


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

Tí Nuevo Testamento cuènte Inchéni Jesucristo C'óna Nquìva **New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	59
SAN LUCAS	96
SAN JUAN	157
LOS HECHOS	203
ROMANOS	255
1 CORINTIOS	276
2 CORINTIOS	297
GALATAS	310
EFESIOS	317
FILIPENSES	324
COLOSENSES	329
1 TESALONICENSES	334
2 TESALONICENSES	339
1 TIMOTEO	342
2 TIMOTEO	348
TITO	352
FILEMÓN	355
HEBREOS	357
SANTIAGO	373
1 PEDRO	378
2 PEDRO	384
1 JUAN	388
2 JUAN	393
3 JUAN	394
SAN JUDAS	395
APOCALIPSIS	397

Tí tan jína chrónka ch'ín Mateo

*Tí sín k'uaxrjeníxin ch'ín Jesús
(Lc. 3.23-38)*

¹ Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham. ² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kichó ch'án. ³ Ch'ín Judá mé it'é tí ch'ín Fares la ko ch'ín Zara la tí iné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram. ⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón. ⁵ Ch'ín Salmón mé it'é tí ch'ín Booz la iné mé tjan Rahab. Ch'ín Booz mé it'é tí ch'ín Obed la iné tí ch'ín Obed mé tjan Rut. Tí ch'ín Obed mé it'é tí ch'ín Isaí. ⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko iné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa. ⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías. ⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acáz la ch'ín Acáz mé it'é tí ch'ín Ezequías. ¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías. ¹¹ Ch'ín Josías mé it'é tí ch'ín Jeconías la ko kichó ch'án. Tí sín a mé k'uéjó sín tí yaon a ntá xrinaḡhya ikui tí sín Babilonia sákjuíko sín tí sín israelita kixin ts'ejóchjina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel. ¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor. ¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud. ¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob. ¹⁶ Ch'ín Jacob mé it'é tí ch'ín José la ch'ín José mé k'óna xii tjan María la jehe tjan María mé iné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrj k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrj k'uaxrjeníxin tí ch'ín David la ntá tí sín Babilonia sákjuíko tí sín israelita chjasén sín la ntá í jnko catorce t'áchrj k'uéjó la ntá kokjíhi Cristo.

*Kokjíhi Jesucristo
(Lc. 2.1-7)*

¹⁸ Tí kokjíhi Jesucristo mé xikihi kónhen. Tí tjan María iné ch'án mé tsotehe tjan ch'ín José. A ntá naxa kuákjahya kichó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios. ¹⁹ Ch'ín José mé tí nkexro ts'óna xii tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehe ch'án tjan kixin tjinkaon ch'án kixin ninkexró tsonohya. ²⁰ Ntá tí naxa tjenkayáxin ch'án kixin xikaha sich'e ch'án ntá kotáchrién ch'án chrónkaxín titaya k'uíkuèn ch'án ikui ijnko ángel kuènte Ìnchéni nixja, chrónka kixin:

—José jaha mé k'uaxrjeníxian David. Tóxakuanhya la ko chrakonhya chrókuákjá tjan María ts'óna ichjián kixin tí xjan tsochónta tjan la kjuachaxin kuènté Nchakuen Dios ikui mé k'óna tí xjan a. ²¹ Sinchekokjíhi tjan ijnko xjan ntoa la its'in xjan Jesús mé xikaha its'in xjan kixin jehe xjan tsjakjin ijié chojni —mé xikaha chrónka tí ch'ín ángel.

²² Kaín tíha kónhen kixin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchro xikihi:

²³ Ijnko tjan naxa chóntahya chojni ntoa mé tsjak'eyá tjan la tsochónta tjan ijnko xjan,

la sinchek'in sín ch'án Emanuel,*
la tíha t'axrjexín kixin Dios tjejókoni. Mé xíkaha chrónka itén Dios.

²⁴ Ntá k'uàya ch'ín José ntá kjuínchexiteyá ch'án tí nkehe k'uętoan tí ángel kuènte Ìnchéni la kuákja ch'án tjan María ts'óna ichjién ch'án. ²⁵ A ntá kjónté xíkaha la naxa kójnkojiéhya sín tí naxa kokjiéhya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjiéxín ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uętuęnen ch'án tí nación a. A ntá xrínahya iso chojni ntoa kjuixín ijnko chjasin nó tjitoxín yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé. ² Ntá kjuanchankí sín kixin:

—¿Nketí tjen tí xjan tsíkokjíhi ts'óna tí rey ts'ętuęnen tí sín judío? K'uíkoxínni tí konotsé kuènte ch'án nó tjitoxín yaon na ntá ó kjuíni kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xíkaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén. ⁴ Ntá tí ch'ín rey k'uętoan kixin síxrakoa kaín tí sín nchát'á t'ętoan la kaín tí sín tjako tí ley la ntá kjuanchankíhi sín ch'án nketí chrókokjiéxín tí nkexro Cristo. ⁵ Ntá jehe sín kjuátehe sín kixin:

—Tsokjiéxín xjan chjasin Belén estado Judea mé xíkaha tsíkjin tí sín tsíchronka itén Dios. Ntáchro xíkíhi:

⁶ Jaha chjasin Belén nonte Judá,
jaha la jehya ijnko chjasin imá ntsí;
kixin tí nonte ts'axrjexín tí nkexro antsí t'ętoan,
la jehe ch'án ts'ayakonhen tí chjasin kuęntana mé chjasin Israel.*
Mé xíkaha nixja itén Dios.

⁷ Ntá imó k'uíyęhe ch'ín Herodes tí sín mago la kjuanchankíhi ch'án sín nkesá kjuankixin k'uíkon sín tí konotsé. ⁸ Ntá chrónka sín ntá tuénxín k'uętoan ch'án kixin sátsji sín chjasin Belén la ntáchro ch'án kixin:

—Sátjirá ntiha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntiha tsotjaha xjan kjuasáya —mé xíkaha k'uętoan ch'ín Herodes.

⁹ Ntá kuínhin tí sín mago tí nkehe k'uętoan tí ch'ín rey ntá sákjuí sín la xík'ikon sín tí konotsé inaá la kjuítaón va ntia la ntá chréhe sín hasta kjuák'e va chrítaón tí nchia tjen tí xjan a. ¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín. ¹¹ La k'uíxenhen sín tí nchia la k'uíkon sín tí xjan kjuák'eko tí tjan María ìné xjan. Ntá k'uéjoxin toch'in sín la chjéhe sín kjuasáya ntá kuakitjehę sín tí nkehe kjuikao sín la kjuanjon sín chica oro la ko ihnti tsochéxin chjincō la ko xroan xraxé náxrjón. ¹² Ntá chr'éxin kotáchrién sín chrónkaxín kixin chrókjanhya sín tí tjen ch'ín Herodes. Méxra kjanxin sín íjnko ntia la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'ín José chrónkaxín titàya k'uíkon ch'án ijnko ángel kuènte Ìnchéni chrónka kixin:

—T'àyá sátsjikoa xjan la ko ìné xjan la sátsjirá chjasin Egipto la ntahó ts'ejorá hasta tsoxrjankajia, kixin tí ch'ín Herodes xritjeyá tí xjan chrók'óyan ch'án xjan —mé xíkaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko ìné xjan la sákjuí sín chjasin Egipto tí tie a. ¹⁵ Ntahó k'uéjó sín hasta ik'uén ch'ín Herodes. Mé xíkaha kónhen kixin tsoxiteyá

* **1:23** Isaías 7.14 * **2:6** Miqueas 5.2

kaín tí nkehe chrónka Ìnchéni, k'uénixja tí sín tsíchrónka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyaha ch'án”.†

Ch'ín Herodes mé k'uetōan its'en xjan

16 A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uetōan ch'án kixin its'en kaín tí chánjan ntoá síin chjasin Belén ó chóna iyó nánó la ko tí xjan naxa chónahya iyó nánó. Mé xikaha k'uetōan ch'án kixin ó xraxinkaon ch'án nkehe kuínhin ch'án chrónka tí sín mago. 17 Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

18 Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkàma tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.‡

Mé xikaha chrónka itén Dios.

19 Ntá tió kjuixin k'uén ch'ín Herodes ntá ijnko ángel kuènte Ìnchéni mé k'uíkonxín ch'ín José kotáchrién ch'án tí kjuák'e ch'án chjasin Egipto mé ntáchro kixin:

20 —T'àyá sátsjikoa tí xjan la ko tí iné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xikaha k'uetōan tí ch'ín ángel.

21 Ntá ch'ín José mé k'uàya ch'án la sákjuíko ch'án tí xjan la ko tí iné xjan la sákjuí sín chjasin Israel. 22 A ntá kuínhin ch'ín José kixin ch'ín Arquelao xjeen ch'ín Herodes mé k'uetōan ch'án tí estado Judea la ntá chrakon ch'án la sáchrókjuihya ch'án ntiha. A ntá kotáchrién ch'án chrónkaxín Dios kixin sáchrókjuí ch'án estado Galilea. 23 Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uéjé sín. Mé xikaha xiteyá tí nkehe tsíchrónka tí sín k'uénixja itén Dios senó. K'uéntáchro sín kixin jehe ch'án mé tsíkítexín sín nazareno.

3

Juan el Bautista mé kjuák'e ch'án nteje (Mr. 1.1-8; Lc. 3.1-9, 15-17; Jn. 1.19-28)

1 A ntá tí yaon a kjuák'e ch'ín Juan Bautista nteje Judea la kjuako ch'án. 2 Ntáchro ch'án kixin:

—Tìtoherá ijíará la tínkírá tí nkehe tjenkayáxinrá kixin í séhya itsi kjuachaxién Dios.

3 Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuènte tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixín Ìnchéni.

Takitjehérá ijnko ntia ntoí.”*

4 Tí iké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko itsjen kotsjenta tónoxín nteje. 5 Itsjé chojni kuixin sín chjasin Jerusalén la ko í so chjasin síin estado Judea la ko chjinaxón tí ntario Jordán kixin tsinhin sín nkexrí tjechrónka ch'án. 6 Ntá chrónka sín ijíé sín ntá ch'ín Juan kuíkítexín ch'án sín tí ntario Jordán.

7 Ntá xrínahya k'uíkon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuènte Dios ó tsi? 8 T'ichjánxin kixin chrók'uejorá jnkójina chrókjuákoxinrá kixin chaxín kjuítóxinhínrá tí nkehe tjenkayáxinrá. 9 Jahará nchehnkerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. 10 Tí chica hacha ó tjechónhen

† 2:15 Oseas 11.1 ‡ 2:18 Jeremías 31.15 * 3:3 Isaías 40.3

tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche. ¹¹ Janhan mé intá tíkítexián chojni kixin tsjakoxin sín kixin ó kjuitoxinhin sín ntíé sín. A ntá tí nkexro itsi chr'éxin mé tsikítexínrá tí Nchakuen Dios la ko xrohi. Antsí tjetóxin t'etōan ch'án a ntá janhan la kánhyó. Méxra chrókósuàna sáchrókjuikian tokaté ch'án. ¹² Jehe ch'án la ó tjexraá ch'án pala sinchetjuáxin ch'án noatrigo kixin tí ntachjiji trigo la ókjé ts'ejo ch'án a ntá tí noatrigo la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochrín —mé xikaha kjuako ch'ín Juan.

Kuikite ch'ín Jesús

(Mr. 1.9-11; Lc. 3.21-22)

¹³ Ntá ch'ín Jesús kjuixín ch'án nó estado Galilea ikui ch'án tí ntarío Jordán tí tjen ch'ín Juan kixin ch'ín Juan tsikite tí jehe ch'án. ¹⁴ A ntá tí saoxín chrohya ch'ín Juan chrókuikite tí ch'ín Jesús ntáchro ch'án kixin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka kixin jeheni chrókuikitia tí jaha —ichro ch'ín Juan.

¹⁵ Ntá kjuátehe ch'ín Jesús kixin:

—A ntá jie la títōhé tí xikaha tjenkayáxian kixin t'ichjánxín tsikiteni kixin sinchexiteyáni tí nkehe k'uetōan Dios.

Ntá ch'ín Juan kuítekaon ch'án la xikaha kjuích'e ch'án. ¹⁶ Ntá tió kuikite tí ch'ín Jesús la ntá xrínahya titàya xitjehe nkajní la k'uikon ch'án tí Nchakuen Dios, éxí kontóá tsjehe, k'uínkajinxín nkaya nkajní ntá kjuák'e chrítaón kja ch'ín Jesús. ¹⁷ Ntá xrínahya kuínhin sín ijnko tan kuixín nkaya nkajní ntáchro kixin:

—Tíhi mé xjanna la imá tjuahá ch'án la imá chàna kixin nchexiteyàna ch'án.

4

Ch'ín Tsochren chrókjuachroe ch'ín Jesús

(Mr. 1.12-13; Lc. 4.1-13)

¹ Ntá tí Nchakuen Dios mé sákjuíko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús. ² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta. ³ Ntá ch'ín Tsochren mé kóchjinehe tí ch'ín Jesús kixin tjinkaon chrókjuachaxín ch'án. Ntáchro ch'án kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ Ntá kjuátehe ch'ín Jesús ntáchro kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tán nixja Dios tjejóchónxin chojni”* —ichro ch'án.

⁵ Ntá ch'ín Tsochren mé sákjuíko ch'ín Jesús tí chjasin tjóá mé chjasin Jerusalén, la sákjuíko ch'án tí chrítaón tí kja nínko a ⁶ la ntáchro ch'án kixin:

—Tí chaxín Xjeen Dios jaha la títōhé t'anótjenxian tí noi ntihi kixin ntáchro xroon itén Dios kixin:

Dios mé ts'etuñhen tí sín ángel kuènte ch'án kixin ts'ayakonhan sín.

Tsotsé sín itjá

kixin tsotéhya totá ts'itja xro tí ts'anótjen†

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuènte Inchéni Dios”‡ —ichro ch'ín Jesús.

⁸ A ntá tió kjuixixín sákjuíko ch'ín Tsochren tí ch'ín Jesús ijnko jna imá noi ntá kjuako tí Jínahya kaín xín tí nación siín chjasintajni la ko tí nkehe t'etōan kuènte. ⁹ La ntáchro ch'ín Tsochren kixin:

* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16

—Kaín tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'ín Tsochren.

¹⁰ Ntá kjuátehe ch'ín Jesús ntáchro ch'án kixin:

—Sátjia Satanás kixin xroon itén Dios ntáchro kixin: “Chrókjuikosáyehé Ìnchéni Dios la jehó ch'án chrókjuich'ehé xra”[§] —ichro ch'ín Jesús.

¹¹ A ntá ch'ín Tsochren mé kuítóhe tí ch'ín Jesús la iso tí sín ángel ikui tsjinkitsa tí jehe ch'án.

*Ch'ín Jesús kjuankixin ch'án tí xra kuènte ch'án estado Galilea
(Mr. 1.14-15; Lc. 4.14-15)*

¹² A ntá ch'ín Jesús mé kuínhin ch'án kixin tí ch'ín Juan mé tjechjina ch'án ntoechiso a, a ntá jehe ch'án mé sákjuí ch'án estado Galilea. ¹³ Kuítóehya ch'án chjasin Nazaret ntiha. Náhí. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabulón la ko estado Neftalí. ¹⁴ Mé xikaha kjuích'e ch'án kixin tsoxiteyá tí nkehe tsíkjin ch'ín Isaías, ijnko nkexro k'uéchrónka itén Dios. Ntáchro ch'án kixin:

¹⁵ Tí estado Zabulón la ko Neftalí tí ntia chrínta ntayaon la tí nó chók'á tjitoxin yaon tí ntarío Jordán, mé tí estado Galilea tí tjejó tí sín jehya judío.

¹⁶ Mé ntiha tjejó tí sín sín tí sítie mé ts'ikon sín ijnko xrohi jíé, la tí sín éxí tsík'en xritjejó sín mé ts'inkaséyanxín ts'ejó sín.

¹⁷ Ntá kjuankixin kjuako ch'ín Jesús ntáchro ch'án kixin:

—Tjitóxinhinrá ntjará. Tsákjára ijnko ntia nixin kixin kjuachaxin kuènte Dios tjen nkaya nkajní la í séhya tsi.

*Ch'ín Jesús k'uíyehé noó chojni k'uétsé koche
(Mr. 1.16-20; Lc. 5.1-11)*

¹⁸ Ntá sákjuí ch'ín Jesús chrínta ntayaon Galilea ntá xrínahya k'uíkon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko íjnko it'in Andrés. Jehe sín mé koche xritsé sín. Ntá tinkák'e sín nchísén chrínkí ntá. ¹⁹ Ntá ch'ín Jesús nixjehe sín ntáchro ch'án kixin:

—Chréhérá tí janhan ntá tsotjahará xra tsjéyará chojni.

²⁰ Ntá tuénxín kuítóhe sín tí nchísén k'uétséya sín koche, ntá sákjuíko sín ch'án.

²¹ Ntá kjínhya kjuíji ch'án ntá k'uíkon ch'án ijnko yaá sín, jnkokoá kichó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabarco la tjejótjonite sín tí nchísén tséya sín koche. Ntá kjaxin tí sín a k'uíyehé ch'ín Jesús. ²² La ntá tuénxín kuítóhe sín tí ntabarco la ko tí it'é sín ntá sákjuíchréhe sín tí ch'ín Jesús.

*Kjuakohe ch'ín Jesús nchónhya chojni
(Lc. 6.17-19)*

²³ Ntá sákjuí ch'ín Jesús nkuíxín tí estado Galilea la kjuakoxin ch'án tí nínko Israel siín jnkoinko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitohe ch'án jína kaín chojni chónka kaín xín chin la ko kaín kjuatjoté. ²⁴ Ntá kaín xín tí sín tjejó tí estado Siria mé kuínhin sín kuènte Jesús la kjuíkəo sín kaín xín tí sín níhi chónka kaín chin la ko tí sín imá tjotéhe sín la ko tí sín chónka nchakuen tí jínahya la ko tí sín t'aniáte sín la ko tí sín síxénká toté sín, la ntá ch'ín Jesús mé kjuínchekitohe ch'án sín jína. ²⁵ Ntá itsjé chojni kjuíchréhe tí ch'ín Jesús, mé kjuixín sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntarío Jordán.

5

Kjuakoxin ch'in Jesús ijnko jna

¹ K'uíkon ch'in Jesús kixin k'uéjé nchónhya chojni la ntá chr'in ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejontaxin sín tí tjen ch'án. ² Ntá ch'in Jesús kjuankíxin kjuakohe ch'án sín kixin:

*Tí nkexro tjejó náxrjón
(Lc. 6.20-23)*

³ —Náxrjón tjejó tí sín nohe kixin t'ichjánxinhin sín nkehe kuente Dios kixin ntá jehe sín mé tsochóna sín tí kjuachaxin kuente Dios.

⁴ 'Náxrjón tjejó tí sín t'ává kixin Dios mé sinchechéhe asén sín.

⁵ 'Náxrjón tjejó tí sín hnkehya asén kixin jehe sín mé ts'áyéhe sín tí nonte tsjanjon Dios.

⁶ 'Náxrjón tjejó tí sín éxí yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkitsa sín kixin ts'áyéhe sín tí nkehe tjinkaon sín.

⁷ 'Náxrjón tjejó tí sín tikonóehé kichó sín kixin ntá Dios kjaxin tsikonóehé tí jehe sín.

⁸ 'Náxrjón tjejó tí sín kótjóá asén kixin ntá jehe sín sátsjik'ikon sín Dios.

⁹ 'Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

¹⁰ 'Náxrjón tjejó tí sín kjónté tjejótjasótexín sín kixin kjuínchexiteyéhe sín Dios kixin ntá jehe sín mé kuente sín nkaya nkajní.

¹¹ 'Náxrjón tjejórá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro sín kixin tinkachónkirá tí janhan. ¹² Chrókócháhará la ko kjuaxróxin chrók'uejorá kixin ntá chr'éxin jahará ts'ayéhérá ijnko nkehe antsí má jina nkaya nkajní. Mé xikaha kjuasóte tí sín k'uéjé ósé k'uéchrónka sín tí itén Dios.

*Jahará la éxí yóhe xijnta la ko éxí xrohi t'inkaséyanxín chjasintajni
(Mr. 9.50; Lc. 14.34-35)*

¹³ 'Jahará mé yóhe éxí xijnta chjasintajni. A ntá tí chrók'uánkéhé tí jní tí xijnta la ntá xitjahya chrókójní inaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

¹⁴ 'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá. ¹⁵ La ko kohya nkexro sinchek'ákjen ijnko lámpara ntá tsjak'e chrínki ijnko ntacajón. Íchá jina tsjak'e ch'án xrohi noi kixin ntá ts'inkaséyanxín kaín nkexro siín tí nchia ntiha. ¹⁶ Mé xikaha tí jahará chrókóyóhará éxí tí xrohi t'inkaséyanxín kixin ts'ikon kaín chojni tí xra jina tjejoch'erá la ntá chrókjuanchehe sín kjuasáyé It'eni tjen nkaya nkajní.

Kjuako ch'in Jesús kuente tí ley

¹⁷ 'Jahará chróntáchrohyará kixin k'uinka kixin tsjakjían tí ley tsík'etoan ch'in Moisés la ko tí nkehe kjuako tí sín k'uéchrónka itén Dios. Náhí. Jehya xikaha k'uinka kixin tsjakjían tíha. Náhí. K'uinka janhan kixin tsjákoxian nkehe chaxín t'axrjexín tíha. ¹⁸ Chaxín xrjanka kixin tí naxa tjen nkajní la ko chjasintajni la kohya ninkehó ley tsjinnya, mé tsjinnya nijnko punto la nijnko letra kuenté tí ley tsjixinjian tsoxiteyá kaín tí nkehe t'ichjánxin tsoxiteyá. ¹⁹ Mé xikaha tí nkexro tsitekakonhya tí nkehe k'uetoan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsi tí kjuachaxin kuente Dios. A ntá tí nkexro tsitekaon la ko tsjakohe ókjé nkexro tsitekaon sín, mé antsí imá ts'etoan sín tí tsi kjuachaxin kuente Dios. ²⁰ Méxra tjonkará kixin t'ichjánxin kixin antsí jina ts'ejorá la tsoyóahyará tí sín tjako ley la ko tí sín fariseo kixin tí tsoyóhará sín la ntá xitjahya tsákjára tí kjuachaxin kuente Dios tjen nkaya nkajní.

*Kjuako ch'in Jesús kuènte tí kjuanínkaon
(Lc. 12.57-59)*

²¹ Jahará tsíkinhínrá kixin tí sín ósé tsík'ítuenhen sín kixin: “T'oyánhyará kichuárá* kixin tí nkexro t'óyán kichó mé t'ichjánxin tsjasóte sín.” ²² A ntá janhan tjonkará kixin jnkojín nkexro tsonínkakonhen kichó mé t'ichjánxin tsjasóte. A ntá tí nkexro t'ántaxínhin kichó la mé tí sín t'etoan mé sinchekitoexín ijíé ch'án. La ntá tí nkexro tsontáche kichó kixin tsixénká ch'án la tíha mé sátsji tsjasótexín tí siín xrohi. ²³ A ntá tí tsjikuehéra Dios nkehe tsochjehéra ch'án ntá tsjasánrá tí altar ntá tsoxráxinkáonrá tí jnkojín kichuárá kjuánjonkoará sín ²⁴ la ntá tí xikaha la títóhéra tí nkehe tí altar la sátsjirá tsonixjehéra ch'án jnkojína kixin í tsokohya kjuanínkaon. La ntá tsjixin la ntá tsjihará tsjánjonrá tí nkehe tjinkáonrá tsjánjonrá.

²⁵ Tí siín jnkojín nkexro tjanchia jie tí jahará la tjinkaon chrókjuikoará ch'án juzgado, a ntá íchá jína jnkokoá chrókjuenkayáxinrá, jehe ch'án la ko jahará, ntia ó, kixin ntá sáchrókjuihyará tí tjen ch'in juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policia kixin ts'ixenhenrá ntoechiso. ²⁶ A ntá chaxín tjonkará kixin tí ts'ikjahará sín ntoechiso la ts'axrjéxinhyará ntiha tsjixinjian tsjenkeherá sín kaín xín chichaon chontará.

Ch'in Jesús kjuako kixin chrókjuasinhya sín jie, chróchóntahya sín chojni chjin ókjé

²⁷ Jahará tsíkinhínrá tí nkehe tsík'ítuenhen tí sín ósé ntáchro kixin: “Chrókjuásinhya jie, chróchóntahyará chojni chjin ókjé.”† ²⁸ A ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

²⁹ A ntá tí ikuan chjina chrókjuásixián jie la chrókuakitsjenkiá ikuan la chróchr'an ikjín kixin íchá jína ts'ítjáyán it'o cuerpo kuéntá kixin jehya kuénté cuerpo kuéntá sátsji tsjasótexín tí siín xrohi. ³⁰ A ntá tí itja chjina chrókjuásixián jie la chróchr'ánjian tí tjá a la chróchr'an ikjín kixin íchá jína ts'ítjáyán it'o cuerpo kuéntá kixin jehya kuénté cuerpo sáchrókjuí tsjasóte tí siín xrohi.

*Ch'in Jesús kjuako kixin chrók'uitjehya kichó sín
(Mt. 19.9; Mr. 10.11-12; Lc. 16.18)*

³¹ Kjaxin tsík'ítuenhen tí sín ósé kixin tí nkexro tjinkaon chrók'uitjíhi ichjién t'ichjánxin ts'óna xroon tsakja tí ichjién kixin ts'itjéxín kichó sín.‡ ³² A ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuítóhe ch'án tjan kixin tsjasin tjan jie. A ntá tí nkexro tsotehe ijnko tjan tsíkítsínkehe la kjaxin ó kjuasin ch'án jie.

Ch'in Jesús kjuako kixin chjiníhya chrók'uákjenxinni ihnié Dios

³³ Kjaxin tsíkinhínrá tsík'ítuenhen tí sín ósé kixin: “T'ichjánxin sinchexiteyará tí nkehe tsíntáchrórá kixin chrók'uákjenxinhyará ihnié Inchéni chjiní.”§ ³⁴ A ntá janhan mé tjonkará kixin chrók'uákjenxinhyará ihnié Dios ninkehó la ko chrók'uákjenxinhyará nkajní kixin ntaha tjen Dios t'etoan. ³⁵ La ko chrók'uákjenxinhyará chjasintajni kixin ntaha tjejókjen toté ch'án la ko chrók'uákjenxinhyará chjasin Jerusalén kixin ntiha la itjen tí Rey t'etoan. ³⁶ La tjenkayáxixínhyará ikjára ó kixin jahará xitjahya tsjakéra ijnko kaxíhi tjóá o nijnko kaxíhi tié. ³⁷ Tí nkehe tsontáchrórá chaxín la chaxín la tí nkehe náhi la náhi la kohya nkehe chrókjuakét'oxinrá chróchronkará. A ntá ichrén nkehe tjakét'oxinrá tsochronkará la táha mé jínahya.

*Ch'in Jesús tjako ch'án kuènte tí sín t'itjáyenhya ichrén kjuanínkaon
(Lc. 6.29-30)*

* 5:21 Éxodo 20.13; Deuteronomio 5.17 † 5:27 Éxodo 20.14; Deuteronomio 23.21 ‡ 5:31 Deuteronomio 24.1-4 § 5:33 Números 30.2; Deuteronomio 23.21

³⁸ Jahará mé ó tsíkinhínrá tsík'ítuenhen tí sín ósé kixin tí takitsjenkí sín ikonrá la kjaxinrá chrókuakitsjenkírará ikon sín. A ntá tí chrókuakitsjenkí sín nènorá la kjaxinrá chrókuakitsjenkírará neno sín kjaxin.* ³⁹ A ntá janhan mé tjonkará kixin tí jnkojín nkexro ichrén nkehe jínahya sit'ahará la jahará ch'ehyará xikaha. Náhí. Tí chjéhe ijnko nkexro ijnko tuāan la ntá tjóka tí í jnko nàngo tuāan. ⁴⁰ La tí síin jnkojín nkexro tjanchia jie la tjinkaon sín chrókuakitsjaha sín camisá la titohe sín sátsjiko sín tí ka t'ínkayate kjaxin. ⁴¹ La tí t'etuānhanrá sín tsámárá nkehe ijnko kilómetro la tjakét'oxinrá í yaá kilómetro. ⁴² Tí jnkojín nkexro tsjanchia nkehe la tí tjinkaon ch'án nkehe la chróntáchrohyará kixin “náhí”, chrókjuinchejenrá ch'án.

*Tjuèhérá tí sín nínkakonhanrá sín
(Lc. 6.27-28, 32-36)*

⁴³ Kjaxin ó tsíkinhínrá tsík'ítuenhen tí sín ósé kixin: “Tjuèhérá tí nkexro choxinrá la tsoninkákonhénrá tí sín jínahya kjuít'ahará.” † ⁴⁴ A ntá janhan mé tjonkará kixin chrótjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjinkakonhya tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya. ⁴⁵ Tí xikaha sich'erá la ntá jahará chaxín xjeen It'éni tjen nkaya nkajní kixin jehe ch'án mé t'etoan ch'án tsjiton yaon ts'inkaséyenhen tí sín jínahya la ko tí sín jína la ko kjaxin t'etoan ch'án kixin ts'aniá ichrin tí síin tí sín jína la ko tí sín jínahya. ⁴⁶ Tí jehó tjuèhérá tí nkexro tjuàhará, ¿la ntá nkehe chrókjuachará? A ntá kjaxin tí sín nchekjènkí la xikaha ch'e sín. ⁴⁷ La tí jehó nixjehérá tí sín kichuárá la ntá, ¿á chaxín imá jína tíha ní? Kixin tí xikaha la kjaxin tí sín chónhya Dios la xikaha ich'e sín. ⁴⁸ Kjaxinrá jahará ntoá chrók'uejorá kixin It'éni tjen nkaya nkajní la antsí má ntoá tjen ch'án.

6

Kjuako ch'ín Jesús kuènté tí xraq jína

¹ Chrókjuásixínhyará kjuaxroan tí nkehe tinkachónkirá kixin tjinkáonrá chrók'uikon chojni ó. A ntá jahará tí xikaha chrókjuich'erá ntá It'éni tjen nkaya nkajní la ninkehó nkehe tsotjáhyará ch'án. ² Tí tjínkitsará ijnko chojni nòa la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xikaha ch'e sín t'óxroan sín nkaxenhen nínko la ko tí ntja kixin chrók'uikon chojni la chrókjuikosáyehe sín tí jehe sín kixin jína tjejóch'e sín. A ntá janhan ntáxrjan kixin ó kjuixin k'uáyéhe sín nkehe la í ts'áyèhya sín inaá. ³ A ntá tí jahará tió chrókjuinkitsará ijnko chojni chaxín nòa la íchá jína kixin chrókónoehya ninkexró kjónté ijnko nkexro tjuá jína. ⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'éni ts'ikon ch'án kixin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

*Tjako ch'ín Jesús nkexrí tsonixjeheni Dios
(Lc. 11.2-4)*

⁵ A ntá tió nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen nínko la ko ts'ejó sín esquina calle kuènte ntsin kixin ts'ikon kaín chojni kixin tjejónixjehe sín Dios. Ntá janhan chaxín ntáxrjan kixin jehe sín la xikaha kjuích'e sín la ó kjuixin k'uáyéhe sín nkehe la í ts'áyèhya sín inaá. ⁶ A ntá tió nixjehérá Dios la t'ixenhénrá nchia ntoará la t'ikjehérá tí puerta la nixjehérá It'éni kixin ntaha tjekoará ch'án. A ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ Ntá tió chrónixjehérá Dios la chrókjateehya chrónixjará kixin chrókóyóahyará éxí tí sín chónhya Dios kixin jehe sín tjenkayáxin sín kixin nchónhya tsonixja sín, la mé xikaha

* 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

mé chrókuinhin Dios, ichro sín. ⁸ A ntá jahará chrókóyóahyará éxí tí jehe sín. It'éni ó nohe ch'án nkehe t'ichjánxínhanrá kjónté naxa tjanchéhyará ch'án. ⁹ Méxra xíkíhi chróntáchrórá:

It'éni tjen nkaya nkajní jaha imá tjóá.

¹⁰ Chrókui tí kjuachaxin kuènta.

Chrókjuich'e tí nkehe tóxrjínhan jaha ntihi chjasintajni éxí tjech'e nkaya nkajní.

¹¹ Ijie la tsjánjuan tí niotja t'ichjánxínhinni.

¹² T'oxíka tí nkehe jínahya kjuich'eni kixin kjaxin jeheni ts'itjáyenhenni tí nkehe kjuich'ehe ni chojni.

¹³ Títóéhyani kixin xrahya chrókjuasinni jie. Nchekaáni kaín tí jínahya chrókónhenni, kixin jaha mé kuèntá tí kjuachaxin kixin ó noheni kixin jaha tjetétoan tí kjuachaxin jnkochrín. Amén.

¹⁴ 'Tí jahará ts'itjáyahanrá tí nkexro kjuasihanrá ichrén jie la mé kjaxin It'éni tjen nkaya nkajní mé ts'ikon ch'án kixin xíkaha kjuich'erá la ntá kjaxin jehe ch'án ts'oxíka ch'án tí jie kjuásinrá. ¹⁵ A ntá tí jahará ts'itjáyahanrá tí jie kjuasihanrá í jnko chojni la ntá kjaxin It'éni tjen nkaya nkajní ts'ikon kixin xíkaha kjuich'erá k'uitjáyahanrá la ntá kjaxin jehe ch'án la ts'oxíkaha ch'án tí jie chontará.

Ch'ín Jesús kjuako kixin chrók'óxroanhya sín kixin kjónehya sín

¹⁶ 'A ntá tí jahará tí naxa kjóntehyará kixin tjinkáonrá tsonixjehérá Dios la ntá chrók'uejohyará éxí t'avará éxí ch'e tí sín jehya jnkójínxón tjenkayáxin sín. Mé xíkaha ch'e sín kixin tjinkaon sín ts'ikon chojni kixin naxa kjónehya sín. Tí xíkaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín ínaá. ¹⁷ A ntá tí jahará kjónté naxa kjóntehyará kixin tjinkáonrá tsonixjehérá Dios la t'ontirá ikonrá la tjéntoárá kjará ¹⁸ kixin tsonoehya chojni kixin naxa kjóntehyará. Jehó It'éni tjekoará ntiha mé jehe ch'án nohe ch'án xíkaha ntá tsjanjon ch'án nkehe ts'ayéhérá.

Tí nkehe chaxín tjete sín nkaya nkajní

(Lc. 12.33-34)

¹⁹ 'Jahará chrókjuásitonhyará nkehe tjete ntihi chjasintajni kixin ntihi la ts'ín kué tí nkehe tjete sinchek'itjáyahanrá va la ko tsochjisen tí chichaon la ko xíchee ts'ixenhen tsaáhará. ²⁰ Íchá jína tjásitonrá tí nkehe tjete nkaya nkajní kixin ntaha kohya iko sinchek'itjayan nkehe la tsochjisenhya tí nkehe la ko kohya xíchee ts'ixenhen tseé. ²¹ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

²² 'Tí ikonrá mé éxí yóhe ijnko xrohi t'inkaséyanxín tí cuerpo kuèntará. Tí jína ikonrá la ntá kjaxin kuenté tí cuerpo kuèntará mé chóna xrohi. ²³ A ntá tí ikonrá la jínahya la ntá kuenté tí cuerpo kuèntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon

(Lc. 16.13)

²⁴ 'Kohya ninkexró tsjacha sich'ehe xra yaá lamó. Tí xíkaha chrókjuich'e ch'án la ntá ijnko tsonínkakohen ch'án la tí í jnko tsotjuèhe ch'án o ijnko la tsitekakohen ch'án la tí í jnko la tsitekakuenhya ch'án. Méxra xitjahya chrókjuich'ehe chojni xra Dios tí tjinkaon sín chróchóna sín itsjé chichaon.

Dios mé t'áyakonhen tí xjeen ch'án

(Lc. 12.22-31)

²⁵ 'A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uítsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuèntará, a ntá kánhyó sínkí tí ka chrók'uítsará? ²⁶ Xráxinkáonrá nkexrí síin tí koxroxé xritjaka. Jehé va la t'enkahya va noa la ko tjáhya va la ko chóntahya va nketí ts'inkachjinayá va tí noa, la kjánchó It'eni tjen nkaya nkajní la tjanjon ch'án nkehe sine va. A ntá jahará mé antsí tjetóan a ntá tí koxroxé la kénhyó. ²⁷ ¿Á tjejó jnkojínrá tjenkayáxinrá kixin tí chrókóxakonhanrá imá a ntá naxá chrók'uankirá it'o metro ntetoxinrá inaá?

²⁸ ¿Nkekuènté kixin imá tóxakonhanrá ikará ó? Tsjehérá nkexrí sí't'ánkí tí catsjo síin nteje. Tí itsjo la ní ch'ehya xra la ko tjonhya. ²⁹ La tjonkará kixin kjónté ch'ín rey Salomón k'uéchón'ta itsjé chichaon la naxá kjuíncheyóehya ch'án nkexrí náxrjón tsjehe tí tsjo a. ³⁰ A ntá tí Dios la nchek'itsa tí ka yoa síin nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuènté títekákonhyará ch'án? ³¹ Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uítsará. ³² Kaín tí nkehe la tí sín chónhya Dios mé tóxakonhen sín tíha. A ntá jahará chontará It'eni tjen nkaya nkajní la mé nohe ch'án kaín nkehe t'ichjánxinhanrá. ³³ A ntá senó mé chrókjuéyará tí kjuachaxin kuènté Dios la chrókjuínchexiteyará tí nkehe jína tjinkaon ch'án, a ntá jehé ch'án mé tsjanjon ch'án kaín nkehe t'ichjánxinhanrá. ³⁴ Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkojnko yaon tjikao kjuaxikaon kuènte.

7

Chrók'uantaxíenhyará kichuára (Lc. 6.37-38, 41-42)

¹ 'Chrókuékahyará ókjé chojni jie kixin ntá Dios kjaxin chrókjuanchahya jie tí jahará. ² A ntá Dios la tsjanchia ch'án jie tí jahará tí tsékará ókjé chojni jie. A ntá tí xikaha sích'erá la mé xikaha tsonhanrá kjaxin. ³ ¿A ntá nkekuènte tsjehé tí chjinínó ntsí tjenkánkí ikon tí kichuá tí naxá ántosán tí inta jie tjenkánkí ikuan? ⁴ A ntá tí chonta jaha tí nta jie tjenkánkí ikuan, ¿a ntá nkexrí kixin chróntáche tí kichuá kixin: "Títohé tsakitsjenkíni tí chjinínó ntsí tjenkánkí tí kuan?" ⁵ A ntá jaha la ntoáhya tjenkayáxian. Senó chrókuakitsjenkiá tí nta jie tjenkánkí ikuan kixin ntá chrók'uikuan tsakitsjenkiá chjinínó ntsí tjenkánkí ikon tí kichuá.

⁶ 'Chróchjeéhyará tí nkehe tsíkótjóá tí konja kixin jehé va tsokjan va tsonínkakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjeje kixin tsinkátja va la tsokuen.

Tjanchia la tjéyá la t'inka puerta (Lc. 11.9-13; 6.31)

⁷ 'Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe. ⁸ Kixin tí nkexro tjanchia nkehe la ts'áyéhe tí nkehe la tí nkexro tjejá nkehe la ts'itja la tí nkexro t'inka puerta la tsoxitjehe.

⁹ ¿Á tjejó jnkojín nkexro ntíhi chrókjuanjón xro chrókjóné xjeen tí chrókjuanchia xjan niotja? Kja náhí. ¹⁰ O tí chrókjuanchia xjan ijnko koche la, ¿á chróchjehe ch'án tí xjeen ch'án konche chrókjóné ní? Kja náhí. ¹¹ A ntá jahará kjónté jínahyará la ó nohará nkehe jína chjehérá xjaanrá. A ntá It'eni tjen nkaya nkajní kjaxin antsí tsochjehe ch'án nkehe jína tí nkexro tsjanchia nkehe.

¹² 'Méxra xikaha chrókjuíkosáyehérá kichuára éxí yóhe nkexrí tjinkáonrá chrókjuíkosáyahará sín mé xikaha k'uetóan ch'ín Moisés la ko xikaha ntáchro tí xroon kuènte tí sín k'uéchónka itén Dios ósé.

*Tí puerta tekahya**(Lc. 13.24)*

¹³ T'ixeenxínrá tí puerta tekahya. Kíxin tí puerta la ko tí nt̄ia ts'itjáyaxín chojni la imá iton la ko teka la nchónhya chojni sátsji tí nt̄ia ntiha. ¹⁴ A ntá tí puerta la ko tí nt̄ia sátsjixinni tí kjuachón la tekahya ntiha la ko tsjéhya chojni ts'itja tí nt̄ia a.

*Tí to mé tjáts̄oanxínni tí nta**(Lc. 6.43-44)*

¹⁵ Méxra tókakonhanrá tí ts'ikonrá itsi tí sín ch'ia tsontácho sín kíxin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jiehe. ¹⁶ Jahará la chrókjuáts̄oanxínrá tí jehe sín kíxin tí xra ch'e sín kíxin tí ntach'j̄ la xitjahya chrók'óna to uva la ko tí kach'j̄ xitjahya chrók'óna to higo. ¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína. ¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. ¹⁹ Kaínxín tí nta t'ónahya to jína mé tsochrínjin la tsoche. ²⁰ Mé xikaha chrókjuáts̄oanxínrá jahará tí sín jehya jína kíxin tí xra tjejóch'e sín.

*Jehya kaín chojni ts'ixenhen tí kjuachaxién Dios tjen nkaya nkajní**(Lc. 13.25-27)*

²¹ Kénhya chojni tsontácho: “Ìnchéni, Ìnchéni”, mé ts'ixenhen sín tí kjuachaxién Dios tjen nkaya nkajní. Náhi. Jehó tí nkexro sinchexiteyá tí nkehe tóxrjínhin T'aná t'et̄oan tjen nkaya nkajní. ²² Tsjixraká tí yaon a la ntá itsjé sín tsontácho sín kíxin: “Ìnchéni, Ìnchéni, k'uénixjaxínni ihniá la ko tí ihniá mé kuakitsjexínni nchakuen tí jínahya la ko kjuachaxién ihniá kjuasixínni nchónhya kjuaxroan.” ²³ A ntá janhan tsjataha kíxin: “Janhan la chonhya tí jahará. T̄it̄onará sátsjirá kíxin jahará imá jínahyará.”

*Ch'ín Jesús kjuíncheyóexin ch'án kíxin yaá nchia**(Lc. 6.47-49; Mr. 1.22)*

²⁴ Méxra tí nkexro tinhin tí nkehe ntáxrjan la titekaon ch'án la jehe ch'án mé éxi yóhe ijnko nkexro chóna kjuaxrexinkaon jína la kjuích'éna nchia chrítaón tjo. ²⁵ A ntá xrínahya xrakoa chrin, ikui yeé nt̄aninche la tjan chjéhe xr̄into la kjónté xikaha la xikahya tí nchia kíxin itj̄o t̄jekjen nchia. ²⁶ A ntá tí nkexro tinhin tí xrjanka la titekakonhya mé jehe la éxi yóhe ijnko nkexro l̄ontj̄ la kjuích'éna ch'án ijnko nchia tí siín nchesen. ²⁷ La ntá xrínahya xrakoa chrin ntá ant̄sí kóyeé nt̄aninche tí tsaka la ko chjéhe xr̄into la ntá xika tí nchia, la ijnko kjuachrakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kíxin nkexrí kjuako ch'án. ²⁹ Kíxin kjuako ch'án éxi ijnko nkexro chóna imá kjuachaxin la tóyóehya ch'án tí sín maestro kjuako tí ley.

8*Ch'ín Jesús kjuínchekitohe jína ijnko chojni chóna chin lepra**(Mr. 1.40-45; Lc. 5.12-16)*

¹ A ntá ch'ín Jesús k'uínkajinxin ch'án tí jna la chréhe nchónhya chojni. ² La ntá kóchjina ijnko ch'ín níhi chóna chin lepra la kjuák'exín toch'in ch'án nkayakon ch'ín Jesús la ntácho ch'án kíxin:

—Ìnchéni tí tjinkávan la jína chrókjuínchekitohéni jína —ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntácho ch'án kíxin:

—Méxra xikaha tjínkavan. Ntá jie sintakitoha jína.

A ntá tuénxín kuítóhe ch'án jína la ó kjuìn tí chin k'uéchóna ch'án.

⁴ La ntá ntácho ch'ín Jesús kíxin:

—Ninkexró chenkahya ntihi. Jehó sáttja tjákohé tí ch'ín nch'at'á kixin kuítóha jína la ko sáttjioa tí nkehe tsík'etóan ch'ín Moisés* kixin ntá xíkaha tsonoxín kaín xín chojni kixin ó kuítóha jína —mé xíkaha k'uetoan ch'ín Jesús.

*Ch'ín Jesús kjuínchekitohe jína ijnko nkexro ch'ehe xrá ijnko capitán romano
(Lc. 7.1-10)*

⁵ A ntá tió k'uixenhen ch'ín Jesús chjasin Capernaum la ntá xrínahya kóchjina ijnko capitán romano la chrónòa ch'án ⁶ ntáchro ch'án kixin:

—Ìnchéni ntóeni itjen ijnko ch'ín ch'eheeni xrá mé níhi ch'án, tjetsínka ch'án, tsík'en toté ch'án la imá tjetéhe ch'án —ichro ch'án.

⁷ A ntá ch'ín Jesús kjuátehe ch'án ntáchro ch'án kixin:

—¿Á sátsjia sintakitóha jína tí ch'ín a? —ichro ch'án.

⁸ Ntá tí ch'ín capitán kjuátehe kixin:

—Náhi, Ìnchéni, tósuèheni kixin chrók'uixenhen ntóeni kixin jehya chojni jínani. Jehó chrókjuánjuan kjuachaxin kuéntá, ntá tí ch'ín ch'eheeni xrá chrókuítóhe ch'án jína. ⁹ Janhan na kjaxin chonta chojni t'etuanna la ko kjaxin janhan tétuannahán tí sín soldado. Tió tétuannahán ijnko sín sátsji sín la ntá ó sátsji sín. La kjaxin tió tétuannahán ijnko sín kixin xrakoa sín la mé tji sín. La ko tió tétuannahán ijnko nkexro ch'ena xrá kixin sich'e xrá la ich'e xrá —ichro ch'án.

¹⁰ Ntá kuínhin ch'ín Jesús ntá kóxakonhen ch'án kixin xíkaha chro tí ch'ín a, ntá nixjehe ch'án tí sín chréhe ch'án ntáchro ch'án kixin:

—Chaxín ntáxrjan kixin kuenté tí nación Israel la k'uitjahya janhan ninkexró tinkáchónki xíkaha éxí tinkáchónki tí ch'ín i. ¹¹ Janhan xrjanka kixin nchónhya chojni ókjé tjixin tí tjitoxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuente Dios. ¹² A ntá itsjé tí sín chrók'uejó tí tjen tí kjuachaxin kuente Dios la ts'axrjexín sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'ín Jesús mé nixjehe ch'án tí ch'ín capitán ntáchro ch'án kixin:

—Sáttja ntóa. Éxí kuítekávan jaha la tsoxiteyá tsonhen tíha —ichro ch'án.

La ntá tí ch'ín ch'e xrá la o tuénxín tí hora a tsíkitohe ch'án jína.

*Ch'ín Jesús kjuínchekitohe ich'ee ch'ín Pedro jína
(Mr. 1.29-31; Lc. 4.38-39)*

¹⁴ A ntá sákjuí ch'ín Jesús tí ntóe ch'ín Pedro la ntaha k'uíkon ch'án kixin tí ich'ee ch'ín Pedro la níhi tjan tjetsínka tjan la chóna tjan sóa. ¹⁵ Ntá itsé ch'án itja tjan la ntá kjuínhin tjan tí sóa la ntá k'uínkatjen tjan la kjuankixin yaxínhin tjan kixin tsjanjon tjan nkehe sine sín.

*Ch'ín Jesús kjuínchekitohe nchónhya tí sín níhi jína
(Mr. 1.32-34; Lc. 4.40-41)*

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrjexín tí nchakuen tí jínahya tí jehe sín la kjaxin kjuínchekitohe ch'án jína kaín tí sinníhi. ¹⁷ Mé xíkaha kjuích'e ch'án kixin tsoxiteyá tí nkehe tsíchrónka tí ch'ín Isaías tí ch'ín k'uéchrónka itén Dios. Mé ntáchro ch'án xíkahi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”† Mé xíkaha ichro itén Dios.

*Tí sín tjínkaon tsochréhe tí ch'ín Jesús
(Lc. 9.57-62)*

* 8:4 Levítico 14.1-32 † 8:17 Isaías 53.4

¹⁸ Tió k'uikon ch'ín Jesús kixin nchónhya chojni k'uántatjen sín ch'án la ntá k'uetōan ch'án kixin ts'átōye sín í jnko chrínta ntá. ¹⁹ La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

—Maestro tjinkaonni chróchréheni tí jaha kjónté nketí tjinkávan sátsjia —ichro tí ch'ín a.

²⁰ La ntá kjuátehe ch'ín Jesús ntáchro ch'án kixin:

—Tí koxróntá chóna va itjueé va la ko tí koxroxé chóna va káké va. A ntá tí Xjeen Dios K'óna Chojni mé chónahya nketí ts'ok'èxin ch'án.

²¹ A ntá ijnko tí chojni k'uájiko ch'án, mé ntáchro ch'án kixin:

—Ínchéni, tītōhéni senó sátsjikjaváni it'éni —ichro ch'án.

²² La ntá kjuátehe ch'ín Jesús ntáchro ch'án kixin:

—Náhi, chréhé tí janhan. Tītōhé kixin tí chojni tsík'en la jnkokón sín tsík'en tsjavá kichó sín —mé xikaha ichro ch'ín Jesús.

Ch'ín Jesús kjuínchek'ixrata tí xrinto la ko tí ntá

(Mr. 4.35-41; Lc. 8.22-25)

²³ Ntá ch'ín Jesús k'uixenhen tí ntabáro la k'uixenko ch'án tí sín k'uájiko ch'án. ²⁴ La ntá xrinahya imá síchrica ntá la ó chjina sítikia ntá tí ntabáro. La kjánchó ch'ín Jesús la tjeua ch'án. ²⁵ La ntá tí sín k'uájiko ch'án kjuínchek'àya sín ch'án la ntáchro sín kixin:

—Ínchéni nchekaáni kixin tí ntabáro la ó meró ts'aniánki ntá —ichro sín.

²⁶ Ntá kjuátehe ch'án ntáchro ch'án kixin:

—¿Nkekuènté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xikaha ntá k'uàya ch'án la k'uetuēhen ch'án tí xrinto la ko tí ntayaon la ntá tuénxín k'uixrata. ²⁷ La ntá imá chrakon sín la ntáchro sín kixin:

—¿Xá nkexro tíhi? Kjónté xrinto la ko ntayaon la mé nchexiteyéhe ch'án —ichro sín.

Tí sín chóna nchakuen tí jínahya tí nonte Gadara

(Mr. 5.1-20; Lc. 8.26-39)

²⁸ Ntá tió k'uátōye ch'ín Jesús tí ntayaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrjexín tōyé chojni tsík'en la kóchjinehe sín ch'án. Jehé sín mé imá jiehe sín la kohya ninkexró tjacha ts'atsínka tí ntia ntiha. ²⁹ La ntá kjuankíxin k'óyako sín ntáchro sín kixin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kixin sinchekjasóteni kjónte naxá kjuixrakáhya tí yaon tsjasóteni? —ichro sín.

³⁰ A ntá ntiha kánhyó kjín síin itsjé cochíno xrine va. ³¹ La ntá tí nchakuen tí jínahya mé chrónóehe tí ch'ín Jesús kixin:

—Tí tsétōan kixin sátsjini la chrókjuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kixin:

—Tí xikaha la sátsjia —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajinxín va ntiha kjuítsínkayá va tsaka, ntá kjuítsínkankí va ntá, kjuínhin va ntá.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchóna tí nchakuen tí jínahya. ³⁴ A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uikon sín kixin xikaha tsíkónhen la chrónóehe sín ch'án kixin sáchrókjui ch'án ókjé.

9

Ch'ín Jesús kjuínchekitohe jína ijnko chojni tsík'en toté
(Mr. 2.1-12; Lc. 5.17-26)

¹ La ntá kjuixin tíha ntá ch'ín Jesús mé k'uixenhen ch'án ijnko ntabárcō la k'uátsínka ch'án í jnko lado chrínta ntā la kjuíji ch'án chjasén ch'án. ² A ntá ntiha kuikao sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kíxin chaxín tinkáchónki sín ch'án la ntá nixjehe ch'án tí sinníhi ntáchro ch'án kíxin:

—Xjeenni nchechéhé asán. Tí jie chonta la ó kjuixin kjuínhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kíxin:

—Tí ch'ín i mé ncheyóhe ch'án asén ch'án Dios kíxin xikaha nixja ch'án.

⁴ Ntá ch'ín Jesús mé ó nohe ch'án kíxin nkehe tí kjo sín asén sín ntá ntáchro ch'án kíxin:

—¿Nkekuénté kíxin xikaha jínahya tjenkayáxinrá? ⁵ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kíxin ó kjuixin kjuínhan ch'án tí jie yámá ch'án o á antsí xrahya chróntátjan ch'án kíxin chrók'uínkatjen ch'án sáchrókjui ch'án? ⁶ Méxra tsjákoxian kíxin tí Xjeen Dios K'óna Chojni mé ntihi chjasintajni chóna kjuachaxin tsjakjínhan ijie chojni.

Ntá ntáche ch'án tí sinníhi a kíxin:

—Ijie la t'inkatjen tjatsíyan kaniāa na sátsjia ntoā —ichro ch'án.

⁷ Ntá tí ch'ín tsík'en toté na tuénxín k'uínkatjen ch'án la sakjuí ch'án ntoe ch'án. ⁸ Ntá kaín tí sín siín ntiha k'uíkon sín kíxin xikaha kónhen la imá chrakon sín la kjuanchehe sín Dios kjuasáya kíxin tí nkexro imá kjuakoxin ch'án kjuachaxin kuénte Dios.

Ch'ín Jesús k'uíyehē ch'án tí ch'ín Mateo
(Mr. 2.13-17; Lc. 5.27-32)

⁹ A ntá ch'ín Jesús sákjuixin ch'án ntiha la k'uíkon ch'án ijnko ch'ín it'in Mateo tjetjāxin ch'án ntiha nchekjènkī ch'án. Ntá ntáchro ch'ín Jesús kíxin:

—Chréhé tí janhan —ichro ch'án.

Ntá ch'ín Mateo tuénxín k'uínkatjen ch'án chréhe ch'án tí ch'ín Jesús.

¹⁰ A ntá chr'éxin ch'ín Jesús kjuák'e ch'án ntoe tí ch'ín Mateo la ntaha xranjon nkehe sine ch'án la ntá itsjé tí sín nchekjènkī la ko í so sín chóna jie mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án. ¹¹ La ntá tí sín fariseo kjaxin k'uíkon sín xikaha la kjuanchankíhi sín tí sín k'uájiko ch'ín Jesús, ntáchro sín kíxin:

—¿Nkekuénté kíxin tí ch'ín maestro kuéntará mé neko ch'án tí sín nchekjènkī la ko tí í so sín chóna jie? —ichro sín.

¹² Ntá ch'ín Jesús la kuínhan ch'án nkehe tí tjo sín la ntáchro ch'án kíxin:

—Tí sín níehya la t'ichjánxienhya sín nkexro sich'e xroān. Náhí. Jehó tí chojni níhi mé t'ichjánxinhin sín nkexro sich'ehe sín xroān. ¹³ Sátjirá la ts'ítjará nkexrí t'axrjexín tí nkehe ntáchro xroon itén Dios. Mé ntáchro kíxin: “Janhan tjínkavan kíxin chrókuikonóhéhérá chojni la tjínkakhya kíxin chrók'oyánrá iko chrókjuánjonrá.”* Mé xikaha ichro itén Dios. Janhan na k'uinkahya ntihi kíxin chrók'uíyaha chojni jína tjejó. Náhí. K'uinka kíxin ts'íyaha tí chojni chóna jie kíxin chrókuítóhe sín tí ijie sín ntá chrókjuinkí sín tí tjenkayáxin sín —ichro ch'án.

Kjuanchankí sín kuénte tí nehya sín
(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kíxin:

—Jeheni la ko tí sín fariseo la jnkoyaxon nehyaní, a ntá tí sín xrikoá la, ¿nkekuénte xikahya ch'e sín? —ichro sín.

¹⁵ Ntá kjuátehe ch'ín Jesús, ntáchro ch'án kíxin:

* 9:13 Oseas 6.6

—¿Xá chrók'uává kaín tí sín tsík'íyehé sín tsochjina tsoṭehé ijnko chojni ḱixin naxa tjen tí ch'ín tsíkóṭehé tjejóko sín ntiha? A ntá tsjixraká ijnko yaon tsotsé sín tí ch'ín tsíkóṭehé sátsjiko sín ch'án ntá kaín tí sín tsíkóchjina mé ts'ává sín la í sinehya sín.

¹⁶ Nijnko chojni chrókjuak'eniehe tí ka ó ntaxin it'o ka nixin ḱixin ntá chrókjuixéhe tí ka nixin chrók'uitjjan tí ka ntaxin ntá antsí má chrók'uichje. ¹⁷ La ko kjaxin éxí yóhe chrókuiqiahya chojni xranvino nixin ijnko tjuaxran ó ntaxin ḱixin tí xikaha chrókjuich'e sín ntá chrók'uichje ti tjuaxran ntaxin. Ntá chrók'uitjyan tí xran la ko chrok'uitjyan tí tjuaxran. Ntá tí xranvino nixin chrókuikia ijnko tjuaxran nixin la ntá xikaha la yóí nkehe chrók'uitjyanhya.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitohe jína ijnko tjan kuákóxin iké ch'án

(Mr. 5.21-43; Lc. 8.40-56)

¹⁸ Ntá naxa tjenixja ch'ín Jesús la ntá ikjui ijnko ch'ín t'etoan kuènte tí sín judío la kjuák'exín toch'in ch'án nkayakon tí ch'ín Jesús la chrónóehé ch'án ḱixin:

—Tí xjanna na ntá kjuixin k'uén. Xrjanóaha sáchrókuini chrókjuakétja tjá jehe tjan ntá chróxechón tjan —ichro ch'án.

¹⁹ Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uájiko ch'án. ²⁰ A ntá itjen ijnko chojni chjin níhi tjan, ó teyó nánó chónṭa tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án ²¹ ḱixin tjenkayáxin tjan ḱixin kjónté chrínta iké ch'án ó chrókuákóxin tjan, la táhó chrókuítóexín tjan jína. ²² Ntá nkátjía ch'ín Jesús la k'uíkon ch'án tí tjan a ntá ntáchro ch'án ḱixin:

—Xjeenni, nchechéhé asán jaha. Jaha la ó kuítóha jína ḱixin kuítekávan tí janhan —ichro ch'án.

Na ntá tuénxín ó kuítóhe tjan jína.

²³ Ntá tió kjuíji ch'ín Jesús ntoe tí ch'ín judío t'etoan la k'uíkon ch'án ḱixin ó yaxínhin tí sín músico ḱixin ó sátsjixravá xjan. La kaín tí chojni tsíkójnkotsé la tsjánkama sín xjan. ²⁴ La ntá ntáchro ch'ín Jesús ḱixin:

—Tí xjan méhe títóherá, ḱixin tsík'enhya xjan, la tjejua xjan ó —ichro ch'an.

Ntá kjuanoá sín ch'án. ²⁵ A ntá tí k'uaxrje kaín chojni la ntá ch'ín Jesús la k'uíxenhén ch'án la itsé ch'án itja tí tjan a la ntá tuénxín k'uínkatjen tjan. ²⁶ Ntá kuenté chjasin ntiha la kuínhin sín ḱixin xikaha kónhen.

Ch'ín Jesús kjuínchekitohe jína yaá sín t'ikonhya

²⁷ Ntá sákjuíxin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehé sín ch'án ntáchro sín ḱixin:

—Tikonóehéni jaha tsík'axrjeníxian David.

²⁸ Ntá k'uíxenhén ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án ḱixin:

—¿Á títekávan ḱixin tsjácha sít'a xikaha? —mé xikaha kjuanchankí ch'án.

Ntá kjuátéhe sín ḱixin:

—Jeén, Ìnchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án ḱixin:

—Tí xikaha kuítekávan la tsoxiteyá —mé xikaha ichro ch'án.

³⁰ La ntá tuénxín ó jína t'ikon sín. Ntá ch'ín Jesús k'uetuēnhen sín ch'án ḱixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jína ijnko ch'ín nósin

³² Tió sákjuí tí sín k'uék'ikonhya, a ntá iso chojni kjuikao sín ijnko ch'ín nósin ch'án la chóna ch'án nchakuen tí jínahya. ³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankíxin nixja ch'án. Ntá kaín chojni la k'uíkon sín la ntáchro sín kíxin:

—Nunca t'ikonhyéni ijnko kjuaxroan xikaha kuenté tí nación Israel —ichro sín.

³⁴ A ntá tí sín fariseo ntáchro sín kíxin:

—Tí nkexro t'etuenhen tí nchakuen tí jínahya tsíkjanjon kjuachaxin mé xikaha takitsje tí ch'ín i tí nchakuen tí jínahya —mé xikaha ichro sín.

Ch'ín Jesús kuikonóehē ch'án chojni

³⁵ Ntá k'uátsínka ch'ín Jesús itsjé chjasin jié la ko chjasin ntsí la kjuakoxin ch'án jnkojnko njnko Israel. Chrónka ch'án tí tan jína nkexrí tjen tí kjuachaxin kuènte Dios. La ntá kjuínchekitohe ch'án jína chojni níhi chóna kaín xín chin la ko chojni chóna kjuatjoté.

³⁶ K'uíkon ch'án kíxin nchónhya chojni k'uéjé sín ntá kuikonóehē ch'án sín kíxin imá tóxakonhen sín la k'uéjé sín éxí kolélo chónahya nkexro t'ayakonhen. ³⁷ Ntá ntáche ch'án tí sín k'uájiko ch'án kíxin:

—Chaxín ntáxrjan janhan kíxin imá tsík'óna, kjánchó chojni sich'e xra mé tsjéhya.

³⁸ Chrókjuancheherá tí lnché tí nonte kíxin chróchr'án ch'án itsjé chojni chrókjuich'e xra —mé xikaha ichro ch'ín Jesús.

10

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuenhen asén chojni la ko sinchekitohe sín jína kaín chojni chóna kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo. ³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkj la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo. ⁴ La ko kjaxin ch'ín Simón, mé kuènte tí sín cananista, la ko kjaxin ch'ín Judas Iscariote, mé tí nkexro chr'éxin kjuínchekji tí ch'ín Jesús.

Ch'ín Jesús k'uetuenhen tí teyó sín kíxin sátsjikjako sín kjuachaxin kuènte Dios

(Mr. 6.7-13; Lc. 9.1-6)

⁵ Ntá k'uetuenhen ch'ín Jesús tí teyó sín kíxin sátsji sín la k'uetjan ch'án kíxin:

—Tjéhýará tí tjejó tí sín jehya judío la ko t'ixeenhyará tí chjasin siín estado Samaria.

⁶ Náhí. Íchá jína sátsjirá tí tjejó tí chojni éxí kolélo kjuíchroē kuènte nación Israel. ⁷ Sátsjirá tjácohérá sín kíxin kjuachaxién Dios tjen nkaya nkajní la í séhya tsi. ⁸ Sínchekitohérá jína chojni níhi la ko sínchekitohérá jína tí sín chóna chin lepra la ko sínchexechónrá chojni tsík'en la takítsjerá tí nchakuen tí jínahya. Jahará kjaxin kuítõhanrá tí kjuachaxién Dios, méxra chrókjuachahýará jahará kjaxin.

⁹ Chrókjuikuahýará ninkehó chichaon oro la ko ninkehó chichaon plata la ko ninkehó chichaon cobre ¹⁰ la ko tí sátsjirá ntja la chrókjuikuahýará ka bolsa la chrókjuikuahýará yaá ka chrók'uínkayaterá la ko chrókjuankahýará tokatárá la ko chrókjuikuahýará nta tjíxinrá. Tí nkexro ch'e xra la jehí siín kjuachaxin ntiha chrókjónē.

¹¹ A ntá tió tsjasánrá ijnko chjasin jié o ijnko chjasin ntsí la tjéýará ijnko nkexro tsjanjon kjuachaxin la ntõē sín ntahó chrókuítóhará ntá tsjixin tí xra ntá sátsjirá. ¹² A ntá tió t'ixenhénrá ntõē sín la nixjehérá sín tjákoxinrá jnkojína. ¹³ A ntá tí chaxín jína asén sín la ts'áyehē sín tí kjuaxróxin, a ntá tí náhi la sátsjikorá tí kjuaxroxin. ¹⁴ A ntá tí tsochrohya sín tsjanjon sín kjuachaxin tsitõhará la tjinkakonhya sín tsinhin sín tí nkehe

tsochronkará na mé t'axrjéxinrá tí ntoe sín o tí chjasén sín la t'oxènjínrá tí inche chóna totará. ¹⁵ A ntá chaxín tjonkará kixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchóna sín jie la kánhyó tsjasóte sín, a ntá tí sín chjasin a la antsí tsjasóte sín kixin k'uéjóróxinhya sín tí tan chrókuaáxin sín.

Ókjé sín tsonínkakohen tí sín kuènte Cristo

¹⁶ 'Janhan tsochr'an tí jahará éxí yóhe chróchr'an kolélo ts'ejóyakjan kolóbo. Listo chrók'uejorá éxí konche xikaha la chrók'uejorá éxí kontóá chrókójiyahyará. ¹⁷ Chrókóxakonhanrá kixin itsi chojni tsotsé sín tí jahará la sátsjikoará sín tí tjejó tí sín t'etoan la ko nkaxenhen tí ninkoé sín tsjatiaxínrá sín. ¹⁸ La ntá tsjikaánrá sín tí tjejó tí sín t'etoan la ko tí siín tí sín rey kixin tinkachónkirá tí janhan. Ntá jína tsochronkará kixin tinkachónkirá tí janhan nkayakon tí jehe sín la ko nkayakon tí sín chónhya Dios. ¹⁹ A ntá tió sátsjikoará sín tí tjejó tí sín t'etoan la tóxakuanhyará nkehe tsontáchrórá o nkexrí tsonixjará kixin tió tsjixraká tí hora la ntá Dios mé tsjinkitsará tsonixjará. ²⁰ Kixin jehya jahará tsonixjará. Náhí. Tí Nchakuen It'eni mé tsochrónka nkehe tsonixjará.

²¹ 'Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsonínkakohen tí it'é kixin its'en. ²² Kaínxín chojni chjasintajni tsonínkakohenrá sín kixin tinkachónkirá tí janhan. A ntá tí nkexro tsítóehya tsinkáchónki sín tí janhan hasta tsjéje chjasintajni mé tsaá. ²³ Tió má chónkíhará sín ijnko chjasin la ntá sátsjirá í jnko chjasin. La ntá chaxín tsoxrjanka kixin tí Xjeen Dios K'óna Chojni mé tsokjan tí naxa tjixinhya ts'atsínkará kaín tí chjasin Israel.

²⁴ 'Tí nkexro xrakohé la kánhyó tjeoan la tí maestro la antsí tjeoan, la ko kjaxin tí nkexro ch'e xra la tjeoanhya la antsí tjeoan tí lamo. ²⁵ A ntá tí nkexro xrakohé chrókjuakoxin ch'án éxí tí nkexro kjuakohé ch'án la ko tí nkexro ch'e xra chrókjuakoxin ch'án éxí tí lámóé ch'án ch'ehe ch'án xra. Tí ch'in inché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

*Nkexro tí chróchrakonhénrá
(Lc. 12.2-9)*

²⁶ 'Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin. ²⁷ Tí nkehe tjonkará sítié la t'ichjánxin tsochronkará tió itsi xrohi t'inkaséyanxín tí yaon. La ko tí nkehe tjonkará ijie ninkexró noehya la t'ichjánxin chronkará chrókuinhin kaín sín. ²⁸ Chróchrakuénhyará tí sín t'óyán cuérpoé chojni kixin asén chojni xitjahya ts'óyán sín. Íchá jína chróchrakonhénrá tí nkexro tsjacha sinchek'itjáyanxín cuérpoé chojni la ko asén chojni tí xrohi ts'ankahya.

²⁹ '¿Á chrókóxixinhya yaá koxroxé ntsínsí ijnko chichaon ntsí? A ntá kjónté xikaha la chrók'uánótjenhya nijnko tí jehe va nonte tí chrókjuanjonhya It'eni kjuachaxin. ³⁰ A ntá kjónté tí kaxihí chóna ikjára la ó nohe ch'án nkekjaín ka chontará. ³¹ A ntá jahará chróchrakonhyará kixin tóyóahyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

*Tí sín tósuèhya tsochrónka sín kixin tinkáchónki sín Cristo nkayakon chojni
(Lc. 12.8-9)*

³² 'Kaín tí chojni tsochrónka kixin tinkáchónkina sín nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajní. ³³ A ntá tí nkexro sinchemána tsontáchró sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

*Jnkokoáhya tsjenkayáxin chojni kixin ó kui Inchéni Jesús
(Lc. 12.51-53; 14.26-27)*

³⁴ 'Tjenkayáxinhyará kixin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Tsjanjonko kichó chojni kixin k'uinka janhan. ³⁵ Janhan

k'uinka kixin tsonínkakonhen chojni it'é, la ko tí xjeen sín chjin mé tsonínkakonhen ìné, la ko tí tikinta tsonínkakonhen ich'ee. ³⁶ Mé xikaha tí sín tsonínkakonhen kichó la mé tí sín naxa kjéhya sín.

³⁷ A ntá tí nkexro antsí tjuèhe it'é sín la ko ìné sín la kánhyó tjuèhe tí janhan la mé xitjahya ts'óna sín kuèntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuèntana. ³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuèntana. ³⁹ Tí nkexro tjinkaon kixin kohya nkehe chrókónhen sín mé ts'itjayan sín, a ntá tí nkexro chrókjuinchek'itjayanxín asén kixin tinkáchónki sín tí janhan la mé tsaá sín.

Tí nkexro ts'áyéhe nkehe

(Mr. 9.41)

⁴⁰ Tí nkexro chrókjuanjon kjuachaxin chrók'uejorá la mé éxí chrók'uáyéhe sín tí janhan la ko tí nkexro chrók'uáyéhe tí janhan la éxí yóhe chrók'uáyéhe sín tí nkexro ichr'ánna k'uinka. ⁴¹ La tí nkexro chrókjuanjon kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nkexro kjuako. La ko tí nkexro chrókjuanjon kjuachaxin tsjak'e ijnko chojni jina kixin jina ch'án mé xikaha ts'áyéhe sín nkehe éxí ts'áyéhe tí nkexro jina. ⁴² A ntá tí nkexro sinchekitonhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jina kixin xikaha kjuích'e ch'án.

11

Ch'ín Juan Bautista k'uetuèhen iso sín

(Lc. 7.18-35)

¹ Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuixin ch'án ntiha la sákjuíkjako ch'án iso chjasin chjinaxón ntiha.

² A ntá ch'ín Juan mé tjechjina ch'án ntoechiso ntá xrínahya kuínhin ch'án nkerí xra tjech'e Cristo. La ntá k'uetuèhen ch'án iyó tí sín k'uék'ajiko ch'án kixin sátsjitsjehe sín tí ch'ín Jesús. ³ Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin:

—¿Á jaha tí nkexro itsi ní o á naxa tsochónhenni í jnko nkexro? —ichro sín.

⁴ A ntá kjuátehe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uíkonrá la ko tí nkehe kuínhínrá.

⁵ Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchónta chin lepra la ó kótjóá sín kuítóhe sín jina la ko tí sín k'uékienhya la ó tinhin sín jie. Kjaxin tí sín tsík'en na ó xechón sín inaá la ko kaín tí sín nòna mé síxraohe sín tí tan jina tsaáxin sín. ⁶ Méxra imá náxrjón tí nkexro kohya nkehe t'inkákonhen tinkáchónki tí janhan.

⁷ Tió sákjuí sín ntá ch'ín Jesús kjuankíxin nixjehe ch'án tí sín k'uéjé la chrónka ch'án kuènte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nhexrayehe xrinto? ⁸ Tí náhi, la ¿nkehe k'uíkonrá? ¿Á k'uíkonrá ch'án éxí ijnko nkexro tsík'itsa jina? Jahará ó nohará kixin chojni tsík'itsa jina la tjejó sín tí nchia kuènte tí sín rey. ⁹ ¿A ntá nkehe k'uíkonrá? ¿Á ijnko nkexro chrónka itén Dios? Jehe chaxín la antsí chónka ch'án kjuachaxin la tí sín k'uéchrónka itén Dios la kánhyó. ¹⁰ Ch'ín Juan mé tí nkexro kui éxí xikaha chrónka xroon itén Dios ósé. Mé ntáchro xikihi:

Janhan mé tsochr'an ijnko nkexro tsochrónka itan kuèntana tsitónxin ntia,

kixin tsjasíyóxin ch'án ntia kuénta.*

Mé xikaha chrónka itén Dios. ¹¹ Ntá ijnko nkehe chaxín tsotjonkará kixin kaín tí nkexro k'uéjé senó la kánhyó tjetooan sín la antsí tjetooan tí ch'ín Juan Bautista. Kjánchó ijnko

* 11:10 Malaquías 3.1

nkexro kjónté tjetuanhya la tí ts'áyéhe sín tí kjuachaxién Dios tjen nkaya nkajní la antsí tjetóan sín la ntá jehe ch'ín Juan la kénhyó.

¹² Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chóna kjuachaxin mé tsjacha sín. ¹³ Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan. ¹⁴ A ntá tí jahará chrókuítekáonrá tíhi; kíxin ch'ín Juan la mé ikui kíxin tí xra kuènte ch'ín Elías tsjintaxín sich'e ch'án kíxin ch'ín Elías la t'ichjánxin chrókui ch'án inaá. ¹⁵ Tí nkexro tjinkaon chrókuinhin la chrókuinhin.

¹⁶ '¿Nkexrí chrókuíntayóaxian tí chojni tjejó ijie? Tóyóhe sín tí chánjan tjejótxin sín ntasin tsítán sín la t'íyehé sín kíchó sín ¹⁷ ntáchro sín kíxin: “K'uánoani flauta kjánchó jahará la tehyará. Itsjeni isón kuènte chojni tsík'en la ntá k'uaváhyará la ko tsjankahyará.” ¹⁸ Kíxin tí ikui ch'ín Juan la kjónehya ch'án la k'uíhya ch'án vino la jahará ntáchrórá kíxin ijnko nchakuen tí jínahya mé chóna ch'án. ¹⁹ A ntá tíó kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrórá kíxin imá itsjé kjóne ch'án la imá ik'ui ch'án la ko imá t'ito ch'án tí chojni chóna jie la ko tí sín nchekjènkí, ichrorá. A ntá tí kjuachaxin kuènte Dios mé tjakoxin tí xjeen ch'án.

Tí chjasin titekakonhya (Lc. 10.13-15)

²⁰ Ntá ch'ín Jesús mé kjuankíxin ch'án ntáche ch'án tí sín tjejó iso tí chjasin imá kjuasixín ch'án kjuaxroan kíxin kjónté xikaha la naxa kuinkáchónkihya sín Dios. ²¹ Ntá ntáchro ch'án kíxin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uxin tí kjuaxroan tí chjasin Tiro la ko chjasin Sidón éxí k'uíkonrá jahará ntá tí chrókójehe sín la tjoka chrókuinkáchónki sín Dios la tjoka chrókjuakoxin sín chrók'uinkáya sín ka tié la ko nteso chrókuinchek'ia sín asén sín. ²² Ntá ntáxrjan kíxin tí yaon tsitoexín ijie chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín. ²³ A ntá jahará chojni chjasin Capernaum tjenkayáxinrá kíxin imá nohará a ntá sátsjirá nkaya nkajní, ichrorá, kjánchó chaxínhya. Jahará la tsjasinkajinxinrá ntiha sátsjirá tsjasótiará tí sín tí sín tsík'en. Tí chrókjuásian tí kjuaxroan tí chjasin Sodoma éxí kjuásian chjasánrá la tí chjasin la kjá naxa chrók'uxin sín naxa chrók'uitjányanhya sín tí yaon ijie kíxin tjoka chrókuitekaon sín. ²⁴ A ntá tjonkará kíxin tíó sinchekitoéxín Dios ijie chojni la antsí tsjasótiará la tí sín chjasin Sodoma la kénhyó tsjasóte sín.

Xrákirá tí tjén janhan la ts'ok'áhará (Lc. 10.21-22)

²⁵ Ntá tí yaon a ch'ín Jesús mé nixjehe ch'án It'é ch'án ntáchro ch'án kíxin:

—Tjáncháha kjuasáya It'eni mé Inché nkaya nkajni la ko chjasintajni kíxin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kíxin ts'itja tí sín noehya. ²⁶ Mé xikaha It'eni jaha kóxrjínhan kíxin xikaha tsonhen —ichro ch'ín Jesús.

²⁷ Ntá ntáchro ch'ín Jesús kíxin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjejá ch'án tsochóxin sín ch'án. ²⁸ Xrákirá kaín rá tí tjén janhan tí jahará imá tsíkóxrjérá kjuich'erá xra la yamará nkehe iye la ntá janhan mé sjintak'ok'áhará. ²⁹ Tákjára tí xra kuèntana la ts'itjará kuèntana kíxin janhan mé jina asenná la ntahnkehya. Ntaha mé ts'itjará ts'ok'èxin asánrá. ³⁰ Tí xra tsotjahará la xrahya la tí nkehe tsotjahará la yehya.

12

Tí sín k'uajiko ch'ín Jesús mé ik'uín sín iso noatrigo ijnko yaon t'ok'éhe tí sín Israel
(Mr. 2.23-28; Lc. 6.1-5)

¹ A ntá ijnko yaon la ch'ín Jesús k'uátsínka ch'án ijnko nonte síin noatrigo tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankíxin sín ik'uín sín iso noatrigo a kíxin sine sín. ² A ntá iso tí sín fariseo k'uíkon sín kíxin xíkaha kjuích'e tí sín xriko ch'ín Jesús la ntá ntáchro sín kíxin:

—Tsjehé tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon i —ichro sín.

³ Ntá kjuátehe ch'ín Jesús kíxin:

—Jahará ¿a kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? ⁴ A ntá jehe sín mé k'uíxenhén sín tí nchia kuènte Dios la kaín sín kjóne sín tí niotja tsíkóyaon kuènte Dios kjónté kohya kjuachaxin sine ch'án ni tí sín k'uájiko ch'án. Jehó síin kjuachaxin sine tí sín nchat'á. ⁵ Jahará ¿a nchekuáxinhyará tí xroon tsíkjin ch'ín Moisés ntáchro kíxin tí sín nchat'á kuènte nínko mé t'ok'éhya sín tí yaon sábadó la kjónté xíkaha la jehya jie tíha? ⁶ Ntáxrjan kíxin itjén janhan la antsí má chonta kjuachaxin la ntá tí nínko la kénhyó. ⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kíxin: “Janhan Dios tjínkavan kíxin chrókuijkonóehérá chojni la tjínkakhonhya kíxin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhyará tí janhan kíxin ninkehó jie chontahya. ⁸ A ntá tí Xjeen Dios K'óna Chojni mé chóna kjuachaxin ts'etoan nkexrí tsonhen tí yaon t'ok'éheni —ichro ch'ín Jesús.

Ch'ín Jesús kjuínchekitohe jína ijnko chojni tsíxámá tja
(Mr. 3.1-6; Lc. 6.6-11)

⁹ Ntá ch'ín Jesús mé sákjuíxin ch'án ntiha la k'uíxenhén ch'án ijnko nínko Israel. ¹⁰ Mé ntiha itjen ijnko ch'ín tsíxámá tja. Na ntá tjejóntaxín iso sín fariseo a tjinkaon sín tsjanchia sín jie. La ntá kjuanchankíhi sín ch'án kíxin:

—¿Á síin kjuachaxin sinchekitoheni jína ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'ín Jesús ntáchro ch'án kíxin:

—Jnkojín tí jahará chontará ijnko kolélo chrókjuítsínkáya ijnko tòye tí yaon t'ok'éheni ¿a chrókjuíhyará chrókuakitsjetaónrá va tòye ní? ¹² Kjánchó tí chojni antsí má tjete sínkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

¹³ Méxra nixjehe ch'án tí ch'ín níhi a, ntáchro ch'án kíxin:

—Tjéntoá tja —ichro ch'án.

A ntá tí ch'ín níhi tja kjuentoá tja ch'án la ó kjuixin kuítóhe jína éxí tí í jnko tja ch'án xíkaha. ¹⁴ Ntá tí sín fariseo kónínkaon sín k'uaxrjexín sín ntiha sákjuí sín la kjuenkayáxin sín nkexrí ts'óyán sín tí ch'ín Jesús.

Itén Dios senó chrónka kuènte ch'ín Jesús

¹⁵ A ntá ch'ín Jesús mé kónohe ch'án kíxin xíkaha tjenkayáxin sín la ntá sákjuíxin ch'án ntiha la itsjé sín chréhe sín ch'án. Kjuínchekitohe ch'án jína kaín tí sinníhi ¹⁶ la k'uetōan ch'án kíxin tsochrónkahya sín noxín kíxin nkexro tí jehe ch'án. ¹⁷ Mé xíkaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsíntáchro ch'án xíkahi:

¹⁸ Ntihi tjen tí nkexro ch'ena xra la janhan mé kjuéyá ch'án, janhan tjuaha ch'án la chàna kíxin itjen ch'án.

Tsotjahá ch'án tí nchakuenná

la jehe ch'án mé tsochrónka ch'án nkexrí sintakitoaxián ijie chojni chjasintajni.

¹⁹ Tsonínkakuenhya ch'án chojni la chjíníhya ts'óyako ch'án,

* 12:7 Oseas 6.6

la ko kohya nkexro tsinhin itén ch'an tí ntia.

²⁰ Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe síhnhikoá.

Jehe ch'án naxa sich'e ch'án xra tsjixrakájia tí yaon ts'etōan ch'án.

²¹ La kaín xín chojni chjasintajni mé tsitekaon sín tí jehe ch'án.†

Mé xikaha chrónka itén Dios ósé.

Tí sín fariseo mé ntáchro sín kixin ch'ín Tsochren t'etuenhen asén tí ch'ín Jesús

(Mr. 3.19-30; Lc. 11.14-23; 12.10)

²² Ntá iso chojni sákjuíkohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. A ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án. ²³ Ntá kaín xín chojni la chrakon sín la tjanchankíhi kichó sín ntáchro sín kixin:

—¿A jehya xjeen David tíhi? —ichro sín.

²⁴ Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuente ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

²⁵ Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkójín gobierno jnkokoáhya tjenkayáxin sín ntá tjanjonko kichó sín na mé ts'itjayan tí kjuachaxin ts'etōanxín sín, la ko kjaxin tí sín jnkokoá chjasin o tí sín jnkokoá nchia jnkokónhya tjenkayáxin sín la kjaxin xikaha ts'itjayan sín. ²⁶ A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naxa chrók'uetoan. ²⁷ Jahará ntáchrorá kixin janhan kuakítsjexián tí nchakuen tí jínahya kjuachaxin kuente ch'ín Beelzebú. A ntá tí chaxín xikaha la ntá ¿nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoxin sín kixin ntoáhya tjenkayáxinrá. ²⁸ A ntá janhan mé kuakítsjexián tí nchakuen tí jínahya kjuachaxin kuente Nchakuen Dios la tíha mé chrókónoaxínrá kixin tí kjuachaxién Dios mé ó kui tí tjejorá.

²⁹ ¿Nkexrí chrók'uixenhen ijnko nkexro ijnko ntōe ijnko ch'ín jiehe la chrókuakitsjehe ch'án tí nkehe chóna ch'án? Senó la chrókónteto ch'án kixin jína chrókueéhe sín ch'án.

³⁰ Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'inkákonhen tí xra it'a.

³¹ Méxra xrjanka kixin Dios tsjakjín jnkójnko jie tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjín ijje sín. ³² La ko xrjanka kixin kaín nkehe t'ántaxínhínrá tí Xjeen Dios K'óna Chojni la tsjakjín Dios. A ntá tí ts'ántaxínhínrá Nchakuen Dios la ntá mé í tsjínhya tí ijjará kjónté ntihi chjasintajni la ko kjónté tí chr'éxin.

Tí nta chrókjuatsōanxín sín tí to jína

(Lc. 6.43-45)

³³ Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsōanxínni tí to a. ³⁴ Jahará tsík'axrjeníxinrá konche. ¿Nkexrí jína chróntáchrorá jahará tí jehya jínará? Tí nixja ir'vará la éxí ntáchro asánrá mé nixja ir'vará.

³⁵ Ijnko chojni jína mé jína nixja kixin jína asén ch'án. A ntá ijnko chojni jínahya mé nixja tí nkehe jínahya kixin tí asén ch'án kjaxin jínahya. ³⁶ Ntá tjonkará kixin itsi tí yaon tsjixixín tío sinchekitoexín Dios ijje chojni ntá tsonohará kaín nkehe chjíní tsínixjará. ³⁷ Kixin tí nkehe nixjará tsjakoxin á kjuásinrá jie ní o náhi.

Tí sín jehya jína tjanchehe sín ch'ín Jesús kixin tsjakoxin ch'án ijnko kjuaxroan jie

(Mr. 8.12; Lc. 11.29-32)

³⁸ Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchro sín kixin:

† 12:21 12.18-21 Isaías 42.1-4

—Maestro, tjinkaonni chrók'uikonni chrókjuásian ijnko kjuaxroan náxrjón tsonoexínni kixin nkexro jaha —ichro sín.

³⁹ Ntá kjuátehe ch'ín Jesús ntáchro ch'án kixin:

—Tí sín jínahya la ko tí sín kuítóhe Dios mé tjanchia sín chrókjuásian kjuaxroan náxrjón. Kjánchó tsjákoxinhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé. ⁴⁰ Éxí yóhe kjuák'e ch'ín Jonás iní yaon la iní tie nkaxenhen tsee koche jie mé xikaha tí Xjeen Dios K'óna Chojni tsjak'e nkaxenhen tòye tsoxravá iní yaon la iní tie. ⁴¹ A ntá tí yaon tsitoxén ijie chojni la ntá tí sín chjasin Nínive mé tsjanchia sín jie kixin tí sín tjejó jie, kixin tí sín chjasin Nínive mé kuítóhe sín ijie sín tió kuínhin sín itén Dios chrónka ch'ín Jonás. A ntá ijie itjén janhan la antsí má chonta kjuachaxin. A ntá tí ch'ín Jonás la kénhyó k'uéchóna ch'án kjuachaxin, kjánchó jahará kuítekákonhyará tí janhan. ⁴² Kjaxin tí yaon tsitoxén ijie chojni la tí tjan reina k'uetōan kjuixin nó Sur mé tsjanchia tjan jie kixin tí sín tjejó ijie kixin jehe tjan kjuixin imá ikjín kixin chrókuinhin tjan tí kjuaxrexinkaon jína k'uékjako ch'ín Salomón. A ntá ijie itjén janhan la janhan antsí má nòna a ntá ch'ín Salomón la kénhyó k'uénohe ch'án.

Tió tsokjan tí nchakuen tí jínahya

(Lc. 11.24-26)

⁴³ A ntá ijnko nchakuen tí jínahya tsík'axrjexín ijnko chojni la mé ixri tí nonte xamá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe. ⁴⁴ La ntá kjuenkayáxin kixin: “Áxri tsokjan ntona k'uaxrjéxian”, ichro. A ntá tió ikjan tí nchakuen la t'ikon éxí ijnko nchia kohya ninkexró la éxí ijnko chojni tsík'ánjón ntōe la náxrjón tsjehe tí nkaxenhen nchia. ⁴⁵ A ntá k'uíkon tí jínahya xikaha tjen nchia la ntá sákjuíkakjín í jnko yato nchakuen tí jínahya antsí má jínahya. A ntá kaín k'uíxenhen tí ntiha. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen kaín tí sín siín ijie titekakonhya.

Tí iné la ko kichó ch'ín Jesús

(Mr. 3.31-35; Lc. 8.19-21)

⁴⁶ Ntá ch'ín Jesús naxa tjenixjehe ch'án chojni la ntá xrinahya kjuíji iné ch'án la ko kichó ch'án. Ntá kuítóhe sín ntója ó la tjinkaon sín chrónixjehe sín ch'ín Jesús. ⁴⁷ Ntá ijnko nkexro ntiha sákjuíchénka tí ch'ín Jesús, ntáchro ch'án kixin:

—Iná la ko kichua tjejó sín ntója la tjinkaon sín chrónixjaha sín tí jaha.

⁴⁸ A ntá ch'ín Jesús kjuátehe ch'án nixjehe ch'án tí nkexro chrónka a, ntáchro ch'án kixin: —¿Xá nkexro tí naná la ko nkexro tí kichiná? —ichro ch'án.

⁴⁹ Ntá kjuakoxin tja ch'án tí sín xriko ch'án la ntáchro ch'án kixin:

—Tí sín i la mé naná la ko kichiná. ⁵⁰ Tí jnkojín sín i nchexiteyá nkehe tjinkaon T'aná tjen nkaya nkajní na mé táha mé naná la ko kichiná mé xikaha t'íkuān tí jehe sín —ichro ch'án.

13

Ch'ín Jesús mé kjuíncheyóexin ch'án éxí ijnko chojni t'enka nontee

(Mr. 4.1-9; Lc. 8.4-8)

¹ A ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjaxin ch'án chrínta ntayaon. ² Ntá k'uíxikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabarco kjuák'etjaxin ch'án la kaín sín na tí chrínta ntā ó kuítóhe sín. ³ A ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxí ijnko ch'ín sákjuík'enka nontee ⁴ mé xikaha sákjuík'enka ch'án iso tí noatrigo a. Ntá iso noa la tsík'ánótjen ntia ntá ikui koxroxé k'uínka va noa. ⁵ A ntá iso noa na mé k'uitji chrík'á xro tí kohya itsje nche ntá tjoka k'uayan kixin ntaha tjínhya chóna nche.

⁶ Ntá tí kjuítõn yaon la ntá tí ka la xámá kixin nĩnkahya chõnta nuèe. ⁷ A ntá í so noa kjuítsínkak'á tí síin kach'ĩ na k'uánkí tí kach'ĩ a na ntá í xitjahya k'uánkí tí noatriga a kixin tsíkjàte tí kach'ĩ. ⁸ A ntá tí noa tsík'itjí nche jína na ntá tió k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta. ⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuènté kjuíncheyóexin ch'ín Jesús

(Mr. 4.10-12; Lc. 8.9-10)

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin: —¿Nkekuènté xíkaha nixjehé sín ncheyóexián? —ichro sín.

¹¹ A ntá ch'ín Jesús kjuátehe ch'án ntáchro ch'án kixin:

—Jahará la Dios me tsjinkĩtsa tsonohará tí nkehe noehya í so chojni kuènte tí kjuachaxin kuènte Dios. A ntá tí jehe sín a la náhi. ¹² Tí nkexro ó chõnta nkehe la antsí ts'áyéhe sín kixin antsí má tsochõnta sín. A ntá tí nkexro chõntahya la kjónté tí ntsí chõnta sín la ts'axrjehe sín. ¹³ Mé xíkaha kjuíntayóaxuán kjuákuaxián sín kixin jehe sín t'ikon sín la ntá kjónté tjátsoanhya sín la tjejóntinhin sín a ntá kjónté kienxínhya sín. ¹⁴ Mé xíkaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xíkahi:

Jehe sín tsinhin sín a ntá tsienxínhya sín
la ts'ikon sín la tsjatsõanhya sín tí nkehe ts'ikon sín.

¹⁵ Imá icha asén tí sín chjasin i.

Chõnta sín ntatsjon kjánchó ts'íkjehe
la chõnta sín ikon sín kjánchó t'ikonhya sín,
kixin chrók'uikonhya sín
la chrókuienhya sín la ko
xitjahya kienxín sín,

kixin í tjinkakonhya sín chrókjan sín kixin janhan mé chrókjuítakitõhã sín jína.*
Mé xíkaha tsíkjin ch'ín Isaías.

¹⁶ Ntá ntáchro ch'ín Jesús ínaá kixin:

—A ntá jahará la imá náxrjón tjejorá kixin t'ikonrá la ko tinhínrá. ¹⁷ Chaxín xrxanka kixin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uíkonhya sín la ko k'uétjinkaon sín chrókuinhin sín tí nkehe tjejotinhínrá la ntá kuénhya sín.

Ch'ín Jesús chrónkaxín nkexrí t'axrjexín tí nkexro sákjuík'enka

(Mr. 4.13-20; Lc. 8.11-15)

¹⁸ Tinhínrá nkexrí t'axrjexín tí ch'ín sákjuík'enka nõntee. ¹⁹ Tí nkexro kuínhin tí itén Dios chrónka nkexrí tí kjuachaxin kuènte Dios la ntá kienxínhya sín la yóhe tí noa xènjintja ntĩa. Ó kui ch'ín Tsochren ntá kjuínchek'itjáyán ch'án tí itan jína kuínhin sín. ²⁰ A ntá tí tje kjuítsínkak'á xro la mé t'axrjexín kixin tí chojni kuínhin itén Dios la tjoka kóxrjínhin sín la kuínkáchónki sín. ²¹ Kjánchó nĩnkahya chõnta nuèe na ntá itsi tí kjuaxróxinhya o tsochónkíhi sín chojni chrók'óyán sín kixin tí itén Dios kuítekaon sín, a ntá tsítõhe sín tí tinkáchónki sín Dios. ²² A ntá tí tje kjuítsínkak'á kach'ĩ na mé éxí yóhe ijnko chojni kuínhin itan jína kjánchó tjitoxienhya ntie sín kixin tóxakonhen sín tí xra chõnta sín chjasintajni la ko tjinkaon sín tsochõnta sín itsjé nkehe. Kaín tíha mé t'inkákonhen tí itén Dios kuínhin sín la ntá xíkaha xitjahya sich'ehe sín xra Dios. ²³ A ntá tí tje k'uínka tí nonte chõnta nche jína na mé yóhe tí chojni kuínhin tí itén Dios na ko kienxín sín la ntá xíkaha jína ch'ehe sín Dios xra. Na iso sín la yóhe éxí tí tje k'óna ijnko ciento neno noa la iso sín la yóhe tí k'óna

* 13:15 13.14-15 Isaías 6.9-10

sesenta neno noa la iso sín la yóhe tí k'óna treinta neno noa —mé xikaha chrónka ch'ín Jesús.

Ch'ín Jesús kjuíncheyóexin ch'án éxí tí kajnto k'uánkíkué tí noatrigo

²⁴ Ntá ch'ín Jesús kjuíncheyóexin ch'án inaá ntáchro ch'án kixin:

—Tí kjuachaxin kuènte Dios mé yóhe ijnko ch'ín k'uenkā noa jína nontee ch'án. ²⁵ A ntá tió k'uéjójua kaín sín ntá ikui ijnko nkexro nínkakonhen sín la k'uenkā ch'án kajnto chrík'á tí noa a la ntá sákjuí ch'án. ²⁶ La ntá tí noatrigo k'uánkí la ntá ó sítintaa la ntá ntiha kjaxin kónoxíxin k'uánkí tí kajnto. ²⁷ Ntá tí sín ch'e xra mé sákjuínixjehe sín tí lámoe sín la ntáchro sín kixin: “Tí noa k'uènká nontaa la noa jína tíha. A ntá ¿nketí kjuixín tí kajnto tsík'ayan?” ichro sín kjuanchankí sín. ²⁸ Ntá kjuátehe tí inché tí nonte ntáchro kixin: “Kjá ijnko nkexro nínkakonna mé kjuích'e xikaha”, ichro ch'án. Ntá tí sín ch'e xra mé kjuanchankí sín kixin: “¿Á tjinkávan kixin sátsjini tsakitsjenkíni tí kajnto?” ichro sín. ²⁹ A ntá kjuátehe ch'án kixin: “Náhí. Tí sátsjia tsakítsjenkiá tí kajnto la kjá chónite tí katrigo ts'axrjenkí. ³⁰ Íchá jína títóhé kixin ts'ánkíkué tsjixin tsotjájiani. Ntá ts'etuenhenni tí sín tsotjá kixin senó ts'ejo sín tí kajnto la sinchenteto sín kixin tsoche la ntá chr'éxin tsotjá sín tí noatrigo ntá ts'inkachjina tí noa a” —mé xikaha chrónka ch'ín Jesús.

Ch'ín Jesús kjuíncheyóexin ch'án éxí tí xroan ijnko ntayoa it'in mostaza (Mr. 4.30-32; Lc. 13.18-19)

³¹ Ntá ch'ín Jesús kjaxin kjuíncheyóexin inaá ntáchro ch'án kixin:

—Tí kjuachaxin kuènte Dios mé éxí yóhe ijnko tje mostaza k'uenkā ijnko chojni nontee ch'án. ³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jié la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

Ch'ín Jesús kjuíncheyóexin ch'án éxí tí xroan t'ánkíxin niotja (Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kixin:

—Tí kjuachaxin kuènte Dios mé éxí yóhe tí xroan t'ánkíxin niotja. Kjuinkíjjanxin ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesús tí nixja ch'án (Mr. 4.33-34)

³⁴ Ch'ín Jesús kjuakohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án. ³⁵ Mé xikaha kjuako ch'án kixin tsoxiteyá tí nkehe tsíchrónka ijnko nkexro k'uéchrónka itén Dios ntáchro xikihi:

Mé tsoníxjaxian sɪntayóaxión nkehe

tsontáxrjan tí nkehe ninkexró noehya desde k'óna chjasintajni.†

Ch'ín Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjehe ch'ín Jesús tí sín a ntá sákjuí sín kaín sín la jehe ch'án k'uíxenhén ch'án nchia. Ntá kóchjina tí sín k'uájiko ch'án la ntáchro sín kixin:

—Chrónkaxián nkexrí t'axrjexín tí kajnto k'uánkíkué tí noa trigo tí nonte —ichro sín.

³⁷ Ntá ch'ín Jesús kjuátehe ch'án ntáchro ch'án kixin:

—Tí nkexro k'uenkā tí noa jína mé tí Xjeen Dios K'óna Chojni. ³⁸ A ntá tí nonte mé chjasintajni tíha. Tí noa jína mé éxí yóhe tí chojni kuákja kjuachaxin kuènte Dios. La ntá tí kajnto mé éxí yóhe tí chojni t'etuenhen Tsochren. ³⁹ Tí nkexro nínkakonhenni mé k'uenkā tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel. ⁴⁰ Éxí xrenájín tí kajnto la tsoche mé xikaha tsonhen tió tsjixixín tsjeje chjasintajni. ⁴¹ Tí Xjeen Dios K'óna Chojni mé ts'etuenhen tí sín ángel kixin tsakitsjexín

† 13:35 Salmo 78.2

sín tí tjet'etoan Dios kaín tí chojni tjachroe í so chojni la ko tí sín ch'e tí nkehe jínahya. ⁴² La tsochr'án sín sátsji sín tí tja síin xrohi la ntaha tsotsjánka sín la sinetaón neno sín. ⁴³ Ntá kaín xín tí sín nchexiteyá tí nkehe tjinkaon Dios mé éxí tí yaon xíkaha tsotsjehe sín tí tjet'etoan It'éni Dios. Tí nkexro tjinkaon chrókuinhin la chrókuinhin —mé xíkaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

⁴⁴ 'Tí kjuachaxin kuènte Dios mé éxí yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'ema ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

Ch'ín Jesús kjuíncheyóexin éxí ijnko xro perla tjete

⁴⁵ Ntá ntáchro ch'ín Jesús kixin: —Kjixin tí kjuachaxin kuènte Dios mé éxí yóhe ijnko nkexro tjejá xro perla náxrjón. ⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxí ijnko nchísén tséya sín koche

⁴⁷ Ntáchro ch'ín Jesús kixin: —Kjixin tí kjuachaxin kuènte Dios mé éxí yóhe ijnko nchísén tséya chojni koche t'enki sín tí ntayaon la ntá tsotsé nchónhya clase koche. ⁴⁸ Ntá tió tsíkaón koche tí nchísén tséya sín va la ntá tsakitsjenki sín la tsjak'e sín chrínta ntá la ntaha ts'ejótjixin sín la tsíchéhe sín koche jína la t'enka sín ntaxra. La ntá tí jehya koche jína la it'e sín. ⁴⁹ Mé xíkaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsitohé tí chojni jína. ⁵⁰ La tsochr'án sín tí sín jínahya sátsji sín tí tjen tja tí síin xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjete ntaxin

⁵¹ Ntá ch'ín Jesús mé kjuanchankí ch'án kixin: —¿Á tiénxinrá jahará kaín tí nkehe ní? —ichro ch'án. Ntá kjuátehe sín kixin: —Jeén, ìnchéni, ó kíenxínni —ichro sín. ⁵² Ntá ntáchro ch'ín Jesús kixin: —Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxí yóhe ijnko ìnché nchia chóna itsjé nkehe tjete tjejóchjina la ntá nohe ch'án tsakitsje tí nkehe tjete nixin la tí nkehe tjete ntaxin —mé xíkaha ichro ch'ín Jesús.

Ch'ín Jesús kjuák'e ch'án chjasin Nazaret (Mr. 6.1-6; Lc. 4.16-30)

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuíxin ch'án ntiha. ⁵⁴ La ntá sákjuí ch'án chjasén ch'án Nazaret. Ntaha kjuankíxin kjuakoxin ch'án tí ninko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin: —Tí ch'ín i la, ¿nketí tsíxraqhé ch'án kixin imá nohe ch'án la ko nkexrí kixin tjasin ch'án kjuaxroan? ⁵⁵ ¿Á jehya tíhi xjeen tí ch'ín carpintero la ìné ch'án mé María? La ko chóxinni tí kíchó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. ⁵⁶ Kjixin tí sín chjin kíchó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xíkaha chrohya sín tsitekakonhen sín ch'án. Ntá ntáchro ch'ín Jesús kixin: —Nkuíxín tjikosáyehe chojni ijnko nkexro chrónka itén Dios. A ntá tí sín chjasén ch'án la ko kaín tí sín ntøe ch'án mé tjikosáyehya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kixin kuítekakuenhya sín ch'án.

14

Ik'uén ch'ín Juan Bautista
(Mr. 6.14-29; Lc. 9.7-9)

¹ A ntá tí yaon a ntá tí ch'ín Herodes mé tí nkexro k'uetoan tí estado Galilea mé kuínhin ch'án nkexrí ichro ch'ín Jesús. ² Ntá nixjehe ch'án tí sín ch'ehe ch'án xra, ntáchro ch'án kixin:

—Kjá tíha la ch'ín Juan Bautista ó tsíxechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etoan kixin ch'ín Juan tsontetoxín cadena la ko tsjak'echjina ch'án. Mé xikaha kjuích'e ch'án kixin xikaha tsíkjanhia tí tjan Herodías, tí tjan ichjién tí ch'ín Felipe, kichó ch'án. ⁴ Tí ch'ín Juan tsintáche ch'án tí ch'ín Herodes kixin:

—Jehya jína tsochonta tí ichjién tí kichuá —mé xikaha tsintáchro ch'án.

⁵ Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kixin kaín sín ntáchro sín kixin ch'ín Juan mé nixja itén Dios, ichro sín. ⁶ A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehé ch'án. A ntá imá kóxrjinhin ch'ín Herodes nkexrí ité tjan. ⁷ La ntá nixjehe ch'án tjan k'uákjenxin ch'án ihnié Dios ntáchro ch'án kixin tsochjéhe ch'án tjan kjónté jnkójín nkehe tsjanhia tjan, ichro ch'án. ⁸ Ntá jehe tjan la senó kjuikjanhankíhi tjan iné tjan ntá iné tjan tsintachro kixin ikja ch'ín Juan mé tsjanhia tjan ntá jehe tjan mé nixjehe tjan tí ch'ín Herodes inaá ntáchro tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kixin xikaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichrén nkehe tsjanhia tjan tsjanjon ch'án. ¹⁰ Méxra k'uetoan ch'án kixin ts'óchrínjin sín ikja ch'ín Juan tí tjen ch'án ntöechiso. ¹¹ Ntá kjuikao sín kjuikoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuikénhen tjan iné tjan.

¹² Ntá tí sín k'uék'ajiko ch'án a mé sákjuikakitsje sín tí cuérpóé ch'án la sákjuikjává sín. La ntá chr'éxin la sákjuí sín sákjuíchénka sín tí ch'ín Jesús kixin xikaha tsíkónhen ntiha.

Ch'ín Jesús kjuínchekjine ch'án in'ó mil chojni
(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'ín Jesús kixin xikaha tsíkónhen la ntá jehó ch'án sákjuí ch'án k'uit'ótjen ch'án ijnko ntabáro la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjen ch'án la ntá k'uaxrjexín sín chjasén sín la ntá totó sín sákjuíchréhe sín ch'án. ¹⁴ A ntá k'uaxrjexín ch'ín Jesús tí ntabáro a, a ntá k'uíkon ch'án kixin nchónhya chojni siín ntiha ntá kuíkonóehé ch'án tí jehe sín na ntá kjuínchekitöhe ch'án jína tí sín níhi tsíkjkao sín. ¹⁵ La ntá ó k'uíxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuénhén sín kixin sátsji sín tí chjasín ntsi chjinaxón tsjik'ena sín nkehe sine sín —ichro sín.

¹⁶ Ntá kjuátehe ch'ín Jesús, ntáchro ch'án kixin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷ Ntá kjuátehe sín kixin:

—Chóntahyani itsjé nkehe. Jehó in'ó niotja la ko yaá koche chóntani —ichro sín.

¹⁸ Ntá ntáchro ch'ín Jesús kixin:

—Xrakoanará tí nkehe méhe ntihi —ichro ch'án.

¹⁹ Ntá k'uetoan ch'án kixin kaín xín sín ts'ixitjaxin sín tí chrítaón kaxi a. Ntá kuákja ch'án tí in'ó niotja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'ö ch'án tí niotja chjéhe ch'án tí sín k'uájiko ch'án la jehe sín mé k'óxikayehé sín chjéhe sín tí chojni siín a. ²⁰ Ntá kaín sín kjuixin kjóne sín kókjehe sín. Ntá kjuixin ntá tí

sín k'uájiko ch'ín Jesús kjuenájín kaín tí nkehe síxèhe sín la mé teyó ntaxra kaón. ²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

Ch'ín Jesús mé tjetjitaón ch'án nta
(Mr. 6.45-52; Jn. 6.16-21)

²² Ntá kjuixin tíha ntá k'uetuēnhen ch'ín Jesús tí sín k'uájiko ch'án kixin ts'it'ótjen sín tí ntabárcō ts'atòye sín í jnko nánko ntayaon. Ntá jehe ch'án naxa kuítóhe ch'án nixjehe ch'án tí sín siín ntiha. ²³ Ntá kjuixin xíkayēhe sín na ntá jehó ch'án chriin ch'án ijnko jna tsonixjehe ch'án It'é ch'án tjen nkaya nkajní. Na ntá ó k'uixin tie la jehó ch'ín Jesús itjen ch'án ntiha. ²⁴ La ntá tí ntabárcō na mé tjenkátaón nta jnkosiné ntayaon. Ntá imá chjéhe nta tí ntabárcō kixin tí xrintō la chjéhe la xitjahya sátsji ntabárcō. ²⁵ Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín. ²⁶ Na ntá tí sín k'uájiko ch'án mé k'uíkon sín kixin tjetjitaón ch'án tí ntayaon na ntá imá chrakon sín la k'óyako sín. Ntáchro sín kixin kjuacha sín ichro sín, chrakon sín.

²⁷ Na ntá nixjehe ch'ín Jesús tí jehe sín ntá ntáchro ch'án kixin:

—Nchefuérte asánrá, chrakonhyará. Janhan kjuihá —ichro ch'án.

²⁸ Ntá ch'ín Pedro mé nixjehe ch'án Inchéni, ntáchro ch'án kixin:

—Inchéni tí chaxín jaha la ntá chrókjuánjuan kjuachaxin chrókjuitaónni tí nta tsjijini tí tjen jaha —ichro ch'án.

²⁹ Ntá ntáchro ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabárcō la kjuankixin ch'án tjetjitaón ch'án nta sákjuíchréhe ch'án tí tjen ch'ín Jesús. ³⁰ A ntá xrinahya ntá kónohe ch'án kixin imá chjéhe xrintō chrítaón nta, ntá chrakon ch'án la kjuankixin tinkák'aniánkí ch'án nta, ntá k'uèya ch'án ntáchro ch'án kixin:

—Inchéni, nchekaáni —ichro ch'án.

³¹ A ntá tuénxín ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuènté titekákonhya? —ichro ch'án.

³² Na ntá tió k'uit'ótjen sín yóí sín tí ntabárcō la ntá tuénxín k'uixratá tí xrintō. ³³ Ntá kaín xín tí sín tjejóxehen tí ntabárcō mé k'uéjoxin tochr'in sín nkayakon ch'ín Jesús la ntáchro sín kixin:

—Jaha mé chaxín Xjeen Dios —ichro sín.

Ch'ín Jesús mé kjuínchekitohe jína tí chojni níhi nonte Genesaret
(Mr. 6.53-56)

³⁴ Ntá tió k'uátòye sín tí ntayaon ntá kjuíji sín tí nonte Genesaret. ³⁵ Ntá tí sín siín ntiha tjoka kjuátsoan sín kixin jehe ch'ín Jesús tíha, ntá kuínhin tí sín chjasin chjinaxón ntiha la ntá kuíkao sín kaín tí sín níhi tí tjen ch'án. ³⁶ Na ntá chrónóhehe sín ch'án kixin chrókuítóhe ch'án kixin kjónté chrínta iké ch'án chrókuákóxin sín, la ntá kaín tí sín kuákóxin iké ch'án mé kuítóhe sín jína.

15

Tíjie tjasin chojni
(Mr. 7.1-23)

¹ A ntá chjasin Jerusalén kjuixin iso sín fariseo la ko iso tí sín maestro tjako tí ley la kjuíchréhe sín tí ch'ín Jesús. Ntá kjuanchankíhi sín ch'án kixin:

² —¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntihya sín itja sín ntá kjónté ine sín? —ichro tí sín fariseo a.

³ A ntá kjuanchankí ch'ín Jesús kixin:

—¿Nkekuènté jahará kjaxin titekákonhyará nkehe tsík'etoan Dios? A ntá jahará tjinkáonrá naxa chrókuinkachónkirá tí nkehe kuinkáchónki tí sín tsík'axrjeníxinrá. ⁴Ntáchro Dios kixin: “Tsochontehérá kjuasáya it'ará la ko ìnará”, la ko ntáchro ch'án kixin: “Tí nkexro t'ántaxínhìn it'é la ko ìné la chrók'uen.”* ⁵A ntá jahará tsintáchrórá kixin ó nchoxon kixin ijnko nkexro tsochénga it'é la ko ìné kixin: “It'èni, ìnéni, chrokjuahya tsjinkitsani tí jaha kixin kaín nkehe chóntani la ó chjéheni Dios.” ⁶A ntá jnkójín nkexro tsontáchro ch'án tíhi ntá í t'ichjánxinhya tsjinkítsa tí it'é la ko tí ìné, mé xíkaha tsixrorá. Mé xíkaha jahará kujtohérá tí nkehe k'uetóan Dios kixin tjinkáonrá chrókjuich'erá éxí kjuích'e tí sín tsík'axrjeníxinrá. ⁷Jahará la jehya jnkójínxón tjenkayáxinrá. Ntoá tsintáchro tí ch'ín Isaías, tí nkexro k'uéchrónka itén Dios ósé. Mé chrónka ch'án kixin nkexrí tjejórá la xíkaha tsíkjin ch'án kixin:

⁸Tí chojni tí chjasin i ir'va ó xraxinkakonxín sín tí janhan a ntá tí asén sín la ikjín kuitohe sín tí janhan.

⁹Méxra ó chónko tóchjina sín xraxinkaon sín tí janhan kixin tí nkehe tjako sín la tí nkehe tsík'etoan chojni ó.† Mé xíkaha ichro itén Dios.

¹⁰Ntá k'uíyehé ch'ín Jesús tí chojni ínaá la ntáchro ch'án kixin:

—Chrókuinhírá la ko chrókuiénxinrá. ¹¹Kaín nkehe ine chojni la ó nchoxon, jehya jie. Tí jie la tí nkehe t'axrjexín ir'va chojni —mé xíkaha ichro ch'ín Jesús.

¹²A ntá tí sín k'uájiko ch'ín Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

¹³Ntá kjuátehe ch'án ntáchro ch'án kixin:

—Kaín tí ka jehya T'aná tjen nkaya nkajní k'uenkaxin la mé ts'axrjenkíxin nuèe. ¹⁴Nté títóhé sín. Tí jehe sín la ntakótán sín la t'etuenhen sín í so sín ntakótán. A ntá tíó ijnko chojni ntakótán tjitaón ntja la ntá yóí sín ts'anótjenyá sín ichrén tòye —ichro ch'án.

¹⁵Ntá ntáchro ch'ín Pedro kixin:

—Chronka nkexrí t'axrjexín tíha —ichro ch'án.

¹⁶Ntá kjuátehe ch'ín Jesús ntáchro ch'án kixin:

—¿Á kjaxinrá jahará tiénxinhyará? ¹⁷¿Á tiénxinhyará kixin kaín tí nkehe ineni na sátji nkaya tseeni na ko xík'axrjexín tí cuérpóeni ínaá? ¹⁸A ntá tí nkehe t'axrjexín ir'va chojni la t'axrjeníxin asén chojni la tíha la mé tí jie tjasixín chojni. ¹⁹Kaín tíha mé t'axrjeníxin asén chojni, mé tí jínahya tjenkayáxin sín la ko tí t'óyán kichó sín la ko tí tjachehe kichó sín la ko tí chóna sín í jnko chojni chjin ókjé la ko teé sín la ko tí kjuach'ia la ko tí t'ántaxínhìn kichó sín. ²⁰Tí nkehe a mé tjasixín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xíkaha ichro ch'ín Jesús.

Ijnko tjan jehya sín israelita mé kuinkáchónki tí ch'ín Jesús

(Mr. 7.24-30)

²¹Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. ²²Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kixin:

—Ìnchéni, Xjeen David, tikonóhéni kixin tí xjeenni chjin la mé níhi tjan chóna tjan ijnko nchakuen tí jínahya —ichro ti tjan a.

²³A ntá ch'ín Jesús la ninkehó kjuátehehya ch'án. A ntá tí sín k'uájiko ch'án na kóchjina sín la ntáche sín ch'án kixin:

—Tétuenhén tjan sátsji tjan kixin tinkák'óyako tjan chréhe tjan tí jeheni —ichro sín.

²⁴Ntá ntáchro ch'ín Jesús kixin:

—Dios mé ichr'ánna tsjéyá jehó tí kolélo kjuíchroe kuènte nación Israel —ichro ch'án.

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

²⁵ A ntá tí tjan a kóchjina la kjuák'exín toch'in tjan nkayakon tí ch'ín Jesús la ntáchro tjan kixin:

—Inchéni, tjínkítsani —ichro tjan.

²⁶ A ntá ch'ín Jesús kjuátehe ch'án ntáchro ch'án kixin:

—Jehya tí jína chrókuakitsjahā niotjā tí xjan ntá chrótjahā koniā chrókjóne va —ichro ch'án.

²⁷ A ntá jehe tjan la ntáchro tjan kixin:

—Chaxín xíkaha, ìnchéni. Kjánchó kjónté tí koniā na tí nkehe tsjixènjinnkí mesa kuènte ìnché la ine va —ichro tjan.

²⁸ Ntá ntáchro ch'ín Jesús kixin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jína.

Ch'ín Jesús mé kjuínchekitohe jína nchónhya chojni níhi

²⁹ Ntá ch'ín Jesús mé sákjuúxin ch'án ntiha la kjuíji ch'án chrínta ntayaon Galilea. Ntá chrín ch'án ijnko jna la ntiha kjuák'etjaxin ch'án. ³⁰ Ntá kójnkotsé itsjé chojni tí tjen ch'án la kjuíkao sín tí sinníhi, mé tí sín xitjahya tji la ko tí sín t'íkonhya la ko tí sín nixjahya la ko tí sín tsíxénká la kaín xín tí í so sinníhi. K'uejo sín tí sinníhi toté tí ch'ín Jesús kixin jehe ch'án mé sinchekitohe ch'án sín jína. ³¹ Kaín chojni la imá chrakon sín kixin k'uúkon sín kixin tí sín k'uénixjahya la ó nixja sín la tí sín tsíxénká la tsíkitohe sín jína la tí sín xitjahya tji la ó tji sín la ko tí sín k'uék'íkonhya la ó t'íkon sín. Méxra kjuanchehe sín kjuasáyé tí Dios kuènte tí sín Israel.

Ch'ín Jesús mé kjuínchekjine noó mil chojni

(Mr. 8.1-10)

³² Ntá k'uúyehē ch'ín Jesús tí sín k'uájiko ch'án la ntáchro ch'án kixin:

—Imá tikonóahā kaín tí chojni kixin ó ní yaon tjejókoni sín ntá kjuèhe sín nkehe sine sín. Tjinkakonhya chrókuétuanhan sín sáchrókjui sín ntoe sín kixin naxā nehya sín la ntā ó tsoxiénxín sín kjinta —ichro ch'án.

³³ Ntá ntáchro tí sín k'uájiko ch'án kixin:

—Ntá jaha la ó noha kixin nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'an kixin:

—¿Nkekjaín niotjā chontará? —ichro ch'án.

Ntá ntáchro sín kixin:

—Yato niotjā chóntani la ko iso koche ntsíntsí —ichro sín.

³⁵ Ntá ch'ín Jesús k'uetōan ch'án kixin kaín xín sín ts'ixitjaxin sín nonte, ichro ch'án.

³⁶ Ntá kuákja ch'án tí yato niotjā la ko tí koche ntsíntsí la kjuanchehe ch'án kjuasáyé Dios. Ntá kóchrít'ō ch'án tí niotjā a la ntá k'uetuēnhen ch'án tí sín k'uájiko ch'án kixin ts'óxíkayehē sín tí niotjā la ko tí koche kaín xín tí sín siín a, sine sín. ³⁷ Na mé kaín xín sín kjóne sín na kókjehe sín ntá kjuenájín sín yatontaxra tot'ō tí nkehe naxā tsíxehē. ³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a. ³⁹ Ntá ch'ín Jesús mé nixjehē ch'án sín sákjuí sín la ntá k'uit'ótjen ch'án ntabárcō la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxin sín ch'án la kjuanchehe sín ch'án kixin chrókjuakoxin ch'án ijnko kjuaxroan kixin á chaxín jehe ch'án tsíkixin ch'án tí tjen Dios. ² A ntá ch'ín Jesús na kjuátehe ch'án, ntáchro ch'án kixin:

—Jahará ntáchrórá kixin ijie ntá kónjín ó tsi ijnko yaon jína kixin kjátse nkajní. ³ La ntá nchítjen ntáchrórá kixin ijie la náxrjónhya kixin kjátse nkajní la tjenkáya tjuí. Méxra jahará ntoáhya tjenkayáxinrá. Ó nohará tjátsoanrá tí nkajní, a ntá tjátsoanhyará tí kjuaxroan sítónhen jie. ⁴ Tí sín jínahya la tí sín titekakonhya la tjanchia sín ijnko kjuaxroan jíé. A ntá ts'ikonhyará í jnko kjuaxroan, jehó tí kjuaxroan kuènte ch'ín Jonás mé ts'ikonrá —mé xikaha ichro ch'ín Jesús.

Ntá kuítqhe ch'án sín la sákjuí ch'án.

Ch'ín Jesús ntáchro kixin chrókuitekakonhya sín tí nkehe tjako tí sín fariseo

(Mr. 8.14-21)

⁵ Ntá tí sín k'uájiko ch'ín Jesús mé k'uátòye sín ntayaon la ntá k'uitjáyenhen sín tsíkjikohya sín niotja. ⁶ Ntá ntáchro ch'ín Jesús kixin:

—Chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kíchó sín ntachro sín kixin:

—Mé xikaha ichro ch'án kixin tsíkjikohyani niotja —ichro sín.

⁸ Ntá kónohe ch'ín Jesús kixin nkehe tí kjo sín kíchó sín, ntá ntáchro ch'án kixin:

—¿Nkekuènté tjórá kixin chontahyará niotja? Jahará la intsíkoá tinkachónkirá tí janhan. ⁹ Jahará ¿á naxa tiénxinhyará la ko á xráxinkákonhyará tí in'ó niotja k'óxikayeheni kjóne tí in'ó mil chojni la ko á xráxinkákonhyará nkekjaín ntaxra kjuenájinnrá tí nkehe tsíxehe? ¹⁰ La ko ¿á xráxinkákonhyará jahará tí yato niotja xikayeheni kjóne tí noó mil chojni la ko á xráxinkákonhyará nkekjaín ntaxra kjuenájinnrá tí nkehe tsíxehe? ¹¹ A ntá ¿nkekuènté kixin kuiénxinhyará kixin janhan la jehya kuènte niotja tjénixja tíó ntáxrjan kixin chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo? —mé xikaha ichro ch'ín Jesús.

¹² Na ntá kuiénxín sín kixin nixjahya ch'án kuènte tí xroan t'ánkíxin niotja. Náhi. Tjenixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

Chrónka ch'ín Pedro kixin ch'ín Jesús mé tí nkexro Cristo

(Mr. 8.27-30; Lc. 9.18-21)

¹³ Kjuíji ch'ín Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátqhe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elías, ichro sín. A ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'ín Jesús kixin:

—¿A ntá jahará nkechrórá kixin nkexro tí janhan? —ichro ch'án.

¹⁶ A ntá ch'ín Simón Pedro kjuátqhe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátqhe ch'ín Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha. ¹⁸ Méxra ntáxrjan kixin jaha mé Pedro mé t'axrjexín kixin ijnko xro la chrítaón tí xro mé sít'ána njnko la kjónté tí kjuachaxin kuènte kjuach'én la tsjachahya sinchek'itjáyan. ¹⁹ Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní síin kjuachaxin.

²⁰ Ntá ch'ín Jesús mé k'uétuènen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

Ch'ín Jesús chrónka ch'án kixin its'en ch'án
(Mr. 8.31—9.1; Lc. 9.22-27)

²¹ Ntá ch'ín Jesús kjuankíxin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etoan kuènte nínko la tí sín nch'at'á tjetooan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyán sín ch'án kjánchó tí nixin yaon mé tsoxechón ch'án inaá. ²² Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehe ch'án ntáchro ch'án kixin:

—Kjá Dios tsjanjonhya kjuachaxin xikaha tsonhan Ìnchéni kixin jaha la xitjahya tsjasóte xikaha —ichro ch'ín Pedro.

²³ A ntá ch'ín Jesús mé kuinkátjá ch'án la nixjehe ch'án tí ch'ín Pedro, ntáchro ch'án kixin:

—Sátjia ntáha, Sátanas. Tjiatéhya tí jaha tí nkehe tsonna. Jaha chrók'uínkakhén tí nkehe tjinkaon Dios. Jaha tjenkayáxinhya éxi tjinkaon Dios. Náhí. Tjenkayáxian éxi tjenkayáxin chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntáchro ch'án kixin:

—Jnkojínrá tjinkáonrá tsochréhérá tí janhan la t'ichjánxin tsitohérá kaín tí nkehe tjaké asánrá, ntá tsámará tí ntacruz kuéntará, a ntá tsochréhérá tí janhan. ²⁵ A ntá tí nkexro tjinkaon jehó sinchekaá asén la ts'itjayan. A ntá tí nkexro chrókjuinchek'itjayanxín asén kixin tinkáchónki sín tí janhan la tsaá. ²⁶ ¿A ntá nkehe tsonhen tí chrókjuacha ijnko chojni chróchónka kaín nkehe siín chjasintajni a ntá tí kjuachón chrókjuinchek'itjayan? ¿Nkehe chrókjuenka chojni kixin chróchónka tí kjuachón? ²⁷ Tí Xjeen Dios K'óna Chojni tsikao ch'án tí kjuachaxin jié kuènte It'é ch'án tjen nkaya nkajni la kaín tí sín ángel tsikao ch'án na ntá tsjenkehe ch'án jnkojnko chojni nkexrí tí xra kjuich'e jnkojnko tí jehe sín. ²⁸ Chaxín xrjanka kixin isorá tjejorá ntihi la naxa ts'ényará naxa ts'ikonjiará kixin nkexrí tí kjuachaxin tsochónka tí Xjeen Dios K'óna Chojni tí tsikao ch'án kjuachaxin jié —ichro ch'ín Jesús.

17

Ch'ín Jesús mé k'uixitóxin nkexrí tsjehe ch'án
(Mr. 9.2-13; Lc. 9.28-36)

¹ Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jna imá noi. ² Ntá ntiha tjejó sín ntá xrínahya k'uíkon sín kixin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjákiní tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan. ³ Na ntá xrínahya k'uíkon sín itjen ch'ín Moisés la ko tí ch'ín Elías tjejótjo sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kixin:

—Ìnchéni, jína kixin tjejóni ntihi. Tí tjinkávan la chrókjuich'évani iní nchia la mé ijnko kuéntá jaha la ijnko kuènte ch'ín Moisés la í jnko kuènte ch'ín Elías —ichro ch'án.

⁵ Ntá naxa tjenixja ch'ín Pedro na ntá xrínahya ikui ijnko tjuí imá t'inkaséyan kjuák'etja chrítaón tí jna tjejó sín. Ntá xrínahya chríkjan tí tjuí kuínhin sín itén ijnko nkexro nixja na mé ntáchro kixin:

—Tíhi mé xjanna. Imá tjuahá ch'án la ko chàna kixin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xikaha la ntá kjuítsínka sín nonte kixin imá chrakon sín.

⁷ Na ntá ch'ín Jesús mé kóchjina tí tjejó sín la kuákóxin sín ch'án la ntáchro ch'án kixin:

—T'aya chrakonhyará —ichro ch'án.

⁸ Na ntá xrínahya k'uíkon sín kixin kohya ninkexró. Jehó ch'ín Jesús mé tjen.

⁹ Na ntá tí k'uínkajinxín sín tí jna ntá k'uetooan ch'ín Jesús, ntáchro ch'án kixin:

—Ninkexró chenkahyará tí nkehe k'uíkonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuènté ntáchro tí sín maestro tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe. ¹² Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxí kóxrjínhin sín. Mé xikaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xikaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuènte Juan Bautista.

Ch'ín Jesús mé kjuínchekitohe jína ijnko xjan t'aniáte

(Mr. 9.14-29; Lc. 9.37-43)

¹⁴ Ntá tió k'uíji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'ín ch'án nkayakon ch'án. La ntáchro ch'án kixin:

¹⁵ —Ìnchéni, tikonóehéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án ntá. ¹⁶ Ntá kjuíkəoni ch'án ntihi la tí sín xrikoá la kjuachahya sín kjuínchekitohe ch'án jína.

¹⁷ A ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jje. ¿Xá hasta nkesá tjinkáonrá naxa ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uetuenhen ch'án tí nchakuen tí jínahya la ntá k'uaxrjexín tí nchakuen tí jínahya tí chánjan la tuénxín kuítóhe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakítsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxí ijnko tje mostaza intsí la ntá chróntácherá tí jnə kixin: “Sátjixian ntihi la sátsjia ókjé”, chróchorá chróntácherá tí jnə la ntá tí jnə sáchrókjuixin ntiha. Mé xikaha kaín nkehe chrókjuachará chrókjuich'erá tí chaxín tinkachónkirá tí janhan. ²¹ A ntá tí tsakítsjerá ijnko nchakuen tí jínahya la t'ichjánxin tsonixjehérá Dios la ko sintehyará.

Ch'ín Jesús chrónka ch'án inaá kixin its'en ch'án

(Mr. 9.30-32; Lc. 9.43-45)

²² Naxa k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'etoan sinchekjasóte sín ch'án ²³ la ts'oyán sín ch'án. A ntá tí yaon nixin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenkə ch'án tí nkehe kjuanchia tí sín kuènte ninko

²⁴ Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkí kuènte ninko mé sákjuítsjehe sín tí ch'ín Pedro la kjuanchankí sín kixin:

—Tí maestro kuèntá la, ¿a tjenkahya ch'án tí nkehe tjanchia tí sín nchekjènkí kuènte ninko? —ichro sín.

²⁵ Ntá kjuátehe ch'ín Pedro, ntáchro ch'án kixin:

—Kjá tjenkə ch'án —ichro ch'án.

Ntá k'uixenhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenka tí nkehe tjanchia tí sín t'etoan chjasintajni, á tí sín kuènte ntiho o á tí sín tsíkjiixin ókjé? —ichro ch'ín Jesús.

²⁶ Ntá kjuátehe ch'ín Pedro, ntáchro ch'án kixin:

—Tí sín tsíkjiixin ókjé mé tjenka sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxinhya chrókjuenka sín. ²⁷ Kjánchó tjínkakhonhya tsonínkaon ninkexró ntihi. La ntá sátsjia tí ntayaon sátsjikoá tí ichjon chóna gancho tséxin sín koche la ntaha itsé tí chjon chrínki ntayaon. Ntá tsákjá tí koche saxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenka kaín tí tjásikáha sín la ko tí tjásíkehé sín jaha. Táha mé sátsjikoá tjenka —ichro ch'ín Jesús.

18

¿Nkexro tí imá ts'etoan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etoan tí kjuachaxin kuènte nkaya nkajní? —ichro sín.

² Ntá ch'ín Jesús mé k'uíyehé ch'án ijnko chánjan la kjuak'e jnkosiné tí tjejó tí jehe sín ³ la ntáchro ch'án kixin:

—Chaxín xrjanka kixin tí ts'ónahyará éxí ijnko xjan ntsí ntá xitjahya tsákjará tí kjuachaxin kuènte Dios. ⁴ Tí jnkojín nkexro ts'óna éxí tí chánjan ihnkehya la mé antsí tjejoan ntiha. ⁵ A ntá tí nkexro ts'áyehé ijnko chánjan kixin tinkáchónki sín tí janhan la mé xikaha éxí chrók'uáyehé sín tí janhan —mé xikaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ Tí jnkojín nkexro chrókjuachroe ijnko chánjan ntsí tinkáchónki tí janhan la íchá jína chrókjuincheteyá sín ch'án ijnko xro tsík'óna xrochre ntá chrókjuikakánki ch'án ntayaon ninka. ⁷ Imá náxrjónhya tjejó tí sín chjasintajni kixin síin nkehe tjasixín chojni jie. Xráxín la jehí síin, a ntá nòa tí nkexro tjasin tí nkehe tsjasixín chojni jie.

⁸ Tí itjá o totá tjásixián jie na chrókójina chrókochrínjian chróchr'an ikjín kixin íchá jína chróchonta kjuachón kjónté it'oó itjá o it'oó totá. Á ntá tí yóí itjá o yóí totá chróchonta tsjásixián jie la tíha mé sátsjixián tí síche xrohi jnkochrín. ⁹ La ko kjaxin tí ikuan tjásixian jie na chrókójina chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yóí ikuan chróchonta tsjásixián jie la tíha mé sátsjixián tí síche xrohi jnkochrín.

Kjuíncheyóexin ch'ín Jesús éxí ijnko kolélo tsík'itjáyan

(Lc. 15.3-7)

¹⁰ Chrókókjoniéhyará nijnko tí chánjan ntsíntsí. Tjonkará kixin nkaya nkajní la tí sín ángel kuènte tí xjanntsí la xráxín tjejó sín tí tjen T'aná nkaya nkajní. ¹¹ Tí Xjeen Dios K'óna Chojni la mé ikui kixin chrókjuinchekaá tí chojni xrichroe.

¹² ¿Jahará nkechorá? Ijnko chojni chóna ijnko ciento kolélo ntá chrók'uitjáyan ijnko va na ¿á chrókuítqehya ch'án tí noventa y nueve va tí jna ó a ntá á chrókjuikjeyáhya ch'án tí ijnko tí ko k'uitjáyan ní? ¹³ A ntá tí tsjacha ch'án ts'itja ch'án va ntá antsí tsochéhe ch'án kixin tí kolélo k'uitja ch'án la ntá kánhyó tsochéhe ch'án kixin tjejó tí noventa y nueve ko tsík'itjáyanhya va. ¹⁴ Mé xikaha kjaxin It'eni tjen nkaya nkajní la tjinkakhonhya ch'án kixin chrók'uitjáyan ninkexró kjónté ijnko chojni kánhyó tjejoan.

Chrók'uitjáyanhanrá tí jie kjuasinhanrá kíchuára

(Lc. 17.3)

15 'Tí kichuá tí chrókjuít'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jię kjuasin ch'án. A ntá tí kjuacha nixjehé tí kichuá la í kohya kjuanínkaon. 16 A ntá tí tahya ch'án kuentá nkechrua la ntá ntáche á jnko o yaá chojni sátjikoá kixin tsinhin sín á chaxín titekakonhya ch'án. 17 A ntá tí kjónté xikaha naxa titekakuenhya ch'án sín la ntá chenka tí sín tsikójnkotsé nkehe tí jię kjuasin ch'án la ntá tí naxa titekakuenhya ch'án tí sín tsikójnkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjènkí.

18 'Chaxín ntáxrjan kixin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajni tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihi chjasintajni la kjaxin ntaha nkaya nkajni tsjanjon Dios kjuachaxin.

19 'Kjaxin ntáxrjan kixin tí tjejó yaará ntihi chjasintajni la tí jnkokoá tjejótkayáxinrá chrókjuancheherá Dios ijnko nkehe tjinkáonrá la ntá jehe ch'án mé tsotjáhará ch'án. 20 Kixin tí tjejó yaá o iy'á chojni tjejó jnkokoá t'ákjenxin sín niná la janhan koína tjéntaxian tí tjejó sín ntiha.

21 Ntá kóchjina ch'ín Pedro mé kjuanchankí ch'án ntáchro ch'án kixin:

—Inchéni, ¿nkekjaín veces chrók'uitjáyenheni tí jię kjuasin kichó ni? ¿Á yato veces ó ní? —ichro ch'án.

22 Ntá kjuátehe ch'ín Jesús, ntáchro ch'án kixin:

—Náhí, jehya yato veces ó. Náhí, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uitjáyenhya ch'án ijie kichó ch'án

23 'Tí kjuachaxin kuènte Dios la éxí yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra. 24 Ntá kjuankixin ch'án tsítsínkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon. 25 Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetóan ch'án kixin tí nkexro a mé tsoxi ch'án la koí tí ichjién ch'án la ko xjeen ch'án la ko kaín nkehe kuènte ch'án kixin ntá xikaha mé tsoxenka kaín tí síká ch'án. 26 A ntá tí nkexro ch'e xra mé kjuák'exín toch'in ch'án nkayakon tí rey la chrónóehę ch'án, ntáchro ch'án kixin: “Jaha Inchéni tikonóehęni la kjónté kjaxón tsjenkahani kaín tí síkahani”, ichro ch'án. 27 A ntá tí ch'ín rey kuikonóehę ch'án tí ch'ín a kjónté itsjé síká ch'án, ntá kuítóhe ch'án sákjuí. 28 A ntá tí sákjuí tí ch'ín a ntá xrínahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: “;Tsjénkana tí nkehe tjasíkàna ní o náhí!” ichro ch'án. 29 A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóehę ch'án ntáchro ch'án kixin: “Tikonóehęni ijie la kjónté kjaxón tsjenkahani kaín tí nkehe síkahani”, ichro ch'án. 30 A ntá jehe ch'án la kuikonóehya ch'án. K'uetóan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án. 31 Ntá tí í so sín ch'exón xra mé k'uikon sín la ntá imá kóxakonhen sín la sákjuíchénka sín tí lámoé sín nkexrí kaá kónhen tí ch'ín síká. 32 A ntá tí lamo mé k'uetóan tsjik'íyehę sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuíntak'itjáyanhan tí nkehe tjasíkàna kixin jaha chronóana. 33 A ntá jaha mé kjaxin chrókuikonóehę tí nkexro choxian éxí janhan kuikonóaha tí jaha”, ichro tí ch'ín lamo. 34 A ntá imá kónínkaon tí lamo a la k'uetóan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

35 A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajni xikaha sit'ahará jahará tí jehya kaín asánrá ts'itjáyanhanrá tí jię chónta kichuárá —ichro ch'ín Jesús.

19

*Tjako ch'ín Jesús kuènte tí sín t'itjíhi kichó
(Mr. 10.1-12; Lc. 16.18)*

¹ **A** ntá kjuixin nixja ch'ín Jesús kaín tíha, ntá sákjuixin ch'án estado Galilea la kjuíji ch'án estado Judea nó tóhe tí ntario Jordán. ² Ntá nchónhya chojni kjuíjichrehe sín ch'án ntá ntiha mé kjuínchekitohe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á síin kjuachaxin tsjákehe jnkojín chojni ichjién kjónté kohya jie jie? —mé xikaha kjuanchankí sín.

⁴ Ntá kjuátehe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'éna kaín chojni síin chjasintajni tí xrankíxixín, la tí nkexro mé “kjuích'éna ch'án chojni ntoa ko chojni chjin”?* ⁵ La ko ntáchro kixin: “Mé xikaha tí chojni ntoa la tsítóhe sín it'é sín la ko iné sín la tsakja sín ichjién sín la yói sín la éxí ó jnko chojni xikaha ts'óna sín.”† ⁶ Mé xikaha la í jehya yaá chojni tí jehe sín. Náhi. Ó jnko chojni k'óna tí jehe sín la mé Dios kjuanjón kjuachaxin kixin kuákja kichó sín, la i xitjahya ts'itjíhi kichó sín.

⁷ Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'uetóan kixin ts'óna ijnko xroon tsakja tí ichjién kixin tsjákeexín kichó sín?‡ —ichro tí sín fariseo.

⁸ Ntá ntáchro ch'ín Jesús kixin:

—**A** ntá jahará titekákonhyará. Méxra ch'ín Moisés kjuanjón ch'án kjuachaxin kixin ts'óna tí xroon ts'itjíexín kichuárá. Kjánchó tí xrankíxixín la xikahya kónhen. ⁹ Méxra ntáxrjan kixin jnkojín sín tjákehe ichjién tí kjuasinhya jie, chóntahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xikaha la ó jie tíha. La ko kjaxin tí ijnko chojni chjin tsíkítsínkehe ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xikaha tjanjonko kichó sín chrók'uitjíhi kichó sín la íchá jína chrókóteehya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjón Dios kjuachaxin tienxín sín. ¹² Siín iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuích'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'án xra. Tí sín tsjacha sich'e tíha la chrókjuich'e sín xikaha.

*Ch'ín Jesús mé kjuíncheyaon ch'án chánjan
(Mr. 10.13-16; Lc. 18.15-17)*

¹³ Ntá ikjui chojni kjuíkao sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kónínkakónhen sín tí sín kjuíkao tí xjan. ¹⁴ **A** ntá ntáchro ch'ín Jesús kixin:

—Nté títóhéra tsoxrakoa xjan tí tjén janhan la t'ínkakuènhyará xjan kixin tí sín kuènte kjuachaxin nkaya nkajni la mé tóyóhe éxí tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

*Ijnko ch'ín ntasoá rico mé kjuínixjehe ch'án tí ch'ín Jesús
(Mr. 10.17-31; Lc. 18.18-30)*

¹⁶ **A** ntá ijnko ch'ín ntasoá sákjuítsjehe ch'án tí ch'ín Jesús la kjuanchankíhi ch'án kixin: —Jaha la ijnko Maestro jína. La ntá ¿nkehe jína chrókjuich'eni kixin chróchóntani kjuachón jnkochríxín? —ichro ch'án.

¹⁷ Ntá ch'ín Jesús kjuátehe ch'án, ntáchro ch'án kixin:

* 19:4 19.4: Génesis 1.27; 5.2 † 19:5 Génesis 2.24 ‡ 19:7 Deuteronomio 24.1-4

—¿Nkekuènté ntáchrua kíxin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochrínín la títekávan tí nkehe k'uetōan Dios —ichro ch'ín Jesús.

¹⁸ Ntá ntáchro tí ch'ín ntasoá kíxin:

—¿Nkehe tíha? —ichro ch'án.

Ntá ntáchro ch'ín Jesús kíxin:

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuènte ókjé chojni ¹⁹ la ko chrókjuíkosáyehé it'á la ko ìná la ko chrótjuèhé kíchuá éxí tjuèxian asán. § —mé xíkaha ichro ch'ín Jesús.

²⁰ Ntá ntáchro tí ch'ín ntasoá kíxin:

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyán? —ichro ch'án.

²¹ Ntá ntáchro ch'ín Jesús kíxin:

—Tí tjinkávan antsí ntoá sìnchexiteyá la sátjia sìnchekjia kaín tí nkehe chonta la sìnchekitonhén tí sín nò. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xíkaha ntá t'ává ch'án sákjuí ch'án kíxin imá itsjé nkehe chóna ch'án.

²³ Ntá ch'ín Jesús mé nixjehé ch'án tí sín k'uájiko ch'án, ntáchro ch'án kíxin:

—Chaxín tjonkará kíxin tí chojni chóna imá itsjé nkehe na imá xra ts'áyéhe sín tí kjuachaxin kuènte nkaya nkajní. ²⁴ Kjatée xrxanka kíxin antsí xrahya chrók'uatsínka ijnko kocamello ijnko tjar'i ntachica tjexrja. A ntá antsí xra kíxin tí sín chóna itsjé nkehe chrók'uáyéhe tí kjuachaxin kuènte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kíchó sín kíxin:

—Tí xíkaha la ¿xá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kíxin:

—Chojni chjasintajni la xitjahya xíkaha sich'e. A ntá Dios mé tsjacha sich'e xíkaha —ichro ch'ín Jesús.

²⁷ Ntá ntáchro ch'ín Pedro kíxin:

—Inchéni, jeheni kaín ni la kuítóheni kaín nkehe chóntani kíxin tsochréheni tí jaha. A ntá ¿nkehe ts'áyéheni? —ichro ch'án.

²⁸ Ntá kjuátéhe ch'ín Jesús kíxin:

—Chaxín ntáxrjan kíxin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochóna kjuachaxin jíé la ntá kjaxinrá jahará chréhérá tí janhan la ts'ejorá teyó trono sìnchekitoexínrá ijíé kaín tí sín tsík'axrjeníxin tí teyó xjeen ch'ín Israel.

²⁹ La ko kaín tí sín kuítóhe sín ntoe sín la ko kuítóhe sín tí kíchó sín la ko kuítóhe sín it'é sín o ìné sín la ko kuítóhe sín ichjién sín la ko xjeen sín la ko nontee sín kíxin tinkáchónki sín tí janhan, na ntá antsí má tsochóna sín la ko kjaxin tsochóna sín kjuachón jnkochrínín. ³⁰ A ntá nchónhya tí sín t'etōan ijie, mé tsjixixín tsochréhe sín. A ntá nchónhya tí sín t'ítuenhen ijie la tí sín a mé ts'etōan sín tí ntíha.

20

Ch'ín Jesús kjuíncheyóexin ch'án éxí tí sín ch'e xra

¹ Tí kjuachaxin kuènte Dios la éxí yóhe ijnko chojni chóna xra nontee ch'án la ntá ijnko yaon imá nchítjen sákjuíkjayá ch'án chojni tsotjéhe ch'án to uva. ² Ntá tí k'uitja ch'án tí sín sich'ehe ch'án xra ntá ikjo ch'án sín kíxin ijnko denario tsjenkehe ch'án sín tí xra sich'e sín nontee ch'án tí yaon a. ³ Ntá chr'éxin como las nueve nchítjen ntá sákjuí ch'án ntasin la k'uíkon ch'án í so sín tjejó ntasin chóntahya sín xra. ⁴ Ntá nixjehé ch'án sín ntáchro ch'án

kixin: “Kjāxinrá sáchrókjuirá chrókjuich'erá xṛa nonteēni la jína chrókjuénkahaṛá”, ichro ch'án. La ntá jehe sín sákjuí sín. ⁵ A ntá tí ìnché nonte la sákjuí ch'án inaá chonkixin naxa xík'itja ch'án í so sín ch'ehe ch'án xṛa la nta tí las tres kónjín la xíkaha naxa xík'itja ch'án í so sín inaá. ⁶ A ntá las cinco kónjín sáxíkji ch'án nta sin inaá la k'uitja ch'án í so chojni ntaha chóntahya sín xṛa la ntá kjuanchankíhi ch'án sín kixin: “¿Nkekuèté tjejorá ntihi ch'ehyará xṛa kuenté yaon? —ichro ch'án.

⁷ Ntá ntáchro sín kixin: “Kohya nkexro kjuanjon xṛa chrókjuich'eni”, ichro sín. Ntá ntáchro ch'án kixin: “Kjāxinrá chrókjuirá chrókjuich'erá xṛa nonteēni la jína chrókjuénkahaṛá”, ichro ch'án. ⁸ A ntá ó kóntó ntá tí ìnché nonte mé nixjehe ch'án tí ch'ín t'etoan sítónhen xṛa nontee ch'án la ntáchro ch'án kixin: “T'iyehé kaín tí sín kjuích'e xṛa tjénkehé sín. Tjankíxian tjénkehé tí chojni kjuixixín k'uixenhen xṛa la chr'éxin tjénkehé tí sín saoxín k'uixenhen xṛa”, ichro ch'án. ⁹ A ntá kóchjina kaín tí sín k'uixenhen xṛa las cinco kónjín la jnkojnko sín k'uáyéhe sín jnkojnko denario. ¹⁰ Ntá chr'éxin, tió kóchjina tí sín k'uixenhen xṛa nchítjen la ntá kjuenkayáxin sín kixin antsí itsjé chichaon chrókjuacha sín, ichro sín. Kjánchó kjāxin sín k'uáyéhe sín jnkojnko denario ó. ¹¹ A ntá tí kjuachahya sín tjete ntá kjuankixin sín kónínakonhen sín tí ìnché nonte ¹² la ntáchro sín kixin: “Tí sín ikui kjuixixín la kjuích'e sín xṛa jnkokoá hora la ntá kjāxin kjuénkehé sín jnkokón éxí kjuacha tí jeheni. La ntá jeheni kjuích'eni xṛa kjónté sóa la kuenté yaon kjuích'eni xṛa”, ichro sín. ¹³ A ntá kjuátehe tí ìnché nonte nixjehe ch'án ijnko tí jehe sín, ntáchro ch'án kixin: “Janhan la kjuít'ayahyará ninkehó. Ó kuítóexínni kixin ijnko denario tsjénkahaṛá tí yaon. ¹⁴ Ntá tsákjá chíchakoan la sátjia. Janhan tjínkavan tsjénkahaṛá tí sín k'uixenhen kjuixixín éxí tí kjuénkaha jaha. ¹⁵ ¿Á chontahya janhan kjuachaxin xíkaha chrókjuénkahaṛá sín kixin tíha la chíchakonna? ¿Nkekuèté tóchjinoxínhan jaha kixin xíkaha kjuénkahaṛá sín?” ichro ch'án. ¹⁶ Mé xíkaha iso tí sín tsjixixín chréhe sín la tí sín a senóxin ntiha la ntá itsjé tí sín senó la mé tsjixixín tsochréhe sín ntiha kixin nchónhya sín k'uíyahaṛá kjánchó tsjéhya sín k'uitja —ichro ch'ín Jesús.

Chrónka ch'ín Jesús inaá kixin its'en ch'án

(Mr. 10.32-34; Lc. 18.31-34)

¹⁷ Ntá ch'ín Jesús sákjuí ch'án ntja nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí siín tí sín nchat'á t'etoan la ko tí sín maestro tí tjako ley. Ntá jehe sín ts'etoan sín kixin its'en ch'án. ¹⁹ Ntá tsjikaán sín ch'án tí siín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkani sín ch'án ijnko ntacruz kjánchó yaon níxin mé tsoxechón ch'án inaá —mé xíkaha chrónka ch'ín Jesús.

Tí nkehe kjuanchia tí ìné ch'ín Jacobo la ko ch'ín Juan

(Mr. 10.35-45)

²⁰ A ntá tí ìné tí xjeen ch'ín Zebedeo mé kjuíkao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'ín tjan nkayakon tí ch'ín Jesús la chrónóhehe tjan ch'án. ²¹ Ntá ch'ín Jesús kjuanchankíhi ch'án tjan kixin:

—¿Nkehe tjínkavan? —ichro ch'án.

Ntá kjuátehe tjan ntáchro tjan kixin:

—Tió tsétoanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

Ntá kjuátehe sín, ntáchro sín kixin:

—Kja tsjachani —ichro sín.

²³ Ntá ntáchro ch'ín Jesús kixin:

—Chaxín kjónté chrókjuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajní mé nohe kixin nkexro tsíkjeýá ch'án ts'áyéhe tíha —ichro ch'ín Jesús.

²⁴ Ntá kuínhin tí ite sín kixin xíkaha tsíkjanhia tí sín a ntá kónínkakonhen sín tí yaá a. ²⁵ A ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'etóan chjasintajni la imá t'etueñhen sín kaín chojni la tí sín t'etóan imá nchehnkehe asén sín kixin ihyé sín t'etóan sín. ²⁶ Kjánchó jahará la xíkahya chrókjuich'erá. Náhí. Tí jnkójínrá tjinkáonrá chrókuétóanrá la chrókjuínkítará tí í so sín. ²⁷ A ntá tí jnkójínrá tjinkáonrá chrókuétóanrá mé t'ichjánxin senó chrókjuákoxínrá chrókjuich'eherá kichuárá xra. ²⁸ Mé xíkaha tí Xjeen Dios K'óna Chojni mé kuihya kixin chojni chrókjuich'ehe xra. Náhí. Ikui ch'án kixin sich'ehe ch'án sín xra la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitohe jína yaá chojni t'ikonhya

(Mr. 10.46-52; Lc. 18.35-43)

²⁹ Ntá k'uaxrjexín sín chjasin Jericó la nchónhya chojni chréhe tí ch'ín Jesús. ³⁰ Ntá ntaha chrínta ntia tjejótjaxin yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuankixin t'íyehé sín ch'án ntáchro sín kixin:

—Inchéni, jaha tsík'axrjeníxian David, tikonóehéni —ichro sín.

³¹ Ntá nchónhya chojni mé ntáche sín tí sín t'ikonhya kixin:

—Tánirá tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

—Inchéni, jaha tsík'axrjeníxian David, tikonóehéni —ichro sín.

³² Ntá ch'ín Jesús kjuák'echónhen ch'án ntá k'uíyehé ch'án tí sín t'ikonhya la kjuanchankíhi ch'án sín ntáchro ch'án kixin:

—¿Xá nkehe tí tjinkáonrá chrókjuít'ahará? —ichro ch'án.

³³ Ntá jehe sín kjuátehe sín ntáchro sín kixin:

—Jaha Inchéni, tjinkaonni chrókjuínchek'ikuanni —ichro sín.

³⁴ Ntá ch'ín Jesús mé kuikonóehé ch'án tí jehe sín la kjuínchekuákóxin tja ch'án tí ikon tí sín t'ikonhya. Ntá tuénxín k'uíkon sín la chréhe sín tí ch'ín Jesús.

21

K'uixenhen ch'ín Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jna Olivo. Ntá ch'ín Jesús k'uétueñhen ch'án iyó tí sín k'uájiko ch'án ² ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehéra va ntá tsjúkuanará va ntihi. ³ A ntá tí jnkójín nkexro tsjanchankíhará nkekuènté tjasintankehéra va la ntá tsontáchrórá kixin “Inchéni t'ichjánxinhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kixin tsoxiteýá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjeherá ó kui tí ch'ín Rey kuèntará.

Ihnkehya ch'án la ijnko kolócho ó tjejken ch'án,

mé ijnko kolóchóxjan, xjeen ijnko kolócho támá nkehe.”*
Mé xikaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetōan ch'ín Jesús. ⁷ Ntá kjuíkao sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús. ⁸ Ntá itsjé chojni kuakitsje sín ka titsáte sín na kjuentoá sín ka tinkák'ikjínxin sín ka tí ntja ts'atsínkaxín ch'ín Jesús. La iso sín xraá kajni la ko chaon nta yoa tsikóchrínjin sín la tinkákjasin sín ntja a. ⁹ Ntá iso sín tsítaón ntja la ko í so sín chréhe iton ch'án mé kjuankíxin sín itsje sín kixin:

—Tjancheheni kjuasáyé tí nkexro k'uaxrjeníxin tí rey David. Jína tí nkexro kjuixín kjuachaxién ihnié Inchéni. Tjancheheni kjuasáyé Dios —ichro sín itsje sín.

¹⁰ Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

—¿Xá nkexro tíhi? —ichro sín.

¹¹ La ntá nchónhya sín kjuátehe sín ntáchro sín kixin:

—Tíhi mé tí nkexro Jesús chrónka itén Dios kjuixín ch'án chjasin Nazaret estado Galilea —ichro sín.

*Ch'ín Jesús kjuínchetjóá tí ninko
(Mr. 11.15-19; Lc. 19.45-48; Jn. 2.13-22)*

¹² A ntá ch'ín Jesús mé k'uixenhen ch'án tí ninko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá. ¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntōna imé it'in nchia tsonixjanaxian sín.” A ntá jahará tí nchia i tsíkjich'énará itjueé xíchee† —mé xikaha ichro ch'ín Jesús.

¹⁴ Ntaha nkaxenhen ninko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitōhe ch'án sín jína. ¹⁵ A ntá tí sín nchāt'á tjetōan la ko tí sín maestro tjako tí ley mé k'uíkon sín kaín tí kjuaxroan kjuích'e ch'án la ko kuínhin sín kixin iso chánjan mé itsje sín nkaxenhen ninko ntáchro sín kixin: “Chjéheni kjuasáyé tí nkexro k'uaxrjeníxin rey David”, ichro sín. Ntá kuínhin tí sín a xikaha ntá kónínkaon sín ¹⁶ la nixjehe sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xikihi chro:

Jaha kjuánjuan kjuachaxin kixin tí sín chánjan hyé la ko chánjan naxa tjejótakí mé tsotsje sín‡

—mé xikaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ok'éhe ch'án tí tie a.

*Ch'ín Jesús kónínkakonhen ch'án ijnko nta t'óna to higo
(Mr. 11.12-14, 20-26)*

¹⁸ A ntá tí kóyaon nchítjen ntá kjan sín chjasin Jerusalén inaá la ikui sín ntja ntá ch'ín Jesús mé ik'uén ch'án kjinta. ¹⁹ Ntá k'uíkon ch'án itjen ijnko nta t'óna to higo chjino ntja. La ntá sákjuítsjehe ch'án tí nta, ntá k'uíkon ch'án kixin jehó ka itsa tí nta, naxa k'ónahya to. A ntá jehe ch'án mé nixjehe ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

* 21:5 Isaías 62.11; Zacarías 9.9 † 21:13 Isaías 56.7; Jeremías 7.11 ‡ 21:16 Salmo 8.2

Ntá tí nta t'óna to higo mé tuénxín xámá. ²⁰ Ntá tí sín k'uájiko ch'ín Jesús mé k'uíkon sín kixin xikaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkekuènté kixin tí nta t'óna to higo tuénxín xámá? —ichro sín.

²¹ Ntá kjuátehe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxin chrónixjehera tí jna i kixin: “Sátjixian ntíhi sátjíkjiánkiá ntayaon”, la mé xikaha tsonhen. ²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin chóna ch'ín Jesús

(Mr. 11.27-33; Lc. 20.1-8)

²³ Ntá kjuixin ntá ch'ín Jesús mé k'uíxenhén ch'án tí ninko ntíha. Ntá tió tjetjako ch'án ntá kóchjina iso tí sín nchát'a t'etōan la ko tí sín táda judío t'etōan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátehe ch'ín Jesús ntáchro ch'án kixin:

—Ntá kjaxian janhan tsjánchánkíhará ijnko nkehe siná tsjateherá ntá janhan tsotjonkará nkehe tí kjuachaxin chonta tjét'a tí xra i. ²⁵ ¿A ntá nkexro k'uetuēnhen ch'ín Juan kixin tsíkíte ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehé sín itjo sín kichó sín kixin:

—A ntá tí tsontáchroni kixin Dios tsík'etuēnhen tí ch'ín Juan ntá tsjanchankí tí ch'ín a kixin nkekuènté kuítekakuenhyani ch'án. ²⁶ A ntá tí tsontáchroni kixin chojni ó tsík'etuēnhen ch'án la ntá chrakonhenni tí chojni kixin kaín sín kuítekaon sín kixin ch'ín Juan la nixja ch'án itén Dios —ichro sín.

²⁷ A ntá kjuátehe sín ntáche sín tí ch'ín Jesús kixin:

—Náhi, noehyani —ichro sín.

Ntá ntáchro ch'án kixin:

—La ko kjaxin janhan tsōxrjankahya nkexro kjuanjon kjuachaxin kixin tjét'a tí xra —ichro ch'án.

Ch'ín Jesús mé kjuíncheyóexin ch'án kixin éxi yaá xjan

²⁸ Ntá ntáchro ch'ín Jesús kixin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehé ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nontēeni”, ichro ch'án. ²⁹ Ntá kjuátehe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uíxitoxin tí kjuenkayáxin ch'án la sákjuíkjich'e ch'án tí xra a. ³⁰ A ntá tí it'é xjan a mé kjuínixjehé ch'án tí ijnko xjan la jnkokón k'uetuēnhen ch'án la kjuátehe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uetuēnhen it'é? —ichro ch'án.

Ntá kjuátehe sín kixin:

—Tí xjan saō —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkí la ko tí chojni chjin ch'iyehé nchónhya chojni ntoa la saoxín ts'ixenhén sín tí kjuachaxin t'etōan Dios la ntá jahará la náhi.

³² Kixin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjènkí la ko tí chojni chjin ch'iyehé nchónhya chojni ntoa mé kuítekaon sín. A ntá jahará kjónté xikaha k'uíkonrá la kjuítóxiénhyará tí tjenkayáxinrá la ko kuítekákonyará —ichro ch'ín Jesús.

Ch'ín Jesús kjuíncheyóexin ch'án kixin éxi chojni ch'e xra la jínahya asén sín
(Mr. 12.1-12; Lc. 20.9-19)

³³ Ntá ch'ín Jesús ntáchro ch'án kixin:

—Tsinhínrá ijnko nkehe sintayóaxian. Éxi ijnko ch'ín k'uenkaxin ch'án itsjé ntanoa t'óna to uva nontee ch'án. Ntá kjuích'éna ch'án ijnko corral. La ko ijnko tjo kjuích'éna ch'án tòyē kixin ts'énya sín ìnté to uva. La ko kjuích'éna ch'án ijnko tjat'ò noi kixin ts'it'ótjen ch'án tsotsjehe ch'án nkuíxín. §

'A nta kjuínchekjen ch'án tí nontee ch'án iso tí sín ch'e xra ntá kjuixin ntá sákjuí ch'án imá ikjín. ³⁴ A ntá tí kjuixraká tí yaon k'óna nkehe ntá jehe ch'án mé ichr'án ch'án iso tí chojni ch'ehe ch'án xra kixin tsjikjanchehe sín tí sín ch'e xra nontee ch'án kixin tsjanjon sín tí nkehe tsakja ch'án. ³⁵ A ntá tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixro k'uíchexín sín. ³⁶ A ntá tí ìnché nonte a xíchr'án ch'án iso chojni ch'ehe ch'án xra ínaá, a ntá tí sín ch'e xra la kjaxin xikahó kjuích'ehe sín tí sín kjuíji.

³⁷ 'A ntá xikaha tsíkónhen ntá kjuenkayáxin ch'án ichr'án ch'án tí xjeen ch'án, la kjá chróchónthehe sín kjuasáyé tí xjeen ch'án, ichro ch'án. ³⁸ A ntá tí k'uíkon tí sín ch'e xra tí xjeen ch'án la ntá jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe. Ts'óyánni ch'án kixin ntá tsitokoni kaín tí nkehe kuènte ch'án”, ichro sín. ³⁹ Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'óyán sín ch'án —mé xikaha kjuako ch'ín Jesús.

⁴⁰ Ntá kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí ìnché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

⁴¹ Ntá kjuátēhe sín kixin:

—Mé tsjiji ch'án la tsíkonóehya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntáchro ch'ín Jesús kixin:

—¿Á nunca kjuínchekuáxinhyará tí xroon itén Dios tsíkjin sín ósé? Mé ntáchro xikihi: Tí xro náxrjónhya kuitóenta tí sín ch'éna tjat'ò, a ntá mé jie k'óna tí xro tjetóan.

Mé xikaha kjuích'e Ìnchéni Dios,

na ntá tíha mé ijnko nkehe kjuachrakon k'uíkonni.*

Mé xikaha ichro itén Dios.

⁴³ Ntá ntáchro ch'ín Jesús kixin:

—Tjonkará kixin Dios tsakitsjehará tí kjuachaxin kuènte ch'án la ntá sinchek'áyéhe ch'án tí sín ch'e xra jína. ⁴⁴ A ntá jnkojín nkexro tsjitsínka chrítaón tí xro i mé tsokuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

⁴⁵ Ntá tí sín nchat'á tjetóan la ko tí sín fariseo mé kuínhin xikaha kjuíncheyóexin ch'ín Jesús ntá kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsonhen sín. ⁴⁶ La ntá tjinkaon sín chrókjuinchekjasóte sín ch'án kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuènte Dios.

22

Ch'ín Jesús kjuíncheyóexin éxi ijnko kia kótehe sín

¹ Ntá ch'ín Jesús mé kjuankíxin nixja ch'án ínaá la kjuíncheyóexin ch'án ntáchro ch'án kixin:

2 —Tí kjuachaxin kuènte Dios mé éxí yóhē ijnko ch'ín rey kjuasin ch'án ijnko kia kixin tsotēhe xjeen ch'án. 3 K'uetuēnhen ch'án tí sín ch'ehe ch'án xrā kixin tsjik'íyehē sín tí sín kjueyá ch'án, kjánchó jehe sín mé tjinkakonhya sín tsochjina sín. 4 A ntá k'uetuēnhen ch'án inaá í so tí sín ch'ehe ch'án xrā ntáchro ch'án kixin: “Chenka tí sín ó k'uíyaha kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsankā la kaín nkehe la ó síchónhen. A ntá chróxrakoa sín tí síin kia”, mé xikaha k'uetoan ch'án. 5 A ntá tí sín tsik'íyehē ch'án mé ántosén sín. Ijnko sín la sákjuí nontēe la í jnko la sákjuí ch'án í jnko xrā chóna ch'án. 6 La í so tí sín a mé tsítsé sín tí sín tsík'etueñhen tí ch'ín rey la k'óka tí sín a hasta ik'uén tí jehe sín. 7 Ntá tí ch'ín rey mé kónínkaon ch'án ntá k'uetuēnhen ch'án tí sín soldado kixin its'en tí sín kjuàya la ko tsoche tí chjasén sín. 8 Ntá nixjehē ch'án tí sín ch'ehe ch'án xrā inaá ntáchro ch'án kixin: “Kaín nkehe la ó síchónhen kixin tí nkexro tsotēhe la ntá tí sín k'uíyaha kuitekakonhya sín la kjuihya sín. 9 Méxrā sátsjirá tí esquina tí ntja jié la t'iyehérá kaín tí sín tsoxetará kixin itsji sin ti kia”, ichro ch'án. 10 Ntá tí sín ch'e xrā mé sákjuí sín la k'uíyehē sín kaín tí sín t'átsínka tí ntja ntiha, mé chojni jína la ko chojni jínahya hasta k'uíxikaón chojni tí nchia ntiha.

11 Ntá tí ch'ín rey mé kuitsjehe kaín tí sín tsík'íyehē ch'án la ntá k'uíkon ch'án ijnko ch'ín ntiha chónahya ka jína kuènte tí kia a. 12 La ntá nixjehē ch'án, ntáchro ch'án kixin: “Amigo, ¿nkexrí k'uixēnhén kixin tsík'ítsahya kuènte kié chojni tsotēhe?” ichro ch'án. Ntá tí ch'ín a kjuátēehya ch'án ninkehó. 13 A ntá tí ch'ín rey mé k'uíyehē ch'án tí sín ch'ehe ch'án xrā la ntáchro ch'án kixin: “Sínchenteto toté la ko itja tí ch'ín a la ité ntója sítié la nta ntiha a mé tsotsjánka ch'án la sinetaón ch'án neno ch'án.”

14 Ntá ntáchro ch'ín Jesús kixin:

—Nchónhya sín k'uíyaha la séhya sín k'uítja —mé xikaha kjuako ch'án Jesús.

*Ch'ín Jesús ntáchro ch'án kixin ó nchoxon tsjenkehe sín gobierno
(Mr. 12.13-17; Lc. 20.20-26)*

15 Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxin sín tí ch'ín Jesús kixin ách'e ichrén jiē tsjasin ch'án la ntá tsjanchia sín jiē. 16 Ntá ichr'án sín iso tí sín ch'ehe sín xrā la iso tí sín ch'ehe tí ch'ín Herodes xrā kixin tsjachaxin sín tí ch'ín Jesús. Ntá tí sín a nixjehē sín ch'án ntáchro sín kixin:

—Maestro, ó noheni kixin tí nkehe ntáchrua jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jína sín. 17 A ntá jaha chronka nkehe tjenkayáxian. ¿Á jína chrókjuenkehēni tí gobierno romano o náhí? —ichro sín kjuanchankí sín.

18 Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxinráni? 19 Tjákonará tí chichaon tjenkehérá sín méhe —mé xikaha k'uetoan ch'ín Jesús.

Ntá kjuikohe sín ch'án tí chichaon a. 20 Ntá k'uíkon ch'ín Jesús ntá kjuanchankí ch'án kixin:

—¿Nkexro tí tsík'axrjexín tjenkáni tí chichaon méhe la ko nkexro ihnié chóna? —ichro ch'án.

21 Ntá kjuátēhe sín kixin:

—Tí ch'ín t'etōan mé tjenkáni ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'etōan tí nkehe kuènte ch'án la kjaxin tí nkehe kuènte Dios la chróchjehérá Dios —mé xikaha chro ch'ín Jesús.

22 Ntá tí kuínhin sín xikaha la chrakon sín la komá sín ch'án ntá sákjuí sín.

*Kjuanchankí sín kixin á tsoxechón chojni
(Mr. 12.18-27; Lc. 20.27-40)*

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xíkaha chrókjuachaxin sín ch'ín Jesús. Ntáchro sín kixin:

²⁴ —Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxí xjeen tí ch'ín sao tsík'en. ²⁵ Ntá ntihi k'uejó yato sín jnkokoá kichó sín. Ntá tí ch'ín sao kótehe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo. ²⁶ A ntá tí ch'ín yóxin ik'uén kjaxin la tí ch'ín nixin kuákja ch'án tjan la ntá xíkaha kónhen inaá. La kayatoé tí sín k'uéchónta sín tjan xíkaha kónhen sín kaín sín ik'uén sín. ²⁷ A ntá kjuixixín ntá kjaxin tjan ik'uén tjan. ²⁸ Ntá tió tsoxechón kaín xín chojni tsík'en, ¿ntá nkexro ts'óna xì tí jehe tjan kixin kayatoé sín kótehe tjan? —mé xíkaha kjuanchankíhi sín tí ch'ín Jesús.

²⁹ Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios. ³⁰ A ntá tí chojni tsík'en tió tsoxechón la tsoteehya sín la ko tsoteehya tí xjeen sín kixin tí sín tsík'en la éxí tí sín ángel kuènte Dios ts'ejó sín nkaya nkajní. ³¹ A ntá tí kaín tí sín tsík'en tsoxechón, ¿á kjuinchekuáxinhyará nkehe ntáchro Dios? Jehe ch'án xíkíhi chro ch'án: ³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóhón —mé xíkaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjetoan

(Mr. 12.28-34)

³⁴ Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuáteehya tí sín saduceo. ³⁵ La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

³⁶ —Maestro, ¿nkexéhe tí nkehe imá tjetoan kuènte tí ley? —ichro ch'án.

³⁷ Ntá ntáchro ch'ín Jesús kixin:

—“Chrótjuèhéra Ìnchéni Dios kaín asánrá la ko kaín kjuaxrexinkaon kuèntará.”† ³⁸ Mé tíha mé tí ley imá tjetoan la ko saoxín k'ueṭoan Dios tíha. ³⁹ A ntá tí nkehe yóxin la tóyóhe la mé ntáchro xíkíhi: “Chrótjuèhéra kichuárá éxí tjuèxínra asánrá.”‡ ⁴⁰ Tí iyó nkehe i la mé antsí tjetoan kuènte tí ley tsík'ṭoan Moisés la ko tí nkehe kjuako tí sín k'uéchrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokoá tjejó sín ⁴² la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xíkíhi:

⁴⁴ Ìnchéni Dios ntáche tí Ìnchéni kixin:

“Tjak'e tjaná chjina ntió tsétoan,

tsjixinjian kaín xín tí sín nínkakonhan la tsjachahya sín ts'ṭoan sín kixin jahvá mé tsétoan.”§

* 22:32 Éxodo 3.6 † 22:37 Deuteronomio 6.5 ‡ 22:39 Levítico 19.18 § 22:44 Salmo 110.1

Mé xikaha chro itén Dios. ⁴⁵ 'A ntá çxá nkexrí kixin Cristo chrók'óna xjeen David a ntá jehe ch'ín David kujkixetén ch'án Ìnché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuátehe sín ninkehó la desde tí yaon a chrakon sín la í nínkehó kjuanchankíehya sín ch'án.

23

Ch'ín Jesús tjanchia jie tí sín fariseo la ko tí sín maestro tjako tí ley
(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés. ³ Méxra chrókjuinchexiteyéhérá kaín tí nkehe t'etoan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín. ⁴ T'etuenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkitsa sín tí nkehe imá ye yamá chojni. ⁵ Ich'e sín kaín xín nkehe kixin tsotsjehe chojni. Tóxrjínhín sín tsjak'enkáni totjen sín la ko itja sín ijnko xroon kjínjin iton ts'ínixín itén Dios la tjinkaon sín iké sín síxinkáni nkehe tjákini. ⁶ Tjinkaon sín tsochóna sín silla jína ts'ejóksen sín sine sín tió sátsji sín tí siín kia la ko xritjeyá sín tí silla antsí náxrjón chrók'uejóya sín nkaxenhen nínko. ⁷ La ko tjinkaon sín kixin chojni chrókjuikosáyehe sín tsoxeta sín tí ntia la ko tjinkaon sín kixin tsontáchro chojni kixin maestro tí jehe sín.

⁸ 'A ntá jahará la titoéhyará kixin tsontáchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. ⁹ La ntá chróntáchrohyará kixin ninkexró mé it'ará ntihi chjasintajni kixin jahará la chontará jnkokoá It'ará mé itjen nkaya nkajni. ¹⁰ La ko jehe sín chróntáchrohya sín kixin jefe tí jahará kixin jehó Cristo mé jefe. ¹¹ Tí nkexro antsí tsjinkitsa iso chojni la jehe ch'án mé antsí t'etoan ch'án. ¹² Kixin tí nkexro ntáchro kixin imá ijié la mé imá tsontsí. A ntá tí nkexro nchehnkehya la antsí tsojié.

¹³ Nòará tí jahará maestro tjàkorá tí ley la ko tí jahará chojni fariseo. Jahará la jnkojínxónhya tjenkayáxinrá. Jahará la t'ikjéherá tí puerta ts'ixenxín chojni tí kjuachaxin kuénte Dios kixin titoéhyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

¹⁴ Nòará tí jahará maestro tjàkorá tí ley la ko chojni fariseo. Jnkojínxónhya tjenkayáxinrá. Jahará takitsjeherá ntøe tí chojni tsíkók'án la ntá isé nixjehérá Dios kixin ch'iyexínrá chojni kixin jína tí jahará. A ntá xikaha kjuich'erá jahará la antsí tsjasótiará.

¹⁵ Nòará tí jahará maestro tjàkorá tí ley la ko chojni fariseo. Jahará la jnkojínxónhya tjenkayáxinrá. Jahará sájtirá nonte la chrítaón ntayaon kixin tsjákohérá ijnko chojni tsinkáchónki xikaha tí tinkachónkirá la ntá tió kjuachará kjuachroerá sín la ntá jehe sín antsí má tsjasótexín sín tí xrohi la kánhyó jahará.

¹⁶ Nòará tí jahará kixin tétøanrá kjánchó ntakótánrá. Ntáchrórá kixin tí jnkojín chojni tsontáchro kixin sinchexiteyá sín nkehe la t'ákjenxin sín tí nínko la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí chica oro siín nkaxenhen nínko la ntá t'ichjánxin sinchexiteyá sín. ¹⁷ Imá lontirá la ko ntakótánrá. ¿Á imá tjetoan tí chica oro o á imá tjetoan tí nínko kixin tí nínko mé kótjuáxin tí chica oro? ¹⁸ Kjaxín ntáchrórá kixin: “Tí jnkojín chojni tsontáchro sín kixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí nkehe tjokehe sín Dios chrítaón tí altar la ntá t'ichjánxin sinchexiteyá sín tí nkehe tsintáchro sín.” ¹⁹ Imá lontirá la ko ntakótánrá. ¿Á imá tjetoan tí nkehe tsochjehérá Dios o á imá tjetoan tí altar kixin tí altar mé tótjuáxin tí

nkehe tsjánjonrá? ²⁰ Kíxin tí nkexro tsontáchro kíxin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhí. Kjaxin t'ákjenxin ch'án kaín tí nkehe síin chrítaón ntiha. ²¹ A ntá tí nkexro tsontáchro kíxin sinchexiteyá ch'án nkehe la t'ákjenxin tí nínko la jehya t'ákjenxin ch'án nínko ó. Náhí. Kjaxin t'ákjenxin ch'án tí Dios itjen ntiha. ²² A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuènte Dios la ko tí nkexro tjet'etoan ntiha.

²³ 'Nòará jahará maestro tjàkorá ley la ko jahará chojni fariseo. Jahará jnkojínxónhya tjenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá tjetoan kuènte tí ley. Mé ntoá chrókjuenkayáxinrá la ko chrókuikonóehérá kichuárá la ko chrókuinkachónkirá Dios. Tíhi la antsí tjetoan chrókjuinchexiteyará la kjaxin chrókuítóehyará chrokjuich'erá tí í so nkehe. ²⁴ Jahará la tétóanrá kjánchó ntakótánrá. Jahará la nchek'ankihirá kjónté ijnko kochjisen intsí chóna tí nkehe its'irá, a ntá ijnko kocamello kjónté ijié va la t'ínkará.

²⁵ 'Nòará tí jahará maestro tjàkorá ley la ko jahará fariseorá. Jahará la jnkojínxónhya tjenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsíkaón kjuachee la ko jahórá tjinkáonrá chróchontará itsjé nkehe. ²⁶ Jahará chojni fariseorá imá ntakótán jahará. Saoxín chrókjuinchetjóará tí nkehe nkaxenhen tí vaso la ko tí plato la ntá ó chrókótjóá tí chrítaón kjaxin.

²⁷ 'Nòará jahará maestro tjàkorá tí ley la ko chojni fariseorá. Jnkojínxónhya tjenkayáxinrá. Jahará la éxí yóhe ijnko tòye tsíxravá chojni, imá náxrjón tsjehe ntója, a ntá nkaxenhen mé tsíkaón huésoé chojni tsík'en la ko kaín nkehe tjuáhya. ²⁸ Mé xíkaha tí jahará la tsjehe éxí chojni jína xíkaha, a ntá jnkojínxónhya tjenkayáxinrá la ko jínahyará.

²⁹ 'Nòará tí jahará maestro tjàkorá ley la ko chojni fariseorá. Jahará la jnkojínxónhya tjenkayáxinrá. Jahará la kjuich'énará tjat'o náxrjón chrítaón tí tòye tsíxravá tí sín k'uékjako itén Dios ósé la ko nchek'ítsará tjat'o chrítaón tòye kuènte tí sín jína asén. ³⁰ La ntá ntáchrórá kíxin tí chrók'uejorá tí k'uéjé tí sín tsík'axrjeníxinrá la ntá chrókjuínkítsahyará chrók'uén tí sín kjuako itén Dios. ³¹ Méxra xíkaha jahórá ntáchrórá kíxin chaxín tsík'axrjeníxinrá tí sín k'óyán tí sín k'uékjako itén Dios. ³² Méxra ijie la tjinkáonrá tsjixinhanrá tí xra kjuích'e tí sín tsík'axrjeníxinrá.

³³ 'Jahará la tsík'axrjeníxinrá konche. ¿Ntá nkexrí chrókuaará kíxin itsi tí tsjasótiará? ³⁴ Méxra janhan mé tsétuanhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen nínko la ko tsochonkíhirá sín chjasin la chjasin. ³⁵ Méxra jahará la yamará tí jie kíxin tí sín jína k'úitjixin ijnié senó. Méxra tsamará tí jie kíxin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, xjeen Berequíás, tí nkexro k'oyánxinrá chjino tí altar. ³⁶ Chaxín tjonkará kíxin kaín tí jie a mé yámá tí chojni síin ijie.

Tsjánka ch'ín Jesús (Lc. 13.34-35)

³⁷ Ntá ntáchro ch'ín Jesús kíxin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítsará. Nchónhya veces tjínkavan chrókójnkotsérá la chrók'uáyakonhánrá éxí ijnko cochíká mé t'ayakonhen xjeen va chrínkí kanenee va mé xíkaha tjínkavan chrók'uáyakonhánrá tí jahará. Kjánchó jahará la tjínkákonhyará xíkaha. ³⁸ Ntá jie la Dios la tsítóhe tí jahará. ³⁹ Ntáxrjan kíxin í ts'ikonhyará tí janhan ínaá tsjixrakájia tí yaon tsontáchrórá kíxin: “Imá jína tí nkexro kuixin kjuachaxién ihnié Ìnchéni” —mé xíkaha ichro ch'ín Jesús.

24

Chrónka ch'ín Jesús kixin ts'itjáyan tí nínko

(Mr. 13.1-2; Lc. 21.5-6)

¹ Ntá ch'ín Jesús k'uaxrjexín ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin ch'án chrótsjehe ch'án kixin náxrjón tsík'óna tí nínko a. ² A ntá ch'ín Jesús mé kjuátehe ch'án kixin:

—Jahará ¿á tjejotsjehérá kaín tíha? Chaxín tjonkará kixin tsjixraká tí yaon ts'oya kuenté nínko. Nijnko xro ts'ejókjehya kichó kixin kaín tíha la tsoxíka —ichro ch'án.

Tí nkehe tsonhen tió tsjixixín

(Mr. 13.3-23; Lc. 21.7-24; 17.22-24)

³ Ntá sákjuí sín chrítaón tí jna Olivo la ch'ín Jesús kjuák'etjaxin ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsochronka nkesá tsonhen tíha. ¿Nkexrí tsonoexínni tió ts'inka tí jaha la ko nkexrí tsonoexínni tí itsi tí tsjixixín chjasintajni? —ichro sín.

⁴ Kjuátehe ch'ín Jesús kixin:

—Tóxakonhanrá títoéhyará kixin ninkexró chrókjuít'áyahará. ⁵ Nchónhya chojni itsi sich'iyaxín nina tsontácho kixin: “Janhan mé tí Cristo” tsixro sín, la sich'iehe sín nchónhya chojni. ⁶ A ntá tió tsinhínrá tsontácho chojni kixin ó síin kjuanínkaon la ko ts'ixin kjuachrakon kixin tsjanjonko kichó sín la kjónté xíkaha tsonhen la chrakonhyará. Ó jehí tsonhen tíha tí naxa ts'itjáyanyha chjasintajni. ⁷ Ijnko nación tsjanjonko í jnko nación la tsjanjonxin sín tí xra ts'etoan sín. La ko itsjé chjasin na tsokjinta la ko tsoníhi chojni la ko ntihi la ntaha tsinkí nonte. ⁸ Kaín tíha la ntá tsoxrankíxixón tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjejó tí síxreé kixin sinchekjasótiará sín la ntá ts'óyánrá sín. La ko kaín xín chojni síin chjasintajni tsonínkakonhanrá sín kixin tinkachónkirá tí janhan. ¹⁰ Ntá tí yaon a la itsjé sín la tsítóhe sín tsinkáchónkihya sín tí janhan la ko tsonínkakonhen sín kichó sín la ko sinchekji kichó sín. ¹¹ Ntá itsi nchónhya chojni ntoáhya tsjako la ntá sich'iehe sín nchónhya chojni. ¹² La ts'ixin nchónhya jie jínahya la ntá ts'ixin itsjé chojni tsotjuèhya sín kichó sín. ¹³ A ntá tí nkexro naxa tjejótinkáchónki tí janhan hasta tí tsjixixín la mé tsaá. ¹⁴ La ko tí itán jína chrónka nkexrí tjen tí kjuachaxin kuènte Dios la t'ichjánxin tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'itjáyan chjasintajni.

¹⁵ Ch'ín Daniel k'uéchrónka itén Dios mé tsíkjin ch'án kixin tsjixraká ijnko yaon tsjak'e ijnko nkehe jínahya nkaxenhen nínko tjóá.* Ntá jahará ts'ikonrá tíha. A ntá tí nkexro nchekuáxin mé tsienxín nkehe tíha. ¹⁶ Ntá kaín tí sín tjejó estado Judea tsochrin sín jna sátsji sín. ¹⁷ A ntá tí sín tjejó chrítaón nchia ntoé sín la í xitjahya tsakitsje sín ninkehó. ¹⁸ Ntá tí tjejóch'e sín xra nontee sín la kjá í tsokjanhya sín tsjikakja sín iké sín. ¹⁹ Ntá nòla tí chojni chjin tjejóyá sín la ko nòla tí sín nchekakí xjan tí yaon a. ²⁰ Chrókjuanchehérá Dios kixin tí tsonhen tíha la chrókójhya nchakuen kin la ko chrókójhya tí yaon t'ok'éhe chojni. ²¹ Kixin tíha mé ijnko kjuachrakon imá ijié la desde tí xrankíxixín chjasintajni la nunca xíkahya kónhen. ²² Ntá tí chrók'uetqanhya Dios kixin tjoka ts'atsínka tíha ntá chrókuaáhya ninkexró. Ntá ts'etoan ch'án kixin tjoka ts'atsínka tí kjuachrakon jie kixin jehe ch'án mé imá tjuèhe ch'án tí sín tsíkjejá ch'án.

²³ Ntá tí tsontácho chojni kixin: “Tsjehé ntihi itjen Cristo”, o “Tsjehé ntiha itjen ch'án”, la ntá chrókuítekákuénhyará sín. ²⁴ Kixin ntá itsi iso sín tsontácho sín kixin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jie kixin tjinkaon sín chrókjuich'iehe sín chojni kjónté tí sín tsíkjejá Dios. ²⁵ Ó xrjanka senó nkehe tsonhen kixin tsonohará. ²⁶ Méxra tí chróntácho sín kixin: “Tsjehérá tí nteje ntiha tjen ch'án”, la

* 24:15 Daniel 9.27

ntá tsjihyará nó ntiha. O tí chróntáchro sín kixin: “Tsjeherá ntihi tí cuarto mé tjen ch'án”, la chrókuítekákonyhará. ²⁷ Méxra éxi tsjonkixin la t'ikon chojni t'inkaséyanxín tí tjitoxin yaon hasta tsjiatóxin yaon mé xikaha ts'ikon chojni tió itsi tí Xjeen Dios K'óna Chojni. ²⁸ Mé éxi yóhe tí tjen ijnko cuerpo tsík'en la ntiha tsojnkotsé tí kontexjuen.

Tsokjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

²⁹ 'A ntá séhyó tí tsjixixín tí kjuachrakon jíé la ntá tí yaon la tsotie a ntá tí nitjó la í ts'inkaséyanxínhya. La ko tí konotsé la tsoxènjinxín nkajní la kjaxin kaín nkehe siín nkaya nkajní la tsinkí. ³⁰ La ntá ts'ikon chojni kixin nkajní tsixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'ikon sín kixin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsikao tí kjuachaxin jíé. ³¹ Ntá tsochr'án Dios tí sín ángel kixin ts'ánoa sín tí trompeta itsen kixin tsochjina kaín tí nkexro kjueyá Dios tsjixín kanóé lado chjasintajni.

³² 'Chrók'uitjará nkexrí sintayóaxian kuènte ijnko nta to higo. Éxi yóhe tió chóna ntahnte la ko ts'ixin kayoa la nta tsonoxínra kixin í séhya tsokjan ichrin. ³³ Mé xikaha tí ts'ikonra ts'atsínka kaín tíha la ntá xikaha tsonoxínra kixin í séhya itsi Inchéni. ³⁴ Ntá tjonkará chaxín kixin kaín tíha senó tsonhen tí naxa ts'enhya tí chojni siín jie. ³⁵ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la nunca ts'itjáyanhya tsoxiteyá tíha.

³⁶ Á ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajní noehya sín la ko ni tí Xjeen Dios noehya. Ó jehó tí It'é mé nohe.

³⁷ 'Éxi yóhe tí nkehe kónhen tí yaon k'uékjak'e ch'ín Noé mé xikaha tsonhen tí tsokjan tí Xjeen Dios K'óna Chojni. ³⁸ Tí naxa titjiéhya sín nta la kaín chojni la jina k'uéjós sín la kjóne sín la ko ik'uí sín la ko sítótehe sín kjuixrakájia tí yaon k'uixenhen ch'ín Noé ntabarco.† ³⁹ A ntá jehe sín mé kienxínhya sín hasta kuijia tí k'uániá chrin ntá ikui nta la k'uátjoá kaín sín. Mé xikaha tsonhen tió itsi tí Xjeen Dios K'óna Chojni. ⁴⁰ A ntá yaá chojni ntoa tjejóch'e sín xra nonte la ntá ijnko la sátsji la í jnko la tsitóhe. ⁴¹ La ko yaá chojni chjin mé tjejót'o sín la ijnko la sátsji la í jnko la tsitóhe.

⁴² 'Chrók'uejotsjehérá kixin noahyará nkehora la ko nkesá ts'inka janhan. ⁴³ Chrókónohará tíhi: tí chrókónohe ijnko inché nchia nkehora tie chrókjui ijnko nkexro tseé la ntá chrókjuak'echónhen tí inché tí nchia ntá xitjahya ts'ixenhen tí nkexro tjinkaon chrókueé. ⁴⁴ Méxra jahará la jina chrók'uejorá kixin tí Xjeen Dios K'óna Chojni me titáya itsi.

Tí nkexro jina ch'e xra la tí nkexro ch'ehya xra jina

(Lc. 12.41-48)

⁴⁵ 'Tí nkexro chaxín ch'e xra jina la ko imá nohe la ntá tí lámoe ch'án ts'etuenhen kixin ts'ayakonhen ch'án tí sín siín ntóe ch'án la ko tsjanjon ch'án nkehe sine sín chintii tí hora a. ⁴⁶ Náxrjón tjen tí nkexro ch'e xra tió itsi tí lamo la ts'ikon kixin xikaha tjenchexiteyá ch'án tí xra k'uituenhen ch'án. ⁴⁷ Chaxín tí lamo la tsjanjon ch'án kaín tí xra chóna ch'án ts'etóan tí ch'ín a. ⁴⁸ A ntá ijnko chojni ch'ehya xra jina la ntá tsjenkayáxin ch'án kixin kjá tjokahya tsokjan tí lámoe ch'án ⁴⁹ la ntá tsjankixin ch'án tsjanjonko ch'án tí í so sín ch'e xra la ko tsjankixin sineko ch'án la ko its'ikao ch'án kaín tí sín sítókoan. ⁵⁰ Ntá xrinahya tsokjan tí lamo ijnko yaon la ko ijnko hora noehya tí nkexro ch'e xra. ⁵¹ La ntá jehe ch'án la sinchekjasóte tí ch'ín kuítóhehe xra kjuínchexiteyáhya la ts'etóan ch'án kixin tsjasóte tí ch'ín a éxi tí sín jnkójínxónhya tjenkayáxin. Ntá ntiha la tsotsjánka ch'án la ko sinetaón neno ch'án.

† 24:38 Génesis 6.5-8

25

Ch'ín Jesús kjuíncheyóexin ch'án kixin ite sín tjarisoá

¹ Ntáchro ch'ín Jesús kixin:

—Tí kjuachaxin kuènte Dios mé éxí yóhe ite sín tjarisoá sátsji tí tsotehe chojni chuénko linterna tjiá aceite la sákjuíchónhen sín tí ch'ín tsíkótehe. ² In'ó sín la tsíkóyaxíenhya sín la in'ó sín ó tsíkóyaxínhin sín. ³ Tí sín tsíkóyaxíenhya na kjaxin la tsíkjjiko sin linterna kjánchó tsíkjjikohya sín aceite tsíkja ínaá. ⁴ A ntá tí sín tsíkóyaxínhin la sátsíkjiko sín xro tjiá aceite la ko tí linterna kuènte sín. ⁵ A ntá tí ch'ín tsíkótehe la tjokahya kui ch'án la ntá jehe sín mé tsíkíhi sín kotáchrín la tsík'ejóua sín kaín sín. ⁶ A ntá kuichjina k'áxrótjen la kuínhin sín t'eya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án. ⁷ A ntá kaín tí sín tjarisoá la k'uàya sín la kjuasiyóxin sín tí linterna kuènte sín. ⁸ A ntá tí in'ó sín tsíkóyaxíenhya la nixjehe sín tí sín in'ó tsíkóyaxínhin ntáchro sín kixin: “Chjehéni intsí aceite kuéntará kixin ó k'uànká aceite tjiá linternéni”, ichro sín. ⁹ A ntá tí sín tsíkóyaxínhin mé ntáchro sín kixin: “Náhi, tí aceite tí xíkaha tsjanjonni intsí jahará la antsí jeheni la tsjachahya. Íchá jina sátsjik'ènará tí sítoxín ntiha”, ichro sín. ¹⁰ Ntá tí in'ó tí sín kóyaxíenhya mé sákjuík'ena sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuíko sín ch'án tí kia tsíkótehe sín la ntá ó tuénxín k'uikjéhe tí puerta. ¹¹ Ntá chr'éxin ikui tí in'ó sín tjarisoá tsíkóyaxíenhya la t'ínka sín puerta ntáchro sín kixin: “Ó kuini takitjehé nchia.” ¹² A nta jehe ch'an kjuátehe ch'án ntáchro ch'án kixin: “Chaxín tí jahará la ní chonhyará”, ichro ch'án.

¹³ Ntá ntáchro ch'ín Jesús ínaá kixin:

—Méxra xíkaha tí jahará chrók'uejótshéhérá kixin noahyará nkeyaon la nkehora itsi ti Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuènte chichaon

¹⁴ Ntá ntáchro ch'ín Jesús kixin:

—Tí kjuachaxin kuènte Dios la yóhe ijnko chojni tjinkaon sáchrókjui ch'án í jnko nación la ntá k'uíyehé ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

¹⁵ 'Ijnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án nkexro tí tsjacha sich'e jnkojnko xra. Ntá jehe ch'án tíó kjuixin kjuanjon ch'án la ntá sakjuí ch'án ikjín. ¹⁶ Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil. ¹⁷ Kjaxin tí nkexro k'uáyéhe iyó mil chichaon mé xíkja ch'án í jnko iyó mil. ¹⁸ A ntá tí nkexro k'uáyéhe ijnko mil chichaon mé sákjuí ch'án la kjuích'ena ch'án ijnko tòye kjuavá ch'án tí chichaon kuènte lámóé ch'án.

¹⁹ A ntá nchónhya nánó k'uátsínka la ntá ikjan tí lámóé sín kixin ntá tsjentoáko sín ch'án cuenta. ²⁰ Saxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáchro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án. ²¹ Ntá tí lamo mé ntáchro kixin: “Nchoxon tí xíkaha. Jaha la ijnko chojni jina ch'e xra. La ó kjuínchexiteyá jina. Kjónté jehya xra jíé la kjuínchexiteyá jina la ntá tsotjaha ijnko xra antsí jíé la tjak'e tsochéheni.” ²² Ntá chr'éxin ikui tí nkexro k'uáyéhe iyó mil la ntáchro ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án. ²³ La ntá tí lamo ntáchro kixin: “Nchoxon jaha mé ijnko nkexro jina ch'e xra la ó kjuínchexiteyá. Kjónté jehya xra jíé la kjuínchexiteyá jina la ntá tsotjaha í jnko xra antsí jíé. Tjak'e tsochéheni”, ichro ch'án. ²⁴ A ntá ikui tí ch'ín k'uáyéhe ijnko mil la ntáchro ch'án kixin: “Ó nóna kixin ijnko chojni imá jjehe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya. ²⁵ Méxra chrakonni la sákjuíjak'emáni tí chichaon chrínkí nche. Tákjá chichakoan tjinhin”, ichro

ch'án. ²⁶ A ntá kjuátehe tí lamo kixin: “Jaha ijnko chojni jínahya la ko séhe. Jaha la ó noha kixin chrótjaa tí nonte k'uénkahya la chrókuákjaá tí nkehe k'uénkahya. ²⁷ A ntá tí chichaon chróchr'an banco. Ntiha chrókjuich'exín xra ntá tí ikjan janhan ntá chrók'uayáha antsí itsjé chichaon chrókjuacha kichó chica”, ichro tí lamo. ²⁸ A ntá nixjehe ch'án tí í so sín tjejó la ntáchro ch'án kixin: “Takitsjehérá tí mil chóna ch'án la chjehérá tí nkexro chóna tí ite mil chichaon ²⁹ kixin tí nkexro kjónté itsjé chóna la mé ts'áyéhe antsí la ntá tí nkexro chónahya la kjónté tí intsí chóna la ts'axrjehe. ³⁰ A ntá tí nkexro ch'ehya xra la tsétuénhén sátsji ch'án tí sítie ntója la ntá ntiha la tsotsjánka ch'án la ko sinetaón ch'án neno ch'án.”

Tsitoxín ijje chojni chjasintajni

³¹ 'A ntá tí tsi tí Xjeen Dios K'óna Chojni la tsikao ch'án kjuachaxién jié éxí ijnko Réy la ko tsikao ch'án kaín xín tí sín ángel ntá ntaha tsjak'etjaxin ch'án tí trono ts'etoxán tí kjuachaxién jié. ³² Ntiha kaín xín tí chojni tsíkixín nkuixín nación tsochjina tí tjen ch'án la jehe ch'án tsakitsjekjan ch'án ijnko la í jnko. Éxí ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí kotentso la ókjé ts'ixin. ³³ Méxra ts'etoxan ch'án kixin tí kolélo la ts'ixin nó tja ch'án chjina, a ntá tí kotentso la nó ti tja ch'án kjon. ³⁴ Ntá tí Rey tsonixjehe tí sín tjejó tja ch'án chjina tsontáchro kixin: “Xrákirá jahará ti tjen kjuachaxin kuente T'aná kixin T'aná ó kjuíncheyaonrá ch'án. Tí naxa kjuích'énahya Dios chjasintajni la xráxín kjuenkayáxin ch'án xikaha tsonhen. ³⁵ Janhan mé k'uén kjinta la jahará kjuánjonrá nkehe kjoné. La ik'uén nta la jahará kjuánjonrá nkehe ik'uia, la k'uájia éxí ijnko chojni kjuixín ikjín la jahará kjuánjonrá nketí k'ók'ána. ³⁶ La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjeherá ti janhan, la kjuak'échjina la ntá jahará kjuasántsjeherá tí janhan.” ³⁷ A ntá tí sín jína la tsjanchankí sín kixin: “Ínchéni, ¿nkesá k'uíkonni kixin ik'uén kjinta ntá kjuanjonni nkehe kjónte? ¿La nkesá k'uíkonni kixin ik'uén nta la kjuanjonni nkehe ik'uia? ³⁸ ¿La ko nkesá k'uíkonni kixin ikjín kjuixian ntá kjuanjonni nketí k'ók'áha? ¿La ko nkesá k'uíkonni kixin chontahya iká la kjuanjonni ika k'uítsa? ³⁹ ¿La nkesá k'uíkonni kixin kóniha o kjuák'echjina la ntá kjuíjitsjeheni tí jaha?” mé xikaha tsjanchankíhi sín ch'án. ⁴⁰ A ntá tí Rey tsontáchro kixin: “Tió kjuínkítsará ijnko kichó ni kjónté ijnko chojni nóé la mé yóhe kixin tí janhan chrókjuínkítsará.”

⁴¹ 'A ntá tí Rey t'etoxan mé tsonixjehe tí sín tjejó nó tja ch'án kjon tsontáchro kixin: “Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuente ch'án. ⁴² Tí ik'uén kjinta la jahará kjuánjonhyará nkehe kjoné la ko ik'uén nta la jahará kjuánjonhyará nkehe ik'uia. ⁴³ K'uájia éxí ijnko nkexro kjuixín kjín la jahará kjuánjonhyará nketí k'ók'ána la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántsjehyará tí janhan.” ⁴⁴ Ntá tí jehe sín la tsjanchankí sín kixin: “Ínchéni, ¿nkesá k'uíkonni kixin ik'uén kjinta la ik'uén nta la ko kjuixian kjín la ko chontahya iká la ko níha la ko kjuák'echjina? ¿Mé nkesá k'uíkonni xikaha la ntá kjuínkítsahyani ti jaha?” tsixro sín. ⁴⁵ La ntá tí Rey tsjatehe ch'án tsontáchro ch'án kixin: “Tí xikaha kaín tíha kjuínkítsahyará ijnko chojni imá nóé la éxí xikaha kjuínkítsahyará tí janhan.” ⁴⁶ A ntá tí sín jínahya xikaha kjuích'e la mé sátsjixin sín ntihi tsjasóte sín jnkochríxín. A ntá tí sín jína la sátsji sín ts'áyéhe sín kjuachón jnkochríxín —mé xikaha chrónka ch'ín Jesús.

26

*Tí sín nínkakonhen ch'ín Jesús tjenkayáxin sín kixin nkexrí ts'óyán sín ch'án
(Mr. 14.1-2; Lc. 22.1-2; Jn. 11.45-53)*

¹ Ntá kjuixin chrónka ch'ín Jesús kaín tíha, ntá nixjehē ch'án tí sín k'uájiko ch'án, ntáchro ch'án kixin:

² —Jahará ó nohará kixin t'itjayan iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etōan ntá tsjak'enkani sín ch'án ijnko ntacruz —ichro ch'ín Jesús.

³ Ntá tí sín nchat'á t'etōan la ko tí sín maestro tjako tí ley la ko tí sín táda kuènte tí sín judío mé kójnkotsé sín tí ntasin kuènte tí nchia kjuák'e ch'ín Caifás tí ch'ín nchat'á t'etōan.

⁴ Ntaha tjenkayáxin sín kixin nkexrí tsotsé sín ch'ín Jesús la ts'óyán sín ch'án. ⁵ A ntá ntáchro sín kixin:

—Tí siin kia la chrótséhyaní ch'án kixin imá tsonínkaon tí chojni —ichro sín.

Ijnko tjan kjuikao aceite xraxé kuikite tjan ikja ch'ín Jesús

(Mr. 14.3-9; Jn. 12.1-8)

⁶ Ch'ín Jesús tjen chjasin Betania ntōe ch'ín Simón tí ch'ín k'uéchóna chinlepra. ⁷ Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuíkaón aceite xraxé náxrjón la imá tjete k'uíte. A ntá tí tjene ch'ín Jesús ntá tí tjan a mé kuikite aceite ikja ch'án. ⁸ A ntá tí sín k'uájiko ch'ín Jesús mé k'uíkon sín xikaha ntá kónínkaon sín la ntáchro sín kixin:

—¿Nkekuènté kóxénhen tí xroan a? ⁹ Íchá jína chrókóxixín itsjé chichaon tí xroan ntá tí chichaon a chrókjuinkitsa tí sín nòé a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntáchro ch'án kixin:

—¿Nkekuènté t'antaxínhínrá tí tjan i? Ó nchoxon ijnko nkehe jína kjuích'e tjan. ¹¹ Tí sín nòé la ó xráxín ts'ejókoará sín, a ntá janhan la jnkochrínhaya ts'ejóni. ¹² Tí nkehe kjuích'e tjan mé kjuíncheka tjan aceite xraxé tí cuerpo kuéntana la mé xikaha kjuakoxín tjan kixin xikaha tsoxravána. ¹³ Ntá chaxín tjonkará kixin kuénté chjasintajni tió tsjako sín tí tán jína tsaáxin sín ntá tsochrónka sín kixin xikaha kjuích'e tjan ntá tsoxraxinkakonxín sín kixin nkehe tí kjuích'e tjan —ichro ch'ín Jesús.

Ch'ín Judas kjuínchekji tí ch'ín Jesús

(Mr. 14.10-11; Lc. 22.3-6)

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehē ch'án tí sín nchat'á t'etōan ¹⁵ la ntáchro ch'án kixin:

—¿Nkekjaín tsochjinará tsoxrjanka nketí tjen tí ch'ín Jesús? —mé xikaha chro tí ch'ín Judas.

Ntá tí sín nchat'á t'etōan kjuenkehe sín ch'án treinta chichaon plata. ¹⁶ Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

Kjuixixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankíxixín kia sine sín niotja tsíkjikohya tí xroan t'ánkíxin niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kixin:

—¿Ínchéni, nketí tjinkávan sincheyaxíxinni tí sineni tí kia pascua? —ichro sín.

¹⁸ Ntá ntáchro ch'án kixin:

—Sátsjirá Jerusalén la tsjasánrá ntōe ijnko ch'ín la nixjehérá ch'án tsontáchrórá kixin: “Ntáchro Maestro kuénténi kixin í séhya naxa tsjak'e ch'án la ntá ijie ntōa ntihi tsoyaxíxin kixin sineko ch'án tí sín xriko ch'án tí kia pascua”, tsixrorá —mé xikaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxíxin sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uéjoko tí teyó sín k'uájiko ch'án kjóne sín. ²¹ La ntá tió naxa tjejóne sín la ntáchro ch'ín Jesús kixin:

—Chaxín tjonkará kixin jnkójínrá tjejorá ntihi mé sinchekjirána —ichro ch'án.

²² Ntá kaín sín la kjuankíxin kóxakonhen sín k'uává sín la ntá kjuankíxin sín jnkojnko sín kjuanchankíhi sín tí ch'ín Jesús kixin:

—Ínchéni, ¿á jeheni ní? —ichro sín.

²³ Ntá kjuátehe ch'ín Jesús kixin:

—Tí nkexro tsochr'ánkíxian niotja tí plato a mé tí nkexro a mé sinchekjina ch'án. ²⁴ Tí Xjeen Dios K'óna Chojni xíkaha tsjasóte ch'án éxí nixja xroon itén Dios, a ntá nòà tí ch'ín sinchekji ch'án. Íchá jína chrókokjéhya ch'án —mé xíkaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'ín Jesús kixin:

—Méxra xíkaha tsintáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'o ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tíhi mé cuerpo kuèntana —ichro ch'án.

²⁷ Na ntá kuákja ch'án ijnko vaso tjiá înté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá ²⁸ kixin tíhi mé jnina mé chrónkaxín ijnko nkehe nixin tsonhen. Mé tí jnina ts'ítji na mé tsjacha tsjinkítsa nchónhya chojni kixin ts'íjmáxin ijíé sín. ²⁹ Tjonkará kixin ts'íhya janhan tí înté to uva ínaá tsjixrakájia tí yaon ts'ayàjia kjuachaxin kuènte T'aná ntá xík'ini înté to uva ínaá —mé xíkaha ichro ch'ín Jesús.

Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús (Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuí sín tí jna Olivo. ³¹ Ntá ntáchro ch'ín Jesús kixin:

—Jahará tsítónaráni kaín rá ijie tie kixin ntáchro tí xroon itén Dios kixin: “Its'en tí nkexro Pastor t'ayakonhen kolélo ntá kaín tí ko mé tsjichroe va.”* ³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátehe ch'ín Pedro ntáchro ch'án kixin:

—Kjónté kaín sín tsítóha sín ntá janhan la náhi —ichro ch'án.

³⁴ Ntá ntáchro ch'ín Jesús kixin:

—Chaxín tsoxrjanka kixin tí tie i naxa tsotsjehya kochíntoa la ó sinchemána níya —ichro ch'án.

³⁵ Ntá ntáchro ch'ín Pedro kixin:

—Kjónté koína its'én la sintamáhya tí jaha —ichro ch'án.

La ntá kaín tí sín k'uájiko ch'án na xíkaha ichro sín kaín sín.

Ch'ín Jesús chrónóehé ch'án It'é ch'án tí tjen ch'án tí Huerto Getsemaní (Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntíha mé nchek'in sín Getsemaní. Ntá jehe ch'án mé ntáchro ch'án kixin:

—Tjejorá ntíhó ntá janhan sátsjia tsonixjaha T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankíxin kóxakonhen ch'án la ko k'uává ch'án. ³⁸ Ntá ntáche ch'án tí iy'á sín kixin:

—Imá t'ává asenná éxí its'én ntá ts'axrje asenná. Ntá jahará ntíhó tsítóhará ts'ejotsjehekoárana —ichro ch'án.

³⁹ Ntá sákjuí ch'án antsí kjínxin ntá kjuák'exín toch'in ch'án k'uísén ch'án hasta caxin kja ch'án nonte ntá chrónóehé ch'án It'é ch'án tjen nkaya nkajní, ntáchro ch'án kixin:

* 26:31 Zacarías 13.7

—It'eni, tí tjinkávan chrókjuinchekaáni kixin chrók'uihyani tí nkehe tsjá tjiá tí copa i. Kjánchó jehya éxí tjinkaonni jeheni. Náhi. Éxí tjinkávan jaha —ichro ch'án.

⁴⁰ Ntá ikjan ch'án tí kuítóhe sín la ó k'uíkon ch'án kixin tjejóua sín. Ntá nixjehe ch'án tí ch'ín Pedro ntáchro ch'án kixin:

—Xá xitjahya chrók'uejótsehekoarána ijnko hora. ⁴¹ Titohará tjejotsjehérá la nixjehérá Dios kixin tsjinkitsará ch'án kixin chrókjuachroehyará ch'ín Tsochren. Asánrá tóxrjínhin kjánchó tí cuerpo chontará la imá ntá —mé xikaha ichro ch'ín Jesús.

⁴² Ntá sákjuí ch'án yóxin inaá chrónóehe ch'án It'é ch'án, ntáchro ch'án kixin:

—Jaha It'eni tí xitjahya tsjakjían tí nkehe tsjasótexínni la ntá tjinkaonni éxí jaha tjinkávan —mé xikaha ichro ch'án.

⁴³ Ntá ikjan ch'án la k'uíkon ch'án tjejóua tí sín k'uájiko ch'án inaá kixin tjeheya sín kotáchrin. ⁴⁴ Ntá kuítóhe ch'án sín inaá la nixin sáxíkji ch'án ntá ó xikahó xínixja ch'án inaá. ⁴⁵ Ntá kjan ch'án tí k'uéjó sín la ntáchro ch'án kixin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án. ⁴⁶ Ntá ijie t'inkatjenrá sátsjini kixin ó kjuí tí ch'ín sinchekjina —ichro ch'án.

Sákjuíko sín tí ch'ín Jesús tsjak'echjina ch'án ntqechiso

(Mr. 14.43-50; Lc. 22.47-53; Jn. 18.2-11)

⁴⁷ Ntá naxa tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuikao ch'án nchónhya chojni kjuíjiko sín chica espada la ko inta. Na mé kjuachaxién tí sín nchat'á t'etoan la ko tí sín táda kuente tí sín judío mé kui sín. ⁴⁸ Ntá ch'ín Judas, tí ch'ín kjuínchekji, mé tsintáchro ch'án kixin:

—Tí ch'ín tsakihá tuéen ch'án na mé tsonoxínrá kixin jehe ch'án. Ntá itserá ch'án —mé xikaha tsintáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehe ch'án ntáchro ch'án kixin:

—¿Á jina tjen, Maestro? —ichro ch'án.

Ntá kjóneko ch'án kochíto. ⁵⁰ Ntá kjuátehe ch'ín Jesús, ntáchro ch'án kixin:

—Amigo, á ó k'uinka tí xra tjinkávan sich'e?

Ntá xikaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án tatsjon ijnko tí sín ch'ehe tí nchat'á t'etoan xra. ⁵² Ntá ntáchro ch'ín Jesús kixin:

—Chr'axenhén tje chica espada méhe. Kaínxín tí sín tjàxaxín chica espada la xikaha ts'énxín sín. ⁵³ ¿Á noahyará kixin janhan jina chrókjuáncháha T'aná la ntá tuénxín chróchr'án ch'án teyó ejército sín ángel? ⁵⁴ Kjánchó tí xikaha chrókónhen la chróxiteyáhya éxí nixja xroon itén Dios kixin itén Dios mé chrónka kixin t'ichjánxín ó jehí xikaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsotserána éxí chrótserá ijnko síchee xikaha. A ntá kaín yaon kjuak'é nkaxenhen nínko kjuákua ¿na ntá nkexrí ntiha mé tsexinhyarána? ⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíjkin xroon itén Dios óse —ichro ch'án.

Mé xikaha ntá kaín tí sín k'uájiko ch'ín Jesús na mé kuítóhe sín ch'án, ntá sákjuí sín.

Ch'ín Jesús kóchjina ch'án tí síxreé t'etoan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuíko sín ch'án ntqech'ín Caifás, tí nchat'á t'etoan. Ntaha mé tsíkójkotsé kaín tí sín maestro tjako tí ley la ko tí sín t'etoan kuente nínko. ⁵⁸ Ntá ch'ín Pedro ikjín tinkáchréhe ch'án ntá kjuíji ch'án tí ntásin ntqech'ín nchat'á t'etoan la kjaxin k'uixenhen ch'án tí ntásin la kjuák'eko ch'án tí sín policía kuente nínko kixin tsotsjehe ch'án nkerí tsonhen.

⁵⁹ Ntá tí sín nchat'á t'etoan la ko tí sín táda la ko kaín tí sín t'etoan mé kjueyá sín nkexrí ts'eka sín jie tí ch'ín Jesús kixin jína chrók'óyán sín ch'án. ⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó testigo ntoáhya chrónka sín ⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuènte Dios la ntá iní yaon koá la ó tsjaké inaá”† —mé xikaha chro sín.

⁶² Ntá tí nchat'á t'etoan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté tjátéehya ninkehó? ¿Á chaxín xikaha tsintáchrua éxí xikaha ichro sín? —ichro ch'án.

⁶³ Ntá ch'ín Jesús la tánikoá ch'án nixjahya ch'án. Ntá ntáchro tí nchat'á t'etoan kixin:

—Kjuachaxièn ihnié tí Dios tjechón t'akjénxian chrónka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'ín Jesús ntáchro ch'án kixin:

—Éxí tí ntáchrua jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chóna kaín xín kjuachaxin la ko ts'ikuan itjuí mé tsixin ch'án nkaya nkajní —ichro ch'ín Jesús.

⁶⁵ Ntá kuínhin tí nchat'á t'etoan la ntá imá kónínkaon ch'án ntá kótséchje ch'án tí iké ch'án la ntáchro ch'án kixin:

—Tí ch'ín a k'uántaxínhin ch'án Dios kixin xikaha nixja ch'án. Méxra t'ichjánxinhya í so chojni tsochrónka. La ntá jahará la ó kuinhínra kixin nkexrí nixja ch'án. ⁶⁶ ¿A ntá jahará la, ¿nkechorá? —mé ichro tí nchat'á a.

Ntá kjuátehe sín ntáchro sín kixin:

—Chóna ch'án jie la chrók'uen ch'án —ichro sín.

⁶⁷ Ntá iso sín la kuikite sín ntate sín nkayakon ch'án na í so sín na kjuate sín ch'án la í so la chjéhe sín ikon ch'án. ⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án kixin chónhya ch'án tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro naxa tjetjaxin ch'án tí ntasin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xríkoa tí ch'ín Jesús tsíkjixin estado Galilea —ichro tjan.

⁷⁰ A ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrua —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uíkon tí jehe ch'án la nixjehe tjan kaín sín tjejótaxín, la ntáchro tjan kixin:

—Tí ch'ín i la kjaxin k'uájiko ch'án tí ch'ín Jesús tsíkjixin chjasin Nazaret —ichro tjan.

⁷² Ntá ch'ín Pedro kjuínchemá ch'án inaá, k'uákjenxin ch'án ihnié Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'éxin tí sín k'uéjótaxín kóchjinehe sín ch'ín Pedro la ntáchro sín kixin:

—Chaxín jaha kjaxin jnkojín tí sín a kixin tjátsoanxínni tí nixja jaha —ichro sín.

⁷⁴ Ntá k'uákjenxin ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xrínahya itsje kochíntoa. ⁷⁵ Ntá ch'ín Pedro mé xraxinkaon ch'án kixin nkexrí chrónka ch'ín Jesús senó kixin: “Naxa tsotsjehya kochíntoa mé ó tsjixin sijnchemána níya kixin chonhyana.”‡ Ntá xikaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

† 26:61 Juan 2.19 ‡ 26:75 Mateo 26.34

27

Kjuikénhen sín ch'ín Jesús tí ch'ín Pilato

(Mr. 15.1; Lc. 23.1-2; Jn. 18.28-32)

¹ Ntá tí kóyaon k'uínkaséyan ntá kaín sín nchat'á t'etoan la ko tí sín t'etoan kuènte tí sín judío kjuenkayáxin sín nkexrí ts'óyán sín tí ch'ín Jesús. ² Ntá tjechronteto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

Ik'uén ch'ín Judas

³ Ntá tí ch'ín Judas, tsíkjinckekji ch'ín Jesús, mé k'uíkon ch'án kixin ts'óyán sín tí ch'ín Jesús. La ntá xraxinkaon ch'án tí jie kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín nchat'á t'etoan la ko tí sín táda. ⁴ La ntá ntáchro ch'án kixin:

—Ó kjuasinni jie kixin kjuínckekjini ijnko nkexro tjóá —ichro ch'án.

À ntá jehe sín kjuátehe sín kixin:

—Ntá janhana la nonahyana tíha. Tíha la ó jie kuènta —ichro sín.

⁵ Ntá ch'ín Judas mé sákjuík'e tí chichaon nkaxenhen ninko ntá sákjuí ch'án kjuísik'á isin ch'án nta.

⁶ Ntá tí sín nchat'á t'etoan kjuenájín sín tí chichaon la ntáchro sín kixin:

—Tí chichaon la kóxixín ijnié chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontee Tí Ch'ín Ch'éna Nchésen kixin tsochónta sín nketí tsoxravá tí chojni tsíkixín ikjín. ⁸ Mé xikaha kjuínckek'in sín tí nonte mé Campo Kuènte Jni la hasta ijie la naxa xikaha nckek'in sín. ⁹ Mé xikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjón tí sín israelita kuènte tí ch'ín a), ¹⁰ la k'uénaxín sín tí nonte kuènte tí ch'ín ch'éna nchésen kixin xikaha kjuínckexiteyá sín tí nkehe k'uetuanna Ìnchéni.”*

Ch'ín Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'ín Jesús sákjuíko sín ch'án nkayakon tí ch'ín gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús, ntáchro ch'án kixin:

—Éxí ntáchrua jaha —ichro ch'án.

¹² Na ntá tí sín nchat'á t'etoan la ko tí sín táda t'etoan t'eka sín jie tí ch'ín Jesús kjánchó la ch'ín Jesús la ninkehó kjuáteehya.

¹³ À ntá ch'ín Pilato kjuanchankí ch'án kixin:

—¿Á kiénhya kaín tí jie t'eka sín tí jaha? —ichro ch'án.

¹⁴ Kjánchó ch'ín Jesús la ninkehó kjuáteehya ch'án. Ntá tí ch'ín gobernador la chrakon ch'án.

K'uetōan sín kixin its'en ch'ín Jesús

(Mr. 15.6-20; Lc. 23.13-25; Jn. 18.38—19.16)

¹⁵ À ntá tí kié pascua mé kuénhen tí ch'ín gobernador kixin jnkójnko nánó takitsjexín ch'án ntqechiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji. ¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás. ¹⁷ Ntá itsjé chojni kójnkotsé la ntá ch'ín Pilato mé kjuanchankí ch'án kixin:

* 27:10 Zacarias 11.12-13

—¿Nkexro tjinkáonrá ts'atjánta, á tí ch'ín Barrabás o á tí ch'ín Jesús nchek'in sín Cristo? —ichro ch'án.

¹⁸ Kíxin tí ch'ín Pilato la ó nohe ch'án kíxin kjuachjinoxínhin chóna tí sín kjuíkaán tí ch'ín Jesús.

¹⁹ Ntá jehe ch'án naxa tjetjaxin ch'án tí nchekitoexíxin ch'án ijje chojni la ntá tí ichjién ch'án mé k'uetuenhen tjan ijnko chojni tsjichénka ch'án kíxin tsjiatehya ch'án tí nkexro jína kíxin kóntó náxrjónhya k'uíkonxín tjan kotáchrién tjan kíxin tí jehe ch'án.

²⁰ A ntá tí sín nch'at'á t'etōan la ko tí sín táda t'etōan a mé nixjehe kaín tí chojni tsikóchjina kíxin chrókjuanchia sín kíxin chrókuítóhe ch'án tí ch'ín Barrabás sáchrókjui, a ntá ch'ín Jesús mé chrók'uen. ²¹ A ntá tí ch'ín gobernador mé nixjehe ch'án sín inaá kjuanchankí ch'án kíxin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchro sín kíxin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kíxin:

—¿A ntá nkehe sít'aha tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátehe sín kíxin:

—¿Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kíxin:

—¿Xá nkehe tí kjuích'e tí ch'ín i kíxin? —ichro ch'án.

Ntá antsí má itsen k'uíxite sín, k'óyako sín, ntáchro sín kíxin:

—¿Tsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kíxin í kohya tsjitóxinhin sín tsjenkayáxin sín la antsí má k'uíxite sín, nínkaon sín, la ntá kjuanchia ch'án xrakao sín inta, la nkayakon kaín tí sín tsikójnkotsé ntaha k'ònti ch'án tja ch'án. La ntáchro ch'án kíxin:

—Janhan tsámáhya jie tí its'en tí nkexro í chóntahya jie. Jahará xikaha tjinkáonrá tsonhen —ichro ch'án.

²⁵ Ntá kaín sín kjuátehe sín kíxin:

—Jeheni la ko xjeenni mé yámáni tí jie tí its'en tí nkexro i —ichro sín.

²⁶ Ntá ch'ín Pilato kuítóhe ch'án kíxin sáchrókjui tí ch'ín Barrabás. Ntá tuénxín k'uetōan ch'án kíxin tsjate sín tí ch'ín Jesús la ntá kjuínchek'áyéhe ch'án tí sín tsjak'enkáni sín ch'án ntacruz.

²⁷ A ntá tí sín soldado a mé sákjuíko sín tí ch'ín Jesús tí palacio kuénte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án. ²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. ²⁹ La kjuak'enkaya sín kja ch'án ijnko corona tsíkich'éna sín ntach'i la ko kjuanjon sín ijnko nta vara kíxin tjenkáya tja ch'án chjina. La ntá k'uéjóxin toch'in sín nkayakon ch'án la kjuanoá sín ch'án, ntáchro sín kíxin:

—Jnkochríxín tsjak'é tsétuénhén tí sín judío —ichro sín.

³⁰ La ko kjaxin ntaté sín kuíkite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án. ³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxín. Ntá sákjuíko sín ch'án kíxin tsjak'enkáni sín ch'án ntacruz.

Kjuák'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuíxin sín ntiha la xéta sín ijnko ch'ín kjuixín ch'án chjasin Cirene, mé it'in ch'án Simón. Ntá k'uetuenhen sín ch'án kíxin tsámá ch'án tí ntacruz tsjak'enkáni ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrjexín Nta Hueso Kja Chojni Tsík'en. ³⁴ Ntá chjéhe sín ch'ín Jesús xranvino tsík'ixinkíkjanxín xroan tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkani sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xikaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuích'exín sín tí kaná.”† ³⁶ Ntá tí sín soldado ntaha k'uéjóna sín t'ayakonhen sín ch'án. ³⁷ Ntá kjuak'enkani sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuenhen tí sín judío.”

³⁸ Kjaxin yaá tí síchee k'uéjónyáni sín ntacruz ijnko la nó tja chjina la íjnko la nó tja kjon. ³⁹ Ntá tí sín tinkák'atsínka mé kjuanoá sín ch'án tinkátjía kja sín ⁴⁰ la ntáchro sín kixin:

—Jaha ntáchrua kixin chrók'oxíka tí nínko a ntá iní koá yaon la ó chrókjuixin chrókjuich'éna inaá,‡ ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxián tí ntacruz méhe —ichro sín.

⁴¹ La ntá kjaxin tí sín nchat'á t'etuan la ko tí sín maestro tjako tí ley la ko tí sín fariseo la ko tí sín k'uetuan kuènte nínko kjuanoá sín ch'án, ikjo sín kíchó sín kixin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuènte Israel ntá jehó ch'án chrókjuinkajinxián ch'án asén ch'án tí ntacruz kixin ntá kjaxinni chrókuitekaonni tí jehe ch'án. ⁴³ Jehe ch'án tsintáchro ch'án kixin Dios tjinkitsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxínhin sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkixin hasta las tres kónjin mé k'uixin tie chjasintajni. ⁴⁶ Ntá tí hora a ch'ín Jesús itsen k'uèya ch'án, ntáchro ch'án kixin:

—Elí, Elí, ¿lama sabactani? —mé tíhi t'axrjexín kixin: It'éni, It'éni, ¿nkekuèté kuítohéni?§ —mé xikaha ichro ch'án.

⁴⁷ Ntá iso sín tjejónaxín kuínhin sín ntá ntáchro sín kixin:

—Tí ch'ín a mé t'íyehé tí ch'ín profeta Elías —ichro sín.

⁴⁸ Ntá ijnko ch'ín kuínká ch'án sákjuíakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjínjin ntá kjuínchechriin ch'án kixin chrók'ui ch'ín Jesús.

⁴⁹ Ntá í so sín ntáchro sín kixin:

—Nté títóhé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án inaá, ntá kjuixin ik'uén ch'án. ⁵¹ Mé ntá tuénxín k'uíchje tí ka tjenkákuènxín nkaxenhen nínko. Mé k'uíchje tí ka k'óna yaá tí kjuankíxixín noi hasta nonte. La ko kuínkí nonte la ko tí tjo la kjaxin xitjehe. ⁵² La ko ó xitjehe tí tòye tsíxravá chojni la ko ó xechón itsjé tí sín k'uékinkáchónki Dios. ⁵³ Kaín tí sín a mé k'uaxrjexín sín tí tòye, la tió kjuixin xechón ch'ín Jesús ntá k'uixenhen sín tí chjasin tjóá mé chjasin Jerusalén la ntaha itsjé chojni k'uíkon kixin xíxechón tí sín a.

⁵⁴ Ntá tí ch'ín capitán la ko tí sín k'uéjóko ch'án, mé tí sín t'ayakonhen ch'ín Jesús, na ntá k'uíkon sín kuínkí nonte la kaín tí í so nkehe la ntá imá chrakon sín, la ntáchro sín kixin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ikjín tjejó sín, tjejótsjehe sín. Jehe sín k'uékinkáchréhe sín ch'ín Jesús tí kjuixin ch'án estado Galilea kixin mé ntiha kjuankíxixín sín k'uékjinkitsa sín ch'án. ⁵⁶ Ntaha kjaxin tjen tjan María Magdalena la ko tjan María, ìné tí ch'ín Jacobo, la ko ch'ín José la ko tí ìné tí xjeen tí ch'ín Zebedeo.

† 27:35 Salmo 22.18 ‡ 27:40 Juan 2.19 § 27:46 Salmo 22.1

*Ntá xrává ch'ín Jesús**(Mr. 15.42-47; Lc. 23.50-56; Jn. 19.38-42)*

⁵⁷ Ntá tí ó ntá kóntó ikui ijnko ch'ín it'in José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús. ⁵⁸ Ntá tí ch'ín José sákjuítsjehe ch'án ch'ín Pilato kjuíkjanhia ch'án tí cuérpóé tí nkexro Jesús. Ntá ch'ín Pilato mé kjuanjon ch'án kjuachaxin. ⁵⁹ Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá. ⁶⁰ Na ntá kjuak'enkaya ch'án ijnko tòye nixin kuènte ch'án kixin senó tsíkjach'èna ch'án. Ntá ijnko xro jié k'uíkjàxín ch'án tí ntója tí tjo, ntá kjuixin ntá sákjuí ch'án. ⁶¹ Ntaha kjuák'e tí tjan María Magdalena la ko í jnko tjan María tjejótxaxin sín ntoí chok'èxin tjen tòye.

Tí sín soldado k'uáyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nchát'á t'etóan la ko tí sín fariseo sákjuítsjehe sín tí ch'ín Pilato ⁶³ la ntá ntáchro sín kixin:

—Ó xraxinkaonni kixin tió naxa kjuák'echón tí nkexro kjuích'ia la tsintáchro ch'án kixin ts'atsínka iní yaon ntá tsoxechón ch'án inaá, tsíchro ch'án. ⁶⁴ Méxra tsétuènhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhi, la kjá tie itsi tí sín k'uájiko ch'án la tseé sín tí cuerpo kuènte ch'án la ntá chr'éxin tsochénka sín chojni kixin ó xíxechón tí nkexro a, mé xikaha sich'ia sín. La ntá tí xikaha sich'e sín antsí má sich'ia sín que tí xrankixixín —mé xikaha ichro sín.

⁶⁵ Ntá ntáchro ch'ín Pilato kixin:

—Ntahi tjejó soldado. Sátsjirá la ts'ayakonhenrá jína tí tòye éxi tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkèxin tí tòye la kuítóhe sín tí sín soldado ntahó kixin ts'ayakonhen sín.

28*Ó xechón ch'ín Jesús**(Mr. 16.1-8; Lc. 24.1-12; Jn. 20.1-10)*

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankixixín semana, la ntá tjan María Magdalena la ko tí í jnko tjan María sákjuítsjehe sín tí tsíkixravá Jesús.

² Ntá xrínahya kuínki nonte imá tjiàn kixin ijnko ángel kuènte Inchéni k'uínkajinxin nkaya nkajni la kjuíji ch'án tí tsíxravá Jesús la kjuakjin ch'án tí xro a tjejkèxin tòye la ntá chrítaón tí xro a kjuák'ekjen ch'án. ³ Tí ángel la imá tjákini tsjehe éxi ijnko xrohi la tí iké ch'án la imá tjóá tsjehe éxi chrinta. ⁴ Tí sín soldado mé k'uíkon sín xikaha la ntá síxranka sín chrakon sín la éxi tsík'en sín xikaha k'uéjó sín. ⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nòna kixin xritjéyará tí nkexro Jesús mé tí nkexro tsíkjak'enkáni ntacruz. ⁶ Kjánchó í kohya ch'án ntahi ó tsíxechón ch'án inaá éxi chrónka ch'án senó. Xrákirá tsjehérá tí tsíkjak'e sín ch'án, í kohya ch'án. ⁷ Ntá sátsjirá tjoka tjíchenkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntia sátsji ch'án estado Galilea. Ntiha ts'ikonrá ch'án”, mé xikaha tsochronkará. Kaín tíha mé tjonkará —mé xikaha chrónka tí ch'ín ángel.

⁸ A ntá tí chojni chjin tjoka sákjuíxin sín tí tsíxravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús. ⁹ Ntá xrínahya titàya k'uíkuèn sín kixin itjen tí ch'ín Jesús la nixjehe sín ch'án. Ntá kóchjinehe sín ch'án la kjóá sín toté ch'án, kuítekaon sín ch'án. ¹⁰ La ntáchro ch'án kixin:

—Chrakonhyará sátsjirá tjíchenkará tí sín kichó ni kixin sáchrókjui sín estado Galilea la ntaha ts'ikon sín tí janhan —mé xikaha ichro ch'ín Jesús.

Tí nkehe chrónka tí sín soldado

¹¹ Tió sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchát'á t'etóan kaín tí nkehe tsíkónhen

tí k'uéjó sín ntiha. ¹² Ntá tí sín nchat'a t'etóan kjuínixjehé sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado. ¹³ La ntáchro sín kixin:

—Chronkará kixin tí tie naxa tjejochrinrá ikui tí sín k'uék'ajiko tí nkexro Jesús, mé kueé sín cuerpo kuènte ch'án, ichrorá. ¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án kixin tsonínkakuanhyará ch'án —mé xikaha ichro tí sín nchat'á.

¹⁵ La ntá tí sín soldado k'uáyéhe sín tí chichaon la sákjuí sín la xikaha kjuích'e sín éxí k'uituenhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

Ch'ín Jesús k'uetuenhen ch'án tí sín k'uék'ajiko ch'án tí xra sich'e sín

(Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sín k'uék'ajiko ch'ín Jesús sákjuí sín ijnko jna estado Galilea kixin xikaha tsík'etóan ch'ín Jesús. ¹⁷ Ntá k'uíkon sín ch'ín Jesús la ntá kuinkáchónki sín ch'án kjónté iso sín naxa kjuenkayáxin á chaxín jehe ch'án o náhí. ¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajní la ko chjasintajni. ¹⁹ Méxra sátjirá kaín xín nación la tjácohérá chojni kixin tsitekaon sín tí janhan. Tíkítexínrá sín kjuachaxién ihnié It'éni la ko ihnié tí Xjeen la ko Nchakuèn Dios. ²⁰ Tjácohérá sín kixin sinchexiteyá sín kaín xín nkehe kuétuanhanrá. Ijie la ó nohará kixin tsjak'é ts'ejokoará jnkochrín hasta tsjeje chjasintajni. Mé xikaha tsonhen. Amén —ichro ch'ín Jesús.

Tí tan jína chrónka ch'ín Marcos

Nteje mé kjuakoxin ch'ín Juan Bautista

(Mt. 3.1-12; Lc. 3.1-9, 15-17; Jn. 1.19-28)

¹ Xikihi mé xrankíxixín tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin:

Janhan tsochr'an ijnko nkexro tsochrónka tan kuèntana tsitónxin ntja,

kixin tsjasiyóxin ch'án ntja kuèntá.*

³ Ntá tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixin Ìnchéni, takitjehérá ijnko ntja ntoí.”†

⁴ Tíha mé xíteyá ikui ch'ín Juan Bautista, mé xikaha kjuák'e ch'án nteje kuikite ch'án chojni. Kjuakohe ch'án chojni ntiha kixin chrókjuinkí sín tí nkehe tjenkayáxin sín chrókuítóhe sín tí ijje sín ntá chrókuikite sín kixin xikaha mé chrókjuin ijje sín. ⁵ Itsjé chojni kuixin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jje yámá sín ntá ch'ín Juan mé kuikite sín ch'án ntarío Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóna ch'án mé kochjoá la ko tsjen kotsjenta tónoxín nteje.

⁷ Mé kjuák'ekjakohe ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuàna chrókjuasintanka tí correa tí tokaté ch'án. ⁸ Janhan mé ìnta ó kuikite sín. Ntá jehe ch'án mé tsikite sín ch'án tí Nchakuen Dios —ichro ch'ín Juan.

Ch'ín Juan kuikite ch'án tí ch'ín Jesús

(Mt. 3.13-17; Lc. 3.21-22)

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuikite sín ch'án tí ntarío Jordán. ¹⁰ Tió k'uaxrjenkixin ch'ín Jesús tí ìnta, ntá xrínahya titàya k'uikuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án. ¹¹ Ntá xrínahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

Ch'ín Tsochren chrókjuachroe tí ch'ín Jesús kixin chrókjuasin ch'án jje

(Mt. 4.1-11; Lc. 4.1-13)

¹² Ntá tí Nchakuen Dios mé sákjuíko tí ch'ín Jesús nteje. ¹³ Kjuák'e ch'án cuarenta yaon tí nteje la ko ntiha mé k'uixin ko jjehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

Ch'ín Jesús kjuankíxixín kjuako ch'án estado Galilea

(Mt. 4.12-17; Lc. 4.14-15)

¹⁴ Kjuixin kjuák'echjina ch'ín Juan ntóechiso ntá ch'ín Jesús na mé sákjuí ch'án nó estado Galilea sákjuíkjakohé ch'án tí sín ntiha tí tan jína kuènte Dios. ¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etqan ch'án. Chrókuítóhérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xikaha kjuako ch'ín Jesús.

* 1:2 Malaquías 3.1 † 1:3 Isaías 40.3

Ch'ín Jesús k'uíyehę noó tí sín itsé koche
(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kíchó ch'án mé it'in Andrés, mé koche xritsé sín, ntá tinkák'e sín tí nchísén chrínkí ntá. ¹⁷ Ntá ntáchro tí ch'ín Jesús kixin:

—Chréhéra tí janhan, ntá tsotjahára xra tsjéyára chojni —ichro ch'án.

¹⁸ Ntá tuénxín kuítóhe sín tí nchísén k'uétséya sín koche ntá sákjuiko sín ch'án.

¹⁹ Ntá kínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehe sín la ko tí it'é sín tjejóxenhén sín tí ntabárcō tjejótonité sín tí nchísén tséya sín tí koche. ²⁰ Na ntá ch'ín Jesús mé k'uíyehę tí jehe sín kixin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'an tí ntabárcō la ko tí sín tjinkítsa ch'án ch'e xra. A ntá jehe sín sákjuiko sín ch'ín Jesús.

Ijnko chojni chóna ijnko nchakuen tí jínahya
(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uíxenhén ch'ín Jesús tí nínko Israel. Na ntá ntaha mé kjuankíxin ch'án kjuako ch'án. ²² A ntá tí chojni siín ntiha mé chrakon sín kuínhin sín tí nkehe kjuako ch'án kixin kjuakoxin ch'án kixin chóna ch'án kjuachaxin, la jehya éxí tí sín maestro tjako tí ley, ichro sín. ²³ Ntá tí nínko Israel chjasin ntiha itjen ijnko chojni chóna ijnko nchakuen tí jínahya k'uíyato ntáchro kixin:

²⁴ —¿Nkekuénté tjiaté tí jeheni kaín ní? Jaha Jesús kjuíxian Nazaret. ¿Á k'uinka kixin sijnchek'itjáyanni? Janhan mé ó kjuátsoan tí jaha, la ko nõna kixin jaha tí nkexro tjóá kuènte Dios —mé xikaha ichro tí nchakuen tí jínahya.

²⁵ Ntá ch'ín Jesús mé k'uétuénhen tí nchakuen tí jínahya ntáchro ch'án kixin:

—Tániá, t'axrjéxian tí jehe ch'án —mé xikaha ichro ch'ín Jesús.

²⁶ A ntá tí nchakuen tí jínahya mé kjuínchek'aniáte tí ch'ín a la ko k'uíyatoxín tsen ntá k'uaxrjexín tí ch'ín a. ²⁷ A ntá kaín sín chrakon sín ntá kjuanchankíhi sín kíchó sín, ntáchro sín kixin:

—¿Xá nkexro tíha kixin tjako ch'án nkehe nixin? Jehe ch'án chóna kjuachaxin kixin t'etuenhen ch'án tí nchakuen tí jínahya la titekakonhen —mé xikaha ichro sín.

²⁸ A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'ín Jesús a.

Ch'ín Jesús kjuínchekitohe jína tí ich'ee tí ch'ín Simón Pedro
(Mt. 8.14-15; Lc. 4.38-39)

²⁹ Ntá tí ch'ín Jesús mé k'uaxrjexín ch'án tí nínko, a ntá tuénxín sákjuiko ch'án ch'ín Jacobo la ko ch'ín Juan, sákjuí sín ntōe ch'ín Simón la ko ch'ín Andrés. ³⁰ Ntá tí ich'ee ch'ín Simón na tjetsínka tjan, níhi tjan kixin chóna tjan sóa. Ntá chénka sín tí ch'ín Jesús. ³¹ Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuínhin tjan tí sóa chóna tjan. Ntá kjuanjon tjan nkehe sine sín.

Ch'ín Jesús kjuínchekitohe jína nchónhya chojni níhi
(Mt. 8.16-17; Lc. 4.40-41)

³² A ntá tió kjuíátaón yaon tió k'uíxin tie kuíkohe sín tí ch'ín Jesús kaín tí sín níhi la ko tí sín chóna nchakuen jínahya; ³³ na ntá kuenté chjasin kójnkotsé sín k'uíxintankí sín ntója tí nchia a. ³⁴ Ntá kjuínchekitohe ch'án jína kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjonhya ch'án kjuachaxin kixin tsonixja tí nchakuen tí jínahya kixin ó kjuátsoan tíha nkexro tí jehe ch'án.

Ch'ín Jesús mé kjuako ch'án estado Galilea
(Lc. 4.42-44)

³⁵ Ntá naxa sítié k'uàya ch'ín Jesús k'uaxrjexín ch'án tí chjasin a sákjuí ch'án nteje kixin ntiha nixjeexín ch'án It'é ch'án tjen nkaya nkajní. ³⁶ Ntá ch'ín Simón la ko tí sín xriko ch'án mé sákjuíkjejá sín ch'án. ³⁷ Ntá k'uitja sín ch'án ntá chénka sín kixin:

—Kaín sín xritjejá sín tí jaha —ichro sín.

³⁸ Ntá ntáchro ch'ín Jesús kixin:

—Sátsjini ókjé chjasin chjinaxón kixin ntaha kjaxin tsjákoḥa sín tí tan jína, kixin xikaha mé tí k'uaxrjexian chjasin ntiha.

³⁹ Ntá nkuíxín estado Galilea sákjuí ch'án kuinkákjako ch'án jnkojnko njnko la ko kuakitsje ch'án tí nchakuen tí jínahya chóna sín.

Ch'ín Jesús kjuínchekitohe jína ijnko ch'ín chóna chinlepra

(Mt. 8.1-4; Lc. 5.12-16)

⁴⁰ Ntá kui ijnko ch'ín chóna chinlepra kjuák'exín toch'in ch'án nkayakon ch'ín Jesús ntá chrónóeḥe ch'án ntáchro ch'án kixin:

—Tí tjinkávan jaha la jína chrókjuínchekitohéni jína —ichro ch'án.

⁴¹ Ntá ch'ín Jesús na imá kuikonóeḥe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xikaha tjinkávan. Ntá jie sintakitoha jína —ichro ch'án.

⁴² A ntá xikaha ntáchro ch'án ntá tuénxín kjuìn tí chinlepra ntá kuítóhe ch'án jína. ⁴³ Ntá k'uetuēnhen ch'ín Jesús tí ch'ín a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sátsja tjákoḥé tí ch'ín nchat'á kixin ó kjuinhan tí chinlepra la ko tjánjuan tí nkehe tsík'etoan ch'ín Moisés‡ kixin tsonoexín kaín xín chojni kixin ó kuítóha jína —ichro ch'án.

⁴⁵ A ntá tí ch'ín tsíkitohe jína, a ntá sákjuí ch'án kjuankixin ch'án chénka ch'án kaín xín chojni kixin nkexrí kuítóhe ch'án jína. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuíxín chjasin.

2

Ch'ín Jesús mé kjuínchekitohe jína ijnko chojni tsík'en toté

(Mt. 9.1-8; Lc. 5.17-26)

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uixikónohe chojni kixin ijnko nchia ntiha kjuák'e ch'án. ² Ntá tuénxín nchónhya chojni kóchjina ntá kjuachahya tí nchia k'uixixenhen sín la ko kjaxin kjuachahya tí ntója nchia chrók'uixintankí sín. A ntá ch'ín Jesús kjuako tí tan jína kuente Dios. ³ Ntá kui noó sín tinkátsénki sín ijnko ch'ín tsík'en toté ch'án. ⁴ Kjánchó xitjahya kóchjina sín tí tjen ch'ín Jesús kixin nchónhya chojni síin. La ntá k'uit'ótjen sín tí chrítaón nchia a ntá k'óxrat'ó sín. Na ntá ijnko hno kjuak'ete sín tí kania tjenkáya tí sinníhi a ntá kjuinkajin sín ntoí tí tjen ch'ín Jesús a. ⁵ Tió k'uíkon ch'ín Jesús tí nkehe kjuích'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjeḥe ch'án tí sinníhi ntáche ch'án kixin:

—Xjeenni, ó kjuixin kjuinhan tí jie chonta —mé xikaha ichro ch'án.

⁶ Na ntá iso tí sín maestro tjako tí ley tjejójtjaxin sín ntiha na ntá jehó sín mé kjo sín asén sín kixin: ⁷ “¿Nkekuènté xikaha nixja tí ch'ín i ncheyóḥe ch'án asén ch'án Dios? Kixin ninkexró xitjahya tsjatsin ije kixin jehó Dios mé chóna kjuachaxin tsjatsen ije chojni”, mé xikaha ikjo sín asén sín. ⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xikaha tjenkayáxinrá? ⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuinhan ch'án tí jie yámá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaniee ch'án

‡ 1:44 Levítico 14.1-32

ntá sáchrókjui ch'án? ¹⁰ Méxra jie tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjinhin ijie chojni —ichro ch'án.

Ntá ntáche ch'án tí ch'ín xitjahya tji kixin:

¹¹ —Jaha tétuanhan t'inkatjen, tjenájian kaniãa na sátjia ntõa —ichro ch'án.

¹² A ntá tí sinníhi na tuénxín k'uínkatjen ch'án kjuák'exín toté ch'án na kjuenájín ch'án kaniëe ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín siín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uíkonhyéni tí nkehe i —ichro sín.

Ch'ín Jesús k'uíyehé ch'ín Leví

(Mt. 9.9-13; Lc. 5.27-32)

¹³ A ntá chr'éxín ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. ¹⁴ Ntá k'uátsínka ch'án k'uíkon ch'án tí ch'ín Leví xjeen ch'ín Alfeo tjetjaxin ch'án tjenchekjènkí ch'án. Ntá ch'ín Jesús mé k'uíyehé ch'án, ntáchro ch'án kixin:

—Chr'éhé tí janhan —ichro ch'án.

Ntá ch'ín Leví mé tuénxín k'uínkatjen ch'án chr'éhe ch'án tí ch'ín Jesús.

¹⁵ A ntá ch'ín Jesús kjuák'e ch'án ntõe tí ch'ín Leví, la ntá kjuanjón sín nkehe sine ch'án la ko kjaxin k'uéjõ nchónhya tí sín nchekjènkí la ko kjaxin í so chojni chóna jie. Mé kaín tí sín a mé tjejótjaxin sín tjejóneko tí ch'ín Jesús la ko tí sín k'uájiko ch'án, kixin nchónhya chojni chr'éhe sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uíkon sín kixin ch'ín Jesús tjejóneko kaín ti sín nchekjènkí la ko tí í so sín chóna jie, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuèntará neko ch'án la ko t'ikao ch'án tí sín nchekjènkí la ko tí í so sín chóna jie? —ichro sín.

¹⁷ Na ntá ch'ín Jesús kuínhin ch'án nkehe tí tjo sín a. Ntá nixjehé ch'án tí sín a ntáchro ch'án kixin:

—Tí sín níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. Janhan na k'uinkahya ntihi kixin chrók'uíyahá chojni jína tjejó sín. Náhí. K'uinka kixin ts'íyahá chojni chóna jie —ichro ch'án.

Tjanchankíhi sín tí ch'ín Jesús kixin á chrókjónehya sín tió tsonixjehé sín Dios

(Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kixin mé xikaha ts'áyéhe sín kjuaxróxin, ichro sín. A ntá kui iso chojni nixjehé sín tí ch'ín Jesús ntáchro sín kixin:

—¿Nkekuènté kixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

¹⁹ Ntá kjuátehe ch'ín Jesús ntáchro ch'án kixin:

—¿Xá chrókjónehya tí chojni tsík'íyehé sín kóchjina ijnko kia tsotehe chojni tí naxa tjejóko sín tí nkexro tsotehe? Tí naxa tjen tí nkexro tsotehe la xitjahya kixin chrókjónehya sín. ²⁰ A ntá itsi ijnko yaon itsi chojni sátsjiko sín tí ch'ín tsíkótèhe, ntá tí yaon la chaxín sinehya sín.

²¹ Ninkexró chrókjuak'eniëhe ijnko ka ó ntaxin it'õ ka nixin kixin ntá chrókjuixéhe tí ka nixin ntá antsí má chrók'uichje tí ka ntaxin a. ²² La ko kjaxin ninkexró chrókuiqia xran vino nixin ijnko tjuaxran ó ntaxin; kixin tí xran vino nixin la chrókótséchje tí tjuaxran ntaxin ntá chrók'uitjayan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigo ijnko yaon t'ok'éhe sín

(Mt. 12.1-8; Lc. 6.1-5)

²³ Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte siín noatrigo. Na ntá tí sín k'uájiko ch'án kjuankíxin sín ik'uín sín iso noatrigo. ²⁴ Na ntá iso tí sín fariseo kjuanchankíhi sín tí ch'ín Jesús a kíxin:

—¿Nkekuènté kíxin tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ok'éheni —ichro sín.

²⁵ Ntá kjuátehe ch'án ntáchro ch'án kíxin:

—¿Á kjuínchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta? ²⁶ A ntá jehe ch'án k'uixenhen ch'án ntøe Dios tió kjuák'e nchat'á Abiatar k'uetøan, a ntá kjóne ch'án tí ntøtja tsíkóyaon kjónté jehó tí sín nchat'á mé k'uéchónta kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

²⁷ Kjaxin ntáchro ch'ín Jesús kíxin:

—K'óna tí yaon ts'ok'éhe chojni kíxin t'ichjánxin sín, la jehya kíxin chrókjuikosáyehe tí yaon a. ²⁸ A ntá tí Xjeen Dios K'óna Chojni mé chóna kjuachaxin ts'etøan nkehe tsonhen tí yaon t'ok'éheni —ichro ch'án.

3

Ijnko chojni tsíxámá tja

(Mt. 12.9-14; Lc. 6.6-11)

¹ Ntá ch'ín Jesús k'uixenhen ch'án ijnko nínko Israel inaá. Na mé ntiha tjen ijnko ch'ín tsíxámá ijnko tja ch'án. ² Na ntá kóchjina iso chojni tsáyehe sín ch'ín Jesús ts'ikon sín kíxin á sinchekitohe ch'án jína tí ch'ín tsíxámá tja tí yaon t'ok'éhe sín kíxin mé jína tsjanchia sín jie, ichro sín. ³ Ntá ch'ín Jesús mé ntáche ch'án tí ch'ín tsíxámá tja a kíxin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín siín ntiha kíxin:

—¿Nkehe siín kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuínchekitohe chojni jína ní o á chrók'óyánni chojni? —ichro ch'án.

A ntá jehe sín la táníkoá sín. ⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kíxin tjinkakonhya sín tsíkonøhe sín chojni. Na ntá k'uetuènen ch'án tí ch'ín a kíxin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jína. ⁶ Na ntá tí sín fariseo a k'uaxrjéxín sín nínko sákjuí sín k'uító sín tí sín kuènte ch'ín Herodes ntá kjuenkayáxinko kíchó sín kíxin nkexrí chrók'óyán sín tí ch'ín Jesús.

Nchónhya chojni siín chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea ⁸ la ko chjasin Jerusalén la ko estado Idumea la ko ikjé sín kujixín sín nó tóhe ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kíxin nkexrí tí kjuaxroan jie kjuasin ch'ín Jesús ntá kuichréhe sín ch'án kíxin chrók'uikon sín tíha kjaxin. ⁹ Ntá k'uetuènen ch'án tí sín k'uájiko ch'án a kíxin ntahó chrókjuak'echonhen sín ijnko ntabárco. A ntá tí imá chrók'uixitja sín ch'án ntá chrók'uixenhen ch'án tí ntabárco, a ntá ntiha chrókjuak'e ch'án tsochrónka ch'án. ¹⁰ Kíxin itsjé chojni tsíkjinchekitohe ch'án jína, na ntá kaín xín tí sín níhi k'uixitja sín ch'án kíxin tjinkaon sín chrókuákóxín sín ch'án. ¹¹ Kjaxin tí sín chóna nchakuen tí jínahya na mé tió k'uíkon sín tí ch'ín Jesús ntá k'uéjóxín sín toch'in sín nkayakon ch'án. Ntá k'óyako tí nchakuen tí jínahya a ntáchro kíxin:

* 2:26 1 Samuel 21.1-6; Levítico 24.5-9

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án
(Mt. 10.1-4; Lc. 6.12-16)

¹³ A ntá chr'éxin chr'in ch'ín Jesús ijnko jna, a ntá ntiha k'uíyehē ch'án tí sín tjinkaon ch'án chrók'ujiko ch'án ntá kóchjinehe sín ch'án. ¹⁴ Ntá kjueyá ch'án teyó tí sín ts'ajiko ch'án kixin ts'etueñhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchakuen tí jínahya chóna chojni. ¹⁶ A ntá tí sín i mé tí teyó sín tsíkjeýá ch'án mé it'in sín xikihi: Simón na mé kjuínchek'in ch'án Pedro; ¹⁷ la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuente tí sín cananista, ¹⁹ la ko Judas Iscariote, mé kjuínchekji tí ch'ín Jesús chr'éxin.

Ntáchro sín kixin ch'ín Jesús chóna kjuachaxin kuente tí Jínahya
(Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia. ²⁰ A ntá inaá kójnkotsé nchónhya chojni, a ntá xitjahya sine sín. ²¹ Ntá kónohe tí sín naxa kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

²² Kjaxin tí sín tjako ti ley kuixin sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etueñhen kaín tí nchakuen tí jínahya ntá xikaha tjacha ch'án takitsje ch'án nchakuen tí jínahya a —ichro sín.

²³ Ntá ch'ín Jesús k'uíyehē ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? ²⁴ A ntá tí sín t'etōan ijnko nación tjanjōnko kichó la tsjachahya ts'etōan. ²⁵ La ko kjaxin tí sín jnkokoá ntōe jnkokoáhya tjenkayáxin sín ntá xitjahya ts'ejóko kichó sín. ²⁶ A ntá tí chaxín ch'ín Tsochren jnkokónhya tjenkayáxin tjanjōnko kichó la ntá ts'itjāyan kjuachaxin kuente.

²⁷ Ninkexró tsjacha ts'ixenhen ntōe ijnko chojni jiehe kixin ts'axrjehe tí nkehe chóna ch'án. Náhí. T'ichjānxin saoxín sinchenteto ch'án tí ch'ín jiehe kixin jína tseéhe ch'án nkehe chóna tí ch'ín a.

²⁸ Tjnko nkehe chaxín tsotjonkará kixin tió tsoxraxinkaon ijnko chojni tí jie chóna la ko tsochronóehē Dios la ntá tsjakjinhin ch'án kaín tí jie la ko kaín tí nkehe jínahya tsintáchro sín. ²⁹ A ntá tí nkexro ts'ántaxinhin tí Nchakuen Dios na mé xitjahya tsjin tí jie na mé jnkochrín tsochóna sín tí jie a —ichro ch'án.

³⁰ Mé xikaha ichro ch'án kixin tí sín a tsintáchro sín kixin ijnko nchakuen tí jínahya mé chóna tí jehe ch'án.

Tí iné la ko kichó ch'ín Jesús
(Mt. 12.46-50; Lc. 8.19-21)

³¹ A ntá kui iné ch'ín Jesús la ko kichó ch'án tjejó sín ntója ó na ntá k'uetueñhen sín ijnko chojni tsjik'íyehē ch'án. ³² A ntá tí sín tjejótxaxin tí tjen ch'ín Jesús ntiha chénka sín ch'án kixin:

—Iná la ko kichuá tjejó sín ntója xritjeýá sín ti jaha. —ichro sín.

³³ Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejótxaxin tí tjen ch'án ntá ntáchro ch'án kixin:

—Jahará mé nana la ko kichiná. ³⁵ Kaín tí sín nchexiteýá tí nkehe tjinkaon Dios na mé tí sín a mé kichiná la ko nana —ichro ch'án.

4

Kjuíncheyóexin ch'án éxí ijnko chojni t'enka nonte
(Mt. 13.1-9; Lc. 8.4-8)

¹ Ch'ín Jesús mé kjuankíxin ch'án kjuakoxin ch'án chrínta ntayaon ínaá. A ntá ntiha mé kójnkotsé nchónhya chojni tí tjen ch'án. Ntá ijnko ntabáro tjenkátaón ntá k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójnkotsé mé kuítóhe sín chrínta ntayaon k'uéjókinhin sín. ² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuík'enka nontee. ⁴ Mé xíkaha sákjuík'enka ch'án iso tí noatrigo a. Ntá iso noa la tsík'ánótjen ntia ntá kui koxroxé k'uínka va tí noa. ⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin tjínhya chóna nche. ⁶ A ntá tió kjuítón yaon la ntá tí ka la chján; la ko chóntahya nuèe a ntá xámá. ⁷ A ntá í so noa kjuítsínkak'á tí síin kach'í la ntá tí kach'í k'uánkí la ntá tí noa í k'ónahya kixin sínja tí kach'í. ⁸ A ntá íso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá íjnko la mé k'óna sesenta neno noa, a ntá íjnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

Ch'ín Jesús chronkaxín nkexrí t'axrjexín tí nkehe ntáchro ch'án
(Mt. 13.10-17; Lc. 8.9-10)

¹⁰ A ntá chr'éxin, tió kuítóhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. ¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuintayóaxuán kaín nkehe kuínhin sín. ¹² Kixin kjónté ts'ikon sín la éxí k'uikonhya sín, la ko kjónté tsinhin sín la tsienxínhya sín kixin ntá chrók'uixitoxínhya tí tjenkayáxin sín a la ko chrókjuínhya tí ijíe sín* —ichro ch'án.

Ch'ín Jesús chrónkaxín nkexrí t'axrjexín tí nkexro sákjuík'enka
(Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiénxinhyará jahará nkexrí t'axrjexín tí nkehe kjuintayóaxian ní? ¿A ntá nkexrí chrókiénxinrá tí í so nkehe naxa sintayóaxian? ¹⁴ A ntá tí nkexro sákjuík'enka tí tje a mé yóhe ijnko nkexro sákjuík'jako itén Dios. ¹⁵ A ntá iso chojni la éxí tí tje kjuítsínka ntia; kixin kuínhin sín itén Dios, ntá chr'éxin ó kui ch'ín Tsochren kjuínchek'itjáyan ch'án tí tan jína kuínhin sín. ¹⁶ A ntá í so chojni la éxí yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín. ¹⁷ Kjánchó nínkahya chóna nuèe, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios. ¹⁸ A ntá í so chojni la éxí yóhe tí tje k'uínka chrík'á kach'í na mé kuínhin sín itén Dios ¹⁹ kjánchó tóxakonhen sín tí nkehe síin chjasintajni la ko tí nkehe tje té tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xra Dios. ²⁰ A ntá í so chojni kuínhin tí itén Dios na kuinkáchónki sín la ntá xíkaha jína ch'ehe sín Dios xra. La iso sín la éxí yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xíkaha ichro ch'ín Jesús.

Ch'ín Jesús mé kjuíncheyóexin éxí ijnko xrohi tjeche
(Lc. 8.16-18)

²¹ Kjaxin ntáchro ch'ín Jesús kixin:

* 4:12 Isaías 6.9-10

—¿Á chrókujkaonni xrohi tjeche chrókjuak'emá chrínkí ntacajón o chrínkí cama? Kjá náhí. Tí xrohi la noi chrókjuak'e ts'inkaséyanxín. ²² Mé xíkaha kaín tí nkehe tjejó má jie tsonoxín chr'éxin la ko kaín tí nkehe ninkexró noehya jie la tsonoxín chr'éxin. ²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókjuenkayáxinrá jína tí nkehe tjejó tinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhéra tí jahará tjejontinhinrá. ²⁵ A ntá tí nkexro chóna nkehe la antsí má ts'ayéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóexin ch'án éxí ijnko tje ts'ayan ts'ánkí

²⁶ Kjaxin ntáchro ch'ín Jesús kixin:

—Tí kjuachaxin t'etoan Dios tóyóhe ijnko chojni sátsjik'enka nonte. ²⁷ Ntá sákjuík'ajua ch'án tí tie la ko k'uàya ch'án tí nchítjen. A ntá xikahó k'uátsínka iso yaon la ko iso tie, a ntá tí tje la k'uayan la k'uánkí. A ntá tí nkexro k'uenka la noehya ch'án nkexrí kónhen tíha. ²⁸ A ntá tí nche mé kjuích'e xra jehó. Senó k'uayan tí chaon tí ka, a ntá kjuíntaa, a ntá chr'éxin icha tí noa tsjinjin; ²⁹ a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsotjá sín.

*Ch'ín Jesús kjuíncheyóexin ch'án éxí ijnko tje it'in mostaza
(Mt. 13.31-32; Lc. 13.18-19)*

³⁰ Kjaxin ntáchro ch'ín Jesús kixin:

—¿Nkehe chrókóyóhe tí kjuachaxin t'etoan Dios, nkehe chrókóyóexin tíha? ³¹ Mé éxí yóhe tí tje it'in mostaza tsík'inka nonte. Tíha mé ijnko tje imá ntsí, a ntá tí í so tje síin chjasintajni la kénhyó. ³² A ntá jnkonaá tsík'inka tí tje la tsík'ayan tsík'ánkí imá ihyé, a ntá tí í so nta la kánhyó. A ntá kjaxin tí chaon tí nta tsík'ánkí imá ihyé, a ntá kjónté koxroxé xritjaka la jína ts'ok'éhe va chrínkí tí ts'van chaon tí nta.

*Nkehe tí xra kjuích'e tí nkehe kjuíncheyóexin ch'ín Jesús
(Mt. 13.34-35)*

³³ Mé xíkaha ch'ín Jesús kjuakohe ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókjuacha chrókienxín sín tíha. ³⁴ Kaínxín nkehe kjuakohe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrxén kaín tí nkehe kjuíncheyóexin ch'án.

*Ch'ín Jesús k'uetuennen ch'án tí xrínto la ko tí ntá síchrica kixin ts'ixita
(Mt. 8.23-27; Lc. 8.22-25)*

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

³⁶ Ntá kuítóhe sín kaín tí chojni a ntá sákjuíko sín tí ch'ín Jesús naxa tjenkáya ch'án tí ntabárcō la ko kjaxin í so ntabárcō sákjuí koí. ³⁷ Ntá xrínahya tjian chjéhe xrínto la ntá síchrica ntá t'ixenhen tí ntabárcō, ó mero tsokaón ntá tí ntabárcō. ³⁸ A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárcō a tjejkón ch'án ijnko ka. Na ntá kjuínchekjàya sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni ntá ní? —ichro sín.

³⁹ A ntá ch'ín Jesús k'uàya ch'án, k'uetuennen ch'án tí xrínto la ko tí ntá kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xrínto la ko tí ntá k'uíxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuénté kixin imá chrakonrá? ¿Á naxa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kíchó sín kixin:

—¿Xá nkexro tíhi? Kjónté xr̄into la ko ntayaon la mé kjuínchexiteyéhe ch'án —ichro sín.

5

Ijnko chojni chón̄ta nchón̄hya nchakuen tí jín̄ahya nonte Gadara
(Mt. 8.28-34; Lc. 8.26-39)

¹ Ntá tió k'uátòye sín tí ntayaon, a ntá kjuíji sín tí nonte Gadara. ² Ntá k'uínkajinx̄in ch'ín Jesús tí ntabárc̄o a. Ntá xr̄ináhya xeta ch'án injko ch'ín kuj̄xin nó tsík̄jixravá chojni mé chón̄ta ch'án injko nchakuen tí jín̄ahya. ³ Tí ch'ín a mé kjuák'e ch'án tí tsík̄jixravá chojni. Ninkexró tjachahya sinchenteto ch'án kjónté cadena tjachahya. ⁴ Nchón̄hya veces kjuínchentetoxín sín ch'án cadena toté ch'án la ko itja ch'án, la kjónté kóchr̄it̄on ch'án kjuínchekuen ch'án tí cadena. Kohya ninkexro tjacha ts'etuenhen tí jehe ch'án. ⁵ K'uék'aji ch'án nchakotjin la ko tie t'íyato ch'án nó jn̄a la ko tí tsík̄jixravá chojni la ko ch̄jéhe asén ch'án xro. ⁶ Na ntá k'uíkon ch'án kixin kui ch'ín Jesús kjónté ikjín la kuinká ch'án kjuíji ch'án kjuák'exín toch'in ch'án nkayakon ch'ín Jesús a ⁷ k'óyako ch'án ntáchro ch'án kixin:

—¿Nkekuènté t̄j̄iaté jaha tí jeheni, jaha Jesús Xjeen Dios t̄jen nkaya nkajní? Dios nchenoheni kixin xr̄janóaha nchekjasótehyani —ichro ch'án.

⁸ Mé x̄ikaha ichro ch'án kixin tsintáchro ch'ín Jesús kixin:

—Jaha nchakuen tí jín̄ahya, t̄j̄tohé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni kixin nchón̄hyani —ichro ch'án.

¹⁰ Ntá imá chrónóehe ch'án tí ch'ín Jesús kixin tsochr'án̄hya ch'án ókjé tí nchakuen tí jín̄ahya. ¹¹ Na ntá siín nchón̄hya cochíno xrine va ch̄jinaxón tí jn̄a ntiha. ¹² A ntá chrónò̄a tí nchakuen tí jín̄ahya ntáchro kixin:

—Tétuenhenni sátsjini tí siín tí cochíno, t̄j̄tohé ts'ixenhenni tí jehe va —ichro tí nchakuen tí jín̄ahya a.

¹³ Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jín̄ahya a mé k'uaxr̄jexín tí ch'ín a sákjuj̄ kjuj̄k'ixenhen tí cochíno a. Na ntá kaín xín tí ko a mé ch̄jina iyó mil va siín va xrine va. Na mé kaín xín va k'uínkajinx̄in va ntiha kjuítsínkayá va tsaka ntá kjuítsínkankí va ntayaon ntá kjuín̄hin va nt̄a.

¹⁴ Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuj̄ chrónka sín ch̄jasén sín la ko nont̄ee chojni. Na ntá itsjé chojni mé kuitsjehe sín nkehe tí tsíkónhen ntiha. ¹⁵ Ntá kjuíji sín tí t̄jen ch'ín Jesús a na k'uíkon sín kixin itjen tí ch'ín k'uéchón̄ta tí nchón̄hya nchakuen tí jín̄ahya senó la ó jína t̄jen ch'án t̄jet̄j̄ax̄in ch'án t̄jenkáya ch'án iké ch'án, na ntá chrakon sín. ¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchón̄ta tí nchakuen tí jín̄ahya la ko nkexrí kónhen tí cochíno a. ¹⁷ Ntá kjuankixin sín chrónóehe sín tí ch'ín Jesús a kixin sáchrókjuixin ch'án ntiha.

¹⁸ A ntá ó ts'it'ótjen ch'ín Jesús tí ntabárc̄o na ntá tí ch'ín k'uéchón̄ta nchakuen tí jín̄ahya na mé chrónò̄a ch'án kixin kj̄axin ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjonhya ch'án kjuachaxin sátsjiko sín ch'án. Náhí. K'uet̄oan ch'án kixin:

—Sátjia nt̄oa t̄j̄ichenka tí sín nax̄a kjéhya tí jaha kixin nkexrí kaín tí kjuaxroan j̄ié kjuasin Dios kjuínchekit̄oha jína kuikonóaha ch'án tí jaha —ichro ch'án.

²⁰ Na ntá tí ch'ín a sákjuj̄ ch'án kjuankixin chrónka ch'án kaín tí ch̄jasin kuènte Decápolis kixin nkexrí kaín tí nkehe kjuích'e ch'ín Jesús kjuínchekit̄ohe ch'án jína. A ntá kaín tí sín kuín̄hin na chrakon sín.

Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Lc. 8.40-56)

²¹ Ntá tió x̄ík̄jank̄ao ch'ín Jesús tí ntabárc̄o tóhe tí ntayaon inaá ntá kóch̄jina nchón̄hya chojni ntá ntahó chr̄inta nt̄a kuítóhe ch'án inaá. ²² Na ntá ikui injko ch'ín t'et̄oan kuènte

n̄inko mé it'in ch'án Jairo. A ntá tió k'uíkon ch'án ḱixin itjen ch'ín Jesús ntá kjuák'exín toch'in ch'án chrínkí toté ch'ín Jesús a ²³ imá chrónóehē ch'án ḱixin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'étja itjá chrítaón kja xjan ntá chrókuitohe xjan jína —ichro ch'án.

²⁴ Ntá ch'ín Jesús sákjuiko tí ch'ín a. Na nchónhya chojni chréhe sín tinkák'ixitja sín ch'án inaá. ²⁵ A ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni. ²⁶ Imá tjote tjan ḱixin nchónhya chojni kjuanjon xroan kónhen tjan na ó kjuixin kjuēhe tjan kaín xín nkehe k'uéchóna tjan. Ó jehí titóehya tjan jína la íchá ntsí tinkákótao tjan. ²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án, ²⁸ ntáchro tjan ḱixin kjónté iké ch'án ó chrókuakóxin tjan na ó tíhó mé chrókuitohe tjan jína, ichro tjan. ²⁹ Ntá tuénxín tí jni na mé ó kjuixié tjan la ko kónohe tjan ḱixin ó kjuixin kuítóhe tjan jína ti chin k'uéchóna tjan. ³⁰ Ntá ch'ín Jesús na ó kónohe ch'án ḱixin kjuachaxién ch'án mé kuítóexín ijnko chojni jína ntá kuinkátjía ch'án kjuanchankíhi ch'án tí chojni siín a ḱixin:

—¿Nkexro kuákóxin tí kaná? —ichro ch'án.

³¹ Ntá kjuátehe tí sín k'uajiko ch'án a ntáchro sín ḱixin:

—Ó noha ḱixin nchónhya chojni sítja, ¿ntá nkekuènté ḱixin naxa tjanchankiá ḱixin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuixín ḱixin tsonohe ch'án nkexro tí kuákóxin tí ké ch'án. ³³ Ntá tí tjan a na mé chrakon tjan síxrànkā tjan ó nohe tjan ḱixin ó kuítóhe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'ín Jesús ḱixin:

—Xjeenni, kaín asán kuinkachónkia tí janhan ntá kuítóha jína. Ijie la kjuaxróxin sátsjia ntóa la ó kuítóha jína a —ichro ch'án.

³⁵ Na ntá naxa tjenixja ch'án ntá ó kui chojni kuixín sín ntóe tí ch'ín t'etoan tí n̄inko. Ntá chénka sín ch'án ḱixin:

—Xjaan na ó kjuixin k'uén. ¿Nkekuènté naxa chjehé xra tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjehe ch'án tí ch'ín t'etoan tí n̄inko ntáchro ch'án ḱixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin ḱixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'in Jacobo, sátsji sín. ³⁸ Na ntá tió kjuíji sín tí ntóe tí ch'ín t'etoan tí n̄inko na k'uíkon sín ḱixin imá sítjité sín tsjankàma sín tí xjan a. ³⁹ Ntá k'uixenhen ch'ín Jesús nchia kjuanchankí ch'án ḱixin:

—¿Nkekuènté ánta tjasitérá tsjankàmará tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetóan ch'án ḱixin kaín sín sátsji sín ntója. Ntá kjuíko ch'án tí it'é la ko tí lné xjan la ko tí iy'á sín xriko ch'án ntá k'uixenko sín ch'án tí tjen tí xjan a. ⁴¹ Itsé ch'án tja xjan ntá nkívee xjan mé nixjeexín ch'án ntáchro ch'án ḱixin:

—Talita, cumi —mé t'axrjexín ḱixin: Lonchí, tétuñhan ḱixin t'àya.

⁴² A ntá tí xjan a ó chóna tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni siín ntiha la chrakon sín k'uíkon sín xikaha. ⁴³ Ntá fuerte k'uetóan ch'ín Jesús ḱixin chróchenkahya sín ninkexró. La kjaxin k'uetóan ch'án ḱixin tsjanjon sín nkehe sine tjan.

6

*Ch'ín Jesús kjuák'e ch'án chjasin Nazaret
(Mt. 13.53-58; Lc. 4.16-30)*

¹ **A** ntá chr'éxin k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkíxin ch'án. ² Na ntá tió kui tí yaon t'ok'éhe sín ntá kjuankíxin ch'án kjuakoxín ch'án tí nínko ntiha. Na ntá nchónhya chojni kuínhin sín ntá chrakon sín ntáchro sín kíxin:

—¿Nketí tsíxrakohe tí ch'ín i kaín tíhi? ¿Nketí kuixín tí kjuaxrexinkaon chóna ch'án la ko tí kjuaxroan tjasin ch'án? ³ ¿Á jehya ch'án tí ch'ín ch'éna nta na mé xjeen tí tjan María, la tí kíchó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿**A** kjaxinhya ntihi tjejókoni tí kíchó ch'án chjin? —ichro sín.

Méxra tahya sín kuentá nkerí ch'e ch'án. ⁴ Na ntá ntáchro ch'ín Jesús kíxin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntoe ch'án na mé tjikosáyehya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitohe ch'án sín jína. ⁶ Ntá chrakon ch'án kíxin xíkaha kuítekakuenhya sín ch'án. Na ntá k'uáji ch'án tí chjasin ntsíntsí chjinaxón ntiha kjuako ch'án.

*Ch'ín Jesús mé ichr'án tí teyó sín kíxin sátsji sín tsjikjako sín itén Dios
(Mt. 10.5-15; Lc. 9.1-6)*

⁷ Na ntá k'uíyehé ch'ín Jesús tí teyó sín k'uajiko ch'án a. Ntá kjuankíxin k'uetuénhen ch'án kíxin yóyó yóyó sín sátsji sín la ko kjaxin kjuanjon ch'án kjuachaxin kíxin tsakitsje sín nchakuen tí jínahya chóna chojni. ⁸ La ko k'uetóan ch'án kíxin ninkehó tsjikohya sín kuènte ntia. Jehó tí nta tjixín sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tokate ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'án kíxin:

—**A** ntá tí ts'ixenhénra ijnko nchia **a** ntá ntaha tsjanjon sín kjuachaxin na ntahó chókuitohará. **A** ntá tsjixinjian tí xra ntá sátsjixinra ntiha. ¹¹ Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrjéxinra tí chjasin a ntá ts'oxénjinra tí nche chóna totará kíxin xíkaha tsjákoxinra kíxin ntoáhya kjuích'e tí jehe sín. **A** ntá chaxín ntáxrjan kíxin tí yaon tsitoexín ijje chojni ntá antsí má tsjasóte tí chojni tí chjasin a, **a** ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakohe sín tí chojni a kíxin mé chrókjuítóxinhin sín ntje sín.

¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuíkite sín itsjé chojni níhi a la ntá kuítóhe sín jína.

*Ik'uén ch'ín Juan Bautista
(Mt. 14.1-12; Lc. 9.7-9)*

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kíxin:

—Kjá tí ch'ín Juan Bautista mé ó tsíxechón ch'án inaá kíxin xíkaha tí kjuachaxin chóna tí ch'ín a —ichro ch'ín Herodes a.

¹⁵ **A** ntá iso sín ntáchro sín kíxin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kíxin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kíxin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etóan ch'án kíxin tsontetoxín tí ch'ín Juan cadena tsjak'echjina ch'án kíxin xíkaha tsíkjanhia tí tjan Herodías. **A** ntá tí tjan Herodías k'uéchjién tí ch'ín Felipe. **A** ntá tí savé ch'án Herodes mé kuákja tí tjan a kíxin ts'óna ichjién ch'án. ¹⁸ **A** ntá tí ch'ín Juan tsíntáche ch'án tí ch'ín Herodes kíxin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kónínkakohen tjan tí ch'ín Juan ntá chrók'óyán tjan ch'án, kjánchó xitjahya ²⁰ kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jína la ko tjóá asén la méxra kuítóehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjínhin ch'án tí nkehe kuínhin ch'án kjuako ch'ín Juan. ²¹ A ntá tí tjan Herodías mé kjuacha tjan tí yaon kia tsíkjitoxinhin nánó tí ch'ín Herodes a kixin tsík'íyehé ch'án tí síxreé la ko tí sín k'uetuénhen tí sín soldado la ko tí sín t'etóan estado Galilea kixin itsi sín ntóe ch'án kixin síin kia. ²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanohana tí nkehe tjinkávan na tsojtahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanhia tjan kjónté jnkosiné tí chjasin t'etóan ch'án. ²⁴ Ntá jehe tjan na mé kuínhin tjan ntá sákjuí tjan chénka tjan iné tjan kixin tsintáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí iné tjan mé ntáchro kixin:

—Ijie la itjia tjanhia tí kja tí ch'ín Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kixin:

—A ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

²⁶ Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'íyehé ch'án, la ntá xitjahya tsootáchro ch'án “Náhí” tí nkehe kjuanchia tjan. ²⁷ Na ntá tuénxín k'uetuénhen ch'án ijnko ch'ín soldado kixin tsjikao ch'án tí kja ch'ín Juan a. ²⁸ Ntá tí ch'ín soldado mé sákjuí ntóechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan iné tjan.

²⁹ Na ntá kuínhin kaín tí sín k'uék'ajiko ch'ín Juan kixin xikaha tsíkónhen. Na ntá sákjuíkakja sín tí cuérpoe ch'án ntá kjuikao sín ntá sákjuíkjává sín.

Ch'ín Jesús mé kjuanjon nkehe kjóne in'ó mil chojni

(Mt. 14.13-21; Lc. 9.10-17; Jn. 6.1-14)

³⁰ A ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuích'e sín na ko nkexrí kjuako sín. ³¹ A ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásitji la ko síti nchónhya chojni na ntá xrankahya ts'ejó sín sine sín. ³² Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárcó sákjuí sín ijnko nonte jehó tjan. ³³ Na ntá itsjé chojni k'uikon sín kixin sákjuí sín la ko kjuátsóan sín kixin ch'ín Jesús. Ntá xrákuaxín sín chjasén sín kuínká sín na ntá senó kjuíji sín tí chrínta ntayaon tí tsjiji ch'ín Jesús. ³⁴ Ntá k'uínkajinxín ch'án tí ntabárcó, a ntá k'uikon ch'án kixin nchónhya chojni síin ntiha ntá kuikonóehé ch'án tí jehe sín na mé éxí yóhe kolélo tjejó sín chóntahya va nkexro ts'ayakonhen va. Ntá kjuankixin ch'án kjuakohe ch'án sín nchónhya nkehe a. ³⁵ Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kixin:

—Ntá ó kóntó la kohya ninkexró tjejó ntihi ³⁶ na ntá jaha chrókuítóhé sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

³⁷ A ntá ch'ín Jesús kjuátehe ch'án ntáchro ch'án kixin:

—Chjehé sín nkehe sine sín —ichro ch'án.

Ntá kjuátehe sín ntáchro sín kixin:

—¿Á tsjik'enani iyó ciento denario niotja tsochjéheni sin sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kixin:

—¿Nkekjaín niotja chontará? Sátjitsjehérá —ichro ch'án.

Ntá sákjuítsjehe sín na ntá chrónka sín kixin:

—In'ó niotja la ko yaá koche mé siín —ichro sín.

³⁹ Na ntá k'uetōan ch'án kixin kaín xín sín chrók'uixitjaxin sín tí chrítaón tí ka yoa a. ⁴⁰ Na ntá xikaha kójnkójié sín ciento sín la ko cincuenta sín k'uixitjaxin sín. ⁴¹ Na ntá ch'ín Jesús kuákja ch'án tí in'ó niotja na ko tí yaá koche ntá konta ch'án nkajní ntá kjuanchia ch'án kjuasáyé Dios. Na ntá kóchrít'ō ch'án tot'ō tí niotja a ntá chjéhe ch'án tí sín k'uájiko ch'án kixin ts'óxikayēhe sín sine tí sín siín a la ko kjaxin kóchrít'ō ch'án tí yaá koche ntá k'óxikayēhe sín kixin sine sín kaín sín. ⁴² Ntá kaín xín sín kjóne sín kókjehe sín. ⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ō tí niotja la ko tí koche tsíxehe. ⁴⁴ A ntá tí sín kjóne na mé in'ó mil chojni ntoa.

Ch'ín Jesús mé tjitaón ntayaon

(Mt. 14.22-27; Jn. 6.16-21)

⁴⁵ A ntá tuénxín k'uetuēnhen ch'ín Jesús tí sín k'uájiko ch'án kixin ts'it'ótjen sín tí ntabárcō a ts'atōyē sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxā kuítóhe ch'án nixjehe ch'án kaín tí sín siín a. ⁴⁶ Kjuixin nixjehe ch'án sín na ntá jehe ch'án chrīin ch'án ijnko jnā tsonixjeexín ch'án Dios. ⁴⁷ A ntá tió k'uixin tie ntá tí ntabárcō na mé ó kjuíji jnkōsiné ntayaon, a ntá jehe ch'án jehó ch'án kjuíji ch'án chrínta ntayaon. ⁴⁸ Ntá kotohe ch'án k'uíkon ch'án kixin imá xra tjiko sín tí ntabárcō a kixin tí xrintō imá chjéhe. Nantōye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uatšínké ch'án sáchrókjui ch'án. ⁴⁹ A ntá tí k'uíkon sín kjuítaón ch'án ntā, ntá kjuenkayáxin sín kixin kjuacha sín, ichro sín, ntá k'óyako sín ⁵⁰ kixin kaín sín k'uíkon sín ch'án la chrakon sín. Na ntá jehe ch'án mé tuénxín nixja ch'án ntá chro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'uit'ótjen ch'án tí ntabárcō tí tjejó sín, a ntá tí xrintō la ó k'uixratá. Ntá imá chrakon sín kixin xikaha kónhen ⁵² kixin kienxínhya sín tí kjuaxroan kjuích'e ch'án kuēnte tí niotja kixin naxā kénhya asén sín kuinkáchónki sín ch'án.

Ch'ín Jesús mé kjuínchekitōhe jína tí chojni níhi tí nonte Genesaret

(Mt. 14.34-36)

⁵³ Ntá tió k'uatōyē sín tí ntayaon ntá kjuíji sín tí nonte Genesaret ntá kjuak'echroē sín tí ntabárcō a tí chrínta ntā. ⁵⁴ Na ntá tió k'uínkajinxin sín tí ntabárcō, a ntá tí sín siín ntiha tjoka kjuátsoan sín tí ch'ín Jesús. ⁵⁵ Ntá sákjuí sín nkuíxín chjinaxón ntiha kjuankíxin sín kuikao sín tí sijníhi tinkátsénkí sín kuikao sín tí tjen ch'ín Jesús. ⁵⁶ La ko kaín nketí kjuíji ch'án, á chjasin ntsí, á chjasin hyé, á nontēe sín ó kjuíjiko sín tí sijníhi a chrínta ntā. Na ntá chrónōēhe sín tí ch'ín Jesús kixin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jína.

7

Tí nkehe nchekjita asén chojni

(Mt. 15.1-20)

¹ A ntá iso sín fariseo la ko iso tí sín tjako tí ley kjuixin sín chjasin Jerusalén ntá kóchjinehe sín tí ch'ín Jesús. ² Tí sín a, tió k'uíkon sín kixin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrjexín kixin kjuínchexiteyáhya sín tí ley, ntá kjonta tí sín a. ³ (Mé xikaha kjuích'e sín kixin tí sín fariseo la ko kaín tí sín judío mé kuinkáchónki sín éxi k'uékjich'e tí sín táda ósé kixin ná t'óntó itja sín ntá sine sín. ⁴ Na ko tí tsokjanxin sín ntaxin ná t'ónti sín ntá sine sín. Na ko kjaxin itsjé í so nkehe tinkáchónki sín, éxi tjōnemá sín tí

vaso t'iyá sín nkehe la ko tí nchésen la ko tí chí chjányan nkehe ne sín la ko tí kámé sín nchetjóá sín.) ⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuénté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjé ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsíntáchro ch'án kixin ntoáhya tsjenkayáxinrá tí jahará kixin xikihi tsíkjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan,

a ntá tí asén sín ikjín kuítóhe sín tí janhan

⁷ Méxra ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etōan chojni ó.*

Mé xikaha ichro itén Dios. ⁸ Ntá jahará kuítóhérá tí nkehe tsík'etōan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'iará nkehe, la ko kjaxin í so nkehe yóhe tinkachónkirá —ichro ch'án.

⁹ Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xikaha títóhérá ntáha tí nkehe tsík'etōan Dios. ¹⁰ Tsíntáchro ch'ín Moisés kixin: “Tsochonteherá kjuasáyé it'ará la ko inará”, la ko “A ntá tí nkexro t'ántaxínhin it'é o iné la chrók'óyán sín.”† ¹¹ A ntá jahará ntáchrórá kixin ó nchōxon kixin ijnko nkexro tsochénka it'é la ko iné kixin: “It'eni, Ineni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios). ¹² A ntá xikaha jnkójín nkexro tsontáchro ch'án tíhi ntá jahará tsontáchrórá kixin í t'ichjánxinhya tsjinkitsa ch'án tí it'é ch'án la ko tí iné ch'án. ¹³ A ntá tí xikaha la títóhérá tí nkehe tsík'etōan Dios éxí sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhe tíha —ichro ch'ín Jesús.

¹⁴ Na ntá k'uíyēhe ch'ín Jesús tí chojni inaá ntáchro ch'án kixin:

—Tinhínrá kaín rá tí nkehe ntáxrjan la ko tiénxinrá. ¹⁵ Tí nkehe ine chojni la jehya jje tíha. Tí nkehe t'axrjeníxin asén chojni mé jje tíha. ¹⁶ Tí tjinkáonrá chrókuinhínrá la chrókuinhínrá —ichro ch'án.

¹⁷ A ntá tió kuítóhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uíxēhen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a. ¹⁸ Na ntá ntáchro ch'ín Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jje ¹⁹ kixin jehya asénni sátsji? Tí nkehe ineni na sátsji nkaya tseeni na ko xik'axrje inaá —ichro ch'án.

Mé t'axrjexín kixin tí nkehe sineni la jehya jje.

²⁰ Ntá ntáchro ch'ín Jesús kixin:

—A ntá tí nkehe t'axrjeníxin chojni na mé jje táha. ²¹ Nkaya asánrá mé t'axrjeníxin tí jínahya tjenkayáxinrá, la ko tí tjachehe kíchuará, la ko tí tjinkáonrá tsochontará chojni chjin ókjé, la ko tí t'oyán kíchuará ²² la ko tí chrókuéerá, la ko tí tjaké asánrá tí nkehe chóna ókjé sín, la ko tí jínahya ch'ehérá kíchuará, la ko tí kjuach'ia xrikoará la ko tí jínahya tjenkayáxinrá, la ko tí chjinōxínhanrá, la ko tí ch'énará kjuach'ia, la ko tí kjuahnke chontará, na kó ti chontahyará kjuaxrexinkaon jína. ²³ Kaín tí nkehe jínahya a mé t'axrjeníxin chojni, la mé tjasixín sín jje.

*Ijnko tjan tsíkixin kjín mé kuítekaon tjan tí ch'ín Jesús
(Mt. 15.21-28)*

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uíxēhen ch'án ijnko nchia kixin tjinkakonhya ch'án kixin chrókónohe chojni

* 7:7 Isaías 29.13 † 7:10 Éxodo 20.12; 21.17

kíxin ntaha tjen ch'án. Kjánchó xitjahya kjuák'emá ch'án ntiha. ²⁵ Na ntá ijnko ìné ijnko tjan tjarisoá chóna ijnko nchakuen tí jínahya mé kuínhin nkehe tí xra ch'e ch'ín Jesús kíxin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús. ²⁶ Na mé jehe tjan tsíkjixín kjín, na mé tsíkjixín tjan nó nación Sirofencia. Na ntá jehe tjan a mé kui tjan chrónóehē tjan tí ch'ín Jesús kíxin chrókuakitsje ch'án tí nchakuen tí jínahya chóna xjeen tjan.

²⁷ Ntá ntáchro ch'ín Jesús kjuátehe ch'án kíxin:

—Títóhé senó chrókjónē tí xjan. Jehya tí jína chrókuakítsjaha xjan tí niotja ntá chrótjaha konja chrókjónē va —ichro ch'án.

²⁸ Ntá jehe tjan kjuátehe tjan ntáchro tjan kíxin:

—Chaxín xikaha, Ìnchéni. Kjánchó kjónté tí konja tjejoyánkí mesa ine tí tot'o niotja tóxènjín tí chánjan —ichro tjan.

²⁹ Na ntá ntáchro ch'ín Jesús kíxin:

—Táha la chaxín ntoá ntáchrúa. Sátjia kíxin tí nchakuen tí jínahya ó k'uaxrjexín tí xjaan —ichro ch'án.

³⁰ A ntá tió kjuíji tjan ntoe tjan, na ntá k'uíkon tjan kíxin tí xjeen tjan na mé ó ntoá tjetsínkaták'á xjan tí cama kíxin ó tsík'axrje tí nchakuen tí jínahya a.

Ch'ín Jesús mé kjuínchekitohe jína ijnko ch'ín tienhya la ko nixjahya

³¹ Ntá ch'ín Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea.

³² Ntá kuikao sín ijnko ch'ín tienhya na ko ntoáhya nixja ch'án. Ntá chrónóehē sín tí ch'ín Jesús a kíxin tsjak'etja tja ch'án chrítaón kja tí ch'ín a kíxin tsitohe ch'án jína. ³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxènhen ch'ín Jesús tatsjon tí ch'ín tienhya. La ko kjaxin tí dedo tja ch'án mé kuikite ch'án ntaté ch'án ntá kjuínchekákóxín ch'án nejen tí ch'ín nixjahya a.

³⁴ Ntá konta ch'án nkajní k'uáváxin ch'án na ntá nixjehe ch'án tí ch'ín tienhya a, ntáchro ch'án kíxin:

—Efata —mé t'axrjexín nkívee sín kíxin: ¡Tsoxitjehe!

³⁵ Na ntá tuénxín xítjehe tatsjon tí ch'ín tienhya ntá kuínhin ch'án la ko kuítóhe jína tí nejen ch'án, ntá jína nixja ch'án. ³⁶ Ntá ch'ín Jesús k'uetoan ch'án kíxin ninkexró tsochenkahya sín. Ntá kjónté imá k'uetoan ch'án ntá ántosén sín kjónté íchá xrichronka sín. ³⁷ Na mé imá chrakon sín ntá ntáchro sín kíxin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjon nkehe kjóne noó mil chojni (Mt. 15.32-39)

¹ A ntá ijnko yaon nchónhya chojni k'uíxikóchjina inaá. A ntá chónahya sín nkehe sine sín. Na ntá ch'ín Jesús mé k'uíyehē ch'án tí sín k'uájiko ch'án, a ntá ntáchro ch'án kíxin:

² —Imá tikonóahā kaín tí sín i kíxin ó ní yaon tjékian sín ntihi ntá chónahya sín nkehe sine sín. ³ Ntá chrókuétuanhya sín sáchrókjui sín ntoe sín tí naxa nehya sín kíxin ntia ó chrókótiénxin sín kíxin iso sín la imá kjín tsíkjixín sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kíxin:

—¿Nkexrí chrókónoxín nchónhya niotja chrókjónē kaín tí sín a kíxin kohya nchia tí tjejóni? —ichro sín.

⁵ Na ntá ntáchro ch'ín Jesús kíxin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kíxin:

—Yato niotja chótani —ichro sín.

⁶ Na ntá ch'ín Jesús k'uetuēnhen ch'án kaín xín sín kixin ts'ixitjaxin sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'ò ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayēhe sín tsakja kaín xín tí sín síin a. ⁷ Na ko iso koche ntsíntsi ch'ónta sín. Ntá ch'ín Jesús kjuanchia ch'án kjuasáya ntá k'uetōan ch'án ts'óxíkayēhe sín kjaxin. ⁸ Na mé kaín xín sín kjóne sín na kókjehe sín. Ntá chr'éxin naxa kjuínchekaon sín yato ntaxra tí tot'ò tí nkehe tsíxehe. ⁹ Na mé chjina noó mil chojni kjóne sín. Ntá ch'ín Jesús mé nixjehe ch'án sín sákjuí sín ¹⁰ ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabárcō a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jíé
(Mt. 16.1-4; Lc. 12.54-56)

¹¹ Na ntá kui iso sín fariseo kjuankixin sín tjo sín tí ch'ín Jesús kjuanchehe sín ch'án kixin chrókjuakoxin ch'án ijnko kjuaxroan jíé kuènte nkaya nkajní kixin tjinkaon sín chrókjuachaxin sín ch'án. ¹² A ntá ch'ín Jesús na mé k'uáváxin ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jíé? Ijie la ninkehó kjuaxroan tsjákoxinhya —ichro ch'án.

¹³ Na ntá kuítóhe ch'án tí sín a, ntá xík'it'ótjen ch'án tí ntabárcō ntá sákjuí ch'án í jnko tóhe ntayaon inaá.

Tí xroan nchek'ánkí tí niotjé tí sín fariseo
(Mt. 16.5-12)

¹⁴ Ntá k'uitjáyenhen sín tsíkjikohya sín nkehe sine sín. Jehó jnkokoá niotja ch'ónta sín nkaxenhen tí ntabárcō a. ¹⁵ Ntá ch'ín Jesús k'uetuēnhen ch'án tí jehe sín kixin:

—Chrókóxakonhanrá kixin tí xroan nchek'ánkí niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kichó sín kixin:

—Mé xíkaha ichro ch'án kixin tsíkjikohyani niotja.

¹⁷ Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuènté tjórá kixin chontahyará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios? ¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará? ¹⁹ Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'ò niotja naxa kjuenájjinrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xíntáchro ch'ín Jesús inaá kixin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'ò niotja kjuenájjinrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjonté xíkaha la, ¿á naxa tiénxinhyará? —ichro ch'án.

Ch'ín Jesús mé kjuínchekitohe jína ijnko ch'ín t'ikonhya tí chjasin Betsaida

²² A ntá chr'éxin kjuíji sín chjasin Betsaida, a ntá ikui iso sín kuikao ijnko ch'ín t'ikonhya. Ntá chrónóēhe sín tí ch'ín Jesús kixin chrókjuínchekitohe ch'án jína tí ch'ín a.

²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

²⁵ Ntá ch'ín Jesús mé xíkjak'etja tja ch'án inaá tí kon tí ch'ín t'íkonhya a. A ntá tí ch'ín k'uíkonhya kuítóhe ch'án jína la jína t'íkon ch'án kaín nkehe. ²⁶ Na ntá ch'ín Jesús mé k'uetuēnhen ch'án tí ch'ín k'uék'íkonhya kixin sátsji ch'án ntoe ch'án ntáchro ch'án kixin: —Chrók'uíxenhya chjasin la ko ninkexró chróchenkahya ntiha —ichro ch'án.

Ch'ín Pedro chrónka ch'án kixin ch'ín Jesús mé tí nkexro Cristo
(Mt. 16.13-20; Lc. 9.18-21)

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntia mé kjuanchankíhi ch'ín Jesús tí sín k'uájiko ch'án kixin: —¿Nkehe ntáchro chojni kixin nkexro tí janhan? —ichro ch'án.

²⁸ Ntá ntáchro sín kixin:
—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín inaá kixin:
—¿A ntá jahará nkechorá kixin nkexro tí janhan? —ichro ch'án.
Ntá kjuátehe ch'ín Pedro ntáchro ch'án kixin:
—Jaha mé tí Cristo, ichroni —mé chro ch'án.

³⁰ Ntá k'uetōan ch'ín Jesús kixin tsochenkahya sín ninkexró.

Ch'ín Jesús chrónka ch'án kixin ts'en ch'án
(Mt. 16.21-28; Lc. 9.22-27)

³¹ Na ntá kjuankixin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuēnte nínko la ko tí sín t'etōan kuēnte tí sín nchat'á la ko tí sín maestro tjako tí ley. A ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án inaá. ³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuēhe ch'án. ³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuēhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxí tjenkayáxin Dios. Náhí. Jaha tjenkayáxian éxí tjenkayáxin chojni ó —ichro ch'án.

³⁴ Ntá ch'ín Jesús mé k'uíyehē ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkójínrá tjínkáonrá tsochréhérá tí janhan na t'ichjánxin tsitōhérá kaín tí nkehe tjaké asanrá na ntá tsamárá tí ntacruz kuéntará, a ntá tsochréhérá tí janhan. ³⁵ A ntá tí nkexro tjínkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsonhen tí chrókjuacha ijnko chojni chróchónka kaín nkehe siín chjasintajni, a ntá kjuachón chrókjuinchek'itjáyan? ³⁷ ¿Nkehe chrókjuenka chojni kixin chróchónka tí kjuachón? ³⁸ A ntá jnkójín nkexro tsosuehē kixin tinkáchónki tí janhan la ko tí tan kuéntana nkayakon tí chojni jínahya chónka jie la kjaxin tí Xjeen Dios K'óna Chojni tsosuehē ch'án tsontáchro ch'án kixin chóxin ch'án tí jehe sín tió tsokjan ch'án tsíkao ch'án tí kjuachaxin jie kuēnte It'é la ko tsíkao tí sín ángel.

9

¹ Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naxa ts'énhyará ts'ikonjjará itsi tí kjuachaxin ts'etōan Dios —ichro ch'án.

Ch'ín Jesús mé k'uíxitoxin nkexrí tsjehe ch'án
(Mt. 17.1-13; Lc. 9.28-36)

² Ntá k'uátsínka injon yaon ntá ch'ín Jesús mé sákjuíko ch'án ch'ín Pedro la ko ch'ín Jacobo la ko ch'ín Juan sákjuí sín jehó sín ijnko jna noi. Ntá ntiha mé xrínahya k'uíxitoxin

ókjé nkexrí tsjehe ch'án k'uíkon tí jehe sín. ³ A ntá iké ch'án tsík'óna imá tjákini la ko imá tjóá éxí chrinta tsjehe, a ntá ntihi chjasintajni kohya ninkexró chrókjuen tí ka chrókuítóhe imá tjóá xíkaha. ⁴ Na ntá titàya k'uíkuèn sín ntiha itjen tí ch'ín Elías la ko tí ch'ín Moisés tjejóto sín tí ch'ín Jesús. ⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuich'énani iní nchia la mé ijnko kuèntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé xíkaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. ⁷ Na ntá xrínahya ikui ijnko tjuj kjuák'etja chrítaón kaín xín tí tjejó sín. Na ntá chríkjan tí tjuj kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuahā ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxín sín tí jna ntá k'ueṭoan ch'ín Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni. ¹⁰ Ntá ninkexró chenkahya sín tí nkehe k'uíkon sín. Na ntá jehó sín mé tjejóto sín kixin nkehe t'axrxjéxín tí nkehe chrónka ch'án kixin tsoxechón ch'án inaá. ¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxín itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxín tsjasóte la ko tsotjinkakonhya sín. ¹³ Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhín sín éxí nixja tí xroon itén Dios kixin xíkaha tsonhen —mé xíkaha chrónka ch'ín Jesús.

*Ch'ín Jesús mé kjuínchekítóhe jína ijnko xjan chóna ijnko nchakuen tí jínahya
(Mt. 17.14-21; Lc. 9.37-43)*

¹⁴ A ntá tió ikjan sín tí kuitohe tí í so sín k'uájiko ch'án ntá k'uíkon sín kixin nchónhya chojni tsík'antatjen tí jehe sín. Kjaxín ntaha siín tí sín tjako tí ley ikjo tí jehe sín. ¹⁵ A ntá tuénxín tió k'uíkon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án. ¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan. ¹⁸ Kjónté nkerí tjen xjan la tí nchakuen tí jínahya mé tjáka xjan nonte, ntá ntáloxrjo sítixín ir'va xjan na netaón xjan neno xjan na méxra tjeheya xjan. Ntá xrjanóahā tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xrákoará ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uíkon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntáloxrjo ir'va xjan. ²¹ Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xíkaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsí xjan. ²² A ntá jnkoyaxón tí nchakuen tí jínahya a mé tjákáte xjan xrohi la ko tjákánkí xjan ñnta kixin tjinkaon chrók'óyán tí xjan a. A ntá jaha zá tsjácha tsjínkítsani? La tikonóhéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuèté tjanchankìna kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

²⁵ Ntá k'uíkon ch'ín Jesús kixin itsjé chojni kóchjina. Ntá nixjehé ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekíenhya chojni. Ijie la tétuanhan kixin t'axrjéxian tí xjan na ko tsitohé xjan la í tsokjanhya ínaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a ínaá, ntá k'uaxrjéxín ntiha. Na éxí tsík'en xjan xíkaha tsjehe xjan. Ntá itsjé sín ntáchro sín kixin ó tsíkixín tsík'en xjan, ichro sín. ²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uíxenhén sín ijnko nchia. Ntá jehe sín kjuanchankíhi sín ch'án kixin:

—¿Nkekuèté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tíhi la t'ichjánxín kixin nchónhya tsochronóhérá T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án

(Mt. 17.22-23; Lc. 9.43-45)

³⁰ A ntá tió sákjuíxin sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonhe sín ³¹ kixin tinkákjakohé ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon níxin na ó tsoxechón ch'án ínaá —ichro ch'án.

³² Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjéxín tíha.

¿Nkexro tí imá tjetoan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kichuárá tí kuini ntja? —ichro ch'án.

³⁴ Ntá jehe sín la táníkoá sín kixin tí ntja kui sín tinkákjo kichó sín kixin nkexro tí imá ts'etōan. ³⁵ Ntá ch'ín Jesús mé kjuák'etjāxín ch'án ntá k'uíyehé ch'án tí teyó sín k'uájiko ch'án, a ntá ntáche ch'án sín kixin:

—Tí jnkójnra tjinkáonra chrókuétōanra má ntá t'ichjánxín kixin tsjixixín tsochréhérá kaín sín, ts'ítuanhanra la ko tsjínkítsará kaín xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkójn nkexro chrók'uáyéhe ijnko chánjan kixin tinkáchónki sín tí janhan la mé xíkaha chrók'uáyéhe sín tí janhan la ko kjāxín éxí chrók'uáyéhe sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjinkítsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:

—Maestro, k'uíkonní ijnko chojni na mé kjuachaxin ihniá mé takitsjexín ch'án nchakuen tí jínahya chóna chojni. Ntá k'uetuenhenni ch'án kixin xikahya chrókjuich'e ch'án kixin xrikohyani ch'án —ichro ch'án.

³⁹ Ntá ntáchro ch'ín Jesús kixin:

—Nté títóhé ch'án kixin ninkexró tjasixín kjuaxroan kjuachaxin nina la tuénxín chrókjuacha chrók'uántaxina sín. ⁴⁰ Tí nkexo ninkakuenhyani la mé tjinkítsa tí jeheni. ⁴¹ A ntá jnkójín nkexo tsojtáhará kjónté ijnko vaso ìnta tsjanjonxín sín nina kixin jahará la tinkachónkirá Cristo, ntáxrjan kixin chaxín ts'áyéhe sín nkehe.

Tí chojni tjasin jie mé tjasóte sín

(Mt. 18.6-9; Lc. 17.1-2)

⁴² 'A ntá jnkójín nkexo chrókjuachroe ijnko xjan kixin chrókjuasin xjan jie tíó tinkáchónki xjan tí janhan la íchá jína chrókjuincheteyá sín ch'án ijnko xro jie tsík'óna xrochre la chrókjuikákánki sín ch'án ntayaon. ⁴³ A ntá tí itjá tjasixián jie na mé íchá chrókójína chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuíxian tí síin xrohi xitjahya ts'anka, ⁴⁴ tí síin kosínto t'enhya la ko síche xrohi ts'ankahya. ⁴⁵ A ntá kjaxin tí totá tjasixián jie na íchá jína chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuíxian tí síin xrohi xitjahya ts'anka, ⁴⁶ tí síin kosínto t'enhya la ko síche xrohi ts'ankahya. ⁴⁷ A ntá tí ikuan tjasixián jie na íchá jína chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etoan. A ntá tí yóí kuan la tíha mé sáchrókjuíxian tí síche xrohi ⁴⁸ tí síin kosínto t'enhya la ko síin xrohi ts'ankahya.

⁴⁹ 'A ntá kaín nkexo t'ichjánxin tjasóte. A ntá kaín nkehe ts'áyéhe Dios chóna xíjnta.

⁵⁰ Tí xíjnta la jína. A ntá tí chrók'uankehe tí jní la ntá xitjahya chrókójní inaá. Jahará mé chrókoyóhara éxí xíjnta kixin kjuaxróxin chrók'uejokoará kichuára —ichro ch'án.

10

Tjako ch'ín Jesús kixin chrókjuákehya kichó sín

(Mt. 19.1-12; Lc. 16.18)

¹ Na ntá ch'ín Jesús mé k'uaxrjexín ch'án chjasin Capernaum sákjuí ch'án nó estado Judea la ko nó tóhe ntario Jordán. Ntá nchónhya chojni kójnkotsé sín tí tjen ch'án ntiha. Ntá kjuakohe ch'án tí jehe sín kixin xikaha kuènen ch'án. ² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxin sín ch'án. Ntáchro sín kixin:

—¿Á síin kjuachaxin tsjákehé chojni ntoa ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'uetuanhanrá tí ch'ín Moisés? —ichro ch'án.

⁴ Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjíexín kichó sín —ichro sín.

⁵ Ntá ch'ín Jesús ntáchro ch'án kixin:

—Ntá jahará icha asánrá títekákonhyará ntá k'uetoan ch'án ts'óna tí xroon a. ⁶ Kjánchó tí xrankixixín tíó kjuíchéna Dios kaín xín nkehe la kjuíchéna ch'án ijnko chojni ntoa la ko ijnko chojni chjin.* ⁷ Méxra tí chojni ntoa tsítóhe ch'án tí it'é ch'án la ko ìné ch'án kixin tsakja ch'án ichjién ch'án ⁸ ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá.† ⁹ Na mé xikaha tí kjuachaxin kuènte Dios kójnkojiéxin sín ntá jehe sín chrók'uitjéhya kichó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjíhi kichó sín. ¹¹ Na ntá ntáchro ch'ín Jesús kixin:

* 10:6 Génesis 1.27; 5.2 † 10:8 Génesis 2.24

—Tí jnkojín nkexro tsjákehe ichjién ntá tsakja ch'án í jnko chjin na mé xíkaha tsjachehe ch'án tí tjan tsíkótehe ch'án saoxín. ¹² La ko kjaxin tí chojni chjin tsíkjákehe xì tsakja tjan í jnko chojni nto na mé xíkaha kjaxin tjan tjasin tjan jie —ichro ch'án.

Ch'ín Jesús kjuíncheyaon ch'án xjan
(Mt. 19.13-15; Lc. 18.15-17)

¹³ Ntá kjuikao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sin kjuikao xjan. ¹⁴ Ntá k'uíkon ch'ín Jesús ntá kónínkaon ch'án ntáchro ch'án kixin:

—Nté títóhérá tí xjan tsoxrakoa tí tjén janhan la t'inkakuènhyará xjan kixin tí sín kuènte kjuachaxin kuènte Dios la mé tóyóhe éxí tí xjan a. ¹⁵ Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etoan Dios tí kjuachaxin kuènte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehe ch'án tí ch'ín Jesús
(Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrín? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkekuènté ntáchrúa kixin jína tí janhan? Jehó jnkokoá nkexro mé jína la tíha mé Dios. ¹⁹ Ntá jaha ó noha kixin nkexrí k'uetoan Dios kixin: “Chrókjuacheéhya kíchuá la chrók'oyánhya chojni la chrókueehya la chrókjóntahya kíchuá la chrókjuich'iahya la ko chróchontehé kjuasáya it'á la ko ìná”‡ —ichro ch'án.

²⁰ A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxa t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sinchekjixián tí nkehe chonta la mé nchekitonhén tí chojni nò, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

²² Ntá tió kuínhin ch'án xíkaha ntá k'uává ch'án sákjuí ch'án, kixin imá tsjé nkehe chóna ch'án.

²³ Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xra ijnko chojni chóna imá tsjé nkehe ts'ixenhen sín tí tjen Dios t'etoan —ichro ch'án.

²⁴ Ntá tóxakonhen tí sín k'uájiko ch'án kixin xíkaha ntáchro ch'án. Ntá chrónka ch'án inaá kixin:

—Tí sín tjekonhen tí nkehe chóna sín na imá xra ts'ixenhen sín tí tjen Dios t'etoan.

²⁵ Antsí xrahya chrók'uátsínka ijnko kocamello ijnko tjar'in ntachica tjexrja. A ntá antsí má xra ijnko ch'ín chóna itsjé nkehe chrók'uixenhen ch'án tí tjen Dios t'etoan —ichro ch'án.

²⁶ Ntá jehe sín kuínhin sín xíkaha ntá imá chrakon sín. Ntá tjanchankíhi kíchó sín kixin:

—Tí xíkaha la, ¿xá nkexro chrókjuacha chrókuaá? —ichro sín.

²⁷ Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Ínchéni, kaín ni mé kuitóheni kaín nkehe chóntani ntá chréheni tí jaha —ichro ch'án.

‡ 10:19 Éxodo 20.12-16; Deuteronomío 5.16-20

²⁹ Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkojín nkexro tsítóhe ntøe sín la o tí kichó ntoa o tí kichó chjin la o it'é o ìné sín o ichjién sín o xjeen sín o nontee kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón ³⁰ na mé ntihi chjasintajni tsochóna sín ciento veces nchónhya ntøe sín la ko éxí kichó sín la ko éxí ìné sín la ko éxí xjeen sín ts'ikon sín itsjé chojni kjé la ko éxí nontee sín xikaha ts'ikon sín itsjé nonte. Kjónté tsjasóte sín ntihi chjasintajni ntá chr'éxin tsochóna sín tí kjuachón jnkochrín. ³¹ A ntá itsjé tí sín t'etøan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etøan sín tí ntiha.

Nixin chronka ch'ín Jesús kixin its'en ch'án

(Mt. 20.17-19; Lc. 18.31-34)

³² Ntá tjejótti sín chríin sín tí ntia sátsji chjasin Jerusalén. Ntá ch'ín Jesús mé tjetaón ch'án ntia ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín inaá ntá kjuankixin ch'án chénka ch'án sín nkexrí tí nkehe tsonhen ch'án. ³³ Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín ncha't'á t'etøan la ko tí sín tjako tí ley. Ntá ts'etøan sín kixin its'en ch'án. Ntá sinchek'áyéhe sín ch'án tí sín jehya judío. ³⁴ Ntá jehe sín la tsjanoá sín tí jehe ch'án la ko ntaté sín tsikite sín ch'án la ko tsjate sín ch'án ntá ts'óyán sín ch'án. Kjánchó tí yaon nixin mé tsoxechón ch'án inaá —mé xikaha ichro ch'ín Jesús.

Ch'ín Jacobo la ko ch'ín Juan tjanchia sín nkehe

(Mt. 20.20-28)

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétøanxián tí kjuachaxián jié na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'ín Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

³⁹ Ntá jehe sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan. ⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxin ó tsíkónoxín —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankixin kónínkakonhen sín tí ch'ín Jacobo la ko tí ch'ín Juan. ⁴² Ntá k'uíyehé ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'etøan chjasintajni la imá t'etuenhen sín kaín chojni la ko tí sín imá tjetoan mé imá nchehnkehe asén sín kixin ihyé sín ts'etøan sín. ⁴³ Kjánchó jahará la xikahya chrókjuich'erá. Náhí. Tí jnkojínrá tjinkáonrá chrókuétøanrá la chrókjuínkítará tí í so sín. ⁴⁴ A ntá tió jnkojínrá antsí chrókuétøanrá mé t'ichjánxin senó chrókjuákoxinrá chrókjuich'eherá kichuára xra. ⁴⁵ Kixin tí Xjeen Dios K'óna Chojni mé kuihya ch'án kixin chojni chrókjuich'ehe ch'án xra. Náhí. Ikui ch'án kixin sich'ehe ch'án sín xra la ko ts'enyákonhen nchónhya chojni kixin tsaáxin sín ch'án —ichro ch'án.

*Ch'ín Bartimeo k'uék'ikonhya ch'án ntá ch'ín Jesús kjuínchekitohe ch'án jína
(Mt. 20.29-34; Lc. 18.35-43)*

⁴⁶ Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjaxín ch'án chrínta ntia tjanchak'á ch'án.

⁴⁷ Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuixín chjasin Nazaret, ntá tí ch'ín t'ikonhya kjuankíxin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóghéni —ichro ch'án.

⁴⁸ Ntá nchónhya sín k'uetuēnhen sín ch'án kixin tsotání ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóghéni —ichro ch'án.

⁴⁹ Ntá ntahó kjuák'e ch'ín Jesús. Ntá k'uetōan ch'án kixin:

—T'iyehérá tí ch'ín a —ichro ch'án.

Ntá k'uíyehé sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

⁵⁰ Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús. ⁵¹ Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítóha jína kixin kuítekávan tí janhan —ichro ch'án.

Ntá tuéxín tí ch'ín t'ikonhya la ó k'uikon ch'án ntá chréhe ch'án tí ch'ín Jesús.

11

*Ntá ch'ín Jesús k'uixenhen ch'án chjasin Jerusalén
(Mt. 21.1-11; Lc. 19.28-40; Jn. 12.12-19)*

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuēnhen ch'ín Jesús iyó tí sín k'uájiko ch'án, ² ntáchro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehéra va ntá tsjikoanará va ntihi. ³ A ntá tí jnkojín chojni tsjanchankíhará sín kixin nkekuènté xíkaha ch'erá ntá tsontáchrórá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. ⁵ Ntá iso tí chojni tjejó ntiha kjuanchankí sín kixin:

—¿Nkekuènté xíkaha ch'erá tjasintankehéra tí kolócho a? —mé chro sín.

⁶ Ntá kjuáteexín sín éxí k'uetōan ch'ín Jesús. Ntá kjuanjon sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. ⁸ Ntá itsjé chojni kuakítsje sín iké sín la kjuentoá sín tinkák'ikjínxín sín ka tí ntia ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xrákao sín tinkát'itjí sín ntia.

⁹ A ntá tí sín tsítaón ntia la ko tí sín chréhe iton kjuankíxin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kjuixín kjuachaxin ihnié Ìnchéni. ¹⁰ Jína tí kjuachaxién Dios itsi mé ts'etuēnhen tí nkexro k'uaxrjeníxín it'éni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uixenhen ch'ín Jesús chjasin Jerusalén la ko kjaxin k'uixenhen ch'án tí nínko jié tsjehe ch'án nkuixín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

Ch'ín Jesús kónínkakahen ch'án ijnko nta t'óna to higo tsík'ónahya to
(Mt. 21.18-19)

¹² A ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta. ¹³ Ntá k'uíkon ch'án kjin kixin itjen ijnko nta t'óna to higo itsá kayoa. Ntá sákjuítsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to. ¹⁴ Ntá nixjehé ch'ín Jesús tí nta t'óna to higo k'uētuenhen ch'án tí nta kixin:

—Í ninkexró sinehya tí to ts'óna tí jaha ínaá —ichro ch'án.

A ntá tí sín k'uájiko ch'án mé kuínhin sín xíkaha.

Ch'ín Jesús kjuínchetjóá ch'án nínko
(Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uixenhen ch'ín Jesús nkaxenhen nínko a. Ntá kjuankíxin ch'án k'uinkité ch'án tí sín nchekjixin nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxixin sín chichaon la ko tí silla tjejókjen tí sín nchekji kontóá ¹⁶ la ko kjuanjonhya ch'án kjuachaxin kixin tsamá sín nkehe ts'ajixenhen sín nínko. ¹⁷ Ntá kjuakohe ch'án sín ntáchro ch'án kixin:

—Ntáchro xroon itén Dios kixin: “Tí ntona i mé it'in nchia tsonixjanaxín chojni nkuixín nación”, a ntá jahará tsík'jich'énará itjueé xíchee* —ichro ch'án.

¹⁸ Ntá tí sín nchát'á t'etōan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án. ¹⁹ Kjánchó ntá ó kóntó ntá k'uaxrjexín ch'án tí chjasin a sákjuí ch'án.

Ó tsixámá tí nta t'óna to higo
(Mt. 21.20-22)

²⁰ A ntá tí nchítjen k'uátsínka sín tí tjen tí nta t'óna to higo ntá k'uíkon sín kixin ó tsixámáxin nuèe tí nta. ²¹ A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakahén jna na ó tsixámá nta —ichro ch'án.

²² Ntá kjuátehe ch'ín Jesús ntáchro ch'án kixin:

—Tinkachónkirá Dios. ²³ Chaxín ntáxrjan kixin jnkojínrá chróntácherá tí jna i kixin: “Sátjixián ntihi tjík'jankiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchorá, ntá xíkaha chaxín tsonhen. ²⁴ Mé xíkaha ntáxrjan kixin kaín tí nkehe tsjanchehérá Dios tí tsitekáonrá kixin chaxín ts'ayéhérá ntá xíkaha tsonhen tsoxiteyá. ²⁵ A ntá tíó tjejonixjehérá Dios ntá jnkojín nkexro naxa ninkákonhénrá, la chrók'uitjáyanhanrá tíha kixin It'ará tjen nkaya nkajní kjaxin chrókjuinçek'itjáyan ch'án tí jie chontará. ²⁶ A ntá tí sinček'itjáyanhyará tí ijié chojni ntá It'ará tjen nkaya nkajní la kjaxin sinček'itjáyanhya ch'án tí jie chontará.

Tjanchankíhi sín tí ch'ín Jesús nkehe tí kjuachaxin chóna ch'án
(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén ínaá. Ntá xritjak'e ch'án nkaxenhen nínko ntá kóchjina tí sín nchát'á t'etōan la ko tí sín tjako tí ley la ko tí sín táda t'etōan nínko ²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xíkaha ch'e? ¿Nkexro tjáha tí kjuachaxin kixin xíkaha kjuich'e? —ichro sín.

²⁹ Ntá kjuátehe ch'ín Jesús ntáchro ch'án kixin:

* **11:17** Isaías 56.7; Jeremías 7.11

—Ntá kjaxin janhan tsjánchánkíhárá ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xikaha it'a. ³⁰ ¿A ntá nkexro k'uetuenhen ch'ín Juan kixin tsikite ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'etuenhen tí ch'ín Juan ntá tsjanchankí tí ch'ín a kixin nkekuèté kuítékakuenhyani ch'án. ³² ¿Á chróntáchroni kixin chojni ó tsík'etuenhen ch'án? —ichro sín.

Kjánchó chrakonhen sín tí chojni chjasin kixin kaín sín kuítékaon sín kixin ch'ín Juan mé k'uénixja ch'án itén Dios. ³³ Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsoxrjankahya nkexro kjuanjon kjuachaxin kixin xikaha t'a —ichro ch'án.

12

Ch'ín Jesús mé kjuíncheyóexin ch'án éxí chojni ch'ehya xra jina

(Mt. 21.33-46; Lc. 20.9-19)

¹ Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'uenkaxin ch'án itsjé ntanò a t'óna to uva nontee ch'án la ko kjuích'éna ch'án corral la ko kjuích'éna ch'án ijnko tòye ts'énya sín to uva. A ntá kjuích'éna ch'án ijnko tjat'o noi kixin ts'it'ótjen ch'án tsokotohe ch'án.

'A ntá kjuínchekjen ch'án tí nonte iso chojni ch'e xra. Ntá sákjuí ch'án kjín. ² Ntá tí kjuixraká tí yaon ts'óna to ntá k'uetuenhen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkosiné tí to tsakja ch'án. ³ Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án. ⁴ A ntá tí ìnché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhin sín ch'án. ⁵ Ntá tí ìnché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìnché mé xíchr'án ch'án í so nkexro ch'ehe ch'án xra sákjuitsjehe sín, kjánchó iso sín k'uékon sín la í so sín la k'óyán sín.

⁶ Ntá jehe ch'án chóna ch'án jnkokoáxón xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án. ⁷ A ntá tí sín ch'e xra a tjo sín kichó sín kixin: “Tí ch'ín i mé ts'áyéhe kaín nkehe síin ntihi. A ntá jie ts'óyánni ch'án, a ntá jeheni ts'áyéheni kaín tí nkehe a”, ichro sín. ⁸ Ntá xikaha itsé sín ch'án k'óyán sín ch'án ntá kuakitsjexín sín ntoe ch'án tí nontee ch'án.

⁹ A ntá kjuanchankí ch'ín Jesús ntáchro ch'án kixin:

—¿A ntá nkehe chrókjuich'e tí ìnché tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

¹⁰ ¿Á kjuínchekuáxinhyará jahará tí xroon itén Dios? Ntáchro xikihí: Tí xro náxrjónhya kuitoenta tí sín ch'éna tjat'o, mé jie k'óna tí xro tjetooan.

¹¹ Mé xikaha kjuích'é Ìnchéni Dios, na ntá tíha mé ijnko nkehe kjuachrakon k'uíkonni† —ichro ch'ín Jesús.

¹² Ntá chrótsé sín tí ch'ín Jesús chrókjuak'echjina sín ch'án kixin kíenxín sín kixin kaín tí ntáchro ch'án la jehe ch'án k'uántaxínhin tí jehe sín. Kjánchó chrakon sín kixin nchónhya chojni kóchjina ntá kuítóhe sín ch'án ntá sákjuí sín.

* 12:9 Isaías 5.1-7 † 12:11 Salmo 118.22-23

¿A jina chrókjuenkehe sín gobierno?

(Mt. 22.15-22; Lc. 20.20-26)

¹³ A ntá ichr'án sín iso tí sín fariseo la ko iso tí sín kuènte ch'ín Herodes kixin tsjanckhíhi sín ch'án iso nkehe kixin tí ntoáhya chrókjuatehe ch'án ntá jina chrók'ueka sín ch'án jie. ¹⁴ Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxixián kixin á jina sín, la ko ntoá tjákua ntje Dios. ¿Á jina chrókjuenkeheni tí gobierno tí chichaon tjanckhia? ¿Á chrókjuenkeheni sín ní o náhí? —ichro sín.

¹⁵ Ntá ch'ín Jesús kjuátsəan ch'án kixin jehya jina tjenkayáxin sín ntáchro ch'án kixin:

—Jehya jina kixin tjáchaxinráni. Xrákəará ijnko tí chichaon tjanckhia sín tsotsjáha —ichro ch'án.

¹⁶ Ntá xrákəo sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrjexín tjenkáni tí chichaon i la ko nkexro ihnié chóna? —ichro ch'án. Ntá jehe sín kjuátehe sín kixin:

—Tí ch'ín t'ətoan mé tjenkáni ch'án —ichro sín.

¹⁷ Ntá kjuátehe ch'ín Jesús ntáchro ch'án kixin:

—Chróchjehérá tí ch'ín gobierno t'ətoan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kixin xikaha kjuátehe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

¹⁸ A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kixin:

¹⁹ —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjih'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxi xjeen tí nkexro tsík'en.‡

²⁰ Kjánchó k'uéjy yato sín jnkokoá kichó sín. Ntá tí ch'ín saə mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjih'énahya sín. ²¹ Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjih'énahya sín xjan. A ntá tí ch'ín nixin kuákja ch'án tí jehe tjan ntá xikaha kónhen inaá. ²² Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan. ²³ Ntá tió tsoxechón kaín xín chojni la, ¿Ntá nkexro ts'óna xli tjan kixin kayatoé sín tsikótehe tjan? —ichro sín.

²⁴ Ntá kjuátehe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios. ²⁵ A ntá tió tsoxechón tí chojni tsík'en la tsoteehya sín la ko tsjanjonhya sín xjeen sín kixin tsotehe sín kixin tí sín tsík'en la éxi sín ángel ts'ejó sín nkaya nkajní. ²⁶ A ntá tí tsoxechón tí sín tsík'en, ¿á kjuinchekuáxinhyará tí xroon tsíkjin ch'ín Moisés chrónka nkexrí k'uénixjexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§ ²⁷ Méxra tí Dios i la jehya tinkáchónki tí sín tsík'en. Náhí. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanckhírá —ichro ch'án.

Tí nkehe antsí imá tjeətoan tsík'ətoan Dios

(Mt. 22.34-40)

‡ 12:19 Deuteronomio 25.5 § 12:26 Éxodo 3.6

²⁸ Ntá kui ijnko ch'ín tjako tí ley kjuák'ekinhin ch'án nkexrí kjuachaxin sín ch'ín Jesús. Ntá kuínhin ch'án kixin imá jína kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjetōan tsík'etōan Dios? —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Tí nkehe antsí tjetōan tsík'etōan Dios mé tíhi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro. ³⁰ Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”* Mé xikaha tí nkehe antsí tjetōan tsík'etōan Dios. ³¹ A ntá tí nkehe yóxin tsík'etōan Dios la mé tóyóhe na mé ntáchro xikihí: “Chrótjuèhérá kichuára éxí tjuèxínrá asánrá,”† la kohya í jnko nkehe antsí má tjetōan tsík'etōan ch'án —ichro ch'ín Jesús.

³² A ntá kjuátehe tí ch'ín tjako njnko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxón Dios la ko kohya í jnko Dios.‡ ³³ Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxínni Dios la ko chrótjuèheni kichó ni éxí tjuèxínni asénni.§ Tíha mé antsí má sínkí. A ntá kaín tí ko chrók'óyánni chrókjuanjōni chróchjānxin chrítaón altar la kánhyó tjetōan tíha —ichro ch'án.

³⁴ A ntá tió k'uíkon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuénte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'ín Jesús kjuák'ekjako ch'án tí njnko jié. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David? ³⁶ A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétoan”*

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókinhin sín kóxrjínhin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntia mé tsjikosáyehe sín. ³⁹ Jehe sín xritjeyá sín tí nta antsí náxrjón ts'ejóyá sín tí nkaxenhen njnko. La ko kjaxin tió sátsji sín tí sine sín xritjeyá sín tí nta antsí náxrjón ts'ejókjen sín sine sín. ⁴⁰ La ko takitsje sín ntōe chojni k'án. La ko ch'iyexín sín chojni kixin isé nixjehe sín Dios kixin chrókuinhin chojni chróntáchro sín kixin imá jína tí jehe sín. Tí sín a mé antsí má tsjasóte sín —ichro ch'án.

Tí ofrenda kjuanjōn ijnko tjan k'án

(Lc. 21.1-4)

⁴¹ A ntá jnkonaá mé ch'ín Jesús tjetjāxin ch'án nkaxenhen njnko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín

* 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio 4.35 § 12:33 Oseas 6.6 * 12:36 Salmo 110.1

chr'áxenhén sín chichaon tí ntacajón. La ko kjaxin nchónhya tí sín rico chr'áxenhén sín nchónhya chichaon tí ntacajón a. ⁴² Ntá kjaxin ntiha mé kjuí ijnko tjan k'án nòà tjan ntá chr'áxenhén tjan tí ntacajón yaá chichaon kánhyó tjete sínkí. ⁴³ Ntá ch'ín Jesús k'uíyēhe ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòà tjan antsí tjete k'uíkon Dios tí chichaon chr'áxenhén tjan tí ntacajón, a ntá tí sín í so la kánhyó ⁴⁴ kixin kaín sín la ó chichaon xéhe sín kjuanjón sín. Ntá jehe tjan la kjónté nòà tjan la kjuanjón tjan kaín tí chichaon k'uéchóna tjan chrók'uíte nkehe chrókjóne tjan —ichro ch'án.

13

Ch'ín Jesús chrónka kixin tsoxíka nínko

(Mt. 24.1-2; Lc. 21.5-6)

¹ A ntá tió k'uaxrjexín ch'ín Jesús tí nínko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kichó, la kaín tíha la tsoxika —ichro ch'án.

Tí nkehe tsonhen chjina tí tsjixixín

(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jnā Olivo chók'èxin tjen tí nínko a. Ntiha kjuák'etjāxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexrí tsonoxínni nkesá tsoxiteyá kaín tíha —ichro sín.

⁵ Ntá ch'ín Jesús kjuátehe ch'án ntáchro ch'án kixin:

—Tóxakonhanrá títoéhyará kixin ninkexró chrókjuit'ayahyará. ⁶ Nchónhya chojni tsi tsonáchro sín kixin jehe sín mé Cristo. Ntá xíkaha sich'iyehé sín nchónhya chojni.

⁷ A ntá tió tsinhínra kixin tjanjónko kichó sín la t'óyán kichó sín la chrakonhyará tóxakuanhyará ó jehí tsonhen tíha. Kjónté xíkaha naxa tsjejehya chjasintajni. ⁸ Ijnko nación tsjanjónko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankixixón tí kjuatjoté.

⁹ Tóxakonhanrá jahará kixin mé tsjikaánra sín nkayakon tí sín t'etōan ntá tí nkaxenhen nínko ntiha mé tsjatiaxínra sín. Jahará t'ichjānxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín. ¹⁰ Tí naxa ts'itjāyanhya chjasintajni la mé t'ichjānxin tsinhin chojni kaín xín nación tí tan jina tsaáxin sín. ¹¹ Tió sátsjikoará sín tsjikaánra sín tí tjejó tí sín t'etōan, la tóxakuanhyará nkehe tsjateherá la ko nkehe tsjenkayáxinra. Náhi. Chronkará tí nkehe kjuanjón Dios tsonáchrora tí hora a, kixin jahyará tsonixjará. Náhi. Nchakuen Dios mé tsonixja. ¹² Iso chojni kjónté naxa kjéhya sín tsjikaán tí kichó sín kixin its'en. La ko kjaxin xíkaha iso chojni tsjikaán tí xjeen sín la ko kjaxin iso sín tsonínkakohen sín tí it'é la ko iné la tsjikaán sín kixin its'en. ¹³ Kaínxín chojni chjasintajni tsonínkakohenra sín kixin tinkachónkirá tí janhan. A ntá tí sín tsítōehya tinkáchónki sín tí janhan hasta tsjixixín ná mé tsaá sín.

¹⁴ Tsjixraká ijnko yaon ts'ikonrá tsjak'e tí nkehe jínahya tí chrókjuaq'ehya éxí tsintáchro profeta Daniel* —ntá tí chojni sinchekuáxin tí xroon í mé chrókuiénxín sín tíha—, a ntá tí chojni tjejó estado Judea ts'ikon sín xíkaha la sátsji sín tsochriin sín jnā tsjík'ejómá sín.

¹⁵ A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen

* 13:14 Daniel 9.27; 11.31; 12.11

nchia chrókuakitsje sín ichrén nkehe chóna sín. ¹⁶ Ntá tí sín tjejó nontee sín la í chrókjanhya sín naxa chrókuakakja sín iké sín. ¹⁷ Ntá nòà tí chojni chjin ts'ejóyá tí yaon a la ko tí sín tjejónchekakí xjeen. ¹⁸ Chrókjuancheherá Dios kixin jehya nchakuen kin chrókónhen tíha. ¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuènhya xikaha desde ti kjuankíxixín Dios kjuích'éna ch'án chjasintajni la ko kjá xikahya tsonhen chr'éxin inaá. ²⁰ A ntá tí chrókjuanjon Inchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhí la kuikonóehé ch'án tí sín tsíkjeýá ch'án ntá k'uetóan ch'án kixin tjoka ts'atsínka tí kjuachrakon a.

²¹ 'A ntá jnkojín nkexro tsontáchro kixin: “Tsjehé, ntihi itjen tí Cristo”, o tsontáchro sín kixin: “Tsjehé, ntiha tjen ch'án”, la titekakuènyará sín. ²² Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jíe tjinkaon sín chrókjuich'iyexín sín chojni, kjónté tí sín tsíkjeýá Dios. ²³ A ntá jahará chrokóxakonhanrá kaín tíha. Tjétjonkará senó kixin tsonohará kixin xikaha tsonhen.

Itsi tí Xjeen Dios K'óna Chojni
(Mt. 24.29-35, 42-44; Lc. 21.25-36)

²⁴ 'Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. ²⁵ A ntá tí konotsé la ts'anótjenxin nkajní la ko tí kjuachaxin siín nkaya nkajní la kjaxin tsinkí. ²⁶ Ntá ts'ikon sín tí Xjeen Dios K'óna Chojni itsi chríkjan tjuí tsíkáo tí kjuachaxin jíe. ²⁷ Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjeýá ch'án.

²⁸ 'Chrókiénxínrá tí nkehe sintayóaxian. Éxí yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa ²⁹ mé xikaha tió ts'ikonrá xikaha tsonhen kaín tíha ntá tsonoaxínrá kixin ó kuichjina tí tsjeje chjasintajni. ³⁰ Chaxín ntáxrjan kixin kaín tíha tsonhen tí naxa t'enhya tí chojni siín chjasintajni. ³¹ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteýá tíha.

³² 'A ntá tí yaon la tí hora tsoxiteýá tíha la ninkexro noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'eni mé nohe.

³³ 'Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha. ³⁴ Éxí yóhe ijnko chojni sátsji kjín, a ntá tí naxa sátxixínhya ch'án ntóe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntóe ch'án, la jnkojnko sín ts'áyéhe sín jnkojnko xra kuènte sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia. ³⁵ Méxra jahará chrók'uejotsjehérá kixin noahyará nkesá tsokjan tí inché tí nchia a, á ijnko tsontanonte o á ijnko k'áxrótjen o á ijnko tjetee tsje cochíká o á ijnko ts'inkaséyan. ³⁶ Ntá xrínahya tsi ch'án ts'itjaxín ch'án kixin tjejochrinrá. ³⁷ Mé xikaha tjonkará la ko xikaha ntátjan kaín chojni kixin chrók'uejótsehe sín —ichro ch'án.

14

Tjoyá sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)

¹ Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjikohya tí xroan nchek'ánkí niotja.

Ntá tí sín nchat'á t'etóan la ko tí sín maestro tjako tí ley mé kjuéyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyán sín ch'án. ² Ntá ntáchro sín kixin:

—Kjánchó jehya yaon kia chrókónhen tíha kixin chrók'uíxitéhya chojni chrókónínkaon sín —ichro sín.

*Ijnko tjan kuik̄itex̄ín aceite náx̄rjón xraxé ikja ch'ín Jesús
(Mt. 26.6-13; Jn. 12.1-8)*

³ A ntá ch'ín Jesús kjuák'e ch'án chjasin Betania ntøe ch'ín Simón, tí ch'ín k'uéchóna chinlepra. A ntá tí tjene ch'ín Jesús ntá xrínahya ikui injnko tjan kuik̄ao tjan injnko xro mé tjiá tí aceite xraxé itsjo nardo, imá tjete tsík'ite. Ntá tí tjan a mé kuakitjehe tjan tí xro a ntá kuik̄ite tjan kja ch'ín Jesús tí aceite a. ⁴ A ntá iso tí sín tjejó ntiha kónínkakonhen sín tjan ntáchro sín kixin:

—¿Nkekuènte kjuínchexénhen tjan tí aceite náx̄rjón xraxé? ⁵ Íchá jína chrókóxi_{xin} iní ciento chichaon denario tí aceite a ntá tí chichaon a mé chróku_{ton}hen tí chojni nòa —mé xikaha ichro sín k'uántaxín_{hin} sín tjan.

⁶ Ntá ntáchro ch'ín Jesús kixin:

—Nté t̄itohérá tjan; ¿nkekuènte t'antaxínhín_{rá} tjan? Ó nchoxon tí nkehe kjuích'ena tjan. ⁷ A ntá tí chojni nòa la ó xráxín ts'ejókoará sín la jína tsjínk̄itsará sín jnkojín yaon. Ntá janhan la jnkochrínhya ts'ejóni. ⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuèntana kixin tsoxravána. ⁹ Chaxín ntáxrjan kixin tí tsjako sín tí tan jína tsaáxin chojni nkuíxín chjasintajni ntá tsochronka sín kixin xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

*Ch'ín Judas kjuinchekji ch'án tí ch'ín Jesús
(Mt. 26.14-16; Lc. 22.3-6)*

¹⁰ A ntá ch'ín Judas Iscariote mé injnko teyóxin sín k'uájiko ch'ín Jesús a mé sákjuítsjehe ch'án tí sín nchat'á t'etøan kixin tsochrónka ch'án nkexrí tsotsé sín tí ch'ín Jesús. ¹¹ A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankixin ch'án kjueyá ch'án nkexrí tsochrónka ch'án kixin tsotsé sín tí ch'ín Jesús.

*Kjóneko sín tí ch'ín Jesús
(Mt. 26.17-29; Lc. 22.7-23; Jn. 13.2-30; 1 Co. 11.23-26)*

¹² A ntá kui tí yaon xrankíxixín kia sine sín niot̄ja tsík̄jikhya tí xroan nchek'ánkí nio tió ts'óyán sín tí kolélo kuènte kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjinkávan sátsjini sincheyaxíxinni kixin sineni kuènte tí kia pascua? —ichro sín.

¹³ Ntá k'uetuènen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará injnko ch'ín yámá tóa tjiá ntá. Tí ch'ín a tsochréhérá. ¹⁴ A ntá tí nchia ts'ixenhen ch'án la tsjanchankíhírá tí ìnché nchia, tsontáchrórá kixin: “K'uetøan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xikaha mé tsixrorá. ¹⁵ Ntá tsjakohará ch'án injnko cuarto jíé, yóxin piso mé chóna kaín nkehe t'ichjánxín. Mé ntaha mé sincheyaxíxin_{rá} tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xikaha k'uitja sín. Ntá tí cuarto a mé kjuíncheyaxíxin sín tí nkehe sine sín kuènte tí kia pascua.

¹⁷ A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha. ¹⁸ Ntá k'uéjío sín, a ntá tió tjejóne sín ntá ntáchro ch'ín Jesús kixin:

—Chaxín ntáxrjan kixin injnko tí jahará tjejóne jnkokoá ntihi mé sinchekjiráni —ichro ch'án.

¹⁹ Ntá jehe sín mé kjuankixin k'uává sín. Ntá kjuankixin sín jnkojnko kjuanchankíhi sín tí jehe ch'án kixin:

—¿Á janhan ní? —ichro sín.

²⁰ Ntá kjuátehe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi. ²¹ Chaxín tí Xjeen Dios K'óna Chojni mé tsonhen éxí nixja xroon itén Dios. Kjánchó nòà tí ch'ín sinchekji ch'án. Íchá jína tí ch'ín a la chrókokjéhya ch'án —mé xíkaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'o ch'án tí niotja ntá kjuanjon ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuèntana —ichro ch'án.

²³ Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá. ²⁴ Ntá ntáchro ch'án kixin:

—Tíhi mé jnina mé chrónkaxín kixin chaxín tsoxiteyá tí nkehe nixin tsonhen na mé ts'itjí kixin tsaáxin nchónhya chojni. ²⁵ Chaxín ntáxrjan kixin ts'íhya janhan tí inté to uva ínaá tí naxa tsjixrakáhya tí yaon itsi kjuachaxin kuènte Dios, a ntá tí yaon a xik'ía inté to uva nixin —mé xíkaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án (Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuènte Dios ntá sákjuí sín tí jna Olivo. ²⁷ Ntá ch'ín Jesús ntáchro ch'án kixin:

—Ijie tie kaín rá tsochakonrá ntá tsitonará. Ntá tsoxiteyá éxí ntáchro xroon iten Dios kixin: “Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”* ²⁸ A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáchro ch'ín Pedro kixin:

—Kjonté kaín sín tsítóha sín ntá janhan la náhi —ichro ch'án.

³⁰ Ntá ntáchro ch'ín Jesús kixin:

—Chaxín ntáxrjan kixin ijie tie tí naxa tsjehya kochíntoa yáya, la jaha mé sinchemána níya kixin chonhyana, tsixrua —ichro ch'án.

³¹ Ntá itsen kjuátehe ch'ín Pedro ntáchro ch'án kixin:

—Kjonté koína its'én la sintamáhya tí jaha —ichro ch'án.

La ko xíkaha ntáchro sín kaín sín.

Ch'ín Jesús nixjeexín ch'án Dios tí Huerto Getsemaní (Mt. 26.36-46; Lc. 22.39-46)

³² Ntá kjuíji sín ijnko nonte mé it'in Getsemaní. Ntá k'uetuènen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjaha Dios —ichro ch'án.

³³ Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án. ³⁴ Ntá ntáche ch'án sín kixin:

—Imá t'ává asenná éxí chrók'uén xíkaha. Ijie la ntihyó titohará tjejotsjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóehe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a. ³⁶ A ntá ntáchro ch'án kixin:

—It'éni jaha. Jaha mé chonta kaín xín kjuachaxin na ntá chrónóahani tsjakjínhínni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhi. Éxí tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora? ³⁸ Ijie la tjejotsjehérá la ko chrónóehérá Dios kixin titóehya ch'án tí Jínahya chrókjuichroerá. Tí asánrá ntáchro kixin chrókjuinchesiteyará tí jina kjánchó tí cuérporá la tsjachahya —ichro ch'án.

* 14:27 Zacarías 13.7

³⁹ Ntá sákjuí ch'án inaá chrónóehe ch'án Dios. Ntá ó jehe xikahó xínixja ch'án. ⁴⁰ Ntá ikjan ch'án la ó tjejójua sín inaá kixin kuihi sín kotáchrin. Ntá í noehya sín nkexrí chrókjuatehe sín. ⁴¹ Ntá nixin sáxíkji ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án. ⁴² Ntá t'àyará sátsjini kixin ó kjuí tí nkexro sinchekjina.

Sákjuíko sín tí ch'ín Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)

⁴³ Naxa tjenixja ch'ín Jesús ntá xrínahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuíkáo ch'án kjuíjiko sín chica espada la ko inta. Na mé kjuachaxién tí sín nchát'á t'etóan la ko tí sín maestro tjako tí ley la ko tí sín táda t'etóan nínko mé kjuixín sín.

⁴⁴ A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinekian kochíto mé jehe tíha la itserá ch'án sátsjikoará ch'án —ichro ch'án.

⁴⁵ Ntá kjuí sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. ⁴⁶ A ntá tí sín kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchát'á t'etóan xra. ⁴⁸ Ntá ch'ín Jesús mé ntáche ch'án tí sín a kixin:

—¿Nkekuénté kixin éxí chrótserá xíchee mé xikaha k'uinkakoará chica espada la ko inta kixin tsotseráni? ⁴⁹ Kaín yaon kjuak'é nkaxenhen nínko kjuákohará, ¿ntá nkekuénté tsehyaráni? Kjánchó t'ichjánxín xikaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

Ijnko ch'ín ntasoá sákjuixín ch'án ntiha

⁵¹ A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án. ⁵² Kjánchó tí ké ch'án ó tsítsé sín ntá kjónté tjóchin ch'án sákjuí ch'án.

Ch'ín Jesús kóchjina ch'án tí tjejó tí sín t'etóan
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuíko sín tí ch'ín Jesús tí ntóe tí nchát'á imá t'etóan. Ntaha mé tsíkójnkotsé kaín tí sín nchát'á t'etóan la ko tí sín táda t'etóan nínko la ko tí sín maestro tjako tí ley. ⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntásin ntóe tí nchát'á imá t'etóan a. Ntaha síche xrohi. A ntá ntiha tjejójtjaxín tí sín policía tjejóchjixrohe sín, ntá kjaxin ch'án ntahó kuítóhe ch'án tjechjixrohe ch'án.

⁵⁵ Ntá tí sín t'etuenhen tí sín nchát'á la ko kaín tí sín t'etóan kjueyá sín chojni kixin tsochrónka sín nkehe tí jie chóna ch'ín Jesús kixin jina chrók'óyán sín ch'án. Kjánchó ninxeró k'uitjahya sín tsjinkítsa tsochrónka. ⁵⁶ Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín. ⁵⁷ Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxíka ch'án tí nínko tsíkjich'énaxín chojni tja ntá iní yaon koá la ó tsjak'e ch'án í jnko nínko jehya chojni sich'éna† —ichro sín.

⁵⁹ Kjónté xikaha la jnkokónhya tí nkehe chrónka sín.

⁶⁰ Ntá tí ch'ín t'etuenhen tí sín nchát'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

† 14:58 Juan 2.19

—¿Á ninkehó t'ateehya jaha? ¿Á chaxín tí jiē t'eka sín tí jaha? —ichro ch'án.

⁶¹ Ntá ch'ín Jesús tání ch'án la ninkehó t'ateehya ch'án. Ntá xíkjančankí tí nčat'á t'etoan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'ín Jesús kixin:

—Chaxín janhan tíha. Ntá chr'éxin ts'ikonrá kixin tí Xjeen Dios K'óna Chojni mé tsjak'etjaxin ch'án tí tja chjina kjuachaxin kuènte Dios la ko itjuj mé ts'inkajinxin ch'án nkaya nkajní —ichro ch'án.

⁶³ A ntá tí nčat'á t'etoan kótséchje ch'án tí iké ch'án kjuakoxin ch'án kixin imá nínkaon ch'án ntáchro ch'án kixin:

—T'ichjánxinhya í so chojni tsochrónka nkehe. ⁶⁴ Jahará ó kuínhínrá kixin k'uántaxínhin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

⁶⁵ Ntá ikjé sín la kjuankixin sín kuikite sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policía kuènte nínko chjéhe sín nkayakon ch'án.

*Ch'ín Pedro kjuínchemá ch'án kixin chónhya ch'án tí ch'ín Jesús
(Mt. 26.69-75; Lc. 22.56-62; Jn. 18.15-18, 25-27)*

⁶⁶ Ntá tí ntasin nonte itjen ch'ín Pedro. Ntá ikui ijnko tjan ch'ehe tjan xra tí nčat'á t'etoan. ⁶⁷ Ntá k'uíkon tjan kixin tjechjixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'ín Jesús kjuixin chjasin Nazaret —ichro tjan.

⁶⁸ Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrua —ichro ch'án.

Ntá k'uaxrjexin ch'án ntiha sákjui ch'án ntója. Ntá xrínahya itsje ijnko kochíntoa. ⁶⁹ Ntá tí tjan a mé k'uíkon tjan tí jehe ch'án ntá chénka tí sín sntaxin ntaha kixin:

—A ntá tí ch'ín i mé jnkojín tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'éxin tí sín k'uéjontaxin ntáche sín tí ch'ín Pedro kixin:

—Chaxín kjaxian jaha tsíkjixian estado Galilea kixin tjatsqanxínni kixin nixja jaha éxi nixja tí jehe sín —ichro sín.

⁷¹ Ntá ch'ín Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrórá jahará —ichro ch'án.

⁷² Ntá yóxin itsje kochíntoa. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Naxa tsotsjehya kochíntoa yáya mé ó tsjixin sinchemána níya kixin chonhyana.”[‡] Ntá xraxinkaon ch'án tíha la ntá kjuankixin ch'án tsjánka ch'án kixin ntoáhya kjuích'e ch'án kjuínchemá ch'án tí ch'ín Jesús.

15

*Ch'ín Jesús nkayakon tí ch'ín Pilato
(Mt. 27.1-2, 11-14; Lc. 23.1-5; Jn. 18.28-38)*

¹ A ntá ó k'uínkaséyan ntá tí sín nčat'á t'etoan kójnkotséko sín tí sín táda la ko tí sín tjako tí ley la ko kaín tí sín t'etoan kuènte nínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato. ² Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús ntáchro ch'án kixin:

[‡] 14:72 Marcos 14.30

—Kjāxian jaha ntáchrúa —ichro ch'án.

³ A ntá tí sín nch'at'á t'etōan mé k'ueka sín ch'án nchónhya jie. ⁴ Ntá ch'ín Pilato xíkjanckh'í ch'án inaá ntáchrō ch'án kixin:

—¿Jaha, nkekuènté t'jateehya ninkehó? Tsjehé kixin nchónhya jie t'eka sín tí jaha —ichro ch'án.

⁵ A ntá ch'ín Jesús la ninkehó kjuátēehya ch'án. Ntá ch'ín Pilato la í noehya ch'án nkehe tsjenkayáxin ch'án.

*K'uáyēhe ch'ín Jesús kixin sinchekjasóte sín ch'án ntá its'en ch'án
(Mt. 27.15-31; Lc. 23.13-25; Jn. 18.38—19.16)*

⁶ A ntá ch'ín Pilato mé kuēnhen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxí tjinkaon tsjanckhia tí sín tsíkójncktsé tí kia a. ⁷ A ntá ntiha tjechjina ijnko ch'ín mé it'in Barrabás, la ko í so sín kuítekakuenhya sín tí síxreé ntá k'óyán sín chojni. ⁸ Ntá kui nchónhya chojni kjuankixin sín kjuanchehe sín tí ch'ín Pilato kixin chrókjuich'e ch'án éxí kaín nánó xíkaha. ⁹ Ntá kjuátēhe ch'ín Pilato kixin:

—¿Á tjinkáonrá tsitōhā sátsji tí ch'ín Rey t'etūēnhen tí sín judío? —ichro ch'án.

¹⁰ Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nch'at'á t'etōan, a ntá tsé sín tí ch'ín Jesús kjuíkēnhen sín ch'án. ¹¹ A ntá tí sín nch'at'á t'etōan a mé kjuínckekóninkaon sín kaín tí chojni síín, ntáche sín kixin íchá jina chrókjuanchia sín kixin chrók'uatjánta ch'án tí ch'ín Barrabás. ¹² Ntá ch'ín Pilato kjuanchankí ch'án ntáchrō ch'án kixin:

—A ntá tí ch'ín tikítexínrá kixin ch'ín Rey t'etūēnhen tí sín judío la ¿nkehe tjinkáonrá sít'ahā ch'án? —ichro ch'án.

¹³ Ntá jehe sín kjuátēhe sín k'óyako sín kjuanchia sín kixin:

—¿Tjakénkǎnia ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuíck'e ch'án? —ichro ch'án.

Kjánckhó antsí má itsen k'óyako sín kjuanchia sín kixin:

—¿Tjakénkǎnia ch'án ntacruz! —ichro sín.

¹⁵ Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uúxité ntá kuítóhe ch'án kixin sátsji tí ch'ín Barrabás. Ntá k'uetōan ch'án kixin tsjate sín tí ch'ín Jesús. Ntá kjuixin ntá kjuanjōn ch'án kjuachaxin kixin tí sín soldado sátsjiko sín ch'án tsjak'enkǎni sín ch'án ntacruz.

¹⁶ Ntá tí sín soldado a mé sákjuíko sín ch'án tí ntāsin tí palacio. Ntaha kójnkcktséxin kaín tí sín soldado. ¹⁷ Ntá ntiha kuakitsje sín iké ch'án ntá kjuínckek'inkáya sín ch'án ijnko ka kjátse tié la ko kjuak'enkáya sín kja ch'án ijnko corona tsík'óna ntach'i. ¹⁸ Ntá kjuankixin k'uúxité sín ntáchrō sín kixin:

—Jnkckhríxín tsjak'e tsétūēnhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntaté sín kuíkíte sín ch'án. K'uéjōxin tock'in sín nkayakon ch'án kjuíck'eyáxixín sín éxí imá chrókjuikosáyehe sín ch'án. ²⁰ Ntá tió kjuixin xíkaha kjuíck'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsíkjinckek'inkáya sín ch'án ntá kjuínckek'inkáya sín ch'án iké ch'án xráxín inaá. Ntá kuakitsjexín sín ch'án ntiha sákjuíko sín ch'án kixin ntá tsjak'enkǎni sín ch'án ntacruz.

*Ntá kjuak'enkǎni sín ch'ín Jesús ntacruz
(Mt. 27.32-44; Lc. 23.26-43; Jn. 19.17-27)*

²¹ A ntá ijnko ch'ín tsíkjixín chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjixín ch'án nontēe ch'án, ntá k'uátsínka ch'án ntiha. Ntá tí sín soldado a mé k'uetūēnhen sín ch'án kixin tsockhréhe ch'án tsamá ch'án tí ntacruz tsjak'enkǎni ch'ín Jesús.

²² A ntá sákjuiko sín tí ch'ín Jesús ijnko tjo it'in Gólgota, na mé nkívee sín t'axrjexín kixin Tjo Calavera. ²³ Ntá ntiha chjéhe sín ch'án xranvino tsík'ixinkíkjanxín xroan mirra chrók'ui ch'án, kjánchó k'uíhya ch'án. ²⁴ Ntá tí sín soldado kjuak'enkanı sín ch'án tí ntacruz a. Kjuixin ntá kjuích'exín sín suerte tí ké ch'án kixin tsonohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkanı sín ch'án tí ntacruz a. ²⁶ Ntá ikja tí ntacruz kjuak'enkanı sín ijnko ntachiso ntsí tsíkjin sín nixja nkekuènte kjuínchekjasóte sín ch'án na mé ntáchro kixin: “Jehe ch'án mé Rey kuènte tí sín judío”. ²⁷ Na ko kjaxin k'uéjóyáni sín ntacruz yaá tí síchee la ijnko la nánko chjina la í jnko la nó kjon tí tjen ch'ín Jesús. ²⁸ Na mé xikaha xiteyá éxí nixja xroon itén Dios ntáchro kixin: “Éxí yóhe ijnko chojni kjuasin jie mé k'uíkon sín ch'án”*.

²⁹ Ntá tí sín k'uatínka ntiha mé kjuanoá sín ch'án la ko k'uantaxínhin sín ch'án tinkátjía kja sín ntáchro sín kixin:

—Kjá na ntáchrua kixin chrók'oxíka tí nínko, a ntá iní yaon koá la ó chrókjuixin chrókjuich'éna inaá,† ichrua. ³⁰ Nchekaá asán jahvá tjasinkajinxían tí ntacruz méhe —ichro sín.

³¹ Ntá tí sín nchat'á t'etōan la ko tí sín tjako tí ley mé kjuanoá sín ch'án ikjo sín kichó sín kixin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án. ³² A ntá chaxín jehe ch'án tí Cristo tí Rey kuènte tí nación Israel ntá chrók'uikonni kixin jehó ch'án chrókjuinkajinxín ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejóyáni ntacruz mé k'uantaxínhin sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkixin mé k'uíxin tie kuenté chjasintajni, kóxrjenhen tí sítié hasta las tres kónjín ³⁴ ntá tí hora a mé itsen k'uèya ch'ín Jesús ntáchro ch'án kixin:

—Eloi, Eloi, ¿lama sabactani? —tí nkívee sín mé t'axrjexín kixin: It'éni, It'éni, ¿nkekuènté kuitohéni?,‡ mé xikaha ichro ch'án.

³⁵ Ntá iso sín siín ntiha kuínhin sín, ntá ntáchro sín kixin:

—Tinhínrá kixin t'íyehé ch'án tí ch'ín Elías tí ch'ín k'uéchrónka itén Dios ósé —ichro sín.

³⁶ Ntá ijnko tí jehe sín siín ntiha kuinká ch'án kuákja ch'án ijnko ka ntá kjuínchekjataxín ch'án vino náxrxónhya ntá kjuak'ekjen ch'án ijnko nta kjínjin ntá kjuínchekjina ch'án tí tjen ir'va ch'ín Jesús chrók'ui ch'án tí vino náxrxónhya. Ntáchro tí ch'ín a kixin:

—Tsítóheni tsotsjeheni á chaxín tsi tí ch'ín Elías tsjinkajín tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án. ³⁸ A ntá tí ka tjenkákuènxín nkaxenhen nínko mé yaá k'óna k'uichje kjuankíxixín noi la hasta nonte k'uichje. ³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin xikaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uéjó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. ⁴¹ A ntá tí chojni chjin i mé kuinkáchréhe sín tí ch'ín Jesús ntá kjuíkao sín ch'án kixin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuiko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

⁴² A ntá ó kóntó tí yaon a mé tí yaon t'óyaxínhin sín kixin tí xrankíxixín tí yaon t'ok'éhe sín, ⁴³ mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etoan ch'án tí xra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntøe ch'ín Pilato kjuíkjanhia ch'án tí cuerpo kuènte ch'ín Jesús. ⁴⁴ Ntá ch'ín Pilato chrakon ch'án kixin ó tsíkjixin tsík'en ch'ín Jesús, ntá k'uíyehè ch'án tí ch'ín capitán a kjuanchankíhi ch'án kixin á chaxín xíkaha kónhen. ⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xíkaha ntá kjuanjon ch'án kjuachaxin kixin tsjikakja ch'ín José tí cuerpo kuènte ch'ín Jesús. ⁴⁶ Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte ch'ín Jesús, a ntá jehe tí ka a mé kjuínchek'isímá ch'án tí cuerpo kuènte ch'án. Ntá kjuak'enkaya ch'án ijnko tòye tsíxrayá itjò. Ntá ijnko xro jíé mé k'uíkjèxin ch'án tí ntója tí tòye. ⁴⁷ A ntá tí tjan María Magdalena la ko tí tjan María iné ch'ín José mé k'uíkon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María iné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuènte ch'ín Jesús. ² Ntá imá nchítjen tí yaon xrankíxixín tí semana mé kjuíji sín tí tòye tsíxravá ch'án, na mé ó kjuíton yaon. ³ A ntá jehe sín mé tinkákjo kichó sín kixin:

—¿Xá nkexro tí chrókuakjìnhinni tí xro tjejkèxin tí tòye? —ichro sín.

⁴ A ntá xrínahya k'uíkon sín kixin ó tsíkjixin tsíkjin tí xro jíé tjejkèxin tí tòye kixin í tjenhya éxí k'uékjak'e senó. ⁵ Ntá kjuíji sín ikon tí tòye ntá k'uíkon sín kixin tjetjaxin ijnko ch'ín ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín. ⁶ Ntá ntáchro ch'án kixin:

—Chrakonhyará. Ó nòna kixin xritjéyará jahará tí ch'ín Jesús tsíkjixin chjasin Nazaret kjuák'enkání ch'án ntacruz. Ntá ó tsíxechón ch'án í kohya ch'án ntihí. Tsjehérá tí tsíkjak'e sín ch'án. ⁷ Ntá sátsjirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxí tsíchrónka ch'án —mé xíkaha chrónka tí ntasoá a.

⁸ Ntá tí chojni chjin a mé sákjuíxin sín tí tsíxravá tí ch'ín Jesús imá síxrànká sín chrakon sín. Ntá naxa chenkahya sín ninkexró kixin chrakon sín.

Ch'ín Jesús titàya xeta tí tjan María Magdalena

(Jn. 20.11-18)

⁹ Tió tsíkjixin tsíxechón ch'ín Jesús nchítjen tí yaon xrankíxixín semana ntá titàya xeta ch'án saoxín tí tjan María Magdalena na mé jehe tjan tsíkakitsjexín ch'án yato nchakuen tí jínahya. ¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín. ¹¹ A ntá tió kuínhin sín kixin tjechón tí ch'ín Jesús kixin xíkaha tsík'ikon tjan la kjónté kuítekakonhya sín.

Iyó sín k'uék'ajiko ch'ín Jesús titàya k'uíkuèn sín tí jehe ch'án

(Lc. 24.13-35)

¹² A ntá chr'éxin ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótji sín ntia sátsji sín ijnko nonte. ¹³ A ntá jehe sín sákjuíchenka sín tí sín í so a; la kjónté xíkaha la kuítekakonhya sín.*

Ch'ín Jesús k'uetuènen ch'án tí sín k'uék'ajiko ch'án tí xra sich'e sín

(Mt. 28.16-20; Lc. 24.36-49; Jn. 20.19-23)

* 16:13 Lucas 24.13-35

¹⁴ A ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án. ¹⁵ Ntá ntáche ch'án sín kixin:

—Sátjirá kuenté chjasintajni tjákohérá kaín xín chojni tí tan jína tsaáxin sín. ¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. ¹⁷ Ntá tí sín tsinkáchónki tí janhan mé tsjasín sín kjuaxroan kixin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkíva. ¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxin ts'ejotja tja sín chojni níhi la tsitqhe sín jína.

Ch'ín Jesús chrìn ch'án nkaya nkajní

(Lc. 24.50-53)

¹⁹ Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxin ch'án tí tja chjina Dios. ²⁰ A ntá jehe sín sákjuí sín nkuíxín sákjuíkako sín tí tan jína tsaáxin chojni. A ntá jehe Ìnchéni mé kjuínkítsa ch'án tí sín a la ko kjuachaxién ch'án mé kjuasixín sín kjuaxroan kixin tíha mé tsonoxín tí sín tjejótinhin kixin chaxín nkehe kuènte Dios kjuako sín. Amén.

Tí tan jína chrónka ch'ín Lucas

Tíhi mé xrankíxixín tí xroon i

¹ Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni. ² Éxí kjuakoheni tí sín tsík'ikonxín kon sín tí xrankíxixín nkehe k'uátsínka ch'án la ntá k'uáyéhe sín tí xra sákjuíchronka sín tí tan jína ³ a ntá janhan kjaxian kjuánchánkiá jína kaín nkehe k'uátsínka tí xrankíxixín. Ntá nòna jína ikjian kaín tíha éxí tsíkónhen ntá tsochr'anhan jaha Teófilo kixin imá tjuaha ⁴ kixin ntá jaha tsonoha jína tí nkehe chaxín tsíkjakoha sín.

Ijnko ángel mé chrónka kixin tsokjíhi Juan Bautista

⁵ A ntá tí ch'ín rey Herodes k'uetōan ch'án tí estado Judea la ko ntiha kjuák'e ijnko nchat'á mé it'in Zacarías. Jehe ch'án mé kuente tí sín tsík'axrjeníxin tí ch'ín Abías.* A ntá ichjién ch'án mé it'in Elisabet. Jehe tjan mé tsík'axrjeníxin tjan tí nchat'á Aarón. ⁶ Yóí sín na mé jína sín kixin éxí tjinkaon Dios la mé kjuínchexiteyéhe sín kaín nkehe k'uetōan ch'án. Méxra ninkexró chrók'uekahya jje tí jehe sín. ⁷ A ntá jehe sín chóntahya sín xjeen sín kixin ó jehí tsíkitoenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchat'á kuente Dios. ⁹ A ntá xikaha kuènhen tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuente njnko tsjak'e ch'án chjincō chrítaón tí altar kuente Dios. ¹⁰ Ntá kjuák'e ch'án ntiha kjuák'e ch'án tí chjincō la nachrohe kaín tí chojni k'uéjóni sín ntója nixjehe sín Dios. ¹¹ Ntá xrinahya k'uíkon ch'ín Zacarías ijnko ángel kuente Dios tjexín toté ch'án nánko chjina tí altar tjak'exin sín chjincō. ¹² A ntá tió k'uíkon ch'ín Zacarías tí ángel la imá kóxakonhen ch'án la ko imá chrakon ch'án. ¹³ A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sijnchek'ian xjan Juan. ¹⁴ Jaha la tsocháha má la ko itsjé chojni tsochéhe sín kixin tsokjíhi xjan ¹⁵ kixin imá tjetoan tsjak'e tí xjaan éxí tóxrjínhin Dios. Ninkehó xran vino la ko ninkehó í jnko xran ts'ihya ch'án. Tsochónta ch'án kjuachaxin kuente Nchakuen Dios kjónté naxa tokjéhya ch'án. ¹⁶ Jehe ch'án mé tsjakohé ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios. ¹⁷ Jehe ch'ín Juan tsítaón ch'án ntia tsixin Ìnchéni. Éxí k'uékjako ch'ín Elías ósé mé tsjako ch'án la ko tsochónta ch'án kjuachaxin éxí k'uéchónta ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kixin ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

—¿Nkexrí chrókónona kixin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

¹⁹ Ntá kjuátehe tí ch'ín ángel ntáchro ch'án kixin:

—Janhan mé Gabriel la mé t'aha xra Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jína tsonhen. ²⁰ A ntá jie kuítekákonyha tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xikaha tsoxiteyá kaín tíha —ichro ch'án.

²¹ A ntá tí í so sín ntiha k'uéjóchónhen sín ntója njnko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen njnko. ²² Ntá tió k'uaxrjexin

* 1:5 1 Crónicas 24.10

ch'ín Zacarías tí nkaxenhen nínko la í xitjahya nixja ch'án. Ntá kónohe sín kixin ichrén kjuaxroan kuènte Dios tsík'ikon ch'án tí nkaxenhen nínko. Ntá itja ch'án ó tjakoxin ch'án tí nkehe chróntáchro ch'án kixin í xitjahya nixja ch'án.

²³ A ntá tió kjuixin tí yaon kjuích'e ch'ín Zacarías xra nínko ntá sákjuí ch'án ntøe ch'án. ²⁴ A ntá chr'éxin ntá kjuák'eyá tí ichjién ch'án Elisabet. Ntá ntøe tjan ó kuítóhe tjan in'ó nitjó kjuenkayáxin tjan kixin: ²⁵ “Mé xikaha ijnko kjuaxroan kjuanjon Ìnchéni kixin chrók'uántaxíenhyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kixin tsokjíhi Jesús

²⁶ A ntá k'uátsínka injon nitjó ntá Dios k'uetuenhen tí ch'ín ángel Gabriel kixin sátsji ch'án ijnko chjasin estado Galilea mé it'in Nazaret, ²⁷ sátsji nixjehe ch'án ijnko tjan tjarisoá naxa kuákjahya tjan chojni ntoá mé it'in tjan María. Jehe tjan mé tsíkatehe tjan kixin tsotehe tjan ijnko ch'ín mé it'in José, mé tsík'axreníxin ch'án tí ch'ín rey David. ²⁸ A ntá tí ch'ín ángel k'uixenhen tí tjan tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kixin nkekuènte xikaha nixjehe ch'án, ichro tjan. ³⁰ A ntá ntáchro tí ch'ín ángel kixin:

—Chrakonhya, María. Dios la imá tjetjinkítsa tí jaha. ³¹ A ntá jie la tsjak'eyá jaha, tsochonta ijnko xjan ntoá la ko sìnchek'ian xjan Jesús. ³² Imá ts'etøan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etøan ch'án éxí ijnko rey éxí k'uetøan ch'ín David, tí nkexro ts'axreníxin ch'án. ³³ Jnkochríxin tsjak'e ch'án ts'etuenhen ch'án tí sín nación Israel, la mé tsjejehya tí kjuachaxin ts'etøan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kixin:

—¿Nkekuènte kixin xikaha chrókónhen kixin janhan la naxa chontahya chojni ntoá? —ichro tjan.

³⁵ Ntá kjuatehe tí ch'ín ángel, ntáchro ch'án kixin:

—Tí Nchakuen Dios mé ts'inkajin éxí ijnko tjuí la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xikaha tí xjan tsokjíhi la mé tjóá xjan la mé its'in xjan Xjeen Dios. ³⁶ La ko kjaxin tjan Elisabet kjéhya jaha kjónté ó nána tjan la mé tjeyá tjan. Senó la k'uéchóntahya tjan xjan, a ntá jie la ó injon nitjó tjeyá tjan. ³⁷ Kixin tí kjuachaxién Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María kixin:

—Janhan mé t'aha Ìnchéni Dios xra. Ó nchoxon tí nkehe k'uetøan ch'án sìnntaxiteyáha ch'án éxí chrónka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ A ntá ijnko yaon tí tjan María tjan sákjuí tjan ijnko chjasin tjan tí jna estado Judea. ⁴⁰ Ntá kjuíji tjan tí chjasin ntiha ntá k'uixenhen tjan ntøe ch'ín Zacarías la ntá nixjehe tjan tí tjan Elisabet. ⁴¹ A ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios ⁴² ntá itsen nixja tjan ntáchro tjan kixin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaon ch'án tí xjaan. ⁴³ ¿Xá nkexro tí janhan kixin kjuínixjana ìné Ìnchéni? ⁴⁴ Tió kuínhan nixjana ntá tí xjan la chrika xjan nkaya tsena kixin chéhe xjan kjuíha. ⁴⁵ Ntá jaha la cháha kixin kuítekávan kixin Ìnchéni Dios sìnchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kixin:

Asenná imá tjikosáyehe Ìnchéni Dios

⁴⁷ la ko chéhe asenná kixin Dios sinchekaáni ch'án.

⁴⁸ Kixin Dios ikuá kuentá ijnko tí chojni chjin nòé ch'exón xra kuènte ch'án.

À ntá ijie la ko jnkochrín tsontáchro chojni kixin náxrjón tjàn janhan, tsixro sín.

⁴⁹ Kixin Dios chóna kaín kjuachaxin ntá janhan mé kjuasixínna ch'án ijnko kjuaxroan jíé;

imá tjóá tí ihnié ch'án.

⁵⁰ Jnkochrín tsikonóehé ch'án kaín tí sín tjikosáyehe sín ch'án.

⁵¹ Tsíkjasin ch'án itsjé kjuaxroan jíé;

kuakitsjehe ch'án tí kjuachaxin chóna tí sín nchehnke.

⁵² Kuakitsjehe ch'án tí kjuachaxin chóna tí sín t'etòan,

À ntá tí sín nòa k'uék'etuanhya senó la mé jie chjéhe ch'án kjuachaxin ts'etòan sín.

⁵³ À ntá tí sín t'énxín kjinta la kjuanjon ch'án kaín nkehe tsicháxinhin sín, a ntá tí sín rico xráxín jehó tja sín sákjuí sín.

⁵⁴ Kjuínkítsa ch'án tí sín naciòn Israel kixin tjejóch'ehe sín ch'án xra;

k'uitjáyenhya ch'án tí jehe sín kuikonóehé ch'án sín,

⁵⁵ éxí k'uéchenka ch'án tí sín k'uaxrjeníxinni k'uéjós sín ósé,

na mé tí ch'ín Abraham la ko kaín tí sín naxa ts'axrjeníxin ch'án —mé xíkaha ichro tjan María.

⁵⁶ À ntá tjan María kuítóeko tjan tí tjan Elisabet iní nitjó la ntá chr'éxín xíkjan tjan ntoe tjan.

Kokjíhi ch'ín Juan Bautista

⁵⁷ Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa. ⁵⁸ À ntá tí sín chjinaxón ntoe la ko tí sín kjéhya tjan mé kjuíjitsjehe sín kixin tsochéheko sín tjan kixin kuínhin sín kixin Dios imá tsíkikonóehé tí jehe tjan. ⁵⁹ Ntá tí yaon jnixin ikui sín sincheka sín xjan tí xroye kuènte tí sín judío. Ntá chrókjuinchek'ín sín xjan Zacarías éxí it'in it'é. ⁶⁰ Kjánchó ntáchro ìné xjan kixin:

—Náhi. T'ichjánxin its'in xjan Juan —ichro tjan.

⁶¹ Ntá ntáchro sín kixin:

—¿Nkekuènte kixin xíkaha chrók'uín xjan? Kohya nkexro naxa kjéhya xíkaha it'in —ichro sín.

⁶² À ntá kaín tí sín kjéhya kjuakoxín sín tja sín kjuanchankíhi sín tí it'é xjan kixin nkexrí tjinkaon ch'án chrók'uín tí xjan. ⁶³ À ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin: “Ihnié xjan mé Juan.” À ntá kaín tí sín tjejó sín ntiha la chrakon sín kuínhin sín xíkaha kónhen. ⁶⁴ À ntá xrínahya ch'ín Zacarías kjuankíxin ch'án nixja ch'án inaá kjuanchehe ch'án Dios kjuasáya. ⁶⁵ À ntá kaín tí sín chjinaxón ntoe sín mé chrakon sín. La ntá nkuíxín tí jna kuènte estado Judea mé kjo sín kichó sín chrónka sín kixin xíkaha tsíkónhen. ⁶⁶ À ntá kaín tí sín kuínhin mé kjuenkayáxin sín kjuanchankíhi sín kichó sín kixin:

—¿Xá nkehe tí xra tsíkìtonhen tí xjan i? —ichro sín.

Kixin chaxín Ìnchéni Dios tsíkjincheyaon ch'án tí xjan.

Tí ch'ín Zacarías itsje ch'án

⁶⁷ À ntá it'é tí xjan mé ch'ín Zacarías, mé antsí k'uáyéhe ch'án kjuachaxin kuènte Nchakuen Dios ntá xíkaha nixja ch'án itén Dios ntáchro ch'án kixin:

⁶⁸ Imá jína Ìnchéni, na mé tí Dios kuènte tí naciòn Israel, kixin ikui ch'án tí tjejóni kjuínchekaá ch'án naciòn kuénténi.

⁶⁹ La ko kjuanjon ch'án ijnko nkexro t'etòan sinchekaáni ch'án

na mé ijnko nkexro k'uaxrjeníxin tí ch'ín David, tí nkexro k'uékjich'ehe Dios xra.

⁷⁰ Éxí k'uéchronkaxín tí sín kjueyá Dios k'uéchronka itén Dios ósé,

71 k'uéchronka Dios kixin sinchekaáni ch'án kixin ntá tsjachahya kaín tí sín nínkakhenni,
72 tsíkonóehē ch'án tí sín k'uaxrjeníxinni ósé,
ts'itjáyenya ch'án tí nkehe tsíchronka ch'án tsoxiteyá.

73 Tíhi mé tsíkjo Dios tí ch'ín Abraham ósé kixin nkehe chaxín tsoxiteyá chr'éxín

74 kixin sinchekaáni ch'án kixin kohya nkehe sich'eheni tí sín nínkakhenni kixin jína
sich'eheni ch'án xra tsochakonhyani,

75 la ntá jína ts'ejóni sinchetjóáni ch'án kaín yaon tí naxa tjejóchónni.

76 A ntá jaha xjeenni mé tsontáchro Dios kixin jaha ijnko nkexro tsochrónka itén Dios tjen
nkaya nkajní.

Jaha tsítónxian ntia tsixín Ìnchéni la ko jaha tsjásiyóxian ntia tsixín ch'án.

77 Jaha tsjákohé tí chojni chjasintajni nkexrí tsjín tí jie chóna sín, ntá tsaá sín.

78 A ntá Dios mé tjuèheni ch'án la ko kuíkonóehēni ch'án, kixin nkajní kuixín ijnko xrohi
nixin ts'inkaséyanxín tí yaon nixin.

79 Tíha mé tsíkao tí xrohi ts'inkaséyanxín tí sín tjejó sítié la ko tí sín chrók'uitjáyan, la ko
ts'ikónxínni tí ntia tsjanjon kjuaxróxin.

Na mé kaín tíhi chrónka tí ch'ín Zacarías.

80 A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte
xjan kixin antsí tsonohe xjan nkexrí tjen Dios. A ntá kjuák'e xjan nteje k'uánkí xjan
kjuixrakája tí yaon kjuankíxin kjuakohe ch'án tí chojni nación Israel.

2

Kokjíhi ch'ín Jesús

(Mt.1.18-25)

1 A ntá tí yaon a na mé tí ch'ín imá t'etōan mé it'in Augusto César na mé k'uetōan
ch'án kixin ts'ínixín ihnié kaín xín chojni síin tí chjasin t'etōan ch'án kixin tsonohe ch'án
nkekjaín chojni síin. 2 Tí xrankíxixín k'uínixín ihnié sín tió Cirenio mé k'uégovernador
k'uetōan estado Siria. 3 Kaínxín chojni t'ichjánxín sátsji sín chjasén sín kixin ntaha ts'ínixín
ihnié sín. 4 Mé xíkaha ch'ín José kjaxin k'uaxrjexín ch'án tí chjasin Nazaret estado Galilea
ntá sákjuí ch'án tí estado Judea na mé sákjuí ch'án chjasin Belén tí tsíkokjéxín tí ch'ín rey
David kixin jehe ch'ín José mé tsík'axrjeníxin ch'án tí ch'ín David. 5 Sákjuí ch'án chjasin
Belén sákjuíko ch'án tí tjan María kixin ntiha ts'ínixínko ihnié ch'án tjan kixin jehe tjan
tsíkatehe kixin tsotehe ch'án. A ntá jehe tjan na mé ó tjejá tjan. 6 A ntá xíkaha kónhen
nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María. 7 A ntá
ntiha kokjéxín tí xjeen tjan saó. Ntá kjuínchek'ísímá tjan xjan ka, a ntá kjuak'enkaya tjan
ijnko nta neyá iko kixin jehe sín la k'uitjahya sín nchia xranka ts'ók'èxín sín mé kjónté
ntiha k'uéjó sín.

Tí sín ángel la ko tí sín k'uáyakonhen kolélo

8 Kjaxin chjinaxón tí chjasin Belén tjejó iso chojni nteje ó la ntá ntahó titohe sín tí tie
a kixin t'ayakonhen sín kolélo. 9 A ntá titàya k'uíkuèn sín ijnko ángel kuènte Dios la ko
nkuíxín tí tjejó sín la k'uínkaséyan kixin tí kjuachaxin jie kuènte Dios kuíkao ch'án. Ntá
jehe sín la imá chrakon sín. 10 A ntá tí ch'ín ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixin kixin tsochéhe kaín
xín chojni 11 kixin ijie tí chjasén ch'ín David kokjéxín tí nkexro tsaáxinrá jahará na mé
Ìnchéni Cristo tíha. 12 Ntá tsonoaxínrá jahará kixin tí xjan a kixin ika tjechr'ísímá xjan la
ko ijnko nta neyá iko mé tjetsínkayá xjan —mé xíkaha chrónka tí ch'ín ángel.

13 A ntá titàya k'uíkuèn sín kixin nchónhya sín ángel kuixín nkaya nkajní tjejóko tí ch'in
ángel tjejótsje sín tjanchehe sín Dios kjuasáya, ntáchro sín kixin:

14 Kjuasáyé Dios tjen nkaya nkajní kixin imá chóna
ch'án kjuachaxin. Ntá chjasintajni ts'ixín

kjuaxróxin tí tjejó tí sín sinchexiteyéhe ch'án.

Mé xíkaha ichro sín.

¹⁵ A ntá tí sín ángel xíkjan sín nkaya nkajni, a ntá tí sín t'ayakonhen kolélo ikjo sín kichó sín ntáchro sín kixin:

—Íntá sátsjini tí chjasin Belén tsjitsjeheni tí nkehe tsíkónhen kixin Ìnchéni k'ueṭoan kui tí nkexro kjuínchenoheni —ichro sín.

¹⁶ Ntá tjiān sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko. ¹⁷ A ntá tió k'uíkon sín xíkaha ntá chrónka sín tí nkehe tsíchrónka tí ángel kixin nkexrí tjen tí xjan a. ¹⁸ Ntá chrakon kaín tí sín kuínhin kixin xíkaha chrónka tí sín k'uáyakonhen kolélo. ¹⁹ Kjánchó tí tjan María la asén tjan ó xraxinkakonxín tjan kaín tíha. ²⁰ A ntá tí sín k'uáyakonhen kolélo la sákjuí sín ntiha kuínkákjanchehe sín Dios kjuasáya kixin kaín tí nkehe tsíkinhin sín la ko k'uíkon sín kixin ó xiteyá kaín nkehe éxi tsíchrónka tí ángel.

Sákjuiko sín tí xjan Jesús tí ninko Jerusalén

²¹ A ntá tió xétja tí ijní yaon ntá kjuíncheka sín xjan xroye kuente tí sín israelita ntá kjuínchek'in sín xjan Jesús éxi tsíntáchro tí ch'ín ángel chénka tí tjan María tí naṣa kjuák'eyáhya tjan.

²² A ntá tió kuítóhe tjan María jína éxi chrónka ley kuente Moisés * ntá sákjuiko sín tí xjan tí chjasin Jerusalén kixin tsochjéhe sín Dios kjuasáya. ²³ Éxi ntáchro tí xroon ley kuenté Ìnchéni Dios kixin: “A ntá kaín xjan ntoa tsokjíhi saoxín la mé tsochjéhe sín Dios tí xjan a sich'ehe xjan xra Dios.”† ²⁴ Ntá xíkaha sákjuí sín kixin ntaha tsjanjon sín iko ts'enxín ntiha tsochjéxín sín Dios kjuasáyé éxi t'ṭoan tí ley kuente ch'án na mé yaá kontóá najni o yaá kontóá nteje chrókjuanjon sín.

²⁵ A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochrín xraxinkaon ch'án Dios la ko kjuák'echónhen ch'án kixin itsi tí nkexro tsaáxin tí nación Israel. Tí Nchakuen Dios tjeko tí ch'ín Simeón ²⁶ tsíkjinchenohe ch'án kixin naṣa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios. ²⁷ A ntá tí Nchakuen Dios kjuínchexraxinkaon tí ch'ín a kixin sátsji ch'án ninko. A ntá tió kui tí ìné la ko it'ḗ xjan Jesús k'uíxenko sín xjan nkaxenhen ninko kixin sinchexiteyéhe sín tí nkehe t'ṭoan tí ley ²⁸ ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

²⁹ Ijie jaha Ìnchéni Dios, tsjánjuan kjuachaxin kixin kjuaxróxin its'én janhan kixin jaha ó kjuínchexiteyá tí nkehe tsíntáchrúa

³⁰ kixin ó k'uíkonxin kuān tí nkexro tsaáxinni,

³¹ mé xíkaha kjuích'e kixin ts'ikon kaín xín chojni.

³² Jehe ch'án mé tí xrohi ts'inkaséyanxín ntié tí sín jehya kuente Israel, la ko jehe ch'án tsjikosáyehe ch'án tí chjasín kuentá Israel, mé ichro ch'ín Simeón.

³³ Ntá ch'ín José la ko tí ìné ch'ín Jesús la chrakon sín kixin xíkaha kuínhin sín ntáchro ch'ín Simeón kixin nkexrí tjen tí xjan. ³⁴ Ntá ch'ín Simeón kjuíncheyaon ch'án sín ntá chénka ch'án tí tjan María mé tí ìné xjan Jesús kixin:

—Tí xjan i tsíkikao itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín sitekaon sín antsí tsonohe sín la ko nchónhya chojni tsojtinkakonhya tsinhin sín tí nkehe tsjako ch'án. ³⁵ Mé xíkaha tsonoxín nkexrí tjenkayáxin jnkobjnko asén chojni. Kjánchó kaín tíha tsoyóhe éxi ijnko chica espada chróchr'áte asán na mé tsoxakonhan la ko ts'avá má —ichro ch'án nixjehe ch'án tí tjan María.

* 2:22 Levítico 12.1-8 † 2:23 Éxodo 13.2,12

³⁶ Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxin ch'án tí ch'ín Aser. Jehé tjan la ó nána tjan. Tí naxa k'uétjarisoá tjan la kótehe tjan. Ntá yatokoá nánó kjuák'eko tí xì tjan ³⁷ ntá jie ochenta y cuatro nánó tsíkók'án tjan. Kuítøehya tjan tí xra kuènte nínko la mé ntahó tjan tjan ch'ehe tjan Inchéni Dios xra nchakotjin la ko tie la jnkoyaxón nehya tjan kixin jina tsonixjehe tjan Dios. ³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí tjan tí xjan Jesús nixjehe tjan kaín tí sín tjejóchónhen kixin itsi nkexro sinchekaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuínchexiteyá sín kaín nkehe t'etøan tí ley kuènte Dios ntá kjan sín estado Galilea na mé chjasén sín chaxín Nazaret. ⁴⁰ A ntá tí xjan a mé k'uánkí xjan la ko tsanká xjan la ko imá kónohe xjan kixin Dios imá tjinkítsa tjancheyaon xjan.

Tí xjan Jesús kjuák'e xjan tí nínko Jerusalén

⁴¹ Tí it'é la ko iné tí xjan Jesús xráxín k'uékji sín kaín nánó tí chjasin Jerusalén kixin tí kia pascua. ⁴² A ntá tió xetjehe ch'ín Jesús tí teyó nánó, ntá sákjui sín kaín sín tí chjasin Jerusalén kixin xikaha kuènnen sín kixin tí kia a. ⁴³ A ntá kjanxin sín ntiha sáchrókjui sín chjasén sín tió k'uátsínka kia la tí xjan Jesús ó tsíkitohe xjan Jerusalén ntahó, kjánchó iné xjan la ko ch'ín José xraxinkakonhya sín kixin kohya tí xjan. ⁴⁴ Jehé sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntia tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín ⁴⁵ kjánchó k'uitjahya sín xjan. Ntá kjan sín tí chjasin Jerusalén kixin tsjeyá sín xjan ntiha.

⁴⁶ Ntá k'uátsínka iní yaon ntá k'uitja sín xjan la mé nkaxenhen nínko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín. ⁴⁷ Ntá kaín tí sín tjejóntaxín tjejótinjin sín mé chrakon sín kixin xikaha imá nohe xjan la ko xikaha tjetehé xjan kaín nkehe tjanchankíhi sín xjan. ⁴⁸ Ntá tió k'uíkon iné la ko it'é la chrakon sín. Ntá ntáchro iné kixin:

—Xjeenni, ¿nkekuènte xikaha kjuich'e? It'á la ko janhan imá kóxakonhenni kjueyáni tí jaha —ichro tjan.

⁴⁹ Ntá ntáchro ch'ín Jesús kixin:

—¿Nkekuènte tjejá tí jeheni? ¿Á noahya jaha kixin tóxakonhenni kixin tí xra kuènte It'éni? —ichro ch'án.

⁵⁰ Kjánchó kíenxínhya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naxa kuítekakonhen xjan tí jehe sín. A ntá tí iné la ntá asén tjan xráxín ó nohe kixin xikaha kónhen. ⁵² La ko naxa k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhin nkexrí kjuínchexiteyá xjan la ko kjaxin kaín chojni kóxrjínhin sín kixin jina tjan xjan.

3

Ch'ín Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

¹ A ntá quince nánó k'uék'etøan ch'ín Tiberio tí xra gobierno, la ko tí ch'ín Poncio Pilato k'uégovernador tí estado Judea, la ko tí ch'ín Herodes k'uégovernador tí estado Galilea, la ko tí kichó ch'án Felipe mé k'uégovernador estado Iturea la ko estado Traconite, la ko ch'ín Lisantias k'uégovernador tí estado Abilinia. ² A ntá ch'ín Anás la ko ch'ín Caifás k'uéchóna sín xra nchat'á t'etøan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías. ³ Ch'ín Juan k'uátsínka ch'án kaín tí chjasin chjino tí ntario Jordán kjuakohe ch'án chojni ntiha kixin chrókuinkí sín tí nkehe tjankeyáxin sín chrókuítohe sín tí ijíé sín ntá chrókuikite sín kixin xikaha mé

chrókjuìn ijíé sín. ⁴ Mé xíkaha kónhen éxí k'uéchronka la ko tsíkjin ch'ín Isaías, mé tí nkexro k'uéchronka itén Dios ósé kixin:

Tsinhín sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixín Ìnchéni Takítjehérá ijnko ntja ntoí.

⁵ Kaínxín tsaka mé tsoyóxin, la ko kaín xín jnā la ko kaín xín itjo tsitohe yóxin, la ko tí ntja tsixrèya mé tsoxrentoá, la ko kaín tí ntja yóxinhya la mé tsoyóxin;

⁶ Xíkaha mé kaín xín chojni chjasintajni mé ts'ikon sín kixin Dios mé chrókuaáxin sín.”*

⁷ A ntá tí kjuíji chojni ntiha kixin ch'ín Juan chrókuikite ch'án sín ntá ntáche ch'án tí jehe sín kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkeherá tí kjuanínkaon kuènte Dios ó tsi? ⁸ T'ichjánxin kixin chrók'uejorá jnkojína chrókjuákoxinrá kixin chaxín kjuitoxinhínrá tí nkehe tjenkayáxinrá. Jahará nchehnerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ⁹ Kixin tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xíkaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátehe ch'ín Juan kixin:

—Tí nkexro chóna yaá camisa la chrókjuinchekitonhen tí nkexro chóntahya. La ko tí nkexro chóna nkehe sine chróchjéhe sín tí nkexro chóntahya nkehe sine —ichro ch'án.

¹² Kjaxin ikui iso tí sín nchekjènkj kixin chrókuikite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kixin:

—Jehó éxí tí tsík'ítuanhanrá chrókjuinchekjènkirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chichakoen sín la ko ninkexró sich'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uéjóchónhen sín tóxakonhen asén sín tjinkaon sín tsonohe sín kixin á tí ch'ín Juan mé tí Cristo. ¹⁶ Kjánchó chénka ch'ín Juan kaín tí sín tjejó a kixin:

—Janhan mé ìnta tíkítexián chojni. A ntá tí nkexro itsi chr'éxin mé tsíkítexínrá tí Nchakuen Dios la ko xrohi. Antsí t'etoan ch'án a ntá janhan la kánhyó. Méxra chrókósuàna chrókjuasintankaha ch'án tí correa tí tokatè ch'án. ¹⁷ Jehe ch'án la ó tjexraá ch'án pala sinchetjuáxin ch'án noatrigo kixin tí ntachjiji trigo la ókjé tsjejo ch'án a ntá tí noatrigo la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochríxín —mé xíkaha ichro ch'ín Juan.

¹⁸ Mé xíkaha chronkaxín ch'án la ko itsjé í so nkehe kjuínchexraxinkaon ch'án chojni mé xíkaha kjuakoexín ch'án sín tí tan jína. ¹⁹ Kjaxin kjuentuéhe ch'án tí ch'ín Herodes kixin chóna ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsíkjich'e ch'án. ²⁰ Kjánchó ch'ín Herodes ántosén ch'án kjónté kuínhin ch'án la kjuínchek'ánkí ch'án tí ijíé ch'án ínaá kixin kjuak'echjina ch'án tí ch'ín Juan tí ntóechiso.

* 3:6 3.4-6 Isaías 40.3-5

*Kuikite ch'ín Jesús**(Mt. 3.13-17; Mr. 1.9-11)*

²¹ A ntá naxa kuènhya tíha naxa kjuák'e ch'ín Juan kuikite ch'án chojni ntá kjaxin ch'ín Jesús mé kuikite ch'án. A ntá tjenixjehe ch'án Dios ntá xitjehe nkajní ²² ntá k'uínkajin Nchakuen Dios éxí ijnko kontóá tsjehe la kjuák'e chrítaón kja ch'án. Ntá xringhya kuínhin sín itén nkexro nkaya nkajní ntáchro kíxin:

—Jaha mé xjanna la tjuaha tí jaha. Imá chàna kíxin nchexiteyána tí jaha.

*Tí sín tsík'axrjeníxin ch'ín Jesucristo**(Mt. 1.1-17)*

²³ Ch'ín Jesús k'uéchónta ch'án chjino treinta nánó tió kjuankíxin kjuako ch'án. Ntá kjuenkayáxin sín kíxin it'é la mé ch'ín José. Ntá it'é tí ch'ín José la mé ch'ín Elí. ²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. ²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, ²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá, ²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, ²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er, ²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, ³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, ³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, ³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isai, a ntá it'é tí ch'ín Isai na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, ³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, ³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham na mé ch'ín Taré, a ntá it'é tí ch'ín Taré na mé ch'ín Nacor, ³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala, ³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, ³⁷ a ntá it'é tí ch'ín Lamec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán, ³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4*Ch'ín Tsochren chrókjuachroe tí ch'ín Jesús**(Mt. 4.1-11; Mr. 1.12-13)*

¹ A ntá ch'ín Jesús imá chóna ch'án kjuachaxiën Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje. ² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xrínahya ik'uén ch'án kjinta. ³ Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóhónxin chojni. Náhi. Kaín tí tan nixja Dios tjejóhónxin chojni”^{*} —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí nación siín chjasintajni. ⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nación a. Janhan na k'uayaha kaín tíha la ntá jie tsotjaha tí nkexro tjínkavan tsotjaha. ⁷ Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuéntá —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuíkosáyehé Ìnchéni Dios la jehó ch'án chrókjuich'ehé xra”[†] —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja nínko, a ntá ntáchro ch'án kixin:

—Tí chaxín Xjeen Dios jaha la tìtohé t'anótjénxian tí noi ntihi ¹⁰ kixin ntáchro xroon itén Dios kixin:

Dios mé ts'etuenhen tí sín ángel kuènte ch'án kixin ts'ayakonhan sín.[‡]

¹¹ Tsotsé sín itjá

kixin tsotéhya totá ts'itja xro tí ts'anótjén§

—mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuènte Ìnchéni Dios”^{*} —ichro ch'ín Jesús.

¹³ Mé xikaha tío kjuachahya tí ch'ín Tsochren kaín nkehe chrók'uetuenhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuènte ch'án estado Galilea

(Mt. 4.12-17; Mr. 1.14-15)

¹⁴ Ntá ch'ín Jesús xíkjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejójtjo sín nkuíxín ntiha kixin nkexro tí jehe ch'án. ¹⁵ Kjuakoxin ch'án tí nínkoe sín kaín chjasin la ko kaín xín chojni kjuanchia sín kjuasáya kixin kóxrjínhín sín tí kjuako ch'án.

Ch'ín Jesús kjuák'e ch'án chjasin Nazaret

(Mt. 13.53-58; Mr. 6.1-6)

¹⁶ Ntá ch'ín Jesús sákjuí ch'án chjasin Nazaret na mé tí chjasin tsík'ánkixin ch'án. Ntá tí yaon t'ok'éhe sín mé k'uixenhen ch'án ijnko nínko Israel kixin xikaha kuènen ch'án. Ntá kjuák'exín toté ch'án kixin sinchekuáxin ch'án tí xroon itén Dios. ¹⁷ Chjéhe sín ch'án tí xroon kuènte tí profeta Isaías. Ntá kuakitjehe ch'án tí xroon ntá k'uitja ch'án nketí nixja xikihí:

¹⁸ Tí Nchakuen It'eni Dios tjetjinkitsana má,

kixin kjueyána ch'án kixin tsqxrjanka tí tan jína kuènte Dios tsjakohá tí sín nòa.

K'uetuanna ch'án kixin sjntakitohá jína tí sín t'ává asén kixin chóntahya sín nkerí tsaáxin sín,

^{*} 4:4 Deuteronomio 8.8 [†] 4:8 Deuteronomio 6.13 [‡] 4:10 Salmo 91.11 [§] 4:11 Salmo 91.12 ^{*} 4:12 Deuteronomio 6.16

la ko tsjakoha tí sín tjejóchjina kixin nkexrí tsaá sín,

la ko sintak'ikuau tí sín t'ikonhya,

la ko sintakaá kaín tí sín tjejóttjasóte kohya nkehe tsaáxin sín,

¹⁹ la ko tsoxrjanka kixin ó kjuixraká tí yaon kixin tí nkexro tsitekaon la tsaá sín.†

²⁰ A ntá ch'ín Jesús kjuixin kjuínchekuáxin ch'án tí xroon, a ntá chjéhe ch'án tí ch'ín tjinkitsa tí xra nínko ntá kjuák'etjaxin ch'án. Ntá kaín tí sín tsíkójkotsé ntiha nínko naxa tjejókomá sín tí jehe ch'án. ²¹ Ntá kjuankixin chronkaxin ch'án ntáchro ch'án kixin:

—Ntá ijie la ó xiteyá tí nkehe kjuintakuáxian tí xroon itén Dios kuínhínra —ichro ch'án.

²² Ntá kaín sín kóxrjinhin sín tí kjuako ch'ín Jesús la ko chrakon sín kixin náxrjón tí nkehe nixja ch'án. Ntá kjuanchankíhi sín kichó sín ntáchro sín kixin:

—¿A jehya xjeen ch'ín José tíhi? —ichro sín.

²³ Ntá kjuátehe ch'ín Jesús ntáchro ch'án kixin:

—Kjá tsontáchrora kixin janhan ijnko chojni ch'e xroan chrókjuintakitoha jina asenná senó, la ko tsontáchrora kixin tí nkehe kuínhínra kjuít'a tí chjasin Capernaum xikaha chrókjuít'a ntihi chjasenná, tsixrorá —ichro ch'án.

²⁴ Naxa tjenixja ch'án ntáchro ch'án kixin:

—Ijnko nkehe chaxín tsotjonkará kixin tí sín chjasén ijnko nkexro chrónka itén Dios la mé xráxin chóntehya sín kjuasáyé tí nkexro a. ²⁵ Chaxín ntáxrjan kixin k'uéjé itsjé chojni chjin tsíkók'án tí nación Israel tió kjuák'e ch'ín Elías tí nkexro k'uéchrónka itén Dios la ntá í k'uániáhya chrin iní nánó ko t'o la ko imá kókjinta nkuíxin chjasin ntiha. ²⁶ Kjánchó Dios la k'uetuenhya ch'ín Elías sáchrókjuitsjehe ch'án nijnko chojni chjin tsíkók'án tí nación Israel. Náhi. Dios k'uetuennen ch'án kixin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón.‡ ²⁷ Kjaxin nación Israel k'uéjé nchónhya chojni chóna chinlepra tió kjuák'e ch'ín Eliseo chrónka ch'án itén Dios, kjánchó nijnko sín kuítóehya sín jina la mé jehó ch'ín Naamán kjuixin ch'án nación Siria mé kuítóhe ch'án jina§ —mé xikaha ichro ch'án.

²⁸ A ntá tió kuínhin sín xikaha ntáchro ch'ín Jesús la ntá kaín tí chojni k'uéjóxehen nínko la mé imá kónínkaon sín. ²⁹ K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuinчек'anótjenxin sín ch'án tí tjo a. ³⁰ A ntá ch'ín Jesús k'uátsínka jnkosiné tí siín tí jehe sín la sákjuí ch'án.

Ijnko chojni chóna ijnko nchakuen tí jínahya

(Mr. 1.21-28)

³¹ A ntá ch'ín Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuankixin ch'án kjuakohe ch'án chojni tí yaon t'ok'éhe sín.

³² Chrakon sín kixin nkexrí kjuako ch'án kixin kjuakoqin ch'án kixin chóna ch'án kjuachaxin.

³³ A ntá nkaxenhen nínko kjuák'e ijnko ch'ín chóna ijnko nchakuen tí jínahya k'óyakoxín itén tí ch'ín a, ntáchro kixin:

³⁴ —Títóhéni; ¿nkekuènte tjiaté tí jeheni kaín ni, jaha Jesús kjuíxian chjasin Nazaret? ¿A k'uinka kixin sinček'itjáyanni? Ó tjátsoan tí jaha la ko nóna kixin jaha mé tí nkexro tjóá kuènte Dios —ichro tí nchakuen tí jínahya.

³⁵ Ntá ch'ín Jesús jjehe k'uetuennen tí nchakuen tí jínahya ntáchro ch'án kixin:

—Táníá. T'axrjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí siín sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka. ³⁶ A ntá kaín sín chrakon sín itjo sín kichó sín kixin:

† 4:19 4.18-19 Isaías 61.1-2 ‡ 4:26 4.25,26 1 Reyes 17.9;18.1 § 4:27 2 Reyes 5.1-14

—¿Xá nkexrí kixin xikaha nixja tí ch'ín i? Jehe ch'án chóna kjuachaxin kixin k'uetuēnhen ch'án tí nchakuen tí jínahya k'uaxrjexín tí nkexro i —ichro sín.

³⁷ A ntá nkuíxín ntiha ikjo sín kichó sín kixin nkerí kjuaxroan kjuích'e ch'ín Jesús.

Ch'ín Jesús kjuínchekitohe jína tí tjan ich'ee ch'ín Simón Pedro

(Mt. 8.14-15; Mr. 1.29-31)

³⁸ Ntá ch'ín Jesús k'uaxrjexín ch'án tí nínko la ntá k'uíxēnhen ch'án ntoe ch'ín Simón. A ntá tí tjan ich'ee ch'ín Simón mé níhi tjan chóna tjan ijnko sóa jié ntá chronóēhe sín ch'án kixin chrókjuínchekitohe ch'án tjan jína. ³⁹ Ntá k'uísén ch'ín Jesús tí tjan tjan ntá k'uetuēnhen ch'án tí sóa a ntá kjuín. Ntá tuénxín k'uàya tjan la ntá kjuanjon tjan nkehe sine sín.

Ch'ín Jesús kjuínchekitohe ch'án jína itsjé chojni níhi

(Mt. 8.16-17; Mr. 1.32-34)

⁴⁰ A ntá kuétaón yaon ntá kaín tí sín chóna sín sinníhi chóna sín nchónhya clase chin mé kuikao sín tí tjan ch'ín Jesús. Ntá kjuak'etja tja ch'án jnkojnko tí jehe sín a ntá xikaha kuítóhe sín jína. ⁴¹ La ko nchónhya chojni níhi chóna nchakuen tí jínahya la mé k'uaxrje tí nchakuen tí jínahya la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínahya.

Kjánchó ch'ín Jesús k'uetuēnhen ch'án tí nchakuen tí jínahya la kjuanjonhya ch'án kjuachaxin kixin tsonixja kixin ó nohe tí nchakuen tí jínahya kixin jehe ch'án na mé tí nkexro Cristo.

Ch'ín Jesús kjuako ch'án tí estado Galilea

(Mr. 1.35-39)

⁴² A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuj ch'án nteje. A ntá kaín tí chojni kjuíkjejá sín ch'án la k'uitja sín tí tjan ch'án. Tjinkaon sín chrókjuínchexrjenhen sín ch'án kixin sáchrókjuíhya ch'án ókjé. ⁴³ Kjánchó kjuátehe ch'ín Jesús ntáchro ch'án kixin:

—T'ichjánxín kixin sátsjia kaín chjasin ókjé tsoxrjanka tí tan jína kuente Dios kixin nkexrí tí kjuachaxin t'etoan Dios, kixin xrā ó mé k'uinka —ichro ch'án.

⁴⁴ A ntá xikaha k'uájikjako ch'ín Jesús kaín tí nínko Israel tí estado Galilea.

5

Kjuaxroan itsé sín koche

(Mt. 4.18-22; Mr. 1.16-20)

¹ Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchónhya chojni na mé k'uixitja kichó sín kixin tjinkaon sín chrókuinhin sín itén Dios. ² Ntá k'uíkon ch'ín Jesús kixin tjejó iyó ntabárcō jehó chjino chrínta ntayaon. A ntá tí sín itsé koche mé tsík'axrjexín sín ntiha la k'uéjó sín tjentoá sín la ko tjejótjōnemá sín tí nchísén tséya sín koche. ³ Ntá ch'ín Jesús k'uit'ótjen ch'án ijnko tí ntabárcō ntiha na mé ntabárcō kuente ch'ín Simón na ntá chronóēhe ch'án tí ch'ín Simón kixin sátsjiko ch'án ntabárcō ijnko chrínta ntá kjínhya. Ntá ntahó kjuák'enkáya ch'ín Jesús tí nta kjuák'etjaxín ch'án kjuakohe ch'án nchónhya chojni siín chrínta ntá. ⁴ A ntá tió kjuixin nixja ch'án ntá ntáche ch'án tí ch'ín Simón kixin:

—Tjíkōa ntabárcō tí tjiá ntá nínka ntá itérá tí nchísén tseyará koche —ichro ch'án.

⁵ Ntá kjuátehe ch'ín Simón ntáchro ch'án kixin:

—Maestro, kjuích'eni xrā kuenté tie la tséhyani ninkehó koche. Kjánchó tí jaha xikaha kuétuēnhēni la mé tsochr'ánni tí nchísén inaá —ichro ch'án.

⁶ Na ntá xikaha kjuích'e sín la ntá nchónhya koche tsítsé tí nchísén la ntá tí nchísén kjuankíxín tinkák'ichje. ⁷ Ntá k'uèyaxín sín tja sín kixin chróxrakoa tí sín ch'eko sín xrā tjejóxēnhen tí í jnko ntabárcō kixin tsjinkítsa sín. Ntá xráko sín ntabárcō kuente sín ntá

kjuínchekaón sín yóí tí ntabárcō ntá chrókjuachahya tí ntabárcō na tjinkaon chrók'uániánkí nta. ⁸ Ntá xíkaha k'uíkon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—Títōhéni Ìnchéni kixin jeheni ijnko chojni chóna jie —ichro ch'án.

⁹ Mé xíkaha ichro ch'ín Simón kixin chrakon ch'án la ko kjaxin chrakon tí í so sín tjejóko ch'án kixin xíkaha kónhen xrenájín nchónhya koche. ¹⁰ La ko ch'ín Jacobo la ko ch'ín Juan, xjeen ch'ín Zebedeo, na mé jnkokoá ch'eko sín xra ch'ín Simón, la kjaxin chrakon sín. Kjánchó ntáche ch'ín Jesús tí ch'ín Simón kixin:

—Chrakonhya. Senó la koche k'uétse la nta jie la náhí la mé chojni tsjéyá —ichro ch'án.

¹¹ Ntá tió kjuíjiko sín tí ntabárcō tí chrínta nta la kuítóhe sín kaín nkehe kuènte sín ntá chréhe sín sákjuíko sín tí ch'ín Jesús.

*Ch'ín Jesús kjuínchekitohe ch'án jína ijnko chojni chóna chinlepra
(Mt. 8.1-4; Mr. 1.40-45)*

¹² Kjuák'e ch'ín Jesús ijnko tí chjasin, ntá kui ijnko chojni níhi chóna chinlepra. A ntá tió k'uíkon ch'án tí ch'ín Jesús ntá kjuák'exín toch'in ch'án chronóhe ch'án jnkójina ntáchro ch'án kixin:

—Ìnchéni, tí tjínkávan jaha la jína chrókjuínchekitōhéni jína —ichro ch'án.

¹³ Ntá ch'ín Jesús kjuéntoá tja ch'án ntá kjuak'etja tja ch'án chrítaón tí sinníhi ntáchro ch'án kixin:

—Méxra xíkaha tjínkávan. Ntá jie sintakitōha jína —ichro ch'án.

Ntá xíkaha ichro ch'án ntá tí chinlepra tuénxín kjuìnhin tí sinníhi. ¹⁴ A ntá k'uetuēnhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsjánjuan tí nkehe tsík'etoan ch'ín Moisés ts'áyéhe Dios* kixin ntá tsonoexín kaín xín chojni kixin ó kuítóha jína —ichro ch'án.

¹⁵ Kjánchó antsí k'uíxikónohe sín nkexrí tí kjuaxroan kjuasin ch'ín Jesús, ntá nchónhya chojni k'uíxikóhchinehe sín ch'án kixin tsinhin sín nkehe tsjako ch'án, la ko tsitōexín sín jína tí chin chóna sín. ¹⁶ Kjánchó ch'ín Jesús la k'uaxrjenta ch'án tí kohya chojni la ntaha nixjeexín ch'án Dios.

*Ch'ín Jesús kjuínchekitohe ch'án jína ijnko ch'ín tsík'en toté
(Mt. 9.1-8; Mr. 2.1-12)*

¹⁷ A ntá ijnko yaon kjuák'ekjako ch'ín Jesús na ntá ntiha k'uejótjaxin iso sín fariseo la ko iso tí sín tjako tí ley, tsíkixín sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuènte Dios kjuakoxin ch'án kixin sinchekitohe ch'án chojni jína. ¹⁸ Ntá kui iso chojni tinkátsénkí sín ijnko ch'ín tsík'en tote tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án. ¹⁹ Kjánchó xitjahya ts'ixenhen sín kixin nchónhya chojni síxenhen nchia. Ntá k'uit'ótjen sín tí chrítaón nchia, ntá kjuakjìn sín iso teja la ko tí nta sít'ó ntá ntiha kjuinkajinxín sín tí ch'ín níhi tjenkáya kania ntoí tí tjen ch'ín Jesús. ²⁰ Na ntá tió k'uíkon ch'ín Jesús kixin imá tinkáchónki sín ch'án ntá nixjehe ch'án tí ch'ín níhi, ntáchro ch'án kixin:

—Jaha, ó kjuixin kjuìnhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjìn ijje kixin jehó Dios mé chóna kjuachaxin tsjatsen ijje chojni”, mé xíkaha kjuenkayáxin sín.

²² Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuènte kixin xíkaha tjenkayáxinrá? ²³ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìnhan ch'án tí ijje yámá ch'án, o

* 5:14 Levítico 14.4-8

á antsí xrahya chróntátjan ch'án kixin chrók'uínkatjen ch'án sáchrókjui ch'án? ²⁴ Méxra ijie tsjákoxian kixin tí Xjeen Dios K'óna Chojni mé chóna kjuachaxin ntihi chjasintajni tsjakjinhin ijie chojni —ichro ch'án.

Ntá k'uetuenhen ch'án tí ch'ín tsík'en tote ntáchro ch'án kixin:

—Jaha tétuanhan t'inkatjen tjatsíyan kaniãa la sátjia ntõa —ichro ch'án.

²⁵ Ntá tuénxín k'uínkatjen tí ch'ín tsík'en tote nkayakon kaín tí sín siín a la kuákja ch'án kaniëe ch'án k'uékjak'eták'á ch'án ntá sákjuí ch'án ntõe ch'án la kjuanchehe ch'án Dios kjuasáya. ²⁶ Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uikonni antsí má kjuaxroan jie —ichro sín.

Ch'ín Jesús k'uíyehë ch'án tí ch'ín Leví

(Mt. 9.9-13; Mr. 2.13-17)

²⁷ Ntá chr'éxin ntá ch'ín Jesús k'uaxrjexín ch'án nchia ntá k'uikon ch'án ijnko ch'ín nchekjènkj mé it'in ch'án Leví tjetjaxin ch'án tjech'e ch'án xra nkaxenhen tí nchia ntá sín tí xenkaxín chichaon a. Ntá ntáchro ch'án kixin:

—Chrèhé tí janhan —ichro ch'án.

²⁸ Ntá ch'ín Leví mé tuénxín k'uínkatjen ch'án la ntá kuítóhe ch'án kaín sín nkehe ntá chrèhë ch'án tí ch'ín Jesús.

²⁹ Ntá chr'éxin ch'ín Leví chóna ch'án ijnko kia jie ntõe ch'án kjuikosáyehe ch'án tí ch'ín Jesús. Kjaxin k'uéjõ itsjé tí sín nchekjènkj la ko itsjé í so chojni chóna jie k'uéjõtjaxinko sín tí ch'ín Jesús chjino tí mesa a. ³⁰ A ntá tí sín fariseo la ko tí sín maestro tjako tí ley la mé kjuankixin sín tjonta sín tí sín k'uájiko ch'ín Jesús ntáchro sín kixin:

—¿Nkekuènte ntekoará la ko t'ikoará tí sín nchekjènkj la ko tí sín chóna jie? —ichro sín.

³¹ A ntá kjuátëhe ch'ín Jesús ntáchro ch'án kixin:

—Tí chojni níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. ³² Janhan la k'uinkahya ntihi kixin chrók'uíyahã tí sín jína tjejó. Náhí. Janhan k'uinka kixin ts'íyahã tí sín chóna jie kixin chrókuítóhe sín tí ijie sín ntá chrókuinkí sín tí tjenkayáxin sín —ichro ch'án.

Tjanchankíhi sín tí ch'ín Jesús kixin á chrókjónehya sín tió tsonixjehë sín Dios

(Mt. 9.14-17; Mr. 2.18-22)

³³ A ntá kjuanchankíhi sín tí ch'ín Jesús kixin:

—¿Nkekuènte kixin tí sín k'uék'ajiko ch'ín Juan jnkoyaxón nehya sín na nixjehë sín Dios, la ko kjaxin xikaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

³⁴ Ntá kjuátëhe ch'ín Jesús kixin:

—¿Xá chrókjuachará chrókuétuenhenrá kaín tí sín tsík'íyehë sín tsíkóchjina tí tjejó tí sín tsíkótehe kixin chrókjónehya sín tí naxã tjejóko sín tí ch'ín tsíkótehe? ³⁵ Kjánchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ávã sín la í sinehya sín —ichro ch'án.

³⁶ Kjaxin kjuíncheyóexin ch'án ntáchro ch'án kixin:

—Ninkexró chrókuaté ijnko camisa nixin ntá chrókjuak'eniehe ijnko camisa ntaxin kixin xikaha chrókjuich'e sín ntá chrók'uitjáyán tí camisa nixin la ko kjaxin tí t'õ ka k'uaxrjexín tí camisa nixin tsoyóehya tí camisa ntaxin. ³⁷ Kjaxin chrókuíkiãhyará xranvino nixin ijnko tjuaxran ntaxin kixin tí xikaha chrókjuich'erá la chrók'uiichje tí tjuaxran ntaxin ntá chrók'uitjáyán tí xran la ko chrók'uitjáyán tí tjuaxran. ³⁸ A ntá tí xranvino nixin chrókuikia ijnko tjuaxran nixin kixin yóí la chrók'uitjáyánhya. ³⁹ La ko kjaxin ninkexró tió tsík'i tí xran ntaxin naxã chrókóxrjínhin chrók'ui xran nixin. Náhí. Tsontáchro ch'án kixin íchá jína tí xran ntaxin, tsixro ch'án —mé xikaha ichro ch'ín Jesús.

6

Tí sín k'uájiko ch'ín Jesús mé k'uín sín iso noatrigo ijnko yaon t'ok'éhe tí sín israelita (Mt. 12.1-8; Mr. 2.23-28)

¹ Ijnko yaon t'ok'éhe sín la ch'ín Jesús k'uaátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankíxin sín nkaya tja sín ó k'óntajinyá sín tí noa ntá kjóne sín. ² Ntá iso tí sín fariseo kjuanchankí sín kíxin:

—¿Nkekuènte kíxin tjejoch'erá xra jie? La mé kohya kjuachaxin tsonhen xra tí yaon t'ok'éheni —ichro sín.

³ Ntá kjuátehe ch'ín Jesús kíxin:

—¿Jahará á kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? ⁴ Na mé jehe ch'án mé k'uíxenhén ch'án ntøe Dios la kjóne ch'án tí niotja tsíkóyaon, la ko kjaxin chjéhe ch'án tí niotja tí sín k'uájiko ch'án kjónté jehó siín kjuachaxin sine tí sín nchat'á* —ichro ch'ín Jesús.

⁵ Kjaxin ntáchro ch'án kíxin:

—A ntá tí Xjeen Dios K'óna Chojni mé chóna kjuachaxin ts'etøan nkexrí tsonhen tí yaon t'ok'éheni —ichro ch'án.

Ch'ín Jesús kjuínchekitohe jína ijnko ch'ín tsíxámá tja (Mt. 12.9-14; Mr. 3.1-6)

⁶ A ntá í jnko yaon t'ok'éhe chojni ntá k'uíxenhén ch'ín Jesús ijnko njnko Israel la ntá kjuankíxin kjuako ch'án. A ntá ntaha kjuák'e ijnko ch'ín tsíxámá tja ch'án chjina. ⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'ueka sín ch'án jie. ⁸ Kjánchó jehe ch'án ó nohe ch'án nkehe tjenkayáxin asén sín ntá nixjehe ch'án tí ch'ín tsíxámá tja ntáchro ch'án kíxin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tote ch'án. ⁹ Ntá nixjehe ch'ín Jesús tí í so sín ntáchro ch'án kíxin:

—Tsjánchánkíhára ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuínchekitøheni chojni jína ní o á chrók'óyánni chojni? —ichro ch'án.

¹⁰ Ntá ch'ín Jesús komá ch'án kaín tí chojni siín ntiha ntá nixjehe ch'án tí ch'ín níhi ntáchro ch'án kíxin:

—Tjéntoá tjá —ichro ch'án.

A ntá tí ch'ín a xikaha kjuích'e ch'án ntá kuítóhe tja ch'án jína. ¹¹ Kjánchó tí sín fariseo tjejó mé kónínkaon sín mé ntá kjo sín kíchó sín kíxin tjínkaon sín chrók'óyán sín tí ch'ín Jesús.

Ch'ín Jesús kjueyá ch'án tí teyó sín ts'ajiko ch'án (Mt. 10.1-4; Mr. 3.13-19)

¹² A ntá ijnko yaon ch'ín Jesús sákjui ch'án ijnko jna kíxin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios. ¹³ A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kíxin ts'óna sín apóstol ts'ajiko sín ch'án. ¹⁴ A ntá tí sín í mé xikihi it'in sín. Na mé ch'ín Simón la ntá ch'ín Jesús kjuínchek'in ihnié ch'án Pedro kjaxin; la ko kíchó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, ¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista; ¹⁶ la ko ch'ín Judas la kíchó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

* 6:4 6.3-4 1 Samuel 21.6; Levítico 24.5-9

Ch'ín Jesús kjuakohe ch'an nchónhya chojni
(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxin sín tí jna ntá k'uéjó sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixin nkuixin estado Judea la ko chjasin Jerusalén la ko tí chrínta ntayaon tí síin tí chjasin Tiro la ko tí chjasin Sidón. Ó kjui sín kixin tsinhin sín tí nkehe tsjako ch'ín Jesús la ko tsitohe sín jína. ¹⁸ A ntá tí sín kjuaxróxinhya k'uéjó k'uéchónta sín nchakuen jínahya na mé kuitohe sín jína kjaxin. ¹⁹ Kaín chojni tjinkaon chrókuákóxin sín tí ch'ín Jesús kixin kjuínchekitohe ch'án jína kaín xín chojni kixin jehe ch'án chóntha ch'án kjuachaxin jié.

Tí kjuachéhe la ko tí kjuaxróxinhya
(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejorá jahará nõará kixin chontará kjuachaxiën Dios.

²¹ 'Náxrjón tjejorá jahará t'énxinrá kjinta ijie kixin chr'éxin sinterá jína.

'Náxrjón tjejorá jahará tsjankará ijie kixin chr'éxin tsjanorá.

²² 'Náxrjón tjejorá jahará nínkakonhanrá chojni la ko ts'inkítíará sín sátsjirá ókjé, la ko t'ántaxínhanrá sín la ko t'ákjenxin sín ihniará éxi ijnko nkehe jínahya kixin tinkachónkirá tí Xjeen Dios K'óna Chojni. ²³ Tsocháhará má la ko imá tsochontará kjuachéhe tí yaon a kixin ts'ayéhérá nkehe kuènte nkaya nkajní. A ntá xikaha tí t'áchrii tí sín jínahya ch'e la mé ósé kjuate sín tí sín k'uéchronka itén Dios.

²⁴ 'A ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

²⁵ 'A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

'A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsot-sjankará.

²⁶ 'Kjuaxróxinhya ts'ejorá tió kaín chojni tsjikosáyahará sín kixin xikaha tí t'áchrii sín kjuikosáyehe tí sín ntoáhya k'uéchronka itén Dios ósé.

Tsotjuèheni tí sín nínkakonhenni
(Mt. 5.38-48; 7.12)

²⁷ 'A ntá jahará tjejotinhínrá mé tjéxrjanka kixin chrótjuèhérá tí sín nínkakonhanrá la ko jína chrókuínkĩsará tí sín tjinkakonhya tí jahará. ²⁸ Jína nixjehérá tí sín t'ántaxínhanrá la ko tjanchehérá Dios kixin tsjinkĩtsa ch'án tí sín chónkíhará sín. ²⁹ Tí chjéhe ijnko nkexro ijnko tuānará chrókjóka tí í jnko nánko kixin chróchjéhe sín tíha kjaxin. La ko tí síin ijnko nkexro tjinkaon sín tsakitsjaha sín tí chamara tjín t'inkayate na mé títóhé kixin kjaxin sátsjiko sín camisá kjaxin. ³⁰ Tí jnkojín nkexro tjanchaha nkehe chonta la chjéhe sín. A ntá tí tsakja sín nkehe kuéntá la tjanchehya sín kixin naxa ts'ókjanhan sín. ³¹ Méxra chrókuikosáyehérá kíchuará éxi yóhe nkexrí tjinkáonrá chrókuikosáyahará tí jehe sín kjaxin.

³² 'Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjónté tí sín jínahya tjasin jie la xikaha ch'e sín. ³³ A ntá tí tjikosáyehérá jehó tí sín tjikosáyahará la kohya ninkehó tsjachahyará xikaha. Kjónté tí sín jínahya tjasin jie mé kjaxin xikaha ch'e sín. ³⁴ La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjónté tí sín jínahya tjasin jie xikaha ch'e sín nchekjen kíchó sín chichaon la ko chónhen sín kixin tsokjan tí chichakoen sín inaá. ³⁵ Kjánchó jahará chrótjuèhérá tí sín nínkakonhanrá la ko jína chrókuich'eherá sín xra la ko chrókuínchekjenrá sín chichaon la chróchoénhyará kixin chrókjan tí chichakonanrá inaá. Mé xikaha chrókuich'era la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya

la ko tí sín jínahya. ³⁶ Chrókuikonóehérá kichuárá éxí yóhe It'ará nkaya nkajní tikonóehé ch'án chojni.

*Chrók'uántaxíenhyani kichó ni
(Mt. 7.1-5)*

³⁷ 'Chrókuékahyará jié ókjé chojni kixin ntá Dios chrókjuanchahya ch'án jié tí jahará. Chrókuétuanhyará kixin chrókjuasóte í jnko chojni kixin Dios kjaxin chrókjuinчекjasótiahýará ch'án tí jahará. Chrók'uitjáyánhanrá ichrén jié kjuasínhanrá í jnko chojni kixin ntá Dios chrókjuinчек'itjáyánhanrá ch'án tí jié kjuásínrá. ³⁸ Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjón ch'án, icha tsík'enka ch'án kixin tsík'ótsjéyehe ch'án tí nkehe tsíkjachroyá ch'án tjetóxin tsjanjón ch'án. Dios tsotjáhará xíkaha yóhe éxí tsíchjehérá í so chojni.

³⁹ Ntá kjuíncheyóexin ch'ín Jesús ntáchro ch'án kixin:

—¿Xá á chrókójína ijnko chojni t'ikonhya chrókjuiko í jnko chojni t'ikonhya? Tí xíkaha la yóí sín chrók'uanótjenyá sín ichrén tòye. ⁴⁰ Ijnko nkexro xrakohe la noehya éxí tí nkexro tjako. Kjánchó tió tsjixin tsoxrakohe ch'án ntá tsonohé ch'án éxí nohe tí nkexro kjuakohe ch'án.

⁴¹ ¿A ntá nkekuènté tsjehé tí chjínínó ntsí tjenkánkí ikon tí kichuá, tí naxa ántosán tí nta jié tjenkánkí ikuan? ⁴² ¿Mé xíkaha nkexrí kixin chróntáche kichuá kixin chrókuítóhe ch'án kixin chrókuakitsjenkíhí ch'án tí chjínínó ntsí tjenkánkí ikon ch'án tí naxa ántosán tí nta jié tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jié tjenkánkí ikuan kixin ntá chrók'uikuan chrókuakitsjenkiá chjínínó ntsí tjenkánkí ikon tí kichuá.

*Tí nta mé tjatsoanxínni tí to tsík'óna
(Mt. 7.17-20; 12.34-35)*

⁴³ 'Kohya nta jína chrók'óna to jínahya, la ko kjaxin kohya nta jínahya chrók'óna to jína. ⁴⁴ Jnkojnko tí nta mé tjatsoanxínni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva. ⁴⁵ Ijnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxí tjenkayáxin asén mé xíkaha nixja ir'va.

*Ch'ín Jesús kjuíncheyóexin éxí yaá nkexro kjuích'éna nchia
(Mt. 7.24-27)*

⁴⁶ ¿Nkekuènte ntáchrórá kixin janhan Inchárá, la ntá tahýará kuenté tí nkehe tétuanhanrá? ⁴⁷ Méxra káin tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. ⁴⁸ Na mé jehe sín tóyóhe ijnko nkexro kjuích'éna nchia la senó k'óxraya ch'án tòye ninka kixin ntá sich'éna ch'án nchia chrítaón tí tjo a. A ntá tió k'uánkí tí ntario la ikui tí ntá k'uúntate tí nchia, kjónté xíkaha la k'uátjoákohya la ní kuínkíhya tí nchia a kixin jína tsík'óna chrítaón tjo tjejen. ⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntario la ikui tí ntá k'uúntate tí nchia la ntá k'uátjoáko ntá tí nchia la ntá kuenté tí nchia la k'uújtáyan —mé ichro ch'ín Jesús.

7

*Ch'ín Jesús kjuínchekítóhe jína ijnko ch'ín ch'ehe ijnko soldado romano xra
(Mt. 8.5-13)*

¹ Ntá ch'ín Jesús kjuixin nixjehé ch'án tí chojni a ntá sákjuí ch'án chjasin Capernaum. ² Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jié níhi tí ch'ín a tjet'en ch'án. ³ A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjijitsjehe sín tí ch'ín

Jesús tsochronóehē sín ch'án kixin chrókjuiji ch'án chrókjuinchekitohe ch'án jina tí ch'ín ch'ehe ch'án xra. ⁴ Ntá kjuíji sín kóchjinehe sín tí ch'ín Jesús kjuankixin chrónóehē sín ch'án ntáchro sín kixin:

—Imá jina tí ch'ín capitán la mé tjinkaon ch'án chrókjuinkitsa ch'án ⁵ kixin tjuèhe ch'án tí nación kuènteni la ko jehe ch'án kjuínkitsa ch'án la ko k'uetōan kixin ts'óna ijnko n̄nko kuènteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuēnhen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jina la ko chrókósuèhē kixin chrók'uixenhén ntōe ch'án. ⁷ Mé xikaha chrókósuèhē ch'án chrókjuiji ch'án chrókjueyá ch'án tí jaha. Méxra tí kjuachaxin chrónixja ó chrókuitōexín jina tí ch'ín ch'ehe ch'án xra. ⁸ Kixin jehe ch'án kjaxin t'ítuēnhen ch'án la ko kjaxin chóna ch'án soldado t'etūēnhen ch'án inaá. Tió t'etūēnhen ch'án ijnko sín kixin sátsji la mé sátsji la ko tió t'etūēnhen ch'án í jnko sín kixin xrákoa la mé xrákoa la ko tió t'etūēnhen ch'án í jnko sín kixin sich'e ijnko xra la mé nchexiteyá ch'án —mé xikaha ichro tí sín kui.

⁹ Ntá ó kuínhin ch'ín Jesús xikaha ntá chrakon ch'án kixin xikaha tjenkayáxin tí ch'ín a, a ntá nkátjá ch'án komá ch'án tí chojni chréhe ntáchro ch'án kixin:

—Ntáxrjan kixin naxa k'úitjahya nijnko nkexro israelita xikaha tinkáchónki éxí tí ch'ín i —ichro ch'án.

¹⁰ A ntá ó kjan nchia tí sín tsík'ítuēnhen la ó k'uíkon sín kixin ó tsíkitohe jina tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxin ntá sákjui ch'ín Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni. ¹² Tió kjuíjichjina sín tí chjasin a la k'uíkon sín nchónhya chojni sákjuíkjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuíkotoxin sín tjan. ¹³ Ntá tió k'uíkon Inchéni tí tjan a ntá kujkonóehē ch'án tjan ntáchro ch'án kixin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénkí tí nkexro tsík'en la kjuak'etja tja ch'án tí nkehe tinkátsénkía sín tí ch'ín tsík'en. A ntá tí sín kuámá nta k'uéjóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuānhan t'àya —ichro ch'án.

¹⁵ Ntá tí ch'ín tsík'en tuénxín kjuák'etjaxin ch'án la ko kjuankixin nixja ch'án. Ntá ch'ín Jesús kjuínchek'áyehē ch'án iné tí ch'ín ntasoá la sákjuíko. ¹⁶ A ntá tió k'uíkon sín xikaha kónhen la kaín sín imá chrakon sín la ko kjuankixin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etōan chrónka itén Dios ts'ejókoni —ichro sín.

Kjaxin ntáchro sín kixin:

—Ó kui Dios tsjinkitsa ch'án chjasén ch'án —ichro sín.

¹⁷ A ntá nkuíxín estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehē ch'án iyó tí sín k'uájiko ch'án ¹⁹ k'uetuēnhen ch'án sín sátsjitsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi o á tsochónhen sín í jnko nkexro, tsixro sín. ²⁰ A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kixin:

—Ch'ín Juan Bautista k'uetōan ch'án kuini tsikjanchankíhani kixin á jaha tí nkexro tsi n̄ o á tsochónhenni í jnko nkexro —ichro sín.

21 A ntá tí yaon kjuíji sín na mé ch'ín Jesús kjuínchekitohe ch'án itsjé chojni jína la mé kjuatsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'ikon ch'án itsjé chojni t'ikonhya. 22 A ntá kjuátehe ch'ín Jesús ntáchro ch'án kixin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kixin tí sín k'uíkonhya la ó t'ikon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuítóhe sín jína, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxraçohe sín tí tan jína tsaáxin sín. 23 Ntá náxrjón tjen tí nkexro kohya nkehe t'inkákonhen tí tinkáchónki sín tí janhan —mé ichro ch'án.

24 Tió sátsíkji tí sín ichr'án ch'ín Juan ntá kjuankixin nixjehe ch'ín Jesús tí sín k'uéjé ntiha kixin nkexrí tjen ch'ín Juan ntáchro ch'án kixin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrínto? 25 Tí náhí, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la ko chóna kaín nkehe náxrjón la mé ntøe rey tjejó sín. 26 ¿A ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xrjanka kixin chaxín xíkaha jehe ch'án na mé antsí t'etøan ch'án la ntá tí sín k'uéchrónka itén Dios ósé la kánhyó. 27 Ch'ín Juan mé tí nkexro kui éxí chrónka tí xroon itén Dios ósé ntáchro kixin:

Janhan mé tsochr'an ijnko nkexro tsochrónka itan kuèntana tsitónxin ntja, kixin tsjasiyóxin ch'án ntja kuénta.*

Mé xíkaha chrónka tí xroon itén Dios. 28 Ntá ijnko nkehe chaxín tsotjonkará kixin kaín tí nkexro k'uéjé senó k'uéchrónka itén Dios la kánhyó tjetøan sín la antsí tjetøan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxièn Dios nkaya nkajní la antsí tjetøan sín a ntá jehe ch'ín Juan la kánhyó —ichro ch'ín Jesús.

29 A ntá tió kuínhin sín tíhi la ntá kaín tí chojni la ko tí sín nchekjènkí tsíkikite ch'ín Juan la ó kjuátsøan sín kixin Dios la jína ch'án. 30 Kjánchó tí sín fariseo la ko tí maestro tjako tí ley tsíkikitehya ch'ín Juan la mé tjinkakonhya sín tí nkehe tjinkaon Dios chrókjuinkitsa tí jehe sín. 31 Ntá ntáchro Ìnchéni kixin:

—¿Nkexrí chrókjuintayóaxian tí chojni tjejó jie? ¿Nkehe chrókóyóhe sín? 32 Tóyóhe sín tí chánjan tjejótxaxin sín tí ntasin tsítán sín la t'íyehé kichó sín ntáchro sín kixin: “Kjuínchentáchroni flauta la tēhyará la ko tsjeni isón kuènte chojni tsík'en la tsjankahyará.” 33 Kixin ó kui ch'ín Juan Bautista la kjónehya ch'án niotja la ko k'uíhya ch'án vino la ntá jahará ntáchrórá kixin ijnko nchakuen tí jínahya chóna ch'án. 34 A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntáchrórá kixin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkí. 35 A ntá tí xjeen Dios mé tjakoxin sín kaín tí nkehe tjinkaon Dios.

Ch'ín Jesús mé kjuák'e ch'án ntøe ijnko ch'ín fariseo it'in Simón

36 Ijnko ch'ín fariseo mé chronóehé ch'án tí ch'ín Jesús kixin tsjiji ch'án ntøe ch'án sineko sín ch'án. Ntá sákjui ch'án ntøe tí ch'ín a, a ntá ntiha kjuák'etjaxin ch'án tí tjen mesa. 37 A ntá itjen ijnko tjan nchónhya jie chóna tjan. Itjen tjan tí chjasin ntiha la ntá kónohe tjan kixin tsíkji ch'ín Jesús ntøe tí ch'ín fariseo la ko ntaha sineko sín ch'án. Ntá kui tjan ntiha kuíkao tjan ijnko xro tjeté tsíkaón aceite xraxé náxrjón. 38 Ntá tsjanka tjan kóchjina tjan toté ch'ín Jesús ntá ntakon tjan kjuátanxín toté ch'án la ko kaxihi tjan kjuínchexámáxin tjan toté ch'án la ko kjóneko kochíto toté ch'án la ko kjuíncheka tjan toté ch'án tí aceite xraxé náxrjón. 39 A ntá tió k'uíkon tí ch'ín fariseo tsík'íyehé tí ch'ín Jesús ntá kjo ch'án asén ch'án kixin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetákóxin ch'án kixin ijnko tjan jínahya tíha”, ichro ch'án. 40 Ntá ch'ín Jesús ntáche ch'án tí ch'ín fariseo kixin:

* 7:27 Malaquías 3.1

—Simón, janhan chonta ijnko nkehe tsonixjaha —ichro ch'án.

Ntá kjuátehe tí ch'ín fariseo ntáchro ch'án kixin:

—Chronka, Maestro —ichro ch'án.

⁴¹ Ntá ntáchro ch'ín Jesús kixin:

—K'uéjó yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario. ⁴² A ntá kjuachahya sín k'ókjenhen sín tí chichaon tí ch'ín síkéhe sín ntá kuikonóehē ch'án sín ntá k'óxíka ch'án tí cuenta síká yóí sín. A ntá jie chronka jaha kixin nkexro tí yóí sín antsí chrótjuēhe tí nkexro kuikonóehē ch'án —ichro ch'ín Jesús.

⁴³ Ntá kjuátehe tí ch'ín Simón ntáchro ch'án kixin:

—Janhan ntáxrjan tí nkexro kuikonóehē má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'ikuan tí tjan a ní? Janhan na mé k'uixanhan ntoa la ntá jaha la kjuánjonhya nta chrók'ontia totená. Kjánchó jehe tjan ti ntakon tjan kjuínchek'ontixín tjan totená la ko kaxihi tjan kjuínchexámáxin tjan. ⁴⁵ A ntá jaha la kjóntekoahyana kochíto. Kjánchó jehe tjan naxa kuitóehya tjan neko kochíto totená. ⁴⁶ Jaha la kuíkítexinhya aceite kja. A ntá jehe tjan kuíkíte tjan aceite xraxé náxrjón totená. ⁴⁷ Mé xíkaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuínhin tjan. A ntá ijnko nkexro kjuínhin intsíkoá jie la mé xíkaha intsíkoá tjakoxin kixin tjuana sín —ichro ch'án.

⁴⁸ Ntá nixjehe ch'án tí tjan a ntáchro ch'án kixin:

—Ó kjuínhan tí jie chonta —ichro ch'án.

⁴⁹ A ntá kaín tí sín tsíkóchjina sín k'uéjótjaxin sín tí tjan ch'án mé kjuankixin kjo sín kichó sín ntáchro sín kixin:

—¿Xá nkexro tíhi kixin tjakjínhin ch'án ijie chojni?

⁵⁰ A ntá ch'ín Jesús ntáche ch'án tí tjan a kixin:

—Ó kuaá jaha kixin kuítekávan tí janhan. A ntá jie kjuaxróxin sátsjia ntoa —ichro ch'án.

8

Iso chojni chjin kjuínkítsa tí xra kjuích'e ch'ín Jesús

¹ A ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsínsí kjuako ch'án la ko chrónka ch'án tí tan jina kixin nkexrí tí kjuachaxin t'etōan Dios. A ntá tí teyó sín mé k'uájiko ch'án. ² Kjaxin chréhe iso chojni chjin tsíkjinchekitōhe ch'án jina tsíkakitsje ch'án tí nchakuen tí jínahya k'uéchónta sín la ko tsíkjatsen ch'án tí chin k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchónta tjan, ³ la ko í jnko tjan it'in tjan Juana ne mé xì mé it'in ch'án Chuza. Jehe ch'án mé ch'ehe ch'án xra tí ch'ín Herodes t'etōan ch'án, la ko í jnko tjan mé it'in tjan Susana, la ko itsjé í so sín k'uéjó sín. A ntá kaín sín kjuanjon sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexin ch'án éxí ijnko ch'ín k'uēnkā nonte

(Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntiha. A ntá ch'ín Jesús kjuíncheyóexin ch'án ntáchro ch'án kixin:

⁵ —Éxí ijnko ch'ín sákjuík'enkā noatrigo nontēe ch'án. Mé xíkaha sákjuí ch'án ik'ue ch'án tí noatrigo a. Ntá iso noa la k'uanótjen chrínta ntja ntá nkaxénjin chojni tí noa a la ko kjaxin tí koxroxē k'uínkā va. ⁶ A ntá í so la k'uitji chrík'á xro ntá k'uayan la xamá kixin kánhyó síin tjo. ⁷ A ntá í so la kjuítsínkák'á kach'í ntá k'uánkí kach'í la ntá í xitjahya

k'uánkí tí no a ḱixin tsíkjate tí kach'i. ⁸ A ntá í so la mé tsík'itjí nche jína. A ntá tió k'uánkí la k'óna jína la mé jnkojnko noatje k'óna ciento neno noa —mé xikaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án ḱixin:

—Tí tjinkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuènte kjuíncheyóexin ch'án

(Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án ḱixin nkexrí t'axrjexín tí nkehe kjuíncheyóexin ch'án. ¹⁰ Ntá ntáchro ch'án ḱixin:

—Dios mé tsjinkítsa ḱixin tsonohará tí nkehe noehya í so chojni nkexrí t'etōan Dios. Kjánchó tí í so sín tjákoḥa sín kjuíntayóaxoán ḱixin ntá k'uíkon sín la kjónté tsjatsōanhya sín la ko kuínhin sín na kjónté naxa tienxínhya sín.

Ch'ín Jesús chronkaxín nkexrí t'axrjexín tí ch'ín k'uenka nonte

(Mt. 13.18-23; Mr. 4.13-20)

¹¹ Ntá tsoxrjanka nkexrí t'axrjexín tí nkehe kjuíntayóaxoán. Tí noatje mé tí itén Dios. ¹² A ntá tí noa k'uanótjen chrínta ntia la mé tóyóḥe tí sín kuínhin tí tan a. A ntá ó kui ch'ín Tsochren ntá kjuínchek'itjayan ch'án kaín tí itén Dios kuínhin sín chrókuaáxin sín ḱixin ntá chrókuitekakonhya sín tí nkehe chrókuaáxin sín. ¹³ A ntá tí noa kjuítsínkak'á xro la éxí yóḥe tí chojni kuínhin itén Dios la tjoka kóxrjínḥin sín kuínkáchónki sín. Na ntá itsi tí kjuaxróxinhya, a ntá tsítóḥe sín tí itén Dios kuínhin sín ḱixin naxa nínkahya chónṭa nuèe. ¹⁴ A ntá tí noa kjuítsínkak'á kach'i na mé éxí yóḥe ijnko chojni kuínhin tí tan jína kjánchó tjitoxienhya ntje sín ḱixin tóxakonhen sín tí xra chónṭa sín la ko tjinkaon sín tsochónṭa sín itsjé nkehe la ko kaín tí nkehe tóxrjínḥin sín mé t'inkákonḥen ḱixin xikaha la xitjahya sich'ehe sín xra Dios. ¹⁵ A ntá tí noa k'uínka nonte jína na mé éxí yóḥe tí chojni kuínhin tí itén Dios a ntá kaín asén sín kuítekaon sín la ntá kuítóehya sín tí tan, a ntá xikaha la jína ch'ehe sín Dios xra.

Ch'ín Jesús mé kjuíncheyóexin éxí ijnko xrohi tjeche

(Mr. 4.21-25)

¹⁶ Nijnko nkexro chrókjuínchek'ákjen xrohi chrókjuak'ema nkaxenhen chí o chrókjuak'ema chrínkí cama. Náhí. Noi chrókjuak'e xrohi ḱixin ntá tí sín ts'ixenhen nchia ts'ikónxín sín tí t'inkaséyan. ¹⁷ Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin ḱixin kaín nkehe la tsonoxín ti xrohi a. ¹⁸ A ntá chrókuinhínrá jína ḱixin tí tjen ijnko nkexro chónṭa nkehe la mé ts'áyéḥe ch'án má. A ntá tí nkexro chónṭahya nkehe la mé ts'axrjehe ch'án kjónté tí nkehe ntsí tónhen ch'án ḱixin chónṭa ch'án.

Tí iné la ko tí kichó ch'ín Jesús

(Mt. 12.46-50; Mr. 3.31-35)

¹⁹ A ntá kjuíji iné la ko kichó ch'ín Jesús tí tjen ch'án. Ntá xitjahya tsochjinehe sín ch'án ḱixin nchónhya chojni síín. ²⁰ A ntá ijnko sín ntiha tsíkjichenka ch'ín Jesús ḱixin:

—Iná la ko kichuá tjejó sín ntója la tjinkaon sín chrók'uikon sín tí jaha —ichro sín.

²¹ Kjánchó kjuáteḥe ch'án ntáchro ch'án ḱixin:

—Tí sín tinhin itén Dios la ko titekaon sín na mé t'íkuan tí jehe sín éxí naná la ko kichiná —ichro ch'án.

Ch'ín Jesús k'uetuenhen tí xrínto la ko tí ntq ḱixin ts'ixita

(Mt. 8.23-27; Mr. 4.35-41)

²² Ntá ijnko yaon k'uixenhen ch'ín Jesús ijnko ntabarco la koí tí sín k'uájiko ch'án. Ntá ntáchro ch'án ḱixin:

—Sátsjini tóḥe ntayaon —ichro ch'án.

Ntá sákjuí sín. ²³ Ntá nachrohe tjejó'tatòye sín a ntá ch'ín Jesús mé kjuák'ejua ch'án. A ntá xrínahya tjan chjéhe xrínto chrítaón ntá ntá xranḱixin sítikia ntá tí ntabarco ntá

chrakon sín kixin ts'aniankí ntá tí ntabárcō. ²⁴ Ntá kjuínchekjayehe sín tí ch'ín Jesús, ntáchro sín kixin:

—Maestro, Maestro. Tjejót'aniankíni ntá —ichro sín.

Ntá ch'ín Jesús k'uàya ch'án ntá k'uētuenhen ch'án tí xr̄ntō la ko tí ntá kixin ts'ixita, a ntá náxrjón k'uixita tí ntá la ko tí xr̄ntō. ²⁵ Ntá ntáche ch'án tí sín k'uájiko ch'án kixin:

—¿Á naxa tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

—¿Xá nkexro tíhi kixin t'ētuenhen ch'án xr̄ntō la ko tí ntá la titekakonhen ch'án?

Ijnko ch'ín nonte Gadara chóna nchakuen tí jínahya

(Mt. 8.28-34; Mr. 5.1-20)

²⁶ Ntá kjuíji sín tí nonte Gadara, na mé tóhe ntayaon ntoí chók'èxin estado Galilea.

²⁷ Ntá k'uínkajinxin ch'ín Jesús tí ntabárcō ntá kóchjina injko ch'ín chjasin ntiha. Ntá ó má sé chóna ch'án nchakuen tí jínahya. Na ntá ni ké ch'án t'inkáyahya ch'án, la ko jehya ntōe ch'án k'uékjak'e ch'án na mé tjen ch'án tí panteón. ²⁸ Tió k'uíkon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'óyako ch'án ntáchro ch'án kixin:

—¿Nkekuènte tjiaté tí jeheni, jaha Jesús Xjeen Dios itjen nkaya nkajní? Chronóahani nchekjasótehyani —ichro ch'án.

²⁹ Xikaha ntáchro ch'án kixin ch'ín Jesús tsík'ētuenhen tí nchakuen tí jínahya kixin ts'axrjexín tí jehe ch'án. Nchónhya veces tí nchakuen tí jínahya k'uék'ētuenhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsíkóntetoxín ch'án kixin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án kixin nchakuen tí jínahya tjinkaon sáchrókjuíko ch'án nteje. ³⁰ Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xikaha kixin nchónhya nchakuen tí jínahya chóna ch'án. ³¹ A ntá kaín tí nchakuen tí jínahya chronóehe tí ch'ín Jesús kixin chrók'uetoanhya ch'án kixin chrókjuítsínkayá tí tòye ninka. ³² A ntá ntiha tí jnā síin nchónhya cochíno xrine va. A ntá tí nchakuen tí jínahya chronóehe tí ch'ín Jesús kixin chrókjuanjon ch'án kjuachaxin chrók'uixenhen tí cochíno a. A ntá kjuanjon ch'án kjuachaxin. ³³ A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochíno a. A ntá kaín tí cochíno kuinká va sákjuí va nó nkaya tsaka k'uánótjenkí va ntá kjuínhin va ntá.

³⁴ A ntá tí sín sít'ayakonhen tí cochíno k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho. ³⁵ A ntá tí chojni k'uaxrjexín sín chjasin sákjuítsjehe sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjaxin ch'án chrínkí toté tí ch'ín Jesús, ó tsík'inkáya ch'án iké ch'án kixin ó jina tjen ch'án, a ntá chrakon sín tí k'uíkon sín xikaha. ³⁶ A ntá tí jehe sín tsík'ikon sín kixin xikaha kónhen la chrónka sín kixin nkexrí kuítóhe jina tí ch'ín k'uéchóna tí nchakuen tí jínahya. ³⁷ A ntá kaín tí chojni chjasin Gadara kjuankixin chronóehe sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'uít'ótjen ch'án tí ntabárcō sákjuíxin ch'án ntiha. ³⁸ A ntá tí ch'ín tsík'axrjexín tí nchakuen tí jínahya chronóehe ch'án tí ch'ín Jesús kixin á chrókjuanjonhya ch'án kjuachaxin sáchrókjuí ch'án koí ch'án. Kjánchó ch'ín Jesús k'uētuenhen ch'án kixin tsitōhe ch'án ntáchro ch'án kixin:

³⁹ —Titōha satjia ntōa la ko chrónka nkexrí ti kjuachaxin jié kuènte Dios kuítóaxián jina jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin injko kjuaxroan jié kjuích'e ch'ín Jesús kjuínchekitōhe ch'án jina.

*Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Mr. 5.21-43)*

⁴⁰ Tió ch'ín Jesús kjan ch'án tí í jnko chrínta ntə ntá nchónhya chojni siín ntiha la chéhe sín kjuíji ch'án ntiha, kixin kaín sín tjejóchónhen sín ch'án. ⁴¹ Ntá kui ijnko ch'ín it'in Jairo na mé ijnko ch'ín t'etəan kuènte nínko. A ntá kjuák'exín toch'in ch'án tote tí ch'ín Jesús chronóehə ch'án kixin sáchrókjui ch'ín Jesús ntəe ch'án ⁴² kixin chóntha ch'án jnkokoáxón xjeen ch'án chjin chóntha teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uíxitja kichó sín.

⁴³ Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóntha tjan teyó nánó titəehya tjan jína. A ntá kaín nkehe k'uéchóntha tjan kjuenkehe tjan tí sín ch'e xroan la ko nijnko sín kjuachahya sín kjuínchekitohe sín tjan jína. ⁴⁴ A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

⁴⁵ Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin ninkexró, ichro sín. A ntá ch'ín Pedro la ko tí sín k'uéjoko ch'án ntáchro sín kixin:

—Maestro, nchónhya chojni siín la ko tótéka sín la ntáhi ntáha, ¿ntá nkekuènte kixin naxə tjanchankiá kixin nkexro tí kuákóxian? —ichro sín.

⁴⁶ Kjánchó ntáchro ch'ín Jesús kixin:

—Jnkójín nkexro kuákóxinna kixin kónòna kixin kjuachaxin kuèntəná kuítəexín ijnko chojni jína —ichro ch'án.

⁴⁷ A ntá tió k'uikon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínkí toté tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxin tjan iké ch'án la ko nkexrí kuítəexín tjan jína xikaha.

⁴⁸ Ntá ntáchro ch'án kixin:

—Jaha, xjeenni, ó kuítəha jína kixin kuítekáván tí janhan. Kjuaxróxin sətjia —ichro ch'án.

⁴⁹ Naxə tjejójtjo sín ntiha ntá xrínahya ikui ijnko nkexro kjuixín ntəe tí ch'ín t'etəan kuènte nínko, a ntá chénka ch'án tí ch'ín t'etəan kixin:

—Xjaan na mé ó kjuixin k'uén. Áxri í chjeéhya xra tí maestro —ichro ch'án.

⁵⁰ A ntá tió kuínhin ch'ín Jesús la kjuátehe ch'án ntáchro ch'án kixin:

—Chrakonhya. Títekáván tí janhan la tsitəhe xjaan jína —ichro ch'án. A ntá sákjuí sín.

⁵¹ A ntá tí kjuíjik'ixenhen sín nchia ntá kuítəehya ch'ín Jesús kixin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjin chrók'uixenhen sín tí tjen tí xjan a. ⁵² Kaín tí sín tjejó ntaha tsjánkəmə sín tí xjan a. Kjánchó jehe ch'án ntáchro ch'án kixin:

—Tsjan kahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá sín ch'án kixin jehe sín la ó nohe sín kixin tsík'en xjan. ⁵⁴ A ntá jehe ch'án itsé ch'án tja xjan ntá itsen k'uíyehə ch'án tí xjan ntáchro ch'án kixin:

—Tjarisoá, t'əya —ichro ch'án.

⁵⁵ Ntá kjan asén tjan ntá tuénxín k'uínkatjen tjan. Ntá k'uətoan ch'ín Jesús kixin tsjanjon sín nkehe sine tjan. ⁵⁶ Ntá it'é la ko iné xjan la chrakon sín. A ntá ch'ín Jesús k'uətuənhen ch'án sín kixin ninkexró chróchenkahya sín kixin xikaha kónhen.

9

*Ch'ín Jesús ichr'án ch'án tí teyó sín
(Mt. 10.5-15; Mr. 6.7-13)*

¹ Ntá ch'ín Jesús k'uətoan kixin tsəchjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchəkuen tí jínahya chóntha chojni la ko sinchekitohe sín

chojni jína. ² Ntá k'ueṭoan ch'án kixin sátsjikjako sín nkexrí tí kjuachaxin t'etōan Dios la ko sinchekitohe sín chojni jína. ³ La ko k'ueṭoan ch'án kixin:

—Ninkehó nkehe sátsjikohyará ntia sátsjirá, ni tí nta tjíxinrá la náhí, ni bolsa la náhí, ni nioṭja, ni chichaon, la ko tsjíkoará jehó tí ka tjejóyará ó. ⁴ A ntá tí tsjasánrá ijnko nchia tsjanjon sín kjuachaxin la ntahó tsitohará la tsjixixín tí xra ntá sátsjixinrá ntiha. ⁵ A ntá tí tsjasánrá ijnko chjasin la ntá tsjanjonhya sín kjuachaxin tsjàkorá ntá t'axrjéxinrá tí chjasén sín ntiha tsotsénkará tí nche chóna totará tsjakoṭxinrá xikaha kixin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsínsí sákjuíchronka sín tí tan jína tsaáxin chojni la ko kjuínchekitohe sín chojni jína kaín chjasin.

Ik'uéen ch'ín Juan Bautista

(Mt. 14.1-12; Mr. 6.14-29)

⁷ A ntá tí ch'ín Herodes t'etōan kuínhin ch'án kaín tí xra tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín. ⁸ A ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. A ntá í so sín la ntáchro sín kixin jnkojín tí sín k'uéchronka itén Dios ósé la mé ó tsíxechón, ichro sín. ⁹ Kjánchó ntáchro ch'ín Herodes kixin:

—Janhan mé kuétoan kóchrínjin sín kja ch'ín Juan. ¿Á chrókóchaxín jehe ch'án kixin nchónhya kjuaxroan kuínhan tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuích'e sín. Ntá k'uaxrjentako sín ch'án tí kohya ninkexró chjinaxón chjasin Betsaida. ¹¹ Ntá tió k'uíxikónohe chojni kixin ntaha tjen ch'ín Jesús ntá sákjuíchréhe sín ch'án. A ntá kjuanjon ch'án kjuachaxin ts'ejó sín. Ntá kjuankíxin chrónka ch'án nkexrí tjen tí kjuachaxin t'etōan Dios la ko kjuínchekitohe ch'án chojni jína.

¹² A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuátehe sín ntáchro sín kixin:

—Chóntahyani itsjé nkehe; jehó in'ó nioṭja la ko yaá koche chóntani. ¿Á tjinkávan sátsjik'enani nkehe sine kaín tí chojni siín? —ichro sín.

¹⁴ Kixin siín chjina in'ó mil chojni ntoa. A ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkojié sín ts'ixitjaxin sín jnkojnko cincuenta sín —ichro ch'án.

¹⁵ A ntá xikaha kjuích'e sín k'ueṭoan sín, a ntá k'uíxitjaxin sín kaín sín. ¹⁶ A ntá ch'ín Jesús kuákja ch'án tí n'ó nioṭja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin kjuanjon tí nkehe sine sín. Ntá kóchrít'o ch'án tí nioṭja la ko tí koche la chjéhe ch'án tí sín xriko ch'án. A ntá jehe sín k'óxikayéhe sín chjéhe sín kaín tí chojni siín. ¹⁷ A ntá kaín sín kjóne sín la kókjehe sín. A ntá chr'éxin kjuenájín sín kaín tí nkehe síxehé mé teyó ntaxra kjuínchekaón sín.

Ch'ín Pedro mé chrónka kixin ch'ín Jesús mé tí Cristo

(Mt. 16.13-19; Mr. 8.27-29)

¹⁸ Ntá ijnko yaon ch'ín Jesús k'uaxrjenta ch'án tjenixjehe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan? —ichro ch'án.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'ín Elías. A ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

²⁰ A ntá kjuanchankíhi ch'ín Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'ín Pedro kixin:

—Jaha tí Cristo ichr'án Dios —ichro ch'án.

Ch'ín Jesús chrónka kixin its'en ch'án

(Mt. 16.20-28; Mr. 8.30—9.1)

²¹ Ntá ch'ín Jesús k'uetuēhen ch'án sín kixin ninkexró tsochenkahya sín kixin nkexro tí jehe ch'án. ²² Ntá chénka ch'án sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsonhen la ko tsitekakuenhya tí sín t'etoan kuente nínko la ko tí sín t'etoan kuente tí sín nch'at'á la ko tí sín maestro tjako tí ley. Ts'óyán sín tí jehe ch'án, kjánchó tí nixin yaon na ó tsoxechón ch'án inaá —ichro ch'án.

²³ Ntá chr'éxin chénka ch'án kaín sín kixin:

—Tí chaxín tsochréhérá tí janhan na t'ichjánxin tsjtohérá kaín tí nkehe tjaké asánrá, ntá tsamará tí ntacruz kuéntará jnkojnko yaon, a ntá tsochréhérá tí janhan. ²⁴ Tí nkexro tjinkaon jehó sinchekaá asén mé ts'itjayan. A ntá tí nkexro sinchek'itjayanxín asén kixin tinkáchónki tí janhan la tsaá. ²⁵ ¿A ntá nkehe tsonhen tí chrókjuacha ijnko chojni chróchónka kaín nkehe síin chjasintajni a ntá kjuachón chrókjuinçek'itjayan ch'án? ²⁶ A ntá jnkojn chojni chrókósuèhe kixin tinkáchónki tí janhan la ko tí nkehe tjakua, a ntá kjaxin tí Xjeen Dios K'óna Chojni mé tsosuèhe chróntáchro ch'án kixin chóxin ch'án tí jehe sín tió tsi ch'án éxi ijnko rey tsikao ch'án tí kjuachaxin kuente It'é ch'án la ko tí sín ángel jina. ²⁷ Tíhi mé ntoá xrjanka kixin iso chojni tjejó ntihi tjejótinhin sín naxa ts'enhya sín ts'ikon sín kixin Dios ts'etoan tí kjuachaxin kuente ch'án.

K'uixitóxin nkexrí tsjehe ch'ín Jesús

(Mt. 17.1-8; Mr. 9.2-8)

²⁸ A ntá k'uátsínka ijni yaon tí tsíchronka ch'án tíhi ntá sákjuiko ch'án ch'ín Pedro la ko ch'ín Juan la ko ch'ín Jacobo la chriin sín ijnko jna kixin tsonixjehe ch'án Dios. ²⁹ Ntá ch'ín Jesús tjenixjehe ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákini tsjehe. ³⁰ Ntá xríñahya k'uikon sín yaá chojni tjejóto sín tí jehe ch'án na mé jehe sín la tí ch'ín Moisés la ko tí ch'ín Elías. ³¹ Imá t'inkáséyan jnkontatjen tí tjejó sín tjejóto sín tí ch'ín Jesús kixin nkexrí its'en ch'án la ko nkexrí tsjasótéxin ch'án tí chjasin Jerusalén. ³² A ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjótsejehe sín k'uikon sín tí kjuachaxin kuente ch'ín Jesús la ko k'uikon sín tí yóí chojni ntoá tjejóko sín ch'án. ³³ A ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kixin:

—Maestro, jina kixin tjejóni ntihi. Chrókjuich'éñani iní nchia la mé ijnko kuéntá la ijnko kuente ch'ín Moisés la ko ijnko kuente ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchro ch'án kixin chrakon ch'án. ³⁴ A ntá naxa tjenixja ch'án ikui ijnko tjuí kjuák'etja tí jna tjejó sín. Ntá chrakon sín tjejó sín chrínki tí tjuí. ³⁵ Ntá xríñahya kuínhin sín chríkjan tí tjuí itén nkexro ntáchro kixin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ A ntá tió kjuixin kuínhin sín tí tan nixja ntá k'uíkon sín kixin jehó ch'ín Jesús tjen. A ntá tí jehé sín la tání sín kixin xíkaha k'uíkon sín tí yaon a la ninkexró chenkahya sín tí nkehe k'uíkon sín.

Ch'ín Jesús kjuínchekitohe jína ijnko chánjan chóna nchakuen tí jínahya
(Mt. 17.14-21; Mr. 9.14-29)

³⁷ A ntá tí yaon chr'éxin k'uínkajinxin sín jna la ntá nchónhya chojni sákjuixinhin sín ntja ch'ín Jesús. ³⁸ A ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kixin:

—Maestro, chronóghani kixin chrótsjehé tí xjeenni kixin jnkokoaxón ó chóntani a ntá níhi xjan. ³⁹ Chóna xjan nchakuen tí jínahya la ntá nchek'iyato xjan la ko nchek'aniáte xjan nchexránka xjan kixin tjetéhe xjan la ko ntalóxrjo sítjixin ir'va xjan la ko ncheníhi xjan, na mé chrohya tsjinhin xjan. ⁴⁰ A ntá chronógheni tí sín xríkoa chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátehe ch'ín Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjákohará kixin nunca t'itjáhyará? Xrákoa tí xjan ntihi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'ín Jesús jiehe k'uetuénhen tí nchakuen tí jínahya kixin ts'axrjexín xjan. Ntá k'uaxrje tí nchakuen tí jínahya ntá kuítóhe xjan jína. A ntá ch'ín Jesús kjuínchek'áyéhe tí it'é xjan. ⁴³ A ntá kaín sín chrakon sín kixin k'uíkon sín tí kjuachaxin jie kuénte Dios.

Ch'ín Jesús chrónka ch'án inaá kixin its'en ch'án
(Mt. 17.22-23; Mr. 9.30-32)

Naxa chrakon sín kaín sín kixin tí kjuaxroan kjuích'e ch'ín Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etoan —ichro ch'án.

⁴⁵ Kjánchó jehé sín kienxínhya sín tí nkehe ntáchro ch'án kixin naxa kjuanjonhya Dios kjuachaxin kixin chrókuienxín sín, ntá chrakon sín na kjuanchankíehya sín ch'án kixin nkexrí t'axrjexín tí nkehe ntáchro ch'án.

Nkexro tí imá tjetooan ts'etoan
(Mt. 18.1-5; Mr. 9.33-37)

⁴⁶ A ntá tí sín k'uájiko ch'ín Jesús kjuankíxin sín itjo sín kichó sín kixin nkexro tí jehé sín antsí má tjetooan ts'etoan. ⁴⁷ Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án ⁴⁸ ntá ntáche ch'án sín kixin:

—Tí jnkójín nkexro chrók'uáyéhe tí xjan i kixin tinkáchónki sín tí janhan mé xíkaha chrók'uáyéhe sín tí janhan. A ntá jnkójín nkexro chrók'uáyéhe tí janhan mé xíkaha chrók'uáyéhe tí nkexro chr'ánna k'uinka. A ntá tí jnkójín nkexro antsí chrókjuinchehnkehya la mé antsí chrók'uáyéhe kjuachaxin chrók'uetooan.

Tí nkexro nínkakuenhya tí jeheni la mé tóxrjínhin ch'án tí xra ch'eni
(Mr. 9.38-40)

⁴⁹ Ntá ntáchro ch'ín Juan kixin:

—Maestro, k'uíkonni ijnko nkexro kjuachaxin ihniá kuakitsjexín ch'án nchakuen tí jínahya chóna chojni. A ntá chénkani ch'án kixin xíkahya chrókjuich'e ch'án kixin xrikohyani ch'án.

⁵⁰ Kjánchó ch'ín Jesús ntáchro ch'án kixin:

—Xíkahya chróntáche ch'án kixin tí nkexro nínkakuenhya tí jeheni la kjá tóxrjínhin tí xra ch'eni —ichro ch'án.

Ch'ín Jesús kjuentuéhe ch'án tí ch'ín Jacobo la ko tí ch'ín Juan

⁵¹ A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén. ⁵² Ich'án ch'án chojni kuitónxin ntia a ntá jehe sín sákjui sín ijnko chjasin ntsí estado Samaria sákjuikjeyá sín nchia ts'ok'èxin sín. ⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'uikon sín kixin ó xra ó sátsji ch'án chjasin Jerusalén. ⁵⁴ A ntá tió k'uikon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

—Inchéni, ¿á tjinkávan kixin chrókjuanchiani xrohi chrók'uinkajinxin nkaya nkajní chrókjuinçek'itjáyan tí jehe sín éxi kjuanchia tí ch'ín Elías?* —ichro sín.

⁵⁵ Ntá ch'ín Jesús kuinkátjá ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará. ⁵⁶ Kixin tí Xjeen Dios K'óna Chojni kuihya ch'án kixin chrókjuinçek'itjáyan ch'án chojni. Náhí. Xra ó ikui ch'án sinchekaá ch'án chojni —ichro ch'án.

Ntá sákjui sín í jnko chjasin ntsí.

Tí sín tjinkaon chróchréhe sín tí ch'ín Jesús

(Mt. 8.19-22)

⁵⁷ A ntá jehe sín sákjui sín ntia inaá. Ntá xeta sín ijnko nkexro ntáche ch'án tí ch'ín Jesús kixin:

—Inchéni, tjinkaonni chróchréheni tí jaha nketí tjinkávan sátsjia —ichro ch'án.

⁵⁸ Ntá ch'ín Jesús kjuátehe ch'án ntáchro ch'án kixin:

—Tí koxróná chóna va itjué va la ko tí koxroxé chóna va kaké va. A ntá tí Xjeen Dios K'óna Chojni chónahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

—Chréhé tí janhan —ichro ch'án.

Kjánchó kjuátehe ch'án kixin:

—Inchéni, tìtohéni senó sátsjikjaváni it'èni —ichro ch'án.

⁶⁰ Ntá kjuátehe ch'ín Jesús ntáchro ch'án kixin:

—Tìtohé kixin tí chojni tsík'en la jnkokón sín tsík'en tsjavá kichó sín. A ntá jaha la sátsjikjàkua nkexrí tjen tí kjuachaxin t'etoan Dios —ichro ch'án.

⁶¹ Ntá ntáchro í jnko nkexro kixin:

—Inchéni, tjinkaonni tsochréheni tí jaha. Jehí tìtohé tsjinixjeheni tí sín siín ntøeni —ichro ch'án.

⁶² Kjánchó ntáchro ch'ín Jesús kixin:

—Tí nkexro kjuankíxin tsotsé ch'án arado ntá chrókjan chrókotónhen nóton mé xikaha xitjahya sich'ehe ch'án Dios xra.

10

Ch'ín Jesús k'uetuēhen setenta chojni sátsjikjako sín

¹ Ntá chr'éxin Inchéni kjueyá ch'án í jnko setenta chojni ntá k'uetuēhen ch'án sín sátsji sín yóyó sín sátsji sín tsitónxin sín ntia tí kaín chjasin na ko nkuíxín tjinkaon ch'án sáchrókjui ch'án. ² Ntá ntáchro ch'án kixin:

—Chaxín ntáxrjan kixin imá tsík'óna, a ntá tí chojni ch'e xra mé tsjéhya. Chrókjuanchehérá tí Inché nonte kixin chróchr'án ch'án itsjé chojni chrókjuich'e xra. ³ Sátjirá jahará. Xráxinkáonrá kixin tétuāhanrá sátsjirá éxi kolélo ts'ejóyākjanrá chrikjan tí kolobo. ⁴ Tsjikoahyará kabólsa la ko tjoā t'inka chichaon la ko tokate tjikoahyará la ko tí nixjehérá chojni tí ntia tìtoéhyará kixin chrókjuintaxrjanhanrá sín. ⁵ A ntá tió ts'ixenhenrá jnkójn nchia la senó nixjehérá sín ntáchrórá kixin ts'áyéhe sín kjuaxróxin, tsixrorá. ⁶ A

* 9:54 1 Reyes 18.30-40

ntá tí tjejó sín kjuaxróxin ntiha la nixjehérá sín la ts'áyéhe sín kjuaxróxin. A ntá tí la náhí, a ntá tí kjuaxróxin chrók'uáyéhe sín na sátsjikoará inaá. ⁷ A ntá tí nchia ntiha chrókjuanjon sín kjuachaxin chrókuithará, ntaha mé tsjanjon sín nkehe chóna sín sinterá la ko its'irá, kixin tí nkexro ch'e xra la síin kjuachaxin tsoxenkehe. Tsíjhyará í jnko nchia la ko í jnko nchia. ⁸ A ntá tsjasánrá ijnko chjasin tsjanjon sín kjuachaxin ts'ejorá ntiha ntá interá tí nkehe tsjanjon sín. ⁹ Nchekitoherá chojni níhi jína. Ntá chenkará sín kixin tí kjuachaxin t'etoan Dios la kínhya tjen tí tjejó sín, ichrorá. ¹⁰ A ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntøe sín sátsjirá tí ntia chjasin ntiha ntá ntáchrórá kixin ¹¹ kjónté tí nche tsík'ixitja totará tsotsénkará kixin tsjákoxinrá kixin tí kjuaxróxinhya ts'áyéhe sín chr'éxin. Kjánchó chrókonohe sín kixin tí kjuachaxin t'etoan Dios la kínhya tjen tí tjejó sín, ichrorá. ¹² Ntáxrjan kixin tí yaon tsjejéxin chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya

(Mt. 11.20-24)

¹³ Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxí k'uikonrá jahará, ntá chrókójehe sín la tjoka chrókjuitóxinhin ntje sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókuakoxin sín kixin t'ává sín. ¹⁴ A ntá tí yaon tsitoexín ijie chojni a ntá jahará antsí tsjasótiará, a ntá tí sín kuènte chjasin Tiro la ko chjasin Sidón la kénhyó tsjasóte sín. ¹⁵ A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajni, ichrorá. Chaxínhya. Jahará la tsjasinkajinrá sátsjirá tí tsjasótéxin tí sín tsík'en.

¹⁶ Tí nkexro tinhin tí nkehe ntáchrórá la mé xikaha tinhin tí nkehe ntáxrjan la ko tí sín titekakonhya sín tí jahará na mé xikaha titekakonnahya sín tí janhan. A ntá tí nkexro titekakonnahya sín tí janhan xikaha titekakonhya sín tí nkexro chr'ánna k'uinka.

Ó kjan tí sín setenta sátsíkji

¹⁷ A ntá ó kjan tí sín setenta sátsíkji la imá chéhe sín ntáchró sín kixin:

—Ínchéni, kjónté tí nchakuen tí jínahya titekakonhenni tió t'ákjenxinni ihniá —ichro sín.

¹⁸ Ntá ntáchró ch'ín Jesús kixin:

—Kja chaxín k'uikuán kixin ch'ín Tsochren k'uánótjenxin nkajni éxí ijnko kjónkixin xikaha kónhen.† ¹⁹ Ó tjahará kjuachaxin kixin kjónté konche la ko konchia tsinkátjará la ko tsjachahya ninkehó tí kjuachaxin kuènte tí ch'ín Tsochren kixin ninkehó tsoanhyará. ²⁰ Kjánchó jehya tíha chrókóchàxinrá kixin tí nchakuen tí jínahya kuitekakonhanrá. Náhi. Chrókóchàxinrá kixin ihniárá ó ts'ínixin nkaya nkajni —ichro ch'án.

Tí Xjeen Dios nixjehe It'é ch'án

(Mt. 11.25-27; 13.16-17)

²¹ A ntá tuénxin tí Nchakuen Dios kjuínchechéhe tí ch'ín Jesús ntá ntáchró ch'án kixin:

—Tjáncháha kjuasáya It'eni Ínché nkaya nkajni la ko chjasintajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'itja tí sín noehya. Mé xikaha It'eni, jaha kóxrjínhan kixin xikaha tsohen.

²² T'aná mé chjina kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjejá ch'án kixin tjinkaon ch'án tsoñohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kixin:

* **10:12** Génesis 19.24–28 † **10:18** Isaías 14.12

—Chéhe tí sín k'uíkonxín kon sín éxí k'uíkonrá. ²⁴ Ntáxrjan kixin nchónhya tí sín k'uéchronka itén Dios ósé la ko nchónhya tí sín rey k'uétjinkaon sín chrók'uikon sín éxí t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kíenhya sín —ichro ch'án.

Ch'ín Jesús kjuíncheyóexin éxí ijnko samaritano jína

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án tsonoexín ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochríxín? —ichro ch'án.

²⁶ Ntá kjuátehe ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátehe ch'án ntáchro ch'án kixin:

—Chrótjuèheni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuénténi la ko chrótjuèheni kichó ni éxí tjuèxínni asénni‡ —ichro ch'án.

²⁸ Ntá ntáchro ch'ín Jesús kixin:

—Jína kjuátehe. A ntá tí jaha xíkaha sích'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxín ch'án tí ch'ín Jesús ntá kjuanchankí ch'án inaá kixin:

—¿Xá nkexro tí kichó ni chrótjuèheni, ichrua? —ichro ch'án.

³⁰ Ntá ch'ín Jesús kjuátehe ch'án ntáchro ch'án kixin:

—Ijnko chojni k'uínkajinxín nó ntia kjuixín chjasin Jerusalén sátsji ch'án chjasin Jericó, ntá kuátóhe ntia iso síchee kueéhe sín ch'án kaín nkehe sáchrókjuiko ch'án, la ko iké ch'án tsikakitsjehe sín ch'án, la tsíkjate sín ch'án, la ntá sátsíkji sín tsíkitohe sín ch'án la ó mero tjet'en ch'án. ³¹ Ntá xrínahya k'uátsínka ijnko nchat'á tí ntia ntiha ntá k'uíkon ch'án xíkaha ntá ántosén ch'án k'uátsínké ch'án. ³² A ntá kjaxin ijnko ch'ín levita k'uátsínka chjinaxón ntiha. Ntá k'uíkon ch'án xíkaha ntá ántosén ch'án k'uátsínké ch'án kjaxin. ³³ A ntá ijnko ch'ín kjuixín estado Samaria k'uátsínka tí ntia ntiha ntá k'uíkon ch'án xíkaha tjetsínka tí nkexro ntá kuíkonóehe ch'án. ³⁴ Ntá kóchjinehe ch'án tí nkexro tsíkóníhi ntá kjuíchehe ch'án xroan tí síchrit'o chjéhe ch'án aceite la ko vino la ko kjuínchentetoxín ch'án ka. Ntá kjuixin ntá kjuínchekíták'á ch'án tí kolóchoe ch'án. Ntá sákjuíko ch'án ijnko nchia t'ok'èxín chojni ntiha la k'uáyakonhen ch'án. ³⁵ Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí ìnché tí nchia ntáchro ch'án kixin: “T'ayakonhén tí nkexro i, a ntá antsí má ts'ichjánxinhin ch'án la tió tsokjan ntá tsjénkahha ts'ókjanhan kaín tíha,” ichro ch'án. ³⁶ A ntá tí iní nkexro k'uátsínka ntia la, ¿nkexro tjuèhe tí nkexro kjuíncheníhi tí síchee? —mé kjuanchankí ch'ín Jesús.

³⁷ A ntá kjuátehe tí maestro tjako tí ley kixin:

—Tí nkexro kuíkonóehe tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xíkaha chrókjuíche —ichro ch'án.

Ch'ín Jesús sákjuí ch'án ntøe tjan Marta la ko tjan María

³⁸ Naxa tjetji ch'ín Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuítóhe ch'án ntøe tjan ntiha. ³⁹ A ntá tjan Marta chóna tjan ijnko kichó tjan it'in María. A ntá jehe tjan kjuák'etjaxín tjan chrínkí toté tí ch'ín Jesús tjetinhin tjan nkehe tí tjechro ch'án. ⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Ìnchéni, ¿á tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkítsani tjan —ichro tjan.

⁴¹ Kjánchó ch'ín Jesús kjuátehe ch'án ntáchro ch'án kixin:

‡ 10:27 Deuteronomio 6.5; Levítico 19.18

—Marta, Marta, jaha imá tóxakonhan kixin t'inkákonhen nchónhya xra chonta.
⁴² Kjánchó jnkokoá nkehe t'ichjánxin. A ntá tjan María kjueyá tjan tí nkehe antsí jína la ko ninkexró tsakitsjehya tjan tíha —ichro ch'án.

11

Ch'ín Jesús tjako ch'án nkexrí tsonixjeheni Dios (Mt. 6.9-15; 7.7-11)

¹ A ntá jnkonaá ch'ín Jesús tjenixjehē ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Inchéni, tjácohéni nkexrí tsonixjeheni Dios kixin xikaha ch'ín Juan kjuakohe ch'án tí sín k'uájiko ch'án.

² Ntá ch'ín Jesús ntáchro ch'án kixin:

—Tió nixjehérá Dios ntáchrorá kixin:

It'eni tjen nkaya nkajní, jaha imá tjóá.

Chrókui ti kjuachaxin kuéntá.

Chrókjuich'e tí nkehe tóxrjínhan jaha ntihi chjasintajni éxi tjech'e nkaya nkajní.

³ Ijie tsjánjuan tí niotja t'ichjánxinhinni jnkoinko yaon.

⁴ T'óxíka tí nkehe jínahya kjuích'eni kixin kjaxin jeheni ts'itjáyenheni tí nkehe kjuích'eheni chojni.

Titóehyani jeheni xrahya chrókjuasinni jie. Nchekaáni kaín tí nkehe jínahya chrókónheni —mé xikaha ichro ch'ín Jesús.

⁵ Kjaxin ntáchro ch'án kixin:

—A ntá jnkójínrá chróchontará ijnko chojni choxian, a ntá sáchrókjuia ntoe ch'án k'áxrótjen chróntáche ch'án kixin: “Amigo, nchekjenni iy'á niotja ⁶ kixin nantá ó kui ijnko chojni chóxinni kuxin ch'án kjin kjuíji ch'án ntoeni ntá chóntahyani ninkehó tsochjeheni ch'án.” ⁷ A ntá tí chrókjuatehe tí nkexro choxian tjen nkaxenhen chróntáchro kixin: “Chjeéhyani xra. Tí ntója ntoeni méhe t'ikjéhe. A ntá xjeenni tjejót'ok'èkoni xjan. Ntá xitjahya ts'áyani tsotjáhani nkehe”, ichro ch'án. ⁸ Ntáxrjan kixin kjónté chrók'uayahya ch'án chrótjáhya ch'án nkehe kjónté chóxian ch'án, kjá ts'áya ch'án tsotjáha ch'án kaín nkehe t'ichjánxinhan kixin tjinkakonhya ch'án kixin naxa chrókjuak'é chrók'uèya jaha. ⁹ Mé xikaha ntáxrjan kixin: Tjanchiará nkehe la Dios tsotjáhará; tjéyará nkehe la ts'itjará; t'inkará puerta la tsoxitjehē. ¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjejá nkehe la ts'itja; la ko tí nkexro t'ínka puerta la tsoxitjehē.

¹¹ 'xá jnkójínrá chontará xjaanrá chrókjuanchahará xjan niotja la zá chrókjuánjonrá ijnko xro? Q chrókjuanchahará xjan koche la za chróchjehérá ijnko konche? ¹² Q chrókjuanchahará xjan koja la zá chrókjuánjonrá ijnko konchia? ¹³ A ntá jahará kjónté jínahyará la ó nohará nkehe jína tsochjehérá xjaanrá, la mé antsí chrókónohará kixin It'eni tjen nkaya nkajní tsotjáhará Nchakuen ch'án tí jnkójínrá chrókjuanchehérá ch'án —ichro ch'ín Jesús.

Tjanchia sín jie kixin ch'ín Jesús chóna kjuachaxin tí Jínahya (Mt. 12.22-30; Mr. 3.19-27)

¹⁴ Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsík'axrje tí nchakuen tí jínahya a ntá tí ch'ín xitjahya nixja la jína nixja ch'án. Ntá kaín chojni chrakon sín kixin xikaha tsíkjich'e ch'án. ¹⁵ A ntá jnkójín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé t'etuēhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxin sín tí ch'ín Jesús ntá kjuanchehe sín ch'án ijnko kjuaxroan náxrjón kuènte nkaya nkajní. ¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkójín gobierno jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá. ¹⁸ A ntá kjaxin tí ch'ín Tsochren chrókjuánjonko kichó ch'án, ¿la nkexrí chróchónta ch'án kjuachaxin naxá chrók'uetōan ch'án tí chrók'uaxrje tí jínahya? A ntá jahará ntáchrórá kixin janhan takítsjé nchakuen tí jínahya kixin tí kjuachaxién ch'ín Tsochren chonta janhan, ichrorá. ¹⁹ A ntá tí xíkaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxin sín kixin jahará ntoáhya tjenkayáxinrá. ²⁰ A ntá tí kjuachaxién Dios mé takítsjéxian tí nchakuen tí jínahya na mé chrókónoaxínrá kixin tí kjuachaxién Dios t'etōan ch'án mé ó kui tí tjejórá.

²¹ A ntá ijnko chojni jiehe yamá chica t'ayakonhen ch'án ntōe ch'án kixin tí nkehe chóna ch'án ts'itjáyanhya. ²² A ntá itsi ijnko nkexro antsí má tsehe, a ntá tsjanjonko ch'án tí ìnché nchia, a ntá tsjacha tsakitsjehe tí ìnché nchia kaín tí chica yamá ch'án kixin imá jieexín ch'án. A ntá tí ch'ín antsí tsehe mé tsakja ch'án kaín nkehe síin ntiha. ²³ Tí nkexro titekakonhya tí janhan mé nínkakonna ch'án. A ntá tí nkexro tjinkítsahya tí janhan mé t'inkákonhen tí xra t'a —ichro ch'án.

Ijnko tí nchakuen tí jínahya mé tsokjan inaá
(Mt. 12.43-45)

²⁴ A ntá ijnko nchakuen tí jínahya tsík'axrjexín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Áxri tsokjan ntona k'uaxrjéxian.” ²⁵ A ntá tió kjan la éxí ijnko chojni tsík'ánjón ntōe la náxrjón tsjehe tí nkaxenhen nchia. A ntá k'uíkon tí jínahya xíkaha tjen nchia ²⁶ a ntá sákjuíkakjín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xíkaha tsonhen ijnko chojni kénhya asén tinkáchónki Dios —ichro ch'án.

Tí kjuachéhe chaxín

²⁷ Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjeníxin tí jaha kjuíntak'ánkiá —ichro tjan.

²⁸ Ntá jehe ch'án kjuátēhe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjón
(Mt. 12.38-42; Mr. 8.12)

²⁹ Ntá nchónhya chojni sítójnkotsé sín tí tjen ch'ín Jesús ntá jehe ch'án kjuankíxin nixja ch'án ntáchro ch'án kixin:

—A ntá tí chojni síin jie la jínahya sín, a ntá tjanchia sín kixin chrókjuásian ijnko kjuaxroan náxrjón. Kjánchó tsjákoxinhya ijnko kjuaxroan la jehó tí nkehe tsíkónhen ch'ín Jonás. ³⁰ Ntá éxí yóhe kónhen ch'ín Jonás kónoexín tí sín chjasin Nínive mé xíkaha tsonhen tí Xjeen Dios K'óna Chojni la ts'íkon tí chojni síin jie. ³¹ A ntá tí yaon tsitōexín ijíe chojni tjejó jie la mé tí tjan reina k'uetōan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjín kjuixín tjan tsinhin tjan nkexrí imá k'uénohe ch'ín Salomón.* A ntá jie itjèn janhan antsí chonta kjuachaxin, a ntá ch'ín Salomón la kénhyó. ³² La ko tí sín chjasin Nínive kjaxin ts'inkatjen sín tió tsitōexín ijíe chojni la tsjanchia sín jie kixin tí sín tjejó jie la ko tsontáchro sín kixin chrókjuasóte tí chojni tjejó jie kixin tió kuínhin tí sín Nínive chrónka ch'ín Jonás itén Dios la kjuítōxinhin sín ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

* 11:31 1 Reyes 10.1-10

Xrohi t'inkaséyanxín cuerpo kuènte chojni
(Mt. 5.15; 6.22-23)

³³ 'Nijnko chojni chrokjuinçek'ákjen ijnko xrohi chrókjuak'ema ch'án la ko chrókjuak'ehya ch'án chrínkí ijnko ntacajón. Náhí. Noi chrókjuak'e xrohi chrókjuak'enkáya candelero kixin ts'ikonxín chojni tí t'inkaséyan.† ³⁴ Tí ikonrá mé éxí yóhe ijnko xrohi t'inkaséyanxín tí cuerpo kuèntará. A ntá tí chontará ikonrá jína la ntá kuenté cuerpo kuèntará chóna xrohi. A ntá tí chontará ikonrá jínahya la ntá kuenté cuerpo kuèntará la sítié tjen. ³⁵ Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjejorá. ³⁶ A ntá tí kuenté tí cuerpo kuèntará chróchóna xrohi la ko nit'ò chrók'uixitiéhya la ntá kuenté la chrók'uikonrá jína la éxí ijnko lámpara kuenté ch'e xra jína.

Ch'ín Jesús chrónka kixin ntoáhya tjako tí sín fariseo la ko tí sín tjako ley
(Mt. 23.1-36; Mr. 12.38-40; Lc. 20.45-47)

³⁷ A ntá tió kjuixin nixja ch'ín Jesús ntá ijnko ch'ín fariseo chrónóehē ch'án tí ch'ín Jesús kixin sátsjiko ch'án ntōe ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjaxín ch'ín Jesús chjino tjen tí mesa a. ³⁸ A ntá tí ch'ín fariseo chrakon ch'án k'uikon ch'án kixin ch'ín Jesús k'óntihya ch'án tja ch'án senó tí sine ch'án éxí tinkáchónki tí jehe sín. ³⁹ Kjánchó Ìnchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachēe la ko kjuachjinoxínhin. ⁴⁰ Jahará lōntirá. ¿A noahyará kixin tí nkexro kjuích'éna tí ntója la koí tí nkaxenhen kjuích'éna ch'án? ⁴¹ Tí chrókjuinçekitonhénrá chojni nòa kaín asánrá tí nkehe chontará la ntá chrókóxakuanhyará tí chrók'ónti chojni o náhí.

⁴² 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuentá tí nkehe ntoá la ko nkexrí chrótjuèhérá Dios la ko nkexrí chrótjuèhérá kíchuará. Jína chróchjehérá Dios nkehe la ko chrók'uitjāyanhyará tí chrókjuínkītsará kíchuará.

⁴³ 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kixin jnkójina tsonixjahará sín tió tsoxétará sín ntasin.

⁴⁴ 'Nòará jahará maestro tjàkorá tí ley la ko jahará fariseorá. Ntoáhya tjenkayáxinrá ch'iará. Jahará éxí yóhe tōye tsíxravá chojni tsík'en t'ikonhya chojni la t'atsínka sín nátaón la noehya sín kixin tsíxravá chojni ntiha.

⁴⁵ A ntá kjuátehe ijnko tí maestro tjako tí ley ntáchro ch'án kixin:

—Maestro, xikaha ntáchrua la, ¿á kjaxinhya jeheni kaín ni t'ántaxínhínni ní? —ichro sín.

⁴⁶ A ntá ntáchro ch'ín Jesús kixin:

—Kjaxin nòará tí jahará tjàkorá tí ley. Tétuēnhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará njnko dedo tjará chrókjuínkītsará tí nkehe imá ye yámá sín.

⁴⁷ 'Nòará tí jahará. Ch'énará tjat'oe tí sín k'uéchrónka itén Dios ósé tsík'óyán tí sín k'uaxrjeníxinrá. ⁴⁸ Xikaha jahará tjàkoxínrá kixin ó nchoxon tí nkehe kjuích'e tí sín k'uaxrjeníxinrá ósé kixin jehe sín k'óyán sín tí nkexro k'uéchrónka itén Dios ósé. A ntá jahará ch'énará tjat'ò tí tsíxravá sín.

⁴⁹ 'Mé xikaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkójín tí jehe sín la ko tsochónkíhi tí í so sín, ichro ch'án. ⁵⁰ A ntá Dios mé tsjanchia jie tí chojni síin jie kixin k'uítji ijnié kaín tí sín k'uéchrónka itén ch'án ósé desde tí xrankixin k'óna chjasintajni ⁵¹ la mé xrankíxixín k'uítji ijnié ch'ín Abel la mé kjuixixín k'óyán sín ch'ín Zacarías k'óyánxin sín ch'án jnkosiné tí tjen tí altar la ko tí njnko. Ntá Dios sinčekjasóte ch'án tí sín síin jie kixin xikaha ik'uén kaín tí sín a.

† 11:33 Lucas 8.16

⁵² 'Nòará jahará maestro tjàkorá tí ley. Jahará tjinkákonhyará kixin í so chojni tsonohe sín tí nkehe chaxín la ni jahará tjinkákonhyará sìnchexiteyará la ko t̄toéhyará kixin í so chojni chrókjuinchexiteyá sín —ichro ch'án.

⁵³ A ntá kjuixin nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakohen sín ch'án ntá kjuankixin sín kjuanchankíhi sín ch'án nchónhya nkehe ⁵⁴ chrókjuachaxín sín ch'án kixin ách'e ntoáhya chrókjuatehe ch'án ntá chrókjuanchia sín jie tí jehe ch'án.

12

Ch'ín Jesús chrónka kixin ntoáhya ch'e tí sín fariseo

¹ A ntá nchónhya mil chojni kójnkotsé sín ntá tinkák'íntate kichó sín. Ntá ch'ín Jesús saoxín kjuankixin chénka ch'án tí sín k'uájiko ch'án ntáchro ch'án kixin:

—Chrókuítekákonyará tí nkehe ntoáhya tjenkayáxin tí sín fariseo ch'ia sín, na mé éxi yóhe tí xroan nchek'ánkí niotja tí nkehe tjako sín. ² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin. ³ A ntá kaín nkehe ntáchrórá tí sítíe la chr'éxin tsinhin chojni tí nchakotjin; la ko kaín nkehe mó ntáchrórá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

Nkexro tí chróchrakonhenni

(Mt. 10.26-31)

⁴ 'Jahará chojni chóxin kichó ni mé tjonkará kixin chróchrakuenhyará tí chojni t'óyán tí cuerpo, a ntá chr'éxin la kohya nkehe tsjacha sín chrókjuich'e sín. ⁵ Kjánchó tjonkará kixin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chóna kjuachaxin tsochr'án chojni tí siín xrohi tsjasótexín sín. Tí nkexro a mé chróchrakonhénrá ch'án má.

⁶ ¿Á chrókóxinhyá in'ó koxroxé yaá chichaon ntsíntí? Kjánchó Dios la ts'itjáyenhya ch'án nijko tí jehe va. ⁷ Kjonté tí kaxíhi chóna ikjára la nohe ch'án nkekjaín ka chontará. Méxra chrakonhyará tí jahará kixin ántí má tjeté sínkí tí jahará. A ntá kjonté nchónhya koxroxé la kánhyó sínkí tíha.

Chróchrónkani kixin tinkáchónkini Inchéni Jesucristo nkayakon chojni

(Mt. 10.32-33; 12.32; 10.19-20)

⁸ 'Ntáxrjan kaín tíhi kixin tí nkexro tsochrónka kixin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kixin chóxin ch'án tí jehe sín nkayakon tí sín ángel kuénte Dios. ⁹ A ntá tí sín sinchemá sín kixin chónhyana sín nkayakon chojni la ntá kjaxian janhan s̄ntamá kixin chonhya tí jehe sín nkayakon tí sín ángel kuénte Dios.

¹⁰ 'A ntá jnkójín nkexro ts'ántaxínhín sín tí Xjeen Dios K'óna Chojni naxa jína ts'itjáyan tí jie k'uántaxínhín sín. A ntá tí nkexro ts'ántaxínhín tí Nchakuen Dios la xitjahya tsjín tí jie tí xikaha tsixro sín.

¹¹ 'Tió tsjikoará sín nkaxenhen njnko Israel la ko tí tjejó tí sín t'etōan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá ¹² kixin tió tsonixjará la tí Nchakuen Dios sìnchexraxinkaonrá nkehe tsixrorá —ichro ch'án.

Tí kjuaxikaon tsochóna chojni itsjé nkehe

¹³ Ijnko nkexro tjenkákjan tí sín tsíkójnkotsé ntáche ch'án tí ch'ín Jesús kixin:

—Maestro, ntáche tí kichó ni a kixin tsjanjon ch'án tí nkehe tónhenni tocar tsíkitohe it'éni tsakjani —ichro ch'án.

¹⁴ Ntá kjuatehe ch'ín Jesús ntáchro ch'án kixin:

—Lontia jaha. ¿Nkekuénte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

¹⁵ Kjaxin ntáchro ch'án kixin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kixin:

—Kjuák'e ijnko chojni rico, a ntá tí nontee ch'án na mé imá k'óna. ¹⁷ A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án. ¹⁸ Ntá kjuenkayáxin ch'án ntáchro ch'án kixin: “Ó nòna nkehe sít'a jie. Ts'oxíka tí t'inkachjinayá noa chonta ntá sít'ána ijnko antsí jie ts'inkachjinayá kaín nkehe k'ónana jie chonta. ¹⁹ Ntá tsontátjan asenná kixin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la inte la its'ia la tócháha,” ichro ch'án. ²⁰ Kjánchó ntáche Dios tí jehe ch'án kixin: “Lontia xíkaha ichrua la, kixin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án. ²¹ Mé xíkaha tsonhen tí nkexro chóna nchónhya nkehe chjasintajni ntihi, a ntá naxa kjueyáhya ch'án nkehe kuènte nkaya nkajní —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uítsará. ²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuèntará, a ntá kánhyó sínkí tí ka chrók'uítsará. ²⁴ Xráxinkáonrá nkexrí siín tí kontálo. T'enkahya va la ko tjáhya va la ko chónahya va nketí ts'ínkachjinayá va tí noa. Kjánchó Dios la tjanjon nkehe sine va. A ntá jahará la antsí tjetean, a ntá tí ko xritjaka la kénhyó. ²⁵ ¿Á tjejó jnkójínrá tjenkayáxinrá kixin tí chrókóxakonhanrá má ntá naxa chrók'uankirá it'o metro ntetoxinrá inaá? ²⁶ A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe siín?

²⁷ 'Xráxinkáonrá nkexrí sít'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uék'inkáya ch'án naxa kjuíncheyóehya ch'án kixin antsí náxrjón tí tsjo a. ²⁸ A ntá xíkaha Dios mé nchek'itsa ch'án kaín kayoa kjónté ijie síchón la ntóye tsoche, la mé xíkaha tsjanjon ch'án tí nkehe chrok'uítsará jahará. ¿Ntá nkekuènte kixin naxa titekákonhyará ch'án? ²⁹ ¿Ntá nkekuènte ixirá tóxakonhanrá xritjeyará nkehe sinterá la ko nkehe its'irá? ³⁰ A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a. ³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tjete siín nkaya nkajní

(Mt. 6.19-21)

³² 'Chrakonhyará jahará kolélo kuèntana. Kjónté tsjéhyará la It'ará tóxrjínhin ch'án tsotjáhará ch'án tí kjuachaxin kuènte ch'án. ³³ Nchekjirá kaín nkehe chontará la ntá chjeherá tí chichaon tí sín chónahya. A ntá xíkaha sích'erá la tí tjoa t'inka chichákonrá tsontaxinhya kixin tí nkehe tjete siín nkaya nkajní tsjejehya la ko ntaha kohya xíchee la ko ts'ínhya kué la ko ts'itjáyanhya. ³⁴ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxin listo chrók'uejóchónhenni

³⁵ 'T'ichjánxin listo ts'ejochónhénra la ko tsjak'ekoará xrohi tjeche. ³⁶ Listo chrók'uejorá éxi chojni ch'e xra tjejóchónhen sín tsokjanxin tí lámoe sín tí tsíkótehe chojni kixin tió tsi ch'án la ts'èya ch'án, la ntá tsakitjehe sín tí puerta tjoka. ³⁷ Náxrjón tí nkexro ch'e xra tió chrókjan tí lámoe sín chrók'uikon ch'án kixin naxa tjejótsjehe sín. Ntá chaxín ntáxrjan kixin tí ch'ín lamo ts'etean ch'án kixin ts'ejótjaxin sín tí tjen mesa

ntiha ntá tsjanjon ch'án nkehe sine sín. ³⁸ Kjónté chrókui ch'án k'áxrótjen o chrókui ch'án nantóye mé xíkaha chrók'uikon ch'án kixin tjejótsjehe sín la náxrjón tí sín ch'ehe ch'án xra. ³⁹ Chrókónohará tíhi kixin tí chrókónohe tí ìnché nchia nke hora chrókui tí xíchee ntá chrókjuak'etsjehe ch'án chrókuítóehya ch'án chrók'uixenhen xíchee tí ntøe ch'án chrókueé. ⁴⁰ Ntá jahará kjaxinrá xíkaha chrók'uejotsjehérá kixin titàya tsi tí Xjeen Dios K'óna Chojni.

*Tí nkexro jína ch'e xra la ko tí ch'ín ch'ehya xra jína
(Mt. 24.45-51)*

⁴¹ A ntá ch'ín Pedro kjuanchankí ch'án kixin:

— Ìnchéni, ¿á jehóni kaín ni kjuíncheyóéxian nkehe ntáchrúa o kaín chojni? —ichro ch'án.

⁴² Ntá ntáchrúo Ìnchéni kixin:

— ¿Nkexro tí t'etøan tí xra jína, a ntá tí lámøe ts'etueñhen kixin ts'ayakonhen ch'án tí chojni siín tí nchia ntiha kixin tsjanjon ch'án nkehe sine sín xintii tí hora a? ⁴³ Náxrjón tjen tí nkexro a tió tsi tí lámøe ts'ikon ch'án kixin naxa tjech'e tí xra. ⁴⁴ Tíhi mé chaxín tsontáxrjan kixin tí ch'ín lamo tsochjéhe ch'án kaín xra chóna ch'án ts'etøan tí ch'ín a. ⁴⁵ A ntá tí ch'ín t'etøan sítønhen xra tsjenkayáxin kixin tjokahya tsokjan tí lámøe ch'án, a ntá tsjankixin ch'án tsonínkakonhen ch'án tsjanjonko ch'án tí í so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokoan ch'án. ⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuítóhehe xra la ntá tsjasóteko ch'án tí sín titekakonhya.

⁴⁷ A ntá tí nkexro nohe ch'án nkehe tí xra tjinkaon tí lámøe ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. ⁴⁸ A ntá tí nkexro noehya nkehe tí xra tjinkaon tí lámøe ch'án ntá ch'e ch'án nkehe chrókjuasótexín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

*Jnkokoáhya tsjenkayáxin chojni kixin ó kui Ìnchéni Jesús
(Mt. 10.34-36)*

⁴⁹ Janhan k'uinka kixin sintak'ákjen xrohi chjasintajni. Ach'e ntáxrjan kixin ó tjechr'ákjen tí xrohi a ntá naxa náhi. ⁵⁰ T'ichjánxin nchónhya tsona tsjasótena. Tóxakonna tsoxiteyája kaín tíha. ⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xíkaha. ⁵² Kixin ijie xrankíxixín in'ó chojni naxa kjéhya jnkokoáhya tsjenkayáxin sín. Tí iní tsonínkakonhen tí yaá. Tí yaá tsonínkakonhen tí iní. ⁵³ A ntá tí it'é tsonínkakonhen tí xjeen ntoa, la ko tí xjeen ntoa tsonínkakonhen tí it'é. A ntá tí ìné tsonínkakonhen tí xjeen chjin, la ko tí xjeen chjin tsonínkakonhen tí ìné. Tí ich'ee tsonínkakonhen tí tíkíntee la ko tí tíkíntee tsonínkakonhen tí ich'ee tjan.

*Tí nkehe chronkaxín nkehe tsonhen
(Mt. 16.1-4; Mr. 8.11-13)*

⁵⁴ Ch'ín Jesús kjaxin ntáche ch'án tí chojni siín kixin:

— A ntá ts'ikonrá ts'àya tjuí tí tjiatóxin yaon, a ntá ntáchrórá kixin ts'aniá chrin, a ntá xíkaha chaxín tsonhen ts'aniá chrin. ⁵⁵ A ntá tí chjéhe xrintø nó sur ntá ntáchrórá kixin tsosóa, a ntá xíkaha chaxín tsosóa. ⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajní la ko chjasintajni. ¿Ntá nkexrí naxa tiénxinhyará nkehe sítønhen tí tjejorá jie?

Chrókóxakonhenni kjuaxróxin chrók'uejókoni tí sín nínkakhenni
(Mt. 5.25-26)

⁵⁷ ¿Nkekuènte tjejáhyará jahará nkehe tí jína? ⁵⁸ Tí jnkojín nkexro tsjanchia jié sátjikoará ch'án nkayakon tí sín t'etoan na tí ntia ó chrónkakjóra ch'án kixin tsoyóxin ts'ixinhya kjuanínkaon kixin sátsjikoahyará nkayakon tí ch'ín juez, kixin tí ch'ín juez chrók'uejóan ch'án kixin sátsjikoará tí sín comandante. A ntá tí ch'ín comandante chróchr'áxanhanrá ch'án ntoechiso. ⁵⁹ Ntáxrjan kjá ni chrók'uaxrjéxinhyará ntiha tsjenkajiará kaín xín chichaon chonta.

13

T'ichjánxin chrókjuinkí chojni tí nkehe tjenkayáxin sín

¹ A ntá tí yaon k'uejó iso sín chénka sín tí ch'ín Jesús kixin nkexrí kjuích'e ch'ín Pilato k'uejóan its'en iso chojni tsíkijixin estado Galilea k'uitji ijnié sín kójnkojiéko tí ijnié tí ko k'oyán sín kjuanchexín sín kjuasáyé Dios. ² A ntá kjuátehe ch'ín Jesús ntáchro ch'án kixin: —¿Á tjenkayáxinrá kixin xíkaha kónhen tí sín tsíkijixin estado Galilea kixin antsí jié jié chóna sín, a ntá tí í so sín chjasén sín la á náhi ní? ³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xíkaha its'enrá kjaxin. ⁴ ¿Á tjenkayáxinrá kixin antsí má k'uéchóna jié tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhi ní? ⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xíkaha ts'itjáyanrá kjaxin.

Ch'ín Jesús kjuíncheyóexin ch'án éxi ijnko nta to higo t'ónahya to

⁶ A ntá ch'ín Jesús kjuíncheyóexin ch'án ntáchro ch'án kixin: —Ijnko chojni chóna ijnko nta to higo nóntee ch'án. Ntá sákjuítsjehe ch'án á k'óna to. A ntá náhi k'uitjahya ch'án ninkehó to. ⁷ Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjahya ninkehó to higo. T'ochrínjian tí nta kixin tsoxéhe tí nonte a.” ⁸ A ntá tí ch'ín t'ayakonhen nonte kjuátehe ch'án ntáchro ch'án kixin: “Áxri, títóhé ijie nánó kixin sintantá nche la ko tsjiko nchekátjehe. ⁹ A ntá tí xíkaha ách'e ts'óna to. A ntá tí náhi na ntá ts'ochrínjian chr'éxin.”

Ch'ín Jesús kjuínchekitohe jína ijnko tjan níhi tí yaon t'ok'éhe chojni

¹⁰ Ch'ín Jesús kjuák'e ch'án ijnko njnko kjuakoxin ch'án ijnko yaon t'ok'éhe chojni. ¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan. ¹² A ntá ch'ín Jesús k'uíkon ch'án kixin xíkaha tjen tjan ntá k'uíyehé ch'án tjan ntáchro ch'án kixin:

—Naná, ó kjuíinhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxín xrentoá tjan ntá chjéhe tjan kjuasáyé Dios. ¹⁴ A ntá tí ch'ín t'etoan kuènte njnko kónínkaon ch'án kixin ch'ín Jesús kjuínchekitohe jína ijnko chojni ijnko yaon t'ok'éhe sín, ntá ntáche ch'án tí chojni a kixin:

—Siín injon yaon mé chrókónhen xra chrók'uinkará chrókuítóhará jína na jehya tí yaon t'ok'éheni chrókónhen tíha —ichro ch'án.

¹⁵ A ntá Inchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintankeehyará tí koxintaará la o tí kolóchoará chrókjuíkoará va ntá tí yaon t'ok'éheni ní? ¹⁶ A ntá tí tjan mé tsík'axrjeníxin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintanka tí nkehe tsíkóntetoxín tjan tí yaon t'ok'éheni? —ichro ch'án.

¹⁷ Ntá xíkaha ichro ch'ín Jesús la ntá kaín tí sín kónínkakhenni ch'án la kósuèhe sín. A ntá kaín tí chojni siín ntaha chéhe sín k'uíkon sín kaín tí kjuaxroan jié kjuakoxin tí jehe ch'án.

*Kjuíncheyóexin ch'ín Jesús éxi ijnko tje ntsí kuènte nta mostaza
(Mt. 13.31-32; Mr. 4.30-32)*

¹⁸ Ntá ntáchro ch'ín Jesús kixin:

—¿Nkehe tóyóexin tí t'etóan Dios tí kjuachaxin kuènte ch'án la ko nkehe jína chrókjuíntayóaxian? ¹⁹ Éxi yóhe ijnko tje kuènte nta mostaza k'uenká ijnko chojni nontee ch'án. A ntá tió k'uánkí kóyóhe éxi ijnko nta jié. A ntá tí koxroxé xritjaká mé kui va kjuích'éna va káké va chrík'á tí chaon tí nta.

*Ch'ín Jesús kjuíncheyóexin éxi tí xroan t'ánkíxin niotja
(Mt. 13.33)*

²⁰ Ntá ntáchro ch'ín Jesús inaá kixin:

—¿Nkehe chrokuíntayóaxian tí t'etóan Dios tí kjuachaxin kuènte ch'án? ²¹ Éxi yóhe tí xroan nchek'ánkí niotja kjuinkíkjanxin ijnko chojni chjin iní medida harina. A ntá tí ch'o la k'uánkí.

*Tí puerta tekahya
(Mt. 7.13-14, 21-23)*

²² K'uátsínka ch'ín Jesús kaín chjasin hyé la ko kaín chjasin ntsínsí nkákjako ch'án tí tan jína kixin jehe ch'án ó sátsji ch'án chjasin Jerusalén. ²³ A ntá ijnko nkexro kjuanchankí ch'án kixin:

—Ínchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

²⁴ —Tóxakonhanrá t'ixeenxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. ²⁵ A ntá tí inché nchia ts'ikjéhe ch'án tí puerta. A ntá chr'éxin jahará ts'ejorá ntója ts'eyará ts'inkará tí puerta tsontáchrórá kixin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchrórá kixin: “Nonahya nketí k'uinkaxínrá jahará”, tsixro ch'án. ²⁶ A ntá tsjankíxinrá tsontáchrórá kixin: “Kjóneni la ko k'uíni jnkokoá la ko jaha kjuákoxian tí ntasjinni”, tsixrorá. ²⁷ A ntá jehe ch'án tsjatehe ch'án tsontáchrórá kixin: “Ó ntáxrjan janhan kixin chonhya tí jahará. Tjtohérá tí janhan sátsjirá ókjé kaín tí jahará jínahya kjuich'erá.” ²⁸ Ntaha tsotsjankará la ko sintetaónrá nénorá tió ts'ikonrá kixin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etóan ch'án, a ntá jahará la ts'axrjéxinrá ntója ntiha. ²⁹ Tsjixín chojni nó tjitoxín yaon la ko nó tjíatóxin yaon la ko nó norte la ko nó sur ntá ts'ejótjaxín sín tí tjen Dios t'etóan ch'án la sine sín. ³⁰ A ntá iso tí sín k'uítuenhen senó la mé ts'etóan sín, la ko iso tí sín k'uék'etóan senó la mé ts'ítuenhen sín.

*T'avá ch'ín Jesús
(Mt. 23.37-39)*

³¹ A ntá tí yaon a ikui iso sín fariseo ntáche sín tí ch'ín Jesús kixin:

—Sátjixian ntihi kixin ch'ín Herodes tjinkaon chrók'óyán ch'án tí jaha —ichro sín.

³² A ntá jehe ch'án kjuátehe ch'án ntáchro ch'án kixin:

—Sátjirá chenkará tí ch'ín jínahya ch'ia kixin: “Ijie la ko ntóye tsakítsje nchakuen tí jínahya la ko sintakítóha chojni níhi jína la ntá tí nixin yaon a ntá tsjixinna tí xra kuéntana,” tsixrorá. ³³ Kjánchó t'ichjánxin kixin naxa sátsjiya tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uenxín ch'án chjasin Jerusalén.

³⁴ 'Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítsará. Imá itsjé veces tjínkavan chrókójnkotsérá la chrók'uáyakonhanrá éxi ijnko cochiká mé t'ayakonhen xjeen va chrínkí kanenee va mé xikaha tjínkavan chrók'uáyakonhanrá tí jahará. Kjánchó jahará la tjínkákonhyará xikaha.

35 Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakájia tí yaon tsontáchrórá kixin: “Jína tí nkexro kjuixín kjuachaxin ihnié Ìnchéni Dios.”

14

Ch'ín Jesús kjuínchekitohe jína ijnko nkexro tsík'atjoyé kuenté

1 A ntá tí yaon t'ok'éhe sín sákjuí ch'ín Jesús ntøe ijnko ch'ín fariseo t'etøan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án. 2 A ntá ntiha ntoí chók'èxin tí tjen ch'án itjen ijnko chojni tsík'atjoyé kuenté. 3 A ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿A síin kjuachaxin sinchekitohe ní jína ijnko chojni níhi tí yaon t'ok'éheni o náhi? —ichro ch'án.

4 A ntá jehe sín la tání sín. A ntá ch'ín Jesús sákjuíko ch'án tí ch'ín níhi la kjuínchekitohe ch'án jína la k'uetuēhen ch'án kixin sátsji ch'án. 5 A ntá ntáche ch'án tí sín fariseo kixin:

—Jnkojín tí jahará chontará kolóchoará o koxintaará chrókjuítsínkáyá va tòye ¿á senóhya chrókuakítsjetaónrá va tòye kjónté yaon t'ok'éheni ní? —ichro ch'án.

6 A ntá jehe sín ninkehó kjuátēehya sín kixin xíkaha ichro ch'án.

Tí sín tsík'iyēhe sín sátsji sín kia tsíkótehe chojni

7 Ntá k'uikon ch'ín Jesús kixin tí sín tsíkóchjina tí kia a kjueyá sín silla náxrjón ts'ejóya sín tí tjen mesa ntá kjuíncheyóexin ch'án ntáchró ch'án kixin:

8 —Tió jnkojín nkexro ts'iyaha sín kixin tsjasán ijnko kia tsotehe chojni la tjéyáhya tí nta silla kuēnte tí sín t'etøan kixin ách'e tsi jnkojín nkexro antsí t'etøan 9 a ntá tí nkexro k'uiyahará yóirá itsi ch'án tsjanchará ch'án kixin t'inkátjēnxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuhá sátsjia tsjak'etjāxian tí silla kjuixixín. 10 Íchá jína tió t'iyaha sín chrókjuak'etjāxian tí silla tjetuanhya, kixin ntá chrókui tí ch'ín tsík'iyaha tsontáchró ch'án kixin: “Jína tjoni la t'atsínka tjak'etjāxian tí silla antsí náxrjón”, kixin ntaha tsjikosáyaha sín nkayakon kaín tí sín ts'ejótjāxinkoa sín ntiha. 11 Kixin tí nkexro sinchēnkehe asén kixin imá chrók'uetøan ch'án la mé chr'éxin Dios tsjanjonhya kjuachaxin kixin ts'etøan ch'án. A ntá tí nkexro k'uék'etøanhya la mé chr'éxin Dios tsjanjon kjuachaxin kixin antsí ts'etøan ch'án.

12 Kjāxin ntáche ch'án tí nkexro tsík'iyēhe ch'án kixin:

—Tió tsjāsian kia it'ø yaon la o tsonjin la t'iyēehya tí sín choxian la ko tí sín kíchuá la ko tí sín naxá kjéhya la ko tí sín rico chjino ntøa, kixin jehe sín la chr'éxin ts'iyaha sín inaá la xíkahó la ó kjuixin kjan tí k'uiyēhé sín. 13 Íchá jína chrók'uiyēhé tí sín nòa la ko tí sín tsixénká toté sín la ko tí sín xitjahya tji la ko tí sín t'ikonhya. 14 Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkítsa tí jehe sín.

Ch'ín Jesús kjuíncheyóexin ch'án éxi ijnko kia jié

15 A ntá kuínhin ijnko tí sín tjejótjāxín sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niotjā tí tjen Dios t'etøan ch'án —ichro ch'án.

16 Ntá ntáchró ch'ín Jesús kixin:

—Ijnko chojni kjuasin ijnko kia jié ijnko kónjín la k'uiyēhe ch'án nchónhya chojni tsi sín tí kia a. 17 A ntá ó kuichjina tí hora sine sín ntá k'uetuēhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyēhe ch'án kixin chrókóchjina sín kixin ó tjejóchónhen kaín nkehe sine sín. 18 Ntá kaín sín kjuankixin sín chrónòa sín kixin xitjahya tsjiji sín sine sín. A ntá tí ch'ín saoxín kjuítsjehe ch'án ntáchró ch'án kixin: “Na ntá k'uēnani ijnko nontēeni la t'ichjānxin tsjitsjeheni la xitjahya tsjijini tí t'iyēheni ch'án, ntá chénka ch'án kixin chrókónínkakuenhyani ch'án”, ichro ch'án. 19 A ntá í jnko ch'ín ntáchró ch'án kixin: “Na ntá k'uēnani in'ó yunta koxinta, a ntá t'ichjānxin tsotsjeheni á jína ch'e va

xra, ntá chénka ch'án kixin chrókónínkakuenhyani ch'án”, ichro ch'án. ²⁰ A ntá í jnko ch'ín ntáchro kixin: “Na ntá kóteheni, méxra xitjahya tsjijini”, ichro ch'án. ²¹ Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintáchro sín. A ntá tí ch'ín lámo kuínhin ch'án xikaha la ntá kónínkaon ch'án ntá ntáche ch'án tí ch'ín ch'ehe ch'án xra kixin: “Tjoka sátjia kaín ntja chjasin i la tsjioa ntihi tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya”, ichro ch'án. ²² A ntá chr'éxin ntá kjan tí ch'ín ch'e xra chénka ch'án tí lámo kixin: “Ó kjuínchexiteyáni xikaha kuétueñhenni la kjónté naxa xranka chrókui chojni”, ichro ch'án. ²³ A ntá tí ch'ín lámo ntáche ch'án tí ch'ín ch'ehe ch'án xra kixin: “Sátjia kaín ntja jie la ko kaín ntja ntsí la tétuenhén chojni siín chrókui sín chrók'uixixenhen nchia ntona naxa xranka. ²⁴ Kixin ntáxrjan kixin nijnko tí sín k'uíyaha senó chrókui sín chrókjone sín tí nkehe chrótjaha sín”, ichro ch'án.

Ixra tsochréheni Cristo

²⁵ Nchónhya chojni nkáchréhe sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kixin:

²⁶ —A ntá jnkojín chojni tsotjinkaon tsochréhe tí janhan la antsí má tjetóan chrótjuana sín la kjónté kénhyó chrótjuèhe it'é sín la ko ìné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuèhe asén sín. A ntá náhi la xitjahya ts'óna discípulo kuéntana jehe sín. ²⁷ Tí nkexro tsamáhya tí ntacruz kuénte sín tsochréhya sín tí janhan la xitjahya ts'óna discípulo kuéntana. ²⁸ A ntá jnkojín tí jahará chrókjuich'énará ijnko tjat'ò nteto, ¿á senóhya chrókjuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchoxon chrókjuixixín chrók'ónaxín tí tjat'ò a? ²⁹ A ntá tió tsjankixinrá sich'énará tí tjat'ò ntá chr'éxin xitjahya tsjixin sich'énará, ntá kaín chojni ts'ikon sín tsjanoará sín ³⁰ tsontáchro sín kixin jaha kjuankíxian kjuich'éna, a ntá jie xitjahya sinchekjixian ts'óna, tsixro sín. ³¹ A ntá jnkojín tí ch'ín rey t'etoan tsjanjonko í jnko rey t'etoan kjaxin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuachaxin ch'án tí kán mil soldado chóna tí í jnko ch'ín t'etoan. ³² A ntá tí chrókjuachahya ch'án chrókjuanjonko ch'án tí í jnko ch'ín rey, ntá naxa ikjín tjen ch'án la ichá jina chróchr'án ch'án ijnko nkexro tsochronóehe ch'án kixin chrók'uixinhya kjuanínkaon. ³³ Mé xikaha jnkojín tí jahará tí tsitóéhyará kaín nkehe ntoáhya tjenkayáxinrá xitjahya ts'óna discípulo kuéntana.

Tí xjnta tsík'ánkéhe tí jní

(Mt. 5.13; Mr. 9.50)

³⁴ A ntá jina tí xjnta, kjánchó tí chrók'uánkéhe tí jní la ntá xitjahya chrókójní inaá. ³⁵ Ntá tí xikaha la ni tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'ín Jesús.

15

Kjuíncheyóexin ch'ín Jesús éxi ijnko kolélo tsik'itjayan

(Mt. 18.10-14)

¹ Kaín tí sín nchekjènkí la ko tí sín chóna nchónhya jie kóchjinehe sín tí ch'ín Jesús kixin tjinkaon sín chrókuinhin sín tí nkehe tjechronka ch'án. ² A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'ín i la kjónté tí sín chóna nchónhya jie la t'ito ch'án la ko neko ch'án —ichro sín.

³ Ntá ch'ín Jesús kjuíncheyóexin ch'án ntáchro ch'án kixin:

⁴ —A ntá jnkojín tí jahará, tí chontará ijnko ciento kolélo ntá chrók'uitjayan ijnko va, ¿á chrókuitóéhyará tí noventa y nueve va tí nteje ó, a ntá á chrókjuíkjayáhyará tí ko tsík'itjayan hasta chrók'uitjajará va ní? ⁵ A ntá tí ts'itjará va ntá tsamará va tsocháhará. ⁶ Ntá tió tsokjanrá ntoará ntá ts'iyehérá kaín tí sín choxinrá tjórá jina la ko tí sín chjinaxón ntoará ntá tsontácherá sín kixin: “Tsochéheni ts'ejóni jie kixin ó k'uitjá tí kolélo tsík'itjayan.” ⁷ Na

mé kjaxin xikaha tsotjonkará kixin antsí tsochéhe kaín tí sín siín nkaya nkajní tió ijnko chojni tsítóhe kaín tí jie tsikjenkayáxin ch'án. Ntá kánhyó tsochéxin tí sín nkaya nkajní kixin tí noventa y nueve chojni jína t'ichjánxienhya chrókjuinkí sín tí nkehe tjenkayáxin sín.

Kjuíncheyóexin ch'án éxí chichaon k'uitjáyan

⁸ 'A ntá ijnko chojni chjin chóna ite chichaon, a ntá tí chrókjuinçek'itjáyan tjan ijnko tí chichaon a la, ¿á chrókjuinçek'ákjenhya tjan xrohi kixin chrókjueyáxin tjan la ko chrok'uánjón tjan tí nchia kixin chrótsjehe tjan jína hasta chrók'uitjajia tjan? ⁹ 'A ntá tió chrók'uitja tjan la ts'iyehé tjan kaín tí chojni chjin jína tjo tjan la ko tí sín chjinaxón ntoe tjan la ntá tsontáche tjan sín kixin: “Tsochéheni ts'ejóni kixin ó k'uitjani tí chichaon kjuínçek'itjáyani.” ¹⁰ Ntá kjaxin xikaha tsotjonkará kixin imá tsochéhe kaín tí sín ángel kuènte Dios tió ijnko chojni tsítóhe kaín tí jie tsikjenkayáxin ch'án.

Ch'ín Jesús kjuíncheyóexin ch'án éxí ijnko ch'ín kuicháxinhin chichaon

¹¹ Kjaxin ntáchro ch'ín Jesús kixin:

—Ijnko nkexro chóna yaá xjeen ch'án. ¹² 'A ntá tí ch'ín tsoyo ntáche ch'án tí it'é ch'án kixin: “It'éni, chjehéni kaín nkehe chróchjehéni.” 'A ntá tí it'é sín k'óchrít'ohé ch'án tí nkehe chóna ch'án. 'A ntá tí ch'ín tsoyo k'uáyéhe tí nkehe kuènte ch'án. ¹³ 'A ntá kánhyó tsjé yaon chr'éxin tí xjeen ch'án tsoyo kjuínçekji ch'án kaín nkehe tsík'áyéhe ch'án, ntá sákjuíko ch'án tí chichaon sákjuí ch'án ókjé chjasin kjín. 'A ntá ntiha kjuínchexénhen ch'án kaín chichaon chóna ch'án kixin jehya tí jína kjuích'e ch'án. ¹⁴ 'A ntá tió kjuixin kjuèhe ch'án tí chichaon kuicháxinhin ch'án ntá xrínahya kókjinta tí chjasin ntiha ntá kohya nkehe sine kaín sín. 'A ntá jehe ch'án kjuankíxin ch'án t'énxín ch'án kjinta. ¹⁵ Ntá jehe ch'án sákjuíkjayá ch'án xrā sich'e ch'án. Ntá chjasin ntaha tjen ijnko ch'ín kjuanchehe ch'án xrā. Ntá tí ch'ín a kjuanjón ch'án xrā ntá k'ueŋtoan ch'án kixin sátsji ch'án nontee ch'án kixin ntiha ts'ayakonhen ch'án cochíno. ¹⁶ 'A ntá jehe ch'án t'énxín ch'án kjinta ntá tjinkaon ch'án chrókjóne ch'án tí nkehe ine tí cochíno kixin ninkexró tí ntiha chrohya tsjanjon nkehe sine ch'án. ¹⁷ Ntá jehe ch'án kjuák'e ch'án kjuenkayáxin ch'án kixin: “Nchónhya chojni siín ntoe t'aná ch'e sín xrā la chóna sín nkehe sine sín. Ntá janhan tjét'énxian kjinta ntihi. ¹⁸ Ntá jie tsokjan tí tjen t'aná la ntá tsontáxrjan kixin: It'éni, kjuasinni jie kuítékakuenhya It'éni nkaya nkajní la ko kjuasinhanni jie kuítékakuanhyani tí jaha. ¹⁹ Tósuèheni tsontáchrúa kixin xjaan tí jeheni. Ch'éneni éxí ijnko chojni t'aha xrā”, mé xikaha kjuenkayáxin ch'án tsontáchró ch'án. ²⁰ Ntá kuákja ch'án ntja xrakoa ch'án tí ntoe it'é ch'án.

'A ntá kjónté naxa kjín kui ch'án a ntá tí it'é ch'án la ó tsík'ikon ntá kujkonóehé ch'án tí xjeen ch'án. Ntá kuínká ch'án la kjuíxinhin ch'án ntja la kjóa ch'án la ko kjóneko ch'án kochíto. ²¹ Na ntá ntáchro tí xjeen kixin: “It'éni kjuasinni jie kuítékakuanhyani Dios la ko kjuasinhanni jie kuítékakuanhyani tí jaha. Tósuèheni tsontáchrúa kixin xjaan tí jeheni”, ichro ch'án. ²² 'A ntá tí it'é ch'án k'uíyehé ch'án tí sín ch'ehe ch'án xrā ntáchro ch'án kixin: “Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án totjoa. ²³ La ko tjicakjínra koxintáxjan tsanká la t'oyánra va kixin sinekoni ch'án tsjasinhinni ch'án kia. ²⁴ Kixin tí xjanna i la éxí ó tsík'en ch'án xikaha ntá jie la éxí ó xechón ch'án la tsík'itjáyan ch'án la ntá jie la ó kónoxín ch'án inaá”, ichro ch'án. Ntá kjuankíxin sín kjuasin sín kia.

²⁵ 'A ntá tí xjeen ch'án sao la nonte tjech'e ch'án xrā. 'A ntá tió kjan ch'án kui ch'án chjinaxón nchia ntá kuínhin ch'án siín són la ko ité sín. ²⁶ Ntá k'uíyehé ch'án ijnko ch'ín ch'e xrā ntá kjuanchankíhi ch'án kixin nkekuènte xikaha sitónhen. ²⁷ 'A ntá tí ch'ín a ntáchro ch'án kixin: “Kíchuá la ó tsíkjan. 'A ntá it'á la k'ueŋtoan k'uén koxintáxjan tsanká kixin jína xíkjan ch'án”, ichro ch'án. ²⁸ 'A ntá tí ch'ín sao la kónínkaon ch'án chrohya ch'án ts'ixenhen ch'án nchia. 'A ntá tí it'é ch'án k'uaxrjexín nchia chronóehé ch'án kixin

chrók'uixenhen nchia. ²⁹ Kjánchó jehe ch'án kjuátehe ch'án ntáche ch'án it'é ch'án kixin: “Nchónhya nánó t'ahani xra, la xráxín kuítekakonhanni kaín nkehe kuétoan la kjuánjonhya nijnko koténtso chrókjónekoni tí sín chóxinni. ³⁰ A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naxa t'oyán koxintáxjan tsanka”, ichro ch'án. ³¹ A ntá ntáchro tí it'é ch'án kixin: “Xjeenni jaha, xráxín tjejóko kíchó ní ntihi. Kaínxín nkehe kuéntana la kuénta jaha kjaxin. ¿Nkekuènte ninkávan? ³² A ntá jie la t'ichjánxin tsjasinhinni kichuá kia tsochéheni kixin éxí tsík'en ch'án la ntá jie la ó tsíxechón, la tsík'itjáyan ch'án xikaha la ntá jie la kónoxín ch'án inaá.”

16

Ch'ín Jesús kjuíncheyóexin ch'án éxí tí ch'ín k'uáyéhe xra la ntá kjuích'ehya xra jína

¹ Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etóan tsonhen xra. Ntá kui ijnko nkexro chénka tí lamó kixin: “Tí nkexro t'etóan nchexénhen ch'án tí nkehe chonta”, ichro ch'án. ² A ntá tí ch'ín lamó k'uíyehé ch'án tí ch'ín ch'ehe ch'án xra ntáche ch'án kixin: “¿Á chaxín xikaha ch'e kixin xikaha ichro sín? A ntá jie tsjánjuan jaha kuentá tí xra kjuích'e kixin ijie í sich'ehya xra tsétoan ntihi”, ichro ch'án. ³ A ntá tí ch'ín t'etóan tónhen xra kjuenkayáxin ch'án kixin: “¿Nkehe chrókjuít'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nontee chojni la ko tósuàna kixin chrók'uájia chrókjuánchák'á nkehe. ⁴ Ó nòna nkehe sít'a kixin ntá tsochonta nkexro tsjanjon kjuachaxin tsjak'é ntóe sín tí í tsochontahya xra sít'a”, ichro tí ch'ín t'etóan. ⁵ Ntá k'uíyehé ch'án jnkojnko jnkojnko tí sín síkéhe tí lámoe ch'án. A ntá tí ch'ín saó kui ntá tí ch'ín t'etóan mé kjuanchankíhi ch'án kixin: “¿Nkekjaín tjasikéhe lámóeni?” ichro ch'án. ⁶ A ntá jehe ch'án kjuátehe ch'án ntáchro ch'án kixin: “Síkani ijnko ciento ntabarril aceite”, ichro ch'án. A ntá tí ch'ín t'etóan ntáchro ch'án kixin: “Ntihi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án. ⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjasiká?” ichro ch'án. Ntá ntáchro ch'án kixin: “Ijnko ciento medida noatrigó síkani”, ichro ch'án. A ntá ntáchro tí ch'ín t'etóan kixin: “Tí xikaha la ntihi tjen tí xroon tsjénkaxian. A ntá jie la ch'éna ochenta ó”, ichro ch'án. ⁸ A ntá tí ch'ín lamó kjuátsoan ch'án kixin kjónté jehya xra jína kjuích'e tí ch'ín t'etóan kjuích'ehe ch'án xra la kjánchó tí kjuích'ia ch'án la antsí nohe ch'án kjuích'ia ch'án. Méxra tí sín chjasintajni antsí nohe sín ch'iyehe kíchó sín, a ntá tí sín ixrí tí t'inkaséyan la xikahya chrókjuenkayáxin sín chrókjuich'ia sín, chrókjuenkayáxin sín tí jína.

⁹ Janhan la tétuanhanrá kixin chrókuicháxinhanrá tí chichaon sín chjasintajni kjónté tjuáhya kixin tsjínkítará chojni kixin ntá itsjórá sín jína. A ntá tió tsjeje kaín chichaon ntá jehe sín ts'ejóchónhen sín nkaya nkajni ts'áyáhará sín jnkochríxín.

¹⁰ Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án. ¹¹ Mé xikaha tí xitjahya t'ayakonhénra tí chichaon kuènte chjasintajni ntihó la, ¿ntá nkexrí chrók'uayéhérá nkehe tjete chaxín kuènte nkaya nkajni? ¹² Mé xikaha tí kjuachahyará k'uáyakonhénra tí chichaon kuènte ókjé nkexro, ¿ntá nkexro chrótjáhará jahará tí nkehe chaxín tjete chrók'uáyakonhénra?

¹³ Nijnko nkexro xitjahya sich'ehe yaá lamó xra kixin ijnko la tsonínkakonhen ch'án la ko tí í jnko tsotjuèhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuich'ehe chojni xra Dios tí tjinkaon sín tsochóna sín itsjé chichaon —ichro ch'án.

¹⁴ A ntá tí sín fariseo imá kóxrjínhjn sín chichaon, ntá kuínhin sín kaín tíha nkerí ichro ch'ín Jesús, ntá kjuanoá sín ch'án. ¹⁵ Na ntá ch'ín Jesús ntáche ch'án sín kixin:

—A ntá jahará tjinkáonrá chrók'uejóxjnrá jína nkayakon chojni. A ntá Dios la chóxin ch'án asánrá. A ntá tí nkehe imá tóxrjínhjn ch'e chojni la Dios la tóxrjienhya ch'án.

Tí ley la ko tí t'etōan Dios tí kjuachaxin kuente ch'án

¹⁶ Naxa kjuakohya ch'ín Juan la k'uékjako sín tí ley kuente ch'ín Moisés la ko tí nkehe k'uékjin tí sín k'uéchronka itén Dios ósé. A ntá kui ch'ín Juan la chrónka ch'án tí tan jína nkexrí ts'etōan Dios tí kjuachaxin kuente ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etōan ch'án.

¹⁷ Antsí xrahya chrók'uitjáyan tí nkehe siín nkajni la ko chjasintajni. A ntá xitjahya kixin chróxiteyáhya kjónté ijnko nkehe ntsí t'etōan tí ley.

*Ch'ín Jesús tjako ch'án kixin chrókjuákehya kichó chojni
(Mt. 19.1-12; Mr. 10.1-12)*

¹⁸ A ntá ijnko chojni tsjakehe ichjién la ntá tsakja ch'án í jnko chojni chjin la ijie tíha. A ntá tí ch'ín tsakja ijnko tjan tsíkítsínkehe la kjaxin ijie tíha.

Tí ch'ín rico la ko tí ch'ín Lázaro

¹⁹ Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia. ²⁰ A ntá ntója ntōe ch'án kjuák'etjaxin ijnko ch'ín nòa mé it'in ch'án Lázaro tjanchak'á ch'án la ko níhi ch'án tsíchr'enka kuenté ntōe ch'án. ²¹ A ntá tí ch'ín nòa la imá kjuak'e asén ch'án chrókjónē ch'án la ko chrókókjeexín ch'án tí nkehe tot'ō tsjixènjinkixin mesa kuente tí ch'ín rico. A ntá tí koniā la kjuamá va tí tosóa chóna ch'án. ²² A ntá ijnko yaon mé ik'uén tí ch'ín nòa. A ntá tí sín ángel mé sákjuiko ch'án tí náxrjón tjen ch'ín Abraham. La ko kjaxin ik'uén tí ch'ín k'uéríko la sákjuikjavá sín ch'án. ²³ Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uíkon ch'án kixin ikjín náxrjón tjen ch'ín Abraham tjeko ch'án tí ch'ín Lázaro. ²⁴ Ntá k'uèya tí ch'ín k'uéchóna tsjé nkehe ntáchro ch'án kixin: “It'eni Abraham, tikonóana tétuēnhén tí ch'ín Lázaro kixin sinchekjataxín ch'án kóhe dedo tja ch'án ìntā ntá tsi ch'án tsjak'etak'á ch'án nejen kixin tsoxruehe kixin tjinahya sóa tí xrohi siín ntihi”, ichro ch'án. ²⁵ Kjánchó ntáchro ch'ín Abraham kixin: “Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uáyéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe. ²⁶ A ntá kjaxin jnkosiné tjen tsaka imá jie xitjahya ts'átōye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átōye sín itsji sín ntihi”, mé ichro ch'ín Abraham. ²⁷ A ntá tí ch'ín k'uéríko mé ntáchro ch'án kixin: “Ntá xrjanóaha jaha It'eni Abraham kixin tétuēnhén tí ch'ín Lázaro sátsji ch'án ntōe t'aná ²⁸ kixin ntaha kuítóhe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhya ntihi”, mé ichro ch'án. ²⁹ Kjánchó kjuátehe ch'ín Abraham ntáchro ch'án kixin: “Ó chóna sín tí nkehe tsíkjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsintáchro tí sín a”, ichro ch'án. ³⁰ Ntá ntáchro tí ch'ín a inaá kixin: “Náhi, It'eni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókuítóhe sín ijie sín”, ichro ch'án. ³¹ Ntá ntáchro ch'ín Abraham kixin: “Tí tsitekakonhya sín tí nkehe tsintáchro ch'ín Moisés la ko tí nkehe tsintáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka inaá”, ichro ch'án.

17

*Tí kjuaxikaon naxa tjasin chojni jie
(Mt. 18.6-7, 21-22; Mr. 9.42)*

¹ Ch'ín Jesús ntáche ch'án tí sín k'uájiko ch'án kixin:

—Xrácín siín nkehe tsjasixín chojni jie. Kjánchó nòà tí nkexro tjasin tí nkehe tsjasixín chojni jie. ² Íchá jína chrókjuincheteyá sín ch'án ijnko xro tsík'óna xrochre chrókjuikákánkí sín ntayaon kixin tjasin ch'án tí nkehe tsjasixín jie ijnko chánjan naxa noehya. ³ Tóxakonhanrá kixin xikahya chrókjuásinrá nkehe.

'A ntá tí kichuárá chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jína tí xikaha kjuít'ahará ch'án. A ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjáyahanrá tí nkehe kjuít'ahará ch'án. ⁴ Kjonté chrókjuasinhanrá ch'án jie yato veces jnkokoá yaon la ko yato veces chróntáchro ch'án kixin í xikahya tsjasin ch'án jie inaá, la t'ichjánxin ts'itjáyahanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kixin tinkáchónkini Cristo

⁵ Ijnko yaon tí sín k'uájiko Ìnchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

⁶ A ntá Ìnchéni ntáchro ch'án kixin:

—Kjonté intsí chrókuinkáchónkirá tí janhan éxí jiéxin ijnko tje ntsí kuènte nta mostaza la jína chrókuétuènhénrá tí nta sicómoro kixin chrók'uaxrjenkixin tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókjuinchexiteyá tí xikaha chróntáchrórá.

Nkexrí chrókjuinchexiteyá tí nkexro ch'e xra

⁷ Jnkójín tí jahará tí chróchontará ijnko nkexro t'ahará xra, a ntá tí chrókjanxin ch'án nontaará kjuínchentá ch'án nche o k'uàyakonhen ch'án tí ko kuèntará, ¿á chróntácherá ch'án kixin senó chrókjuak'e ch'án chrókjóne ch'án? ⁸ Kjá náhí. Kjá chrókuétuènhénrá ch'án kixin senó chrókjuinchechján ch'án tí nkehe sinte la ko chrókóyaxínhin ch'án kixin tsjanjon ch'án nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'án sine ch'án la ko its'i ch'án. ⁹ ¿Á chrókjuanchehérá ch'án kjuasáya kixin kjuínchexiteyá ch'án tí nkehe kuétuènhénrá ch'án? Kjá náhí. ¹⁰ Mé kjaxin xikaha tí jahará tió chrókjuixin kaín tí xra k'uetuanhanrá Dios chróntáchrohyará kixin jína kjuich'erá xra kixin ó jehó tí nkehe k'uítuanhanrá kjuinchexiteyará, tsixrorá.

Ch'ín Jesús kjuínchekitohe ch'án jína ite chojni chóna chinlepra

¹¹ Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea. ¹² Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín ¹³ ntá itsen k'uíyehé sín ch'án ntáchro sín kixin:

—Jesús, Maestro, tikonóehéni kaín ni —ichro sín.

¹⁴ Ntá k'uíkon ch'ín Jesús tí jehe sín ikjín tjejó sín ntáche ch'án sín kixin:

—Sátsjirá tjácohérá tí sín nchat'á kixin ó kuítóhará jína, ichrorá.

Nachrohe sákjuí sín tinkákitohe sín jína. ¹⁵ Ntá ijnko tí jehe sín tió kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án. ¹⁶ Kjuák'exín toch'ín ch'án chrínkí toté ch'ín Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'ín a mé tsíkjixín ch'án estado Samaria. ¹⁷ A ntá ch'ín Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina? ¹⁸ ¿Á jehó tí ch'ín i kjonté ikjín tsíkjixín ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹ A ntá ntáche ch'án tí ch'ín a kixin:

—T'ínkatjen sátsjia. Kixin tí kuítékávan Dios la kuítóha jína —ichro ch'án.

Itsi tí kjuachaxién Dios (Mt. 24.23-28, 36-41)

²⁰ A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuènte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuènte Dios la me tíha ijnko nkehe xitjahya ts'ikon chojni.

²¹ Xitjahya tsontáchrór kixin: “Ntihi tjen,” o “Ntiha tjen”; kixin tí kjuachaxin kuènte Dios itjen jnkosiné tí tjejorá —ichro ch'án.

²² Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkójín yaon chrók'uikonrá tí Xjeen Dios K'óna Chojni, ntá í ts'ikonhyará ch'án. ²³ Tsontáchró sín kixin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín. ²⁴ Kixin éxí ts'ikonrá tsjonkíxín ts'inkaséyanxín kuenté nkajní mé xikaha tsonhen tió itsi tí Xjeen Dios K'óna Chojni. ²⁵ T'ichjánxín senó tsjasóte ch'án nchónhya la ko tí sín síin jie tsitekakuenhya sín ch'án. ²⁶ Éxí kónhen tí yaon kjuák'e ch'ín Noé mé xikaha tsonhen tió tsokjan tí Xjeen Dios K'óna Chojni. ²⁷ K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uixenhen ch'ín Noé tí ntabárcō ntá k'uániá chrin, a ntá tí sín kuítóhe ntója la kaín sín k'uitjayan sín.* ²⁸ Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enka sín nontee sín la ko k'uékjich'ena sín nchia. ²⁹ A ntá tí yaon k'uaxrjexín ch'ín Lot tí chjasin Sodoma, na mé nkajní kuixín xrohi la ko azufre, na mé tíha k'uénxín kaín xín tí sín ntiha.† ³⁰ Mé xikaha tsonhen tí yaon itsi tí Xjeen Dios K'óna Chojni.

³¹ A ntá tí yaon i tí tjejó jnkójín nkexro chrítaón nchia tjejót'ok'éhe sín, a ntá ichrén nkehe chóna sín kuítóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjui sín ókjé. Kjaxin xikaha jnkójín chojni tjejó sín nontee sín la í chrókjanhya sín ntoe sín. ³² Xráxinkáonrá nkehe kónhen ichjién ch'ín Lot.‡

³³ Tí nkexro tjinkaon kixin kohya nkehe chrókónhen na mé ts'itjayan. A ntá tí nkexro chrókjuinchekitjayanxín asén kixin chróchronka itén Dios la mé tsaá. ³⁴ A ntá tsontáxrjan kixin tí tie a jnkokoá ts'ejójua yaá chojni la ijnko la sátsji la ko tí í jnko la tsitohe. ³⁵ Yaá chojni chjin its'o sín jnkokoá, la ijnko la sátsji la ko ijnko la tsitohe. ³⁶ Yaá chojni ts'ejóch'e sín xra nonte, la ijnko la sátsji a ntá ijnko la tsitohe —ichro ch'án.

³⁷ Ntá kuínhin sín tíha ntá kjuanchankíhi sín ch'án kixin:

—¿Xá nketí tsonhen tíha, Inchéni? —ichro sín.

A ntá jehe ch'án kjuátehe ch'án ntáchro ch'án kixin:

—Tí tjen tí cuerpo kuènte chojni tsík'en la mé ntiha tsojnkotsé tí kontexjuen —ichro ch'án.

18

Ch'ín Jesús kjuíncheyóexin ch'án éxí ijnko tjan k'án la ko ijnko ch'ín juez

¹ A ntá ch'ín Jesús kjuíncheyóexin ch'án kjuakoxin ch'án kixin jnkochrínín chrónixjehe chojni Dios la ko chrókóxrjéhya sín. ² Ntá ntáche ch'án sín kixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró. ³ Kjaxin chjasin ntiha kjuák'e ijnko tjan k'án, jnkoyaxón sákjuitsjehe tjan tí ch'ín juez kjuanchia tjan jie ntáchro tjan kixin chrókuítóexín kixin ijnko chojni nínkakonhen tjan ntiha. ⁴ Nchónhya veces tjitsjehe tjan tí ch'ín juez la chrohya ch'án chrókjuinchekitóexín ch'án. Ntá chr'éxín kjuenkayáxin ch'án ntáchro ch'án kixin: “Kjonté í tsjikosáyàhya Dios la ko ninkexró tsjikosáyàhya ⁵ a ntá tí tjan k'án jnkoyaxón tjanchia tjan jie, la tsjínkítsa tjan tsitoexín tí jie tjanchia tjan kixin í jnkoyaxónhya itsi tjan tsochronòa tjan kixin ó kjuixin kónínkavan jie”, ichro ch'án.

⁶ Ntá ntáchro Inchéni kixin:

* 17:27 17.26–27 Génesis 6.5–7.24 † 17:29 17.28–29 Génesis 18.20–19.25 ‡ 17:32 Génesis 19.26

—Mé xikaha ichro tí ch'ín juez jínahya. ⁷ ¿Xá chrókjuinkitsahya Dios tí sín kjueyá ch'án tí chróchronóehē sín ch'án nchakotjin la ko tie? ¿Á tjokahya chrókjuatehe chrókjuinkitsa sín ch'án? ⁸ Ntáxrjan kixin kjá tjoka chrókjuinkitsa sín ch'án. A ntá tió itsi tí Xjeen Dios K'óna Chojni, ¿á naxa chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxí ijnko ch'ín fariseo la ko ijnko ch'ín nchekjènkí

⁹ Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín kixin imá jína sín a ntá tí í so sín la náhí, ichro sín. Ntá ntáchro ch'án kixin:

¹⁰ —Iyó sín ntoa sákjuí nkaxenhen nínko kixin tsonixjehe sín Dios. Ijnko la fariseo la ko ijnko la ch'ín nchekjènkí. ¹¹ A ntá tí ch'ín fariseo tjexín ch'án toté ch'án nixjehe ch'án Dios ntáchro ch'án kixin: “It'éni Dios, kjuasáya tjahá kixin jeheni la chóntahyani jje éxí tí sín í so kixin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxí tí ch'ín nchekjènkí tjinhin. ¹² Jeheni la nehyani iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án. ¹³ A ntá tí ch'ín nchekjènkí la imá kjín kuitohe ch'án kóxakonhen ch'án chrókonta ch'án nkajní la mé chjéhe ch'án ntakuin ch'án ntáchro ch'án kixin: “It'éni Dios tikonóehéni tí jeheni kixin nchónhya jje chóntani”, ichro ch'án. ¹⁴ Tjonkará kixin tí ch'ín nchekjènkí tió kjan ch'án ntoe ch'án la Dios kuikonóehé tí jehe ch'án la kjuinhin ch'án tí jje chóna ch'án, a ntá tí ch'ín fariseo la náhí. Kixin kaín chojni nchehnkehe asén kixin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

Ch'ín Jesús kjuíncheyaon ch'án chánjan

(Mt. 19.13-15; Mr. 10.13-16)

¹⁵ Kjaxin kjuikao sín chánjan ntsíntsí tí tjen ch'ín Jesús kixin chrókjuincheyaon ch'án xjan. Kjánchó tió k'uíkon tí sín k'uájiko ch'án la í kjuanjonhya sín kjuachaxin kixin tsochjinako sín xjan. ¹⁶ A ntá ch'ín Jesús k'uíyehé ch'án sín ntáchro ch'án kixin:

—Tjtoherá chánjan méhe xrakoa tí tjen janhan la t'ínkakuènhyará xjan kixin tí sín kuènte kjuachaxin kuènte Dios la mé tóyóhe tí jehe xjan. ¹⁷ Ntá chaxín ntáxrjan kixin tí nkexro ts'ónahya éxí ijnko chánjan xitjahya ts'ejó sín tí ts'etoan Dios tí kjuachaxin kuènte ch'án.

Ijnko ch'ín ntasoá ríco kjuínixjehe ch'án tí ch'ín Jesús

(Mt. 19.16-30; Mr. 10.17-31)

¹⁸ Ijnko ch'ín t'etoan kuènte nínko kjuanchankíhi ch'án tí ch'ín Jesús kixin:

—Jaha la ijnko maestro jína la, ¿nkehe naxa t'itjáyan chrókjuich'eni kixin chróchóntani kjuachón jnkochrín? —ichro ch'án.

¹⁹ Ntá kjuátehe ch'ín Jesús ntáchro ch'án kixin:

—¿Nkekuènte ntáchrúa kixin jína tí janhan? Jnkokoá nkexro la mé jína la tíha mé Dios. ²⁰ Jaha la ó noha nkehe tí k'ueetoan Dios kixin chrókjuacheéhya kichuárá, la ko chrók'oyánhya chojni, la ko chrókueehya, la ko chróntáchróhya ninkehó nkehe chaxínhya kuènte ókjé chojni, la ko chrókjuíkosáyehé it'á la ko iná —ichro ch'án.

²¹ A ntá jehe ch'án kjuátehe ch'án ntáchro ch'án kixin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kixin:

—A ntá jnkokoá nkehe naxa t'itjáyan chrókjuich'e, chrókjuínchekjia kaín nkehe chonta la chróchjehé tí chichaon tí sín nòa. A ntá tí nkehe tjete la tsochonta nkaya nkajní. A ntá tió tsjixin sinchekitonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xikaha la kóxakonhen ch'án kixin imá itsjé nkehe chóna ch'án. ²⁴ Tió k'uíkon ch'ín Jesús kixin kóxakonhen tí ch'ín a la ntá ntáchro ch'án kixin:

—Imá xrá kixin tí chojni chóna itsjé nkehe chrók'uixenhen sín tí tjen Dios t'etoan.

²⁵ Antsí xrahya chrók'uatsínka ijnko kocamello ijnko tjar'i ntachica tjexrja, a ntá antsí má xrá kixin ijnko chojni chóna itsjé nkehe chrókjuak'e tí t'etoan Dios —ichro ch'án.

²⁶ **A** ntá kuínhin sín kixin xikaha ntáchro ch'án ntá ntáchro sín kixin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kixin:

—Tí nkehe tsjachahya chojni chrókjuinchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ **A** ntá ch'ín Pedro ntáchro ch'án kixin:

—Ínchéni, jeheni la ó kuítóheni kaín nkehe chóntani kixin tsochréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Ntá chaxín tsotjonkará kixin jnkójnra chrókuítóhéra ntoa, la o chrókuítóhéra it'á la ko iná, la o chrókuítóhéra kichuára, la o chrókuítóhéra ichjiánra, la o chrókuítóhéra xjaanra kixin chrókjuich'era xra kuente Dios ³⁰ la antsí nkehe ts'ayéhéra ntihi chjasintajni la ko tí chr'éxin la ts'ayéhéra kjuachón jnkochrín —ichro ch'án.

Ch'ín Jesús chrónka ch'án inaá kixin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uíyehé ch'án jehó tí teyó sín k'uájiko ch'án ntá chrónka ch'án kixin:

—Ijie sátsjini Jerusalén. **A** ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni. ³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhin sín ch'án la ko ntate sín tsíkite sín ch'án.

³³ Tsjate sín ch'án, a ntá chr'éxin la ts'óyán sín ch'án. **A** ntá nixin yaon tsoxechón ch'án —ichro ch'án.

³⁴ **A** ntá jehe sín la ninkehó kienxínhya sín tí nkehe nixja ch'án kixin tíha ijnko nkehe naxa tsjachahya sín chrókienxín sín.

Ch'ín Jesús kjuínchekitohe ch'án jína ijnko chojni t'ikonhya chjasin Jericó

(Mt. 20.29-34; Mr. 10.46-52)

³⁵ **A** ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntja tjetjaxin ijnko ch'ín t'ikonhya tjanchak'á ch'án. ³⁶ Ntá xrínahya kuínhin tí ch'ín t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

³⁷ Ntá chénka sín ch'án kixin ch'ín Jesús tsíkjin chjasin Nazaret ts'atsínka ch'án ntiha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'ín David, tikonóehéni —ichro ch'án.

³⁹ **A** ntá tí sín tsítaón ntja la k'uetuenhen sín ch'án kixin tsotání ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'ín David, tikonóehéni —ichro ch'án.

⁴⁰ **A** ntá ch'ín Jesús ntá ntahó kjuák'echónhen ch'án ntá k'uetuan ch'án kixin tsjikakjín sín tí ch'ín a. Ntá tió kuikao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Ínchéni, tjinkaonni chrókjuínchek'ikuanni —ichro ch'án.

⁴² Ntá ntáchro ch'ín Jesús kixin:

—Ó ts'ikuan. Ó kuítóha jína kixin kuítekávan tí janhan —ichro ch'án.

⁴³ Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xikaha kónhen kjuanchehe sín kjuasáyé Dios.

¹ A ntá ch'ín Jesús k'uixenhen ch'án chjasin Jericó la ntá k'uátsínka ch'án tí chjasin a. ² A ntá ntiha tjen ijnko chojni ríco it'in ch'án Zaqueo, t'etuenhen ch'án tí sín nchekjènkí. ³ Tjinkaon ch'án chrókjuatsōan ch'án nkexro tí ch'ín Jesús, kjánchó nchónhya chojni síin la xitjahya t'íkon ch'án kixin intsi ch'án. ⁴ Ntá kuinká ch'án kuítaón ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús. ⁵ A ntá tió k'uatsínka ch'ín Jesús ntiha konta ch'án tí nta ntáchro ch'án kixin:

—Zaqueo, tjoka tjasinkajián kixin ntoa ntahó tsitona jie —ichro ch'án.

⁶ Ntá ch'ín Zaqueo la tjoka k'uínkajin ch'án kóchéhe ch'án. ⁷ Ntá kaín sín k'uíkon sín xikaha ntá kjuankixin sín tjonta sín tí ch'ín Jesús, ntáchro sín kixin ntoe ijnko chojni chóna nchónhya jie tsitohe ch'án. ⁸ Ntá ch'ín Zaqueo kjuák'exín toté ch'án ntáche ch'án Ìnchéni kixin:

—Jaha Ìnchéni, chrókónoha kixin tsjánjuan jnkosiné tí nkehe chonta sintakitonhan tí sín nòa. A ntá tí jnkójín nkexro kjuít'áyaha kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'ín Jesús kixin:

—A ntá jie la tsaá chojni tí nchia i kixin tí ch'ín a mé k'uaxrjeníxin ch'ín Abraham. ¹⁰ A ntá tí Xjeen Dios K'óna Chojni mé kuikjeyá la ko sinchekaá tí chojni chóna jie.

Ch'ín Jesús kjuíncheyóexin ch'án éxí ite chichaon imá tjete sínkí

¹¹ A ntá tí chojni síin ntiha nachrohe tjejótinhin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuènte Dios la ách'e ó tuénxín tsi, ichro sín.

¹² A ntá ntáchro ch'án kixin:

—Itjen ijnko nkexro tsík'axrjeníxin ijnko nkexro imá k'uék'etoan. Ntá sákjuí ch'án ókjé nación kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá.

¹³ A ntá tió chjina sátsji ch'án ntá k'uíyehé ch'án ite tí sín ch'ehe ch'án xra ntá chjéhe ch'án jnkójnko tí jehe sín jnkójnko chichaon imá tjete sínkí. Ntá k'uetōan ch'án kixin:

“Tsjankíxinrá ch'ekoará xra tí chichaon hasta tí tsokjanjian”, ichro ch'án. ¹⁴ A ntá tí sín chjasén ch'án ntiha imá kónínkakonhen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín síin ntiha kixin tjinkakonhya sín tí nkexro a ts'óna rey ts'etuenhen sín. ¹⁵ Kjónté xikaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetōan ch'án xrakoa tí sín ch'ehe ch'án xra, na mé tí sín tsík'áyéhe tí chichaon, kixin tsonohe ch'án nkehe tí xra kjuích'eko sín tí chichaon k'uáyéhe sín. ¹⁶ A ntá tí ch'ín xrankíxixín kóchjina la ntáchro ch'án kixin: “Tí chichakoan la kjuachani ite chichaon inaá”, ichro ch'án. ¹⁷ A ntá kjuátehe tí ch'ín rey kixin: “Ó nchoxon tí xikaha jaha la ijnko chojni jina ch'e xra. Jina kjuích'e xra kjónté jehya xra jie ntá tsjánjuan kjuachaxin tsétoan ite chjasin”, ichro ch'án. ¹⁸ A ntá kóchjina tí ch'ín íjnko a inaá ntáchro ch'án kixin: “Tí chichakoan la kjuachani in'ó chichaon inaá”, ichro ch'án. ¹⁹ A ntá xikaha inaá kjuátehe tí ch'ín rey kixin: “Tsjánjuan kjuachaxin tsétoan in'ó chjasin”, ichro ch'án. ²⁰ A ntá kóchjina tí ch'ín níxin ntáchro ch'án kixin: “Tí chichakoan la tjinhin. K'uánkintani panítóeni ²¹ kixin chrakonhanni kixin jaha la jiaha la tjinkávan tsákjá tí nkehe jehya jaha kjuaké la ko tsotja tí nkehe jehya jaha kuènkaxian”, ichro ch'án. ²² A ntá tí rey ntáchro ch'án kixin: “Jehya chojni jina ch'e xra jaha. Tí nkehe ntáchrúa tsjáncháxian jie. Jaha la ó noha kixin jiena janhan tsákjaá tí nkehe kjuakéhya, ichrúa, la ko tsotja tí nkehe kuènkahya. ²³ ¿Ntá nkekuènte kixin chr'anhya tí chichaon ijnko banco chrókjuich'exín xra? A ntá tió kjan ntōna la antsí tsjé chichaon chrók'uayáha tí chrókjuacha kichó chica”, ichro ch'án. ²⁴ A ntá ntáche ch'án tí sín síin ntiha kixin: “Takítsjehérá ch'án tí chichaon tsík'áyéhe ch'án la ntá chjehérá tí ch'ín chóna ite chichaon”, ichro ch'án. ²⁵ A ntá jehe sín ntáchro sín kixin: “¿Nkekuènte chrók'uáyéhe ch'án kixin ó chóna ch'án ite chichaon?” ichro sín. ²⁶ A ntá tí ch'ín rey kjuátehe ch'án ntáchro ch'án kixin: “Kjónté jnkójín nkexro itsjé

chón̄ta la ts'áyéhe má. A ntá tí nkexro chón̄tahya la kjónté tí ntsí chón̄ta ch'án la ts'axrjehe ch'án. 27 A ntá tí sín nínkakkonna sín tjínkakkonhya sín kíxin ts'ónana rey la xrákoará sín ntihi ts'íkónxín kuān ts'ochrínjinrá kja sín.”

*Ch'ín Jesús k'uixenhen ch'án chjasin Jerusalén
(Mt. 21.1-11; Mr. 11.1-11; Jn. 12.12-19)*

28 Tió kjuixin ntáchro ch'ín Jesús tíhi ntá chr̄in ch'án sátsji ch'án chjasin Jerusalén. 29 A ntá ó kjuíji chjinaxón tí chjasin Betfagé la ko chjasin Betania chjinaxón tí jnā nchek'in sín Olivo, ntá k'uētuenhen ch'án iyó tí sín k'uájiko ch'án 30 ntáche ch'án sín kíxin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxā ninkexró tjiták'áhya va. Tjasintānkehérá va la tsjíkuanará va ntihi. 31 A ntá tí jnkójín nkexro tsjanchankíhará nkekuente tjasintānkehérá va la ntácherá sín kíxin: “Ìnchéni ts'ichjānxinhin va”, tsixrorá.

32 A ntá tí sín k'uituenhen sákjuí sín k'uitja sín éxí ntáchro ch'án. 33 A ntá tió tjejójtjasintānkehe sín va la ntá tí sín ìnché va kjuanchankíhi sín kíxin:

—¿Nkekuente tjasintānkehérá tí kolócho? —ichro sín.

34 A ntá jehe sín kjuátehe sín kíxin:

—Ìnchéni ts'ichjānxinhin va —ichro sín.

35 Ntá sákjuíkohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a. 36 A ntá tinkákji tí kolócho tjejen ch'án la tinkák'ikjínxin sín tí iké sín nt̄ia kíxin nátaón tí ka ts'atsínka tí kolocho tjejen ch'án. 37 Ntá tió kjuíjichjina sín tí chjinaxón tí t'inkajinxin chojni tí jnā Olivo, a ntá kaín tí sín kuítekaon tí jehe ch'án chréhe sín kjuankíxin sín itsen nixja sín chéhe sín kjuanchehe sín kjuasáyé Dios kíxin kaín tí kjuaxroan k'uíkónxín kon sín. 38 Ntá ntáchro sín kíxin:

—Jína tí nkexro Rey kjuixin kjuachaxin ihñjé Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

39 A ntá iso tí sín fariseo tjejóyákjan sín í so chojni tjejónchexroan sín ntiha ntáchro sín kíxin:

—Maestro, tétuenhén tí sín chréhe tí jaha kíxin tsotání sín —ichro sín.

40 A ntá ch'ín Jesús kjuátehe ch'án ntáche ch'án sín kíxin:

—A ntá tí sín í tsotání sín la ixro tsotsje —ichro ch'án.

41 A ntá tió kjuíjichjina ch'án chjasin Jerusalén ntá k'uíkon ch'án tí chjasin la ntá tsjánka ch'án kíxin kuítekakonhya sín 42 ntáchro ch'án kíxin:

—Chrókuiénxinrá la ko chrókónohará nkexrí chrók'uayèxinrá tí kjuaxróxin, kjánchó jahará kuítekákonhyará. A ntá ó kjuixin k'uátsínka tí kjuaxróxin chrók'uíkonrá la xitjahya ts'íkonrá jie. 43 A ntá tsi iso yaon jínahya itsi tí sín nínkakkonhanrá la sich'éna sín ijnko tjat'ò ts'ántatjen tí chjasin tjejorá ntihi ts'ínkákónhen kíxin xitjahya ts'axrjéxinrá chjasin ntihi kíxin nkuíxín ts'ejó sín ts'ínkákónhanrá sín 44 ntá ts'óxíka sín kaín tí tjat'ò siín ntihi la ko ts'óyán sín kaín tí chojni siín la ko tsítóehya sín kíxin ninkehó xro naxā ts'ejókjen kíchó, kíxin jahará kjuátsoanhyará kíxin kuitsjehe Dios tí chjasin tjejorá ntihi.

*Ch'ín Jesús kjuínchetjóá ch'án nkaxenhen n̄inko
(Mt. 21.12-17; Mr. 11.15-19; Jn. 2.13-22)*

45 A ntá ch'ín Jesús k'uixenhen ch'án tí n̄inko jié, a ntá kjuankíxin ch'án kuakitsje ch'án tí sín nchekji nkehe la ko tí sín t'ena nkehe ntiha. 46 Ntá ntáchro ch'án kíxin:

—A ntá ntáchro xroon itén Dios chrónka kíxin: “Tí ntona i mé it'in nchia tsonixjanaxián chojni”, * ichro. A ntá jahará tí nchia i tsíkji ch'énará itjueé xíchee —ichro ch'án.

47 A ntá tí n̄inko ntiha kjuák'e ch'ín Jesús kjuako ch'án kaín yaon. A ntá tí sín nchát'á t'etoan la ko tí maestro tjako tí ley la ko kjaxin tí sín t'etoan tí chjasin ntiha kjuéyá sín

* 19:46 Isaías 56.7

nkexrí chrók'óyán sín ch'án. ⁴⁸ Kjánchó k'uitjahya sín nkexrí chrók'óyán sín ch'án kixin kaín chojni tjejótinhin tí nkehe tjechronka ch'án.

20

Tí kjuachaxin chóna ch'ín Jesús

(Mt. 21.23-27; Mr. 11.27-33)

¹ A ntá ijnko yaon kjuák'e ch'ín Jesús tí nínko ntiha kjuakohe ch'án chojni tí tan jína tsaáxin sín. A ntá kjuí tí sín nchat'á t'etoan la ko tí sín maestro tjako tí ley la ko kjaxin tí sín t'etoan kuènte nínko. ² Ntá kjuanchankíhi sín ch'án kixin:

—Chronka nkehe tí kjuachaxin chonta kixin xikaha ch'e. ¿Nkexro kjuanjon tí kjuachaxin a? —ichro sín.

³ Ntá kjuátehe ch'ín Jesús ntáchro ch'án kixin:

—Kjaxin janhan tsjánchánkíhará ijnko nkehe siná nkexrí tsjateherá. ⁴ ¿A ntá nkexro k'uetuēnhen tí ch'ín Juan kixin tsíkite ch'án chojni? ¿Á Dios ní o chojni ó? —ichro ch'án.

⁵ Ntá kjuankíxin sín tjo sín kichó sín ntáchro sín kixin:

—¿Nkehe chrókjuateheni? A ntá tí tsontáchroni kixin Dios tsíchr'án tí ch'ín Juan la ntá tsjanchankí ch'án kixin nkekuènte kuítekakuenhyani ch'án. ⁶ A ntá tí tsontáchroni kixin chojni ó k'uetuēnhen sín ch'án la ntá kaín chojni tsonínkaon sín la ixro ts'óyánxinni sín kixin tjenkayáxin sín kixin ch'ín Juan chaxín k'uékjako ch'án itén Dios —mé xikaha ikjo sín.

⁷ Ntá kjuátehe sín kixin noehya sín nkexro tsíchr'án tí ch'ín Juan. ⁸ Ntá ntáchro ch'ín Jesús kixin:

—Kjaxin janhan tsoxrjankahya nkexro kjuanjon kjuachaxin tjet'a tíhi —ichro ch'án.

Ch'ín Jesús kjuíncheyóexin ch'án éxi tí sín ch'ehya xra jína

(Mt. 21.33-44; Mr. 12.1-11)

⁹ Ntá tuénxín kjuankíxin ch'ín Jesús nixjehe ch'án chojni kjuíncheyóexin ch'án ntáchro ch'án kixin:

—Kjuák'e ijnko chojni k'uenkaxin ch'án nta to uva tí nontee ch'án, a ntá chr'éxin kjuínchekjen ch'án tí iso tí sín ch'e xra. A ntá kjuixin ntá sákjuí ch'án imá sé. ¹⁰ A ntá kui tí yaon tsakjinjin sín to uva. Ntá k'uetuēnhen ch'án ijnko nkexro ch'ehe ch'án xra kixin tsjikjanchehe ch'án tí sín ch'e xra nontee ch'án kixin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkité sín ch'án la ninkehó tsíchjéhya sín ch'án. ¹¹ A ntá tí ch'ín nontee ichr'án ch'án í jnko nkexro ch'ehe ch'án xra. A ntá kjaxin k'uántaxínhin sín ch'án la ko kjuate sín ch'án la ko kjaxin ninkehó tsíchjéhya sín ch'án inaá. ¹² A ntá tí ch'ín nontee ichr'án ch'án í jnko nkexro. A ntá tí sín ch'e xra kjaxin xikahó tsíkijich'ehe sín inaá, tsík'inkité sín ch'án.

¹³ Ntá tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjanna imá tjuaha. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án. ¹⁴ A ntá kjónté kui ch'án la k'uikon tí sín ch'e xra ntá chénka sín kichó sín kixin: “Tí ch'ín i mé ts'áyéhe ch'án kaín nkehe kuènte it'é ch'án. Ts'óyánni ch'án kixin jeheni tsitokoni kaín tí nkehe a,” ichro sín. ¹⁵ A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—A ntá tí inché nonte la, ¿nkehe chrókjuich'e ch'án kixin xikaha kónhen tí xjeen ch'án?

¹⁶ Chrókui ch'án chrókjuinçek'itjáyan ch'án tí sín ch'e xra kixin xikaha kjuích'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

¹⁷ A ntá ch'ín Jesús komá ch'án tí jehe sín ntáchro ch'án kixin:

—¿A ntá nkehe t'axrjexín tí nkehe ntáchro xroon itén Dios ntáchro xíkíhi?:

Tí xro náxrjónhya kúitoenta tí sín ch'éna tjat'o, a ntá mé jie k'óna tí xro tjetooan.*

¹⁸ A ntá jnkojín chojni tsjitsínka chrítaón tí xro i tsokuen ch'án. A ntá ts'ánótjen tí xro i tsoxratja ijnko chojni la tsokuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

¹⁹ A ntá tí nch'at'á t'etooan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni síin. ²⁰ Ntá k'uetuēnhen sín chojni tsotsáyehe sín ch'án, éxí chojni chóna kjuasáyé ch'án chrókjo sín ch'án jnkojína kixin ách'e ichrén nkehe ntoáhya tsonixja ch'án. A ntá jína tsjanxaxín sín jie tsjikaán sín ch'án tí tjen tí ch'ín gobernador. ²¹ Mé xíkaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrua la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios.

²² A ntá jie la chrónka, ¿á jína chrókjuenkēheni tí gobierno romano o náhi? —ichro sín.

²³ A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuēnte chrokjuachaxinráni? ²⁴ Tjákonará ijnko tí chichaon méhe. ¿Nkexro tí tsík'axrjexín tjenkání tí chichaon i la ko nkexro ihnié chóna méhe? —ichro ch'án.

Ntá kjuátehe sín kixin:

—Tí ch'ín t'etooan mé tjenkání ch'án —ichro sín.

²⁵ Ntá ntáchro ch'án kixin:

—Chróchjehérá tí ch'ín gobierno t'etooan tí nkehe kuēnte ch'án; a ntá tí nkehe kuēnte Dios chróchjehérá Dios —ichro ch'án.

²⁶ A ntá ninkehó kjuachahya sín kjuachaxin sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni

(Mt.22.23-33; Mr.12.18-27)

²⁷ A ntá chr'éxin iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

²⁸ —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitohe ichjién, tí chónahya sín xjeen, la t'ichjánxin kixin kichó tí ch'ín tsík'en tsotehe tí tjan k'án kixin tsochóna sín xjeen sín éxí xjeen tí ch'ín saó tsík'en ts'ikon sín.† ²⁹ A ntá k'uejó sín yato sín jnkokoá kichó sín. A ntá tí ch'ín saó la kótehe ch'án. Ntá k'uén ch'án la chónahya ch'án ninkehó xjeen ch'án. ³⁰ A ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chónahya sín xjeen sín. ³¹ A ntá tí ch'ín níxin xíkótehe jehe tjan inaá. Kjaxin xíkaha kayatoé sín. Kaín sín k'uén sín ninkehó xjeen sín chónahya sín. ³² A ntá kjuixixín kjaxin jehe tjan ik'uén tjan. ³³ A ntá tió tsoxechón chojni tsík'en, ¿ntá nkexro tí jehe sin ts'óna ichjién tí jehe tjan kixin yato tí jehe sín kótehe tjan? —ichro sín.

³⁴ Ntá ch'ín Jesús kjuátehe ch'án ntáchro ch'án kixin:

—Ntihi chjasintajni tí chojni ntoá la ko tí chojni chjin tótehe sín takja kichó sín. ³⁵ A ntá tí sín kúitekaon sín tí janhan ntá tsjacha sín tsoxechón sín inaá la í tsoteehya sín la koí tsoteehya tí xjeen sín. ³⁶ Kixin tí sín a la xitjahya ts'en kixin éxí tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín. ³⁷ Kjaxin ch'ín Moisés tió chrónka ch'án kuēnte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko

* 20:17 Salmo 118.22 † 20:28 Deuteronomio 25.5

ch'ín Jacob.‡ 38 Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóhón, la Dios la t'ikon ch'án kixin kaín chojni la síhón —ichro ch'án.

39 A ntá iso tí sín tjako tí ley la ntáchro sín kixin:

—Jína kjuàkua la ko jína ntáchrua, Maestro— ichro sín.

40 A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

41 Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjeníxin tí ch'ín David? 42 A ntá ch'ín David ikjin ch'án tí libro Salmos la ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntiho tsétoan

43 tsjixinjian kaín xín tí sín nínkakonhan la tsjachahya sin ts'etoan sín kixin jahvá mé tsétoan.”§

44 ¿Xá nkexrí kixin Cristo chrók'óna it'é David, kixin jehe David kujkítexín ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jie tí sín tjako tí ley

(Mt. 23.1-36; Mr. 12.38-40; Lc.11.37-54)

45 Kaín chojni tjejóhinhin sín nixjehe ch'ín Jesús tí sín k'uájiko ch'án ntáchro ch'án kixin:

46 —Chrókóxonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka kjinjin la ko tjinkaon sín kixin kaín chojni chrókjuikosáyehe sín tsoxeta sín ntsin la ko tjejá sín silla antsí náxrjón chrók'uejóyá sín nkaxenhen ninko la ko tjejá sín kixin jína chrók'uejó sín tí sátsji sín kia, 47 la ko kjaxin takitsjehe sín ntoe tí chojni chjin k'án. A ntá kjuixin kjuích'iyehé sín chojni ntá náxrjón nixjehe sín Dios. A ntá jehe sín antsí má sinchekjasóte sín Dios kixin xikaha kjuích'ia sín.

21

Tí chichaon kjuanjon ijnko tjan k'án nòa

(Mr. 12.41-44)

1 A ntá tí nkaxenhen ninko ch'ín Jesús k'uíkon ch'án kixin tí sín ricó kjuikao sín chichaon chr'áxehen sín tí ntacajón tjetóxyeyá chichaon. 2 A ntá kjaxin k'uíkon ch'án ikjui ijnko tjan k'án nòa la ntá jehe tjan chr'áxehen tjan yaá chichaon ntsíntsí. 3 Ntá ntáchro ch'ín Jesús kixin:

—La chaxín ntáxrjan kixin tí tjan k'án i nòa tjan kjánchó antsí tjeje sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhí.

4 Kixin kaín tí chichaon kjuanjon sín la chichaon síxèhe sín. A ntá jehe tjan kjónté nòa tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án kixin tí ninko ts'itjáyan

(Mt. 24.1-2; Mr. 13.1-2)

5 Iso sín tjejóto sín kixin nkexrí tsjehe ninko tsík'óna xro náxrjón la ko í so nkehe tsíkjanjon chojni éxí ijnko nkehe chjehe sín Dios. A ntá ch'ín Jesús ntáchro ch'án kixin:

6 —A ntá tsi ijnko yaon tí ninko tjejokomará ntihi la tsoxíka. A ntá tsokohya ninkehó xro ts'ejóksen kichó inaá —ichro ch'án.

Tí nkehe tsonhen tí naxa ts'itjáyanhya chjasintajni

(Mt. 24.3-28; Mr. 13.3-23)

7 Ntá kjuanchankíhi sín ch'án kixin:

‡ 20:37 Éxodo 3.6 § 20:43 20.42-43 Salmo 110.1

—Maestro, ¿nkesá tsonhen tíha? ¿Nkexrí tsonhen tí tsonoexínni tí nkehe tsonhen? —ichro sín.

⁸ Ntá ntáchro ch'ín Jesús kixin:

—Chrókóxakonhanrá t̄toéhyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Ijie mé tsoxiteyá tsonhen.” Kjónté x̄ikaha tsontáchro sín la chrókuítekákuenhyará tí jehe sín. ⁹ A ntá tió tsinhínrá tsontáchro chojni kixin ó siín kjuanínkaon tjanjonko kichó sín, kjónté x̄ikaha n̄axa chróchrakonhyará kixin kaín tíha t'ichjánxin ts'atsínka senó tí n̄axa tsjixixínhya ts'itjáyán chjasintajni —ichro ch'án.

¹⁰ N̄axa tjechrónka ch'án ntáchro ch'án kixin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin.

¹¹ Kjaxin imá t̄jjan tsínki nonte la ko tsokjinta la ko tsoníhi chojni nchónhya chjasin, a ntá nkajní nchónhya kjuachakon jié ts'ixin ts'ikon chojni.

¹² 'N̄axa ts'atsínkahya tíha la tsonínkakonhanrá sín tsotsérá sín sátsjikoará sín tí n̄inko tsjanchia sín jié la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador kixin tinkachónkirá n̄ina. ¹³ A ntá tí yaon x̄ikaha tsonhen la ts'ixin kjuachaxin kixin tsochronkará nkexro tinkachónkirá. ¹⁴ Tóxakuanhyará senó nkexrí tsjateherá tí nkehe tsjanchankíhará sín ¹⁵ kixin janhan la tsjánjuan kjuaxrexinkaon jina tsonixjará kixin nijnko tí sín nínkakonhanrá xitjahya tsontáchro sín kixin ntoáhya tí nkehe tsjateherá. ¹⁶ Kixin kjónté it'ará la ko kichuára la ko tí sín kjéhyará la ko tí sín tjóra jina mé sintakjirá sín. Jehe sín ts'óyán sín jnkojínrá. ¹⁷ Kaín chojni chjasintajni tsonínkakonhanrá sín kixin tinkachónkirá n̄ina. ¹⁸ Kjánchó x̄ikaha la nijnko kaxih̄i chóna kjára ts'itjáyánhya. ¹⁹ Tí ts̄toéhyará tinkachónkirá tí janhan la tsochontará kjuachón jnkochrín.

²⁰ 'A ntá tió ts'ikonrá kixin kuenté chjasin Jerusalén tsík'ántatjen sín soldado ntá tsonoaxínrá kixin í séhya ts'itjáyán tí chjasin a. ²¹ A ntá tí sín tjejó sín Judea la t'ichjánxin sátsjixín sín ntiha sátsji sín jn̄a. A ntá tí sín siín chjasin Jerusalén kjaxin t'ichjánxin sátsjixín sín ntiha la ko ti sin tjejó sín nontee sín la í xitjahya tsokjan sín chjasin. ²² Kixin tí yaon ts'ixin tsjasóte chojni tsoxiteyá tsonhen kaín nkehe nixja xroon itén Dios. ²³ Nòa tí chojni chjin tjejóyá tí yaon a la ko tí sín chóna xjanhnt̄e n̄axa nchekakí sín. Kixin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha. ²⁴ Jnkojínrá ts'énxinrá tí siín kjuanínkaon ntiha la ko jnkojínrá tsotsérá sín sátsjikoará sín sinchekjasótiará kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kixin Dios mé tsjanjon kjuachaxin iso yaon x̄ikaha tsonhen. A ntá chr'éxin tsontáchro ch'án kixin: “La í kohya nkehe tsonhen.”

*A ntá tió itsi ti Xjeen Dios K'óna Chojni
(Mt. 24.29-35, 42-44; Mr. 13.24-37)*

²⁵ 'A ntá tsonoaxínrá nkexrí tsonhen tí yaon la ko nkexrí tsonhen nitjó la ko nkexrí tsonhen konotsé. A ntá chjasintajni tsokohya kjuaxróxin kaín nación la ko tsochakon chojni kixin imá tsojna ntayaon. ²⁶ A ntá chojni la tsojinh̄in sín kixin tsochakon sín tsjenkayáxin sín nkehe tsonhen chjasintajni kixin kaín tí nkehe sínkání nkajní la tsínki. ²⁷ Ntá x̄ikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko t̄juj tsik̄ao ch'án tí kjuachaxin jié kuènte nkaya nkajní. ²⁸ A ntá tió tsoxrankixin tsonhen kaín tíha chrókócháhará chrókjuaya kjára ntá chróntáchrórá kixin kjínhya tjen tí nkexro tsaáxinrá —ichro ch'án.

²⁹ Kjaxin kjuíncheyóexin ch'án í jnko nkehe ntáchro ch'án kixin:

—Tjenkayáxinrá nkexrí siín tí nta t'óna to higo la ko kaín tí í so nta. ³⁰ Tió ts'ikonrá kixin tinkák'ayan kahnt̄e tí nta, ntá tsonoaxínrá kixin í séhya ts'ixenhen nchakuen chrin. ³¹ Mé kjaxin x̄ikaha tió ts'ikonrá kixin kaín tí nkehe sítónhen, ntá tsonoaxínrá kixin tí kjuachaxin kuènte Dios la ó chjino tjen.

³² Mé chaxín ntáxrjan kixin kaín tíhi tsonhen senó naxa t'enhya chojni tjejó jie. ³³ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³⁴ Chrókóxakonhanrá chrókuitoéhyará kixin chrókjuichròerá kixin tí imá chrókjónterá la ko tí chrókókoanrá. Kixin tí xikaha la ntá titàya tsi tí yaon la chrók'uejochoénhyará.

³⁵ Na mé éxí ijnko trampa xrínahya ts'ikjehe mé xikaha itsi tí yaon a, la ko xikaha tsonhen kaín chojni síin chjasintajni tí ts'ejóchoénhya sín. ³⁶ Méxra listo chrók'uejorá la ko chrónixjehérá Dios kaín yaon chronóehérá ch'án kixin tió tsi kaín tí kjuaxikaon xikaha la ntá tsjinkitsará ch'án tsaará kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'ín Jesús kjuák'ekjakoxin ch'án tí nínko ntiha jnkojnko yaon, a ntá tie la sákjuí ch'án tí jna nchek'in sín Olivo, la ntaha kuítóhe ch'án. ³⁸ A ntá kaín chojni kóchjina sín tí nínko jnkojnko nchítjen kixin tsinhin sín tí nkehe tsochronka ch'án.

22

Imó kjuenkayáxin sín nkexrí tsotsé sín tí ch'ín Jesús

(Mt. 26.1-5,14-16; Mr. 14.1-2, 10-11; Jn. 11.45-53)

¹ Ntá kuichjina tí yaon kia sine sín tí niotja tjikohya tí xroan t'ánkíxin niotja na mé tí kia nchek'in sín pascua. ² Ntá tí nchat'á t'etóan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús kixin chrakonhen sín tí chojni chjasin ntiha.

³ A ntá ch'ín Tsochren k'uixenhen asén ch'ín Judas, mé kjaxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús. ⁴ Tí ch'ín a mé sákjuítsjehe tí sín nchat'á t'etóan la ko tí sín t'etóan kuènte nínko, ikjo kichó sín kixin nkexrí tsjikaán sín tí ch'ín Jesús. ⁵ Ntá jehe sín kóchéhe sín la ko ntáchro sín kixin tsjenkehe sín tí ch'ín Judas. ⁶ Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

Kjuixixín kjoneko sín tí ch'ín Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroan t'ánkíxin niotja, a ntá t'ichjánxin ts'óyán sín tí kolélo sine sín kuènte tí kia pascua. ⁸ A ntá ch'ín Jesús k'uetuenhen ch'án tí ch'ín Pedro la ko tí ch'ín Juan kixin sátsji sín sincheyaxín sín tí nkehe sine sín kuènte tí kia pascua. ⁹ Ntá jehe sín kjuanchankíhi sín ch'án kixin:

—¿Nketí tjinkávan sincheyaxíinni? —ichro sín.

¹⁰ Ntá kjuátehe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yamá ijnko toa tjiá nta. Chréhérá ch'án sátsjirá tí nchia ts'ixenhen ch'án. ¹¹ Tsontácherá tí inché tí nchia kixin: “Ntáchro Maestro kixin: ¿Nketí tjen tí cuarto tsjánjuan kjuachaxin tsoyaxíxin sineko ch'án tí sín teyó xriko ch'án tí yaon pascua?” tsixrorá. ¹² A ntá jehe ch'án tsjakohará ch'án ijnko cuarto jié tí yóxin piso la ntiha síin nkehe t'ichjánxin, la ntaha sincheyaxíxinrá tí sineni tsonjín —ichro ch'án.

¹³ A ntá jehe sín sákjuí sín k'uitja sín kaín nkehe éxí tsíchronka ch'ín Jesús. Ntá ntiha kjuíncheyaxíxin sín sine sín kuènte pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uéjótjixin sín tí tjen tí mesa. ¹⁵ Ntá ntáchro ch'ín Jesús kixin:

—Imá tjinkávan kixin tsjasinni kia sinekianrá tí yaon pascua naxa ts'énhya janhan.

¹⁶ Ntáxrjan kixin sinehya janhan xikaha inaá tí naxa tsoxiteyáhya tíha tió tsi kjuachaxin kuènte Dios —ichro ch'án.

¹⁷ Ntá kuákja ch'án tí nkehe tjiá inté to uva ntá chjéhe ch'án kjuasáya Dios ntá ntáchro ch'án kixin:

—Tákjárá tíhi la its'irá kaín rá ¹⁸ kixin ntáxrjan kixin xík'ikianhyará tí ìnté to uva tí naxa tihya tí kjuachaxin kuènte Dios —ichro ch'án.

¹⁹ A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ò ch'án chjéhe ch'án tí jehe sín ntáchro ch'án kixin:

—Tíhi mé cuerpo kuèntana kixin ts'ényákonhanrá. Mé xíkaha tsoxráxinkákonxínrá tí janhan —ichro ch'án.

²⁰ Kjaxin xíkaha kjuanjon ch'án tí nkehe tjiá ìnté to uva tió kjuixin kjóne sín la ntáchro ch'án kixin:

—Tí nkehe tjiá tí vaso chronkaxín tí nkehe nixin tsonhen tsoxiteyá kixin tí jnina ts'itjí tsojtjuáxin tí ijiará.

²¹ Tí nkexro sinchekjina mé tjekian tí tjen mesa ntihi. ²² Méxra tí Xjeen Dios K'óna Chojni its'en éxi k'uítuenhen; kjánchó nòà tí ch'ín sinchekji ch'án kixin tsjasóte ch'án —ichro ch'án.

²³ A ntá jehe sín kjuankixin sín tjanchankíhi kíchó sín:

—¿Xá nkexro sinchekji ch'án? —ichro sín.

Ikjo sín kixin nkexro tí imá ts'etōan

²⁴ A ntá jehe sín mé tjo sín kixin nkexro antsí ts'etōan. ²⁵ A ntá ntáchro ch'ín Jesús kixin: —Tí sín reyes kuènte tí naciones imá t'etōan sín. A ntá tí chojni mé ntáchro sín kixin tí sín t'etōan la mé chojni ch'e xra jina. ²⁶ A ntá jahará xíkahya chrókjuich'erá. Íchá jina tí nkexro imá t'etōan chrók'óna éxi tí nkexro antsí ntasoá chróchóxin chrók'uítuenhen, na mé tí nkexro t'etōan chrók'óna éxi ijnko nkexro ch'exón xra. ²⁷ ¿A ntá nkexro tí antsí t'etōan, á tí nkexro lámō tjetjaxin tí tjen mesa ntá sine ch'án, o á antsí t'etōan tí nkexro kujukao tí nkehe sine ch'án? Náhí. Tí nkexro tjetjaxin tí tjen mesa mé antsí t'etōan ch'án. Mé xíkaha janhan tjénkajánrá éxi ijnko nkexro ch'exón xra tí janhan.

²⁸ Jahará xráxin k'uéjontaxínrá k'uíkonrá kaín nkehe náxrjónhya kónna. ²⁹ Méxra janhan tsjánjuan kjuachaxin tsétōanrá éxi chjina T'aná tí tétōan janhan ³⁰ kixin sinterá la ko its'irá tí tsjak'e mesa kuèntana tí tsétōan janhan nkaya nkajní la ko tsétōanrá sinchekitoexínrá tí ijié kaín tí sín k'uaxrjeníxin tí teyó xjeen ch'ín Israel.

Ch'ín Jesús chrónka ch'án kixin ch'ín Pedro sinchemá kixin chónhya tí jehe ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ìnchéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxi noatrigó. ³² Kjánchó janhan xrjanóaha T'aná kixin jaha chrókuitōéhya tí tinkachónkia tí janhan. A ntá jaha kjónté tsjásian jie, a ntá tsokjan inaá ts'itjáyanyha tinkachónkia tí janhan ntá sinchechéhé kichuárá —ichro ch'án.

³³ A ntá ntáchro ch'ín Simón kixin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ A ntá kjuátehe ch'ín Jesús ntáchro ch'án kixin:

—Pedro, ntáxrjan kixin ijie jaí naxa tsjehya kochíntōa sinchemána iníya kixin chonhya tí janhan, tsixrua —ichro ch'án.

Ntá ó kuichjina tí hora xíkaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kixin:

—Tió kuétuanhanrá sákjuirá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tokate na, ¿á naxa t'itjayan ichrén nkehe ní? —ichro ch'án.

Ntá kjuátehe tí jehe sín ntáchro sín kixin:

—Náhí. Ninkehó nkehe t'itjáyanyha —ichro sín.

³⁶ Ntá ntáchro ch'án kixin:

—A ntá jie tí nkexro chón̄ta kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chón̄tahya chica espada chrókjuinchekeji ch'án tí ka t'inkáya ch'án kixin chrók'uenaxín ch'án ijnko chica. ³⁷ Ntáxrjan kixin t'ichjánxin tsoxiteyá tsona éxí nixja xroon itén Dios ntáchro kixin: “Éxí yóhe ijnko chojni kjuasin jie mé xikaha ts'ikon sín ch'án.”* Mé xikaha kaín nkehe chrónka xroon itén Dios kixin tsona mé t'ichjánxin tsoxiteyá —ichro ch'án.

³⁸ A ntá jehe sín ntáchro sín kixin:

—Inchéni, ntihi tjejó yaá chica espada —ichro sín.

Ntá kjuátehe ch'án kixin:

—Kjonté ó táhó la ó nchoxon —ichro ch'án.

Ch'ín Jesús nixjeexín ch'án Dios tí Huerto Getsemani

(Mt. 26.36-46; Mr. 14.32-42)

³⁹ Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kixin xikaha kuènnen ch'án k'uékjich'e ch'án la koí tí sín k'uájiko ch'án tinkáchréhe sín. ⁴⁰ Ntá kjuíji sín ntiha ntá ntáchro ch'án kixin:

—Nixjehérá Dios kixin tsjinkitsa ch'án tí jahará kixin tsjásinhyará jie —ichro ch'án.

⁴¹ Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin éxí chrók'ue chojni xro. Ntá kjuák'exín toch'in ch'án kixin tsonixjehe ch'án Dios. ⁴² Ntá ntáchro ch'án kixin:

—It'éni, tí tjinkávan chrókjuinchekaáni kaín nkehe náxrjónhya chrók'uatsínkani. Kjánchó jehya éxí tjinkaonni jeheni chrókónhenni. Náhí. Éxí tjinkávan jaha —ichro ch'án.

⁴³ Ntá xrínahya k'uíkon ch'án itjen ijnko ángel tsíkixín nkaya nkajní kixin tsjinkitsa ch'án. ⁴⁴ A ntá imá tóxakonhen ch'án, a ntá antsí fuerte nixjehe ch'án Dios, ntá k'uíxin ch'án ntáchjin éxí yóhe jni xikaha k'uítji k'uánótjen nonte.

⁴⁵ Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín. ⁴⁶ A ntá ntáchro ch'án kixin:

—¿Nkekuènte tjejochrinrá? T'àyará. Nixjehérá Dios kixin tsjinkitsará ch'án kixin tsjachroehyará ch'ín Tsochren —ichro ch'án.

Itsé sín tí ch'ín Jesús

(Mt. 26.47-56; Mr. 14.43-50; Jn. 18.2-11)

⁴⁷ A ntá ch'ín Jesús naxa tjenixja ch'án ntá xrínahya kui nchónhya chojni yámá chica. Tí ch'ín it'in Judas, ijnko tí teyo sín k'uájiko ch'ín Jesús, kuítaón ch'án ntia, ntá kóchjinehe ch'án tí ch'ín Jesús kixin sineko ch'án kochító. ⁴⁸ A ntá ntáchro ch'ín Jesús kixin:

—Judas, ¿á ijnko kochító ó sinchekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'ín Jesús tió k'uíkon sín kixin xikaha kónhen ntá kjuanchankíhi sín ch'án kixin:

—Inchéni, ¿á chrókuatéxinni sín chica espada? —ichro sín.

⁵⁰ A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etoan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kixin:

—Táhó, titohe, ó tjen —ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekitöhe ch'án jina.

⁵² Ntá tuénxín ch'ín Jesús ntáche ch'án tí sín nchat'á t'etoan la ko tí sín t'etoan kuènte njnko la ko tí sín táda t'etoan mé tí sín tsíki sátsjiko sín ch'án ntáchro ch'án kixin:

—¿Nkekuènte k'uinkakoará chica espada la ko inta éxí chrótsará ijnko xíchee? ⁵³ A ntá kaín yaon kjuak'é janhan k'uejóni kjuákoáxinrá tí njnko ntiha la ninkehó tsehyará

* 22:37 Isaías 53.12

tí janhan. **A** ntá jie mé tí hora kuèntará ntá kjuacha tí kjuachaxin kuènte sítié —ichro ch'án.

*Ch'ín Pedro kjuínchemá ch'án kixin chónhya ch'án tí ch'ín Jesús
(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

⁵⁴ Ntá itsé sín tí ch'ín Jesús kjuínchenteto sín ch'án sákjuíko sín ch'án ntoe nchat'á t'etōan. **A** ntá ch'ín Pedro ikjín tinkáchréhe ch'án. ⁵⁵ **A** ntá tí ntasin ntiha kjuaka sín xrohi síxrohe sín. **A** ntá ch'ín Pedro kjaxin kjuák'entaxín ch'án tí tjejó sín ntiha. ⁵⁶ **A** ntá ijnko tjachjin ch'e xra tió k'uíkon tjan kixin koí ch'ín Pedro tjechjixrohe ch'án ntiha ntá komá tjan tí jehe ch'án ntá ntáchro tjan kixin:

—Kjaxin tí ch'ín i xriko tí ch'ín Jesús —ichro tjan.

⁵⁷ Ntá ch'ín Pedro kjuínchemá ch'án ntáchro ch'án kixin:

—¿Nkekuènte xikaha ichrúa jaha? Ni chonhya tí nkexro a —ichro ch'án.

⁵⁸ **A** ntá antsíkoá chr'éxin ikui í jnko chojni k'uíkon tí jehe ch'án ntá ntáchro kixin:

—Kjaxin jaha xríkoa tí nkexro a —ichro.

Ntá ch'ín Pedro ntáchro ch'án kixin:

—Náhi, janhya —ichro ch'án.

⁵⁹ Ntá éxi ijnko hora chr'éxin ntá nixja í jnko ch'ín chénka tí í so sín kixin:

—Tí ch'ín i chaxín xriko tí ch'ín Jesús kixin kjaxin tsíkijxin ch'án estado Galilea —ichro ch'án.

⁶⁰ Ntá ntáchro ch'ín Pedro kixin:

—Nonahya janhan nkehe tí ntáchrúa —ichro ch'án.

Ntá tuénxín naxa tjenixja ch'án ntá xrínahya ó tsje kochíntōa. ⁶¹ Ntá Ìnchéni kuinkátjá ch'án komá ch'án tí ch'ín Pedro. Ntá ch'ín Pedro xraxinkaon ch'án kixin xikaha tsíchronka Ìnchéni kixin: “Naxa tsotsjehya kochíntōa sìnchemána iníya.”† ⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

*Kjuanoá sín tí ch'ín Jesús
(Mt. 26.67-68; Mr. 14.65)*

⁶³ Tí sín sákjuíko ch'ín Jesús kjuanoá sín ch'án la ko kjuate sín ch'án. ⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáchro sín k'uántaxínhìn sín ch'án.

*Ntá sákjuíko sín tí ch'ín Jesús nkayakon tí sín t'etōan
(Mt. 26.59-66; Mr. 14.55-64; Jn. 18.19-24)*

⁶⁶ **A** ntá kóyaon nchakotjin la kójnkotsé kaín tí sín táda t'etuenhen tí sín judío, la ko tí nchat'á t'etōan, la ko tí sín maestro tjako tí ley la sákjuíko sín tí ch'ín Jesús nkayakon tí sín imá t'etōan. Ntá ntiha kjuanchankíexín sín ch'án kixin:

⁶⁷ —Ijie la chronka, ¿á jaha tí Cristo? —ichro sín.

Ntá jehe ch'án kjuátehe ch'án kixin:

—Tí tsontáxrjan kixin chaxín janhan na tsitekákonhyará. ⁶⁸ **A** ntá tí chrókjuánchánkíhará ichrén nkehe la chrókjuáteehyará la ko chrók'uatjántahyarána. ⁶⁹ **A** ntá jie tí Xjeen Dios K'óna Chojni mé tsjak'etjaxin tí tja chjina kuènte Dios chónka kaín xín kjuachaxin —ichro ch'án.

⁷⁰ **A** ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáchro ch'án kixin:

—Chaxín janhan xikaha ntáchrórá tí jahará —ichro ch'án.

⁷¹ Ntá kjo sín kichó sín kixin:

† 22:61 Lucas 22.34

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

23

Sákjuiko sín tí ch'ín Jesús nkayakon tí ch'ín Pilato

(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uínkatjen sín ntá sákjuiko sín tí ch'ín Jesús nkayakon tí ch'ín Pilato. ² A ntá ntiha kjuankíxin sín t'eka sín jie tí jehe ch'án ntáchro sín kixin:

—K'uitjani tí nkexro i tjachroe ch'án chojni nación kuènténi ntáchro ch'án kixin chrókjuenkeehyani tí gobierno romano, la ko kjaxin ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kixin:

—¿Á jaha tí Rey t'etuèhnen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xíkaha ntáchrua jaha —ichro ch'án.

⁴ A ntá ch'ín Pilato ntáche ch'án tí sín nchat'á t'etōan la ko tí chojni tsíkikao sín kixin:

—T'itjáhya nijnko jie chóna tí nkexro i —ichro ch'án.

⁵ A ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankíxin ch'án kjuako ch'án estado Galilea, a ntá jie ó kui ch'án ntihi la xíkaha tjako ch'án —ichro sín.

Sákjuiko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xíkaha ntáchro sín ntá kjuanchankí ch'án á tí ch'ín i la á Galilea tsíkixín ch'án. ⁷ A ntá kjuátehe sín kixin ntaha tsíkixín ch'án, ntá k'uetōan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxin ch'án tjen ch'án chjasin Jerusalén tí yaon a. ⁸ A ntá ch'ín Herodes k'uíkon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxín ch'ín Jesús. ⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuátehehya ch'án. ¹⁰ Kjaxin ntiha k'uejó tí sín nchat'á t'etōan la ko tí sín maestro tjako tí ley la ntá nchónhya jie k'ueka sín ch'án kixin nínkakonhen sín ch'án.

¹¹ A ntá ch'ín Herodes la ko tí sín soldado kuènte ch'án kjuankíxin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrjón éxí t'inkáya tí sín rey. A ntá tuénxín ch'ín Herodes k'uetōan ch'án kixin sátsji ch'án inaá tí tjen ch'ín Pilato. ¹² A ntá tí yaon a ch'ín Pilato la ko ch'ín Herodes kjuankíxin sín tjuèhe kichó sín kixin tí senó la k'uénínkakonhen kichó sín.

K'uetōan sín kixin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uíyehē ch'án tí nchat'á t'etōan la ko tí sín gobernador la ko kaín chojni chjasin ntiha kixin tsojnkotsé sín ¹⁴ ntá ntáche ch'án sín kixin:

—Jahará kjuíkuanará tí nkexro i ntáchrórá kixin ntoáhya tjakohe ch'án chojni kixin chrókónínkakonhen sín tí gobierno. Kjánchó janhan kjuánchánkíha ch'án itsjé nkehe kuínhínra ntá k'uíkonrá kixin k'uitjáhya ninkehó tí jie tékará ch'án. ¹⁵ La ko kjaxin ch'ín Herodes k'uitjáhya ch'án tí jie tékará tí ch'ín Jesús ntá chr'án ch'án inaá ntihi. Ó k'uíkonrá kixin ninkehó jie chónthaha ch'án chrók'uenxín ch'án. ¹⁶ Sintakjasóte ch'án ntá chr'éxin tsjánjuan kjuachaxin sátsji ch'án —ichro ch'án.

17 **A** ntá tí yaon kia a la t'ichjánxín kixin ch'ín Pilato tsjanjon kjuachaxin sátsji ijnko chojni tjechjina kixin xikaha kuènhen sín ósé. 18 Ntá kaín sín kjuankixin sín k'óyako sín ntáchro sín kixin:

—¡Tí nkexro la náhí! ¡Ch'ín Barrabás mé t'atjánta! —ichro sín.

19 **A** ntá ch'ín Barrabás tsík'ikjéhe sín ch'án kixin jehe ch'án la ko í so chojni kónínkakonhen sín tí chjasin ntiha la ko tsík'óyán ch'án chojni. 20 **A** ntá ch'ín Pilato tjinkaon ch'án chrókjuanjón ch'án kjuachaxin sáchrókjui ch'ín Jesús. **A** ntá xíkjanchankíhi ch'án tí chojni siín ntiha ínaá. 21 Kjánchó jehe sín antsí má tsen k'óyako sín ntáchro sín kixin:

—¡Tjakékanirá ch'án ntacruz! ¡Tjakékanirá ch'án ntacruz! —ichro sín.

22 Níxin xíkjanchankí ch'ín Pilato ntáchro ch'án kixin:

—¿Xá nkehe ntoáhya kjuích'e ch'án? Janhan la k'uítjahya ninkehó jie chóna ch'án chrók'uenxín ch'án. Sintakjasóte ch'án la ntá chr'éxín tsjánjuan kjuachaxin sátsji ch'án —ichro ch'án.

23 Kjánchó jehe sín antsí tsen kjuanchia sín ntáchro sín kixin chrókjuak'enkáni ch'án ntacruz. **A** ntá k'óyako sín la ko k'óyako tí sín nchat'á t'etōan ntá kjuacha sín kjuanchia sín tí nkehe tsonhen. 24 **A** ntá ch'ín Pilato kjuanjon ch'án kjuachaxin xikaha tsonhen tí nkehe kjuanchia sín. 25 **A** ntá kjuanjon ch'ín Pilato kjuachaxin sátsji tí ch'ín Barrabás éxí kjuanchia sín, na mé tí ch'ín k'uikjéhe sín kixin k'uékje ch'án kjuanínkaon la ko k'uék'óyán ch'án chojni. **A** ntá ch'ín Pilato kjuanjon ch'án kjuachaxin kixin sátsjiko sín tí ch'ín Jesús sinchekjasóte sín ch'án éxí tjinkaon sín.

Kjuak'enkani sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

26 **A** ntá tió sákjuíko sín ch'ín Jesús tsjak'enkani sín ch'án ntacruz, ntá itsé sín ijnko ch'ín tsíkjixín chjasin Cirene it'in ch'án Simón, mé kjuixín ch'án nontee ch'án, ntá kjuínchekamá sín ch'án tí ntacruz tsjak'enkáni ch'ín Jesús la tinkáchréhe ch'án.

27 Kjaxin chréhe nchónhya chojni ntoa la ko nchónhya chojni chjin chréhe sín tsjánkàma sin ch'án. 28 Kjánchó ch'ín Jesús nkátjá ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjankamahyará tí janhan. Chrótsjankará kixin tí nkehe tsonhanrá jahará la ko xjaanrá. 29 Kixin itsi yaon tsontáchrórá kixin náxrxón tí sín chónahya xjan la ko tí sín kjuínchekokjéheya xjan la ko tí sín kjuínchekakíhya ninkehó xjan. 30 Ntá tsjankixin chojni tsontáche sín tí jnā kixin tsoxrátja sín la ko tsontáche sín tjo kixin tsjavá sín. 31 Kjonté tí nta yoa la ó sítónhen kaín tíhi la íchá tió chróxámá tí nta la ¿nkehe tí kaá chrókónhen tí nta tsíxámá? —ichro ch'án.

32 Kjaxin sákjuíko sín iyó sín tsíkjasin jie kixin ts'óyánko sín ch'ín Jesús. 33 Ntá tió kjuíji sín tí jnā tikitexín sín tí jnā Nta Hueso Kja Chojni, na mé ntiha kjuak'enkani sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la íjnko la tja ch'án kjon tjejóyáni sín ntacruz kjaxin. 34 Ntá tió kjuixin kjuak'enkani sín tí ch'ín Jesús tí ntacruz ntá nixjehe ch'án tí It'é ch'án Dios ntáchro ch'án kixin:

—It'éni, tónínkákuènhya sín kixin tí nkehe kjuích'eheeni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikayehé sín iké ch'án ch'exín sín suerte kixin tsonoxén sín nkexro tsakja tí ka a. 35 Kaín chojni chjasin ntiha tjejótsjehe sín kixin xikaha sítónhen la ko kjaxin tí sín t'etōan tjanoá sín tí jehe ch'án ntáchro sín kixin:

—Kjuínchekaá ch'án ókjé chojni, a ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjejá Dios —ichro sín.

36 La ko kjaxin tí sín soldado kjuanoá sín ch'án kóchjinehe sín ch'án kuíkəo sín xranvino náxrxónhya chjéhe sín ch'án chrók'ui ch'án, 37 ntáche sín ch'án kixin:

—Tí jaha chaxín rey kuènte tí sín judío ntá jahvá chrókjuínchekaá asán —ichro sín.

³⁸ Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkíva griego la ko nkíva latín la ko nkíva hebreo ntáchro kíxin: “Tíha mé Rey kuènte tí sín judío”, ichro.

³⁹ Ijnko tí sín chóna jie tjenkáni ntacruz k'uántaxínhin ch'án tí ch'ín Jesús ntáchro ch'án kíxin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

⁴⁰ A ntá tí ch'ín jnko a k'uetuēhen tí í jnko ch'ín a kíxin tsotání ch'án, ntáchro ch'án kíxin:

—Ntáchrohya xíkaha. ¿Á chrakuenhya Dios kíxin xíkaha ichrua kíxin kjaxin jeheni na ó tjejójtjasóteni? ⁴¹ Yóini na nchoxon tjejójtjasóteni tjejójtjenkani tí jie kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáchro ch'án kíxin:

—Jesús, xráxinkávan tí janhan tió ts'ayéhé kjuachaxin tsétoan jaha —ichro ch'án.

⁴³ Ntá kjuátēhe ch'ín Jesús ntáchro ch'án kíxin:

—Chaxín ntáxrjan kíxin ijie jaí ts'ejóko kichó ni nkaya nkajní —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkíxin. A ntá k'uíxin tie kuenté chjasintajni hasta las tres kónjín.

⁴⁵ Ik'uén yaon, la ko tí ka t'inkákuēnxín nkaxenhen nínko k'uichje jnkosiné. ⁴⁶ Ntá ch'ín Jesús k'uèya ch'án itsen ntáchro ch'án kíxin:

—It'eni tjen nkaya nkajní, jaha ts'ayéhé asénni —ichro ch'án.

Xíkaha ichro ch'án ntá k'uén ch'án.

⁴⁷ A ntá k'uíkon tí ch'ín capitán romano kaín xíkaha kónhen ntá kjuanchehe ch'án kjuasáyé Dios ntáchro ch'án kíxin:

—Chaxín tí nkexro la jína la ninkehó jie chóntahya —ichro ch'án.

⁴⁸ A ntá kaín tí chojni tsíkójnkotsé ntiha k'uíkon sín xíkaha kónhen ntá sákjuíxin sín ntiha chrakon sín tjate sín ntakuin sín kíxin xíkaha kónhen. ⁴⁹ A ntá kaín tí sín chóxin ch'ín Jesús la ko kjaxin tí chojni chjin k'uékinkáchónki sín ch'án tsíkjin sín estado Galilea ikjín tjejó sín tjejótsjehe sín nkerí sítónhen.

Sákjuíkjavá sín tí ch'ín Jesús

(Mt. 27.57-61; Mr. 15.42-47; Jn. 19.38-42)

⁵⁰ A ntá ntiha tjen ijnko ch'ín it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etoan kuènte tí sín judío, jehe ch'án mé ijnko nkexro jína.

⁵¹ Jehe ch'án kjuák'echónhen ch'án itsi tí kjuachaxin kuènte Dios. Méxra kóxrjienhya ch'án nkexrí kjuích'e tí sín í so t'etoan. ⁵² Méxra sákjuítsjehe ch'án tí ch'ín Pilato kjuíkjanhia ch'án tí cuerpo kuènte ch'ín Jesús. A ntá ch'ín Pilato kjuanjon ch'án kjuachaxin. ⁵³ Ntá sákjuí sín tsjinkajinxín sín ch'án ntacruz. Ntá kjuixin kjuinkajin sín ch'án ntá kjuínchek'ísímá sín ch'án ijnko ka jie, ntá sákjuíko sín tsoxravá ch'án ijnko tòye xráxín tsíklich'éna ch'ín José jehó tjo la ko naxa ninkexró tsíxraváhya ntiha. ⁵⁴ Kaín tíha kónhen tí yaon viernes kónjín. Tí yaon mé tjejóyaxínhin sín kíxin í séhya tsoxrankíxin tí yaon t'ok'éhe sín sábado kíxin kohya kjuachaxin sich'e sín ninkehó xra.

⁵⁵ A ntá tí chojni chjin nkáchréhe kjuikoxín ch'ín Jesús estado Galilea kjaxin sákjuíko sín sákjuítsjehe sín tí tòye tsoxravá ch'án la ko k'uíkon sín jína nkexrí kjuak'e sín tí cuerpo kuènte ch'án. ⁵⁶ A ntá tió kjan sín tí nchia tjejó sín k'óyaxínhin sín kjueyá sín xroan xraxé náxrjón itsa ntóé ch'án kíxin xíkaha k'uékinkáchónki tí sín judío. A ntá k'ok'éhe sín tí yaon sábado éxi t'etoan tí ley.

24

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

¹ Tí yaon domingo, mé tí yaon xrankíxixín semana tí chojni chjin na xíkjan sín inaá tí tsíxravá ch'ín Jesús sákjuíko sín xroan xraxé tsík'ena sín. La ko í so chojni chjin sákjuíkotoxin sín. ² Ntá ó kjuíji sín ntiha k'uíkon sín tí xro tsíkjèxín tí tòye la í xíkahya tjen tí sákjuí sín. ³ Ntá k'uixenhen sín tòye ntá k'uitjahya sín cuerpo kuènte Ìnchéni Jesús. ⁴ Ntá chrakon sín ntá noehya sín nkehe sich'e sín. Ntá xrínahya k'uíkon sín iyó chojni ntoa tjejóxin toté chjinaxón tí tjejó sín, la iké sín la tjákini tsjehe. ⁵ A ntá tí chojni chjin kjuínchek'ísén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuènte xritjéyará tí nkexro tjechón tí siín tí sín tsík'en? ⁶ Tjenhya ch'án ntihi la ó xechón ch'án. Xráxinkáonrá nkehe ntáchro ch'án tí kjuák'e ch'án estado Galilea ⁷ ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chóna jie tsjak'enkaní sín ch'án ntacruz la ko tí nixin yaon tsoxechón ch'án inaá —ichro sín.

⁸ A ntá tí síchjin xráxinkaon sín kixin nkexrí tsíchronka ch'ín Jesús, ⁹ a ntá tió kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín. ¹⁰ A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María ìné ch'ín Jacobo la ko tí í so chojni chjin. ¹¹ A ntá tí sín apóstol kuínhin sín éxí ijnko nkehe chaxínhya tí nkehe chrónka tí jehe sín ntá kuítekakonhya sín.

¹² Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkjixravá ch'ín Jesús. Ntá kjuíji ch'án k'uíkon ch'án tí nkaxenhen tòye k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xíkaha tsíkónhen.

Tí ntia Emaús sákjuí sín la kjuíjichréhe Ìnchéni

(Mr. 16.12-13)

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjínxin tejnko kilómetro tí chjasin Jerusalén. ¹⁴ Tinkákjo sín kichó sín kixin kaín tí nkehe tsíkónhen tí chjasin Jerusalén. ¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án. ¹⁶ Kjónté k'uíkon sín ch'án la kjuanjonhya Dios kjuachaxin kixin chrókjuatsoan sín tí jehe ch'án. ¹⁷ A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntia? ¿Nkekuènte kixin t'avará? —ichro ch'án.

¹⁸ A ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

¹⁹ A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkjixín ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxin ch'án kjuachaxin kuènte nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xíkaha k'uíkon Dios la ko k'uíkon tí chojni. ²⁰ A ntá tí nchat'á t'etōan la ko tí sín gobierno kjuínchek'áyéhe sín ch'án kixin its'en ch'án la tsjak'enkaní sín ch'án ntacruz. ²¹ A ntá jeheni k'uejóchónhenni kixin jehe ch'án chrókjuinchekaá ch'án tí sín Israel. A ntá jie ó chóna iní yaon xíkaha kónhen. ²² A ntá iso chojni chjin kjaxin k'uékinkáchónki sín ch'án kjuínchechrakon sín tí jeheni kixin jehe sín tsíkjitsjehe sín tí tsíxravá ch'án imá nchítjén ²³ la mé tsík'itjahya sín tí cuerpo kuènte ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín. ²⁴ Ntá tuénxín iyó tí sín k'uájikoni kjaxin

sákjuitsjehe sín tí tsíxravá ch'án la kuik'itja sín éxí chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

²⁵ Ntá kjuátēhe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uéjé ósé. ²⁶ ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'uetōan ch'án? —ichro ch'án.

²⁷ Ntá kjuankixin ch'án chronkaxín ch'án nkexrí t'axrjexín kaín tí nkehe nixja xroon itén Dios kixin nkehe tsonhen tí jehe ch'án la mé kjuankixixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

²⁸ Ntá kjuíji sín tí chjasin ntsí a, a ntá ch'ín Jesús tsjehe ch'án éxí naxa sáchrókjui ch'án kjín. ²⁹ A ntá jehe sín mé chronóēhe sín ch'án kixin ntahó chrókuitōhe ch'án, ntáchro sín kixin:

—Titōha ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uíxenhén ch'án nchia kixin tsitōeko sín ch'án. ³⁰ A ntá tjejótjaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niōtja la kjuanchehe ch'án kjuasáyé Dios la kóchrít'ō ch'án kuákja tí jehe sín. ³¹ Ntá tuénxín xraxinkaon sín ntá kjuátsoan sín tí jehe ch'án. Ntá tuénxín k'uitjáyankoá ch'án. ³² Ntá jehe sín itjo sín kíchó sín ntáchro sín kixin:

—¿Á chaxínhya chéhe asénni tí kuikaoni ch'án ntja kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

³³ Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín. ³⁴ A ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

³⁵ Ntá jehe sín kjaxin chrónka sín nkehe tsíkónhen tí ntja sákjuí sín kixin nkexrí kjuátsoanxín sín tí ch'ín Jesús tí kóchrít'ō ch'án niōtja kjuanjon ch'án.

Titàya k'uikuèn sín ikui ch'ín Jesús

(Mt. 28.16-20; Mr. 16.14-18; Jn. 20.19-23)

³⁶ A ntá jehe sín naxa tjejótjo sín kaín tí nkehe tsíkónhen, a ntá xrínahya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

³⁷ A ntá jehe sín la imá chrakon sín kjuenkayáxin sín kixin k'uíkon sín ijnko xrintōe chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xikaha tjenkayáxin asánrá? ³⁹ Tsjeherá tjaná la ko totená kixin chaxín janhan. Itserána la ko komárána, kixin ijnko xrintōe chojni chóntahya nto la ko chóntahya hueso éxí t'íkonrá kixin chonta janhan —ichro ch'án.

⁴⁰ A ntá xikaha ichro ch'án ntá kjuako ch'án itja ch'án la ko toté ch'án. ⁴¹ Ntá kjónté xikaha k'uíkon sín la naxa kuítekakonhya sín kixin chéhe sín la ko chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

⁴² Ntá chjehe sín ch'án it'ō koche tsíchjántaón xrohi la ko ijnko t'ō katjé kotsjenta tjia tsjen. ⁴³ A ntá jehe ch'án kuákja ch'án kjóne ch'án k'uíkonxín kon sín. ⁴⁴ Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

⁴⁵ Ntá kjuanjon ch'án kjuachaxin kixin tsienxin sín tí xroon itén Dios tsíkin sín ósé.

⁴⁶ Ntá chénka ch'án sín kixin:

—Mé xíkaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án. ⁴⁷ A ntá t'ichjánxin tsjakoxin sín ihnié ch'án tsjankíxixín sín chjasin Jerusalén la ko chrókuinhin chojni kuenté chjasintajni kixin chrókuítóhe sín ijíé sín chrókuitekaon sín tí jehe ch'án kixin jehe ch'án mé chrókuincheyaon tí ijíé sín.

⁴⁸ A ntá jahará mé tsochronkaxínrá kixin xíkaha k'uíkonrá kaín tíha. ⁴⁹ Ntá tsochr'an janhan tí Nchakuen T'aná éxí tsintáchro ch'án. Kjánchó chjasin Jerusalén ntahó titohará tsoxiteyájjia ts'ayéhérá kjuachaxin tsixin nkaya nkajní.

Ch'ín Jesús sákjuí ch'án nkaya nkajní

(Mr. 16.19-20)

⁵⁰ A ntá ch'ín Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín. ⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní. ⁵² A ntá jehe sín k'uíkon sín xíkaha, a ntá xraxinkaon sín ch'án, ntá kjan sín chjasin Jerusalén chéhe sín. ⁵³ A ntá kaín yaon tjejó sín nkaxenhen nínko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naxa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha. ² Tí xrankíxixín na mé tí nkexro xráxín kjuák'eko Dios ³ la ko kjuachaxin kuènte ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuènte ch'án. ⁴ Jehe ch'án na mé kjuanjon kjuachaxin kaín nkehe síchón síin chjasintajni la ko jehe ch'án mé xrohi t'inkaséyanxínhin jnkajnko ntje chojni chjasintajni. ⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

⁶ Ntá kjuák'e ijnko chojni k'uetuēnhen Dios kui mé it'in ch'án Juan. ⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kixin kaín xín chojni chrókuitekaon sín tí tjechrónka ch'án a. ⁸ A ntá tí ch'ín Juan la jehya tí xrohi a. Ó k'uítuēnhón ch'án kui ch'án kixin tsochrónka ch'án nkerí kuènte tí xrohi a. ⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkjich'énaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naxa kjuátsoanhya sín ch'án. ¹¹ Ikui ch'án tí tjejó tí sín judío k'uaxrjeníxin ch'án, kjánchó kuítekakuenhya sín ch'án. ¹² A ntá tí sín kuítekaon sín ch'án mé k'uáyéhe sín kjuachaxin kixin ts'óna sín xjeen Dios. ¹³ Ntá yóehya ts'axrjeníxin sín it'é sín chjasintajni ntihyó la ko yóehya ijnko it'é chrókjuenkayáxin ch'án chrókjuich'éna ch'án ijnko xjan. Náhí. Dios mé kjueyá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uétjuéhé ch'án chojni chjasintajni la ko imá ntoá chrónka ch'án. Kuayeni k'uíkonní kixin imá t'etōan ch'án kixin jehe ch'án mé tí jnkokoáxón Xjeen It'éni tjen nkaya nkajní na mé xíkaha imá t'etōan ch'án.

¹⁵ Ch'ín Juan mé chrónka ch'án nkexrí tjen tí nkexro a. Ntáchro ch'án kixin:

—Senó k'uékjákohará kixin chr'éxin tsi tí nkexro a, na mé antsí má t'etōan ch'án, a ntá janhan la náhí kixin tí janhan naxa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

¹⁶ Kaínni ó k'uáyéheni tí kjuachaxin jie tjetjanjon ch'án la ko antsí má tjencheyaonni ch'án la ko tjencheyaonni ch'án. ¹⁷ Dios mé tsík'etueñhen ch'ín Moisés kixin tsokjin ch'án tí ley. A ntá Inchéni Jesucristo mé kjuakoxin ch'án kixin nkexrí imá tjuéhé Dios tí chojni chjasintajni. A ntá kaín nkehe chrónka ch'án mé antsí ntoá. ¹⁸ Kohya ninkexró chjasintajni k'uíkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

Ch'ín Juan mé chrónka ch'án nkexrínchi tjen ch'ín Jesús (Mt. 3.11-12; Mr. 1.7-8; Lc. 3.15-17)

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni nch'at'á la ko iso tí sín levita, ikui sín kuinixjehé sín tí ch'ín Juan kjuanchankíhi sín ch'án kixin:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kixin:

—Náhí. Jehya janhan tí Cristo —ichro ch'án.

²¹ Ntá xíkjanchankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkatehe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjanchankíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'ín Juan inaá kixin:

—Náhi. Janhya —ichro ch'án.

²² Ntá kjuanchankíhi sín ch'án inaá kixin:

—¿Ntá nkexro jaha? T'ichjánxín tsonoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

²³ Ntá kjuátehe ch'ín Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Takitjehérá ijnko ntia ntoí tsixín Inchéni” —mé xíkaha ichro ch'án kjuátexín ch'án itén ch'ín Isaías k'uéchrónka xroon itén Dios ósé.*

²⁴ A ntá tí sín fariseo mé tsíchr'án tí jehe sín kuikjanchankíhi sín tí ch'ín Juan. ²⁵ A ntá kjuanchankíhi sín ch'án kixin:

—Ó ntáchrúa kixin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uéchrónka itén Dios ósé. ¿A ntá nkekuèté tikite chojni tí xíkaha? —mé ichro sín.

²⁶ Ntá ntáchro ch'ín Juan kixin:

—Janhan na mé ìntà ó tikítexián chojni. Ó ntihi tjenkákjan ijnko nkexro naxa tjátsoanhyará. ²⁷ Jehe ch'án mé tsi ch'án nóton tí janhan. A ntá antsí má t'etōan ch'án, a ntá janhan na kénhyó. A ntá tōsuàna chrókjuasintankā tí correa tokaté ch'án —ichro ch'án.

²⁸ Kaín tíha mé tsíkónhen tí chjasin it'in Betábara tí nó tjitoxín yaon tóhe tí ntarío Jordán tí kjuák'e ch'ín Juan kuikite chojni.

Ch'ín Jesús na mé éxí yóhe ijnko kolélo kuènte Dios

²⁹ A ntá tí yaon chr'éxín mé k'uíkon ch'ín Juan kixin ó tje kui ch'ín Jesús. Ntá nixjehe ch'án tí sín tsíkóchjina ntáchro ch'án kixin:

—Tsjeherá tí nkexro tje kui mé tí Kolélo kuènte Dios jehe ch'án. Tíha mé tsjìinxín ijíe chojni chjasintajni. ³⁰ Janhan mé k'uéxrjanka kixin tí iton tí janhan mé tsichréhe ijnko nkexro antsí t'etōan, a ntá janhan la kénhyó tētoan kixin naxa kohyana na jehe ch'án la ó xráxín tjen ch'án. ³¹ Kjaxin janhan naxa chonhya nkexro tíha. A ntá xra ó k'uinka kjuak'é kuikítexián chojni ìntà kixin tí chojni nación Israel mé chrókjuátsōanxín sín ch'án —ichro ch'ín Juan

³² Kjuintaxín ntáchro ch'ín Juan kixin:

—Ó k'uíkuan kixin tí Nchakuen Dios mé k'uínkajinxín nkaya nkajní na éxí yóhe ijnko kontóá k'uínkajin la ko kjuák'e va ntoí tí tjen ch'án. ³³ A ntá janhan kjaxin naxa chonhya nkexro tíha. A ntá tí nkexro k'uétuanna kixin tsjak'é tsíkítexián chojni ìntà mé tsíchrónka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsoanxián janhan kixin tí nkexro a mé tsíkítexín ch'án Nchakuen Dios chojni. ³⁴ A ntá janhan jie mé ó k'uíkonxín kuan kixin xíkaha kónhen tí jehe ch'án, a ntá xrjankaxián kixin táha mé Xjeen Dios tíha —mé xíkaha chrónka ch'án.

Tí sín saoxín kjueyá ch'ín Jesús

³⁵ Tí yaon chr'éxín kjuák'e ch'ín Juan la ko iyó tí sín k'uájiko ch'án, ³⁶ a ntá xrinahya k'uíkon ch'án k'uátsínka ch'ín Jesús. Ntá ntáchro ch'ín Juan kixin:

—Tsjeherá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús. ³⁸ Ntá kuinkátjía ch'ín Jesús k'uíkon ch'án kixin tinkáchréhe sín ntá kjuanchankíhi ch'án sín kixin:

* 1:23 Isaías 40.3

—¿Xá nkehe xritjéyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

³⁹ Ntá kjuátehe ch'án ntáchro ch'án kixin:

—Íntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uikon sín nketí nchia kjuák'e ch'án ntá k'uejoko sín ch'án kuenté tí kónjín kixin kjuíji sín ntiha como las cuatro kónjín.

⁴⁰ A ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chónka ch'án ijnko savé mé it'in Simón Pedro. ⁴¹ Na ntá tuénxín tí ch'ín Andrés sákjuíkjeýá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexín kixin Cristo.

⁴² A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sintak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrjexín kixin ixro tíha.

Ch'ín Jesús mé kjuéyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxin mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kixin:

—Chr'éhé tí janhan —ichro ch'án.

⁴⁴ A ntá tí ch'ín Felipe mé chjasén ch'án mé it'in Betsaida tí chjasén ch'ín Andrés la ko ch'ín Pedro. ⁴⁵ Ntá tí ch'ín Felipe mé sákjuíkjeýá ch'án tí ch'ín Natanael na ntá chénka ch'án kixin:

—Ó k'uitjani tí nkexro tsi éxí k'uechrónka tí ch'ín Moisés tí tsíkjin ch'án tí xroon chrónka tí nkehe k'uetōan Dios. Kjaxin tí sín k'uechrónka tí itén Dios chr'éxin mé k'uechrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrjexín tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kixin:

—Xrákiá ts'ikuan —ichro ch'án.

⁴⁷ Na ntá k'uikon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankíhi ch'án tí ch'ín Jesús kixin:

—¿Nkexrí kixin tjátsōanna? —ichro ch'án.

Ntá kjuátehe ch'ín Jesús ntáchro ch'án kixin:

—Naxa nixjaahya tí ch'ín Felipe mé k'uikuan tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajní tsétuēnhén tí nación Israel —ichro ch'án.

⁵⁰ Ntá kjuátehe ch'ín Jesús ntáchro ch'án kixin:

—Jehya tí nkehe ntáxrjan k'uikuan tjenkankiá nta t'óna to higo, jehya táho tsitékákoxian. Náhi. Chr'éxin xiki í jnko kjuaxroan antsí má jié ts'ikuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsoxrjanka kixin tsoxitjehe tí nkajní ts'ikonrá itsi itsjé tí sín ángel kuènte Dios mé ts'it'ótjen la ko ts'inkajin tí tjen janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí ìné ch'ín Jesús tsík'íyehé sín tjan la ntiha tjen tjan koí. ² Kjaxin tsík'íyehé sín tí ch'ín Jesús la ko tí sín k'uájiko ch'án kixin sátsji sín tí tsíkótehe sín ntiha. ³ Ntá ó tsík'ankehé sín tí xranvino ik'uí sín na ntá tí ìné ch'ín Jesús mé ntáche tjan tí jehe ch'án kixin:

—Ó tsík'ànká xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ¿nkehe tsonhen chronka? Naxá kjuixrakáhya tí yaon tsjásian kjuaxroan —ichro ch'án.

⁵ A ntá tí ìné ch'án na mé ntáche tjan tí sín ch'e xra kixin:

—Tí chrén nkehe chrók'uetuanhanrá ch'án chrókjuínchexiteyará —ichro tjan.

⁶ A ntá siín ntiha injon chí tsík'óna xro na mé tíha tjiá ntá t'ònti sín kixin xikaha mé ts'axrjehe tí jie chóna sín koí, mé xikaha kuinkáchónki tí sín judío. Na mé jnkojnko chí mé tjacha tikia ochenta litro la o ciento litro ntá. ⁷ Ntá k'uetuenhen ch'ín Jesús tí sín ch'e xra kixin:

—Tíkjará ntá kaín tí chí a tsokaón —ichro ch'án.

Ntá kjuínchexiteyá sín kjuínchekaón sín ntá jnkojnko tí chí a. ⁸ A ntá ntáche ch'ín Jesús tí jehe sín inaá kixin:

—Tákjá intsi ntá tjiá chí tjikuehé tí ch'ín t'etōan tí kia a —ichro ch'án.

Ntá xikaha kjuích'e sín kjuínchexiteyá sín. ⁹ A ntá tí ch'ín t'etōan tí kia a mé tsjexín ch'án tí ntá tsík'óna xranvino kjónté noehya ch'án nketí kuixín tí xran a. Jehó tí sín ch'e xra kuikao sín mé nohe sín kixin jehe sín mé tsíkakitsje sín ntá. Ntá tí ch'ín t'etōan mé k'uíyehé ch'án tí ch'ín tsíkótehe. ¹⁰ Ntáche ch'án kixin:

—Xrácín tí sín tjasin kia la senó tí xranvino náxrjón tjanjon sín na tió chrók'uihya tí sín tsíkóchjina na ntá tjanjon sín tí xranvino náxrjónhya. A ntá jaha la náhí. Senó kjuakéchjina tí xranvino antsí má náxrjón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuích'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxín ch'án nkexrí imá jie tí kjuachaxin kuènte ch'án, a ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uátsínka kia, a ntá sákjuí ch'án chjasin Capernaum, sákjuíko ch'án ìné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí ninko jie

(Mt. 21.12-13; Mr. 11.15-18; Lc. 19.45-46)

¹³ A ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjuí ch'án chjasin Jerusalén. ¹⁴ Ntá nkaxenhen tí ninko jie ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjejótjaxín tí sín tjinkíxixín chichaon.

¹⁵ Ntá ch'ín Jesús mé kuákja ch'án ihno tsíxehé sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen ninko kaín xín sín la ko tí kolélo la ko tí koxinta. Na ntá tí ntamesa tjinkítóxixín sín tí chichaon mé kótéka ch'án tsíkjaminkí xènjín tí chichaon a. ¹⁶ Ntá k'uetuenhen ch'án tí sín nchekji tí kontóá a kixin:

—Takítsjerá kaín tí nkehe a. Ch'énahyará ijnko ntsin tí ntōe T'aná ntihi —ichro ch'án.

¹⁷ Ntá xrácínkaon tí sín k'uájiko ch'án ti nkehe tsíkjin sín ósé kixin: “Éxí xrohi k'uákjen asenná nínkavan kixin tí ntōa tjikosáyehya sín.” *

¹⁸ Ntá tí sín judío mé kjuanchankíhi sín ch'án kixin:

—¿Xá nkerí kjuaxroan tsjásixián tsjákoxian nketí kjuachaxin chonta kixin xikaha kjuích'e tíhi? —ichro sín.

¹⁹ Ntá kjuátéhe ch'ín Jesús kixin:

* 2:17 Salmo 69.9

—Tí ts'oxíkará tí nínko i ntá iníkoá yaon la ó sít'ána nixin tsjak'e ínaá —ichro ch'án.

²⁰ Na ntá ntáchro tí sín judío a kixin:

—Cuarenta y seis nánó k'uéjó sín kjuích'éna sín tí nínko i, a ntá jaha ntáchrúa kixin iní yaon koá sich'éna ínaá, ichrúa —ichro sín.

²¹ Kjánchó kienxínhya sín kixin tí nínko ntáchro ch'ín Jesús la tí cuerpo kuènte ch'án.

²² Ntá tió kjuixin xechón ch'án ntá xráxinkaon tí sín k'uájiko ch'án kixin xíkaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

²³ Tió kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kixin ó k'uíkon sín tí kjuaxroan kjuasin ch'án. ²⁴ Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jína nkexrí tónhen asén jnkojnko chojni ²⁵ a ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

3

Ch'ín Nicodemo kuinixjehé ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjetoan kuènte tí sín Israel. ² A ntá ijnko tie kjuíchréhe ch'án tí ch'ín Jesús a nixjehé ch'án ntáchro ch'án kixin:

—Maestro, kónoheni kixin It'éni tjen nkaya nkajní mé tsíchr'án k'uinka tsjákohéni kixin tí jehya Dios chrókjuak'ekoa la xitjahya chrókjuásian kjuaxroan jié —ichro ch'án.

³ Ntá kjuátehe ch'ín Jesús ntáchro ch'án kixin:

—A ntá tsotjonka ijnko nkehe imá tjetoan. Tí nkexro tsokjéhya nixien mé xitjahya ts'íkon tí kjuachaxin ts'etean Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína nixien? ¿Á chrók'uixanhan tsee naná ínaá ntá chrókokjína nixien ní? —ichro ch'án.

⁵ Ntá kjuátehe ch'ín Jesús ntáchro kixin:

—Ntá tsotjonka ijnko nkehe imá tjetoan. Jehó tí sín tsíkokjéxín nta la ko kjaxin tsíkokjéxín Nchakuen Dios mé ts'áyéhe sín tí kjuachaxin kuènte Dios. ⁶ Tió ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsokjéxín nixien ijnko chojni na ntá ts'áyéhe sín tí Nchakuen Dios a. ⁷ Chrakonhya tí nkehe xrjanka kixin “Kaín chojni t'ichjánxin tsokjéhi nixien.” ⁸ Éxí yóhe tí tinhín tí chjéhe xrínto ntá noahya nketí kuixin tí xrínto la ko noahya nketí sátsji na mé kjaxin xíkaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xíkjanchankí ch'ín Nicodemo ínaá kixin:

—¿Nkekuènté kixin xíkaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án kixin:

—¿Jaha ijnko maestro imá t'etean tí nación Israel ntá naxa tiénxinhya tí nkehe ní?

¹¹ Chaxín tjétjonka tí nkehe nóna la ko tí nkehe k'uíkuan ntá títekákonnahya jaha. ¹² Tí nkehe tjétjonka la kuènte chjasintajni ó ntá kjónté la títekákonnahya jaha. ¿Ntá nkexrí chrókuítekavan tí chrótjonka nkehe kuènte nkaya nkajní? ¹³ Kohya í jnko nkexro k'ujt'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixin ch'án. ¹⁴ Éxí yóhe ch'ín Moisés tió k'uixin sín tí nteje, a ntá Dios mé k'uetean kixin sinchekjanoya ch'án ijnko konche tsjak'enkanı ch'án ijnko nta, ntá xíkaha kjuích'e ch'án kjuak'enkanı ch'án tí konche tí nta a komá sín tí konche ntá kuaá sín k'uénhya sín, * mé xíkaha tsonhen tí Xjeen Dios K'óna Chojni mé t'ichjánxin kixin

* 3:14 Números 21.9

tsjak'enkáni ch'án ijnko ntacruz ¹⁵ kixin mé xikaha kaín nkexro tsinkáchónki tí jehe ch'án mé tsaá sín tsochóna sín kjuachón jnkochrín.

Dios imá tjuèhe ch'án tí chojni chjasintajni

¹⁶ 'Kixin Dios mé imá tjuèhe ch'án chojni chjasintajni ntá kjuanjon ch'án jnkokoáxón Xjeen ch'án, kixin ntá jnkojnko chojni tsinkáchónki tí Xjeen ch'án mé ts'itjáyanhya sín tsochóna sín kjuachón jnkochrín. ¹⁷ Chr'ánhya Dios tí Xjeen ch'án chjasintajni kixin sinchekjasóte chojni kixin tí jie kjuasin sín. Náhí. Ó jehí ichr'án ch'án tí Xjeen ch'án chjasintajni kixin sinchekaá chojni.

¹⁸ 'Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitōexín Dios tí ijie sín tsjasóte sín kixin titekakuenhya sín tí jnkokoáxón Xjeen Dios. ¹⁹ Na mé xikaha Dios sinchekjasóte sín jnkochrín kixin ó kui tí nkexro t'inkaséyanxín chjasintajni na kjónté ntá antsí má tóxrjnhín sín tí sítié a. A ntá tí t'inkaséyan la náhi kixin naxá tóxrjnhín sín tí nkehe jínahya tjejóch'e sín. ²⁰ Kaín tí sín tjejóch'e nkehe jínahya na mé tóxrjénhya sín t'inkaséyan chrókóchjinehya sín kixin tsonoxínhya tí nkehe jínahya tjejóch'e sín. ²¹ A ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuente Dios kixin tsonoxín tí nkehe ch'e sín kixin ntá kaín sín chojni mé tsjatsōan sín kixin tjejóch'e sín tí nkehe tóxrjnhín Dios.

Ch'ín Juan Bautista chrónka inaá kuente ch'ín Jesús

²² Na ntá chr'éxin ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuikite ch'án chojni. ²³ Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuikite ch'án chojni kixin ntiha mé yeé ntá síin. Na ntá nkáki sín kuikite sín. ²⁴ Mé xikaha kónhen naxá kjuák'echjinhya ch'ín Juan.

²⁵ Ntá tí sín k'uájiko ch'ín Juan la ko tí sín judío mé kjuachaxin kichó sín kixin nkexrí íchá jína chrókótjuáxin chojni, ichro sín. ²⁶ A ntá tí sín k'uájiko ch'ín Juan sákjuítsjehe sín ch'án chénka sín ch'án kixin:

—Maestro, tí ch'ín kjuák'ekoa tóhe ntarío Jordán, na mé tí nkexro tsíchronka kuente ch'án, la mé itjen ch'án tikite ch'án chojni la ko kaín sín chojni mé tjichréhe sín ch'án —ichro sín.

²⁷ Na ntá ntáchro ch'ín Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni. ²⁸ Ó kuínhínrá ntoá k'uéxrjanka senó kixin janhya tí Cristo. Náhí. Janhan ó kuítuannuá kuítōnxián ntia tsoxrjanka kixin ó tsi ch'án. ²⁹ Éxí yóhe ijnko ch'ín tsotehe na mé jehe ch'án mé ts'áyéhe ch'án tí ichjién ch'án. A ntá tí ch'ín chóxin ch'án mé chéhe asén ch'án tjetinhin ch'án tjenixja tí ch'ín ts'áyéhe ichjién a. Mé xikaha janhan imá chána kixin xikaha sítónhen kixin itsjé chojni sítóchjinehe sín tí ch'ín Jesús tsinhin sín nkehe tí tjenixja ch'án. ³⁰ A ntá jehe ch'án t'ichjánxin antsí ts'etōan ch'án. A ntá janhan la kénhyó —mé chro ch'ín Juan.

Tí nkexro kuixin nkaya nkajni

³¹ Tí nkexro kuixin nkaya nkajni mé kaín nkehe t'etuenhen ch'án. A ntá ijnko chojni kuente chjasintajni ó mé chrónka kuente chjasintajni ó. A ntá tí nkexro kuixin nkaya nkajni mé kaín nkehe t'etuenhen ch'án. ³² Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án. ³³ A ntá jnkojín nkexro titekaon sín tí nkehe chrónka ch'án na mé xikaha tjakōxin ch'án jie kixin chaxín ntoá chrónka Dios ³⁴ kixin tí nkexro ichr'án Dios mé nixja itén Dios kixin jehya intsíkoá tí Nchakuen Dios k'uáyéhe ch'án. Náhí. ³⁵ It'eni Dios mé tjuèhe ch'án tí Xjeen ch'án na mé xikaha ó tsíchjéhe ch'án kjuachaxin kixin kaín sín nkehe ts'etuenhen ch'án. ³⁶ A ntá tí nkexro tsitekaon tí Xjeen Dios mé xikaha tsochóna sín tí kjuachón

jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xíkaha. Tí sín a mé Dios sinchekjasóte sín jnkochrín.

4

Ch'ín Jesús ikjo ch'án ijnko tjan samaritana

¹ A ntá tí sín fariseo mé kónohe sín kixin antsí tsjé chojni chréhe sín tí ch'ín Jesús kúikite ch'án sín na ntá tí chojni chréhe sín tí ch'ín Juan la kánhyó tsjé sín. ² Kjánchó jehya ch'ín Jesús kúikite ch'án chojni. Méxra tí sín k'uájiko ch'án mé kúikite sín chojni. ³ A ntá tió kónohe ch'ín Jesús kixin xíkaha tsíkinhin tí sín fariseo ntá k'uaxrjexín ch'án tí estado Judea xíkjan ch'án estado Galilea inaá.

⁴ Ntá t'ichjánxin ts'átsínka ch'án estado Samaria. ⁵ A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchekitonhen ch'ín Jacob tí xjeen ch'án José. ⁶ La ó chjino tjen tí tòye takitsje chojni ìnta mé it'in Ìnté Jacob. Na ntá ó chonkixin kjui sín ntiha. Méxra tí ch'ín Jesús la imá kóxrjé ch'án kixin imá kjín tí ntja kjuixin ch'án ntá kjuák'etjaxin ch'án chrínta tí tòye takitsje sín ìnta. ⁷⁻⁸ Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan ìnta. Ntá ntáchro tí ch'ín Jesús kixin:

—Chjina intsí ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kixin:

—¿Nkekuènté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xíkaha kjuanchankí tjan kixin tí sín judío mé ninkehó t'ikonhya tí sín samaritano.)

¹⁰ Na ntá ntáchro ch'ín Jesús kixin:

—Chrókónoha tí nkehe tjanjon Dios la ko chrókjuatsōan jaha nkexro tí tjetjanahaha ntá ntá chrókjuanchana ntá, ntá chrótjaha tí ntá tjechón chaxín —ichro ch'ín Jesús.

¹¹ Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntá kixin tí tòye i la imá ninka? ¿Ntá nkexrí tsochjina tí ntá tjechón tjemé? ¹² Tí nkexro k'uaxrjeníxinni mé Jacob mé kuítóeheni tí tòye tjia ntá ntihi la ko kjaxin ik'uí ch'án tí ntá la ko kjaxin ik'uí tí xjeen ch'án la ko tí iko kuènte ch'án. ¿A ntá xá jaha la xá antsí má tjetōan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátēhe ch'ín Jesús ntáchro ch'án kixin:

—Tí sín it'i sín tí ntá ntihi tí tòye i nántaxón its'en sín ntá inaá. ¹⁴ A ntá tí sín its'i sín tí ntá sintakitonhan sín mé í ts'enhya sín ntá inaá. Tí ntá sintakitonhan sín mé ts'óna éxí yóhé ijnko ntá ts'axrje nkaya asén sín mé tsinkákjanjon tí kjuachón tsochónta sín jnkochrín —ichro ch'án.

¹⁵ Ntá ntáchro tí tjan a inaá kixin:

—Chjina tí ntá, a ntá ts'énhyaana ntá inaá la ko ts'inkahya ntihi tsakítsje ntá —ichro tjan.

¹⁶ Ntá k'uetōan ch'ín Jesús kixin:

—Sátjia tjík'iyehé xiá ntá ts'inkará ntihi inaá —ichro ch'án.

¹⁷ Ntá ntáchro tjan kixin:

—Chontahya xíná —ichro tjan.

Ntá ntáchro ch'ín Jesús kixin:

—Chaxín ntáchrúa kixin chontahya jaha xiá. ¹⁸ K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrúa kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuañ kixin jaha ijnko nkexro chrónka itén Dios. ²⁰ A ntá tí sín k'uaxrjeníxinni k'uíxin ósé mé k'uéxraxinkakonxín sín Dios tí jna ntihi. Kjánchó jahará chojni judío mé ntáchrórá kixin tí njnko jié chjasin Jerusalén kaín ni chróxraxinkakonxínni Dios —ichro tjan.

²¹ Ntá ch'ín Jesús ntáche ch'án tjan kixin:

—Títekávan kixin tjetsi tí hora a tsoxráxinkákonxínhyará It'eni Dios tí jna ntihi la ko tsoxráxinkákonxínhyará ch'án chjasin Jerusalén kjaxin. ²² Jahará chojni samaritano chonhyará tí nkexro xráxinkáonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjinhin chojni tí jie yámá sín mé ts'axrjeníxin tí sín judío. ²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín It'eni la mé asén sín ó tsoxraxinkakonxín sín It'eni Dios. Dios mé tóxrjínhin ch'án kixin chojni xikaha chrókjuich'e sín chróxraxinkakonxín sín ch'án. ²⁴ Jehe Dios na mé nchakuen ó, a ntá tí sín chróxraxinkaon sín ch'án na mé t'ichjánxin kixin asén sín ó tsoxraxinkakonxín sín ch'án —mé xikaha chrónka ch'ín Jesús.

²⁵ A ntá ntáchro tí tjan a kixin:

—Ó nòna kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kixin:

—Tí nkexro a la mé janhan tjétjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uíkon sín kixin tjenixjehe ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjinkaon ch'án na nkekuénté nixjehe ch'án tí tjan a. ²⁸ A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Íntará sátsjitsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókójehya tí nkexro i Cristo? —ichro tjan.

³⁰ Na ntá tí chojni a mé xrákuaxin sín tí chjasin a ntá kuitsjehe sín tí ch'ín Jesús. ³¹ Naxa tihya sín nachrohe tí sín k'uájiko ch'án mé chrónóehe sín ch'án ntáchro sín kixin:

—Maestro, kjaxian chrókjonte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kichó sín kixin:

—¿Xá jnkojín sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxí yóhe chrókjoné nkehe mé tí sít'a tí xra la ko tsjixinna tí xra kuente tí nkexro chr'anna k'uinka. ³⁵ Ntáchrórá kixin: “Noó nitjó naxa t'itjáyan tsochónhenni ntá tsotjáni noatrigo”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxamá kixin ó jina chrótjáni. ³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochrín. Ntá tí sín k'uenka sín nonte la ko tí sín tjá sín jnkokón tsochéhe sín. ³⁷ Mé xikaha tsoxiteyá tí nkehe ntáchro sín kixin: “Ijnko nkexro mé t'enka noa, a ntá ókjé sín tsotjá sín tí noa a”, ichro sín. ³⁸ A ntá janhan ichr'an tí jahará tsotjará ijnko nonte tsík'énkahyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

³⁹ A ntá itsjé tí sín samaritano kuente tí chjasin ntiha mé kjuankixin kuinkáchónki sín tí jehe ch'án kixin xikaha chrónka tjan kixin jehe ch'án ó chrónka ch'án kaín xín nkehe kjuích'e tjan tí senó a. ⁴⁰ A ntá tió kuínhin sín tí nkehe chrónka tjan ntá kui sín tí tjan ch'ín Jesús ntá chrónóehe sín ch'án kixin tsitöhe ch'án ntiha. Ntá kuitöhe ch'án ntiha iyó yaon.

⁴¹ Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án. ⁴² Ntá ntáche sín tí tjan a kixin:

—Ntá jie jehya jehó tí nkehe chrónka kuítekaonni. Náhí. Tí jie ó kuínhinni nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitohe jína ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea. ⁴⁴ A ntá jehe ch'án tsíntáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án. ⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehya sín ch'án jína kixin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntiha.

⁴⁶ Ntá xíkjan ch'ín Jesús ínaá chjasin Caná, estado Galilea, na mé ntiha tsíkjinchekjaminca ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum. ⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóehé ch'án tí ch'ín Jesús kixin sáchrókjuí ch'ín Jesús ntóe ch'án sinchekitohe jína tí xjeen ch'án ó tjet'en xjan. ⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

⁴⁹ Ntá chrónòda tí ch'ín ch'ehe xra gobierno ntáchro ch'án kixin:

—¿Á chrókójínahya sáchrókjuíni ntóna jaí kixin xjanna ó tjet'en? —ichro tí ch'ín a.

⁵⁰ Ntá kjuátehe ch'ín Jesús ntáchro ch'án kixin:

—Ikjan sáttjia ntóa kixin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án. ⁵¹ A ntá kjuíji ch'án chjino ntóe ch'án ntá xrínahya tí sín ch'ehe sín ch'án xra kjuíxinhin sín ntia chrónka sín kixin:

—Xjaan la ó jína tjen —ichro sín.

⁵² Ntá kjuanchankíhi ch'án sín kixin nkehora kjuankíxin kuítóhe xjan jína, na ntá chrónka sín kixin:

—Ijna la una kónjín mé kjuíin tí sóa —ichro sín.

⁵³ Ntá kónohe tí it'é xjan kixin xíkaha tí hora tsíntáchro ch'ín Jesús kixin tí xjeen ch'án na ó jína tjen. A ntá jehe ch'án la ko kaín tí sín siín ntóe ch'án mé kuínkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tió kuixín ch'án estado Judea ikjan ch'án estado Galilea.

5

Ch'ín Jesús kjuínchekitohe jína ijnko ch'ín tsík'en tóte chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xíkjan ch'án chjasin Jerusalén ínaá. ² A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkiva hebreo tí ntá mé it'in Betesda. A ntá chrínta tí pila siín in'ó cuarto ntsíntsi. ³ Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en toté. Tjejóchónhen sín kixin nkehora tsinkí ntá ⁴ kixin nántaxón k'uínkajin ijnko ángel kjuíánkí ntá kjuínchekinkí ntá. A ntá tí nkexro senó tsjiánkí ntá mé tsítóhe jína kjónté cualquiera chin chóna. ⁵ A ntá ntaha kjuák'e ijnko ch'ín na mé chóna ch'án treinta y ocho nánó níhi ch'án. ⁶ A ntá tió k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsítóha jína? —ichro ch'án.

⁷ Ntá ntáchro tí sijníhi kixin:

—Chóntahyani nínkexró tsjinkítsani tsjiánkíni ntá. A ntá tí tjinkaonni chrókjuíánkíni ntá la ntá ókjé nkexro tjítaón ntia tjiánkí ntá senó —mé chro tí sijníhi.

⁸ A ntá k'uetóan ch'ín Jesús kixin:

—Ijie la t'inkatjen, tjatsíyan kaniaa, itjia —ichro ch'án.

⁹ Ntá tuénxín kuítóhe ch'án jína, ntá kjuatsen ch'án kaníee ch'án kjuankíxin itji ch'án. Kjánchó yaon sábadó tíha mé tí yaon t'ok'éhe sín. ¹⁰ Mé xíkaha tí sín judío ntáche sín tí ch'ín kuítóhe jína kixin:

—Ijie tí yaon t'ok'éheni ntá kohya kjuachaxin tsamá kaniãa —ichro sín.

¹¹ A ntá ntáchro tí ch'ín a kixin:

—Tí nkexro kjuínchekitona jína mé k'uetuanna kixin tsjatsíyan kaniãa la ko sátsjia —ichro ch'án.

¹² Ntá kjuanchankíhi sín ch'án kixin:

—¿Nkexéhe tí nkexro k'uetuanhan kixin tsjatsíyan kaniãa la ko sátsjia? —ichro sín.

¹³ A ntá tí ch'ín tsíkítóhe jína na í kjuátsoanhya ch'án tí nkexro kjuínchekítóhe ch'án jína kixin ntaha la síin nchónhya chojni, a ntá ntahó k'uitjáyaxín ch'ín Jesús. ¹⁴ A ntá chr'éxín ch'ín Jesús xeta ch'án tí ch'ín a nkaxenhen tí nínko jíé ntá ntáchro ch'án kixin:

—Tsjuhé kixin ijie la ó jína tjen jaha la í tjásinhya jie inaá. A ntá tí tsjásian jie inaá a ntá antsí má jínahya tsonhan —ichro ch'án.

¹⁵ A ntá sákjuí tí ch'ín a ntá chénka ch'án tí sín judío kixin jehe ch'ín Jesús mé kjuínchekítóhe ch'án jína. ¹⁶ Mé xíkaha tí sín judío kjuankíxin sín chónkíhi sín tí ch'ín Jesús la ko chrók'óyán sín ch'án kixin kjuínchekítóhe ch'án chojni jína tí yaon t'ok'éhe sín.

¹⁷ Kjánchó ch'ín Jesús ntáche ch'án tí jehe sín kixin:

—Méxra T'aná naxa tjech'e ch'án xra. A ntá janhan kjaxin tjet'a xra —ichro ch'án.

¹⁸ Méxra xíkaha tí sín judío antsí tjinkaon sín chrók'óyán sín ch'án kixin kuítekakuenhya ch'án tí ley kuènte tí yaon t'ok'éhe sín la ko kjaxin ntáchro ch'án kixin tí It'é ch'án la mé Dios, mé xíkaha ncheyóhe ch'án asén ch'án Dios.

Tí kjuachaxin chóna tí Xjeen Dios

¹⁹ Ntá ntáche ch'ín Jesús tí jehe sín kixin:

—Ijnko nkehe tjetoan tsotjonkará kixin tí Xjeen Dios nkaya nkajní tí jehó kjuachaxin kuènte ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xíkaha ch'e ch'án. ²⁰ A ntá tí It'é mé tjuèhe tí Xjeen ch'án, la ko tjakohe ch'án kaín xín xra ch'e ch'án, la ko antsí tjetoan tí xra naxa tsjakohe ch'án kixin ntá tsochrakonrá kixin ts'ikonrá tí xra sich'e ch'án. ²¹ Tí It'é mé chóna kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'án. ²² A ntá It'é la í sinchekitoexínhya ch'án ijie ninxeró. Kaín tí kjuachaxin kuènte ch'án chjéhe ch'án tí Xjeen kixin sinchekitoexín ch'án ijie chojni chjasintajni ²³ kixin ntá kaín chojni tsjikosáyehe sín tí Xjeen éxí yóhe tjikosáyehe sín tí It'é ch'án. Tí sín tjikosáyeheya tí Xjeen xíkaha kjaxin tjikosáyeheya sín tí It'é kixin jehe ch'án mé tsíchr'án tí Xjeen.

²⁴ Ijnko nkehe tjetoan tsotjonkará kixin tí jnkójínrá tjejotinhínrá tí nkehe tjákua la ko tinkachónkirá tí T'aná, mé tí nkexro ichr'ánna, na mé xíkaha ó chontará tí kjuachón la ko tsjasótiahyará, na mé kuítóhérá tí ntia chrók'uénxinrá, la ntá jie kjuankíxinrá tsochontará tí kjuachón jnkochr'ín. ²⁵ Ijnko nkehe tjetoan tsotjonkará kixin ó tsi tí yaon, na mé jie tíha, mé xíkaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóchón sín. ²⁶ Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón ²⁷ la ko kjaxin chjéhe ch'án kjuachaxin tí Xjeen ch'án sinchekitoexín tí ijie chojni chjasintajni kixin jehe mé tí Xjeen Dios K'óna Chojni. ²⁸ Chrakonhyará tjetjonkará xíkaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án. ²⁹ A ntá ts'axrjexín sín tí tòye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'ín Jesús

³⁰ 'Tí jehó kjuachaxin kuèntana xitjahya sit'a ninkehó xra. A ntá jie ntákitoxián tí ijie éxi k'uetuanna T'aná. A ntá tí nkehe ntákitoxián la jína ntoá kixin tjínkakhonhya sit'a éxi tjínkavan. Náhí. Éxi tjínkaon T'aná, tí nkexro ichr'ánna, mé xikaha jtét'a. ³¹ A ntá tí chróxrjanka kixin nkexrí imá jína janhan la tíha la ninkehó kjuachaxin chróchóntahya. ³² Itjen í jnko nkexro tjechrónka nkexrí tjén janhan a ntá ó nòna kixin tí nkehe chrónka ch'án la sínkí. ³³ Jahará tsíkétuènhénra chojni kjuíkjanckhíhi sín tí ch'ín Juan kixin nkexrínchi tjén janhan. A ntá tí nkehe tsíkjethe ch'án la chaxín ntoá tíha. ³⁴ Kjánchó chontiaxinhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kixin jahará jína chrókuaará. ³⁵ Tí ch'ín Juan kjuák'e éxi yóhe ijnko xrohi kjuák'eche k'uínkaséyanxín la ko jahará kócháhará xikaha, kjánchó séhya kóxrjínhanrá tí xrohi a. ³⁶ Kjánchó siín nkehe antsí tjetoan tjákoxin nkexrí tjén janhan, a ntá kánhyó tjetoan tí nkehe tsíchrónka tí ch'ín Juan. Tí xra jtét'a, mé tí xra kjuanjon T'aná sit'a tsjixinna tí xra, na mé tíha mé tjákoxin kixin chaxín T'aná tsíchr'án k'uinka. ³⁷ Kjaxin jehe T'aná, tí nkexro ichr'ánna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uíkonhyará ch'án ³⁸ la ko kjaxin itén ch'án kuítóehya nkaya kjará kixin tjínkákonhyará tsítekáonrá tí Xjeen Dios tsíchr'án tsíki. ³⁹ Jahará nchekuáxinrá jína tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochrín. A ntá tí nkehe tsíkjin sín ósé mé chrónka kuènte janhan. ⁴⁰ Kjánchó jahará tjínkákonhyará tsochjinará tí tjén janhan kixin chrók'uayéhérá tí kjuachón a.

⁴¹ 'Janhan na tjéyáhya kixin chojni chrókuikosáyana sín. ⁴² A ntá janhan ó nòna kixin jahará la tjuèhyará Dios. ⁴³ Mé k'uinkaxian janhan tí kjuachaxin kuènte T'aná. Kjánchó jahará la títekákonnyará. A ntá tí chrókui í jnko nkexro kjuachaxin chrókuakitsjeníxin asén ó, a ntá tíha mé tjínkáonrá chrókuítekáonhénra. ⁴⁴ ¿Nkexrí chrókuítekáonrá jahará kixin tjéyará kixin tí chojni chjasintajni chrókuikosáyahará sín, a ntá tjéyáhyará tí kjuachaxin chrókjuanjon jnkokoá Dios? ⁴⁵ Tsontáchróhyará kixin janhan tsjánchíá jie tí jahará nkayakon T'aná. Náhí. Ch'ín Moisés mé tsjanchia ch'án jie tí jahará kixin tsontáchrórá kixin jehe ch'án kuínkachónkirá. ⁴⁶ Kja tí jahará chrókuítekáonrá nkehe tsíntáchró ch'ín Moisés ntá chrókuítekáonrá tí janhan kixin tí xroon tsíkjin ch'án mé chrónka kuènte tí janhan. ⁴⁷ A ntá tí títekákonnyará tí nkehe tsíkjin ch'án, ¿ntá nkexrí chrókuítekáonnyará nkehe ntáxrjan janhan? —ichro ch'án.

6

*Ch'ín Jesús kjuanjon ch'án nkehe kjóne in'ó mil chojni
(Mt. 14.13-21; Mr. 6.30-44; Lc. 9.10-17)*

¹ A ntá chr'éxin ntá sákjuí ch'ín Jesús k'uátòye ch'án tí ntayaon Galilea na mé tí ntayaon Tiberias tíha. ² A ntá nchónhya chojni tinkáchréhe sín kixin k'uíkon sín tí kjuaxroan jie kjuasin ch'án kjuínchekitohe ch'án jína tí sinníhi. ³ A ntá jehe tí ch'ín Jesús chrìn ch'án ijnko jna na ntá ntaha kjuák'etjaxin ch'án la koí tí sín k'uájiko ch'án a. ⁴ A ntá í séhya ts'ixin tí kia pascua a mé kié tí sín judío a. ⁵ A ntá tí ch'ín Jesús k'uíkon ch'án kixin nchónhya chojni chrìn sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'uenani nkehe sine kaín tí chojni a? —ichro ch'án.

⁶ Mé xikaha ntáchró ch'án kixin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án. ⁷ Ntá kjuátehe ch'ín Felipe ntáchró ch'án kixin:

—Kjonté doscientos chichaon denario chróchóntani chrók'uínáxin tí niotja la naxa chrókjuachahya chrók'uáyéhe jnkojnko sín tot'o tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchró ch'án kixin:

⁹ —Ntihi tjen ijnko xjan ntoa chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni siín? —ichro ch'án.

¹⁰ A ntá ntáchro ch'ín Jesús kixin:

—Tétuēnhén tí sín siín a kixin ts'ixitjaxin sín —ichro ch'án.

A ntá nchónhya ika yoa siín na ntá ntaha k'uixitjaxin sín na mé éxí in'ó mil chojni k'uixin sín. ¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikeyehe sín chjéhe sín kaín tí sín sítjaxin a. Xikaha kjaxin k'óxikeyehe sín tí koche. A ntá kaín sín kjóne sín éxí tjinkaon sín.

¹² Kjuixin kjóne sín ntá k'uetuēnhen ch'ín Jesús tí sín k'uájiko ch'án ntáchro ch'án kixin:

—Tjénájínrá tí nkehe tot'o síxèhe sín kixin ts'itjáyanyha ninkehó —ichro ch'án.

¹³ Ntá xikaha jehe sín kjuenájín sín kjuínchekaón sín teyó ntaxra tí tot'o tí in'ó niotja tsík'óna noa cebada síxèhe sín tí kjuixin tsíkjine sín. ¹⁴ A ntá tí sín kjóne tí niotja k'uíkon sín tí kjuaxroan jíe kjuasin ch'ín Jesús ntáchro sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni tsjakoheni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxēnhen sín ch'án tí xra rey kixin chrók'uetōan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntiha.

Éxí ijnko ntia xikaha kjuítaón ch'ín Jesús tí ntayaon

(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'ín Jesús k'uínkajinxin sín jna sákjuí sín chrínta ntayaon ¹⁷ k'uit'ótjen sín ijnko ntabárcō kjuankixin sín ts'atōye sín ntayaon sátsji sín chjasin Capernaum. Na ó k'uixin tie na naxa kjanhya ch'ín Jesús. ¹⁸ Ntá kjuankixin chjéhe xrintō tsankā ntá kjuankixin tinkákjaminkí nta. ¹⁹ A ntá tió kjuacha sín á in'ó o injon kilómetro ntá xrinahya k'uíkon sín tí ch'ín Jesús tinkákóchjinehe ch'án tí ntabárcō, éxí ijnko ntia tjetjitaón ch'án tí nta, ntá k'uíkon sín ntá imá chrakon sín. ²⁰ Kjánchó ntáchro ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcō. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² A ntá tí yaon chr'éxin na mé tí sín kuítóhe tóhe ntayaon na mé ó nohe sín kixin jnkokoáxón ntabárcō k'uékjak'e ntiha la ko ó nohe sín kixin ch'ín Jesús kjá ni sátsíkjikohya sín ch'án na mé k'uíkon sín kixin jehó tí sín k'uájiko ch'án sátsíkji sín. ²³ Kjánchó siín ntabárcō tixin chjasin Tiberias tinkákóchjinehe tí nó kjónexín sín tí niotja kjuanchaxín ch'ín Jesús kjuasáyé Dios. ²⁴ A ntá tió k'uíkon sín kixin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabárcō ntá sákjuí sín chjasin Capernaum sákjuíkjeyá sín tí ch'ín Jesús.

Ínchéni Jesús mé éxí niotja tjanjon kjuachón

²⁵ A ntá tóhe ntayaon xéta sín tí ch'ín Jesús ntá kjuanchankíhi sín ch'án kixin:

—Maestro, ¿nkesá k'uinka ntihi? —ichro sín.

²⁶ Ntá kjuátēhe ch'ín Jesús ntáchro ch'án kixin:

—Ó nóna kixin jahará tjéyará tí janhan kixin kjónterá niotja kókjahará, la jehya kixin kiénxinrá tí kjuaxroan kjuásian. ²⁷ Chrókjuich'ehyará tí xra chrók'uite tí nkehe chrókjónterá tjoka tsjeje ó. Náhí. Chrókjuéyará tí nkehe chrókjuejehya chrókjónterá chrók'uayéxínrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjakoxin ch'án kixin tí Xjeen ch'án mé chóna kjuachaxiēn tí jehe ch'án —ichro ch'ín Jesús.

²⁸ A ntá kjuanchankíhi sín ch'án kixin:

—¿Nkexrí chrókjuich'eni chrokjuinchexiteyáni nkexrí tjinkaon Dios? —ichro sín.

²⁹ A ntá kjuátehe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuákoéxianni chrók'uikonni kixin ntá chrókuitekaonni tí jaha? ¿Nkehe tí xra ch'e jaha? ³¹ Tí sín tsík'axrjeníxinni k'uéjósín ósé mé kjóne sín maná k'óna niotja tió k'uixin sín nteje mé xikaha tí xroon kuente Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkixín nkaya nkajní”^{*} —ichro sín.

³² A ntá kjuátehe ch'ín Jesús ntáchro ch'án kixin:

—Ijnko nkehe tjetóan tjonkará kixin jehya ch'ín Moisés kjuanjon tí maná k'óna niotja k'uinkajinxín nkaya nkajní. Náhí. T'aná mé tjetjanjon tí niotja chaxín jina k'uinkajinxín nkaya nkajní. ³³ Tí niotja tjanjon Dios mé tí nkexro k'uinkajinxín nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kixin:

—Jaha Ìnchéni, jnkochrín chjehéni tí niotja a —ichro sín.

³⁵ A ntá ntáchro ch'ín Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá. ³⁶ Kjánchó éxí k'uétjonkará senó na ó k'uikonrá tí janhan na kjónté naxa titekákonhyará. ³⁷ A ntá kaín tí sín chjina T'aná la tsochjina sín tí janhan. A ntá kaín tí sín tjejótóchjinehe sín tí janhan la tsétuanhya sín kixin sátsji sín. ³⁸ Janhan k'uinkaxian nkaya nkajní jehya tí xra tóxrjina chrókjuít'a. Náhí. K'uinka kixin chrókjuít'a tí xra tóxrjínhin tí nkexro tsíchr'ánna. ³⁹ A ntá T'aná mé tí nkexro tsíchr'ánna mé tjinkaon ch'án kixin sintak'itjáyanhya ninkexró tí sín chjina ch'án na mé tjinkaon ch'án kixin janhan mé sintaxechón kaín sín tí yaon tsjixixín. ⁴⁰ Mé xikaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. A ntá janhan sintaxechón sín tí yaon tsjixixín —ichro ch'án.

⁴¹ A ntá tí sín judío kjuankixin sín kjonta sín tí ch'ín Jesús kixin tsíntáchro ch'án kixin jehe ch'án mé tí niotja k'uinkajinxín nkaya nkajní. ⁴² Mé ntáchro sín kixin:

—¿Á jehya tí Jesús, it'é mé it'ín José, na mé chóxinni tí it'é la ko tí ìné ch'án? ¿Ntá nkekuente ntáchro ch'án kixin nkajní k'uinkajinxín ch'án? —ichro sín.

⁴³ Ntá kjuátehe ch'ín Jesús ntáchro ch'án kixin:

—Títóhéra tjóntahyará tí janhan. ⁴⁴ Kohya nkexro chrókóchjina tí tjén janhan tí chrókjuínkítsahya T'aná. A ntá tí sín tóchjina na mé sintaxechón sín tí yaon tsjixixín. ⁴⁵ Na mé tí sín k'uéchrónka itén Dios ósé mé tsíkjin sín xroon ntáchro kixin: “Dios mé tsjakóhe ch'án kaín chojni.”† A ntá kaín tí sín tsíkinhin tí nixja T'aná la ko kjuakóhe ch'án sín mé sítóchjina sín tí tjén janhan.

⁴⁶ Jehya kixin itjen ijnko chojni tsík'ikon T'aná. Náhí. Jehó tí nkexro kuixín tí tjen Dios mé tsík'ikon ch'án Dios. ⁴⁷ Chaxín tí nkehe tjéxrjanka kixin tí sín titekaon sín tí janhan mé ó tsochóna sín kjuachón jnkochrín. ⁴⁸ Janhan na mé tí niotja tjanjon kjuachón. ⁴⁹ Tí sín k'uaxrjeníxinrá k'uéjósín ósé kjóne sín tí maná k'óna niotja tió k'uéjósín nteje, a ntá kjónté ik'uén sín k'uitjayan sín. ⁵⁰ Tí nkehe xrjanka mé tí niotja k'uinkajinxín nkaya nkajní, a ntá tí sín sine tí niotja a mé ts'enhya sín. ⁵¹ Janhan mé tí niotja tjechón k'uinkajinxín nkaya nkajní. A ntá tí sín sine tí niotja a mé ts'ejóchón sín jnkochrín. Tí niotja tsjánjuan ts'ejóchónxin chojni chjasintajni mé ntóna tíha —ichro ch'ín Jesús.

⁵² A ntá tí sín judío mé sítjité sín itjo sín kichó sín ntáchro sín kixin:

* 6:31 Salmo 78.24 † 6:45 Isaías 54.13

—¿Nkexrí chrókjuanjon ch'án ntoe ch'án chrókjóneni? —ichro sín.

⁵³ **A** ntá kjuátehe ch'ín Jesús ntáchro ch'án kixin:

—Ntá tsotjonkará kixin tí sintehyará ntoe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará. ⁵⁴ Tí sinterá ntona la ko it'irá jnina ntá tsochontará kjuachón jnkochrín la ko janhan mé sintaxechónrá tí yaon tsjixixín. ⁵⁵ Kixin ntona na mé chaxín nkehe ine chojni la ko jnina na mé chaxín nkehe it'i chojni. ⁵⁶ Tí sín ine ntona la ko it'i sín jnina mé jnkokoá tjenkayáxinkian sín la ko janhan mé xríkian sín. ⁵⁷ T'aná tsíchr'án ch'án tí janhan mé chóna kjuachaxin, a ntá janhan mé tjéhonxian tí jehe ch'án. Ntá tí sín sine tí ntona mé ts'ejóchónxin sín tí janhan. ⁵⁸ **A** ntá tjénixja kuènte tí niotja k'uínkajinxin nkaya nkajni na mé yóehya tí maná tsík'óna niotja kjóne tí sín tsík'axrjeníxinrá ósé kixin jehe sín na kjóne sín na kjónté k'uén sín. **A** ntá tí sinterá tí niotja k'uínkajinxin nkaya nkajni ntá ts'ejochónrá jnkochrín —mé chro ch'ín Jesús.

⁵⁹ Kaín tíha mé kjuakohé ch'án tí sín tsíkójnkotséxin tí ninko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrín

⁶⁰ **A** ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

⁶¹ **A** ntá kónohe ch'ín Jesús kixin xikaha tóxakonhen sín kíenxínhya sín tí nkehe tsintáchro ch'án ntá kjuanchankíhi ch'án sín kixin:

—¿Á kjaxinrá tjinkákonhyará tsinhínrá tíhi? ⁶² ¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixín ch'án tí tsíkjak'e ch'án ósé? ⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjonkará na mé kuènte tí Nchakuen Dios na mé tjejóchónxin chojni. ⁶⁴ Kjánchó isorá naxa titekákonnahyará —ichro ch'án.

Mé xikaha ichro ch'án kixin tí xrankíxixín ó kónohe ch'án kixin nkexro tí sín tsitekakuenhya sín ch'án la ko kónohe ch'án kixin nkexro sinchekji ch'án. ⁶⁵ **A** ntá ntáchro ch'án kixin:

—Méxra xikaha k'uétjonkará kixin ninkexró tsochjina tí tjén janhan tí tsjinkítsahya T'aná —ichro ch'án.

⁶⁶ **A** ntá kjuixin tíha ntá nchónhya tí sín k'uék'ajiko ch'ín Jesús ntá xrínahya kuítóhe sín, í chrèhya sín ch'án. ⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxinrá tjinkáonrá xikaha sáchrókuirá? —ichro ch'án.

⁶⁸ Ntá kjuátehe ch'ín Simón Pedro kixin:

—Jaha Ìnchéni, ¿nkekuènté tjanchankíhíni á sáchrókuini ókjé? Jaha tí tan chronka a mé tsochóntaxínni kjuachón jnkochrín ⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kixin:

—Janhan kjuéyá tí kaín rá teyórá la ko jnkójnra ntihi mé ts'ónará ijnko jínahya —ichro ch'án.

⁷¹ Tíha mé t'axrjexín tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'in Simón, mé ijnko tí teyó sín tsíkjejá ch'án ntá kjónté sinchekji ch'án tí ch'ín Jesús.

7

Tí sín jnkokoá kichó ch'ín Jesús mé kuítekakuenhya sín ch'án

¹ Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án. ² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia.* ³ **A** ntá tí sín kichó ch'ín Jesús

* 7:2 Levítico 23.34

ntáche sín ch'án kixin:

—Chrókuitoahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian. ⁴ Kixin tió tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kaín xín chojni síin chjasintajni —mé chro sín.

⁵ Xikaha ntáchro tí sín kichó ch'án kixin kjaxin jehe sín titekakuenhya sín tí jehe ch'án.

⁶ A ntá kjuátehe ch'ín Jesús ntáchro ch'án kixin:

—Naxa kjuixrakáhya tí hora kuèntana tsjásian kjuaxroan. Ntá jahará la cualquier hora tjinkáonrá jina chrók'uikonrá kjuaxroan. ⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jina tí nkehe tjejóch'e sín. ⁸ Jahará la sátjirá tí kia a. A ntá janhan la tjíhya kixin naxa kjuixrakáhya tí hora kuèntana —ichro ch'án.

⁹ Mé xikaha ntáchro ch'án ntá kuítóhe ch'án estado Galilea.

Itjen ch'ín Jesús tí kia a

¹⁰ A ntá ó kjuixin sátsíkji tí sín jnkokoá kichó ch'ín Jesús ntá jehe ch'án la kjaxin sákjui ch'án tí kia a kjánchó noxínhya xritjak'e ch'án. ¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jina ch'án”; kjánchó í so sín ntáchro sín kixin: “Jehya chojni jina ch'án, méxra imá ch'iehe ch'án chojni”, ichro sín.

¹³ Kjánchó noxínhya kjo sín xikaha kixin chrakonhen sín tí sín judío a.

¹⁴ A ntá ó kjuíji jnkosiné tí kia a ntá k'uixenhen ch'ín Jesús tí ninko jié ntá kjuankíxin ch'án kjuako ch'án. ¹⁵ A ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakóehya ch'án? —ichro sín.

¹⁶ Ntá kjuátehe ch'ín Jesús ntáchro ch'án kixin:

—Tí nkehe tjákua la jehya kuèntana na mé tí xra kuènte tí nkexro tsíchr'ánna k'uinka.

¹⁷ Tí jnkojinrá tjinkáonrá chrókjuinchexiteyéherá éxí tóxrjínhin Dios la tsonohará á chaxín kuènte Dios tí nkehe tjákua o á kuèntana tíha. ¹⁸ A ntá tí nkexro tjako tí nkehe t'axrjeníxin kja sín ó mé xikaha ch'e kixin tjinkaon sín kixin tí chojni ó mé chróchóntehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ ¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekákuenhyará tí nkehe tsíkjin ch'án. ¿Méxra nkekuèté tjinkáonrá chrók'oyánrá tí janhan? —ichro ch'án.

²⁰ Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'oyán tí jaha? —ichro sín.

²¹ Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá.† ²² A ntá ch'ín Moisés tsík'etoan kixin xjaanrá ntoá itsa xjan xroye, (kjánchó jehya ch'ín Moisés kjuankíxin ch'án kjuako ch'án tíha, na mé tí sín tsík'axrjeníxinrá kjuankíxin sín kjuako sín tíha). Mé xikaha nchekará xjan tí xroye a kjónté yaon t'ok'éheni. ²³ A ntá xikaha nchekará xjan xroye tí yaon t'ok'éheni kixin xikaha chrókjuinchek'itjáyankíhyará ninkehó tí nkehe k'uetóan ch'ín Moisés, ¿ntá nkekuèté kixin nínkákonnará tí janhan kixin kjuíntakítóha jina ijnko chojni tí yaon t'ok'éheni? ²⁴ Chrókjuanchahyará jié kixin tí nkehe t'ikonxínrá ikonrá ó. Chrókjuenkayáxinrá tí nkehe jina tóxrjínhin Dios —mé chro ch'ín Jesús.

† 7:21 Juan 5.2-9

Ch'ín Jesús chrónka kixin nketí k'uaxrjenixin ch'án

²⁵ A ntá iso sín chjasin Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'ín a xritjeyá sín chrók'óyán sín? ²⁶ Ntá jie noxín tjen ch'án nixja ch'án kohya ninkexró nínkakohen ch'án. Kjá tí síxreé titekaon sín kixin tí nkexro a chaxín Cristo tíha. ²⁷ Kjánchó ó noheni nketí tsíkjin ch'án. A ntá tió tsi tí nkexro Cristo ntá ninkexró tsonoehya nketí tsixin ch'án —ichro sín.

²⁸ A ntá ch'ín Jesús kjuák'ekjako ch'án tí nínko jié ntá kuínhin ch'án kixin xikaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkjin. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxa chonhyará tí nkexro a. ²⁹ Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

³⁰ Ntá chrótsé sín ch'án chrókjuák'echjina sín ch'án ntá kjónté ninkexró tséhya sín ch'án kixin naxa kjuanjonha Dios kjuachaxin chrótsé sín ch'án. ³¹ Kjánchó itsjé chojni kuítekaon sín tí jehe ch'án. A ntá ntáchro sín kixin:

—A ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

³² A ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín nchat'á t'etōan k'uetuēnen sín iso sín policia kuēnte nínko tsotsé sín ch'án tsjak'echjina sín ch'án. ³³ A ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjiya tí tjen tí nkexro ichr'ánna. ³⁴ A ntá jahará tsjeyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

³⁵ A ntá tí sín judío kjuankixin sín kjuanchankíhi sín kichó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkiva griego kixin ntá tsjakōhe ch'án tí sín griego?

³⁶ ¿Nkexrí t'axrjexín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntarío tjechón

³⁷ A ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kja tí jnkójínrá ik'uénrá nta xrákirá its'irá nta. ³⁸ A ntá éxi ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje inta tjechón —ichro ch'án.

³⁹ Mé xikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxa tihya tí Nchakuen Dios kixin ch'ín Jesús naxa sátsjihya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáchro ch'ín Jesús ntá ntáchro sín kixin:

—Kja chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuénté chrókjuixin Galilea tí nkexro Cristo? ⁴² Tí xroon tsíkjin sín ósé mé chrónka kixin tí nkexro Cristo mé ts'axrjenixin tí sín k'uaxrjenixin tí ch'ín rey David la ko tsjixin ch'án chjasin Belén mé tí chjasin k'uékjak'e ch'ín David —ichro sín.

⁴³ Mé xikaha jnkokoáhya kjuenkayáxin sín kaín sín kixin nkexro tí ch'ín Jesús. ⁴⁴ Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuích'ehya xikaha.

Tí síxreé kuítekakonhya sín tí ch'ín Jesús

⁴⁵ A ntá tí sín policia kuènte nínko mé kjan sín tí tjejó tí sín fariseo la ko tí sín nchat'á t'etoan. Ntá tí sín a mé kjuanchankíhi sín tí sín policia kixin:

—¿Nkekuènté kjuíkoahyará ch'án? —ichro sín.

⁴⁶ Ntá kjuátehe tí sín policia kixin:

—Kohya ninkexró nixja éxí xikaha nixja tí ch'ín a —ichro sín.

⁴⁷ Ntá ntáche tí sín fariseo tí sín policia kixin:

—¿Á kjaxinrá kuítóhéra kjuít'ayahará ch'án? ⁴⁸ ¿Á kuítekaon tí jehe ch'án jnkojín tí sín t'etoan kuènténi o tí sín fariseo? ⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

⁵¹ —Tí ley kuènténi la kohya kjuachaxin sinchekjasóteni ijnko chojni tí naxa kienhyani nkehe nixja ch'án la ko kienhyani tí jie kjuasin ch'án —ichro ch'án.

⁵² Ntá kjuátehe sín ntáchro sín kixin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsonoha kixin nijnko tí sín k'uéchrónka itén Dios tsíkji_xinhya sín tí estado Galilea —ichro sín.

Ijnko tjan kjuasin jie chóna ókjé chojni nto

⁵³ Ntá jnkojnko tí sín xíka sín sákjuí sín ntøe sín.

8

¹ Ntá ch'ín Jesús mé sákjuí ch'án tí jna Olivo. ² Ntá tí kóyaon nchítjen ikjan ch'án k'uixenhen ch'án tí nínko jie a la ko kaín xín tí chojni mé kóchjinehe sín ch'án. Ntá kjuák'etjaxin ch'án kjuankíxin ch'án kjuako ch'án. ³ Ntá tí sín tjako tí ley la ko tí sín fariseo mé kjuíkaø sín ijnko tjachjin kónoxíxin kixin chóna tjan ókjé chojni nto. Ntá kjuak'e sín tjan jnkosiné tí sín tjejó ntiha. ⁴ Ntá ntáche sín tí ch'ín Jesús kixin:

—Maestro, tí tjan i kónoxíxin kixin kjuasin tjan jie chóna tjan ókjé chojni nto. ⁵ A ntá tí ley tsíkjin ch'ín Moisés mé t'etoan kixin ixro chrók'óyánxinni tí chojni chjin xikaha ch'e. ¿A ntá jaha, nkechrua? —ichro sín.

⁶ Mé xikaha ichro sín kixin tjinkaon sín kixin ách'e ntoáhya chrókjuatehe ch'ín Jesús ntá chrókjuanchia sín jie. Ntá ch'ín Jesús mé k'uísén ch'án kjinxin ch'án dedo tja ch'án nonte a. ⁷ Ntá naxa tinkákjanchankíhi sín ch'án. Ntá k'uínkatjen ch'án k'uetøan ch'án kixin:

—Xá nkexro tí tjejorá ntihi chónahya ninkehó jie mé saoxín chróchjéhe sín tjan xro —ichro ch'án.

⁸ Ntá xík'isén ch'án inaá ikjin ch'án tí nche inaá. ⁹ Ntá tí sín a mé kuínhin sín tí nkehe k'uetøan ch'ín Jesús ntá kósuèhe sín kixin koí sín chóna sín jie, ntá jnkojnko jnkojnko sín, sásítji sín na mé saoxín tí ch'ín antsí má táda ch'án sákjuí ch'án, ntá kaín tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítóhe sín ntiha. ¹⁰ Ntá xrentoá ch'án la kjuanchankíhi ch'án tjan kixin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kixin:

—Náhi, Inchéni, ninkexró —ichro tjan.

Ntá ntáchro ch'ín Jesús kixin:

—Kjaxin janhan sintakjasótiahya. Sátjia la í tjásinhya jie inaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjehe ch'án tí sín tsíkóchjina inaá ntáchro ch'án kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítié a —ichro ch'án.

¹³ Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínhya tíha kixin jahvá tjechronka —ichro sín.

¹⁴ Ntá kjuátehe ch'ín Jesús ntáchro ch'án kixin:

—Janhván tjetjonkará nkexrí tjen na kjónté chaxín xrjanka kixin ó nòna nketí nó k'uinkaxian la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá. ¹⁵ Jahará la éxí chojni chjasintajni ó tékará jie. A ntá janhan la tékahya jie ninkexró. ¹⁶ Kjánchó ntoá chrókujintakitoaxián ijié chojni kixin jehya janhván t'a tíha, T'aná tjékian, na mé tí nkexro k'uetuanna k'uinka ntihi na mé jehe ch'án mé tjékian ch'án ntihi ntakitoaxínkian ijié chojni. ¹⁷ A ntá tí ley tsíkjin ch'ín Moisés mé ntáchro kixin tí tsonoxín iyó sín tsochrónka á chaxín xikaha tsíkónhen ntá chrókuitekaon chojni. ¹⁸ Ntá janhan na mé tjéxrjanka nkexrí tjen janhan la ko kjaxin T'aná mé tí nkexro k'uetuanna k'uinka mé jehe ch'án kjaxin chrónka ch'án nkexrí tjen janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'ín Jesús ntáchro ch'án kixin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'án.

²⁰ Mé xikaha chro ch'ín Jesús tí kjuák'ekjoxin ch'án tí nínko jie chjino ntacajón tjetóxyéya chichaon tjanjon sín. Kjánchó ninkexró tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijiará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntáchro ch'án kixin xitjahya tsjijini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntihi k'uaxrjénixínrá. A ntá janhan la nkaya nkajní k'uaxrjénixian. Jahará la kuènte chjasintajni ntihi. A ntá janhan la janhya kuènte chjasintajni. ²⁴ Mé xikaha tjonkará kixin tió ts'énrá naxa tsochontará ijiará kixin tí tsítekákonhyará tí janhan, mé tí nkexro xráxín tjen,* ntá kjónté ts'énrá naxa tsochontará tí ijiará —ichro ch'án.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

—Tí xrankíxín kjuankíxian tjonkará kixin nkexro tí janhan. ²⁶ Itsjé nkehe chonta chróntáxrjan kixin chrókujintakitoaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuinhan chrónka ch'án mé tjáqhə tí sín chjasintajni —ichro ch'án.

²⁷ Kjánchó jehe sín mé kíenxínhya sín kixin nixja ch'án kuènte It'é ch'án tjen nkaya nkajní. ²⁸ A ntá ntáchro ch'án kixin:

—Tió sinchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxín tjen.† Ntá tsonohará kixin jehya janhan tétəan tí xra tjet'a. Náhi. Jehó tí

* 8:24 Éxodo 3.14 † 8:28 Éxodo 3.14

nkehe kjuakona T'aná mé tjétjàkua. ²⁹ Tjékian tí nkexro k'uetuanna k'uinka kíxin jehí xráxín T'aná la kuítõnahya janhván kíxin xráxín ntaxiteyáha tí nkehe tóxrjnhin ch'án —ichro ch'án.

³⁰ Mé xikaha ntáchro ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsítóhe sín ijié sín

³¹ Ntá nixjehe ch'ín Jesús tí sín judío kuinkáchónki sín ch'án ntáchro ch'án kíxin:

—Tí tsítóehyará tí tan kjuákohará ntá jahará chaxín discípulo kuéntana ³² la ko tsjatsõanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsõkohya nkehe ts'inkákonhen —ichro ch'án.

³³ Ntá kjuátehe sín ntáchro sín kíxin:

—Jeheni mé tsík'axrjeníxinni ch'ín Abraham na í xráxín kohya nkexro k'ueña tí jeheni. ¿Nkekuénté ntáchrúa jaha kíxin ts'áyéhēni kjuachaxin tsaáxinni? —ichro sín.

³⁴ Ntá ntáchro ch'ín Jesús kíxin:

—Tjetoan tí nkehe tjétjonkará kíxin tí sín tjasin jie mé éxí chojni k'uíná chrokjuahya tsítóhe sín ijié sín. ³⁵ A ntá ijnko chojni k'uíná la jnkochrínhya tsjak'e ch'án tí ntõe tí nkexro a. A ntá tí xjeen tí nkexro na mé jnkochrín tsítóhe ntiha. ³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsõkohya nkehe ts'inkákonhen.

³⁷ Ó nõna kíxin jahará tsík'axrjeníxinrá ch'ín Abraham. Kjánchó tjinkáonrá chrók'oyánrá tí janhan kíxin títekákonhyará tí nkehe tjéxrjanka. ³⁸ Janhan xrjanka tí nkehe k'uíkuan kíxin nkexrí tjen T'aná. A ntá jahará tjejonchexiteyéherá tí nkehe kuínhínrá chrónka it'ará —ichro ch'án.

³⁹ A ntá jehe sín kjuátehe sín ntáchro sín kíxin:

—It'éni mé ch'ín Abraham —ichro sín.

Kjánchó ntáchro ch'ín Jesús kíxin:

—A ntá tí jahará chrókóchaxín xjeen ch'ín Abraham ntá chrókjuich'erá éxí kjuích'e ch'án. ⁴⁰ A ntá tjétjonkará tí tan chaxín kuínhan chrónka Dios na kjónté chrók'oyánrá tí janhan. A ntá ch'ín Abraham xikahya kjuích'e ch'án. ⁴¹ Jahará tjejoch'erá éxí kjuích'e it'ará —ichro ch'án.

Ntá ntáchro sín kíxin:

—Jehya k'ónamá tí jeheni. Náhí. Chóntani jnkokoá It'éni mé Dios —ichro sín.

⁴² Ntá ntáche ch'ín Jesús tí jehe sín kíxin:

—Tí chrókóchaxín kíxin Dios mé It'ará la ntá chrótjuanará kíxin janhan kjaxin k'uaxrjeníxinna Dios k'uinkaxian tí tjen ch'án. Jehya kíxin janhván k'uinka. Náhí. Dios mé ichr'ánna k'uinka. ⁴³ ¿Nkekuénté kíxin tiénxinyará tí nkehe tjonkará? Jehí tjinkákonhyará chrókuinhínrá tí nkehe xrjanka. ⁴⁴ Jahará mé xjeen Tsochren la ko jahará tsík'axrjeníxinrá ch'án la ko tjinkáonrá sijnchexiteyará tí nkehe tjinkaon ch'án. Tsochren mé xrankíxín kjuaya ch'án. Nunca k'uénixja ch'án ntoá. Xráxín ch'ia ch'án kíxin xikahó tjenkayáxin ch'án. Jehe ch'án mé it'é kaín tí kjuach'ia. ⁴⁵ A ntá janhan tjétjonkará nkehe ntoá ntá títekákonnyará. ⁴⁶ ¿Á tjejorá jnkójínrá nohará nkerí jie kjuásian janhan? A ntá tí ntáxrjan tí nkehe ntoá, ¿ntá nkekuénté títekákonnyará? ⁴⁷ Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonnyará chrókuinhínrá itén ch'án —ichro ch'ín Jesús.

Cristo la ó xráxín tjen ntá chr'éxin kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kíxin:

—Chaxín ntoá ntáchroni kíxin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátehe ch'ín Jesús ntáchro ch'án kíxin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan. ⁵⁰ Janhan na tjéyáhya nkexro tsjikosáyana.

Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuítekakonhya. ⁵¹ Imá tjetōan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'án.

⁵² Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrua kixin tí tsitekaonni tí nkehe tjákua jaha ntá í ts'énhyani, ichrua. ⁵³ ¿Xá imá tētoan jaha la ntá kánhyó t'ētoan it'ēni Abraham? Jehe ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'ín Jesús ntáchro ch'án kixin:

—Tí chrókjuikosáyahā asenná na mé sínkíhya tíha. A ntá T'aná mé tjikosáyana ch'án na ntá jahará ntáchrorá kixin jehe ch'án mé Dios kuéntará. ⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyona tí jahará chrókjuít'ayahará. Kjánchó janhan na choxian ch'án la ko ntaxiteyáha tí nkehe t'ētoan ch'án. ⁵⁶ Ch'ín Abraham tí nkexro tsík'axrjeníxinrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uíkon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxā chontahya cincuenta nánó, ¿na ntá nkekuénté ntáchrua kixin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kixin:

—Imá tjetōan tí nkehe tjétjonkará kixin naxā kohya ch'ín Abraham mé xráxín itjén janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án nínko ntá chr'éxin k'uaxrjexín ch'án ntiha. K'uátsínka ch'án jnkosiné tí tjejó sín sákjuí ch'án.

9

Ch'ín Jesús kjuínchekitohe jína ijnko ch'ín tsíkokjéxín t'ikonhya ch'án

¹ K'uátsínka sín ijnko ntá ntá k'uíkon ch'ín Jesús ntiha tjen ijnko ch'ín tsíkokjéxín t'ikonhya ch'án. ² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuénté tsíkokjéxín ch'án t'ikonhya ch'án? ¿Á ijje it'é o ñé ch'án o á ijje ch'án? —ichro sín.

³ Ntá kjuátehe ch'ín Jesús ntáchro ch'án kixin:

—Jehya ijje ch'án la ko jehya ijje it'é la ko ñé ch'án. Náhí. Jehí xíkaha tsíkonhen ch'án kixin tí kjuachaxién Dios tsjakoxín kixin tsitoexín ch'án jína. ⁴ Naxā nchakotjin t'ichjánxin sít'a tí xrá tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e xrá. ⁵ Naxā itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuíkite ch'án ntaten ch'án intsí nche k'óna nchet'o ntá kuátematóxin ch'án ikon tí ch'ín t'ikonhya. ⁷ Ntá k'uetuenhen ch'án tí ch'ín t'ikonhya kixin:

—Sátjia tí pila tjiá ntá it'in Siloé t'ontia kuan —ichro ch'án. (A ntá tí ihnié Siloé mé t'axrjexín nkívee sín kixin K'uítuenhen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uíkon ch'án. ⁸ Ntá tí sín ntōe chjinaxón ntōe ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'ín i k'uékjak'etjaxín ch'án k'uékjanhak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhi, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'íkuan jaha? —ichro sín.

¹¹ Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuích'éna ch'án nchet'o kuátematóxin ch'án kuan la ntá k'uetuanna ch'án kixin satsjia ti pila tjiá ntá nchek'in sín Siloé ts'ontia kuan, ichro ch'án. Ntá sákjuia k'ontia, ntá xrínahya ó k'uíkuan —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'ín k'uék'ikonhya kuítóhe jína

¹³ Ntá tí sín a sákjuiko sín tí ch'ín k'uék'ikonhya sákjuíchréhe sín tí sín fariseo a. ¹⁴ A ntá tí yaon t'ok'éhe sín mé tsíkjich'éna ch'ín Jesús tí nchet'o kjuínchekitoexín jína tí ch'ín k'uék'ikonhya. ¹⁵ A ntá tí sín fariseo xíkjanchankíhi sín ch'án inaá kixin nkexrí kuítóhe ch'án jína t'ikon ch'án jie. Ntá kjuátehe ch'án ntáchro ch'án kixin:

—Kuátematóxin ch'án nchet'o kuan, ntá k'ontia kuan ntá jie t'íkuan —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuènte Dios kixin chóntahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jie tí chóna ch'án jie? —ichro sín.

Mé xíkaha jnkokónhya kjuenkayáxin tí jehe sín. ¹⁷ Ntá xíkjanchankíhi sín tí ch'ín k'uék'ikonhya inaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehe ch'án mé injnko nkexro chrónka itén Dios —ichro ch'án.

¹⁸ Kjánchó tí sín judío kuítekakónhya sín kixin chaxín k'uék'ikonhya ch'án ntá jie t'ikon ch'án. Ntá k'uíyehé sín tí it'é la ko tí iné tí ch'ín tsíkitohe jína. ¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrórá kixin tí tsíkokjéxín ch'án t'ikonhya ch'án? ¿Ntá nkexrí jie t'ikon ch'án? —ichro sín.

²⁰ Ntá kjuátehe tí it'é la ko tí iné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxín ch'án t'ikonhya ch'án.

²¹ Kjánchó noehyani nkexrí kixin t'ikon ch'án jie la ko noehyani nkexro kjuínchekitohe ch'án jína. Tjanchankíhírá ch'án, ó nteto ch'án, ntá jehe ch'án tsochrónka ch'án kixin nkexrí kuítóhe ch'án jína —ichro sín.

²² Mé xíkaha kjuátehe tí it'é la ko tí iné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen nínko tí sín titekaon kixin ch'ín Jesús mé tí nkexro Cristo. ²³ Mé xíkaha ntáchro tí it'é la ko tí iné ch'án kixin chrókjuanchankíhi sín ch'án, ó nteto ch'án, ichro sín.

²⁴ Ntá yóxin xík'íyehé tí sín judío tí ch'ín k'uék'ikonhya ntá k'uetuennen sín ch'án kixin: —Tjetsjehe Dios ntá ntoá chrónka kixin ó noheni kixin tí ch'ín a na chóna ch'an jie —ichro sín.

²⁵ Ntá tí ch'ín k'uék'ikonhya kjuátehe ch'án kixin:

—Nonahya á chóna ch'án jie o á chóntahya ch'án jie. Jnkokoá nkehe nóna kixin senó k'uék'ikonhya ntá jie t'íkuan —ichro ch'án.

²⁶ Ntá xíkjanchankíhi sín ch'án inaá kixin:

—¿Nkexrí kjuích'e ch'án kixin kjuíntak'ikuan ch'án? —ichro sín.

²⁷ Ntá kjuátehe ch'án ntáchro ch'án kixin:

—Ó kjuixin tjonkará kjánchó titekákonhyará. ¿Nkekuènté tjinkáonrá kixin tsotjonkará inaá? ¿Á kjaxinrá tjinkáonrá tsochréhérá ch'án? —ichro ch'án.

²⁸ Ntá kónínkakonhen sín ch'án la k'uántaxínhin sín ch'án la ko kjuátehe sín kixin:

—Jaha la chréhé tí chojni a. A ntá jeheni na chréhéni tí nkehe k'uetoan ch'ín Moisés.

²⁹ Ó noheni kixin Dios k'uénixjehé ch'ín Moisés. A ntá tí ch'ín a la noehyani nketí tsíkjin ch'án —ichro sín.

³⁰ Ntá kjuátehe tí ch'ín ntáchro kixin:

—Imá ókjé tíha. Tí ch'ín a mé kjuínchek'ikonna. A ntá jahará ntáchrórá kixin noahyará nketí tsíkjin ch'án. ³¹ Ó noheni kixin tienhya Dios tí nkehe tjanchia tí chojni chóna jie. Jehó tinhin ch'án tí nkehe tjanchia tí sín titekaon Dios la ko nchexiteyéhe sín tí nkehe tjinkaon ch'án. ³² Nunca kienhyéni kixin ijnko nkexro chrókjuinche'ikon ijnko chojni tsíkokjéxín t'ikonhya. ³³ A ntá tí nkexro a tí chrókujinnya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuátehe tí sín fariseo ntáchro sín kixin:

—Jaha la nchónhya jie chonta tió kokjíha. A ntá jie ¿á tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjéxín ch'án tí nínko a sátsji ch'án.

Ntakótán nchakuen sín

³⁵ Ntá kuínhin ch'ín Jesús kixin xikaha k'uetuēnenhén tí sín judío kixin ts'axrjéxín nínko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

³⁶ Ntá kjuátehe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

³⁷ Ntá kjuátehe ch'ín Jesús ntáchro ch'án kixin:

—Ó k'uíkuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'ín ch'án toté ch'ín Jesús ntáchro ch'án kixin:

—Ijie kuítekavan tí jaha Ìnchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sintakitoxián ijíé chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uéjontaxín kuínhin sín kixin xikaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

⁴¹ Ntá kjuátehe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahyará jie. Kjánchó ntáchrórá kixin t'ikonrá. Méxra chontará jie —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjettoan tí nkehe tjetjonkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé. ² A ntá tí nkexro t'ixenxín tí puerta na mé nkexro t'ayakonhen tí kolélo a. ³ La ko tí ch'ín tjet'ayakonhen tí puerta a mé tsakitjehé ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsqan va itén ch'án. Ntá t'iyexín ch'án jnkojnko ihníé jnkojnko tí kolélo kuènte ch'án ntá ts'axrjéxín

va ntoe va. ⁴ Ntá t'ikon ch'án kixin k'uaxrje kaín va ntá kuítonhen ch'án va ntia ntá tinkáchréhe va kixin tjatsoan va itén ch'án. ⁵ Chrohya va tjichréhe va ijnko chojni ókjé na mé tsinkéhe va tí chojni a kixin tjatsoanhya va itén ókjé chojni —ichro ch'án.

⁶ Mé xikaha ntáchro ch'ín Jesús kjuíncheyóexin ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jína

⁷ Ntá chrónka ch'ín Jesús ínaá ntáchro ch'án kixin:

—Ijnko nkehe tjetoan tsotjonkará kixin janhan la éxí tí puerta t'ixenxín tí kolélo tí t'inkachjina va. ⁸ Kaín tí sín kuitónxin ntia kui senó mé xíchee la ko chrókueé. La ntá tí kolélo la ántosén va tí nkehe ntáchro tí jehe sín. ⁹ Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo síin kjuachaxin ts'axrjexín va tí kòrré va sátsjikjine va la ko síin kjuachaxin ts'ixenhen va tí ts'inkachjina va ínaá.

¹⁰ 'A ntá xíchee mé jehó chrókueé la ko tjinkaon chrók'óyán la ko chrókjuinçek'itjáyan kaín nkehe. A ntá janhan k'uinka kixin tsochontaxinrá kjuachón na mé kjuachón jnkochrín. ¹¹ Janhan mé ijnko pastor jína a ntá tí pastor jína mé ts'enyákonhen tí kolélo a. ¹² A ntá tí nkexro ch'e xra tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsinká va la sátsjichroe va. ¹³ Mé xikaha tí chojni tjinkaon chrókjuacha tí xra chrókjuich'e ó la mé sátsji. A ntá tí kolélo la ántosén ch'án kuáhya ch'án kuenté tí jehe va.

¹⁴⁻¹⁵ 'A ntá janhan mé ijnko pastor jína. Mé xikaha T'aná chóxin ch'án tí janhan la ko kjaxin janhan choxian tí jehe ch'án mé xikaha choxian janhan tí sín éxí kolélo kuéntana la ko jehe sín mé chóxin sín tí janhan. Ntá ts'enyákonhan tí sín éxí kolélo kuéntana. ¹⁶ Kjaxin chonta kolélo naxa jehya kòrré va ntihi mé kjaxin t'ichjánxin sátsjicakjián va. A ntá tí tsitekakonna va ntá ts'óna jnkokoá kòrré va la ko jnkokoá nkexro ts'ayakonhen va.

¹⁷ Tjuana T'aná kixin kjónté its'én la tsoxechónna ínaá. ¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna ínaá. Tíhi mé k'uetuanna T'aná —ichro ch'ín Jesús.

¹⁹ Tió kuínhin tí sín judío tí nkehe ntáchro ch'ín Jesús ntá kjuankixin jnkokoáhya kjuenkayáxin sín. ²⁰ Nchónhya tí jehe sín ntáchro sín kixin:

—¿Nkekuènté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

²¹ Ntá ikjé sín ntáchro sín kixin:

—Xikahya chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

Tí sín judío kuítékakuenhya sín tí ch'ín Jesús

²² A ntá tí nchakuen kin tí chjasin Jerusalén k'uúxin kia xraxinkakonxín sín tí yaon tsíkjixin tsík'óna nínko. ²³ Ntá ch'ín Jesús itjen ch'án tí nínko tí ntasin kuènte Salomón.

²⁴ Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chrónka ntoá kixin á chaxín jaha tí Cristo —ichro sín.

²⁵ Ntá kjuátehe ch'ín Jesús kixin:

—Ó tjonkará ntá naxa títekákonhyará. Kaín tí xra tjét'a janhan tí kjuachaxin kuènte T'aná mé tjakoxin nkexro tí janhan. ²⁶ Kjánchó jahará títekákonhyará kixin jahará la jehya kolélo kuéntana éxí tjonkará senó. ²⁷ Tí kolélo kuéntana mé tjatsoan va tí tanná la ko kjaxin janhan tjatsoan tí jehe va la ko jehe va mé chréhe va tí janhan. ²⁸ Janhan mé tjaha va tí kjuachón jnkochrín la í ts'itjáyanhya va la ko ninkexró tsjachahya tsakitsjexín va

tjaná. ²⁹ Ó kjuanjon T'aná, mé tí nkexro tjetóxin t'etoan, na ninkexró tsjacha tsakitsjexín va tí tja ch'án. ³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xro chróchjéhe sín ch'án inaá. ³² Ntá kjuátehe ch'ín Jesús ntáchro ch'án kixin:

—Nchónhya nkehe jína k'uíkonrá kjuákoxiān kjuachaxin kuēnte T'aná. ¿Ntá nkekuèté chróchjìnará xro? —mé chro ch'án.

³³ Ntá kjuátehe tí sín judío kixin:

—Jehya tí kjuaxroan jína tjásian chrótjiáxiānni xro. Náhí. Jaha ijnko chojni ó ntá kjuíncheyóhé asán Dios na mé tsotjiáxiānni xro —ichro sín.

³⁴ Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjāxinrá éxí Dios tí jahará.”* ³⁵ Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé xíkaha ntáchro Dios kixin éxí Dios jnkójnko nkexro k'uáyéhe itén ch'án. ³⁶ A ntá kjueyána Dios ichr'ánna ch'án chjasintajni, ¿ntá nkekuèté ntáchrórá kixin k'uántaxínhan Dios kixin janhan ntáxrjan kixin Xjeen Dios tí janhan? ³⁷ Kja tí chrókjuít'ahya tí xra ich'e T'aná la chrókuítekákonhyará. ³⁸ A ntá kjónté tjet'a tí xra a kjónté títekákonhyará tí janhan na mé chrókuítekáonrá tí xra tjet'a chrókónoaxínrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

³⁹ Mé xíkaha chrótsé sín tí ch'ín Jesús inaá chrók'uikjéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xíkjan ch'án tí í jnko lado ntario Jordán inaá tí k'uékjak'e ch'ín Juan k'uékikítexín ch'án chojni senó. ⁴¹ Ntá nchónhya chojni sákjuíchréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jié la kjónté ntoá tí nkehe chrónka ch'án kuēnte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

¹ Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta. ² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuíkítexín aceite xraxé toté Inchéni la ko kjuínchexámáxin tjan kaxihi tjan toté ch'án.* ³ A ntá yóí tí kichó ch'án chjin ichr'án sín ijnko nkexro tsochénka tí ch'ín Jesús kixin:

—Inchéni jaha, tí nkexro choxian tjuèhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

—Tí chin chóna ch'án jehya kixin ónaá chrók'uitjáyanxón ch'án tí ts'en ch'án. Náhí. Tíha mé tsjakoxin tí kjuachaxin jié kuēnte tí Xjeen Dios —ichro ch'án.

⁵ A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro. ⁶ Na ntá tió kuínhin ch'án kixin níhi ch'ín Lázaro na kjónté kuítóhe ch'án iyó yaon inaá tí nó kjuák'e ch'án. ⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea inaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha inaá? —ichro sín.

⁹ Ntá ntáchro ch'ín Jesús kixin:

* 10:34 Salmo 82.6 * 11:2 Juan 12.3

—Jnkojnko yaon mé chóna teyó hora. Tió ixri chojni nchakotjin tsóténkixinhya sín ninkehó kixin t'inkaséyanxín xrohi chjasintajni a. ¹⁰ Tí sín ixri tie mé tsóténkixín sín nkehe kixin chónahya sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayaḡa ch'án —ichro ch'án.

¹² Ntá ntácho tí sín k'uájiko ch'án kixin:

—Inchéni, tí k'uájua ch'án la mé chrókuitohe ch'án jína —ichro sín.

¹³ Kjánchó tí nkehe ntácho ch'ín Jesús mé t'axrjexín kixin ó tsíkjin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjeua ch'ín Lázaro. ¹⁴ Ntá ntoá chrónka ch'ín Jesús kixin:

—Ó tsík'en ch'ín Lázaro. ¹⁵ Ntá chàna kixin kohyana ntiha kixin mé xikaha tsitékákoxínra. A ntá jie ìntará sátsjitsjeheni ch'án —ichro ch'án.

¹⁶ Ntá ch'ín Tomás, kjaxin tikitexín sín ch'án ch'ín Nohé, mé ntáche ch'án tí í so sín kixin:

—Sátsjini koíni kaín ni ts'enkaoni Inchéni —ichro ch'án.

Ch'ín Jesús ntácho ch'án kixin sinchexechón ch'án chojni inaá

¹⁷ Ntá kjuíji ch'ín Jesús kuínhin ch'án kixin ch'ín Lázaro la ó chóna noó yaon tsíkjiḡravá ch'án. ¹⁸ A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ò kjínxin. ¹⁹ A ntá itsjé tí sín judío sátsíkjiḡsjehe sín tí tjan Marta la ko tí tjan María tjeónixjeḡe sín kixin kánhyó ts'ává sín kixin tsík'én tí kichó sín a. ²⁰ Ntá kuínhin tjan Marta kixin ó kui ch'ín Jesús ntá k'uaxrjexín tjan nchia tsjixinhin ntja. A ntá tí tjan María kuítóhe tjan nchia. ²¹ Ntá tí tjan Marta ntáche tí ch'ín Jesús kixin:

—Inchéni jaha. Chrókjuak'e ntihi ntá chrók'uenhya kichó ni. ²² Kjánchó ó nòna kixin Dios tsotjáha kaín nkehe tsjanchehé ch'án —ichro tjan.

²³ Ntá ntácho ch'ín Jesús kixin:

—Tsoxechón kichuá inaá —ichro ch'án.

²⁴ Ntá ntácho tjan Marta kixin:

—Ó nòna kixin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

²⁵ Ntá ntácho ch'ín Jesús kixin:

—Janhan mé ntáxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sintaxechón sín inaá. ²⁶ La ko kaín xín tí sín naxa tjejóchón sín la tsitekaon sín tí janhan na ts'enhya sín. ¿Á titekávan xikaha ní? —ichro ch'án.

²⁷ Ntá ntácho tjan kixin:

—Chaxín Inchéni titekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkjiḡravá nkexro Lázaro

²⁸ Ó kjuixin ntácho tjan Marta xikaha ntá sákjuík'íyehje tjan kichó tjan María ntá imó chénka tjan kixin:

—Ntiha tjen Maestro t'iyahá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuíḡsjehe tjan tí ch'ín Jesús.

³⁰ Naxa tsík'ixenhya ch'án chjasin naxa tjen ch'án tí xéta ch'án tjan Marta. ³¹ Ntá tí sín judío tjeónixjeḡe tjan María kixin kánhyó ts'ává tjan, mé k'uikon sín kixin tjoka k'uaxrjexín tjan nchia, ntá kjuíchréhe sín tjan kjuenkayáxin sín kixin sátsji tjan tí tsíkjiḡravá kichó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuíji tjan tí tjen ch'ín Jesús ntá kjuák'exín toch'in tjan toté ch'án ntácho tjan kixin:

—Inchéni jaha, chrókjuak'e jaha ntihi ntá chrók'uenhya kíchiná —ichro tjan.

³³ Ntá k'uíkon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án. ³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Inchéni, ¿á sátsjitsjehé? —ichro sín.

³⁵ Ntá tsjánka ch'ín Jesús. ³⁶ Ntá ntáchro tí sín judío kixin:

—Tsjuhérá kixin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'ává asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro. ³⁹ Ntá k'uetōan ch'ín Jesús kixin:

—Tjakjíyan tí xro a —ichro ch'án.

A ntá tí tjan Marta mé kíchó tí nkexro k'uén mé ntáchro tjan kixin:

—Inchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

⁴⁰ Ntá kjuátehe ch'ín Jesús ntáchro ch'án kixin:

—Ó tjonka kixin tsítekáván ntá ts'ikuan tí kjuachaxin jié kuènte Dios —ichro ch'án.

⁴¹ Ntá kjuakjiin sín tí xro a. Ntá ch'ín Jesús konta ch'án nkajní ntáchro ch'án kixin:

—It'éni, tjáncháha kjuasáya kixin ó kuínhín tí nkehe ntáxrjan. ⁴² Janhan na ó nòna kixin xráxin tjetinhín tí nkehe ntáxrjan ntá xikaha ntáxrjan jie kixin tsinhin tí sín tjejontaxin ntihi ntá tsitekaon sín kixin jaha mé kuétoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—¿Lázaro, t'axrjéxian méhe! —ichro ch'án.

⁴⁴ Ntá tí ch'ín tsík'en k'uaxrjexín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkèxin ijnko ka. Ntá k'uetōan ch'ín Jesús kixin:

—Tjasintankará tí ka chróntetoxín ch'án kixin jína tsji ch'án —ichro ch'án.

Imó kjuenkayáxin sín kixin nkexrí ts'óyan sín tí ch'ín Jesús

(Mt. 26.1-5; Mr. 14.1-2; Lc. 22.1-2)

⁴⁵ Ntá itsjé tí sín judío sákjuikotoxin sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án. ⁴⁶ Kjánchó iso tí jehe sín sákjuítsjehe sín tí sín fariseo kjuíchénka sín tí kjuaxroan tsíkjasin ch'ín Jesús. ⁴⁷ Ntá tí sín fariseo la ko tí sín nchát'á t'etōan jnkokoá kójnkotséko sín tí sín antsí t'etōan, la ntáchro sín kixin:

—¿Xá nkexrí chrókjuich'ehe ní tí ch'ín a kixin jehe ch'án mé tjasin ch'án kjuaxroan jié?

⁴⁸ A ntá tí chrókuítóheni ch'án xikahó ntá kaín xín chojni chrókuítekaon sín tí jehe ch'án, ntá tsi tí sín romano t'etōan sinchek'itjayan sín tí ninkoéni la ko tí xra chóntani la ko tí nación kuènténi —ichro sín.

⁴⁹ Ntá ch'ín Caifás mé tí nkexro t'etuenhen tí sín nchát'á tí nánó a ntáche ch'án tí jehe sín kixin:

—Jahará la noahyará ninkehó tíha ⁵⁰ la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjasénni kixin ntá chrók'uitjayanhya kuenté tí nación kuènténi —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhí. Jehe ch'án mé k'uetuenhen tí sín nchát'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía. ⁵² A ntá jehya tí nación kuènte sín ó chrók'uenyákonhen ch'án. Náhí. Kjaxin kixin sinchekaá ch'án kaín tí sín ts'óna xjeen Dios

tjejó sín kuenté chjasintajni. ⁵³ A ntá tí yaon a tí sín t'etuenhen tí sín judío mé kjuankíxin sín kjuenkayáxin sín kíxin chrók'óyán sín tí ch'ín Jesús.

⁵⁴ A ntá ch'ín Jesús la í noxínhya k'uájí tí k'uéjéjé tí sín judío, na mé k'uaxrjexín ch'án tí estado Judea, sákjuí ch'án chjinaxón nteje, tí tjen ijnko chjasin it'in Efraín. Ntaha kuítóeko ch'án tí sín k'uájiko ch'án.

⁵⁵ Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjexín sín chjasén sín sákjuí sín chjasin Jerusalén kíxin ntaha tsoyaxínhin sín kíxin tsotjóá sín kjónté naxa xrankíxinhya ts'ixin tí kia pascua. ⁵⁶ Ntaha k'uájikjeyá sín tí ch'ín Jesús k'uéjóxenhen sín tí njnko jié ntá kjuanchankíhi sín kíchó sín kíxin:

—¿Jahará nkechorá? ¿Á chrókjuí ch'án tí kia ní o náhi? —ichro sín.

⁵⁷ A ntá tí sín fariseo la ko tí sín t'etuenhen tí sín nchat'á na ó k'uetoan sín kíxin tí siín ijnko nkexro nohe nketí tjen ch'ín Jesús chróchrónka sín kíxin ntá jína chrókjuitsé sín ch'án chrókjuinchenteto sín ch'án la ko chrókjuak'echjina sín ch'án.

12

Ijnko tjan kjuíncheká tjan aceite xraxé náxrxón toté tí ch'ín Jesús (Mt. 26.6-13; Mr. 14.3-9)

¹ Naxa t'itjáyan injon yaon ntá ts'ixin tí kia pascua. A ntá ch'ín Jesús sákjuí ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án. ² Ntá ntiha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uéjéjé sín kjóneko sín tí ch'ín Jesús. ³ Ntá tjan María kuikao tjan it'o litro aceite tsík'óna xroan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxíhi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan. ⁴ Ntá ch'ín Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kíxin:

⁵ —¿Nkekuénté kóxihya tí xroan xraxé, chrókóxixín iní ciento chichaon denario kíxin chrókjuinkítsa tí sín nòa? —ichro ch'án.

⁶ Kjánchó ch'ín Judas la jehya ntáchro ch'án xíkaha kíxin chrókuikonóehé ch'án tí sín nòa. Náhi. Ntáchro ch'án tíhi kíxin xráxin chee ch'án kíxin jehe ch'án t'ayakonhen ch'án tí nkehe tjinká chichaon ntá xráxin teé ch'án tí chichaon tsixrenájín ntiha. ⁷ Ntá ntáchro ch'ín Jesús kíxin:

—Nté títoherá tjan. Tsíkjak'echjina tjan tí xroan a kíxin tí yaon tsoxrávána. ⁸ Tí sín nòa jnkochrín sín ts'ejokoará sín. A ntá janhan jnkochríninhya ts'ejóni —ichro ch'án.

Tí sín judío itjo sín nkexrí chrók'óyán sín tí ch'ín Lázaro

⁹ A ntá itsjé tí sín judío k'uixikónohe sín kíxin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kíxin chrókjuitsjehe sín tí ch'ín Jesús ó. Náhi. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús. ¹⁰ Ntá tí sín nchat'á t'etoan mé kójnkotsé sín kjuenkayáxin sín chrók'óyán sín tí ch'ín Lázaro kjaxin ¹¹ kíxin itsjé tí sín judío kuítekaon sín tí ch'ín Jesús kíxin xíkaha kjuínchexechón ch'án tí ch'ín Lázaro ntá k'uaxrjekjanxín sín tí sín nchat'á.

K'uixenhen ch'ín Jesús chjasin Jerusalén (Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkji sín chjasin Jerusalén kíxin tí kia pascua. A ntá tí yaon chr'éxin k'uixikónohe sín kíxin tsjiji ch'ín Jesús tí chjasin ntiha. ¹³ Ntá kóchrínjin sín chaan ntakajni kjuíxinhin sín ntja itsji ch'ín Jesús, itsje sín, ntáchro sín kíxin:

—Tjancheheni Dios kjuasáya. Imá jína tí nkexro kuixín tí kjuachaxién It'eni tjen nkaya nkajni. Imá jína tí ch'ín Rey ts'etuenhen tí nación Israel —ichro sín itsje sín.

¹⁴ Ntá tsík'itja ch'ín Jesús ijnko kolócho la ntá kjuák'ekjen ch'án, éxi nixja itén Dios kíxin:

15 Chrakonhyará jahará tjejorá chjasin Jerusalén, tsjehérá ó tje kui tí ch'ín Rey kuèntará, tje kjen ch'án ijnko kolócho.*

16 A ntá tió kónhen tíha kíenxínhya tí sín k'uájiko ch'ín Jesús kíxin nkekuènté xíkaha kónhen. A ntá chr'éxin tió kjuixin sákjujia ch'án nkaya nkajní ntá xraxinkaon sín kíxin xíkaha tsíkjin tí sín k'uéchrónka itén Dios ósé nkexrí tsonhen ch'án, na ntá xíkaha chaxín xiteyá tí chrónka sín senó kíxin xíkaha tsonhen ch'án.

17 Mé xíkaha kaín tí sín tsíkójnkotsé tí kjuák'e ch'ín Jesús tió k'uíyehé ch'án tí ch'ín Lázaro kíxin ts'axrjexín ch'án tí tòyè tsíkji_xravá ch'án ntá xechón ch'án mé tí sín a mé chrónka sín tí nkehe k'uíkon sín. 18 Mé xíkaha sákjuixinhin sín tí ntia tsjixín ch'ín Jesús, k'uíxikónohe sín kíxin xíkaha tsíkjasin ch'ín Jesús tí kjuaxroan jíé. 19 Mé xíkaha ntáchro tí sín fariseo itjo sín kíchó sín kíxin:

—Tsjeherá kaín rá, ninkehó tsjachahyani sich'eni kíxin kaín xín chojni sákjuíchréhe tí jehe ch'án —ichro sín.

Iso sín nkivee griego tjejá sín tí ch'ín Jesús

20 Iso sín nixja griego k'uéjójákjan tí sín sákjuj sín tí kia chjasin Jerusalén tsoxraxinkakonxín sín Dios. 21 Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónóehé sín ch'án kíxin:

—Tjinkaonni chrók'uikonni tí ch'ín Jesús —ichro sín.

22 Ntá ch'ín Felipe sákjuíchenka ch'án tí ch'ín Andrés. Na ntá yóí sín sákjuíchenka sín tí ch'ín Jesús. 23 Ntá ntáchro ch'ín Jesús kíxin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhe ch'án tí kjuachaxin kuènte It'é. 24 A ntá tsotjónkará ijnko nkehe chaxín kíxin tí chrókjuítsínkahya ijnko noatrigó tí nche chrók'uenhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kíxin chrótjá sín. 25 A ntá tí nkexro imá tjuèhe asén kíxin kohya nkehe chrók'uatsínka na mé tsochóntahya ch'án kjuachón jnkochrín. A ntá tí nkexro tje kuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochóna ch'án kjuachón jnkochrín. 26 A ntá tí jnkójín nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkójín sín sich'ena sín xra xíkaha na mé T'aná mé tsjikosáyehe tí jehe sín.

Ch'ín Jesús chrónka ch'án kíxin its'en ch'án

27 'Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kíxin sinchekaána ch'án tí nkehe tsona jie o náhí? Kjánchó xra ó k'uinka xíkaha tsona. 28 Jaha It'éni, tjáko_xian tí kjuachaxin kuènte ihnjá —ichro ch'án.

Ntá kuínhin sín nixja ijnko nkexro nkajní ntáchro kíxin:

—Ó kjuixin kjuákoxian tí kjuachaxin la ko xíkaha xikjáko_xian inaá.

29 A ntá tí sín tjejóntaxín tsíkinhin sín mé ntáchro sín kíxin kjóna, la ko í so sín ntáchro sín kíxin:

—Ijnko ch'ín ángel nixjehe ch'án —ichro sín.

30 Kjánchó ntáchro ch'ín Jesús kíxin:

—Náhí. Jehya kíxin janhan tí jie chrókuinhan tí nixja ch'án. Náhí. Nixja ch'án kíxin tsinhínrá jahará. 31 Ntá jie tsitoxén tí ijje chojni chjasintajni na mé tí nkexro t'etoxan chjasintajni mé ts'axrjehe ch'án tí xra t'etoxan ch'án. 32 A ntá tió tsjak'énkánia ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

33 Mé xíkaha chrónkaxín ch'án kíxin nkexrí ts'enxín ch'án. 34 A ntá kjuátehe tí sín ntiha ntáchro sín kíxin:

* 12:15 Zacarías 9.9

—Kuínhinni nchekuáxin sín tí xroon tsíkjin sín ósé chrónka kixin Cristo la jnkochrínin tsjak'e ch'án. ¿Ntá nkekuénté ntáchrua kixin tí Xjeen Dios K'óna Chojni t'ichjánxin tsjak'enkání ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

³⁵ Ntá ntáchro ch'ín Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen ti xrohi t'inkaséyanxin ntia. A ntá náhí la ó ts'ixin tie. A ntá tí sín ixri tí sítié a mé noehya sín nketí sátsji sín. ³⁶ Títekáonrá tí xrohi tí naxa tjen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'ín Jesús

³⁷ K'uékjasin ch'ín Jesús nchónhya kjuaxroan jié k'uíkonxín kon sín ntá kjónté kuítekakuenhya sín ch'án ³⁸ kixin mé xíkaha tsoxiteyá tí nkehe tsintáchro ch'ín Isaías tsíkjin ch'án ósé kixin:

Inchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuènte ch'án.†

³⁹ Méxra kuítekakuenhya sín tí ch'ín Jesús éxí tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókienxínhya sín,

kixin ntá chrókóchjinehya sín tí janhan kixin chrókjuintakitoha sín jína.‡ ⁴¹ Xíkaha

k'uéchrónka ch'ín Isaías imá ósé kixin k'uék'ikon ch'án tí kjuachaxin jié kuènte Jesús

ntá k'uéchrónka ch'án nkexrí tsjak'e tí ch'ín Jesús.

⁴² Kjánchó itsjé tí sín judío t'etoan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonhya sín kjuachaxin chrók'uixenhen sín tí ninkoe sín judío. ⁴³ Mé xíkaha imá kóxrjínhin sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'ín Jesús mé tsitoexixin ijié chojni

⁴⁴ Ntá itsen nixja ch'ín Jesús ntáchro ch'án kixin:

—Tí títekáonrá tí janhan na mé jehya janhván títekáonrá na mé kjaxin títekáonrá T'aná, mé tí nkexro k'uetuanna k'uinka. ⁴⁵ Éxí tí t'ikonrá tí janhan mé xíkaha t'ikonrá tí nkexro k'uetuanna k'uinka. ⁴⁶ A ntá janhan mé xrohi k'uinka chjasintajni kixin tí sín titekaon sín tí janhan ts'ejóhya sín tí sítié a. ⁴⁷ A ntá tí jnkójnra tinhínra tí nkehe xrxanka ntá títekáonnahyará la jehya janhan sintakjasótiará kixin jehya kixin k'uinka sintakjasóte chojni chjasintajni. Náhí. K'uinka kixin sintakaá chojni. ⁴⁸ A ntá tí títekáonhyará tí janhan la ko títekáonhyará tí tan kuèntana la ó síin nkexrí tsitoexixin ijiará, na mé éxí tí tan xrxanka mé Dios sinchekitoexín ijiará tí yaon tsjixixín chjasintajni. ⁴⁹ Jehya tí nkehe kuèntana tjéxrjanka. Náhí. T'aná na mé tí nkexro k'uetuanna k'uinka mé k'uetuanna nkehe tsoxrjanka la ko nkehe tsjakuá. ⁵⁰ A ntá nòna kixin tí nkehe k'uetuon T'aná mé xranjonxín tí kjuachón jnkochrínin. Mé xíkaha tí nkehe ntáxrjan mé tjéxrjanka kixin T'aná mé k'uetuanna.

13

Ch'ín Jesús kjuínchek'ònti ch'án toté tí sín k'uájiko ch'án

¹ A ntá tí yaon xika tí ntóye tsjasin sín tí kia pascua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xrácín tjuèhé ch'án tí sín kuènte ch'án chjasintajni, a ntá jie tsjakoxin ch'án kixin imá tjuèhe ch'án tí jehe sín.

† 12:38 Isaías 53.1 ‡ 12:40 Isaías 6.10

² A ntá tí ch'ín Tsochren tsík'etuenhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús. ³ Ntá ch'ín Jesús la ó nohe ch'án kixin tsíkixin ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsíkjanjon kjuachaxin ts'etuenhen ch'án kaín xín nkehe. ⁴ Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xámáxin chojni t'ónti k'uínkat'óxin ch'án. ⁵ Ntá kujkia ch'án ijnko nkehe nta, ntá kjuankixin ch'án kjuínchek'ónti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjuíjixraká tí tjen ch'ín Pedro, a ntá ntáchro ch'ín Pedro kixin:

—Jaha Ìnchéni la, ¿nkekuènté chrókjuínchek'óntia toténi? —ichro ch'án.

⁷ Ntá kjuátehe ch'ín Jesús ntáchro ch'án kixin:

—Jaha la naxa tiénxinha tí nkehe tjét'a janhan. Chr'éxin ntá tsiénxian nkekuènté tjét'a tíha —ichro ch'án.

⁸ Ntá ntáchro ch'ín Pedro kixin:

—Jaha la sinchek'óntihya toténi —ichro ch'án.

Ntá ntáchro ch'ín Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'án.

⁹ Ntá kjuátehe ch'ín Simón Pedro ntáchro ch'án kixin:

—Náhi, Ìnchéni. Jehya tí toténi ó chrókjuínchek'óntia. Kjaxin itjani la ko ikjani chrókjuínchek'óntia —ichro ch'án.

¹⁰ Ntá ntáchro ch'ín Jesús inaá kixin:

—Tí sín tsíkixin tsík'ónti la t'ichjánxinha kuenté sín ts'ónti sín inaá. Náhi. Jehó toté sín ó mé t'ichjánxin naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

¹¹ Mé xikaha ntáchro ch'ín Jesús kixin kénhya sín tjóá sín kixin ó nohe ch'án nkexro sinchekji ch'án.

¹² Ntá tió kjuixin kjuínchek'ónti ch'án toté sín kaín sín ntá xík'inkáya ch'án inaá tí ka kuítsáte ch'án ntá kjuák'etjaxin ch'án tí k'uínkatjénxin ch'án. Ntá ntáchro ch'án kixin:

—¿Á kiénxinrá tí nkehe kjuít'a? ¹³ Jahará la ntáchrórá kixin janhan Maestro kuéntará la ko Ìnchárá. Chaxín ntoá ntáchrórá kixin janhan tíha. ¹⁴ Janhan tí Maestro kuéntará la ko ìnchárá kjuíntak'óntia totará. A ntá jahará kjaxin xikaha chrókjuínchek'óntirá toté kichuára. ¹⁵ Janhan mé kjuákoxian kixin xikaha chrókjuích'erá éxí kjuít'a janhan. ¹⁶ Ijnko nkehe chaxín tsotjonkará kixin tí sín ch'exón xra mé t'etóanhya sín éxí t'etóan tí lámoe sín, la ko tí sín k'uáyéhe sín ijnko xra t'etóanhya sín éxí t'etóan tí sín kjuanjón tí xra a. ¹⁷ Tí chrókiénxinrá nkehe tíha la ko chrókjuínchexiteyará la chrókócháhará má.

¹⁸ Jehya kaín rá xikaha ntáxrjan. Ó nõna kixin nkexro kjuéyá janhan. Kjánchó t'ichjánxin tsoxiteyá tí nkehe tsíkjin sín ósé ntáchro kixin: “Ijnko nkexro tjeñekian mé tsjanjonkian.”* ¹⁹ Mé xikaha tjétjonkará senó kixin tió ts'atsínka tíha ntá tsítekáonrá kixin janhan mé tí nkexro xráxin tjen. ²⁰ Ijnko nkehe tjetóan tjétjonkará kixin tí tsjánjonrá kjuachaxin tsitóhe tí chojni ichr'an janhan, mé éxí yóhe chrókjuánjonrá kjuachaxin chrókuítóhe tí janhan, a ntá tí tsjánjonrá kjuachaxin tsitona janhan mé éxí yóhe chrókjuánjonrá kjuachaxin chrókuítóhe tí nkexro k'uetuanna k'uinka —ichro ch'ín Jesús.

Ch'ín Jesús chrónka kixin ch'ín Judas sinchekji ch'án

(Mt. 26.20-25; Mr. 14.17-21; Lc. 22.21-23)

²¹ Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án kixin:

—Ijnko nkehe tjetóan tsotjonkará kixin jnkojínrá tjejórá ntihi mé sinchekjiráni —ichro ch'án.

* 13:18 Salmo 41.9

²² Ntá tí sín k'uájiko ch'án kjuanjíxin komáxin la ko í komáxin kichó sín kixin noehya sín nkexro tí ntáchro ch'án. ²³ A ntá ijnko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín. ²⁴ Ntá ch'ín Simón Pedro kjuakoxín seña k'uetuēhen ch'án tí í jnko ch'ín a kixin:

—Tjanchankíhi ch'án nkexro tíha —ichro ch'án.

²⁵ A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kixin:

—Inchéni, ¿nkexro tíha? —ichro ch'án.

²⁶ A ntá kjuátehe ch'ín Jesús ntáche ch'án tí ch'ín a kixin:

—Sintakjata it'ò niotja, a ntá tí nkexro tsotjahá tí t'ò niotja a mé tí nkexro a —ichro ch'án.

A ntá mé xikaha kjuínchekjata ch'ín Jesús it'ò niotja ntá chjéhe ch'án tí ch'ín Judas Iscariote, it'é ch'án mé it'ín Simón. ²⁷ Ntá k'uáyéhe ch'án tí niotja ntá tuénxín k'uixenhen asén ch'án tí ch'ín Tsochren. Ntá ntáche ch'ín Jesús tí jehe ch'án kixin:

—Tí xra tjinkávan sich'e la jaí tóxakonhan —ichro ch'án.

²⁸ Kjánchó nijnko tí sín tjejóne ntiha kienxínhya sín nkekuènté xikaha ntáchro ch'án.

²⁹ Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kixin ách'e ch'ín Jesús mé k'uetuēhen ch'án tí ch'ín Judas kixin ichrén nkehe sátsjik'ena ch'án kuènte tí kia a, o ách'e ichrén nkehe sinchekitonhen ch'án tí sín nò a. ³⁰ Ntá k'uáyéhe ch'ín Judas tí niotja, a ntá k'uaxrjexín ch'án ntiha. A ntá ó k'uúxin tie.

Ijnko nkehe nixin k'uetoan ch'ín Jesús

³¹ A ntá ó kjuixin sátsíkji ch'ín Judas, ntá ntáchro ch'ín Jesús kixin:

—A ntá jie tsonoxín tí kjuachaxin jie kuènte tí Xjeen Dios K'óna Chojni la ko tsjakoxin ch'án tí kjuachaxin jie kuènte Dios. ³² Na mé xikaha tí Xjeen Dios K'óna Chojni mé tsjakoxin tí kjuachaxin jie kuènte Dios. A ntá Dios mé tsjakoxin ch'án tí kjuachaxin kuènte Xjeen ch'án la tjoka tsoxiteyá. ³³ Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxí yóhe k'uetjanka tí sín judío mé tjonkará kjaxinrá kixin: Ninkexró xitjahya tsjiji sín tí sátsjiyá janhan.† ³⁴ Ijnko nkehe nixin tétuanhanrá ijie kixin chrótjuèhérá kichuárá éxí yóhe tjuahará mé xikaha chrótjuèhérá kichuárá. ³⁵ Tí tsotjuèhérá kichuárá ntá tsonoxín kaín xín chojni siín chjasintajni kixin tinkachónkirá tí janhan —ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án (Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

—Inchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án kixin:

—Tí nó sátsjiyá xitjahya tsochréhérá jaí. Ntá chr'éxín tsjasánchréhérá ntiha —ichro ch'án.

³⁷ A ntá ntáchro ch'ín Pedro kixin:

—¿Nkekuènté xitjahya tsochráha tí jaha jaí? Kjonté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákonna jaha? Ijnko nkehe chaxín tsotjonka kixin naxa tsotsjehya tí kochínto la ó tsjixin sinchemána níya kixin chonhyana, tsixrua.

14

Jesús mé ntia sátsjixinni tí tjen It'éni tjen nkaya nkajni

¹ Tóxakuanhyará jahará. Títekáonrá Dios la ko kjaxin títekáonrá tí janhan. ² Ntoe T'aná nchónhya nchia siín ts'ejóni. A ntá tí xikahya chrók'uúxin la xikahya chrótjonkará. Méxra

† 13:33 Juan 7.33

sátsjiyá s̄intayóxian tí chrók'uejóni. ³ A ntá tí sátsjiyá s̄intayóxian, ntá tió tsjixin ntá ts'inka ínaá, ntá sátsjini kixin jahará k̄j̄axin chrók'uejorá ntiha tí tsjak'é janhan. ⁴ Jahará la ó nohará nketí sátsjiyá la ko ó nohará tí nt̄ia a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Ínchéni, noehyani nketí sátsjia jaha. ¿A ntá nkexrí chrókónoheni tí nt̄ia a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí nt̄ia la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jina tsjiji tí tjen T'aná. ⁷ Tí chrókjuátsoanrá tí janhan ntá x̄ikaha chrókjuátsoanrá T'aná k̄j̄axin. Na ntá ó choxínrá ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

—Ínchéni, t̄itohéni kixin tsochóxinni It'á. Táhó mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

—Felipe, ósé tjejóni, ¿a ntá nax̄a t̄j̄atsoanhya tí janhan ní? A ntá x̄ikaha tí t'ikonrá tí janhan na mé x̄ikaha chrók'uikonrá T'aná. ¿Nkekuénté tjanchána kixin chrókuítōh̄a chrók'uikonrá tí T'aná? ¹⁰ ¿Á titekákonhya jaha kixin janhan jnkokoá t̄j̄ékian T'aná, la ko T'aná tjen tí t̄j̄én janhan? Tí nkehe níx̄ja janhan la jehya kuéntana. Náhí. T'aná t̄j̄ékian janhan mé t̄j̄ech'e ch'án tí x̄ra kuénte ch'án. ¹¹ Titekáonrá kixin jnkokoá t̄j̄ékian T'aná, a ntá T'aná itjen tí t̄j̄én janhan. Kjóté kuítekákonhyará x̄ikaha la chrókuítekáonrá kixin tí kjuaxroan jie kjuákoxian k'uikonrá. ¹² Ijnko nkehe chaxín t̄jonkará kixin tí chaxín tsitekáonrá tí janhan ntá k̄j̄axinrá tsjachará s̄ich'erá x̄ra yóh̄e t̄j̄ét'a la ko k̄j̄axin ix̄ra āntsi jíe tsjachará s̄ich'erá kixin janhan la ó sátsjiyá tí tjen T'aná. ¹³ Kain nkehe tsjanchatóxixínrá tí n̄ina na mé tsjánjuan kixin x̄ikaha tsjákoxian tí kjuachaxin kuénte T'aná. ¹⁴ Tí chrén nkehe tsjanchatóxixínrá n̄ina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

¹⁵ Tí chaxín t̄juéhérá tí janhan ntá chrókjuínchexiteyéhérá tí nkehe kuétuānhanrá. ¹⁶ Ntá tsoxrjannóh̄a T'aná kixin tsochr'án ch'án Nchakuen ch'án kixin tsjink̄itsa tí jahará la ko sinchechéhe āsánrá la mé ts'ejokoará jnkochr̄ixín. ¹⁷ Jehé ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin t̄j̄ejokoará ch'án la ko ts'ejokoará ch'án jnkochr̄ixín. ¹⁸ Janhan na ts̄itoáhyará nòerá jahórá, na mé tsokjan ínaá kixin ts'ejóni. ¹⁹ A ntá séhya ntá tí sín chjasintajni ts'ikonhya sín tí janhan ínaá. Kjánchó jahará mé ts'ikonrá tí janhan. Ntá k̄j̄axinrá ts'ejochónrá kixin janhan na t̄j̄échuān. ²⁰ A ntá tí yaon a chrókónohará kixin T'aná la ko janhan jnkokoá t̄j̄ékian la ko k̄j̄axin jahará la ko janhan jnkokoá t̄j̄ejóni. ²¹ Tí nkexro nohe tí nkehe t̄étoan la ko sinchexiteyéh̄e sín mé x̄ikaha tsjákox̄in sín kixin chaxín t̄juèhe sín tí janhan. A ntá tí t̄juèhe sín tí janhan ntá T'aná mé tsot̄juèhe tí jehe sín la ko k̄j̄axin janhan tsot̄juāh̄a sín la ko tsjákoxian nkexrí t̄j̄én janhan —ichro ch'ín Jesús.

²² A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Ínchéni, ¿nkekuénté jehóni t̄j̄ákoxian, a ntá t̄j̄ákoéxinhya tí chojni chjasintajni? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí nkexro t̄juèhe tí janhan mé sinchexiteyéh̄e tí nkehe t̄étoan. La ko T'aná mé tsot̄juèhe tí jehe sín la ntá T'aná la ko janhan ts'ejókoni sín. ²⁴ A ntá tí sín t̄juèhya tí janhan la mé nchexiteyèhya sín tí nkehe t̄j̄ákua. A ntá tí nkehe t̄j̄ákua t̄j̄ejotinhínrá la jehya kuéntana. Náhí. Kuénte T'aná tí nkexro k'uetuāna k'uinka.

²⁵ 'Naxa tjejóni la tjétjonkará kaín tíhi. ²⁶ A ntá Nchakuen T'aná tsochr'án ch'án kjuachaxin nina mé tsjinkitsa tí jahará la ko sinchechéhe asánrá la ko tsjakohará kaín nkehe la ko sinchexraxinkaonrá kaín nkehe xrjanka.

²⁷ 'Kjuaxróxin tsitoha la ko kjuaxróxin kuéntana tsotjahará. Jehya éxi tí kjuaxróxin chrókJuanjon tí sín chjasintajni. Náhí. Chrókóxakuenhya asánrá la ko chróchrakonhyará.

²⁸ Ó kuínhínrá ntáxrjan kixin sátsjiyá la ko tsokjan janhan ts'ejóni inaá. Tí chaxín tjuèhérá tí janhan ntá chrókócháhará tí kuínhínrá kixin sátsjiyá tí tjen T'aná kixin antsí t'etoan ch'án la kánhyó t'etoan janhan. ²⁹ Senó tjétjonkará tíhi kixin tió tsonhen tíha la ts'ikonrá ntá tsitékáonrá jahará.

³⁰ 'Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuēhen tí sín chjasintajni. A ntá jehe ch'án la ninkehó t'etuannahya tí janhan.

³¹ Kjánchó t'ichjánxin kixin xikaha tsonhen ntá tí sín chjasintajni mé tsonohe sín kixin tjuaha T'aná la ko nchexiteyáha tí nkehe k'uetuanna ch'án. Ntá jie t'inkatjenrá sátsjixínni ntihi.

15

Tí nta t'óna to uva la ko tí chaan nta

¹ Janhan mé éxi yóhe ijnko ntanò a tjechón itsa to uva la ko T'aná mé éxi yóhe tí nkexro t'ayakonhen tí nta a. ² Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to. ³ A ntá jahará la kótjuáxinrá tí tanná k'uetjonkará senó. ⁴ Tí tsitoéhyará tí janhan ntá kjaxin janhan tsitohahya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahóra tsjachahyará sich'erá tí xra kuéntana tí tsitohérá tí janhan.

⁵ Janhan na mé yóhe tí ntanò a, a ntá jahará la tí chaan tí ntanò a tsík'ayanta. Tí nkexro jnkokoá tjenkayáxinkian mé tsjacha ts'óna nchónhya to. A ntá tí tsinkáchónkihya sín tí janhan la ninkehó xra tsjachahya sín sich'e sín. ⁶ A ntá tí nkexro jnkokoáhya tjenkayáxinkian na mé éxi yóhe tí nta ch'ehya xra tsíkóchrínjin sín tsík'itjí sín chrínta tí nonte a tsóxamá ntá tsorexjo ntá tsoche.

⁷ Ntá tí chaxín tsitohéhyará tsinkachónkirá tí janhan la ko ts'itjáyanhyará tí nkehe kjuákohará ntá tsjanchiará ichrén nkehe tjinkáonrá la ts'ayéhérá. ⁸ A ntá T'aná la tsöchéhe ch'án tí ts'ónará itsjé to. Mé xikaha tsjakoxinrá kixin tinkachónkirá tí janhan. ⁹ Janhan tjuahará tí jahará éxi tjuana T'aná. Chrókónohará kixin tjuahará. ¹⁰ Tí tsitékáonrá tí nkehe kuétuanhanrá ntá tsonohará kixin tjuahará éxi yóhe kjaxin janhan ntaxiteyá tí nkehe k'uetuanna T'aná ntá kónòna janhan kixin tjuana ch'án.

¹¹ Mé xikaha tjonkará kaín tíha kixin ntá éxi chana mé xikaha tsjintaxín tsöchéhe asánrá. ¹² Tí nkehe kuétuanhanrá la mé tíhi kixin chrótjuèhérá kichuára éxi tjuahará xikaha. ¹³ Ninkexró chrókóyóhe éxi tí nkexro imá tjuèhe tí sín chóxin ch'án ntá ts'enyákonhen ch'án tí jehe sín. ¹⁴ Jahará la chojni choxian tí tsitékáonrá tí nkehe tétuanhanrá. ¹⁵ Ntáxrjanhya janhan kixin jahará chojni ch'exón xra kixin tí chojni xikaha ch'exón xra mé noehya sín nkehe tí xra ch'e tí lámoe sín a. Náhí. A ntá jahará la chojni choxian kixin kaín xín nkehe kjuakona T'aná mé kjuákohará. ¹⁶ Jehya kixin jahará kjuéyará tí janhan. Náhí. Janhan mé kjuéyá tí jahará kixin tsotjahará xra, a ntá éxi yóhe to xé mé chrók'uaxrje jína tí xra sich'enará kixin chrók'uitjáyanhya. A ntá T'aná mé tsotjáhará ch'án kaín xín nkehe tsjanhexínrá nina. ¹⁷ Mé xikaha tétuanhanrá kixin tsotjuèhérá kichuára.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

¹⁸ Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín. ¹⁹ Tí chrókókuéntará chjasintajni ntá tí sín chjasintajni chrótjuahará sín kixin naxa kjéhyará sín. Kjánchó janhan kjuéyá tí jahará kixin chrók'uaxrjékjanxínrá tí

sín siín chjasintajni. A ntá tí sín chjasintajni nínkakonhanrá sín kixin jahará jahyará kuéntará chjasintajni. ²⁰ Xráxinkáonrá tí nkehe tsítjonkará kixin tí sín ch'ehe lámøe sín xra tjetóxinhya ts'etøan sín.* Éxí yóhe chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuákøhå sín ntá kjaxin tsitekaon sín tí nkehe naxa tsjákohérá sín. ²¹ Mé xikaha sit'ahará sín kixin jahará tinkachónkirá tí janhan la ko jehe sín chónhya sín tí nkexro ichr'ánna k'uinka ntihi.

²² Tí chrók'uinkahya janhan ntihi chrónixjahya sín ntá chrókuamáhya sín jie. Ntá jie koha nkerí tsaáxin sín kixin tí jie tinkákjasin sín. ²³ Tí sín nínkakonna mé xikaha nínkakonhen sín T'aná. ²⁴ Chróchóntahya sín jie tí chrók'uejókianhya sín ntihi chrókjuásinhya janhan kjuaxroan jie éxí tsíkjasinhya ninkexró senó. Ntá jie ó k'uikon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin. ²⁵ Mé xikaha tsonhen kaín tíha kixin ntá tsoxiteyá tí nkehe ntáchro tí ley kuènte sín kixin: “Kohya jie kjuásian janhan ntá kjónté kónínkakonna sín.”† ²⁶ A ntá tsi tí nkexro tsjinkítsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuènte T'aná. A ntá jehe ch'án mé tsochrónka nkexrí tjén janhan ²⁷ la ko jahará kjaxinrá tsochronkará nkexrí tjén janhan kixin tí xrankíxixín la k'uéjóni jnkokoá.

16

¹ Kaín tíhi tjetjonkará kixin chrókuítóéhyará tí nkehe kjuákohará. ² Tí sín judío tsjanjonhya sín kjuachaxin ts'ixenhenrá nínkoé sín la ko tsjixraká tí yaon kixin tí sín ts'óyán sín tí jahará tsontáchro sín kixin xikaha mé tjejóch'e sín xra kuènte Dios, tsixro sín. ³ Mé xikaha sich'e sín kixin chónhya sín T'aná la ko chónhyana sín. ⁴ A ntá tjonkará kaín tíhi kixin tió tsjixraká tí yaon xikaha tsonhen ntá tsoxráxinkáonrá kixin ó k'uétjonkará senó a.

Tí xra ch'e Nchakuen Dios

Tí xrankíxixín k'uétjonkahyará tíhi kixin jnkokoá k'uék'ejóni. ⁵ Ntá jie sátsjiyá tí tjen tí nkexro ichr'ánna k'uinka. Kjánchó nijnkorá tjanchankíhyará nketí sátsjiyá. ⁶ Ntá kjuixin tjonkará tíha ntá imá t'avará kixin kuínhínrá xikaha xrjanka. ⁷ A ntá chaxín tí nkehe tjetjonkará kixin íchá jína sátsjiyá kixin jahará jína chrók'uejorá. A ntá tí sáchrókjuíhya ntá chrókuihya tí nkexro tsjinkítsará. A ntá tí sátsjiyá janhan ntá tsétøan kixin itsi ch'án ntihi. ⁸ A ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jie, la ko itjen ijnko ntia ntoá chrókuakja sín la ko Dios mé sinchekitøexín tí jie kjuasin sín. ⁹ Xikaha chóna sín jie kixin tinkáchónkihya sín tí janhan. ¹⁰ A ntá tsonohe sín kixin itjen tí ntia ntoá kixin sátsjiyá tí tjen T'aná ntá ts'ikonhyará tí janhan inaá, ¹¹ la ko tsonohe sín kixin Dios sinchekitøexín ijie kixin ó kjuixin kuítøexín ijie tí nkexro t'etøan chjasintajni kixin tsjasóte.

¹² Naxa chonta janhan itsje nkehe chrótjonkará, kjánchó chrókjuachahyará chrókiénxinrá jie. ¹³ A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjákohará ch'án kaín xín nkehe ntoá. Méxra jehya tí nkehe kuènte ch'án tsochrónka ch'án na mé tí nkehe tsinhin ch'án mé tsochrónka ch'án tsjákohará ch'án tí nkehe tsonhen chr'éxin. ¹⁴ Jehe ch'án mé tsjikosàyana ch'án kixin ts'áyéhe ch'án tí nkehe kuéntana ntá tsjákohará ch'án nkehe tíha. ¹⁵ Kaínxín nkehe chóna T'aná na mé kuéntana. Mé xikaha ntáxrjan kixin tí Nchakuen Dios chaxín ntoá mé ts'áyéhe ch'án tí nkehe kuéntana ntá tsjákohará ch'án nkehe tíha.

Senó ts'avá sín ntá chr'éxin tsochéhe sín

¹⁶ Ntá í séhya la í ts'ikonhyará tí janhan. La ko kjaxin séhya xik'ikonrá tí janhan inaá kixin sátsjiyá tí tjen T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kíchó sín kixin:

* 15:20 Juan 13.16 † 15:25 Salmo 35.19; 69.4

—¿Nkexrí t'axrjexín tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án inaá kixin sátsji ch'án tí tjen It'é ch'án? ¹⁸ ¿Nkexrí t'axrjexín tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xikaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan inaá. ¿Á tíha mé tjejtjananchankíhírá kíchuará ní? ²⁰ Tjéjtjonkará ijnko nkehe chaxín kixin imá tsotsjankará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sintaníhará kjónté chr'éxin tsocháhará má. ²¹ Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni. ²² Mé xikaha jahará ijie t'avará. Ntá xik'íkuan tí jahará inaá ntá imá tsochéhe asánrá la ko tsokohya ninkexró tsakitsajahará tí kjuachéhe tsochontará.

²³ Tíó tsi tí yaon a ntá tsjanchankínahyará ninkehó. Chaxín tí nkehe tjéjtjonkará kixin T'aná tsotjáhará ch'án kaín nkehe tsjanchatóxixínrá nina. ²⁴ Naxa kjuánchatóxixínhyará ninkehó tí nina. Ntá jie tjanchará la ts'ayéhé, a ntá tsjintaxín tsocháhará.

Inchéni Jesucristo mé kjuacha ch'án k'uetōan ch'án, ntá chjasintajni la náhi

²⁵ Tí nkehe tjéjtjonkará mé kjuintayóaxián ó. Ntá tsjixraká tí yaon la í ninkehó sintayóaxián na mé ntoá tsotjonkará nkexrí tjen T'aná. ²⁶ A ntá tí yaon a mé tsjan-chaxínrá nkehe nina. Ntá ntáxrjanhya tíhi kixin tsonixjayákonhanrá tí tjen T'aná ²⁷ kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekáonrá kixin janhan k'uinkaxian tí tjen Dios. ²⁸ K'uaxrjéxian tí tjen T'aná k'uinka chjasintajni. Ntá jie la ó tsitōha chjasintajni ntá sátsjiyá inaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya. ³⁰ Ntá jie tienxínni kixin jaha mé noha kaín xín nkehe la ko t'ichjánxinhya kixin jnkójín nkexro chrókjuanchankíha sín ichrén nkehe. Méxra xikaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátehe ch'ín Jesús ntáchro ch'án kixin:

—¿Á jie kuítekáonrá ní? ³² Ntá tsi tí yaon na mé jie tíha na ntá tsochakonrá jnkójnkorá tsoxíkará sátsjirá ntá tsitonará janhván tsjak'é. Kjánchó jehya janhván tjén. T'aná mé tjékian. ³³ Tjéjtjonkará kaín tíhi kixin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjónté kjuaxróxinhya tjejorá tjejtjasóterá kjánchó chrakonhyará kixin janhan mé ó kjuixin kjuacha tsétoan. A ntá tí chjasintajni la kjuachahya ts'etōan —ichro ch'án.

17

Ch'ín Jesús chrónóhe ch'án It'é ch'án kixin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajní ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan antsí má kjuachaxin kixin kjaxin tí Xjaan chrókjuikosáyehe tí jaha. ² Jaha tsíchjehé kjuachaxin tí Xjaan kixin ts'etuenhen ch'án kaín xín chojni na ntá jehe ch'án tsochjéhe kjuachón jnkochrínín kaín tí sín tsíchjehé ch'án. ³ Tí kjuachón jnkochrínín mé t'axrjexín kixin tsochóxian sín tí jaha tí jnkokoá Dios chaxín tjechón la ko kjaxin tsochóxin sín Jesucristo la mé jaha kuétuenhén ch'án kui ch'án ntihi chjasintajni.

⁴ Ó kjuixin kjuikosáyaha tí jaha ntihi chjasintajni kjuixinna tí xra chjina sít'a. ⁵ A ntá jie It'éni, chjina jaha tí kjuachaxin jie k'uéchonta janhan tí k'uéjóni jnkokoá naxa k'ónahya chjasintajni.

⁶ Ó kjuixin kjuákoḥa tí sín chjina chjasintajni kixin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuákoḥa sín itán la ntá ijie la ó kuítekaon sín. ⁷ Ntá jie ó kjuátsoan sín kixin kaín tí kjuachaxin chonta janhan la jaha tsíkjánjuan. ⁸ Kixin ó kjuixin kjuákoḥa sín tí tán chjina jaha, ntá kuítekaon sín, ntá kuíenxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

⁹ Janhan mé xrjanóaha kixin chrók'uayakonhén tí jehe sín. Jehya kixin xrjannóaha kixin chrók'uayakonhén kaín tí chojni síin chjasintajni. Náhí. Jehó xrjanóaha kixin chrók'uayakonhén tí sín chjina kixin kuéntá sín. ¹⁰ A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jié kuéntana mé ts'inkaséyanxín tí jehe sín.

¹¹ A ntá jie tsitonahya janhan ntihi chjasintajni. Kjánchó jehe sín naxa tsitohe sín chjasintajni. A ntá jie tsjasán tí tjen jaha. Jaha It'eni imá jina jaha, t'ayakuenxián sín tí kjuachaxin tí ihniá kixin ntá jnkokoá chrókjuenkayáxin sín éxí tí jaha la ko janhan jnkokoá tjenkayáxinni. ¹² A ntá tí naxa k'uéjókian tí jehe sín ntihi chjasintajni la k'uàyakuànxián sín tí kjuachaxin tí ihniá chjina. Nijnko tí jehe sín k'uitjányanhya sín. A ntá jnkokoá nkexro mé k'uitjayan mé tí ch'ín xráxín ts'itjayan kixin xikaha tsoxiteyá éxí nixja tí xroon tsíkjin sín.

¹³ Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kixin ntá tsochéhe sín éxí yóhe imá chàna. ¹⁴ Janhan mé kjuákoḥa sín itán jaha, a ntá jie tí sín chjasintajni mé nínkakonhen tí jehe sín kixin jehe sín la jehya kuènte chjasintajni éxí kjaxin janhan na janhya kuéntana chjasintajni. ¹⁵ Tjáncháhya kixin chrókuakítsjehé sín chjasintajni. Náhí. Tjáncháhá kixin chrók'uayakonhén sín kixin chrókjuich'iyehya sín tí Jínahya. ¹⁶ Jehe sín la jehya kuènte chjasintajni éxí yóhe janhan kjaxin janhya kuènte chjasintajni. ¹⁷ Nchetjuáxian sín tí kjuachaxin kuéntá kixin itán jaha mé tí tan chaxín ntoá. ¹⁸ Éxí yóhe jaha kuétuanna k'uinka chjasintajni mé xikaha janhan tétuannahán sín kixin chrók'uejójáxian sín tí sín chjasintajni. ¹⁹ Jehó tí xra kuéntá chrókjuít'a kixin chrókjuinkitsa tí jehe sín, a ntá jehe sín kjaxin chrókjuich'e sín tí xra kuéntá kixin kuínhin sín itán chaxín ntoá.

²⁰ Kjánchó jehya kixin xrjanóaha kixin chrókjuínkitsa tí jehó sín. Náhí. Kjaxin xrjanóaha kixin chrókjuínkitsa kaín tí sín tsitekaon sín chr'éxin tsinhin sín tí nkehe tsochrónka tí sín a. ²¹ Mé xikaha xrjanóaha kixin kaín tí jehe sín jnkokoá chrókjuenkayáxin sín éxí jaha It'eni la ko janhan jnkokoá tjenkayáxinni mé xikaha xrjanóaha kixin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuítekaon sín kixin jaha tsíkétuanna k'uinka ntihi. ²² A ntá tí kjuachaxin jié chjina na mé tjaha tí jehe sín kixin ntá kaín sín jnkokoá chrókjuenkayáxin sín éxí yóhe jaha la ko janhan jnkokoá tjenkayáxinni. ²³ Janhan la ko jehe sín jnkokoá chrókjuenkayáxinni éxí jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuéhé tí jehe sín éxí yóhe tjuana tí jaha.

²⁴ Jaha It'eni, tí sín kjuánjuan la tjínkavan kixin tí jehe sín chrók'uejókian sín tí tsjak'é janhan kixin chrók'uikon sín tí kjuachaxin jié chjina; kixin xráxín naxa k'ónahya chjasintajni k'uétjuana jaha. ²⁵ It'eni jaha, imá jina jaha. Kjónté tí sín chjasintajni naxa chónhya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe sín kixin jaha kuétuanna k'uinka. ²⁶ Ó kjuákoḥa sín kixin nkexro tí jaha la ko xikaha naxa tsjákoḥa sín, kixin éxí tjuana jaha mé xikaha chrótjuèhe sín kichó sín la ko janhan chrók'uejókian tí jehe sín —mé xikaha chrónóehé ch'ín Jesús tí It'é ch'án.

18

*Ch'ín Jesús sákjuíko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)*

¹ Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrjexín sín ntiha k'uatòye sín tí tsaka Cedrón. Ntaha tjen ijnko nonte siín nchónhya nta k'uixenhen ch'ín Jesús la ko tí sín k'uájiko ch'án. ² Kjaxin ch'ín Judas tí ch'ín sinchekji tí ch'ín Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'ín Jesús tí sín k'uájiko ch'án a. ³ A ntá ch'ín Judas ó kjuikao ch'án nchónhya sín soldado la ko iso sín policía kuènte ninko tsík'etuēnhen tí sín nchat'á t'etoan la ko tí sin fariseo. Ntá kjui sín kaín sín xraá sín chica la ko kjuikao sín xrohi t'inkaséyanxín tí kjuixín sín. ⁴ A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kixin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kixin:

—Tjeyáni tí ch'ín Jesús tsíkjixín chjasin Nazaret —ichro sín.

Ntá kjuátehe ch'ín Jesús ntáchro ch'án kixin:

—Janhan tíha —ichro ch'án.

A ntá ch'ín Judas tí ch'ín tsíkjinchekji tí ch'ín Jesús mé koí tjenkákjan ch'án tí jehe sín ntiha. ⁶ A ntá tió kjuátehe ch'ín Jesús kixin jehe ch'án tíha, ntá jehe sín xráchonka sín kjuítsínka sín nonte. ⁷ Ntá xíjjanchankí ch'ín Jesús ínaá ntáchro ch'án kixin:

—¿Nkexro xritjéyará? —ichro ch'án.

Ntá xintáchro sín kixin:

—Tjeyáni tí ch'ín Jesús tsíkjixín chjasin Nazaret —ichro sín.

⁸ Ntá ntáchro ch'ín Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá tìtoherá sátsji tí í so sín xríkian —ichro ch'án.

⁹ Mé xíkaha ntáchro ch'ín Jesús kixin ntá tsoxiteyá tí nkehe tsintáchro ch'án kixin: “Tí sín kjuanjon T'aná la ninkexró kjuíntak'itjáyanhya.”* ¹⁰ Ntá ch'ín Simón Pedro kuakitsje ch'án tí chica espada chrinkatoxín ch'án kóchrínjin ch'án tatsjon chjina ijnko ch'ín it'ín Malco, mé ijnko ch'ín ch'ehe nchat'á t'etoan xra. ¹¹ Kjánchó ch'ín Jesús ntáche ch'án tí ch'ín Pedro kixin:

—Chr'axenhén tjoē chica espada méhe. Kjá ntáchrúa kixin tsjasótehyana, kjá ichrua. Kjánchó T'aná kjuanjon kjuachaxin kixin nchónhya tsjasótena —ichro ch'án.

Ch'ín Jesús kjuák'e nkayakon tí ch'ín t'etuēnhen tí sín nchat'á

(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí ch'ín comandante t'etuēnhen sín la ko tí sín policía judío kuènte ninko mé itsé sín tí ch'ín Jesús kjuínchenteto sín ch'án. ¹³ A ntá sákjuíko sín ch'án ntōē ch'ín Anás ich'ee tí ch'ín Caifás mé tí nkexro tsík'áyéhe xra nchat'á t'etoan tí nánó a. ¹⁴ A ntá tí ch'ín Caifás, jehe ch'án na mé tí nkexro tsintáche tí sín judío kixin íchá jína kixin jnkokoá chojni chrók'uenyákonhen kaín tí sín chjasén ch'án.†

Ch'ín Pedro kjuínchemá ch'án kixin chóxin ch'án tí ch'ín Jesús

(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko íjnko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijnko a mé chóxin ch'án tí nchat'á t'etoan. Ntá k'uixenko ch'án tí ch'ín Jesús tí ntāsin ntōē tí nchat'á t'etoan. ¹⁶ Kjánchó ch'ín Pedro kuítóhe ch'án ntója ntāsin ó. Ntá tí ch'ín ijnko a chóxin tí nchat'á t'etoan mé k'uaxrje ch'án ntāsin nixjehe ch'án tí tjan t'ayakonhen tí ntója ntāsin chrónóēhe ch'án tjan ntá xranjon kjuachaxin ntá k'uixenhen ch'ín Pedro kjaxin. ¹⁷ Na ntá tí tjan t'ayakonhen tí ntója ntāsin kjuanchankíhi tjan tí ch'ín Pedro kixin:

—¿Á jahya kjaxin xríkoa tí ch'ín a? —ichro tjan.

Ntá kjuátehe ch'ín Pedro kixin:

* 18:9 Juan 17.12 † 18:14 Juan 11.49-50

—Náhi, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policia kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

Tí nchat'á t'etōan mé kjuanchankíhi ch'án tí ch'ín Jesús
(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'etōan kjuankíxin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuakohe ch'án sín. ²⁰ Ntá kjuátehe ch'ín Jesús ntáchro ch'án kixin:

—Noxín kjuak'é kjuàkua, la ntá kaín xín chojni kuínhin sín. Xráxín k'uékjákoxian kaín xín tí nínko ntsí la ko tí nínko jié tójnkotséxin kaín xín sín judío. Ninkehó nkehe kjuákohya imó. ²¹ ¿Nkekuènté tjanchankína tí janhan xíkaha? Chrókjuanchankíhí tí sín kuínhin kixin nkexrí kjuákoha sín. Jehe sín mé nohe sín nkehe kjuákoha sín —ichro ch'án.

²² Kjuixin ntáchro ch'ín Jesús tíhi ntá ijnko ch'ín policia kuènte nínko mé tjentaxín ch'án ntiha chjéhe ch'án nkayakon tí ch'ín Jesús ntáchro ch'án kixin:

—¿Á xíkaha jiehe tsjátéhé tí nchat'á t'etōan ní? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí ntoáhya tí nkehe xrjanka ntá chronka nkehe tí ntoáhya. A ntá tí ntoá tí nkehe xrjanka, ¿ntá nkekuènté kixin tjatena? —ichro ch'án.

²⁴ Ntá k'uetōan ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí nchat'á t'etōan.

Ch'ín Pedro xíkjinchemá ch'án inaá kixin chóxin ch'án tí ch'ín Jesús
(Mt. 26.71-75; Mr. 14.69-72; Lc. 22.58-62)

²⁵ Ntá ch'ín Simón Pedro mé naxa tjexín toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhi, janhya —ichro ch'án.

²⁶ A ntá ijnko ch'ín ch'ehe tí nchat'á t'etōan xra, na mé tí ch'ín a mé naxa kjéhya ch'án tí ch'ín tsíróchrínjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uíkuan tjekoa ch'án tí huerto ní? —ichro ch'án.

²⁷ Ntá ch'ín Pedro xíkjinchemá ch'án inaá kixin jehya ch'án, ichro ch'án. Ntá xrínahya tuénxín itsje ijnko kochíntōa.

Ch'ín Jesús kjuák'e nkayakon tí ch'ín Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Ntá k'uaxrjexín sín ntōe ch'ín Caifás, sákjuíko sín ch'ín Jesús tí palacio t'etōanxín tí ch'ín gobernador. Ntá ó kjuankíxin k'uínkaséyan kjuíji sín ntiha. A ntá tí sín judío la mé í k'uixenhya sín tí palacio kixin tí xíkaha chrók'uixenhen sín tí nchia a la chrókuamá sín tí jie síin ntiha la í xitjahya sine sín tí kia pascua, ichro sín. ²⁹ A ntá ch'ín Pilato k'uaxrjexín ch'án tí nchia t'etōanxín ch'án kjuanchankíhi ch'án sín kixin:

—¿Nkehe tí jie chóna tí nkexro i? —ichro ch'án.

³⁰ Ntá kjuátehe sín ntáchro sín kixin:

—Tí chróchóntahya ch'án jie jié la chrókjuíkōahyani ch'án —ichro sín.

³¹ Ntá k'uetōan ch'ín Pilato kixin:

—Sátjikoará ch'án nchekitōexínrá nkerí jie chóna ch'án kixin éxí ntáchro tí ley kuèntará —ichro ch'án.

Ntá kjuátehe tí sín judío ntáchro sín kixin:

—Jeheni chojni judíoni la chóntahyani kjuachaxin ts'óyánni ninkexró —ichro sín.

³² Mé xikaha tsoxiteyá tí nkehe tsíntachro ch'ín Jesús kixin nkexrí ts'enxín ch'án. ³³ Ntá ch'ín Pilato xík'ixenhen ch'án tí nchia t'etōanxín ch'án ntá k'uíyēhē ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etūenhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kixin:

—Tí nkehe tjanchankíná, ¿á jahyá kjuenkayáxian xikaha, o á í jnko nkexro kjuanchia jie kixin tí janhan? —ichro ch'án.

³⁵ Ntá kjuátehe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nchat'á t'etōan mé kjuikaán sín tí jaha. ¿Xá nkehe kjuich'e kixin? —ichro ch'án.

³⁶ Ntá kjuátehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétōan. Náhí. Tí chrókuétōan chjasintajni ntá tí sín xrikian chrókjuanjonko sín tí sín judío kixin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétōan —ichro ch'án.

³⁷ Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kixin:

—Janhan tí rey éxí ntáchrúa jaha. Tí xra ó kokjina la ko tí xra ó k'uinka chjasintajni kixin tsoxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

³⁸ Ntá ntáchro ch'ín Pilato kixin:

—¿Xá nkehe tí nkehe chaxín ntoá, ichrúa? —ichro ch'án.

*Ch'ín Pilato kjuanjon kjuachaxin kixin its'en ch'ín Jesús
(Mt. 27.15-31; Mr. 15.6-20; Lc. 23.13-25)*

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sín judío nixjēhē ch'án sín ntáchro ch'án kixin:

—K'uíjtáhya ninkehó jie chóna tí nkexro i. ³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjinkáonrá kixin ts'atjánta tí ch'ín Rey t'etūenhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhí. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetōan ch'án kixin tsjate sín tí ch'ín Jesús. ² Ntá tí sín soldado kjuích'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kixin jehe sín tsjikosáyehe sín ch'án éxí ijnko rey, kjánchó chaxínhya tíha. ³ Ntá kóchjinehe sín tí tjen ch'án ntáchro sín kixin:

—Isé tsjak'e tsétuēnhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etōanxín ch'án ínaá nixjēhē ch'án tí sín tsíkójnkotsé ntáchro ch'án kixin:

—Tsjeherá tsakítsjexián ch'án ntihi kixin tsonohará kixin k'uíjtáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'í la ko tjenkáya ch'án tí ka kjátse tié. Ntá ntáchro ch'ín Pilato kixin:

—Tsjeherá, ntihi tjen ch'án —ichro ch'án.

⁶ A ntá tió k'uikon tí sín nchat'á t'etōan la ko tí sín policia kuente ninko ntá kjuankixin sín t'óyako sín ntáchro sín kixin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'ín Pilato kixin:

—Jahará tjikoará ch'án tjaké nkanirá ch'án ntacruz kixin janhan k'uitjáhya ninkehó jie chóna tí jehe ch'án —ichro ch'án.

⁷ Ntá kjuátehe tí sín judío kixin:

—Jeheni chojni judío mé chónani ijnko ley t'etōan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án ⁹ ntá xik'ixenhen ch'án tí nchia t'etōanxin ch'án inaá kjuanchankíhi ch'án tí ch'ín Jesús kixin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuáteehya ch'án.

¹⁰ Ntá ntáchro ch'ín Pilato kixin:

—¿Jaha nkekuenté tjáteehya nkehe tjánchánkíha? ¿Á noahya jaha kixin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kixin sátsjia kohya nkehe tsonhan? —ichro ch'án.

¹¹ Ntá kjuátehe ch'ín Jesús ntáchro ch'án kixin:

—Ninkehó kjuachaxin chróchontahya jaha chrókuétoan chrók'uen o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jie jie chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankixin ch'án kjueyá ch'án nkexrí chrók'uetōan ch'án kixin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kixin:

—Kja tí tsjtohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'etuenhen tí nación kuenténi. Tí nkexro ch'éna asén ch'án éxi ijnko rey mé nínkakonhen ch'án tí ch'ín t'etuenhenni —ichro sín.

¹³ Ntá kuínhin ch'ín Pilato tíhi ntá k'uetōan ch'án kixin tsakitsje sín tí ch'ín Jesús ntója ntá ch'ín Pilato kjuák'etjaxin ch'án tí silla nchekitōexín ch'án jie, mé nkiva hebreo mé it'ín Gabata, mé t'axrjexín kixin tjat'ō noi jehó xro tsík'óna. ¹⁴ Na mé ó chjina chonkixin ntá tí tsonjin la mé ó tsjasin sín tí kia pascua. Ntá ch'ín Pilato ntáche ch'án tí sín judío kixin:

—Ntíhi itjen tí ch'ín rey kuentará —ichro ch'án.

¹⁵ Kjánchó jehe sín k'óyako sín ntáchro sín kixin:

—¡Its'en ch'án! ¡Its'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'ín Pilato kixin:

—¿Á tjinkáonrá kixin janhan chrókjuakénkania ijnko ntacruz tí ch'ín rey kuentará ní? —ichro ch'án.

Kjánchó tí sín nchat'á t'etōan mé kjuátehe sín kixin:

—Náhi. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkáni sín ch'án ntacruz. Ntá sákjuíko sín ch'án.

Kjuák'enkáni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuíko sín tí ch'ín Jesús kuámá ch'án tí ntacruz tsjak'enkáni ch'án. Ntá kjuíjiko sín ch'án ijnko tjo tikitexín sín Hueso Kja Chojni. A ntá nkiva hebreo mé tikitexín sín Gólgota. ¹⁸ Ntaha mé kjuák'enkáni sín ch'án tí ntacruz. Ntá kjaxin yaá sín nánánko k'uéjō jnkójnko sín ntá jnkosiné kjuák'e ch'ín Jesús. ¹⁹ Ntá k'uetōan ch'ín Pilato kixin tsokjin sín ijnko ntachiso tsjak'enkáni sín ikja tí ntacruz ntáchro kixin: “Ch'ín Jesús kjuixin ch'án chjasin Nazaret, mé tí ch'ín Rey kuente tí sín judío”, tsixro. ²⁰ A ntá itsjé tí sín judío mé kjuínchekuáxin sín tí letra tsík'óna kixin chjino tí chjasin Jerusalén tsíkjak'enkáni sín ch'ín

Jesús ntacruz la ko iní nkìva tsíkjin sín, na mé ijnko nkìva la hebreo, la ijnko nkìva la griego, la ijnko nkìva la latín. ²¹ Ntá tí sín nchàt'á t'etòan kuènte tí sín judío mé ntáche sín tí ch'ín Pilato kixin:

—Chrókjinhya jaha xikaha kixin jehe ch'án mé tí “Ch'ín Rey kuènte tí sín judío.” Náhí. Íchá jína chrókjian jaha kixin “Jehe ch'án ntáchro ch'án kixin jehe ch'án mé tí ch'ín Rey kuènte tí sín judío” —ichro sín.

²² Kjánchó kjuátehe ch'ín Pilato kixin:

—Tí letra kuétoan k'óna la ó k'óna, kjónté xikahó tsitòhe —ichro ch'án.

²³ Ntá tí sín soldado tió tsíkjin tsíkjak'enkani sín tí ch'ín Jesús tí ntacruz ntá kuákja sín tí ké ch'án la k'óxikayehe sín jnkojnko ka kuákja sín kanoé sín. La ko kjaxin kuákja sín tí ka kjinjin k'uék'inkáya ch'án. Tí ka mé tsíxronhya ka la me jnkokoá ka tíha. ²⁴ Ntá tí sín soldado kjo sín kichó sín ntáchro sín kixin:

—Tsótséchjehyani tí ké ch'án. Íchá jína sich'exinni suerte ntá tsotsjeheni siná nkexro ts'áyéhe tí ka.

Mé xikaha xiteyá éxí ntáchro xroon itén Dios tsíkjin sín ósé ntáchro kixin: “Kjuích'exín sín suerte ntá k'óxikayehe sín kaná.”* Mé xikaha kjuích'e tí sín soldado.

²⁵ A ntá chjino tí ntacruz kjuák'enkani ch'ín Jesús mé kjuák'e tí iné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena. ²⁶ A ntá tió k'uíkon ch'ín Jesús kixin itjen tí iné ch'án la ko chjino tjen tí ch'ín antsí tjuèhé ch'án k'uék'ajiko ch'án, ntá nixjehe ch'án tí iné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjehe ch'ín Jesús tí ch'ín a ntáchro ch'án kixin:

—Tsjehé kixin ntaha itjen iná —ichro ch'án.

A ntá tí ch'ín a mé k'uáyéhe ch'án tí tjan a sákjuíko ch'án tjan ntoe ch'án k'óna éxí iné ch'án xikaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjin sín ósé ntá xikaha ntáchro ch'án kixin:

—Ik'uén ntá.

²⁹ Ntá ntiha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kjinjin, ntá kjuínchechrìn sín tí tjen ir'va ch'án. ³⁰ Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín sín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

³¹ A ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jié, ichro sín. Mé xikaha kjuanchehe sín tí ch'ín Pilato kixin ts'etòan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en. ³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús. ³³ Ntá kjuíji sín tí tjen ch'ín Jesús ntá k'uíkon sín kixin ó tsíkjin tsík'en ch'án, ntá í k'óchjenjinhya sín toté ch'án.

³⁴ A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko ìnta. ³⁵ A ntá janhan mé tjékjian tí xroon í mé kjuak'é ntiha k'uíquán kixin xikaha kónhen ntá ntoá tjéxrjanka kixin jahará kjaxinrá chrókuítekáonrá. ³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin:

* 19:24 Salmo 22.18

“K'óchjenjinhya sín ninkehó huésøe ch'án.”† 37 Kjaxin itjen í jnko nketí nixja tí xroon itén Dios tsíkjin sín ósé ntáchro kixin: “Tsokomá sín tí nkexro tsíchr'áte sín chica.”‡

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

38 Ntá ó kjuixin kónhen kaín tíha ntá ch'ín José, mé ijnko ch'ín kjuixin chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxin ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jehe ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuiko ch'ín José tí cuerpo kuènte ch'ín Jesús. 39 Kjaxin ch'ín Nicodemo, tí ch'ín kjuínixjehé tí ch'ín Jesús ijnko tie a mé kjuí ch'án kjuikao ch'án treinta kilo xroan xraxé tjiko xroan mirra la ko xroan áloes. 40 Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjínjin tsíka tí xroan xraxé a kixin xikaha k'uékinkáchónki tí sín judío k'uékjavá sín chojni tsík'en. 41 Tí kjuák'enkání ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxráváhya ntiha. 42 Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankixin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

1 A ntá tí yaon xrankixín semana ntá tí tjan María Magdalena naxa sítié sákjuí tjan tí tjen tí tòye, ntá k'uíkon tjan kixin ó tsíkjin tí xro tsík'ikjèxin tí tòye a. 2 Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuèhe ch'ín Jesús, ntá ntáchro tjan kixin:

—Ó tsíkakitsjexín sín tòye tí cuerpo kuènte Ìnchéni ntá noehyani nketí tsíkjak'e sín —ichro tjan.

3 Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a. 4 Ntá yóí sín kuinká sín sákjuíko kichó sín. Kjánchó tí ch'ín í jnko antsí tjan kuinká ch'án ntá kánhyó tjan kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a. 5 K'uísén ch'án tsjehe ch'án nkaxenhen tí tòye a. A tí ka tsík'ísímá ch'ín Jesús mé naxa tjejó k'uíkon ch'án, kjánchó jehe ch'án k'uixenhya ch'án tí tòye a. 6 Ntá kjónté chr'éxin kjuíji ch'ín Simón Pedro ntá k'uixenhen ch'án tí tòye a. Ntá kjaxin k'uíkon ch'án kixin tjejó tí ka tsík'ísímá ch'ín Jesús 7 la ko k'uíkon ch'án tí ka tsík'ísímá ikja ch'án na mé tí ka tsíxrèya ka la ókjé tjen ka, a ntá tí í so ka na mé ókjé tjejó ka kjaxin. 8 Na ntá tí ch'ín í jnko k'uék'ajiko ch'ín Jesús, mé tí ch'ín tsíkjiji senó na kjaxin k'uixenhen ch'án tí tòye ntá k'uíkon ch'án tí nkehe tsíkónhen ntá kuítekaon ch'án. 9 Kixin naxa k'uékienxínhya sín tí nkehe k'uéchrónka xroon itén Dios kixin t'ichjánxin tsoxechón tí ch'ín Jesús. 10 A ntá tí sín sátsíkjitsjehe tòye la xíkjan sín ntøe sín.

Titàya k'uíkuèn tjan María Magdalena tí ch'ín Jesús

(Mr. 16.9-11)

11 Ntá tjan María mé ntahó kuítóhe tjan ntója tí tòye tsjánka tjan. Naxa tsjánka tjan k'uísén tjan tsjehe tjan nkaxenhen tí tòye 12 ntá xrínahya k'uíkon tjan yaá sín ángel tjejóyá sín ka tjoá tjejótjaxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án. 13 A ntá tí sín ángel mé kjuanchankí sín kixin:

—Naná, ¿kuènte tsjánka? —ichro sín.

Ntá kjuátehe tjan ntáchro tjan kixin:

—Sátsíkjiko sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátsoanhya tjan kixin jehe ch'án. ¹⁵ Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuénté tsjan̄ka? ¿Nkexro tjeýá? —ichro ch'án.

Ḃ ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kja tí jaha sákjuíkoa ch'án ntá jie chrónka nketí sákjuíkoa ch'án kixin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxin tjan nkíva hebreo ntáchro tjan kixin:

—¡Raboni! —ichro tjan. Tíha mé t'axrjexín kixin Maestro.

¹⁷ Ntá ntáchro ch'ín Jesús kixin:

—Tatjántana kixin naxa sátjílhya janhan tí tjen T'aná. Sátjia tjítsjehé tí sín kichiná chénka sín kixin sátsjiyá tí tjen T'aná na mé kjaxin It'ará tí jahará na mé Dios kuéntana la ko kjaxin Dios kuéntará —ichro ch'án.

¹⁸ Ntá tí tjan María Magdalena sákjuíchénka tjan tí sín k'uék'ajiko ch'ín Jesús chrónka tjan kixin xikaha tsík'ikon tjan Ìnchéni. La ko kjaxin chrónka tjan kixin xikaha tsintáchro ch'án.

Tí sín k'uék'ajiko ch'ín Jesús titàya k'uíkuèn sín ch'án

(Mt. 28.16-20; Mr. 16.14-18; Lc. 24.36-49)

¹⁹ Ḃ ntá ó kónjín tí yaon a mé tí yaon xrankíxín semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jína kixin chrakonhen sín tí sín judío. Ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án kjuajna tí sín k'uék'ajiko ch'án ntáchro ch'án kixin:

—Jína tjejorá —ichro ch'án.

²⁰ Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uíkon sín Ìnchéni. ²¹ Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uētuan̄na k'uinka, a ntá jie la janhan tētuānhan tí jahará —ichro ch'án.

²² Ntá k'uánote ch'án tí jehe sín ntáchro ch'án kixin:

—T'ayéhérá Nchakuen Dios. ²³ Tí ts'itjāyanhanrá tí jie kjuasin jnkojín chojni ntá xikaha tsjìn tí ijje sín. Ntá tí ts'itjāyanhyará tí jie kjuasin jnkojín chojni ntá naxa kjuīnhya tí ijje sín —ichro ch'án.

Ch'ín Tomás k'uíkon ch'án kixin tsíxechón Ìnchéni

²⁴ Ḃ ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikítexín sín ch'ín Nohé mé kohya ch'án tí kui ch'ín Jesús. ²⁵ Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uíkonni Ìnchéni —ichro sín.

Kjánchó ntáchro ch'ín Tomás kixin:

—Tí ts'íkōnhya janhan tí tsíkjiatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuítekavan? —ichro ch'án.

²⁶ Ḃ ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jína ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsíkjiatexín chica clavo tjaná la ko xrákoa tjá chr'axénhén chjiana. Chróntáchrohya kixin chaxínhya. Tsítekávan kixin chaxín —ichro ch'án.

²⁸ Ntá kjuátehe ch'ín Tomás ntáchro ch'án kixin:

—¡Inchéni jaha la ko Dios kuéntana! —ichro ch'án.

²⁹ Ntá ntáche ch'ín Jesús tí ch'ín Tomás kixin:

—Jaha Tomás k'uikonjian ntá kuítekávan. Ntá antsí náxrjón tjejó tí sín kjónté k'uikonhya la titekaon sín —ichro ch'án.

Tíhi mé chrónka nkekuènte tsíkjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uikon tí sín k'uájiko ch'án kjónté chrónkahya tí xroon i kixin xikaha kónhen. ³¹ Tí nkehe chrónka tí xroon i ikjian janhan kixin chrókuítekáonrá jahará kixin Jesús mé tí Cristo, mé tí Xjeen Dios kixin ntá kaín ni chróhóntani kjuachón jnkochrixin kixin chrókuitekaonni ch'án.

21

Yato tí sín k'uék'ajiko ch'ín Jesús xrínahya titàya k'uikon sín ch'án

¹ A ntá chr'éxin tí sín k'uék'ajiko ch'ín Jesús titàya xik'ikon sín tí jehe ch'án inaá chrínta ntayaon Tiberias. Mé xikaha kónhen ² kixin jnkokoá k'uéjé sín ch'ín Simón Pedro la ko ch'ín Tomás, me tí ch'ín tikitexín sín ch'ín Nohé, la ko ch'ín Natanael kujxin ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús. ³ Ntá ntáchro ch'ín Simón Pedro kixin:

—Sátsjitse koche —ichro ch'án.

Ntá kjuátehe sín kixin:

—Koíni sátsjikoani —ichro sín.

Ntá sákjuí sín k'ujt'ótjen sín ijnko ntabarco. Kjánchó ninkehó koche tséhya sín kuenté tie. ⁴ A ntá ó chjina ts'inkaséyan ntá xrínahya titàya k'uikon sín itjen ch'ín Jesús chrínta ntayaon, kjánchó kjuátsoanhya tí sín k'uék'ajiko ch'án kixin jehe ch'án. ⁵ Ntá kjuanchankíhi ch'án sín kixin:

—Jahará ntasoá, ¿á naxa ninkehó koche tsehyará? —ichro ch'án.

Ntá kjuátehe sín ntáchro sín kixin:

—Naxa ninkehó ko tséhyaní —ichro sín.

⁶ Ntá ch'ín Jesús ntáche ch'án sín kixin:

—Itérá tí nchísén tí nánko chjia chjina tí ntabarco la tsotserá va —ichro ch'án.

Ntá xikaha kjuích'e sín k'ue sín nchísén ntá í tjachahya sín tsakitsjenkixin sín ntá tí nchísén kixin nchónhya koche tjinká. ⁷ A ntá tí ch'ín antsí tjuèhe ch'ín Jesús mé ntáche ch'án tí ch'ín Pedro kixin:

—¡Inchéni tí méhe! —ichro ch'án.

Ntá kuínhin ch'ín Simón Pedro kixin Inchéni tíha ntá k'uinkáya ch'án iké ch'án inaá (kixin tsíkakitsje ch'án iké ch'án) ntá kjuiankí ch'án ntá. ⁸ Tí í so sín k'uék'ajiko ch'ín Jesús mé kjuíji sín tí chrínta ntayaon kjuikao sín tí ntabarco tinkánkákjentóxin tí nchísén tjinká koche chrítaón ntá kixin ijnko ciento metro kjinxin tí chrínta ntá k'uéjé sín. ⁹ Ntá kjuíji sín chrínta ntá ntá k'uínkajinxin sín tí ntabarco ntá k'uikon sín tjeche xrohi síxènkí xrinta ntá chrítaón tí xrinta tjejen ijnko koche la ko nánko siín niotja. ¹⁰ Ntá kjuanchia ch'ín Jesús ntáchro ch'án kixin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'ujt'ótjen ch'án tí ntabarco kuákja ch'án tí nchísén kuinkánkákjen ch'án xráko ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a. ¹² Ntá ntáchro ch'ín Jesús kixin:

—Xrákirá, interá —ichro ch'án.

A ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsoan sín kixin Ìnchéni tíha. ¹³ Ntá kóchjina ch'ín Jesús kuákja ch'án tí niqtja chjéhe ch'án tí jehe sín la ko xikaha xíkjanjon ch'án tí koche.

¹⁴ Tíhi mé níxin k'uíkon tí sín k'uék'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, xjeen Jonás, ¿á antsí tjuana jaha, a ntá tí í so la kánhyó? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuèntana —ichro ch'án.

¹⁶ Ntá yóxin kjuanchankí ch'ín Jesús ínaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuèntana —ichro ch'án.

¹⁷ Ntá níxin kjuanchankí ch'ín Jesús kixin:

—Jaha Simón, xjeen Jonás, ¿á tjínkavan tí janhan? —ichro ch'án.

A ntá k'uává ch'ín Pedro kixin níxin kjuanchankí ch'ín Jesús kixin á tjínkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha kaín xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha t'ayakonhén tí kolélo kuèntana. ¹⁸ Ntá ijnko nkehe chaxín tjétjonka kixin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. A ntá tíó tsotáda jaha ntá tsjéntoá tjá ntá í jnko nkexro sintak'inkáya ka la ko sátsjikoá sín tí tóxrjíanhya sáchrókjuia —ichro ch'án.

¹⁹ A ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uíkon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanckankíhi ch'án tí ch'ín Jesús kixin nkexro sinckekji ch'án.† ²¹ Ntá ch'ín Pedro k'uíkon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Ìnchéni, ¿a ntá tí ch'ín i la nkehe tsonhen ch'án a? —ichro ch'án.

²² Ntá kjuátehe ch'ín Jesús kixin:

—Tí tjínkavan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhi. Ó jehí ntáchro ch'án kixin tí tjínkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

²⁴ A ntá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

* 21:14 Juan 20.19,26 † 21:20 Juan 13.25

²⁵ Naxa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka kaín tí xroon chrók'óna xikaha. Amén. Ó tjen.

Tí xrā kjuích'e tí sín kjueyá ch'ín Jesús

Itsi Nchakuen Dios

¹ Tjuahā jaha Teófilo na tí libro saoxín mé kjian̄ kaín nkehe kjuako ch'ín Jesús la ko tí xrā kjuích'e ch'án tí xrankíxixín ² hasta tí yaon sákjui ch'án nkaya nkajní. Ā ntā ti naxa sákjuíhya ch'án nkajní la kjueyá ch'an tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehe ch'án sín la k'uetuēnhen ch'án sín kixin tsonohe sín nkehe tí xrā chrókjuich'e sín. ³ Tió kjuixin k'uén ch'án ntá kónoxín kixin tjechón ch'án, k'uíkon tí jehe sín la ko cuarenta yaon mé k'uíkon sín ch'án jnkoyaxón. Itsjé nkehe kjuakoxín ch'án kixin tsonoexín sín kixin chaxín tjechón ch'án la ko kjuako ch'án nkexrí tí kjuachaxin kuènte Dios.

⁴ Ti naxa kójnkotséko ch'án tí sín k'uájiko ch'án la jehe ch'án mé k'uetuēnhen ch'án sín kixin naxa sátsjixinhya sín tí chjasin Jerusalén. Chronka ch'án kixin:

—Chróchonhénrá ntihō chrók'uayéhérá tí nkehe tsjanjon T'aná, me tí nkehe kuinhínrá xrjanka janhan. ⁵ Ā ntá chaxín ch'ín Juan intā ó kuíkítexín ch'án chojni. Ā ntá ijie kánhyó itsjé yaon ntá jahará la Nchakuen Dios la tsikitiaxínrá.

Sákjui ch'ín Jesús nkaya nkajní

⁶ Ntá ti naxa kójnkotséko sín ch'ín Jesús, kjuanchankíhi sín ch'án kixin:

—Jaha Ìnchéni, ¿á tsjánjonhya kjuachaxin jaí ts'etōanni chjaséni Israel ínaá? —ichro sín.

⁷ Ntá kjuátehe ch'ín Jesús kixin:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etōan tíha. ⁸ Ntá itsi tí Nchakuen Dios ntá ts'ayéhérá kjuachaxin sátsjichronkará nkehe tí xrā kjuít'a, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin nixja ch'ín Jesús ntá xrínahya tinkák'it'ótjen ch'án sákjui ch'án la tjejótsjehe sín. Sákjui ch'án hasta kjuák'enkákjan ch'án ijnko tjuí. Ntá í t'ikonhya sín nkerí kjuíji ch'án.

¹⁰ Ntá naxa tjejókonta sín tí sákjui ch'ín Jesús nkajní, ā ntá xrínahya titàya k'uíkuèn sín yaá chojni ntoa tjejóyá sín ka tjoá tjejó sín chjinaxón tí tjejó tí jehe sín. ¹¹ Ntá tí sín a mé ntáchro sín kixin:

—Jahará chojni kjuíxinrá estado Galilea, ¿nkehe tsonhen naxa kontará nkajní? Xíkaha tjejokontará sákjui Jesús la ko mé xíkaha xiki ch'án ínaá —ichro sín.

Xreyá ch'ín Matías tsjiatéhe lùké ch'ín Judas

¹² Na ntá kjanxin sín tí jnā it'in Olivo na ikjan sín chjasin Jerusalén. Tíha a mé kjinhyó tjen kixin ó xíkahō k'uetōan tí ley sátsji sín tí yaon t'ok'éhe sín. ¹³ Na ntá kjuíji sín tí chjasin ntiha ntá k'uit'ótjen sín tí yóxin piso tí nchia tsíkjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuènte tí partido cananista, la ko kjaxin ch'ín Judas, savé ch'án mé it'in Jacobo. ¹⁴ Kaín sín kójnkotsé sín ntiha tsonixjehe sín Dios la ko k'uék'ejó sín tí kichó tí ch'ín Jesús la ko tí tjan María, ìné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsíkójnkotsé ntiha. Ntá ntáchro ch'án kixin:

¹⁶ —Kíchóni, t'ichjánxin tsoxiteyá éxí nixja xroon itén Dios éxí tsínixja ch'ín David tsíchronka Nchakuen Dios nkehe sich'e ch'ín Judas. Tí ch'ín Judas mé kjuíkao ch'án tí sín tsotsé ch'ín Jesús. ¹⁷ Jehe ch'án mé kjaxin k'uék'ajikoni la jnkokón xrā k'uáyèkoni ch'án.

¹⁸ **A** ntá jehe ch'án mé sákjuík'enaxín ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjehe tsee ch'án k'uaxrje kaín sîntandé ch'án. ¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrjexín kixin ijnko nonte síin ijni. ²⁰ Tí xroon Salmo mé nixja xikihí:

Tsitöhe ntoé ch'án a,
la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyéhe tí xrá kuènte ch'án.*

Mé xikaha tsíkjin ch'ín David.

²¹ Tí tjejóni ntihi la síin chojni ó k'uájikoni xráxín tí k'uék'ajikoni Ìnchéni Jesús ²² desde k'uíkoni nkexrí kuikite ch'ín Juan tí jehe ch'án la ko hasta k'uíkoni sákjuí ch'án nkaya nkajni. Ntá ijie t'ichjánxin tsoxreyá jnkójín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xikaha chrónka ch'ín Pedro.

²³ Ntá kjuenkayáxin sín tsonoxín yaá chojni mé tí ch'ín José, t'ikon ch'án Barsabás la ko Justo, la ko kjaxin í jnko ch'án it'in Matías. ²⁴ Ntá nixjehe sín Dios la ntáchro sín kixin:

—Ìnchéni jaha mé choxian asén kaín chojni. Tjákohéni nkexro tsonhen tocar xrá tí yaá tí nkexro í kónoxín ²⁵ tsjiatehe xrá apóstol kuènte ch'ín Judas. **A** ntá tí ch'ín Judas mé kuítóhe ch'án tí xrá kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuích'e sín suerte ntá xríñahya kónhen tocar tí ch'ín Matías, ntá tuénxín tí hora a kuákja ch'án xrá k'uéjoko ch'án tí tejnko tí sín kjueyá Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín. ² Xríñahya kuínhin sín ijnko tóvéntó kuixín nkajni. Tí tóvéntó mé éxi ijnko xrinto fuerte chjehe. Kuenté tí nchia tjejóxehen sín mé kóvéntó kjaxin. ³ Ntá xríñahya k'uíkon sín nkehe éxi xrohi nene tsjehe. Ntá tíha xikayehe la k'uéjókjen jnkójnko kja tí jehe sín. ⁴ Na ntá kaín sín k'uáyéhe sín tí Nchakuen Dios ntá kjuankíxin sín nixja sín í jnko nkíva kixin Nchakuen Dios kjuínkítsa sín nixja sín.

⁵ **A** nta tí yaon a la tí chjasin Jerusalén k'uéjó chojni judío tjinkaon sín sinchexiteyéhe sín tí nkehe tinkáchónki sín, mé tsíkjin sín nkuíxín chjasintajni. ⁶ **A** ntá jehe sín mé tsíkinhin sín tí tóvéntó ntá tsíkóhina nchónhya chojni. Ntá í noehya sín nkehe chrókjuenkayáxin sín kixin jnkójnko tí jehe sín mé kuínhin sín kixin nixja tí sín a jnkójnko nkívee sín. ⁷ Ntá síxranká sín, chrakon sín ntá jehe sín mé tjo sín kíchó sín kixin:

—¿Á jehya kaín tí sín tjejónixja mé tsíkjin sín estado Galilea? ⁸ La ¿nkekuènté tjejótininni kixin nixja sín jnkójnko nkíveeni? ⁹ Kixin ntihi mé síin chojni tsíkjin chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, ¹⁰ la ko Frigia, la ko Panfilia, la ko Egipto la ko nkuíxín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkokjéxín judío, la í so la tinkáchónki sín Dios éxi tí sín judío xikaha. ¹¹ La kjaxin síin chojni tsíkjin Creta, la ko Arabia. Mé xikaha kaín ni tsíkjininni tí chjasin a mé tsíkinhinni tjejónixja tí sín a tí kjuaxroan kuènte Dios jnkójnko nkíveeni —mé xikaha ichro sín.

¹² Ntá tóxakonhen kaín sín la chrakon sín ntá kjuanchankíhi kíchó sín kixin:

—¿Nkehe t'axrjexín kaín tíha? —ichro sín.

¹³ **A** ntá iso sín kjuanoá sín ntáchro sín kixin:

—Tsékoan tí sín a —ichro sín.

* **1:20** Salmos 69.25; 109.8

A ntá ch'ín Pedro chénka tí sín siín

¹⁴ Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kixin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínrá tí nkehe tsoxrjanka. ¹⁵ Tí sín tjejó ntihi la jehya tsékoan sín éxí ntáchrórá, kixin na ntá las nueve nchítjen la kohya nkexro tsékoan. ¹⁶ Tíhi mé tsíchrónka ch'ín profeta Joel:

¹⁷ Ntáchro Dios kixin: Itsi ijnko yaon tsjixixín

ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuéntana.

La ko tí sín ntasoá mé titàya ts'íkuèn sín tí nkehe tsjáqoha sín.

La ko tí sín ó táda la kotáchrién sín ts'íkonxín sín kixin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xra la ko tí síchjin kjaxin

la tsochrónka sín tanná.

¹⁹ Ntá janhan mé tsjáqoxián ijnko kjuachrakon nkajní.

A ntá chjasintajni tsjáqoxián kjuaxroan:

mé ts'ixin ijní la ko xrohi la ko itjuí tsík'óna ihnchi.

²⁰ Mé tí yaon la ts'inkaséyanxínhya, ts'óna ts'ixin tie.

A ntá tí nitjó mé ts'óna ijní.

Xíkaha senó tsonhen ntá itsi Ìnchéni.

Tíhi mé ijnko yaon imá jié la imá náxrjón.

²¹ A ntá kaín tí nkexro tsjanchehe ihnié Ìnchéni kixin tsjinkítsa sín mé tsaá sín.*

Mé xíkaha tsíchrónka ch'ín Joel.

²² Jahará chojni israelita tinhínrá tí nkehe tsoxrjanka. Tí ch'ín Jesús tsíkjixin chjasin Nazaret mé Dios kjuakoxin ch'án kixin tsíchr'án ch'án kixin kjuasin ch'án itsjé kjuaxroan jié k'uíkonrá la ko kjuako ch'án kixin Dios tsíchjéhe ch'án kjuachaxin kixin tjinkaon ch'án chrók'uíkonrá. Jahará ó jína nohará kaín tíha. ²³ Kjónté xíkaha k'uíkonrá la jahará itserá ch'án éxí tsíkjenkayáxin Dios ósé. A ntá jahará kjuínchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuak'enkanı sín ch'án ijnko ntacruz. ²⁴ Kjánchó Dios la kjuínchexechón ch'án inaá la kjuatsen ch'án tí kjuatjoté kuènte kjuach'én kixin ntá ti kjuach'én xitjahya ts'etuenhen tí jehe ch'án. ²⁵ A ntá ósé tí ch'ín rey David tsíchrónka ch'án kuènte Jesús ntáchro ch'án kixin:

Jaha Ìnchéni t'íkuan kixin jnkochrín tjétaón ntja tí xritjak'é janhan.

Jaha mé itjen tjaná chjina kixin chrókohya jie chrókjuásian.

²⁶ Méxra imá chéhe asenná. Ir'va tsjexián tí nkehe náxrjón.

Ó nòna kixin kohya nkehe ts'atsínka kjónté its'én.

²⁷ Ó nòna kixin tí jaha tsitohéhya asenná chríkjan tí siín chojni tsík'en.

Tsjánjonhya kjuachaxin kixin tsoxíka ntona kixin janhan mé ijnko nkexro t'aha xra jína tjuéhe.

²⁸ Jaha mé kjuákona tí ntja tsjanjon kjuachón. Jaha mé nchechàna kixin t'ayakonna.†

Mé xíkaha tsíkjin ch'ín David.

²⁹ Kíchóni titohérá tsontáxrjan kixin ch'ín David, tí nkexro k'uaxrjeníxinni mé tsík'én ch'án la ko tsíkixravá ch'án. Ntá naxa noheni nketí tsíxravá ch'án. ³⁰ A ntá ch'ín David mé ijnko nkexro tsíchrónka itén Dios la ó nohe ch'án kixin chaxín Dios chrónka kixin ijnko nkexro ts'axrjeníxin ch'án mé ts'óna rey mé ts'etōan éxí jehe ch'án k'uetōan ch'án. ³¹ Mé xíkaha ch'ín David la ósé ó nohe ch'án nkehe tsonhen la mé chrónka ch'án kixin tsoxechón Cristo la ko ntáchro ch'án kixin tí asén ch'án tsitohéhya tí siín tí sín tsík'en la ts'itjáyanhya tí cuerpo kuènte ch'án. ³² Méxra Dios kjuínchexechón tí ch'ín Jesús, mé k'uíkonni kaín ni la

* 2:21 2.17-21 Joel 2.28-32 † 2:28 2.25-28 Salmo 16.8-11

mé chrónkani kixin chaxín tíha. ³³ Ntá ijie Jesús mé sákjuiko ch'án Dios la nàngo itja chjina Dios mé tjen ch'án. Ntá tsíntácho It'é ch'án Dios kixin tsochr'án ch'án tí Nchakuen ch'án. Ntá jie ó kui la ó k'uíkonrá la ko kuínhínrá nkehe kónhen. ³⁴ Tí ch'ín David la jehya jehe ch'án sákjuj nkaya nkajní, kixin jehe David ntácho ch'án kixin:

Ìnchéni Dios mé ntáche tí Ìnchéni kixin:

“Tjak'e tjaná chjina ntiho tsétoan,

³⁵ tsjixinjian kaín xín tí sín nínkakonhan la tsjachahya sín ts'etoan sín kixin jahvá mé tsétoan.”[‡]

Mé xikaha tsíkjin ch'ín David.

³⁶ 'Ntá kaín rá chojni israelita chrókónohará chaxín kixin jehe tí ch'ín Jesús ó kjuakénkanirá tí ntacruz la Dios mé kjuích'éna Ìnchára ijie, mé tí Cristo —mé xikaha chrónka ch'ín Pedro.

³⁷ Ntá tí kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntácho sín kixin:

—Kíchóni, a ntá jie la ¿nkexrí chrókjuich'eni?

³⁸ Ntá kjuátehe ch'ín Pedro ntácho ch'án kixin:

—Chrókuítōhérá tí ijiará la chrórxáxinkáonrá Dios. Ntá chrókuikitiaxínrá ihnié Jesu-cristo ntá Dios mé tsjakjihinhanrá tí ijiará ntá jehe ch'án tsjanjon ch'án Nchakuen ch'án ts'ayéhérá. ³⁹ Dios mé sinchekitonhanrá ch'án tí Nchakuen ch'án ts'ayéhérá jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkójnko tí nkexro tsjeyá ch'án.

⁴⁰ Mé xikaha ntácho ch'ín Pedro la ko í so nkehe ntácho ch'án. Nta nixjehe ch'án sín inaá, ntácho ch'án kixin:

—Chrókuítōhérá tí jínahya tjenkayáxin tí chojni síin chjasintajni kixin jahará me jína chrókuaará.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankixin tinkáchónki Ìnchéni Jesús la k'uíto tí sín ó xráxin síin. ⁴² Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueyá Jesús la kjuínkítsa sín kjuanjon sín tí nkehe chrókjóne tí í so sín la ko chjéhe sín Dios kjuasáya la ko kójnkotsé sín kixin sine sín niotja xraxinkakonxín sín kixin ik'uén Ìnchéni.

Mé xikaha k'uéjó tí sín xrankíxín tinkáchónki Ìnchéni

⁴³ La ntá kaín tí í so sín mé chrakon sín kixin tí sín tsíkjeýá Jesús kjuasin sín itsjé kjuaxroan. ⁴⁴ La kaín tí sín tinkáchónki Jesús mé jnkokoá k'uéjó sín la jnkokoá chóna sín tí nkehe sine sín. ⁴⁵ Kjuínchekji sín tí nkehe chóna sín ntá k'óxikayéhe sín tí chichaon la chjéhe sín tí sín chónahya. ⁴⁶ Jnkójnko yaon kójnkotsé sín tí nínko la ntá jnkójnko ntōe sín kjóneko kichó sín. La ko kjóne sín niotja kixin xraxinkakonxín sín kixin ik'uén Ìnchéni la ko kjuaxróxin k'uéjó sín la kohya nkexro kjuínchehnke. ⁴⁷ Kjuanchehe sín kjuasáyé Dios. Ntá kaín chojni k'uéchónthehe sín kjuasáya. A ntá jnkójnko yaon Ìnchéni mé kjueyá iso chojni kixin tsotsjé tí sín tsaá.

3

Kuítōhe jína ijnko nkexro xitjahya tji

¹ Ijnko yaon tí ch'ín Pedro la ko ch'ín Juan mé chrin sín sákjuj sín tí tjen tí nínko. Mé kjuíji sín las tres kónjín, tí hora mé nixjehe sín Dios. ² Kaín yaon kjuák'e ntiha ijnko ch'ín tsíkokjéxín xitjahya tji. Sátsíkjiko sín ch'án tí nínko la tsíkjak'etjaxín sín ch'án tí ntója puerta mé it'in Ntója Náxrjón. Ntaha tjetjanchak'éhe ch'án chichaon tí sín sít'ixenhen ntiha. ³ Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan

[‡] 2:35 2:34–35 Salmo 110.1

ts'ixenhen sín n̄inko, a ntá kjuanchak'éhe ch'án sín chichaon. ⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin:

—Tsjehe n̄ihi.

⁵ A ntá tí ch'ín a tjetsjehe ch'án jina kixin ách'e ichrén nkehe tsjanjon tí sín a, ichro ch'án.

⁶ A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnié Jesucristo, tí nkexro tsíkji_xin chjasin Nazaret, la t'inkatjen itjia —mé xikaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án. ⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankixin ch'án itji ch'án. Ntá k'uixenko sín ch'án nkaxenhen n̄inko. Tjetji ch'án la ko chrika ch'án la chjéhe ch'án kjuasáya Dios. ⁹ Na ntá kaín tí chojni siín tí chjasin n̄iha la k'uíkon sín kixin ó tji ch'án la ko chjéhe ch'án kjuasáya Dios. ¹⁰ Ntá chrakon sín kixin xikaha tsíkónhen kixin tsíkjatsoan sín kixin jehe tí nkexro kjuák'etj_xin kjuanchak'á ch'án chichaon ntója n̄inko it'in Ntója Náxrjón.

Nixjehe ch'ín Pedro tí chojni siín tí ntasin Salomón

¹¹ Na tí ch'ín xitjahya tji la mé títoehya ch'án tí ch'ín Pedro la ko ch'ín Juan. Ntá kaín xín tí sín siín n̄iha chrakon sín kuinká sín sákjuitsjehe sín tí ntasin kuènte n̄inko it'in ntasin Salomón kixin ntaha tjejó tí sín a. ¹² Ntá tí k'uíkon ch'ín Pedro xikaha la ntáche ch'án sín kixin:

—Jahará chojni israelita, ¿nkekuènte chrakonrá jahará la ko nkekuènte komaráni? ¿Á tjenkayáxinrá kixin jehóni kjuínchekito_heni jina tí ch'ín i kixin jehóni chóntani kjuachaxin la ko kixin imá tinkáchónkini Dios? ¹³ Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkjikénhenrá ch'án tí sín t'etóan. Ntá tí ch'ín Pilato mé tjinkaon ch'án chrók'uátjánta ch'án tí ch'ín Jesús kjánchó jahará la tjinkákonhyará xikaha. ¹⁴ A ntá jahará chrókjuanchiará chrókuítóhe sáchrókjui tí nkexro tjóá jina asén. A ntá náhí. A ntá jahará mé tjinkáonrá sátsji ijnko chojni chóna nchónhya jie. ¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xikaha k'uíkonni la chrónkani. ¹⁶ Tí kjuachaxién ihnié Jesús mé tinkáchónkini la ntá tíha mé kuítóexín jina tí nkexro k'uíkonrá la ko choxinrá. Tí ch'ín a mé kuítekaon ch'án ntá kuítóhe ch'án jina. Mé xikaha ó k'uíkonrá kaín rá.

¹⁷ Kichóni ó nòna kixin tió jahará la ko tí sín t'etóan k'oyánrá Jesús la ni kónoahyará nkehe kjuich'erá. ¹⁸ Ntá ó xiteyá tí nkehe tsintáchro Dios tsínixj_xin tí sín tsíchrónka itén ch'án kixin tí Cristo t'ichján_xin tsjasóte ch'án. ¹⁹ Méxrā tsitohérá ijjará ntá xráxinkáonrá Dios ntá jehe ch'án mé ts'óxíka ijjará ntá Ìnchéni mé sinchekito_hará ch'án jina. ²⁰ Ntá jehe ch'án mé tsochr'án Jesucristo inaá la xrā ó tsi kixin tsaáxinrá. ²¹ Na ntá ijie la Jesucristo la nkaya nkajni ntahó tsitohé ch'án hasta tsjasiyóxinjian Dios kaín nkehe éxi tsintáchro ch'án tsínixj_xin ch'án tí sín tsíchrónka itén ch'án ósé. ²² A ntá senó tí ch'ín Moisés tsíchénka tí sín tsík'axrjení_xinni kixin: “Ìnchéni Dios mé tsochr'án ijnko nkexro ts'axrjení_xinrá tsochrónka itén ch'án éxi tsíchr'án ch'án tí janhan. T'ichján_xin tinhínrá kaín tí nkehe tsontáchro ch'án. ²³ A ntá tí chojni titekakonhya tí nixja tí nkexro a la ts'itjáyan sín la tsitohé sín tí nación Israel,”* mé xikaha tsíchrónka ch'ín Moisés.

²⁴ Kaín_xín tí sín tsíchrónka itén Dios kjuankixixín ch'ín Samuel la ko kaín tí sín kui chr'é_xin mé chrónka sín kixin kaín tíha tsonhen xikaha tí yaon i. ²⁵ Mé tí nkehe tsintáchro Dios tsínixj_xin ch'án tí sín tsíchrónka itén ch'án kixin xikaha chrók'uayéhérá jahará tí nkehe chrókjuanjon ch'án kixin chrók'uejorá jina. Dios tsíkjich'éna ch'án ijnko pacto mé nixjehe ch'án tí sín tsík'axjení_xinrá mé tsintáche ch'án tí ch'ín Abraham kixin: “Kaín_xín

* 3:23 3.22–23 Deuteronomio 18.15,19

chojni chjasintajni mé tsoyaonxín sín kixin ijnko nkexro ts'axrjeníxin tí jaha.”† 26 Dios kjuínchexechón ch'án tí Xjeen ch'án la saoxín ichr'án ch'án tí tjejorá jahará israelitará kixin chrókjuintayaonrá ch'án kixin jnkojnko tí jahará chrókuítóhéra tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etoan

1 Ch'ín Pedro la ko ch'ín Juan la naxa tjejónixjehe sín tí sín tsíkójnkotsé ntá xrínahya ikui tí sín nchát'á la ko tí ch'ín t'etuenhen tí sín soldado kuènte tí nínko la ko tí sín saduceo. 2 Imá kónínkaon sín kixin ch'ín Pedro la ko ch'ín Juan kjuakohē sín tí sín tsíkójnkotsé nkexrí tsoxechón chojni tsík'en kixin xikaha xechón ch'ín Jesús. 3 Ntá kuínhin sín xikaha ntá itsé sín tí sín a ntá sákjuíko sín, chr'áxenhén sín ntqechiso. Ntahó k'uéjój sín hasta kóyaon kixin ó ntá kóntó. 4 A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

5 A ntá tí yaon chr'éxin kójnkotsé tí chjasin Jerusalén tí sín t'etoan kuènte tí sín judío la ko tí sín tjako tí ley. 6 Mé kjaxin ntaha tjen ch'ín Anás, mé jehe ch'an mé tí nchát'á imá t'etoan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchát'á t'etoan. 7 Ntá k'uetoan sín kixin síxrakoa ch'ín Pedro la ko ch'ín Juan. Ntá k'uéjój sín jnkosiné la ntá kjuanchankíhi sín ntáchro sín kixin:

—¿Nkexro kjuanjon kjuachaxin o nkexro kjuachaxin ihnié kixin xikaha ich'erá tí nkehe?

8 Ntá ch'ín Pedro imá chóna ch'án kjuachaxin kuènte Nchakuen Dios ntá kjuátehe ch'án ntáchro ch'án kixin:

—Jahará chojni t'etoan kuènte chjasin la ko jahará sín táda kuènte chjasin Israel, 9 jahará mé tjanchankirá kixin nkexrí kuítóhe ijnko chojni níhi jína kixin tjinkáonrá tsonohará. 10 Ntá tinhínrá jína tí nkehe tsochrónkaxinni kixin kaín rá chojni chjasin Israel tsonohará kixin tí ch'ín i itjen ntihi mé kuítóhe ch'án jína kjuachaxién ihnié Jesucristo, tí nkexro tsíkjiixin chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá. 11 Tí ch'ín Jesús i mé tí xro náxrjónhya kuítóéntará tió kjuich'énará tjat'ó ntá mé jie k'óna tí xro tjetooan.* 12 Kohya í jnko nkexro chóna kjuachaxin chrókuaáxinni kixin kohya í jnko ihnié chojni ntihi chjasintajni chrókuinkáchónkini chrókuaáni —mé xikaha ichro ch'ín Pedro.

13 Tí síxreé mé k'uíkon sín kixin ch'ín Pedro la ko ch'ín Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etoan ntá kjuátsoan sín kixin tí sín a mé tsík'ajiko ch'ín Jesús. 14 A ntá tí ch'ín tsíkítóhe jína mé ntiha tjejóko sín ch'án. Méxra xitjahya tsjanchia sín jie tsjasóte tí sín a. 15 Ntá tí síxreé a mé k'uetoan sín kixin tí sín a ts'axrje sín ntója ntá jehó sín k'uéjójxenhén sín nchia ikjo sín kichó sín. 16 Ntá ntáchro sín kixin:

—¿Nkehe chrókjuich'ehe ni tí sín a? Kaínxín tí chojni ntihi chjasin Jerusalén mé ó k'uíkon sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha. 17 Í tjinkakonhyani kixin naxa tsochrónka sín tíha kixin naxa tsinhin chojni. Méxra ts'etoanni kixin í tsochénkahya sín ninkexró tí ihnié Jesús.

18 Na ntá k'uíyehē sín tí sín a inaá ntá k'uetoenhen sín kixin ninkehó chrónixja sín la ko chrókjuako sín ihnié Jesús, ichro sín. 19 A ntá ch'ín Pedro la ko ch'ín Juan kjuátehe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará o chrókjuinchexiteyéhēni tí jehe ch'an? 20 A ntá jeheni la xitjahya tsítóheni tsochrónkani tí nkehe ó k'uíkonni la ko tí nkehe kuínhinni —ichro sín.

† 3:25 Génesis 22.18 * 4:11 Salmo 118.22

²¹ A ntá kjónté xikaha kuínhin tí síxreé la jiehe k'uetōan sín ntá kjuanjon sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuích'e sín. ²² Na mé tí ch'ín kuítóhe jina kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanhia sín kixin tsochrakonhya sín

²³ Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetōan tí sín nchät'á t'etōan la ko tí sín táda. ²⁴ Ntá kjuixin kuínhin tí sín tsíkójnkotsé na ntá kaín sín nixjehe sín Dios la ntáchro sín kixin:

—Inchéni, jaha mé kjuích'éna nkajní la ko chjasintajni la ko tí ntayaon la ko kaín xín tí nkehe siín. ²⁵ Jaha mé kjuachaxién Nchakuan nixjaxian ch'ín David tí nkexro kjuít'aha xra. Ntáchro ch'án kixin:

¿Nkekuènte kixin kónínkaon kaín tí chojni nación ókjé?

A ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey siín chjasintajni la ko kaín tí sín tí chjasin kójnkotsé sín

nínkakohen sín Inchéni la ko Cristo.†

Mé xikaha tsíkjin ch'ín David ósé.

²⁷ Mé xikaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsíkójnkotsé sín tí chjasin ntihi kixin kónínkakohen sín tí Xjaan Jesús chóntahya jie, mé tí nkexro tsíkjéyá jaha sit'aha xra. ²⁸ Mé xikaha kjuínchexiteyá sín tí nkehe ósé tsíkjenkayáxin kixin t'ichjánxin xikaha tsonhen. ²⁹ A ntá Inchéni, tsjehé kixin imá jiehe k'uetōan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán. ³⁰ La ko tí kjuachaxián sinchekitōexín jina tí chojni níhi la ko tsjákoxian kjuaxroan kjuachaxién ihnié tí nkexro Jesús t'aha xra —mé xikaha nixjehe sín Dios nkaya nkajní.

³¹ A ntá tí kjuixin nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankixin sín chrónka sín itén Dios.

Tí kaín nkehe siín la kaín sín mé kuènte sín

³² La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntáchro kixin jehó kuènte tí nkehe siín. Náhí. Kaín sín mé kuènte sín. ³³ Tí sín tsíkjeýá Jesús mé kaín asén sín chrónkaxín sín kixin nkexrí xechón Inchéni Jesús. Ntá Dios antsí kjuíncheyaon kaín sín. ³⁴ Kohya ninkexró nóaxinhya tjejó ntiha kixin kaín tí sín chóna nontee sín o ntōe sín kjuínchekji sín. Na ntá tsíkjikao sín tí chichaon ³⁵ chjéhe sín tí sín kjueyá Jesús. A ntá tí sín k'óxikayéhe sín tí chichaon, kuákja tí sín nò. ³⁶ Mé xikaha kjuích'e ijnko ch'ín levita it'in José. Jehe ch'án la tsíkjin ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axrjexín kixin tí ch'ín nchechéhe asén chojni. ³⁷ Jehe ch'án a mé kjuínchekji ch'án ijnko nontee ch'án ntá kjuikao ch'án tí chichaon kjuínchek'áyéhe ch'án tí sín kjueyá Jesús.

5

Ijie kjuasin ch'ín Ananías la ko tjan Safira

¹ A ntá í jnko ch'án mé it'in Ananías, a ntá ichjién ch'án mé it'in Safira, mé jehe sín mé kjuínchekji sín ijnko nontee sín. ² A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjueyá Jesús la kjuanjon ch'án éxí kaín. ³ Ntá ntáchro ch'ín Pedro kixin:

—Ananías, ¿kuènté chjehé kjuachaxin tí Tsochren kixin k'uetuēnhen asán? Ntá kjuích'iyehé tí Nchakuen Dios kixin kjuínchemá iso chichaon kjuínchekjixián nontaa.

† 4:26 4.25-26 Salmo 2.1-2

⁴ ¿Á jehya nontaa tíha? Ntá tió kjuínchekjia la, tí chichaon la, ¿á jehya kuèntá? ¿Kuènte kjuenkayáxian sích'e tíha? Kjuich'iyehé Dios, jehya chojni kjuich'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín. ⁶ Na ntá ikjui iso sín ntasoá la ntá kjuínchek'ísímá sín ika tí cuerpo kuènte ch'án la ntá sákjuíko sín, sákjuíkjavá sín.

⁷ Ntá k'uaítsínka iní hora ntá kjuíji ichjién ch'ín Ananías k'uixenhen tjan tí nchia ntaha a. La noehya tjan nkehe tsíkónhen tí ntiha. ⁸ Ntá ch'ín Pedro mé kjuanchankíhi tí tjan a, ntáchro ch'án kixin:

—Chronka, ¿á chaxín xikahó kóxixín tí nonte ó kjuínchekjirá? —ichro ch'án.

Ntá kjuátehe tjan kixin:

—Chaxín xikahó kóxixín.

⁹ Ntá ntáchro ch'ín Pedro kixin:

—¿Nkekuènte jnkokoá kjuenkayáxínrá kjuich'iyehérá Nchakuen Ìnchéni? Kjá ntáchrorá kohya nkehe chrókónhanrá. Ntihi ó kui tí sín ntasoá sákjuíkjavá sín xia na ntá jaí sátsjiko sín tí jaha —mé xikaha ichro ch'ín Pedro.

¹⁰ Ntá tuénxín kjuítsínka tjan Safira toté tí itjen ch'ín Pedro ntá ik'uén tjan. Ntá k'uixenhen tí sín ntasoá tí nchia a ntá k'uíkon sín kixin tsíkixín tsík'en tjan. La ntá sákjuíko sín tí cuerpo kuènte tjan la kjuavá sín tjan tí chjinaxón tsíxrává tí xì tjan. ¹¹ Na kaín tí sín kuènte nínko la ko tí í so sín kuínhin tí xikaha tsíkónhen, mé imá chrakon sín.

Itsje kjuaxroan kjuakoxin sín

¹² A ntá tí sín kjueyá Jesús mé kjuakoxin sín nchónhya kjuaxroan tí siín chojni ntiha la ko kaín sín mé kójnkotsé sín tí ntasin it'in Salomón. ¹³ Chrakon iso sín k'uítóhya tí jehe sín la kjónté la kaín chojni tjikosáyehe tí jehe sín. ¹⁴ La ntá xrínahya nchónhya chojni ntoa la ko chojni chjin kjuankíxin tinkáchónki sín Ìnchéni. ¹⁵ Ntá itsje chojni mé kuakitsje sín tí chojni níhi k'uejo sín ntja. Tjejóták'á sín chrítaón cama la ko kania kixin ts'atsínka ch'ín Pedro ntá kjónté its'ueen ch'án ó ts'atsínka tí tjejó sín mé chrókuítexín sín jína. ¹⁶ Kjaxin tí chjasin chjino mé kjuixín nchónhya chojni ikjui sín chjasin Jerusalén la kjuikao sín tí chojni níhi la ko tí chojni chóna nchakuen tí jínahya. La kaín sín a mé kuítóhe sín jína.

Ch'ín Pedro la ko ch'ín Juan mé chónkíhi sín

¹⁷ Na ntá tí sín nchat'á t'etoan la ko tí sín kuènte tí sín saduceo mé imá kóchjinoxínhin sín. ¹⁸ Na ntá itsé sín tí sín kjueyá Jesús la chr'áxenhen sín ntóechiso. ¹⁹ A ntá ijnko ángel kuènte Ìnchéni ikui tí tie a kuakitjehé ch'án ntója ntóechiso ntá kuakitsje ch'án tí sín a. La ntá k'uetuenhen ch'án sín kixin:

²⁰ —Sátjirá nínko la tsjákohérá kaín tí sín ntiha tí tan nixin tsjanjon kjuachón.

²¹ Kjuixin kuínhin sín ntá sákjuí sín ntá tí k'uínkaséyan k'uixenhen sín tí nínko kjuako sín.

A ntá tí nchat'á t'etoan la ko tí sín k'uejóko ch'án mé k'uíyehé sín tsojnkotsé kaín tí síxreé, mé tí sín t'etoan kuènte Israel. Na ntá k'uetóan sín kixin tsoxrakoa tí sín tjejóchjina tsíkjejá Ìnchéni. ²² A ntá kjuíji tí sín policía tí ntóechiso a ntá k'uitjahya sín tí sín a. La ntá ikjan sín la ²³ ntáchro sín kixin:

—Kjuíjini ntiha la k'uíkonni tsíkjehe jína ntóechiso a la k'uejó tí sín soldado a ntója. Ntá kuakitjeheni ntóechiso la k'uitjahyani ninkexró tí nkaxenhen —ichro sín.

²⁴ Ntá kaín tí nchat'á t'etoan la ko tí ch'ín k'uetuenhen tí policía kuènte nínko la ko i so tí sín nchat'á t'etoan mé kuínhin sín ntá ntáchro sín kixin xá nkexrí chrókónhen chrók'uitjáyan tí xra kuènte tí sín a. ²⁵ Na ntá tuénxín kjuíji ijnko nkexro ntáchro kixin:

—Tí sín k'uejochjinará jahará mé ó nkaxenhen nínko ntaha tjejó sín tjejótjakohe sín chojni —ichro ch'án.

²⁶ La ntá tí ch'ín k'uetuenhen tí sín policía mé sákjuíko ch'án tí sín policía la kjuíkajín tí sín tjako. Ninkehó kjuich'ehya tí sín policía tí sín tjako kixin chrakon sín kixin ách'e tí

sín siín ntiha mé tsjak'e sín xro, ichro sín. ²⁷ Na ntá tió kjuikao sín tí sín a la k'uejó sín nkayakon tí sín t'etoan ntá tí nch'at'á t'etoan ntáchro ch'án kixin:

²⁸ —Jeheni kjuanjonhyani kjuachaxin kixin tsjákorá ihnié tí nkexro a. ¿A ntá nkehe kjuich'erá jahará? Kuenté chjasin Jerusalén tsikjákorá. La tjinkáonrá tsékaráni jie kixin jeheni tsik'óyánni tí ch'ín a —ichro ch'án.

²⁹ A ntá ch'ín Pedro la ko tí iso sín kjueyá Jesús ntáchro sín kixin:

—A ntá jeheni t'ichjánxin sinchexiteyéheni Dios senó. A ntá chr'éxin sinchexiteyéheni chojni. ³⁰ Tí Dios tsikinkáchónki tí sín tsik'axjeníxinni ósé mé kjuínchexechón Jesús, tí nkexro a mé kjuakénkanirá tí ntacruz tsik'oyánná. ³¹ Ntá ijie tjeko ch'án Dios nkaya nkajní la nánko itja chjina Dios mé tjen ch'án la Dios kjuích'éna ch'án ijnko nkexro t'etoan kixin sinchekaá ch'án chojni kixin tí nación Israel chrókjan chrókuinkáchónki sín Dios ntá chrók'uitjáyan tí jie chóna sín. ³² La ko kjaxin jeheni chrónkani kaín tí nkehe k'uíkonní kjuachaxién Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

³³ La ntá tí sín t'etoan a mé kuínhin sín tíha ntá kónínkaon sín la ko tjinkaon sín chrók'óyán sín tí sín a. ³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uejoan ch'án kixin tí sín tsikjeyá Ìnchéni mé ts'axrje sín ntója intsí, ichro ch'án. ³⁵ Na ntá nixjehé ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuich'eherá tí sín a. ³⁶ Xráxinkáonrá kixin senó kjuák'e ijnko ch'ín it'in Teudas la tónhen asén ch'án kixin imá t'etoan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuèxín tí xra k'uékjich'e sín. ³⁷ Ntá chr'éxin tió xrenájín kaín ihnié chojni k'uejó na ntá ikjui í jnko ch'ín mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xíka sín sákjuí sín ínaá. ³⁸ Méxra titoherá tjiatéhyará tí jehe sín a. A ntá tí tjejóch'e sín xra kuente chojni ó la kjaxin ts'itjáyan. ³⁹ A ntá tí chaxín tjako sín kjuachaxién Dios ntá tsjachahyará sinchek'itjáyanrá tíha. Méxra titoherá sín kixin tsjánjonkohyará Dios.

⁴⁰ Na ntá kaín tí síxreé mé kuítekaon sín la ntá k'uíyehé sín tí sín kjueyá Jesús. La ntá kjuate sín la xik'etuénhen sín kixin í tsonixjahya sín ihnié Jesús la ntá kjuanjon sín kjuachaxin kixin sátsji sín. ⁴¹ Ntá tí sín kjueyá Jesús mé k'uaxrjexín sín tí tjejó tí sín t'etoan kjónté xíkaha kónhen sín la chéhe sín kixin Dios kjuanjon kjuachaxin kjuasóte sín kixin tí kjuako sín ihnié Jesús. ⁴² Kuítóehya sín tsjako sín kuente Jesucristo kaín yaon tí nkaxenhen njnko la ko tí jnkojnko ntqé chojni.

6

Kjueyá sín yato chojni tsjinkitsa

¹ Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nkíva griego mé kónínkakonhen sín tí sín nixja nkíva hebreo. Ntáchro sín kixin tí sín chjin k'án kuente sín la kánhyó jína k'uáyéhe tí nkehe síxikayéhe sine sín jnkojnko yaon, ichro sín.

² Na ntá tí teyó tí sín tsikjeyá Jesús mé k'uíyehé sín kaín tí sín tinkáchónki Ìnchéni. Ntá nixjehé sín, ntáchro sín kixin:

—Jeheni la jehya jína tsítóheni tí xra tjakoni itén Dios, kixin ntá sit'aharáni xra ts'óxíkayeheni tí nkehe sine tí sín k'án. ³ Méxra jahará kichó ni tsjeyará yato chojni ntoá tí tjejórá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinchek'áyeheni tí xra a. ⁴ A ntá jeheni la tsonixjeheni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xikaha ntá jnkokoá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxin kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehe ch'án mé tsíkjiixin ch'án chjasin Antioquía la ósé mé tsíkinkáchónki ch'án ti nkehe tinkáchónki tí sín judío. ⁶ Ntá kjuixin kjueyá sín tí sín a ntá kjuikao sín ti tjejó tí sín tsíkjejá Ìnchéni. La ntá tí sín a mé nixjehe sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nchat'á judío kjuankíxin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kíxin Dios tsíkjincheyaon ch'án la nchónhya kjuaxroan kjuakoxin ch'án tí sín chojni. ⁹ A ntá iso sín tsíkjiixin tí nínko judío kuènte tí sín senó k'uejó esclavo sín tsíkjiixin sín chjasin Cirene, la ko Alejandría, la ko Cilicia, la ko estado Asia, mé kjuankíxin sín ikjo sín ch'ín Esteban. ¹⁰ Kjónté xikaha la kjuachahya sín kíxin Nchakuen Dios mé kjuínkítsa tí ch'ín Esteban nixja ch'án. ¹¹ Na ntá jehe sín mé kjuenkehe sín ókjé chojni kíxin tsochrónka sín kíxin kuínhin sín k'uántaxínhin ch'án ch'ín Moisés la ko Dios, ichro sín. ¹² Mé xikaha k'uíxité kaín chojni la ko tí sín t'etoan kuènte nínko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí sín tí síxreé a. ¹³ Kjaxin kjueyá sín chojni tsochrónka kíxin ntoáhya kjuako ch'ín Esteban la ntáchro tí sín a kíxin:

—Tí ch'ín a mé títoehya ch'án t'ántaxínhin ch'án tí nínko kuènténi la ko tí ley. ¹⁴ Ó kuínhinni kíxin chrónka ch'án kíxin tí ch'ín Jesús, tí ch'ín tsíkjiixin chjasin Nazaret, mé sinchek'itjáyan ch'án tí nínkoeni ntihi la ko tsjitóxinhin ch'án tí nkehe tinkáchónkini mé tí nkehe tsík'etoan ch'ín Moisés —mé xikaha ichro sín.

¹⁵ Ntá tí síxreé la ko kaín tí sín sítjaxin ntiha la komá sín tí ch'ín Esteban la mé k'uíkon sín kíxin tí kàré ch'án mé éxi ijnko ángel mé xikaha tsjehe tí jehe ch'án.

7

Tí nkehe kjuátehe ch'ín Esteban

¹ A ntá tí sín nchat'á t'etoan kjuanchankíhi sín tí ch'ín Esteban kíxin:

—¿Á chaxín kaín tíhi tsíntáchrua?

² Na ntá jehe ch'án kjuátehe ch'án ntáchro ch'án kíxin:

—Kaínrá kichó ni Israel la ko sín táda tinhínra tí nkehe tsontáxrjan. Dios kuènteni chóna kjuachaxin mé kjuakohe ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxa sátjihya ch'án tsjak'e ch'án nonte Harán. ³ Dios tsíntáchro kíxin: “Títohé chjasán la ko kaín tí nkexro kjéhya. Na ntá sátjia tí nonte tsjákohá jaha.”*

⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjejorá ijie. ⁵ Kjánchó ch'ín Abraham la kuákjahya ch'án nít'ó nonte hasta ni tí tsjak'e toté ch'án la chónahya ch'án. A ntá chrónka Dios kíxin chaxín chr'éxin tió tsjixin ts'en ch'ín Abraham la tí sín ts'axrjeníxin ch'án mé ts'áyéhe sín tíha. Kjónté naxa kohya nijnko xjeen ch'án la mé xikaha ntáchro Ìnchéni. ⁶ Kjaxin tsíntáchro Dios kíxin tí sín ts'axrjeníxin ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó. ⁷ La kjaxin xíntáchro Dios inaá kíxin: “Ntá chr'éxin janhan sítakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xikaha ichro Dios. ⁸ Na ntá Dios mé tsíkjo ch'ín Abraham kíxin kaín tí chojni ntoa ts'axrjeníxin ch'án mé itsa sín xroye. Na ntá xikaha tió kokjíhi xjeen ch'an Isaac ntá

* 7:3 Génesis 12.1

ch'ín Abraham mé chjéhe ch'án xjan xroye tió xétjehe xjan ijní yaon. Ntá kjaxin xikaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xikaha kjuích'e ch'án inaá. Ntá tí sín a mé k'óna it'é tí teyó tribu tsík'axrjeníxin tí sín Israel.

⁹ 'Tí xjeen ch'ín Jacob mé tí sín k'uaxrjeníxinni ósé la jehe sín k'uéchjinoxínhin sín tí kichó sín José ntá kjuínchekji sín ch'án la tí sín k'uena la sákjuíko sín ch'án nó nación Egipto, kjánchó Dios mé kjuínkítsa tí jehe ch'án. ¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsonohe ch'án. Na ntá k'uíkon ch'ín Faraón tí rey kuènte nación Egipto a xikaha tí xra jína kjuích'e ch'ín José ntá kjuanjon ch'án kjuachaxin kixin ts'etoan ch'ín José tí nación Egipto la ko tí ntoe ch'án.

¹¹ 'Na ntá kókjinta xrínahya la náxrjónhya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín. ¹² A ntá tsíkinhin ch'ín Jacob kixin tí nación Egipto mé sítóxi noa trigo ntá k'uetuenhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín. ¹³ Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuakohé ch'án tí ch'ín Faraón tí sín naxa kjéhya ch'án. ¹⁴ La ntá k'uetōan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án. ¹⁵ Mé xikaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha. ¹⁶ Ntá chr'éxin kuakitsjexín sín tòye tí huésōé tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

¹⁷ 'La ntá ó kuichjina tsoxiteyá tí nkehe tsintáchro Dios tsíkjo ch'ín Abraham ntá tí sín Israel imá kótsjé sín nación Egipto. ¹⁸ A ntá xrínahya í jnko ch'ín rey kjuankíxin k'uetōan nación Egipto la k'uéchónhya ch'án tí ch'ín José. ¹⁹ La ntá tí ch'ín rey kjuích'iyehé ch'án tí sín naxa kjéhyani la ko kjuínchekjasóte ch'án sín. La tsík'etoan ch'án kixin tí xjan ntoa na ntá kokjíhi mé tsjik'itjí sín xjan kixin its'en xjan. ²⁰ Na ntá tí yaon a tsíkokjíhi ch'ín Moisés ntá imá kóxrjínhin Dios tí xjan a. It'é la ko iné xjan mé k'uéchóna sín xjan iní nitjó koá ntoe sín. ²¹ Ntá chrokjuahya tsjak'ema sín xjan la ntá kjuíkjáka sín xjan. La ntá xjeen tí ch'ín rey kuènte Egipto mé kjuíkkaja tjan xjan la sákjuíko tjan ntoe tjan la kjuínchek'ánkí tjan xjan éxí xjeen tjan xikaha. ²² La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetoan tí nkehe k'uéntáchro ch'án la ko tí nkehe k'uékjich'e ch'án.

²³ 'La ntá tió chóna tí ch'ín Moisés cuarenta nánó ntá tjinkaon ch'án tsjtsjehe ch'án tí sín israelita naxa kjéhya ch'án. ²⁴ Ntaha mé k'uíkon ch'án kixin ijnko chojni Egipto kjuate ijnko chojni naxa kjéhya tí jehe ch'án. Ntá chrókuinkítsa ch'án tí sín naxa kjéhya ch'án ntá k'oyán ch'án tí ch'ín Egipto a. ²⁵ Kjuenkayáxin ch'án kixin tí sín naxa kjéhya ch'án, mé tí sín israelita, mé tsonoexín sín kixin Dios mé tsíchr'án tí jehe ch'án sinchekaá sín ch'án. Kjánchó tí sín a kjuátsōanhya sín. ²⁶ La ntá í jnko yaon tí ch'ín Moisés k'uíkon ch'án kixin yaá sín israelita tjanjonko kichó sín. La ntá tjinkaon ch'án chrókjuít'oxin ch'án kixin chrokjuanjonhya sín. La ntáchro ch'án kixin: “Jahará jnkokoá kichuárá la, ¿nkekuènté tjanjonrá?”. ²⁷ A ntá tí nkexro chóna tí jie mé kónínkaon ch'án la kótéka ch'án tí ch'ín Moisés. Ntá ntáchro ch'án kixin: “¿Nkexro kjuanjon kjuachaxin kixin jaha k'óna juez kuènténi? ²⁸ ¿Á tjinkávan ts'oyánni kjaxinni éxí k'oyán tí ch'ín Egipto ijna ní?” ²⁹ A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxí ijnko chojni tsíkjixín ókjé. Ntá ntaha tsíkótehe ch'án la ko kjuích'ena ch'án yaá xjan ntoa.

³⁰ 'Na ntá k'uátsínka cuarenta nánó ntá tí nteje chjino jna it'in Sinaí mé xrínahya k'uíkon ch'án ijnko ángel tjenkákjan tí xrohi chríkjan tí ntayoa tjeche. ³¹ Ntá tí ch'ín Moisés la chrakon ch'án kixin xikaha k'uíkon ch'án la ntá kóchjinehe ch'án kixin chrótsjehe ch'án la ntá kuínhin ch'án itén Ìnchéni ntáchro kixin: ³² “Janhan mé Dios tinkáchónki tí sín

tsík'axrjeníxian mé Abraham, la ko Isaac, la ko Jacob,” mé xíkaha ichro Dios. Ntá tí ch'ín Moisés la kjuankíxin chrakon ch'án la síxranka ch'án ntá í tjinkakonhya ch'án tsotsjehe ch'án. ³³ Na ntá ntáchro Ìnchéni kíxin: “Takítsje tokatá kíxin tí nonte tinkatja la nonte tjóá chóntahya jie. ³⁴ Ó k'uíkuañ kíxin tí sín kuèntana mé imá tjejtjasóte sín naciòn Egipto. La ó kuñhan kíxin t'èya sín. La ntá ijie ó k'uinka kíxin tsjínkítsa sín. Méxra xrákia jaha tsétuanhan jaha sátsjia naciòn Egipto,”† ichro Dios.

³⁵ Tí sín israelita mé kjuanoá sín tí ch'ín Moisés. Tsíntáchro sín kíxin: “¿Nkexro kjuanjon kjuachaxin kíxin jaha k'óna juez?” ichro sín. Kjánchó Dios ichr'án ch'án tí ch'ín Moisés kíxin ts'etōan ch'án la ko sinchekaá ch'án tí sín israelita kjuachaxin tí ángel k'uíkon ch'án chríkjan tí nta. ³⁶ Ntá tí ch'ín Moisés kuakitsjexín ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí naciòn Egipto, la ko tí Ntayaon Kjátse, la ko tí nteje k'uáji sín cuarenta nánó. ³⁷ Jehe tí ch'ín Moisés a mé chénka tí sín israelita kíxin: “Dios mé tsochr'án ijnko chojni tsoníxja itén Dios ts'axrjeníxin tí sín kichuára éxí ichr'án ch'án tí janhan. Títekákonhénra tí jehe ch'án.”‡ ³⁸ Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehe ch'án tí jna Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijie.

³⁹ A ntá tí sín k'uaxrjeníxinni ósé mé tjinkakonhya sín kíxin chrókuitekaon sín la kjuanoá sín tí ch'ín Moisés la ko tjinkaon inaá chrókjan sín naciòn Egipto. ⁴⁰ A ntá ntáche sín ch'ín Aarón kíxin: “Tjinkaonni sïch'éna ijnko dios kíxin tsinkáchónkini kíxin í noehyani nkehe kónhen tí ch'ín Moisés, tí nkexro kjuínkítsa k'uaxrjexínni naciòn Egipto.”§ ⁴¹ Ntá kjuínchekjanoya sín ijnko koxintáxjan la ntá k'óyán sín iko kjokehe tí nkehe tsíkjanoya a la imá kóchéhe sín k'uíkon sín tí nkehe tsík'ónaxín tja chojni. ⁴² A ntá Dios mé kuítóhe tí jehe sín kíxin tsinkáchónki sín tí konotsé síin nkajní. Tíhi mé tsíkjin ijnko nkexro k'uéchrónka itén Dios ntáchro xíkíhi:

Jahará chojni Israel, ¿á k'oyánra tí iko kjókánará tí janhan tí cuarenta nánó k'uejorá nteje ní?

⁴³ Kja náhi, jehó tí nkehe kjuich'énará mé kjókehérá tí ko a. Kjuíkoará tí ninkoe tí dios Moloc

la ko kjaxin kjuíkoará tí konotsé kuènte dios Renfán.

A ntá tí nkehe tsíkjich'énará jahará mé xráxinkákonxínra éxí Dios kuèntará.

Méxra janhan tsakítsjexínra tí tjejorá la tsétuanhánra sátsjirá chjasin Babilonia.*

Mé xíkaha ntáchro Dios ósé.

⁴⁴ Naxa k'uéjé tí sín k'uaxrjeníxinni tí nteje la chóna sín ijnko ninko kamantá chóna tí ley tsík'etōan Dios. Tíhi kjuich'ena sín éxí tsík'etūenhen Dios tí ch'ín Moisés kíxin sich'ena ch'án kaín nkehe k'uíkon ch'án. ⁴⁵ Ntá tí sín tsík'axrjeníxinni mé k'uáyéhe sín tí ninko kuítōnhen sín. Ntá tí sín kjuíkao ch'ín Josué mé kjuíkao sín tí ninko tió kjuacha sín k'uáyéhe sín í jnko nonte kuènte í so chojni kuakitsje Dios, kíxin ts'áyéhe tí jehe sín. Mé xíkaha kónhen hasta tí yaon kjuankíxin k'uetōan ch'ín David. ⁴⁶ Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sich'ena ch'án ijnko ninko kuènte Dios mé tí Dios k'uékinkáchónki ch'ín Jacob. ⁴⁷ Kjánchó jehe ch'án kjuich'énahya ch'án tí ninko a. Tí ch'ín Salomón mé kjuich'ena. ⁴⁸ Kjánchó Dios nkaya nkajni chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kíxin:

⁴⁹ Janhan Dios nkaya nkajní itjén tétōanxián ntá chjasintajni tjekjen totená.

¿Xá nkexéhe tí nchia chrókjuich'énará?

¿Xá nketí chrókjuak'é chrók'ok'ánaxián?

⁵⁰ ¿Xá jehya tjaná kjuít'ánaxián kaín tí nkehe ní?†

† 7:34 7.30-34 Éxodo 3.1-10 ‡ 7:37 Deuteronomio 18.15,18 § 7:40 Éxodo 32.1 * 7:43 7.42-43 Amós 5.25-27

† 7:50 7.49-50 Isaías 66.1-2

Mé xikaha ichro Dios.

⁵¹ A ntá jahará la icha asánrá xráxín títekákonhyará. Jahará tinhínrá kjánchó ich'era éxí chojni chónhya Dios. Xráxín tjánjonkoará Nchakuen Dios. Jahará mé tóyohará tí sín tsík'axrjeníxinrá ósé. ⁵² Tí sín tsík'axrjeníxinrá kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kixin itsi tí nkexro chóntahya jie. A ntá ó kui tí nkexro a ntá jahará kjuínchekjirá ch'án ntá k'óyán sín ch'án. ⁵³ Jahará k'uayéhérá tí nkehe k'ueṭoan Dios senó, mé tí nkehe chrónka tí ángel, la kjónté xikaha kuítekákonhyará —ichro ch'ín Esteban.

Ik'uén ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kixin nínkakonhen sín ch'án. ⁵⁵ A ntá ch'ín Esteban antsí chóna ch'án Nchakuen Dios la konta ch'án nkajní k'uíkon ch'án kjuachaxién Dios la ko k'uíkon ch'án kixin ch'ín Jesús tjexín toté ch'án nánko tja chjina Dios. ⁵⁶ Ntá ntáchro ch'ín Esteban kixin:

—Tsjuhérá kixin k'uíkuan kixin xitjehe nkajní la ntaha itjen tí Xjeen Dios K'óna Chojni nánko tja chjina Dios.

⁵⁷ A ntá jehe sín la k'uikjehe sín ntatsjon sín la itsen k'uixité sín ntá sákjuí sín k'uixitja sín ch'án ⁵⁸ sákjuíko sín ch'án ikon chjasin ntá ixro chjehe sín ch'án. La tí sín tjanchia jie mé kuakitsje sín iké sín la k'uejo sín toté ijnko ch'ín ntasoá it'in Saulo kixin ts'ayakonhen ch'án tí ka a. ⁵⁹ La it'e sín xro ntá ch'ín Esteban mé chrónóhe ch'án Inchéni la ntáchro ch'án kixin:

—Inchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kixin:

—Inchéni jaha mé tahya kuentá tí jie kjuasin sín.

Mé xikaha ichro ch'án ntá ik'uén ch'án.

8

Ch'ín Saulo chrók'óyán ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xíkayehe sín sákjuí sín nkuíxín estado Judea la ko estado Samaria. A ntá jehó tí sín tsíkjeýá Jesús mé kuítóhe sín ntiha.

² Na iso sín imá tinkáchónki Dios mé kjuavá sín ch'ín Esteban la ko tsjánkama sín ch'án la ko t'avéhe sín ch'án. ³ A ntá tí ch'ín Saulo la kjuankíxin kónínkakonhen ch'án tí sín tinkáchónki Cristo. K'uíxenhén ch'án jnkojnko jnkojnko ntøe sín la itsé ch'án tí sín ntoa la ko tí chojni chjin. La ntá kuínkánkákjen ch'án sín sákjuíko ch'án sín kixin ts'ejóchjina sín.

Kjuako sín itan jína tí estado Samaria

⁴ A ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuíxín tí sákjuí sín. ⁵ La ijnko ch'ín it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuènte Cristo. ⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kixin ó k'uíkon sín tí kjuaxroan kjuakoxin ch'án. ⁷ Itsje chojni chóna nchakuen tí jínahya mé kuítóhe sín jína la tí nchakuen tí jínahya k'óyako k'uaxrjexín tí jehe sín. La nchónhya tí sín chóna chin xitjahya itji la ko tí sín síxénká toté mé kuítóhe sín jína. ⁸ A ntá imá kóchéhe kaín tí sín siín chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinchexroan ch'án. K'uékjich'iehe ch'án tí sín estado Samaria ntáchro ch'án kixin ijnko chojni imá tjetoan tí jehe ch'án. ¹⁰ La kaín tí sín ntiha k'uejó sín kuínhin sín jína, mé tí chánjan ntsíntsi hasta tí chojni imá táda la k'uéntáchro sín kixin:

—Tí ch'ín i imá chóna ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kixin k'uékjinchexroan ch'án k'uékjich'iyexín ch'án sín itsjé nánó. ¹² Ntá tió kuítekaon sín tí tan jina kjuako ch'ín Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuíkite sín. ¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankíxin k'uájiko ch'án tí ch'ín Felipe la imá chrakon ch'án kixin k'uúikon ch'án tí kjuaxroan jié kjuasin tí ch'ín Felipe.

¹⁴ A ntá tí sín apóstol, mé tí sín tsíkitohe chjasin Jerusalén, kuínhin sín kixin itsjé tí sín estado Samaria ó kuítekaon sín itén Dios. Ntá k'uetuenhen sín ch'ín Pedro la ko ch'ín Juan sátsji sín ntiha. ¹⁵ Ntá tió kjuíji sín ntá kjuanchehe sín Dios kixin tí sín ntiha tinkáchónki Cristo chrók'uáyéhe sín Nchakuen Dios ¹⁶ kixin nijnko tí jehe sín ntiha naxa tsík'áyéhya sín Nchakuen Dios. Jehó tsíkikitexín sín ihnié Ìnchéni Jesús. ¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uúikon ch'án kixin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon ¹⁹ la ntá chro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaón ikja jnkójin chojni ntá chrók'uáyéhe sín Nchakuen Dios —ichro ch'án.

²⁰ Ntá ntá chro ch'ín Pedro kixin:

—Jaha la ko tí ch'ichakoán ts'itjáyankoa kixin tjenkayáxian kixin chrók'uèna tí kjuachaxin kuènte Dios. ²¹ Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán. ²² Méxra ts'itohé tí ijiá la chrónóhé Dios kixin ách'e tsjakjìnhan ch'án tí jié tjenkayáxian. ²³ Ó t'íkuan kixin imá chjinoxínhin asán la ko nchónhya jié chonta —ichro ch'ín Pedro.

²⁴ La ntá ch'ín Simón kjuátehe ch'án ntá chro ch'án kixin:

—Nixjehérá Ìnchéni kixin tí janhan kixin chrókónnahya tí janhan éxi tí ntá chrorá —ichro ch'án.

²⁵ Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya ti chjasin ntsíntsí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkjin nación Etiopía

²⁶ A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sátsjia nó sur tsoxeta tí ntia t'inkajinxin chjasin Jerusalén hasta chjasin Gaza —ichro tí ch'ín ángel.

Na ntá tí ntia a mé ijnko ntia t'atsínka nó nteje. ²⁷ Na ntá tí ch'ín Felipe k'uínkatjen sákjuí tí ntia. La ntiha xrínahya xeta ch'án ijnko chojni tsíkjin nó nación Etiopía. Jehe ch'án mé ijnko chojni eunuco mé tja ch'án siín ch'ichakoen tí tjan reina Candace t'etuenhen tí nación Etiopía. Jehe ch'án sátsíkji ch'án chjasin Jerusalén xraxinkakonxín ch'án Dios.

²⁸ A ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios.

²⁹ La ntá tí Nchakuen Dios mé k'uetuenhen tí ch'ín Felipe ntá chro kixin:

—Sátsjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntá chro ch'án kixin:

—¿Nkexrí chrókuiánxian kixin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjaxin chjinaxón ti tjen ch'án.

³² Na tí xroon itén Dios tjenchekuáxin ch'án mé tíhi: Jehe ch'án mé sákjuiko sín éxí ijnko kolélo kjuiko sín ts'óyán sín. La éxí ijnko kolélo tsjánkahya tió kjínhin sín kaxree va mé xíkaha jehe ch'án ninkehó xítjeehya ir'va ch'án.

³³ K'uíkon sín ch'án éxí ijnko chojni chóna jje la ntoáhya kjuínchekjasóte sín ch'án. Kohya nkexro tsjacha tsochrónka kuènte tí sín chrók'uaxrjeníxin ch'án kixin jehe ch'án la k'uenxín ch'án chjasintajni.* Mé xíkaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kixin:

—Tsotsenkávan chronka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xíkaha kjuanchankí ch'án.

³⁵ La ntá tí ch'ín Felipe kjuankíxin chrónka ch'án kuènte tí nkehe tjenchekuáxin tí ch'ín a la chrónka ch'án tí tan jína kuènte Jesús. ³⁶ A ntá xrínahya kjuíji sín tí tjía ntá, ntá ntáchro tí ch'ín eunuco kixin:

—Tsjehe tjía ntá. ¿Á xitjahya chrókuíkítina? —ichro ch'án.

³⁷ Na ntá ntáchro tí ch'ín Felipe kixin:

—Ti kuitekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kixin:

—Títekavan kixin tí Jesucristo la Xjeen Dios —ichro ch'án.

³⁸ La ntá tí ch'ín tsíkjin Etiopea a k'uetōan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjin Etiopea mé k'uínkajin sín ntá kjuíankí sín ntá la tí ch'ín Felipe kuíkíte ch'án tí ch'ín a. ³⁹ La ntá kjuixin k'uaxrjenkí sín ntá la ntá tí Nchakuen Inchéni sátsíkjiko tí ch'ín Felipe ókjé. A ntá k'uíkonhya kíchó sín inaá. Ntá kjónté xíkaha la tí ch'ín eunuco sákjuí ch'án la antsí chéhe asén ch'án. ⁴⁰ A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Inchéni kixin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo (Hch. 22.6-16; 26.12-18)

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Inchéni Jesús. Méxra sákjuítsjehe ch'án tí ch'ín nchat'á t'etōan. ² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí njnko chjasin Damasco tsjeyá ch'án tí sín kuákja ntá nixin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén. ³ La ntá kjuíji ch'án chjinaxón chjasin Damasco, a ntá xrínahya titàya ikui ijnko xrohi t'inkaséyan kuixin nkaya nkajni k'uantatjen ch'án a. ⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kixin:

—Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuátehe, ntáchro kixin:

—Janhan mé Jesús, mé tí nkexro xritjéyá jaha. ⁶ T'aya sáttja. T'ixenhén tí chjasin Damasco, ntá ntiha mé tsinhín nkehe sích'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró. ⁸ La ntá tuénxín k'uàya ch'ín Saulo ntá kuakitjenkí ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuiko sín ch'án chjasin Damasco. ⁹ A ntá ntiha kjuák'e ch'án la iní yaon k'uíkonhya ch'án la ko kjaxin kjónehya ch'án la ko ninkehó k'uíhya ch'án.

* 8:33 8.32-33 Isaías 53.7-8

¹⁰ **A** ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uúkuèn ch'án Ìnchéni ntáchro kixin:

—Ananías.

A ntá ch'ín Ananías mé kjuátēhe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sätjia tí ntia it'in Ntja Ntoí. Ntá tió tsjasán ntōe ch'ín Judas tjanchankíhí sín á ntahya itjen ijnko ch'ín tsíkijxin chjasin Tarso me it'in ch'án Saulo. Jehe ch'án mé tjechrónōana ch'án. ¹² **A** ntá titàya k'uúkuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kixin xik'ikon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhí, tsjihyani kixin ó kuínhinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jína kjuích'ehe ch'án tí sín kuítekaon tí jaha chjasin Jerusalén.

¹⁴ **A** ntá jie la ó kjuí ch'án ntihi kixin tsík'áyéhe ch'án kjuachaxin kuènte nchät'á t'etōan kixin tsotsé ch'án kaín tí sín tinkáchónki ihniá.

¹⁵ Kjánchó Ìnchéni ntáchro kixin:

—Sätjia. Janhan kjuéyá tí ch'ín a kixin tsjako ch'án tanná. Tsjakohe ch'án tí sín ókjé nación la ko tí sín rey la ko kjaxin tí sín israelita. ¹⁶ Janhan tsjākōhā ch'án kixin nchónhya tsjasóte ch'án kixin tsinkáchónkina ch'án.

¹⁷ **A** ntá ch'ín Ananías sákjuí ch'án tí nchia itjen ch'ín Saulo la ntá k'uúixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uúkuən tí ntja k'uinkaxian, mé k'uetuanna kjuíha kixin sintak'ikuan inaá la ko ts'ayéhé Nchakuen ch'án —ichro tí ch'ín Ananías a.

¹⁸ Ntá tuénxín k'uanotjēnxin ikon ch'ín Saulo ijnko nkehe éxí kjoe koche xikaha. Ntá xik'ikon ch'án inaá. La ntá k'uúinkatjen ch'án la ko kuíkite ch'án. ¹⁹ La ntá chr'éxin ntá kjóne ch'án la ntá ikjan asén ch'án inaá. Ntá kuitohe ch'án iso yaon k'uejóko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankixin ch'ín Saulo kjuakoxin ch'án iso ninko Israel kixin Jesús mé Xjeen Dios. ²¹ La kaín tí sín tjejótinhin imá chrakon sín la ntáchro sín kixin:

—¿Á jehya tí ch'ín i tjinkaon sinchek'itjāyan ch'án kaín tí chojni tinkáchónki Jesús chjasin Jerusalén? ¿Á jehya tí xra a kjuixin ch'án ntihi kixin tsotsé ch'án sín la sátsjiko ch'án sín tí tjejó tí sín nchät'á t'etōan? —ichro sín.

²² Kjánchó antsí má fuerte kjuako ch'ín Saulo kixin chaxín tí ch'ín Jesús mé tí Cristo. La tí sín judío k'uejó chjasin Damasco kjuachahya kjuachaxin sín ch'án.

Kjuachahya tí sín judio chrótsé sín tí ch'ín Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexrí chrók'óyán sín tí ch'ín Saulo. ²⁴ **A** ntá ó kuínhin ch'án nkehe kjuenkayáxin sín. **A** ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrjexín ch'án chjasin. ²⁵ **A** ntá tí sín tinkáchónki Ìnchéni mé kjuak'enkaya sín tí ch'ín Saulo ijnko ntaxra jié ijnko tie. Ntá kjuinkajinxin sín tí ntaxra tjenkáya tí ch'ín Saulo nóton tí tjat'ō tsík'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

²⁶ Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kixin kuítekakonhya sín kixin á chrókóchaxín kjaxin ch'án tinkáchónki ch'án Ìnchéni. ²⁷ **A** ntá ch'ín Bernabé mé sákjuíko ch'án tí ch'ín Saulo ti tjejó tí sín apóstol la ntá chrónka ch'án kixin ch'ín Saulo mé

tsík'ikon ch'án Ìnchéni tí ntja sákjuí ch'án ntá Ìnchéni mé nixjehe ch'án. Méxra chjasin Damasco k'uékjako ch'án ihnié Ìnchéni la chrakonhya ch'án. ²⁸ Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxiэн ihnié Ìnchéni Jesús. ²⁹ La ikjo ch'án tí sín judío nixja nkiva griego. A ntá jehe sín la tjinkaon sín chrók'óyán sín tí jehe ch'án. ³⁰ A ntá tí sín kichó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uetuénhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjó sín la antsí má tinkáchónki sín Ìnchéni. K'uéchóna sín kjuasáyé Ìnchéni la ko tí Nchakuen Dios kjuínkítsa sín la ntá antsí má sítinkákótsjé sín.

Ch'ín Eneas kuítóhe ch'án jína

³² Na ntá tí ch'ín Pedro xritsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kichó ni tjejó chjasin Lida. ³³ Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án. ³⁴ Na ntá ntáchro ch'ín Pedro kixin: —Eneas, Jesucristo mé sintakitoha jína ijie. T'inkatjen tjatsiyan camá —ichro ch'án.

Na ntá ch'ín Eneas tuénxín k'uínkatjen ch'án. ³⁵ La kaín tí sín siín chjasin Lida la ko chjasin Sarón k'uíkon sín kixin kuítóhe ch'án jína la ntá kjaxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkiva griego la mé t'axrjéxín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkítsa tjan tí chojni nòa. ³⁷ Ntá ijnko yaon imá kóníhi tjan ntá ik'uén tjan. La ntá kjuínchek'ónti sín cuérpóé tjan la ntá tí yóxin piso noi kjuák'e sín tjan. ³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tsontáche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjan tí cuérpóé tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan. ⁴⁰ A ntá k'uetóan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehe ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'àya.

Ntá kuakitjenki tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan. ⁴¹ A ntá itsé ch'án itja tjan la k'uínkatjen tjan. La ntá k'uíyehé ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan. ⁴² Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni. ⁴³ A ntá ch'ín Pedro kuítóhe ch'án itsjé yaon tí chjasin a la kjuák'e ch'án ntóe ch'ín Simón, ijnko ch'ín nchentá tjeó iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetuénhen tí sín soldado italiano. ² Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjinkítsa tí sín judío la ko xráxín nixjehe ch'án Dios. ³ La ntá ijnko yaon las tres kónjín titàya k'uíkuèn ch'án ijnko ángel kuènte Dios k'uíxénhen tí tjen ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhin kixin tí nixjehé ch'án la ko tí jina ch'e tjínkítsa tí sín nòà. ⁵ Ntá jaha tétuēnhén jnkojín chojni sátsji chjasin Jope kixin tsjikakjín sín ch'ín Simón kjaxin it'in ch'án Pedro. ⁶ Itjen ch'án ntøe ijnko ch'ín kjaxin it'in Simón. Tí ch'ín a mé nchentá tjoé iko. Mé tjen ntøe ch'án chjinaxón tí ntayaon a.

⁷ Ntá tió sákjuí tí ángel nixjehé ch'ín Cornelio la ntá jehe ch'an k'uíyehé ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chónthehe sín kjuasáya kichó sín. ⁸ Ntá kjuixin chénka ch'án kaín sín tí nkehe k'uíkon ch'án ntá k'uetuēnhen ch'án sín sátsji sín chjasin Jope.

⁹ Í jnko yaon chr'éxin chjina chonkixin tjejóyá sín ntia chjino chjasin Jope ntá ch'ín Pedro mé k'uit'ótjen ch'án chrítaón nchia kixin ntaha nixjēexín ch'án Dios. ¹⁰ Ntá imá k'uén ch'án kjinta la tjinkaon ch'án chrókjone ch'án. Nachrohe tsochján tí nkehe sine ch'án la ntá titàya k'uíkuèn ch'án nkehe ¹¹ mé k'uíkon ch'án kixin xitjehé nkaya nkajní ntá ntiha k'uínkajinxin ijnko ka jié. Kanoé punté tí ka tjejóte. ¹² Tí nkaxenhen tí ka a tjinká ko noó toté la ko konche la ko kaín ko xritjaká. ¹³ Ntá kuínhin ch'án nixja ijnko nkexro ntáchro ch'án kixin:

—Pedro, t'áya, t'oyán tí ko a ntá inte.

¹⁴ Ntá ch'ín Pedro kjuátēhe ch'án kixin:

—Náhi, Ìnchéni. Nunca nehyani tí nkehe tjuáhya.

¹⁵ Ntá kjuátēhe tí tan inaá ntáchro kixin:

—Tí nkehe ó kjuínchetjóá Dios. La ntáchrohya kixin tjuáhya —ichro ch'án.

¹⁶ Xikaha kónhen iní veces ntá tuénxín sákjuí tí ka nkaya nkajní. ¹⁷ Ntá ch'ín Pedro naxa tjenkayáxin ch'án nkehe t'axrjexín tí k'uíkon ch'án la xrínahya ó kui tí sín ichr'án ch'ín Cornelio ntója nchia. Ó tsíkjanchankí sín nketí tjen ntøe ch'ín Simón. ¹⁸ Ntá kjuanchankí sín itsen kixin:

—¿Á ntihi tjen ch'ín Simón kjaxin it'in ch'án Pedro?

¹⁹ Naxa tjenkayáxin tí ch'ín Pedro tí nkehe k'uíkon ch'án ntá Nchakuen Dios chrónka kixin:

—Tsjehe ó kui iní sín xritjeyá tí jaha. ²⁰ T'áya t'inkajián sáttjikoá tí sín a. Tóxakuanhya jaha, janhan mé kuétuānhan sín ikui sín —ichro Nchakuen Dios.

²¹ Ntá k'uínkajin tí ch'ín Pedro tí tjejó tí sín a ntá ntáchro ch'án kixin:

—Janhan tí nkexro xritjéyará. ¿Nkehe tí tsonhen tjinkáonrá?

²² Ntá kjuátēhe sín ntáchro sín kixin:

—K'uetōan tí ch'ín capitán Cornelio ikuini ntihi. Jehe ch'án me ijnko chojni imá jina la ko xraxinkaon ch'án Dios. Kaín tí sín judío tjikosáyehe ch'án la ko tjuēhe sín ch'án. Ijnko ángel kuente Dios mé nixjehé ch'án chénka ch'án kixin chrók'uíyehé ch'án tí jaha kixin chrókjuia ntøe ch'án la ntá chrókuinhin ch'án tí nkehe tsontáchrua —mé xikaha chrónka sín.

²³ Na ntá tí ch'ín Pedro kjuanjon kjuachaxin kixin ntahó chrók'ok'éhe sín ti tie a. Ntá kóyaon ntá sákjuíko ch'án sín. Kjaxin iso sín tinkáchónki Ìnchéni tjejó chjasin Jope mé sákjuíkotoxin sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyehé ch'án tí jehe sín kixin tsinhin sín. ²⁵ Ntá tió kjuíji tí ch'ín Pedro ntøe tí ch'ín Cornelio ntá k'uaxrjexín ch'án nchia nixjehé kichó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án. ²⁶ A ntá tí ch'ín Pedro kjuínchek'inkatjen ch'án tí ch'ín a la ntáchro ch'án kixin:

—T'inkatjen. Tjak'exián totá. Janhan mé ijnko chojni éxi tí jaha.

²⁷ A ntá kjuixin ikjo sín la ntá k'uixenhen sín ntøe ch'án la ntá k'uíkon tí ch'ín Pedro kixin nchónhya chojni tsíkójnkotsé ntiha. ²⁸ Ntá ntáchro ch'án kixin:

—Jahará nohará kixin tí jeheni judíoni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni. ²⁹ Méxra tió k'uíyanará la tjoka k'uinka. Tjínkavan chrókónona kixin nkekuente k'uíyanará.

³⁰ Ntá kjuátehe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehanyi la nixjeheni Dios. Ntá xrínahya k'uíkoni ijnko chojni chóna iké tjákini. ³¹ La ntáchro ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjinkitsa jaha tí chojni nò. ³² Méxra tétuénhén chojni sátsji chjasin Jope kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntøe ijnko ch'ín mé kjaxin it'in Simón nchentá ch'án tjoé iko. Chjino tí ntayaon a itjen ntøe ch'án,” ichro tí ángel. ³³ Méxra xikaha tjoka ichr'ánni sín tsíkjejá sín tí jaha. Jína k'uinka ntøeni. Ntá ijie ó nohe Dios kixin kaín ni tjinkaonni tsinhinni nkehe tí k'uetuanhan Ìnchéni tsochronka tsinhinni.

Ch'ín Pedro kjuakohe ch'ín Cornelio ntøe ch'án

³⁴ Ntá ntáchro ch'ín Pedro kixin:

—Ijie ó t'íkuan kixin jnkokón t'ikon Dios kaín xín chojni. ³⁵ Tí nkexro kaín nación titekaon la chónthehe kjuasáyé Dios la mé tóxrjínhin ch'án. ³⁶ Dios mé nixjehe ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehe ch'án mé Ìnché ch'án kaín nkehe. ³⁷ Jahará ó nohará jína kaín tí nkehe tsíkónhen nkuíxín tí tjejó tí sín judío mé kjuankixin estado Galilea tió kjuixin kjuako ch'ín Juan kixin t'ichjánxin tsikite chojni. ³⁸ Jahará ó nohará kixin Dios kjuanjon kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkixín chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínchekitohe ch'án jína kaín chojni tjasótexín kaín tí kjuachaxién tí jínahya. Mé xikaha jína kjuích'e ch'án kixin Dios tjeko tí jehe ch'án. ³⁹ A ntá jeheni mé chaxín k'uíkoni kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkani sín ch'án ijnko ntacruz la k'óyán sín ch'án. ⁴⁰ A ntá Dios kjuínchexechón ch'án tí nixin yaon la kjuanjon ch'án kjuachaxin kixin k'uíkoni ch'án inaá. ⁴¹ Jehya kixin kaín chojni chrók'uikon sín ch'án. Náhí. Jehó tí sín tsíkjejá Dios kixin ts'ikon chaxín xechón ch'án. Jeheni kjónekoni ch'án la ko k'uíkoni ch'án tió xíxechón ch'án inaá. ⁴² K'uetøan ch'án kixin jeheni tsjakøhèni chojni la tsochronkani kixin jehe ch'án mé tí nkexro juez sinchekitoexín ijje tí sín tjejóchón la ko tí sín ó tsík'en. ⁴³ Kaín tí sín k'uéchrónka itén Dios mé chrónka sín kixin jnkojnko tí sín tinkáchónki Jesús mé ts'ókíka ch'án ijje sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. ⁴⁵ Ntá tí sín judío kjuikotoxin ch'ín Pedro la chrakon sín kixin Dios mé kjuanjon Nchakuen ch'án, kjaxin k'uáyéhe tí sín jehya judío. ⁴⁶ Méxra kuínhin sín nixja sín jnkojnko nkiva ókjé la ko kuínhin sín tjanchehe sín Dios kjuasáya. ⁴⁷ Ntá ntáchro ch'ín Pedro kixin:

—Jehe sín ó k'uáyéhe sín tí Nchakuen Dios xikaha jeheni. Ntá chrókjuanjonni kjuachaxin kixin tsikite sín —ichro ch'án.

⁴⁸ La ntá k'uetøan ch'ín Pedro kixin tsikite kaín sín kjuachaxién ihnié Jesucristo. Ntá tí sín kuíkite mé kjuanchia sín kixin chrókuitøhe tí ch'ín Pedro ntiha iso yaon.

11

Nixjehe ch'ín Pedro tí sín tinkáchónki Cristo chjasin Jerusalén

¹ Na ntá tí sín tsíkijeyá Ìnchéni la ko kaín tí sín tinkáchónki Ìnchéni k'uéjé estado Judea mé kuínhin sín kixin tí sín jehya judío ó tinkáchónki sín itén Dios. ² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án.

³ Kjuanchankíhi sín ch'án ntáchro sín kixin:

—¿Nkekuènté kjuítsjehé tí sín jehya judío, la ko kjóntekoa tí jehe sín? —mé xíkaha kjuanchankí sín.

⁴ Ntá tí ch'ín Pedro kjuankíxin ch'án chrónka ch'án desde tí xrankixíxin kaín nkehe tsíkónhen ch'án. Ntáchro ch'án kixin:

⁵ —Janhan mé kjuak'é chjasin Jope kjuak'énixjahá Dios. La ntá titàya k'uíkuèn ijnko ka jié k'uínkajinxin nkaya nkajní. Kanoé punté tí ka tjejóte la kjuák'e chjino tí tjén. ⁶ Ntá tsjahá jína tí nkehe la k'uíkuàn kixin tí nkaxenhen tí ka tjinká ko noó toté la ko iko nteje la ko konche la ko iko xritjaká. ⁷ La kjaxin kuínhan itén ijnko nkexro nixjana ntáchro ch'án kixin: “Pedro, t'àya t'oyán tí ko a ntá inte.” ⁸ A ntá kjuátahá kixin: “Náhí, Ìnchéni. Nunca nehyani tí nkehe tjuáhya.” ⁹ A ntá kjuátehe tí tan kuixin nkaya nkajní a inaá chrónka kixin: “Tí nkehe a mé ó kjuínchetjóá Dios. La ntáchrohya kixin tjuáhya,” ichro ch'án. ¹⁰ Xíkaha kónhen iní veces. Ntá sákjuí kaín tí nkehe a nkaya nkajní inaá. ¹¹ Ntá xrínahya tuénxín kjuíji iní chojni ntoa tí nchia tjejóni. Tsíkijixin sín chjasin Cesarea xritjeyá sín tí janhan. ¹² Tí Nchakuen Dios mé k'uetoan kixin sáchrókjuikian sín la chrókóxonahya. Kjaxin sákjuikian injon tí sín kichó ni tjejó i. Kaínni k'uixenhenni ntoe tí ch'ín a. ¹³ A ntá tí ch'ín ntoe ntiha mé chrónka ch'án kixin k'uíkon ch'án ijnko ángel tjexín toté la nixja ntáchro kixin: “Tétuénhén chojni sátsji chjasin Jope kixin tsjikakjín sín ijnko ch'ín it'in Simón la ko kjaxin it'in ch'án Pedro. ¹⁴ Jehe ch'án mé tsonixjahá ch'án tsochrónka ch'án nkexrí tsaá jaha la ko kaín tí sín kjéhya.” ¹⁵ Ntá kjuankíxian nixjahá sín na ntá ó kui tí Nchakuen Dios k'uáyéhe sín éxí k'uáyéheni tí senó a. ¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'án kixin: “A ntá chaxín ch'ín Juan ìnta ó kuíkítexín ch'án chojni, a ntá ijie jahará tsikitiaxínrá tí Nchakuen Dios.” ¹⁷ Éxí xíkaha jeheni tió kjuankíxin kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xíkaha ijie la kjuanjon Dios tí Nchakuen ch'án k'uáyéhe tí jehe sín kjaxin. ¿Xá nkexro tí janhan kixin chrókjuánjonkian Dios? —ichro ch'ín Pedro.

¹⁸ A ntá tí sín kichó ni tjejó chjasin Jerusalén kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrín —mé xíkaha ichro sín.

Tí nínko chjasin Antioquía

¹⁹ Tí kjuixin k'uen ch'ín Esteban ntá kjuankíxin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakohe sín tí sín judío nkexrí tjen tí tan jína. A ntá tí sín jehya judío la náhí. ²⁰ A ntá í so sín tinkáchónki Ìnchéni tsíkijixin chjasin Chipre la ko tsíkijixin sín Cirene sákjuí sín chjasin Antioquía. Tió kjuíji sín ntiha mé kjuakohe sín tí sín jehya judío nkexrí tjen tí tan jína kuènte Ìnchéni Jesucristo. ²¹ Tí kjuachaxin kuènte Ìnchéni mé chónka tí jehe sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'ín Bernabé sákjuí ch'án ntiha. ²³ Ntá tió kjuíji ch'án ntiha ntá k'uíkon ch'án kixin Dios imá kjuínkítsa tí sín ntiha kjaxin. Ntá imá kóchéhe asén ch'án. Ntá nixjehe ch'án sín kixin kaín asén sín ts'ejó sín tsinkáchónki sín Ìnchéni. ²⁴ Ch'ín Bernabé la ijnko chojni imá jína asén la antsí chónka ch'án Nchakuen Dios la jína tinkáchónki ch'án; méxra kóchjina nchónhya sín kuinkáchónki sín Ìnchéni.

²⁵ Kjuixin tíha a ntá ch'ín Bernabé sákjuí ch'án chjasin Tarso sákjuíkjayá ch'an tí ch'ín Saulo. ²⁶ Ntá tió k'uitja ch'án ntá sákjuíko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakohé sín itsjé chojni. Ntiha chjasin Antioquía kjuankíxin sín kjuíkítexín sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía. ²⁸ Ijnko ch'ín it'in Agabo k'uínkatjen ch'án kjuák'exín toté ch'an tí tsikójnkotsé tí sín tinkáchónki Jesús la kjuachaxién Nchakuen Dios chrónka ch'án kíxin tsokjinta nkuíxin ntiha. Tí nkehe chrónka ch'án mé chaxín kónhen tió kjuák'e ch'ín Claudio k'ueṭoan ch'án. ²⁹ A ntá tí sín tinkáchónki Ìnchéni chjasin Antioquía kjuenkayáxin sín kíxin jehe sín tsjinkítsa sín tí sín kichó sín tinkáchónki Ìnchéni estado Judea. La jnkojnko sín kjuanjón sín tí nkehe chónka sín. ³⁰ Mé xíkaha kjuenájín sín chichaon sákjuíko ch'ín Bernabé la ko ch'ín Saulo chjéhe sín tí sín t'ayakonhen nínko estado Judea.

12

Ik'uéen ch'ín Jacobo la ko kjuák'echjina ch'ín Pedro

¹ A ntá tí yaon a tí ch'ín rey Herodes mé ntá kjuankíxin ch'án kónínkakonhen ch'án tí sín tinkáchónki Jesús. ² La k'ueṭoan ch'án kíxin tí ch'ín Jacobo ts'enxín ijnko chica espada tjate. Jehe ch'án mé kichó ch'án tí ch'ín Juan a. ³ Ntá k'uíkon ch'ín Herodes kíxin imá kóchéhe tí sín judío kíxin xíkaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín niotja chóntahya tí xroan nchek'ánki niotja. ⁴ Kjuixin itsé ch'ín Herodes tí ch'ín Pedro ntá chr'áxnenhen ch'án ntóechiso. Ntá ntiha mé tjejónta noó grupo soldado la mé noó soldado jnkojnko grupo. Kjuenkayáxin ch'ín Herodes kíxin tsjixin ts'átsínka tí kia pascua ntá sátsjiko ch'án tí ch'ín Pedro tí siín tí sín israelita kíxin ts'íkon kuenté chjasin ntiha kíxin nkexrí its'en ch'án. ⁵ Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehé sín Dios kaín asén sín kíxin tsjinkítsa Dios tí ch'ín Pedro.

Dios kjuínkítsa ch'ín Pedro k'uaxrjexín ch'án ntóechiso

⁶ Tí tie a mé kjuenkayáxin ch'ín Herodes kíxin tsoyaon ntá tsakitsje ch'án ch'ín Pedro sátsjiko ch'án tí siín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntóechiso. ⁷ A ntá xrínahya tuénxín ikui ijnko ángel kuènte Ìnchéni, a ntá tí nkaxenhen ntóechiso imá k'uínkaséyan ijnkòyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'ueṭoan tí ángel ntáchro kíxin:

—Tjoka t'aya.

La ntá tí chica cadena tjejóchróntetoxín itja ch'ín Pedro mé k'uánótjen. ⁸ Ntá xík'etóan tí ángel ntáchro kíxin:

—T'inkaya iká la tjanka tokatá.

Ntá kuítekaon ch'ín Pedro la kjatée xík'etóan tí ángel ntáchro kíxin:

—T'ítsate iká ntá chréhe sátsjini —ichro ch'án.

⁹ Ntá ch'ín Pedro chréhe ch'án iton tí ángel a ntá noehya ch'án á chaxín xíkaha kónhen tí nkehe kjuích'e tí ángel o náhí. Ntáchro ch'án kíxin ách'e ijnko nkehe k'uíkonxón ch'án.

¹⁰ Ntá kjuixin k'uátsínka sín tí tjejó tí soldado saxón la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta chica ijié chjinaxón ntja. La ntá tí puerta chica la jehó xitjehé. Ntá k'uaxrje sín tjejótji sín ijnko ntja la ntá xrínahya tí ángel ó sákjuí la ntá jehó ch'ín Pedro kuítóhe ch'án. ¹¹ A ntá tí ch'ín Pedro kónohe ch'án kíxin chaxín kónhen tíha. Ntá ntáchro ch'án kíxin:

—Ntá ó noheni kíxin chaxín Ìnchéni tsíchr'án tí ángel kuènte ch'án kíxin sinchekaáni kíxin ts'óyánhyani ch'ín Herodes la ko tsoenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntōe ijnko tjan María, ìné ch'ín Juan kjaxin tìkìtèxìn sín Marcos. Ntaha tsíkójnkotsé itsjé sín tinkáchónki Ìnchéni tjejónixjehe sín Dios. ¹³ La ntá t'ínka ch'án tí puerta chjinaxón ntja la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha. ¹⁴ A ntá tió kjuátsōan tjan itén ch'ín Pedro ntá k'uitjáyenhen tjan kuakitjeehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'ín Pedro. ¹⁵ Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xíntáchro sín kixin:

—Jehya jehe ch'án. Kjá tí xrintōe ch'án.

¹⁶ A ntá ch'ín Pedro naxa t'ínka ch'án tí ntója puerta la ntá tió kuakitjehe sín la k'uíkon sín ch'án ntá chrakon sín. ¹⁷ A ntá kjuakoxin ch'ín Pedro itja ch'án kixin tsotání sín ntá chrónka ch'án kixin Ìnchéni mé kuakitsjexín ch'án ntōechiso. Ntá k'uetōan ch'án ntáchro ch'án kixin:

—Chenkará ch'ín Jacobo la ko kaín kíchó ni nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro. ¹⁹ La ntá k'uetōan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetōan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjexín ch'án estado Judea ntá sákjuí ch'án chjasin Cesarea la ntiha kjuák'e ch'án.

Ik'uén ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uàyakonhen ch'án ntōe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etōan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sítixin tí nkehe ine sín. ²¹ Ntá ch'ín Herodes k'uíyehē ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrjón kuènte chojni t'etōan la kjuák'enkáya ch'án ijnko silla kuènte chojni t'etōan. La ntá kjuankixin ch'án nixjehe ch'án tí sín tsíkójnkotsé. ²² A ntá tí sín a kjuankixin k'uèya sín, ntáchro sín kixin:

—Jehya chojni tjenixja. Dios tjenixja —ichro sín.

²³ A ntá tuénxín ijnko ángel kuènte Ìnchéni kjuíncheníhi ch'ín Herodes kixin kjuíncheyóhe ch'án asén ch'án Dios. La ntá kosintō kjóne nkaya tsee ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixra kuènte sín chjasin Jerusalén la ntá sáxíkji sín chjasin Antioquía la sákjuíko sín ch'ín Juan mé kjaxin tìkìtèxìn sín ch'án Marcos.

13

Ch'ín Saulo la ko ch'ín Bernabé sákjuíkjako sín

¹ A ntá tí nínko chjasin Antioquía la siín iso sín nixja sín itén Dios la kjuakohe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etōan estado Galilea, la ko ch'ín Saulo. ² Ijnko yaon la tjejótójnkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xra sich'e sín.

³ Ntá nixjehe sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkojnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uixenhen sín ijnko ntabárcō sákjuí sín ijnko nonte it'in Chipre. ⁵ Ntá kjuíji sín ijnko puerto it'in Salamina. Ntaha kjuakoxin sín itén Dios tí ninko kuènte tí sín judío. Kjaxin kjuíjiko sín ch'ín Juan kixin tsjinkĩtsa ch'án. ⁶ La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kixin kjaxin ch'án nixja ch'án itén Dios. ⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehē ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhin ch'án itén Dios. ⁸ A ntá tí ch'ín nchexroan, nkiva griego mé tikítexín sín ch'án Elimas, mé nínkakonhen ch'án tí sín tjako a kixin tjinkakonhya ch'án kixin tí ch'ín t'etoan chrókuitekaon ch'án Ìnchéni. ⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan. ¹⁰ Ntáchro ch'án kixin:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuènte kixin ch'éna jínahya tí ntja ntoá kuènte Ìnchéni? ¹¹ A ntá ijie la Ìnchéni sintakjasótia. Tsitoha ntakótán iso yaon la ts'ikonhya tí xrohi kuènte yaon —ichro ch'ín Pablo.

Ntá tuénxín tí ch'ín Elimas la k'uixitie tjen ch'án. La ntá kjueyá ch'án ijnko nkexro tsinkátséhe tja ch'án sátsjiko ch'án kixin t'ikonhya ch'án. ¹² A ntá xikaha mé k'uíkon tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uíkon ch'án tí kjuachaxin kuènte Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuíxin sín chjasin Pafos. K'uixenhen sín ntabárcō sákjuí sín kjuíji sín chjasin Perge estado Panfilia. Ntá ntaha ch'ín Juan* kuítóhe tí jehe sín ntá kjan ch'án chjasin Jerusalén. ¹⁴ Ntá sákjuíxin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uixenhen sín tí ninko Israel na ntaha k'uejótjaxin sín. ¹⁵ Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'uechrónka itén Dios ntá tí sín t'etoan kuènte ninko mé k'uíyehē sín tí sín a ntá ntáchro sín kixin:

—Kíchóni tí chonta nkehe tsochronka kixin antsí má tsochéheni la chronka jie tsinhinni —ichro sín.

¹⁶ Ntá ch'ín Pablo k'uínkatjen ntá kjuakoxin itja ch'án kixin tsotání sín. Ntá ntáchro ch'án kixin:

—Chrókuinhínrá jahará chojni israelita la ko kjaxin chrókuinhínrá jahará tsíkjixinrá chjasin ókjé tí chaxin tjinkáonrá nchexiteyéhérá Dios. ¹⁷ Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxin Dios kjuanjon kjuachaxin kixin chrókótsjé tí jehe sín tí naxa k'uejó sín chjasin Egipto. Éxí chojni tsíkjixin ókjé k'uejó sín a ntá chr'éxin ntá kjuachaxién Dios kjuínkĩtsa sín k'uaxrjexín sín tí nonte ntiha inaá.

¹⁸ Dios kjuínkĩtsa sín tí cuarenta nánó k'uejó sín tí nteje. ¹⁹ Ntá chr'éxin kjuínchek'itjáyan ch'án yato nación k'uék'ejó nonte Canaán, kixin tí sín tsík'axrjeníxinni chrók'uáyehē tí nonte a. ²⁰ Ntá kaín sín k'uejó sín ntiha ijnko cuatrocientos cincuenta nánó. K'uék'etoan tí sín juez hasta ikjuí tí ch'ín Samuel ijnko ch'ín k'uechrónka itén Dios. ²¹ Ntá kjuanchia tí sín israelita ijnko ch'ín rey ts'etuēhen sín. Ntá kjueyá Dios tí ch'ín Saúl la k'ueetoan ch'án cuarenta nánó. Jehe ch'án it'é ch'án mé ch'ín Cis la k'uaxrjeníxin ch'án ch'ín Benjamín.

²² Ntá chr'éxin Dios kuakitsjehe ch'ín Saul tí xra kjuák'e ch'án ntá k'uáyehē ch'ín David

* 13:13 Hechos 12.25

tí xra rey. Ntá ntáchro Dios kixin: “Ó k'uitjá ch'ín David, it'é ch'án mé Isaí. Jehé ch'án mé ijnko chojni nchechàna mé sinchexiteyàna ch'án kaín nkehe tjínkavan”.²³ Ijnko tí chojni k'uaxrjeníxin tí ch'ín David mé Jesús. Tíha la Dios tsíchr'án ch'án kixin sinchekaá tí sín israelita. Mé xíkaha tsíntáchro ch'án.²⁴ Naxa tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án kixin chrókjan sín chrórxaxinkaon sín Dios ntá chrokuikite sín.²⁵ Ntá chjina its'en ch'ín Juan ntá ntáchro ch'án kixin: “Janhan na jehya tí nkexro tjenkayáxinrá. Náhi. Chr'éxin na itsi í jnko nkexro la chrókósuàna chrókjuasintanka tí correa tokaté ch'án kixin antsí mé t'etoan tí jehé ch'án la kánhyó t'etoan tí janhan,” mé xíkaha tsíntáchro ch'ín Juan.

²⁶ Jahará kichó ni tsík'axrjeníxinrá ch'ín Abraham tinhínrá la ko kaín rá chojni tsíkjixín ikjín nchexiteyéherá Dios, tinhínrá tí tán tsaáxinrá.²⁷ Méxra tí sín k'uék'ejó sín chjasin Jerusalén la ko tí sín t'etoan ntiha mé kónoehya sín nkexro tí ch'ín Jesús la ko kuienxínhya sín tí nkehe tsíkjin tí sín k'uéchrónka itén Dios senó tió kjuínchekuáxin sín tí xroon tí nkaxenhen nínko jnkojnko tí yaon t'ok'éhe sín. Mé xíkaha jehé sín tió kjuínchekjasóte sín tí ch'ín Jesús la kjuínchexiteyá sín éxí nixja tí xroon a.²⁸ Ntá k'uitjahya sín ninkehó jie kixin chrók'uen ch'án ntá kjónté kjuanchehe sín tí ch'ín Pilato kixin ts'etoan ch'án kixin its'en ch'án.²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajinxín sín tí cuerpo kuènte ch'án tí ntacruz ntá kjuavá sín ch'án.³⁰ A ntá Dios kjuínchexechón tí jehé ch'án inaá.³¹ A ntá nchónhya yaon k'uíkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjejonixja sín nkexrí kjuako ch'ín Jesús, tjakohe sín kaín chojni.

³² 'A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjeníxinni ósé.³³ Mé xíkaha xiteyá k'uáyéheni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'ín Jesús éxí nixja tí xroon yóxin Salmo, ntáchro kixin: “Jaha mé xjanna. Janhan mé tjahá kjuachón jie.”[†] ³⁴ Ntá tsíntáchro Dios kixin sinchexechón ch'án tí ch'ín Jesús kixin tsoxíkahya cuérpoé ch'án. Mé xíkaha chrónka tí xroon itén Dios. Ntáchro kixin: “Janhan mé sintaxiteyá tí nkehe chaxín tjanka ch'ín David.”[‡] ³⁵ La ko í jnko Salmo mé ntáchro xíkhi: “Jaha tsjánjonhya kjuachaxin kixin tsoxíka tí cuérpoé tí nkexro tjóá kjuít'aha xra.”[§] ³⁶ A ntá ch'ín David kjuínchexiteyá ch'án éxí tsík'etoan Dios tí kjuák'e ch'án ntá kjónté chr'éxin ik'uén ch'án ntá xravá ch'án xíkaha k'uéxravá tí sín tsík'axrjeníxinni la ntá kjónté la xíka ntøe ch'án.³⁷ A ntá tí cuérpoé tí nkexro kjuínchexechón Dios la kótjehya.³⁸ Méxra kichó ni t'ichjánxin tsonohará kixin nkexrí tsjin ijíará kixin Jesús mé k'uenyákonhánrá.³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetøan ch'ín Moisés kjuachahya kótjuáxin tí jie.⁴⁰ Chrókóxakonhanrá kixin chrókuànhyará xíkaha éxí tsíkjin tí sín ósé xíkhi:

⁴¹ Tsjehérá jahara chojni titekakonhya. Ijie la tsochrakonrá kixin nkehe tsonhen kixin janhan Dios tsjakoxiàn ijnko nkehe jie ijnko yaon kjánchó tsítekàkonhyará kjónté ókjé nkexro chróchrónka.*

⁴² A ntá ch'ín Pablo la ko tí nkexro k'uájiko ch'án k'uaxrjexín sín nkaxenhen tí nínko, a ntá chrónòna tí sín jehya sín judío tsíkokjéxín, kjuanchia sín kixin í jnko semana tí yaon t'ok'éhe sín la inaá tsochrónka ch'án éxí tí kjuako ch'án.⁴³ Ntá tí kjuixin xíkaxín sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuínkáchónki sín éxí tí sín judío la xraxinkaon sín Dios, la mé imá kóxrjínhin sín tí nkehe kjuako ch'ín Pablo la ko ch'ín Bernabé la ntá sákjuíchréhe sín. A ntá jehé sín mé k'uetøan sín kixin antsí jína chrókuínkáchónki sín tí Dios tjuèhe kaín chojni.

⁴⁴ A ntá í jnko semana kjuèxin, tí yaon t'ok'éhe sín la kójnkotsé kaín tí sín siín tí chjasin ntiha kixin tjinkaon sín tsinhin sín itén Dios.⁴⁵ A ntá k'uíkon tí sín judío a kixin nchónhya chojni tsíkójnkotsé, ntá imá kóchjinoxínhin sín, ntá kjuankíxin sín k'uántaxínhin sín tí ch'ín

† 13:33 Salmo 2.7 ‡ 13:34 Isaías 55.3 § 13:35 Salmo 16.10 * 13:41 Habacuc 1.5

Pablo. ⁴⁶ A ntá ch'ín Pablo la ko ch'ín Bernabé la íchá antsí má chrakonhya sín nixja sín ntáchro sín kixin:

—T'ichjánxin senó jahará judíorá chrókuinhínra itén Dios. Kjánchó tjinkákonhyará tsinhínra tí nkehe jína tsjanjon kjuachón jnkochrín. A ntá ijie la tsitohará tí jahara judíorá la ntá jeheni la sátsjini tsjakoheni tí sín jehya judío ⁴⁷ xikaha tsík'etoan Inchéni. Ntáchro ch'án kixin:

Janhan ichr'an tí jahará éxi xrohi ts'inkaséyanxín kaín nació

kixin sátsjikoará tí tan tsjanjon kjuachón tsaáxin chojni hasta tí antsí má kjín kjuèxin chjasintajni.†

Mé xikaha k'ueṭoan Dios.

⁴⁸ A ntá kuínhin tí sín jehya sín judío tíha la kjuankíxin kóchéhe sín la ntáchro sín kixin tí tan kuènte Inchéni la nkehe jína, ichro sín.

La ntá kjuankíxin kuinkáchónki kaín tí sín tsíkitoenxín sín kixin tsochónta sín kjuachón jnkochrín. ⁴⁹ Ntá xikaha xrankíxin xrako tí itén Inchéni nkuíxín tí chjasin ntiha. ⁵⁰ A ntá tí sín judío nixjehe sín iso chojni chjin jína tjetooan la ko tí chojni ntoa t'etoan tí chjasin ntiha la ntá kjuínchekónínkaon tí sín a la ntá kjuankíxin sín chrók'óyán sín tí ch'ín Pablo la ko tí ch'ín Bernabé ntá sákjuíxin sín chjasin ntiha. ⁵¹ A ntá jehe sín la kótsjénka sín tokaté sín kixin tsoxénjin tí nche chónta toté sín. Tíha mé kjuakoxin sín kixin ntoáhya kjuenkayáxin tí sín a. A ntá sákjuí tí jehe sín chjasin Iconio. ⁵² Ntá tí sín tinkáchónki Inchéni la imá chéhe sín kixin antsí chónta sín Nchakuen Dios.

14

Ch'ín Pablo la ko ch'ín Bernabé tjejó chjasin Iconio

¹ Ntá kjuíji ch'ín Pablo la ko ch'ín Bernabé tí chjasin Iconio. Ntá k'uixenhen sín ninkoe tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín. ² A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kixin tsonínkakonhen sín tí sín tjako. ³ A ntá tí sín tjako la isé kuítóhe sín ntiha la chrakonhya sín nixja sín la ko tinkáchónki sín Inchéni Jesús. La ntá Inchéni kjaxin kóxrjínhin ch'án tí nkehe nixja sín kixin nkexrí tjuèheni Dios la kjuanjon ch'án kjuachaxin tsjasin sín kjuaxroan. ⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjeýá Inchéni. ⁵ A ntá tí sín judío la ko tí sín jehya judío mé kjuenkayáxinko sín tí sín t'etoan kixin sinchechrakon sín tí sín tsíkjeýá Inchéni la ko tsochjéhe sín xro. ⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuíxín ntiha. ⁷ La kjaxin ntaha kjuako sín tí tan jína kuènte Inchéni.

Chjéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kixin tsíkokjéxín ch'án xitjahya itji ch'án. ⁹ Méxra ó tjetjaxinkoá ch'án ntá kuínhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kixin tí ch'ín antsí tinkáchónki ch'án Inchéni kixin tsitohé ch'án jína. ¹⁰ Ntá jehe ch'án itsen ntáche ch'án tí ch'ín a kixin:

—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án. ¹¹ Ntá kaín tí sín chjasin ntiha k'uíkon sín nkehe kjuíche ch'ín Pablo, ntá kaín sín k'uíyexin sín nkívee sín Licaonia ntáchro sín kixin:

—Dios tsík'óna chojni mé tsíkixin nkajní tjejókoni ntíhi —ichro sín.

† 13:47 Isaías 42.6; 49.6

¹² La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kixin imá nixja ch'án. ¹³ Ntá tí ch'ín nch'at'á kuènte tí dios Júpiter mé chóna ch'án ninko tí t'ixenxínni ikon chjasin ntá kjuikao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kixin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a. ¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankíxin sín kótséchje sín iké sín la sákjuíkjiakjan sín tí chojni siín ntiha la t'óyako sín ntáchro sín kixin:

¹⁵ —¿Kuènté kixin tjejoch'erá xíkaha? Jeheni chojni éxi tí jahará. Tí xra ó kuini kixin tsochrónkani itén Dios kixin tsitohérá kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehe ch'án mé kjuích'éna ch'án nkajní la ko chjasintajni la ko tí ntañaon la ko kaín tí nkehe siín. ¹⁶ Ntá ósé mé kuítóhe Dios chojni kixin jehó ts'aji sín ntje sín. ¹⁷ Kjonté la Dios tjakoxin ch'án kixin jehe ch'án t'etōan ch'án kixin kjuích'éna ch'án kaín nkehe. Jehe ch'án mé t'etōan kixin ts'aniá chrin ntá ts'enkani la jina ts'óneheni, la jehe ch'án tjanjon ch'án nkehe kixin jnkochrín ts'ixin nkehe sineni, la ko jehe ch'án mé nchechéheni ch'án —mé xíkaha ichro ch'ín Pablo.

¹⁸ Kjonté xíkaha ichro tí sín tjako la naxa tjinkaon tí chojni chrokuikosáyehe sín chrók'óyán sín koxinta chrókjokehe sín tí sín tjako.

¹⁹ A ntá ikui iso tí sín judío kjuixin sín chjasin Antioquía la ko chjasin Iconio. Nixjehe sín tí sín ntiha kixin tsitōhe sín tí nkehe jehya jina tjako tí sín a ntá kónínkaon sín ntá kjuankíxin chjéhe sín xro tí ch'ín Pablo. La ntá ách'e ó kjuixin tsík'en ch'án ntá kuinkánkákjen sín ch'án sákjuíko sín ch'án ikon chjasin. ²⁰ Ntá tí sín tinkáchónki Ìnchéni mé kójnkotsé sín k'uantatjen sín tí ch'ín Pablo ntá k'uàya ch'án xíkjan ch'án tí chjasin ntiha ínaá. Ntá tí yaon chr'éxin ntá sákjuíko ch'án tí ch'ín Bernabé chjasin Derbe.

²¹ A ntá ó kjuixin chrónka sín tí tan jina la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía. ²² Nkuixín tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uetoan sín kixin naxa jina chrókuinkáchónki sín Ìnchéni la ntáchro sín kixin tí ts'ixenhenni tí kjuachaxin kuènte Dios t'ichjánxin tsjasóteni. ²³ A ntá ntiha kjueyá sín chojni jnkójnko ninko kixin ts'etuenhen sín tí sín tinkáchónki Jesús kixin jina ts'ejó sín. Ntá nixjehe sín Dios tí naxa kjónehya sín la ntá ntáche sín Ìnchéni kixin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

²⁴ Ntá chr'éxin k'uátsínka sín estado Pisidia la ntá kjuíji sín estado Panfilia. ²⁵ Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia. ²⁶ Ntá ntiha k'uixenxín sín ntabárcō ntá sákjuí sín chjasin Antioquía tí chjasin k'uénixjehe chojni Dios k'uékjanchia sín kixin Dios tsjinkítsa tí sín a sich'e sín tí xra. La ntá ó kjuixin xiteyá. ²⁷ Ntá tió kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuankíxin chrónka ch'ín Pablo nkexrí kjuínkítsa Dios tí jehe sín la ko nkexrí kjuanjon Dios kjuachaxin tsjakohe sín tí chojni jehya judío kixin kjaxin sín tsitekaon sín Ìnchéni. ²⁸ A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

¹ A ntá iso chojni tsíkixin sín estado Judea ntá kjuíji sín chjasin Antioquía. Ntá kjuankíxin sín kjuakohe sín tí sín kichó ni kixin xitjahya tsaáxin sín tí chónahya sín tí xroye tsík'etōan ch'ín Moisés. ² Ntá tí ch'ín Pablo la ko tí ch'ín Bernabé la ko tí sín judío kjuankíxin kjuanjonkoxín sín kichó sín. Ntá áxri ntá kónoxín kixin tí ch'ín Pablo la ko tí

ch'ín Bernabé la ko í so chojni la sátsji sín chjasin Jerusalén. Ntaha tsonixjehe sín tí sín apóstol la ko tí sín t'etōan n̄inko kixin nkexrí tsonhen tí xroye tsík'etōan ch'ín Moisés.

³ Tí sín tinkáchónki Ìnchéni chjasin Antioquía mé ichr'án sín tí sín a ntá k'uátsínka sín estado Fenicia la ko estado Samaria la tinkáchrónka sín kixin nkexrí tí sín ókjé jehya sín judío kjuitoxinhin tí k'uékjenkayáxin sín ntá kuákja sín nt̄ie Dios. Ntá kaín tí sín kichó ni imá kóchéhe sín tí kuínhin sín x̄ikaha.

⁴ La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etōan kuènte n̄inko mé kjuanjon sín kjuachaxin ts'ejó tí sín a. Ntá chrónka sín kixin Dios imá kjuínk̄itsa tí jehe sín. ⁵ Ntá iso tí sín fariseo ó tsíkitekaon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyēhe sín kaín tí ley —ichro sín.

⁶ Na ntá kaín tí sín apóstol la ko tí sín t'etōan n̄inko mé kójnkotsé sín kjuenkayáxin sín nkexrí tsonhen kixin x̄ikaha ichro tí sín judío. ⁷ Ntá imá nixjehe kichó sín ntá k'uínkatjen ch'ín Pedro ntáchro ch'án kixin:

—Jahará kichó ni ó nohará nkexrí kixin senó Dios tsíkjeýá tí jeheni kixin tsjākōheni kaín tí sín jehya judío kixin tsinhin sín tí tán jína kuènte Cristo kixin kjaxin jehe sín tsitekaon sín. ⁸ Dios mé ó nohe ch'án nkexéhe kaín asén chojni. Kjuakoxin ch'án kixin k'uáyēhe ch'án tí sín jehya judío kixin chjéhe ch'án sín Nchakuen ch'án éxí tí x̄ikaha k'uáyēheni tí jeheni. ⁹ Dios la t'ikon kaín chojni jnkokón éxí tí jeheni. Ntá kjuínchetjóá ch'án asén sín kixin ó tinkáchónki sín Ìnchéni. ¹⁰ Méxra ¿nkekuènté titekákonhyará tí nkehe kjuích'e Dios la ntá t̄etuēnhénrā chojni sinchexiteyá sín kaín tí nkehe ixrā tsitekaon sín? Ni jeheni la ko ni tí sín tsík'axrenixinni kjuachahya sín kjuínchexiteyá sín tíha. ¹¹ Náhí. Ó noheni kixin kjuasáyé Ìnchéni Jesús mé kuaáxinni la ko kjaxin x̄ikaha kuaáxin tí jehe sín kuítekaon —mé x̄ikaha ichro ch'ín Pedro.

¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínk̄itsa sín kjuasin sín itsjé kjuaxroan k'uíkon tí sín jehya sín judío. ¹³ Kjuixin nixja ch'ín Pablo la ko ch'ín Bernabé ntá kjuank̄ixin nixja ch'ín Jacobo, ntáchro ch'án kixin:

—Kichóni, tinhínrā tí nkehe tsōxrjanka. ¹⁴ Ch'ín Simón Pedro chrónka nkexrí kjuakoxin Dios kixin tjuēhe ch'án tí chojni jehya judío la nkexrí kjueyá Dios iso tí sín kixin tsinkáchónki sín tí jehe ch'án. ¹⁵ Mé x̄ikaha chaxín chrónka tí xroon tsíkjin tí sín k'uéchrónka itén Dios kixin:

¹⁶ Janhan mé tsokjan chr'éxin.

Tiό ts'ínka ntá s̄it'ána n̄ixin tí nchia tsík'oya kuènte David la janhan la tsjínk̄itsa sín ts'etōan sín.

¹⁷ Kixin kjaxin kaín xín chojni mé tsjeýá sín Ìnchéni

la ko kjaxin kaín xín tí sín ókjé nación mé tí sín kótjuáxin n̄ina mé tsinkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuènte ch'án.*

Mé x̄ikaha ichro itén Dios

¹⁹ 'Méxra ntáxrjan kixin tí sín jehya judío la t'ichjánxinhya sinchexiteyá sín kuènté tí ley kixin ó kuítóhe sín tí nkehe kuínkáchónki sín senó kixin jína chrókjueyá sín Dios.

²⁰ Méxra tsochr'énhenni sín ijnko xroon la jehó ts'et̄uēnhenni sín kixin chrókjónehya sín tí nto tsíkjokehe chojni tí nkehe tsíkjanoya la ko chróchóntahya sín chojni chjin ókjé la ko chrókjónehya sín tí nto kuènte ko tsíchrínjinhya ikja va la ko chrókjónehya sín ijn̄ié va. ²¹ A ntá jnkōjnko chjasin síin nkexro chrónkaxín tí ley kuènte ch'ín Moisés nchekuáxin sín tí nkaxenhen n̄inko jnkōjnko tí yaon t'ok'éhe sín —ichro ch'ín Jacobo.

* 15:18 15.16-18 Amós 9.11-12

²² Ntá kaín tí sín tsíkjeyá Ìnchéni la ko tí sín t'etòan kuènte nìnko la ko kaín tí í so sín tinkáchónki Ìnchéni kjueyá sín iso chojni tsochr'án sín chjasin Antioquía, mé kjueyá sín ch'ín Judas, tikítexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetòan ntiha. ²³ Ntá ichr'án sín tí xroon sákjuíko tí sín a ntáχρο kixin:

“Jeheni chojni tsíkjeyá Ìnchéni la ko chojni t'etòan kuènte nìnko ntihi la nixjahaaráni tí jahará, kichó ni jehya judío, tjejórá chjasin Antioquía la ko estado Siria la ko estado Cilicia. ²⁴ Ó noheni kixin iso chojni tsíkixín chjasénni kjónté k'uéchóntahya sín kjuachaxin la kjuínchexakonhanrá sín kixin ntáχρο sín kixin t'ichjánxín itsará tí xroye tsík'etòan ch'ín Moisés. ²⁵ Ntá jnkokoá kjuenkayáxinni tsjeyáni nkexro tjejó ntihi kixin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kixin imá tjuèheni sín. ²⁶ Tí sín a mé ántosen sín kjónté chrók'uenxín sín kixin tí tinkáchónki sín Ìnchéni Jesucristo. ²⁷ Méxra tsochr'ánni ch'ín Judas la ko ch'ín Silas tsjiji sín kixin jehe sín mé tsonixjahaará sín tsochrónkaxín sín kaín tíha. ²⁸ Jína kixin Nchakuen Dios mé kjuínkítsani kjuenkayáxinni kixin jehya chrók'uetuanhanráni ijnko nkehe imá xra. Náhí. Jehó tí nkehe kánhyó xra t'ichjánxín sinchexiteyará mé t'etòanni: ²⁹ chrókjóntehyará tí iko tsíkjokehe chojni tí nkehe tsíkjanoya la ko kjaxin chrókjóntehyará ijnié tí ko a la ko chrókjóntehyará tí nto kuènte tí ko tsíchrínjinhya kja la ko kjaxin ninkexró chrókuakjahya í jnko chojni chjin óké. Ntá tí sinchexiteyará kaín tí nkehe t'etòanni la jína ts'ejorá.” Mé xíkaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá kójnkotsé tí sín tinkáchónki Jesús ntá kjuanjón sín tí xroon a. ³¹ Ntá tió kjuínchekuáxin tí sín kichó ni tí xroon a ntá imá kóchéhe sín kixin xíkaha chrónka tí xroon a. ³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kichó ni kixin tí nkehe nixja sín. ³³ Ntá ntahó k'uéjó sín iso yaon, ntá tió sátsji sín ntá kaín tí sín tinkáchónki Ìnchéni nixjehe sín jína ntá ó xíkjan sín inaá tí tsíkixín sín tí tjejó tí sín tsíchr'án sín. ³⁴ Kjánchó ch'ín Silas kjuenkayáxin ch'án kixin ntahó chrókuitòhe ch'án. ³⁵ A ntá ch'ín Pablo la ko ch'ín Bernabé kuítóhe sín chjasin Antioquía. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankíxin tí yóxin viaje

³⁶ A ntá chr'éxín ch'ín Pablo nixjehe ch'án ch'ín Bernabé. Ntáχρο ch'án kixin:

—Sátsjitsjeheni tí sín kichó ni kaín tí chjasin kjuakoxínni itén Ìnchéni ósé. Tsjitsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tikítexín sín ch'án Marcos. ³⁸ A ntá ch'ín Pablo kóxrjienhya sátsjiko sín tí ch'ín Marcos a kixin jehe ch'án kuítóhe ch'án sín estado Panfilia la kjuínkítsahya ch'án kixin naxa tsonhen tí xra.† ³⁹ Méxra jnkokoáhya kjuenkayáxin sín la ntá xikayehe sín la óké sákjuí sín. Ch'ín Bernabé sákjuíko ch'án tí ch'ín Marcos la k'uixenhen sín ijnko ntabárcò sákjuí sín nonte Chipre. ⁴⁰ A ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxín sákjuí sín. Tí sín kichó ni ntiha kjuanchehe sín Dios kixin jína ts'ayakonhen sín ch'án la ntá sákjuí sín. ⁴¹ Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni nìnko ntiha.

16

Ch'ín Timoteo sákjuíko ch'án ch'ín Pablo la ko ch'ín Silas

¹ Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehe ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego. ² Ntá tí sín kichó ni tjejó chjasin Listra la

† 15:38 Hechos 13.13

ko chjasin Iconio mé nixja sín kixin jína tí ch'ín Timoteo. ³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetoan ch'án chrókua tí ch'ín Timoteo a tí xroye kixin tsonínkakonhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego. ⁴ Ntá sákjuí sín la kaín tí chjasin k'uátsínka sín la nixjehe sín tí sín kichó ni la chrónkaxín sín tí nkehe tsík'etoan tí sín apóstol la ko tí sín t'etoan kuente nínko chjasin Jerusalén. ⁵ Ntá tí chojni tinkáchónki Ìnchéni mé antsí má ntoá k'uéjé sín la ko jnkojnko yaon sítinkákótsjé sín.

Xrínhya titàya k'uikuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia. ⁷ Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha. ⁸ Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon. ⁹ Ntá ijnko tie xrínhya titàya k'uikuèn ch'ín Pablo ijnko ch'ín estado Macedonia kjuák'exín toté ch'án chrónòà ch'án kixin: “T'átsínka Macedonia tsjínkítsani,” ichro ch'án. ¹⁰ Méxra tíha tsík'ikon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxinni kichó ni ntiha.]

Ch'ín Pablo la ko ch'ín Silas, k'uéjé sín chjasin Filipos

¹¹ Ntá ntaha chjasin Troas k'uixenxínni ijnko ntabárcó ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxin kjuíjini chjasin Neápolis. ¹² Ntá ntiha sákjuixinni la kjuíjini chjasin Filipos. Tí chjasin a mé k'uéchóna tí sín romano ósé ntá ijnko chjasin antsí má tjetóan tí it'ò tí estado Macedonia. Ntaha mé k'uéjóni iso yaon. ¹³ Ntá tí yaon t'ok'éhe sín ntá k'uaxrjéxinni tí chjasin Filipos ntá sákjuíni ijnko chrínta ntarío mé ntiha kuèhnen sín tsojnkotsé sín tsonixjehe sín Dios. Mé ntaha k'uéjótjaxinni la kjuankíxinni kjuakoheni iso chojni chjin tsíkójnkotsé ntiha. ¹⁴ Ntá ijnko tí jehe sín mé ijnko tjan it'in tjan Lidia la tsík'ixín tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Ìnchéni mé kjuínkítsa asén tjan kixin tsinhin tjan jína tí nkehe kjuako ch'ín Pablo. ¹⁵ Ntá jehe tjan la ko kaín tí sín tjejó ntòe tjan mé kuíkite sín. Ntá chrónóehé tjan tí ch'ín Pablo ntáchro tjan kixin:

—Tí chaxín tjátsóan kixin chaxín tinkáchónkini Ìnchéni la jína chrókuitóha ntóeni ntihi —ichro tjan.

Ntá kjónté kuítóheni ntiha.

¹⁶ Ntá ijnko yaon sákjuíni tí nó kuèhnen sín nixjeexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí ìnché tjan kixin xíkaha tónohe tjan. ¹⁷ A ntá tí tjan tjarisoá a kjuankíxin tjan tinkáchréhe tjan tí ch'ín Pablo la ko tí jeheni ntá t'èya tjan ntáchro tjan kixin:

—Tí sín i ch'ehe sín xra Dios nkaya nkajni la tjako sín ijnko ntia jína tsaáxin chojni.

¹⁸ Mé xíkaha kjuích'e tjan itsjé yaon. Ntá kóchjinhin ch'ín Pablo la nkátjía ch'án nixjehe ch'án tí nchakuen tí jínahya chóna tí jehe tjan, ntáchro ch'án kixin:

—Kjuachaxièn ihnié Jesucristo tétuánhán kixin ts'axrjéxian tí jehe tjan —ichro ch'án.

Ntá tuénxín ó k'uaxrjéxín tí nchakuen tí jínahya tí jehe tjan.

¹⁹ Na ntá tí ìnché tí tjan a mé k'uíkon sín nkehe kónhen tjan la ó nohe sín kixin í tsjachahya sín chichaon kuente tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuíko sín tí tjejó tí síxreé ntasin tjetóan. ²⁰ Ntá kjuíkaán sín ntaha ti tjejó tí sín juez la ntáchro sín kixin:

—Tí sín i mé sín judío la imá sítjité sín chjasénni. ²¹ Tjako sín tí nkehe kuèhnyani tsonoheni la tóxrjénhyani sich'eni kixin jeheni mé chojni romanoni.

²² Kaín tí sín ntiha kónínkakohen sín tí jehe sín. Ntá tí sín juez mé k'uetōan ts'axrjehe sín iké sín ntá ts'ekonxín sín nta sé. ²³ Ntá tió kjuixin k'uékon sín nchónhya ntá chr'áxenhén tí sín a ntōechiso ntá k'uetuēnhen sín tí ch'ín t'ayakonhen ntōechiso kixin jina chrók'uayakonhen sín tí sín a. ²⁴ Ntá tí ch'ín t'ayakonhen ntōechiso mé k'uáyéhe ch'án kjuachaxin ntá chr'áxenhén ch'án tí sín a ijnko cuarto chríka ntōechiso kixin ts'axrjehya sín. Ntá chr'áxenhén ch'án toté sín tí nta tjejóxrja la ko chica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuēnte Dios. La tí sín í so tjejóchjina mé tjejótinhin sín kixin xíkaha tjejóch'e sín tjejótse sín. ²⁶ Ntá xrínahya tjian kuínkí nonte la kjuínchekinkí kuenté tí xrankíxixín ntōechiso ntá tuénxín kaín tí ntója puerta mé xítjehe la ko k'uánótjen tí chica cadena tsíchróntetoxín kaín tí sín tjejóchjina. ²⁷ Ntá tí ch'ín t'ayakonhen ntōechiso mé k'uàya ch'án. Ntá k'uíkon ch'án kixin síxítjehe tí ntója puerta ntōechiso a. Ntá kuakitsje ch'án chica espada ntá chrók'óyán ch'án asén ch'án kixin kjuenkayáxin ch'án kixin ó kjuixin tsíkinká kaín tí sín síchjina, ichro ch'án. ²⁸ Ntá ch'ín Pablo k'uèya ch'án itsen ntáchro ch'án kixin:

—Náhi kohya nkehe ch'ehé asán kixin kaín ni naxa tjejóni ntihyó —ichro ch'án.

²⁹ Ntá tí ch'ín t'ayakonhen ntōechiso kjuanchia kixin ts'ákjen xrohi ntá k'uíxenhén ch'án kuínká ch'án la síxránka ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas. ³⁰ Ntá tuénxín kuakitsjexín ch'án sín ntiha ntá kjuanchankíhi ch'án sín kixin: —¿Nkexrí chrókjuít'a kixin chrókuaána? —ichro ch'án.

³¹ Ntá kjuátēhe sín ntáchro sín kixin:

—Títekáván Ìnchéni Jesucristo la tsaá jaha la ko tí sín tjejó ntōa.

³² Ntá kjuakōhe sín tí jehe ch'án a la ko kaín tí sín tjejó ntōe ch'án ti tan kuēnte Ìnchéni.

³³ Na kjónté sítié la tí hora a sákjuíko ch'án sín kjuínchek'íjma ch'án tí tsíchrít'o sín. Ntá tuénxín jehe ch'án la ko kaín xín sín tjejó ntōe ch'án mé kuíkite sín. ³⁴ Na ntá chr'éxin tí jehe ch'án sákjuíko sín ntōe ch'án. Ntá ntiha kjuanjon ch'án nkehe sine sín. Imá chéhe ch'án la ko kaín tí sín ntōe ch'án kixin ó kuítekaon sín Dios.

³⁵ Ntá kóyaon nchítjen ntá tí sín juez k'uetuēnhen sín tí sín policía sátsjitsjehe sín tí ch'ín t'ayakonhen ntōechiso kixin chrókjuanjon ch'án kjuachaxin ts'axrje ch'ín Pablo la ko ch'ín Silas. ³⁶ Ntá tí ch'ín t'ayakonhen ntōechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etōan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policía kixin:

—A ntá jeheni kjónté chojni romanoni mé kjuatēni sín nkayakon nchónhya chojni. Jehya kixin chrókjuanchia sín nke jie chóntani. Náhi. Kjónté la chr'áxenhenni sín ntōechiso. A ntá ijie la ¿á imó chrókuakitsjeni sín ní? Náhi. Tsjjia ti jehe sín tsakitsjeni sín —ichro ch'án.

³⁸ Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano. ³⁹ A ntá sákjuí tí sín juez ntá chrónōhe sín tí ch'ín Pablo la ko ch'ín Silas kixin tsonínkakohenya sín kixin xíkaha kónhen sín ntá k'uaxrjexín sín ntiha ntá chrónò a tí sín a sátxixin sín tí chjasin ntiha. ⁴⁰ Ntá ch'ín Pablo la ko ch'ín Silas tió k'uaxrjexín sín tí ntōechiso ntá kjuíji sín ntōe tí tjan Lidia. Ntá tió kjuixin sákjuítsjehe sín tí sín kichó ni la kjuínchechéhe sín ntá sákjuíxin sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío. ² A ntá ch'ín Pablo sákjuí ch'án nínko éxí kuēnhen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios. ³ Kjuako ch'án

kíxin tí nkexro Cristo mé t'ichjánxín its'en la ko chr'éxín tsoxechón ch'án ínaá. Ntáchro ch'án kíxin:

—Tí ch'ín Jesús a mé jeheni chrónkaxínni kíxin tsinhínra jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxín kuítekaon itsjé tí sín griego xraxinkaon Dios a la ko kjaxín nchónhya chojni chjin tjetooan kuítekaon. ⁵ A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntia. Ntá kaín sín k'uixité sín la kjuínchexakonhen sín tí sín síin chjasén sín. Ntá itsjé sín k'uixenhen sín ntøe ijnko ch'ín it'in Jasón kjueyá sín ch'ín Pablo la ko ch'ín Silas kíxin tjinkaon sín sáchrókjuíkohe sín tí sín a tí sín t'etooan. ⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuínkánkákjen sín sákjuíko sín tí sín tí síxreé tí chjasin ntiha. Ntaha níinkaon sín k'uèya sín ntáchro sín kíxin:

—Tí sín i mé kjuínchexakonhen chojni kuenté chjasintajni. La ntá ó kjui sín chjasénni ntihi kjaxin. ⁷ La ntá tí ch'ín Jasón a mé kjuanjon ch'án kjuachaxin kíxin tí sín a mé ts'ejó sín ntøe ch'án. Kaín sín titekakonhya sín tí ley kuènte tí ch'ín romano t'etooan. Ntáchro sín kíxin itjen í jnko nkexro antsí má t'etooan, ntá tíha mé Jesús —ichro sín.

⁸ Ntá tió kuínhin kaín tí sín tsíkójnkotsé la ko tí síxreé ntá k'uixité sín kónínkaon sín. ⁹ Ntá ch'ín Jasón la ko tí sín tjejóko ch'án kjuenká sín ntá tí síxreé kuítóhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kíchó ni mé ichr'án sín ch'ín Pablo la ko ch'ín Silas kíxin sátsji sín chjasin Berea. Ntá tió kjuíji sín ntaha k'uixenhen sín tí nínkoé tí sín judío. ¹¹ A ntá tí sín judío ntiha la antsí má jína asén sín, ntá tí sín chjasin Tesalónica la náhi. Antsí má kóxrjínhin sín tsinhin sín tí itén Dios la jnkójnko yaon kjuínchekuáxin sín tí xroon chóna itén Dios kíxin tsonohe sín á chaxín ntoá xíkaha tí ntáchro tí sín a. ¹² Méxra nchónhya tí jehe sín kuítekaon sín la ko kjaxín nchónhya tí chojni chjin griego tjetooan mé kuítekaon la ko kjaxín tí chojni ntoa. ¹³ A ntá tí sín judío chjasin Tesalónica kónohe sín kíxin ch'ín Pablo mé kjuakoxin itén Dios chjasin Berea ínaá. Ntá sákjuí sín ntiha a ntá kjuínchekóninkaon tí sín a. ¹⁴ A ntá tí sín kíchó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítóhe sín tí chjasin Berea. ¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kíxin k'uetooan ch'ín Pablo kíxin tsochronka sín kíxin tjoka chrókóxakonhen tí ch'ín Silas la ko tí ch'ín Timoteo tsijji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kíxin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kíxin k'uíkon ch'án kíxin tí chjasin ntiha síin nchónhya tí nkehe tsíkjanoya. ¹⁷ Ntá tí nínko ntiha kjuakøhe ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakøexín ch'án tí chojni síin ntiha. ¹⁸ La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankíxin nixjehe sín tí ch'ín Pablo. Iso sín ntáchro sín kíxin:

—¿Nkekuènté kíxin ánta tjenixja tí nkexro a?

La í so sín ntáchro sín kíxin:

—Méxra tjenixja ch'án kuènte í jnko dios.

Mé xíkaha ichro sín kíxin kjuako ch'ín Pablo tí tán jína kuènte Jesús la ko kjuako ch'án kíxin Jesús kjónté k'uén ntá xechón. ¹⁹ Ntá sákjuíko sín ch'ín Pablo ijnko tjo it'in Areópago. Ntiha mé kuènen sín tójnkotsé sín kíxin tjenkayáxixín sín. Ntá nixjehe sín tí ch'ín Pablo, ntáchro sín kíxin:

—Tjinkaonni tsochronka tí nkehe nixin kjuíkoa. ²⁰ Itsjé tí nkehe ókjé tjetjækua la tjinkaonni tsonoheni nkehe t'axrjéxín kaín tíha —ichro sín.

²¹ Ntá kaín tí sín chjasin Atenas la ko tí sín tsíkji_xín ókjé tjejó ntiha mé tóxrjénhya sín í jnko xra, jehí tóxrjín_hín sín chrókuinhin sín la ko chrónixja sín ijnko nkehe n_ixin.

²² Ntá ch'ín Pablo k'uínkatjen ch'án kjuák'exín toté ch'án tí siín tí jehe sín chrítaón tí Tjo Areópago. Ntá ntáchro ch'án kixin:

—Jahará tjejorá chjasin Atenas tinhínrá. Janhan ó k'uíquān kixin jahará la itsjé dios tinkachónkirá. ²³ Ntá tí kjuak'é ntiha k'uájia la k'uíquān itsjé tí nketí tjásixínrá culto ntá k'uitja ijnko altar ts'ínixín kixin: “Ntihi xraxinkakonxinni ijnko Dios naxa chónhyani”. Méxra tí Dios xráxinkáonrá kjónté naxa chonhyará mé tí Dios a mé tjákoará.

²⁴ Tí Dios mé kjuíchéna ch'án chjasintajni la ko kaín nkehe siín chjasintajni. Jehe ch'án mé ñché nkajní la ko chjasintajni. La tjexenhya ch'án ijnko n_inko tsíkji_h'énaxín chojni tja. ²⁵ La t'ichjánxienhya ch'án kixin chojni chrókjuinkitsa tí jehe ch'án kixin jehe ch'án mé chjéhe kjuachón kaín chojni la ko tjanjon ch'án x_rintō la ko kaín nkehe siín.

²⁶ Kaín tí nación k'uaxrjeníxin jnkokoá chojni kixin chrók'uejó sín nkuíxín chjasintajni. Kjaxin chrónka Dios nkesá la ko nketí ts'ejó chojni. ²⁷ Méxra jeheni t'ichjánxín tsjeyáni Dios kixin ntá tsienxinni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án. ²⁸ Jehe ch'án tjejóchónxinni ch'án la ko nchekinkíni ch'án la jehe ch'án t'ayakonhenni ch'án. Mé xikaha tsintáchro jnko ch'ín chjasánrá ósé kixin: “Jeheni mé naxa kjéhya Dios.” ²⁹ Jeheni mé naxa kjéhyani Dios méxra xitjahya tsjenkayáxinni kixin sich'énani Dios chica oro o chica plata o xro kixin éxí tsíkjenkayáxin chojni kixin sich'éna sín dios kuènte sín. ³⁰ Senó Dios kónínkakhonhya ch'án kixin ó nohe ch'án kixin naxa chónhya sín ch'án. Ntá ijie t'etuenhen Dios kaín xín chojni siín chjasintajni tsokjan sín la tsinkáchónki sín tí jehe ch'án. ³¹ Dios tsíkjejá ijnko yaon sinchekitoexín ijje chojni chjasintajni. Tsíkjejá ch'án ijnko chojni la kjuakoxín kaín kjuachaxin kixin tí nkexro kjónté tsík'en la xechón ínaá —ichro ch'ín Pablo.

³² Na ntá tió kuínhin sín kixin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kixin:

—Chr'éxín tsinhinni ínaá tí nkehe ntáchrúa —ichro sín.

³³ Ntá ch'ín Pablo kuítóhe ch'án tí jehe sín. ³⁴ Na ntá iso sín kjuíchréhe sín ch'ín Pablo la kjuankíxin tinkáchónki sín ñchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitoexín ijje chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankíxin sín tinkáchónki sín ñchéni.

18

Sákjuí ch'ín Pablo chjasin Corinto

¹ Ntá kjuixin tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto. ² Ntiha mé xéta ch'án ijnko ch'ín judío it'in Aquila. Jehe ch'án mé tsíkji_xín ch'án estado Ponto la séhya jehe ch'án la ko ichjién ch'án Priscila mé kjuixín sín nación Italia kixin t'ichjánxín ts'axrjexín sín ntiha kixin tí ch'ín t'etoan mé it'in Claudio k'uetōan ch'án kixin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín. ³ Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuítóeko kichó sín kixin jnkokoá sich'e sín tí xra a. ⁴ Ntá jnkojnko tí yaon t'ok'éhe sín sákjuí ch'ín Pablo tí n_inko nixjehe ch'án tí sín judío la ko tí sín jehya judío kixin tjinkaon ch'án kixin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios kixin tsonohe tí sín judío kixin Jesús mé tí nkexro Cristo. ⁶ Ntá tí sín judío mé kjuankíxin kónínkakhonhen sín tí ch'ín Pablo la imá k'uántaxín_hín sín ch'án. Ntá jehe ch'án k'ótsjènka ch'án iké ch'án kixin kjuakoxín ch'án kixin xikaha tsjasóte sín. Ntá ntáchro ch'án kixin:

—A ntá ijie la jahará kjuéyará tí jie ts'itjáyanxínrá. A ntá janhan la í chontahya jie kixin ó kjuákoḥará tí tán jína, a ntá kuítékákonhyará. A ntá ijie la íchá jína sátsjia tsjákoḥa tí sín jehya judío —ichro ch'án.

⁷ Ntá k'uaxrjexín ch'án nínko ntá sákjuí ch'án ntoe ijnko chojni mé it'in Justo mé jehe ch'án xraxinkaon ch'án Dios. Ntoe ch'án mé chjinaxón nínko. ⁸ Ntá ch'ín Crispo, ijnko nkexro t'etoan kuènte nínko, la ko kaín tí sín tjejó ntoe ch'án, mé kjuankíxin sín kuítekaon sín Ìnchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuankíxin sín kuítekaon sín Ìnchéni la kuíkite sín. ⁹ Ntá ijnko tie titàya k'uíkuèn ch'ín Pablo Ìnchéni nixjehe ch'án ntáchro kixin:

—Chrakonhya tjákua itan kuèntana. Tjtoéhya tsochronka ¹⁰ kixin janhan tjejóko kichó ni kixin ninkexró kohya nkehe sit'aha. Kixin janhan la chonta itsjé chojni tí chjasin ntihi tinkáchónki tí janhan.

¹¹ Méxra ch'ín Pablo mé kuítóhe ch'án ijnko nánó ko t'ò ntiha chjasin Corinto, kjuákoḥe ch'án sín itén Dios.

¹² A ntá tí yaon k'ueṭoan ch'ín Galión estado Acaya, ntá itsjé tí sín judío kónínkakonhen sín tí ch'ín Pablo. Ntá itsé sín ch'án sákjuíko sín ch'án tí tjejó tí sín t'etoan. ¹³ A ntá ntáche sín tí ch'ín t'etoan kixin:

—A ntá tí nkexro i ixri ch'án tjachroe ch'án chojni kixin ókjé nkexrí chrókuinkáchónki sín Dios la ko tsitekakonhya sín tí nkehe t'etoan tí ley.

¹⁴ Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kixin:

—Tí chaxín ijnko jie jie kjuasin tí ch'ín i ntá kjónté chrókuínhan tí nkehe ntáchrórá jahará judiorá. ¹⁵ A ntá jehí tjanjonxinrá tí nkehe nixjará la ko ihnié chojni la ko tí ley tinkáchónkirá. Méxra jahórá chrókjuínchekitoexínrá tíha kixin janhan tjínkakonhya ts'óna juez sintakitoaxian kuènte tí nkehe a —ichro ch'án.

¹⁶ Ntá k'ueṭoan ch'án kixin sátsjixín sín ntiha. ¹⁷ Ntá tí sín griego la kónínkaon sín la itsé sín tí ch'ín Sóstenes tí ch'ín t'etoan kuènte tí nínko judío, la ntahó kjuatexín sín ch'án. Jehe ch'ín Galión a la mé kjónté k'uíkon ch'án la ántosén ch'án.

Ch'ín Pablo xíkjan ch'án chjasin Antioquía ntá sákjuí ch'án nixin viaje

¹⁸ A ntá ch'ín Pablo kuítóhe ch'án chjasin Corinto itsjé yaon ntá nixjehe ch'án tí sín kichó ni ntiha ntá k'uíxenhén ch'án ntabárcṵ sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxa k'uíxenhya ch'án ntabárcṵ inaá la ikjín ch'án mòloé kixin xíkaha kjuákoḥín ch'án kixin kjuínchexiteyá ch'án tí nkehe chrónka ch'án. ¹⁹ Ntá tió kjuíji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sín judío tsíkójnksé ntiha. ²⁰ Ntá jehe sín chrónòda sín kixin chrókuítóhe ch'án isé ntiha, kjánchó jehe ch'án la chrohya ch'án. ²¹ Ntá tuénxín nixjehe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjaha tí jahará tí naxa tjinkaon Dios —ichro ch'án.

Ntá kuítóhe ch'án sín ntá k'uíxenhén ch'án ntabárcṵ sákjuíxin ch'án chjasin Éfeso. ²² Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Ìnchéni ntiha. Ntá tuénxín xíkjan ch'án chjasin Antioquía. ²³ Ntá kuítóhe ch'án ntiha itsjé yaon ntá xíkji ch'án inaá ntá xík'atsínka ch'án itsjé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ijnko ch'ín judío it'in Apolos ikui chjasin Éfeso mé tsíkjiixin ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios. ²⁵ Jehe ch'án ó xraḥe ch'án ntje Ìnchéni ntá imá tóxrjínhin ch'án nixja ch'án la ko tsjako jína kuènte ch'ín Jesús. Kjánchó jehó nohe ch'án nkexrí kuíkite chojni

ch'ín Juan. ²⁶ A ntá ch'ín Apolos kjuák'e ch'án kjuako ch'án tí n̄nko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naxa noehya ch'án kuente ntje Dios. ²⁷ Ntá tjinkaon ch'ín Apolos sátsji ch'án estado Acaya. Ntá tí sín kíchó ni kjuínkítsa sín ch'án la ikjin sín ijnko xroon chr'énhen sín tí sín tinkáchónki Ìnchéni tjejó ntiha kixin jína tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohe ch'án tí sín tsíkinkítsa Dios tsíkitekaon sín ch'án. ²⁸ Ntá kjuakoexín ch'án kaín chojni kixin ntoáhya ch'e tí sín judío, la xitjahya tsontácho sín náhi. Kjuakohe ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxa itjen ch'ín Apolos tí chjasin Corinto ntá ch'ín Pablo k'uatsínka ch'án nchónhya chjasin chrík'á jna la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios. ² Ntá kjuanchankíhi ch'án sín kixin:

—¿Á k'uayéherá Nchakuen Dios tió kuinkachónkirá Ìnchéni? —ichro ch'án.

Ntá kjuátehe sín kixin:

—Náhi, kienhyani á tjen Nchakuen Dios —ichro sín.

³ Ntá kjuanchankí ch'ín Pablo kixin:

—¿Nkexro kjuachaxiэн kuíkitiará? —ichro ch'án.

Ntá kjuátehe sín kixin:

—Éxí kjuako ch'ín Juan kuíkiteni —ichro sín.

⁴ Ntá ntácho ch'ín Pablo kixin:

—Ch'ín Juan mé kuíkite ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhin sín xikaha ntá kuíkite sín kjuachaxiэн ihnié Ìnchéni Jesús. ⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uáyéhe sín ntá kjuankixin sín nixja sín itsjé nkiva ókjé la ko kjuankixin sín kjuako sín tí nkehe kjuanjon Dios. ⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án n̄nko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuente Dios. ⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jína kuente Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoexín ch'án kaín yaon. ¹⁰ Mé xikaha kjuák'e ch'án kjuako ch'án iyó nánó, ntá kaín tí sín k'uéjó ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío. ¹¹ Ntá Dios antsí má kjuakoexín kjuaxroan jié kixin tí nixja ch'ín Pablo. ¹² Ntá itsjé chojni kjuikao sín pañitoé sín la ko iké sín kuákóxin ch'ín Pablo ntá sákjuiko sín kjuínchekakóxin sín tí sín níhi ntá kuítohe sín jína la ko kjaxin nchakuen tí jínahya k'uaxrjexín tí jehe sín.

¹³ A ntá iso tí sín judío ixri sín ntácho sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxiэн ihnié Jesús. La ntá ntáche sín tí nchakuen tí jínahya kixin:

—Kjuachaxiэн ihnié tí Jesús tjako tí ch'ín Pablo t'etoanxínni kixin jaha nchakuen jínahya sátjixian ntihi —ichro sín.

¹⁴ Mé xikaha k'uékjich'e tí yato xjeen ijnko ch'ín judío it'in Esceva mé ijnko nchát'á t'etoan. ¹⁵ Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntácho kixin:

—Chóxinni nkexro ch'ín Jesús la ko ó noheni nkexro ch'ín Pablo. A ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuíncheníhi ch'án kaín sín la imá kjoté sín. Ntá k'uaxrjexín sín ntøe sín tjóhín sín la ko síchrít'ø cuérpøé sín. ¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsíkónhen la imá chrakon sín. Imá jié tí kjuachaxin ihnié Ìnchéni Jesús, ichro sín.

¹⁸ Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya. ¹⁹ Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xra ntá kjuaka sín tí libro a la k'uíkon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín. ²⁰ Ntá tí itén Ìnchéni sítinkák'ánkí la tjakoxin kixin chaxín chóna kjuachaxin.

²¹ Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma. ²² Ntá ichr'án ch'án iyó tí sín tjinkítsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuítóhe ch'án estado Asia iso yaon.

Kónínkaon k'uixité chojni chjasin Éfeso

²³ Ntá itsjé chojni chjasin Éfeso kónínkaon sín la k'uixité sín kixin kóxrjienhya sín tí itén Ìnchéni. ²⁴ Kixin ntiha mé itjen ijnko ch'ín it'in ch'án Demetrio. Kjuích'éna ch'án nkehe chica plata tsjehe éxí nínko kuènte tí dios Diana la nchónhya chichaon kjuacha ch'án la ko tí sín kjuích'eko ch'án xra. ²⁵ Ntá kójnkotséko sín í so sín jnkokón tí xra ch'e sín. Ntá ntáchro ch'án kixin:

—Jahará nohará kixin tí xra ch'eni la tjachani jína la náxrjón tjejóni. ²⁶ Kjánchó ó k'uíkonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsíkjanøya mé jehya Dios. Kjánchó jehya chjasin Éfeso ó. Náhí, nkuíxín estado Asia kuítekaon chojni. ²⁷ Imá tóxakonhenni kixin tí xra ch'eni ts'itjáyan la kjaxin tóxakonhenni tsontáchro sín kixin chónkó tí nínkøe tí dios Diana imá jié la ko ts'itjáyan tí kjuachaxin kuènte tjan. Ntá í tsitekakonhya sín tí kjuachaxin kuènte tjan nkuíxín estado Asia la ko kuenté chjasintajni —ichro ch'ín Demetrio.

²⁸ Ntá tí kuínhin sín xíkaha la imá kónínkaon sín ntá k'uèya sín ntáchro sín kixin:

—Ts'itjáyanhya tí dios Diana kuènte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'ín Gayo la ko tí ch'ín Aristarco mé iyó sín tsíkjiixin sín Macedonia. Ntá kuínkánkákjen sín kuikao sín tí nchia jié tójnkotséxin sín xráxín. ³⁰ Ntá ch'ín Pablo tjínkaon ch'án chrók'uixenhen ch'án tí nchia kixin tsonixjehe ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a. ³¹ Kjaxin iso tí síxreé kuènte tí estado Asia mé chóxin sín ch'ín Pablo, ntá k'uetoan sín kixin tsochénta chojni tí ch'ín Pablo kixin chrókjuiatéhya ch'án tí síin sín ntiha. ³² A ntá iso tí sín tsíkójnkotsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xra tsíkójnkotséxin sín kixin nínkaon sín. ³³ La iso sín judío chénka sín ijnko ch'ín it'in Alejandro nkerí xra kjuixin sín kixin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kixin tsotání sín ntá tsonixjaxin ch'án tí sín judío tsinhin kaín chojni. ³⁴ Ntá tió kjuátsoan tí sín tsíkójnkotsé kixin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyanhya tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uetoan ch'án tsotání sín. Ntá ntáchro ch'án kixin:

—Chojni chjasén Éfeso tinhínra. Kuenté chjasintajni nohe sín kixin tí sín chjasin ntihi mé t'ayakonhen sín tí ninko kuènte tí dios Diana. Tí retrato kuènte tjan mé tsíkixín nkaya nkajíní. ³⁶ Kohya nkexro tsochtácho kixin chaxínhya tíha. Méxra tánírá. Tjenkayáxinrá jína nkehe chrókjuich'erá. ³⁷ Jahará kjuíkoará tí sín a ntihi la kjánchó k'uántaxíenhya sín tí ninkoeni la ko k'uántaxíenhya sín tí tjan santo kuénténi. ³⁸ Méxra ch'ín Demetrio la ko tí sín ch'eko ch'án xra la tí tjanchia sín jie jnkójín nkexro la síin juez sinchekitoexín. Méxra tsochrónka sín tí tjan tí ch'ín juez kixin jnkójnko sín la chrókuitoexín tí jie chóna sín. ³⁹ Ntá tí síin ijnko nkehe tsjanchará ntá t'ichjánxin tsojnkotsérá la ntoá chrókuitoexín. ⁴⁰ Tóxakonhenni kixin kjá tí sín t'etoan ts'ekani sín jie kixin jehya jína k'uíxiténi kónínkaonni. Noehyani nkehe tsjateheni kixin tí tsjanchankí sín nkekuènte k'uíxiténi, tsixro sín.

⁴¹ La ntá k'uetoan ch'án kixin sátsji sín kixin ó kjuixin tí kójnkotsé sín.

20

Sátsji ch'ín Pablo estado Macedonia la ko estado Grecia

¹ Ntá tí kjuixin k'uíxité sín, a ntá ch'ín Pablo k'uíyehé kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjehé kichó sín ntá sáxíkji ch'án nó estado Macedonia. ² Ntá nkuíxín k'uatsínka ch'án la kjuínchechéhe ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuíji ch'án estado Grecia. ³ Ntiha kuítóhe ch'án iní nitjó ntá chrók'uixenhen ch'án ijnko ntabáro ntá sáchrókjuí ch'án estado Siria. Ntá kónohe ch'án kixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia. ⁴ Ntá tí sín sákjuíko ch'ín Pablo mé tí ch'ín Sópater mé jehe ch'án tsíkixín ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkixín sín chjasin Tesalónica, la ko ch'ín Gayo tsíkixín ch'án chjasin Derbe, la ko kjaxin sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkixín sín estado Asia. ⁵ Ntá tí sín kichó ni a mé kuítónxin sín ntja ntá tjejóchónhen sín tí jeheni chjasin Troas. ⁶ Kjuixin k'uátsínka tí kia tió kjóne sín niotja chónahya tí xroan t'ánkixin niotja, ntá k'uixenheni ijnko ntabáro k'uaxrjexínni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuítónxin sín ntja. A ntá ntiha kuítóheni yato yaon.

Ch'ín Pablo sákjuí chjasin Troas

⁷ Ntá tí yaon xrankíxín semana ntá kójnkotséni kixin tsochrít'o niotja tsoxraxinkakonxínni Ìnchéni. Ntá ch'ín Pablo nixjehé ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxin, ntá antsí má sé tí nkehe chrónka ch'án la naxa tjenixja ch'án k'áxrótjen. ⁸ Tí tsíkójnkotsé sín a mé ijnko piso noi la ntiha mé síche nchónhya xrohi. ⁹ Ntá ntiha itjen ijnko ch'ín ntasoá it'in ch'án Eutico mé tjetjaxín ch'án chrítaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkíhi ch'án kotáchrin. A ntá xrínahya tsík'ajua ch'án ntá tsík'anótjenxin ch'án tí ventana tí níxin piso ntiha ntá sákjuíkatsen sín ch'án la ó tsíkixín tsík'en ch'án. ¹⁰ Ntá ch'ín Pablo k'uínkajin ch'án ntá kjuítsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kichó ni kixin:

—Chrakonhyará tsík'enhya ch'án, tjechón ch'án —ichro ch'an.

¹¹ Ntá ch'ín Pablo k'ujit'ótjen ch'án inaá tí k'uínkajinxín ch'án kixin ntiha ts'óxikayehé ch'án niotja sine sín tsoxraxinkakonxín sín Ìnchéni. Ntá naxa tjenixja ch'án hasta k'uínkaséyan a ntá sákjuí ch'án. ¹² Ntá tí ch'ín ntasoá tsík'anótjen sákjuíko sín la tjechón ch'án kohya nkehe xéhe ch'án ntá kaín sín imá kóchéhe sín.

Sákjuíxin ch'ín Pablo chjasin Troas kjuíji ch'án chjasin Mileto

¹³ Jeheni mé kuítónxinni ntja saoxín la k'uixenhenni ijnko ntabárco sákjuíni nó chjasin Asón kixin ntiha tsoxetani ch'ín Pablo éxí tsíntáchro ch'án kixin tjinkaon ch'án sátsjixín ch'án toté ch'án ntiha. ¹⁴ Ntá ó xetani tí jehe ch'án chjasin Asón ntá k'uixenhenni ch'án tí ntabárco kjaxin ch'án ntá sákjuíkoni ch'án nó chjasin Mitilene. ¹⁵ Ntá tí sákjuixinni ntiha ntá tí yaon chr'éxín ntá k'uátsínkani estado Quío ntá tí yaon chr'éxín kjuíjini chjasin Samos. Ntá ínaá k'uixenhenni tí ntabárco ntá sákjuíni chjasin Trogilio ntá ntiha k'ok'éheni. Ntá xík'ixenhenni ntabárco ínaá ntá tí yaon chr'éxín kjuíjini chjasin Mileto. ¹⁶ Mé xíkaha kjuích'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuiji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

Nixjehe ch'ín Pablo tí sín t'etuēhen ninko chjasin Éfeso

¹⁷ Tí itjen ch'ín Pablo tí chjasin Mileto k'uíyehē ch'án tí sín t'etuēhen tí ninko chjasin Éfeso. ¹⁸ Ntá tió kui sín ntá ntáchro ch'án kixin:

—Tí jahará la ó nohará nkexrí kjuak'é la ko kjuàkua desde tí yaon xrankíxixín k'uinka estado Asia. ¹⁹ Ó nohará kixin kaín tí yaon k'uejóni la kaín asenná kjuít'ahā xrā Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyánna sín. ²⁰ Janhan la kuitoahya kjuàkua kaín tí nkehe jína t'ichjánxín tsonohará. Mé xíkaha kjuàkua tió kójnkotsérá la ko xíkaha kjuíkjàkuaxian jnkojnko ntoará. ²¹ Kjuákoḥā kaín chojni judío la ko kaín chojni jehya judío kixin t'ichjánxín tsítóhe sín tí jie tjasin sín la ko tsitekaon sín Dios la ko Ìnchéni Jesucristo. ²² Ntá ijie sátsjiyá chjasin Jerusalén kixin Nchakuen Dios k'uetuanna la í nonahya nkehe tsonna ntiha. ²³ Ntá jehó nòna kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena. ²⁴ Kaín tíha la tóxakonahya. Kjonté chrókjuasótexián la ninkehó sínkíhyana la janhan la chàḅā kixin tí xrā chonta la chrókjuintaxín la chrókjuintaxiteyá tí xrā chjina Ìnchéni Jesús kixin tsjàkua tí tan jína nkexrí tjuèhe Dios chojni.

²⁵ 'Ntá jie ó nòna kixin tí jahará kjuákohará kjuachaxin kuènte Dios la nijnkora ts'ikonhyará tí janhan ínaá. ²⁶ Méxrā tinhínrá ijie kixin í jehya jiēna kixin jnkojínrá chrók'uitjāyanrá. ²⁷ Kixin ó kjuàkua kaín tí nkehe tjinkaon Dios kixin tsonohará la í t'itjāyanhya ninkehó. ²⁸ Méxrā xráxinkáonrá ts'ejorá jnkojína la ts'ayakonhénrá kaín tí sín tinkáchónki Ìnchéni kixin Nchakuen Dios mé tjáhará tí xrā pastor kixin ts'ayakonhénrá tí sín kuènte tí ninkoe ch'án k'uenaxín ch'án tí ijnié ch'án. ²⁹ Ó nòna tió sátsjia ntá itsji í so chojni éxí kolóbo jiehe tsojtinkaon sinchek'itjāyan tí sín tinkáchónki Ìnchéni. ³⁰ La ntá kjonté jahará la isorá tjejorá ntihi tsjankíxínrá tsjākorá kjuach'ia chrínki chrókjuákohérá kichuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya. ³¹ Méxrā chróxráxinkáonrá kixin chjina iní nánó kjuak'é kjuákohará nchakotjin la ko tie la kuitoahya kjuíntaxraxinkávan hasta kjuíncheníhi asenná nixjahará jnkojnko tí jahará.

³² 'A nta jie la jahará kichó ni tjetjāncháḥā Dios kixin t'ayakuanxínrá ch'án tí itén ch'án kixin tjuahará ch'án. Jehe ch'án imá chóna kjuachaxin tsjinkítsará ntá ts'ayéherá kaín tí nkehe tjinkaon ch'án tsochjéhe ch'án kaín tí chojni tsíkótjóa. ³³ Janhan mé kjuakéhya asenná chichakoen chojni o iké jnkojín chojni. ³⁴ Náhí. Jahará ó nohará jína kixin janhan na mé tjaná kjuít'axián xrā kjuácha k'uenaxín tí nkehe t'ichjánxínna la ko kjaxin tí nkehe t'ichjánxínhin tí chojni k'uejókian. ³⁵ Méxrā kjuàkuaxínrá xíkaha sích'erá xrā kixin jína tsjinkítsará tí chojni chóntahya. Xráxinkáonrá kixin tsíntáchro Ìnchéni Jesús kixin: “Antsí tsochéheni kixin tí nkehe chrókjuanjoni, a ntá kánhyó tsochéheni kixin tí nkehe chrók'uáyéheni.”

³⁶ Ntá kjuixín ntáchro ch'ín Pablo xíkaha ntá jehe ch'an la ko kaín sín k'uejóxín toch'in sín ntá nixjehe sín Dios. ³⁷ Ntá kaín sín tsjanka sín la ko kjóa sín ch'án la ko tséhe sín

tja ch'an. ³⁸ Imá k'uává sín kixin chrónka ch'án kixin í ts'ikonhya sín ch'án inaá. Ntá sákjuíkotoxin sín ch'án nó tí tjen tí ntabárcō sátsjiko ch'án.

21

Sákjuí tí ch'ín Pablo nó chjasin Jerusalén

¹ A ntá tió kuítóheni tí sín kichó ni ntá k'uixenhenni ntabárcō la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara. ² Tí chjasin Pátara la mé ntiha k'uitjani ijnko ntabárcō sátsji nó estado Fenicia. Ntá k'uixenhenni tí ntabárcō a ntá sákjuíni. ³ Ntá tió k'uátsínkani la k'uíkoni tí nonte Chipre itjani ikjon kuítóhe ntá k'uatsínkani estado Siria. Ntá tí ntabárcō la ts'atsínka tsítóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a. ⁴ Ntá ntiha k'uitjani tí sín tinkáchónki Ìnchéni a ntá ntiha kuítóhekoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'ín Pablo kixin sáchrókjuihya ch'án chjasin Jerusalén. ⁵ Ntá kjuixin k'uátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíkotoxiníni tí k'uaxrjentani ikon chjasin ntá sákjuíni chrínta ntayaon. K'uéjóxinni toch'inni nixjeheni Dios ⁶ ntá tuénxín nixjeheni sín jnkójina ntá tséhe tja kichó ni. Ntá k'uixenhenni tí ntabárcō, a ntá jehe sín ikjan sín ntoe sín.

⁷ Ntahó chjasin Tiro kjuixixín tí k'uixenhenni tí ntabárcō ntá kjuíjini chjasin Tolemaida. Ntiha kjuínixjeheni tí sín kichó ni tinkáchónki Ìnchéni. Ntá ntiha k'uéjókoni sín ijnko yaon. ⁸ Ntá tí yaon chr'éxin sákjuíxinni ntiha ntá kjuíjini chjasin Cesarea. Ntá ntiha sákjuíni ntoe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yatōxin tjinkítsa tí sín kjueya Ìnchéni. A ntá jeheni mé kuítóheni ntiha. ⁹ Tí ch'ín Felipe a mé chónka ch'án noó xjeen ch'án chjin naxa tóteehya sín. Tí xjeen ch'án a mé chrónkaxín sín tí itén Dios. ¹⁰ Ntá ntaha k'uéjókoni sín itsjé yaon ntá ikjui ijnko ch'ín nixja itén Dios it'in Agabo, tsíkjixin ch'án estado Judea. ¹¹ Ikjui ch'án kjuinixjehé ch'án tí jeheni la ntá kuákja ch'án tí tjoa t'ínkat'óxin ch'ín Pablo na ntá kjuínchentetoxín toté ch'án la ko itja ch'án ntá ntáchro ch'án kixin:

—Tí Nchakuen Dios mé ntáchro kixin mé xíkaha chjasin Jerusalén tí sín judío sinchenteto sín ìché tí tjoa sinchek'áyehé sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónóeheni tí ch'ín Pablo kixin sáchrókjuihya ch'án tí chjasin Jerusalén. ¹³ Ntá kjuátehe ch'ín Pablo kixin:

—¿Nkekuènté tsjankará la ko nkekuènté nchek'áváráni? Janhan na chrakonhya kjónté jehya tí sinchentetona sín ó. Náhi. Kjónté kjaxin chrók'uénxian chjasin Jerusalén tí tinkáchónkia Ìnchéni —ichro ch'án.

¹⁴ Ntá kjuachahyani nixjeheni ch'án ntá kuítóheni ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén. ¹⁶ Ntá sákjuíkoni iso tí sín tinkáchónki Ìnchéni tsíkjixin chjasin Cesarea. Sákjuíkoni sín ntoe ijnko ch'ín tsíkjixin Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kuítóheni.

Ch'ín Pablo sákjuítsjehe tí ch'ín Jacobo

¹⁷ Tió kjuíjini chjasin Jerusalén ntá tí sín kichó ni tinkáchónki Ìnchéni mé kjuanjon sín kjuachaxin k'uéjóni la chéhe sín. ¹⁸ Ntá tí yaon chr'éxin ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etōan kuènte nínko. ¹⁹ Ntá ch'ín Pablo kjuixin nixjehé ch'án sín ntá tuénxín chrónka ch'án kaín tí xra kjuích'e Dios tió kjuakōhe ch'án tí sín jehya sín judío. ²⁰ Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kíchóni, jaha k'uíkuan kixin siín itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxin tsítøehyani tí ley. ²¹ Ntá tsíkinhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uøtoan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxí k'uékinkáchónkini ósé. ²² ¿Ntá nkehe chrókjuich'eni? Kixin tió tsinhin sín kixin kjuihá la tsojnkotsé nchónhya sín. ²³ Méxra íchá jína jaha sinchexiteyá tíhi. Ntihi tjejó noó sín t'ichjánxin sinchexiteyá sín tí nkehe chénka sín Dios. ²⁴ Jaha sáchrókjuíkoa sín la chrókótjóá jaha la ko jehe sín. La ko kjaxin chrókjuènka tsokjín sín ntá tsoñoexín tí sín judío kixin chaxínhya tí nkehe tsíkinhin sín la ko tsoñoexín sín kixin kjaxian jaha nchexiteyéhé tí ley. ²⁵ A ntá tí sín jehya judío tsíkitekaon Inchéni la ikjinni ijnko xroon ó chr'énhenni sín. K'uøtuønhenni sín kixin sinehya sín tí nto tsíkjokehe chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí ninko

²⁶ Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóá asén sín. Ntá kjuixin ntá k'uíxehen ch'án tí ninko kixin tsochrónka ch'án kixin ó kjuixin kjuínchexiteyá ch'an tí nkehe k'uítuenhen ch'án. Tíhi mé t'axrjexín kixin jnkojnko sín tsjikaó sín nkehe tsjanjon sín.

²⁷ Ó chjina chróxétja tí yato yaon ntá iso tí sín judío tsíkjiixin estado Asia mé tsík'ikon sín ch'ín Pablo nkaxenhen tí ninko. Ntá kjuínchekónínkaon sín kaín chojni chjasin ntiha ntá itsé sín tí ch'ín Pablo. ²⁸ Ntá k'uèya sín ntáchro sín kixin:

—Kaínrá chojni chjasin Israel tsjínkítasaráni kixin tsotséni tí ch'ín i. Jehe ch'án mé ixri nkuíxín xritjakøhe ch'án chojni nkehe jehya jína kuènte chjaséni, la ko titekakonhya ch'án tí ley kuènte Moisés, la ko titekakonhya ch'án ninkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí ninko tjóá —ichro sín.

²⁹ Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkjiixin chjasín Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen ninko.

³⁰ Ntá kuenté tí chjasin a kónínkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkákjenxín sín ch'án nkaxenhen ninko la kuakitsje sín ch'án ntója ntá tuénxín k'uíkjehe sín tí puerta ninko. ³¹ Ntá tjinkaon sín chrók'óyán sín ch'án ntá ijnko ch'ín comandante k'uøtuønhen itsjé tí sín soldado romano kuínhin ch'án kixin kuenté tí chjasin Jerusalén k'uíxité nínkaon sín. ³² Ntá tí ch'ín comandante sákjuíko ch'án iso sín soldado la ko tí sín k'uøtuønhen tí soldado a la kuinká sín sákjuí sín tí siín tí chojni. Ntá tió k'uíkon tí sín a kixin ó kjuíji tí ch'ín comandante la ko tí sín soldado a ntá kuítøhe sín, í kjuatehya sín ch'ín Pablo. ³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uøtoan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án. ³⁴ A ntá tí chojni tsíkójnksé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuènte xikaha kjuích'e sín kixin k'uíxité sín. Ntá k'uøtoan ch'án kixin tí sín soldado sátsjiko sín tí ch'ín Pablo tí cuartel siín tí sín soldado. ³⁵ La ntá tió kjuíjiko sín ch'án tí t'it'ótjenxin sín tí nchia a ntá t'ichjánxin kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín. ³⁶ Kaín tí chojni chréhe nóton t'èya sín ntáchro sín kixin:

—Chrók'uen ch'án —ichro sín.

Ch'ín Pablo chrónka nkayakon chojni kixin chóntahya ch'án jie

³⁷ Ntá tió sáchrókjuíko sín ch'ín Pablo tí nkaxenhen tí cuartel kuènte tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jína tsonixjahani jaha intsí? —ichro ch'án.

Ntá kjuátehe tí ch'ín comandante ntáchro ch'án kixin:

—¿Jaha la á noha nixja griego? ³⁸ Méxra ¿á jehya jaha tí chojni tsíkjin Egipto kjuínchenínkaon chojni la ko sákjuíko nteje tí noó mil chojni tsíkjàya? —ichro ch'án.

³⁹ Ntá kjuátehe ch'ín Pablo ntáchro ch'án kixin:

—Náhi, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkjin ijnko chjasin imá tjetóan. A ntá ijie xrjannóaha kixin tsjánjuan kjuachaxin tsonixjahá tí chojni —ichro ch'án.

⁴⁰ Ntá tí ch'ín comandante kjuanjon kjuachaxin ntá ch'ín Pablo kjuák'exín toté ch'án tí tjen escalera ntá tja ch'án ó kjuakoxin ch'án kixin tsotání sín. Ntá tání sín ntá kjuankixin nixjxin ch'án nkiva hebreo. Ntáchro ch'án kixin:

22

¹ —Jahará kichó ni la ko chojni it'é xjan tinhínra nkehe tí tsoxrjanka kixin chontahya jie —ichro ch'án.

² Ntá kuínhin sín kixin nixjxin ch'án nkiva hebreo ntá antsí má tání sín. Ntá ntáchro ch'ín Pablo inaá kixin:

³ —Janhan mé ijnko chojni judío tsíkokjínaxián chjasin Tarso estado Cilicia. K'uankixian ntihi chjasin Jerusalén la kjuintakuáxian tí nkehe kjuako tí ch'ín Gamaliel la titekavan tí ley tsíkináchónki tí sín tsík'axrjeníxinni ósé. Tjínkavan chrókjuít'aha Dios xra kaín asenná éxí tjinkáonra jahará ch'erá tí yaon ijie. ⁴ Ti senó k'uénínkakonhan chrók'oyán tí sín tinkáchónki Ìnchéni kjuintanteto chojni ntoa la ko chojni chjin kixin chrók'uejóhchina sín. ⁵ A ntá tí sín nchat'á t'etóan la ko kaín tí sín táda t'ayakonhen nínko la mé nohe sín kaín tíha kixin jehe sín mé kjuanjon sín xroon ts'áyéhe tí sín kichó ni judío tjejó chjasin Damasco. Ntá sákjuia nó ntiha kixin chrókjuíkjéyá tí sín tinkáchónki Ìnchéni kixin chrótse sín ntá chrókjuíkian sín ntihi Jerusalén chroklusóte sín.

Ch'ín Pablo chrónka nkexrí kjuankixin tinkáchónki ch'án Ìnchéni

(Hch. 9.1—9; 26.12—18)

⁶ A ntá tió kjuasán chjina chjasin Damasco chjina chonkixin ntá xrínahya k'uinkáséyan jnkontatjén tí tjén ijnko xrohi imá t'inkaséyan kujxin nkajní. ⁷ Ntá kjuachr'ítsinka nonte ntá tuénxín kuínhan itén ijnko nkexro nixjana ntáchro kixin: “Saulo, Saulo, ¿nkekuénté ninkákonna xritjéyá tí janhan?” ⁸ Ntá kjuánchánkiá kixin: “¿Xá nkexro jaha?” Ntá kjuátehe ch'án ntáchro ch'án kixin: “Janhan mé tí nkexro Jesús tsíkjin chjasin Nazaret, mé tí nkexro xritjéyá.” ⁹ La ntá tí sín k'uájikian mé k'uíkon sín tí xrohi la chrakon sín kjánchó kuínnya sín itén tí nkexro nixjana. ¹⁰ Ntá kjuánchánkiá kixin: “¿Xá nkehe tsonhen tjínkavan sít'aha jaha?” Ntá kjuátehe ch'án ntáchro kixin: “T'aya sátjia t'ixenhén chjasin Damasco ntá ntiha tsochrónka sín kaín nkehe sich'e.” ¹¹ Ntá tí xrohi a mé k'uixenka ikuan ntá í xitjahya t'íkuan. Ntá tí sín chríkjan mé kuinkátséna sín sákjuíkian sín chjasin Damasco.

¹² Ntá ntaha kjuák'e ijnko ch'ín it'in Ananías ijnko chojni jína kjuínchexiteyéhe ch'án tí ley kuénte ch'ín Moisés. Kaín tí sín judío siín chjasin Damasco tjikosáyehe sín tí jehe ch'án.

¹³ Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kixin: “Kichóni Saulo, ijie la ts'ayéhé kjuachaxin ts'íkuan inaá.” Ntá ó jína t'íkuan. ¹⁴ Ntá tuénxín ntáchro ch'án inaá kixin: “Tí Dios kuinkáchónki tí sín tsík'axrjeníxinni la ó tsíkjeýá ch'án tí jaha kixin tsonoha nkehe tjínkaon ch'án la ko kixin ts'íkuan tí nkexro jína la ko tsinhín tan k'uaxrjéxín ir'va ch'án. ¹⁵ Jaha mé tsochrónka tí nkehe k'uíkuan la ko tí nkehe kuínhín tsinhín kaín tí chojni chjasintajni. ¹⁶ A ntá jie la í choénnya má. T'aya la tsikitixián ihnié Ìnchéni kixin mé ts'ímáxin ijíá,” ichro ch'ín Ananías.

Pablo chrónka kixin Dios ichr'án ch'án tsjakohé tí sín jehya sín judío

17 'Na ntá tió xíkjan chjasin Jerusalén ntá sákjuia nínko tsonixjaha Dios ntá titàya k'uúkuèn 18 Ìnchéni ntáchro ch'án kixin: “Tjoka ts'axrjéxian chjasin Jerusalén kixin tsitekakuenhya sín tí nkehe tjákua mé tí tan kuèntana.” 19 Ntá janhan ntátjan ch'án kixin: “Ìnchéni, jehe sín ó nohe sín kixin senó k'uék'atsínka kaín tí nínko la k'uétse tí sín tinkáchónki tí jaha la sákjuíkian sín ntóechiso k'uékon sín. 20 Tió k'óyán sín tí ch'ín Esteban tí nkexro k'uékjit'aha xra, k'uénixja tí tan kuènta ntá janhan kjaxin tjéntaxián ntiha la janhan ntáxrjan kixin ó nchóxon its'en ch'án la k'uáyakonhan tí iké tí sín kjuàya.” 21 Ntá Ìnchéni xínixja inaá, ntáchro ch'án kixin: “Tétuanhan jaha kixin sátsjia chjasin kjín kixin tsjákohé tí chojni jehya judío.”

Ntá tí ch'ín comandante k'uáyéhe tí ch'ín Pablo kixin tsjasóte ch'án

22 Ntá tí sín tsíkójnkotsé mé kuínhin sín kaín tíha ntá kjuankixin k'uèya sín ntáchro sín kixin:

—Its'en ch'án, í tsjak'echónhya ch'án —ichro sín.

23 Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín.

24 Ntá tí ch'ín comandante mé k'uetuénhen ch'án tí sín soldado a kixin sátsjiko sín ch'ín Pablo nkaxenhen tí cuartel kuènte sín. Ntá ntiha k'uetóan ch'án kixin tsjatexín sín ch'án chikoté ntá tsonoxín tí ch'ín comandante nkekuènte imá t'óyako sín nínkakonhen sín tí jehe ch'án. 25 Ntá kjuixin kjuínchenteto sín ch'án kixin tsjate sín ch'án ntá nixjéhe ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxa kjuéyáhyará nkerí jie chonta? —ichro ch'án.

26 Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kixin:

—¿Nkehe sich'e jaha kixin tí nkexro i mé ijnko chojni romano?

27 Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátéhe ch'ín Pablo kixin chaxín jehe ch'án.

28 Ntá ntáchro tí ch'ín comandante kixin:

—¿Á ntá nkexrí kixin janhan nchónhya chichaon kjuènká kixin ts'ónana chojni romano?

Á ntá ntáchro ch'ín Pablo kixin:

—Janhan na chojni ntiha tsíkokjínaxián.

29 Na ntá tí sín soldado chrókuate ch'ín Pablo mé kuínhin sín kixin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsíkjinchenteto ch'án.

Ch'ín Pablo nixjéhe ch'án tí sín t'etóan kuènte tí sín judío

30 Á ntá tí kóyaon ntá tí ch'ín comandante a mé tjinkaon ch'án tsonohe ch'án nkehe tí jie chrók'ueka tí sín judío tí ch'ín Pablo. Ntá kjuasintanká ch'án chica cadena tsíchróntetoxín tja tí ch'ín Pablo ntá k'uetóan ch'án kixin tsojnkotsé kaín tí nchat'á t'etóan la ko tí sín t'etóan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí síin tí jehe sín.

23

1 Ntá ch'ín Pablo komá tí sín t'etóan kuènte sín judío ntá ntáchro ch'án kixin:

—Kíchóni, tí k'uékjak'é hasta ijie la Dios tjetsjehe kixin ijnko kjuaxrexinkaon jína chonta —ichro ch'án.

2 Ntá tí ch'ín Ananías tí ch'ín nchat'á t'etóan mé k'uetuénhen ch'án tí sín chjino tjejó tí tjen ch'ín Pablo tsochjéhe sín ir'va ch'án. 3 Ntá kjuátéhe ch'ín Pablo kixin:

—Dios mé sinchekjasóte ti jaha kixin ntoáhya kjuich'e. Tjetjaxian méhe kixin tsjéyá nkehe tí jie chonta éxí nixja tí ley. **A** ntá ¿nkekuènte kuítekákonyha tí ley, la kuétōan kixin ts'ékonna? —ichro ch'án.

⁴ **A** ntá tí sín siín ntiha ntáchro sín kixin:

—¿Á xikaha ts'antaxínhín tí nchāt'á t'etōan kuènte Dios?

⁵ Ntá kjuátehe ch'ín Pablo ntáchro ch'án kixin:

—Kíchóni, kjuatsoanhya janhan kixin jehe ch'án mé tí nchāt'á t'etōan. Ntáchro tí xroon itén Dios kixin: “Chrók'uantaxíenhya tí chojni t'etuenhen chjasán”^{*} —ichro ch'án.

⁶ Ntá ch'ín Pablo mé kónohe ch'án kixin iso chojni siín ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kixin janhan mé tinkachónkia kixin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kichó sín ntá xikaha jnkokónhya kjuenkayáxin tí sín tsíkójnkotsé ntiha. ⁸ Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya nchakuen. **A** ntá tí sín fariseo la titekaon sín kaín tí nkehe a. ⁹ Ntá kaín sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kixin:

—Tí ch'ín i, kohya ninkehó nkehe jínahya kjuich'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kixin chrókjuinckekuen sín tí ch'ín Pablo ntá k'uētuenhen ch'án tí sín soldado a kixin sátsjikakjín sín ch'án la tsíkəo sín ch'án inaá tí cuartel kuènte tí sín soldado.

¹¹ **A** ntá tí tie a na ntá xrínahya titəya k'uikuèn ch'ín Pablo Inchéni nixja ch'án, ntáchro kixin:

—Chrakonhya Pablo kixin éxí chronka tanná chjasin Jerusalén la mé xikaha tsochronka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin **a** ntá iso tí sín judío a mé kjuenkayáxin sín kixin ts'óyán sín tí ch'ín Pablo. Ntá k'uákjenxin sín ihnié Dios chaxín tsoxiteyá la sinehya sín la ko ts'ihya sín ninkehó tí naxə ts'óyánhya sín ch'án. ¹³ Chjina cuarenta sín kjuenkayáxin sín kixin xikaha sich'e sín. ¹⁴ Ntá sákjuichenka sín tí sín nchāt'á t'etōan la ko tí sín t'etuenhen kuènte tí sín judío la ntáche sín kixin:

—K'uákjenxinni ihnié Dios kixin chaxín tsoxiteyá kixin í sinehyani ninkehó tí naxə ts'óyánhyani tí ch'ín Pablo. ¹⁵ Méxra ntá jahará la ko í so ti sín t'etuenhen tí sín judío tsontácherá tí ch'ín comandante a kixin tsjikəo sín tí ch'ín Pablo ntihi tí tjejorá ntóye nchítjen kixin antsí má tsjanchankíhírá ch'án nkehe siná á chaxín tí jie t'íká ch'án. **A** ntá jeheni senó ts'ejóchónhenni tí tsjixin ch'án ntá ts'óyanni ch'án kixin í tsjihya ch'án ntihi —ichro sín.

¹⁶ Ntá tí xjeen tí kjavé tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uíxenhén ch'án cuartel kuènte tí sín soldado kixin tsochronka ch'án nkehe tí tjo sín kuínhin ch'án. ¹⁷ La ntá ch'ín Pablo mé k'uíyehé ch'án ijnko tí sín capitán la ntáchro ch'án kixin:

—Sátsjikoa tí ch'ín ntasoá ti tjen tí ch'ín comandante kixin tjinkaon ch'án tsochronka ch'án nkehe —ichro ch'án.

¹⁸ Ntá tí ch'ín capitán a mé sákjuíko ch'án ti tjen tí ch'ín comandante ntá ntáchro tí ch'ín capitán a kixin:

* 23:5 Éxodo 22.28

—A ntá tí ch'ín Pablo tjechjina mé k'uíyeheni ch'án kixin tsjikaoni tí ch'ín ntasoá ntihi kixin tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochronka? —ichro ch'án.

²⁰ Ntá ntácho tí ch'ín ntasoá a kixin:

—Iso tí sín judío mé kjuenkayáxin sín kixin tsjanchaha sín kixin ntóye nchítjen sátsjiko ch'ín Pablo tí tsojnkotsé tí sín judío t'etōan. Sit'ayaha sín tsonácho sín kixin tjinkaon sín tsjanchankíhi sín ch'ín Pablo tí nkehe antsí má xra. ²¹ A ntá jaha la chrókuítekákonyha kixin chjina cuarenta chojni tjejóchónhen sín imó la k'uákjenxin sín ihnié Dios kixin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsonohe sín nkehe tsixrua jaha —ichro ch'án.

²² A ntá tí ch'ín comandante a mé nixjehe ch'án tí tí ch'ín ntasoá la k'uetoan ch'án kixin:

—Tsochenkahya ninkexró kixin xikaha kjuíchronka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uíyehē ch'án yaá tí sín capitán a ntá k'uetoan ch'án kixin tsoyaxínhin sín sátsjiko sín iyó ciento sín soldado sátsjixín toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án. ²⁴ La ko k'uítuenhen sín sinchekamá sín kokate tsjiták'á ch'ín Pablo la ts'ayakonhen sín ch'án jina kixin kohya nkehe tsonhen kixin tsjiji ch'án tí tjen ch'ín Félix, tí ch'ín gobernador. ²⁵ Ntá tí ch'ín comandante ikjin ch'án ijnko xroon a, ntácho kixin:

²⁶ “Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jina, nixjaha. ²⁷ Tí sín judío a mé itsé sín tí ch'ín i kixin chrók'óyán sín ch'án. Ntá tió kónona kixin ijnko chojni romano tí jehe ch'án la ntá sákjuikian sín soldado kjuintakaá ch'án. ²⁸ Tjinkávan tsonona nkekuente kixin nínkakonhen sín ch'án. Ntá sákjuikian ch'án tí tsikójnksé tí sín judío. ²⁹ Ntá kónoxín kixin nínkakuenxín sín ch'án kixin tí ley kuente sín kjuínchexiteyáhya ch'án, ichro sín. Jehya jie jie tsíkjasin ch'án kixin chrók'óyán sín ch'án o chrókjuak'echjina sín ch'án. ³⁰ Ntá ó kuinhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kixin chrókjuiji sín tí tjen jaha chrókjuá sín kixin nkekuente nínkakonhen sín ch'án. Kjuasáyá. Ó tjen.”

³¹ Ntá tí sín soldado a mé kjuínchexiteyá sín éxí k'uítuenhen sín a ntá sákjuiko sín tí ch'ín Pablo tí tie a chjasin Antípatris. ³² Ntá tí yaon chr'éxin tí sín soldado xrixín toté ó a mé xíkjan sín tí cuartel kuente sín. Ntá tí sín k'uéjókjen kokate a mé naxa sákjuiko sín tí ch'ín Pablo. ³³ Ntá tió kjuíji sín tí chjasin Cesarea ntá tí sín soldado a mé kjuanjon sín tí xroon a chjehe sín tí ch'ín gobernador la ko kjaxin kjuínchek'áyehē sín ch'án tí ch'ín Pablo. ³⁴ Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkjinjín tí ch'ín a. ³⁵ Ntá ntácho ch'án kixin:

—Ntá tsinhan nkehe tsixro tí sín itsji ts'eka jie.

Ntá k'uetoenhen ch'án tí sín soldado a kixin ts'áyakonhen sín tí ch'ín Pablo tí nchia kuente ch'ín Herodes.

24

Ch'ín Pablo nixjehe ch'án ch'ín Félix chrónka ch'án kixin kjuasinhya ch'án jie

¹ Ntá k'uátsínka in'ó yaon, ntá ch'ín Ananías, tí nchat'á imá t'etōan, kjuíji ch'án chjasin Cesarea. Kjaxin kuikao ch'án iso tí sín t'etōan kuente nínko a la ko ijnko ch'ín abogado it'in Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuente ch'ín

Pablo. ² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankíxin ch'án nixjehe ch'án tí ch'ín Félix ntáchro ch'án kíxin:

—Kjuasáyá jaha gobernador kíxin imá kjuínkítsa kíxin kjuaxróxin tjejóni la kjuasáyá kíxin imá noha kjuíncheyóxian tí nación kuènteni. ³ Kjuasáyá jaha Félix. Imá jína jaha kíxin k'uáyéheni kaín tíha. ⁴ Tjínkakhonhya sintak'itjáyanhan nchónhya tiempo la xrjanóaha kíxin chrókjuak'é chrókuinhín intsikoá tí nkehe tsoxrjanka. ⁵ A ntá ijie ó k'uitjani kíxin tí ch'ín i mé éxí ijnko chin t'óxíka kuénté chjasintajni kíxin ch'iyehé ch'án tí sín judío ntá xíka sín. Jehe ch'án mé t'etóan ch'án tí sín tinkáchónki tí ch'ín tsíkjixín chjasin Nazaret. ⁶ Jehe ch'án mé kjaxin chrókjuínchekjita ch'án tí nínko. A ntá itséni ch'án ntá chrókjuínchekitoexínni tí ijie ch'án éxí t'etóan tí ley kuènteni. ⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakitsje sín tí ch'ín Pablo. ⁸ Ntá k'uetoan ch'án kíxin tí sín tjanchia jie chrókuitsjehe sín tí jaha kíxin jaha chrókjuanchankíhí ch'án kíxin chrókónoha jína nkexéhe tí jie chrókjuínchekjasótexín sín ch'án —ichro tí ch'ín Tértulo.

⁹ Ntá ntáchro kaín tí sín judío síin ntiha kíxin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxin tja ch'án kíxin tsonixja tí ch'ín Pablo a. Ntá ntáchro ch'ín Pablo kíxin:

—Chéheni kíxin tsonixjahani tsochrónkani kíxin kohya jie kjuasinni kíxin ó noheni kíxin jaha la juez kuènte tí nación ntihi la nchónhya nánó tétóan. ¹¹ Jaha la kjaxin ó chrókónoha kíxin na ntá teyó yaon kjuíjini chjasin Jerusalén kíxin ntaha tsoxráxinkákonxínni Dios. ¹² Kónoxínhya kíxin nijnko nkexro chrókjuachaxínni, la ko kjuínchexakuenhyani ninkexró nínko la ko ni tí nínko ntsí la ko ninketó chjasin. ¹³ Tí sín i la xitjahya tsontáchro sín kíxin xíkaha tí jie kjuasinni. ¹⁴ Janhan chaxín xrjanka kíxin t'ahá xrá tí Dios k'uékinkáchónki tí sín tsík'axrjeníxinni mé yóhe tí ntja nixin. A ntá jehe sín ntáchro sín kíxin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín tí xroon kuènte ley la ko tinkáchónkia kaín tí nkehe k'uénixja tí sín k'uéchrónka itén Dios. ¹⁵ Kjaxín tinkáchónkia tí Dios tinkáchónki tí jehe sín kíxin tjéchonhan kíxin Dios sinchexechón kaín chojni jína la ko kaín chojni jínahya kjaxin. ¹⁶ Méxra tóxakonna kíxin tjóá chrókjuak'é kíxin chrókjuanchahya Dios jie la ko kjaxin chojni chrókjuanchahya jie.

¹⁷ Nta kjuixin k'uatsínka iso nánó ixrini ókjé ntá kjuíjini chjaséni kíxin tsjanjonni chichaon la ko kjaxin tsochjéheni Dios nkehe. ¹⁸ Méxra mé xíkaha tjenni nkaxenhen nínko nta iso sín judío tsíkjixín estado Asia ó xetani ntiha. Ntá kjuínchetjóáni aséni la tsjéhya chojni k'uíkon la kohya chojni kjuánjonkoni. ¹⁹ A ntá tí sín a mé t'ichjánxin chrókui sín ntihi kíxin chrókjuanchia sín jie tí nínkakonna sín. ²⁰ A ntá tí náhi la tí sín tjejó ntihi chróchrónka sín kíxin nkehe tí jie k'uitjaxín sín tió kjuák'eni tí tjejó tí sín t'etóan kuènte tí sín judío. ²¹ Kjá tí tsontáchro sín kíxin náxrjónhya ijnko nkehe itsen k'uèya ntáxrjan kíxin: “Ijie sinchekitoexinrá jiéna kíxin sinchekjasótenará kíxin janhan tinkáchónkia kíxin tsoxechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jína kónohe ch'án kíxin nkexrí tí ntja nixin. Ntá kjuínchekitoexínhya ch'án ijie ch'ín Pablo. Ntáchro ch'án kíxin:

—Tsjjia tí ch'ín comandante Lisias ntá tsochrónka ch'án nkekuènte tí jie tjanchiará ntá tsonóna —ichro ch'án.

²³ Ntá k'uètuénhen ch'án ijnko ch'ín capitán kíxin ts'ayakonhen ch'án ch'ín Pablo kjánchó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxin ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uetoan ch'án kíxin tsjik'íyehé sín tí ch'ín Pablo kíxin tsochrónka ch'án nkexrí tinkáchónki chojni Jesucristo. ²⁵ A ntá ch'ín Pablo mé kjuako ch'án kíxin nkexrí ts'ejó chojni jína la ko nkexrí ts'etuenhen chojni asén sín kíxin ch'ehya sín tí jínahya la ko

nkexrí Dios sinchekitoexín ijié chojni tí tsjixixín. Ntá ch'ín Félix kuínhin ch'án xikaha ntá chrakon ch'án, ntáchro ch'án kixin:

—A ntá jie la sátsjia. Ntá ts'íyaha tió chonta tiempo —ichro ch'án.

²⁶ A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehē ch'án tí ch'ín Pablo kixin tsonixjehe ch'án. ²⁷ Ntá xikahó kónhen hasta k'uátsínka iyó nánó ntá tí ch'ín Félix kuítóhe ch'án tí xra gobernador la ntá í jnko ch'ín it'in Porcio Festo mé k'uixenhen ch'án tí xra a ínaá. A ntá ch'ín Félix mé kuítóhe ch'án tí ch'ín Pablo tjechjina ch'án kixin tjinkaon ch'án chrókjuinchexiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

¹ Ntá tí ch'ín Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxín ntá sákjuixin ch'án chjasin Cesarea la kjuíji ch'án chjasin Jerusalén. ² Ntiha tí sín nchat'á t'etoan la ko tí sín judío imá tjetōan mé kjuanchia sín kixin tsjasóte ch'ín Pablo. ³ Kjuanchia sín kixin xra ó chrók'uetōan ch'án kixin chrókjuí ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntia ts'óyán sín tí ch'ín Pablo. ⁴ Kjánchó ch'ín Festo kjuátehe ch'an ntáchro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'ín Pablo la tjechjina ch'án chjasin Cesarea la xitjahya ts'etoan ch'án kixin tsjixrakoa. ⁵ Ntá ntáchro ch'án kixin:

—Tí chojni tjetōan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jina tsjanchia sín jie —ichro tí ch'ín Festo.

⁶ Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea ínaa. Ntá tí yaon chr'éxín a kjuák'etjaxín ch'án tí tjet'etoanxín ch'án ntá k'uetōan ch'án kixin tsjikakjín sín tí ch'ín Pablo. ⁷ Ntá tió k'uixenhen ch'ín Pablo ntiha ntá tí sín judío kuixín Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie. ⁸ A ntá tí ch'ín Pablo a chrónka ch'án kixin kjuasinhya ch'án jie. Ntáchro ch'án kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuente tí sín judío la ko jehya chrókuitekakonhyani tí ninko la ko jehya chrókuitekakonhyani tí ch'ín gobernador romano.

⁹ A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntáchro ch'án kixin:

—¿Á tjinkávan sátsjia chjasin Jerusalén kixin ntaha janhan chrókjuíntakitoaxián nkehe tí jie chonta jaha? —ichro ch'án.

¹⁰ Ntá kjuátehe ch'ín Pablo kixin:

—Náhi, jeheni ó ntihi tjenni tí t'etoanxín tí sín gobierno romano la jina chrókjuinchekitoexián ijiéni kixin jaha la ó noha kixin ninkehó ije kjuích'ehyani tí sín judío. ¹¹ Kja tí chaxín kjuásian ichrén jie jie chrók'uénxian la chrakonhyana kjónté chrók'uén. A ntá ti chaxínhya xikaha t'ekana sín jie la ninkexró chóntahya kjuachaxin chrók'uetōan sáchrókjuikoni tí jehe sín. A ntá tjánchíá kixin jehe tí ch'ín imá t'etoan mé sinchekitoexín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkítsa ch'án ntá ntáchro ch'án kixin:

—Jaha mé tjanchia kixin tí ch'ín imá t'etoan sinchekitoexín ch'án ijiá. Méxra tétuanhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uatásínka iso yaon ntá tí ch'ín rey Agripa la ko tjan Berenice kjuíji sín chjasin Cesarea kixin tsonixjehe sín tí ch'ín Festo. ¹⁴ Ntá ntiha mé kuítóhe sín itsjé yaon ntá ch'ín Festo a mé chénka ch'án tí ch'ín rey nkehe kuènte tí ch'ín Pablo. Ntáchro ch'án kixin:

—Ntihi itjen ijnko ch'ín tjechjina tsíkítóhe ch'ín Félix. ¹⁵ A ntá tió kjuak'é chjasin Jerusalén ntá tí sín nchat'a t'etoan la ko tí sín t'etuenhen tí sín judío a mé kjuíjitsjehe sín tí janhan ntá kjuanchia sín jie kuènte ch'ín Pablo. Kjuanchia sín kixin chrók'óyánni tí jehe ch'án. ¹⁶ Ntá janhan kjuátaha kixin: Jeheni chojni t'etoan kuènte sín romano mé kuènyani ts'etoanni its'en ninkexró tí naxa tsochjinahya tí ch'ín kjuasin jie kixin tsonáchro ch'án á chaxín tí jie tjanchia sín o náhi. ¹⁷ Ntá ti sín judío kui ntihi ntá chuánhya má. Kjonté tí yaon chr'éxin kjuak'étxaxian tí ntakitoxián ijé chojni la kuétoan kixin síxrakoa tí ch'ín Pablo. ¹⁸ A ntá tí sín kóchjina kohya ninkehó ichro sín kuènte ti jehe ch'án éxi kjuenkayáxian janhan chróntáchro sín. ¹⁹ Jehó nínkakuenxín sín ch'án kixin tí nkehe tinkáchónki ch'án la ko nínkakuenxín sín ch'án kixin tí nkexro it'in Jesús mé ik'uén ch'án ntá jie ntáchro ch'ín Pablo kixin tjechón ch'án inaá. ²⁰ Janhan la nonahya nkexrí tsitoexín tí ijé ch'án ntá kjuánchánkíha tí ch'ín Pablo á tjinkaon ch'án sátsji ch'án chjasin Jerusalén kixin ntaha tsitoexin tí jie ch'án. ²¹ A ntá jehe ch'án tsíkjanchia ch'án kixin tí ch'ín imá t'etoan mé chrókjuinchekitoxin ch'án ijé ch'án. Ntá kuétoan janhan kixin naxa ntihyó tsjak'echjina ch'án tsononajia janhan nkesá tsétuanhan ch'án sátsji ch'án ntiha —ichro ch'án.

²² A ntá ch'ín Agripa ntáche ch'an tí ch'ín Festo kixin:

—Kjaxian janhan tjínkavan tsinhan tí nkehe tsochrónka tí ch'ín a.

Ntá kjuátehe ch'ín Festo ntáchro ch'án kixin:

—Ntóye tsinhín nkehe tsochrónka ch'án.

²³ Ntá tí yaon chr'éxin tí ch'ín Agripa la ko tí tjan Berenice kjuíji sín la k'uixenhen sín la ko tí sín soldado t'etoan tsíkjikao sín, la ko k'uixenko sín iso chojni tjetooan kuènte chjasin ntiha. Ntá k'uetooan ch'ín Festo kixin tsjixrakoa tí ch'ín Pablo. ²⁴ Ntá ntáchro ch'ín Festo kixin:

—Jaha ch'ín rey Agripa tinhín la ko tinhínrá kaín rá tsíkójkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuítóehya sín, tjanchana sín kixin chrók'uen ch'án. ²⁵ A ntá tónhenni kixin kohya jie jie kjuasin ch'án kixin chrók'uen ch'án. Kjánchó jehe ch'án mé tsíkjanchia ch'án kixin tí ch'ín imá t'etoan chrókjuinchekitoxin ijé ch'án. Ntá kjuenkayáxian kixin tsétuanhan ch'án sátsji ch'án ntiha. ²⁶ Nonahya nkehe chaxín tsokjian ts'áyéhe tí ch'ín t'etoan. Ntá jie kuétoan kjuíkakjín sín ch'án kjuíkao sín ch'án tí tjejóni ntihi kixin tjetooan kixin jaha ch'ín Agripa la ko kaín rá tjejorá ntihi tsjanchankíhírá ch'án kixin mé tsonòna janhan nkehe tsokjian. ²⁷ Méxra náxrjónhya chróchr'an ijnko tí chojni tjechjina naxa nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochrónka —ichro ch'án.

Ntá tí ch'ín Pablo mé kjuaya tja ch'án ntá kjuankíxin nixja ch'án, ntáchro ch'án xikihi:

² —Chàna kixin tsonixja nkayakuan tí jaha rey Agripa tsoxrjanka kaín tí jie t'ekana tí sín judío. ³ Ó noheni kixin jaha la ó noha jína kuènte tí ley la ko tí nkehe tinkáchónki tí sín judío, la ko jaha noha nkehe tí kjuachaxin sín kichó sín. Méxra xrjannóaha kixin tjak'etinhín jína.

Chrónka ch'ín Pablo nkexrí kjuák'e ch'án tí ósé

⁴ 'Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána. ⁵ Kjaxin jehe sín la ó nohe sín la kjá jína chróchronka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuènte tí nkehe tinkáchónkini. ⁶ Ntá ijie sinchekitoexián jiena kixin nínkaon tí sín judío a kixin tjéchnhan kixin Dios mé sinchexechón chojni inaá xikaha tsíchénka ch'án tí sín tsík'axrjeníxinni. ⁷ Tí teyó tribu tsík'axrjeníxin ch'ín Israel mé tjejóchónhen sín kixin ts'ikon sín tsoxiteyá tí nkehe tsíchronka Dios. Méxra xraxinkaon sín Dios nchakotjin la ko tie. Méxra mé xikaha tjéchnhan, jaha rey Agripa, la mé xikaha nínkakonna tí sín judío ijie. ⁸ ¿Á titekákonhyará jahará kixin Dios sinchexechón chojni tsík'en?

Ch'ín Pablo k'uénínkakonhen ch'án tí chojni tinkáchónki Ìnchéni

⁹ 'Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsíkjixin chjasin Nazaret. ¹⁰ Mé xikaha kjaxin k'uékjít'a chjasin Jerusalén. Tí sín nchat'á t'etōan mé kjuanjon sín kjuachaxin kixin janhan tsochr'áxanhan ntōechiso nchónhya tí sín tinkáchónki Ìnchéni. Ntá tió k'óyán sín tí sín a mé janhan la ntáxrjan kixin ó nchōxon xikaha kónhen. ¹¹ Nchónhya veces kjuíntakjasóte tí sín tinkáchónki Ìnchéni kixin chrókuítóhe sín tí nkehe tinkáchónki sín. Mé xikaha k'uékjít'a kaín xín nínko kixin imá k'uénínkakonhan tí jehe sín la xikaha k'uájichráha sín kjónté sátsíkji sín chjasin ókjé.

Chrónka ch'ín Pablo nkexrí kuínkáchónki ch'án Ìnchéni (Hch. 9.1—19; 22.6—16)

¹² Méxra xra ó sákjuia janhan chjasin Damasco. Tí sín nchat'á t'etōan mé ó kjuanjon sín kjuachaxin kixin xikaha t'aha sín xra. ¹³ A ntá tí ntia a jaha rey chrókónoha kixin chonkixin k'uíkuan éxí ijnko xrohi t'inkaséyan kuixin nkaya nkajní antsí má fuerte la kánhyó fuerte tí xrohi kuènte yaon la tí t'inkaséyan mé k'uantatjen tí janhan la ko tí sín xríkjan. ¹⁴ Ntá kaín ni kjuítsínkani nonte ntá xrínahya kuinhan nixja ijnko nkexro mé nkiva hebreo nixjaxin ch'án. Ntáchro tí nkexro a kixin: “Saulo, Saulo, ¿nkekuènte nínkakonna xrítyéyá tí janhan? Jahvá nchekjasóte asán kixin tjanjonkoa tí janhan. Éxí yóhe ijnko koxinta kónínkaon va tí chriáte sín va chica yo mé xikaha jaha.” ¹⁵ Ntá kjuánchánkiá kixin: “¿Xá nkexro jaha?” Ntá tí nkexro me kjuátehe kixin: “Janhan mé Jesús mé tí nkexro chréhé jaha. ¹⁶ Ijie t'áya jaha, tjak'exián totá. Janhan kjuánjuan kjuachaxin kixin k'uíkuan tí janhan ijie kixin jaha sich'ena xra. Janhan kjuéyá tí jaha kixin tsochénta chojni kixin k'uíkuan tí janhan la ko tsochronka tí nkehe tsjákohá inaá tí xik'ikuan tí janhan inaá. ¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tētoan satsjia. ¹⁸ Méxra tētoan sátsjia tí tjejó tí jehe sín kixin takítjenkia ikon sín kixin í ts'ajihya sín ntia sítié la ts'aji sín ntia t'inkaséyan la ko tsochóntahya tí jínahya kjuachaxién ts'etuenhen tí jehe sín. Jehe sín mé tsínkáchónki sín tí janhan. Ntá janhan ts'áyáha sín la tsjin ijie sín la ko tsitōnhen sín tí nkehe ts'áyéhe kaín tí sín tsíkjinchetjóá Dios,” ichro Ìnchéni.

Ch'ín Pablo kuítekaon ch'án tí nkehe tsík'ikon ch'án

¹⁹ Mé xikaha jaha rey Agripa kjuíntaxiteyáha tí nkehe k'uíkuan kuixin nkaya nkajni. ²⁰ Saóxín kjuákoḥa tí sín siín chjasin Damasco, la ntá chr'éxin chjasin Jerusalén, la ko kuenté tí estado Judea ntá kjaxin kjuákoḥa tí sín jehya judío. Kjuákoḥa sín kixin chrókuítóhe sín ijie sín, la chrókjan sín chrókuínkáchónki sín Dios, la ko chrókjuakoxin sín xra jína kixin chaxín ó kjuítóxinhin sín tí nkehe tinkáchónki sín. ²¹ Mé xikaha tí xra tséxinna tí sín judío a nkaxenhen nínko la tjínkaon sín chrók'óyánna sín. ²² Ntá kjuasáyé Dios kjuínkítsana la ntoá itjén ijie tjákoḥa kaín chojni ntsíntsi la ko chojni ihyé la ninkehó k'uantaxiánhya kuènte tí nkehe tsíchronka tí sín tsíchronka itén Dios la ko tí nkehe tsíchronka ch'ín Moisés tsonhen, ²³ kixin t'ichjánxin its'en Cristo la ko tsoxechón

ch'án inaá. Tí itén ch'án éxí ijnko xrohi ts'inkaséyanxín tí sín siín ntihi la ko tí sín siín í so nación kixin tsaáxin sín.

Ch'ín Pablo nixjehe ch'án ch'ín Agripa kixin chrókuinkáchónki ch'án Ìnchéni

²⁴ Mé xikaha ichro ch'ín Pablo kixin kohya jie kjuasin ch'án ntá tí ch'ín Festo mé itsen k'uèya ch'án kixin:

—Pablo jaha la kjá tsík'ixikján. Imá tsíkjinchekuáxian mé xikaha tsikólókoxián —ichro ch'án.

²⁵ Ntá kjuátehe ch'ín Pablo kixin:

—Jehya tsík'ixikjánna. Jaha Festo imá tjuaha. A ntá tí nkehe ntáxrjan la ijnko nkehe jina la ijnko nkehe chaxín. ²⁶ Ntihi itjen tí ch'ín rey Agripa. Jehe ch'án mé jina nohe ch'án kaín tí nkehe a. Méxra tjenixjaha ch'án jnkójina kixin ó nòna kixin jehe ch'án ó nohe ch'án kaín nkehe kónhen kixin jehya ijnko nkehe imó kónhen tíha. ²⁷ Jaha, rey Agripa, ¿á titekávan tí nkehe tsíkjako tí sín tsíchrónka itén Dios ósé? Janhan la ó nòna kixin titekávan jaha.

²⁸ Ntá kjuátehe ch'ín Agripa ntáchro ch'án kixin:

—Ó antsíkoá chrokuacha chrókuachróena kixin chrók'ónana cristiano —ichro ch'án.

²⁹ Ntá ntáchro ch'ín Pablo kixin:

—Ntáxrjan kixin á isé tsoxrjanka o á séhya la Dios mé tjinkaon kixin jehya jahvá chrókuinkachónkia ch'án. Náhí. Kjaxin tjinkaon ch'án kixin kaín nkexro tjejótinhin chrók'óna sín éxí tí janhan kjánchó xikahya chróchóna sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxajin ntiha. ³¹ Ntá kaín sín k'uaxrjenta sín la ikjo sín kichó sín. Ntáchro sín kixin:

—Kohya jie tsíkjasin tí ch'ín a kixin chrók'uénxín ch'án la ko chrókuak'echjinaxín ch'án ntoechiso.

³² Ntá tí ch'ín Agripa ntáche ch'án tí ch'ín Festo kixin:

—Ó nchoxon chrókuánjuan kjuachaxin sáchrókjui tí ch'ín a tí jehe ch'án chrókuanchahya ch'án kixin tí ch'ín imá t'etōan sinchekitoexín ijje ch'án —mé xikaha ichro tí ch'ín Agripa.

27

Ch'ín Pablo sákjuí ch'án chjasin Roma

¹ Ntá k'uetoan sín sátsjini nación Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'in Julio. Jehe ch'án me ijnko policía kuente tí ch'ín t'etoan Augusto César. ² Ntá k'uixenhenni ijnko ntabarco tsíkjinxín nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjinxín chjasin Tesalónica nó estado Macedonia. ³ A ntá tí yaon chr'éxin mé kjuíjini tí puerto chjasin Sidón. Ntá ch'ín Julio mé ikjo jnkójina ch'ín Pablo ntá chjéhe ch'án kjuachaxin kixin sátsjitsjehe ch'án tí chojni chóxin ch'án ntiha kixin tsjinkitsa sín ch'án. ⁴ Ntá chr'éxin sákjuíxinni chjasin Sidón. Ntá kjuíjini ijnko isla it'in Chipre la nó tja kjonni kuítóhe tíha la imá chjéhe xrinto. ⁵ Ntá k'uatōyeni tí ntayaon chjinaxón chjasin Cilicia la ko Panfilia la ntá kjuíjini chjasin Mira estado Licia.

⁶ A ntá ntiha tí ch'ín capitán, tí ch'ín k'uetoenhen tí sín soldado a, mé k'uitja ch'án í jnko ntabarco tsíkjinxín nó chjasin Alejandría sátsji nó nación Italia. Ntá ntáchro ch'án kixin tíha sátsjikoni kixin tsjijini ntiha. ⁷ Nchónhya yaon kjuíjixinni kixin imá iyó la imá xra kjuíjini chjino chjasin Gnido. Ntá naxa chjéhe xrinto tsanká ntá k'uátsínkani chjinaxón Salmón ntá kuinkátjixinni chjino tí isla Creta. ⁸ Ntá xikahó imá xra k'uátsínkani chjinó chrínta ntá kjuíjini ijnko chjasin it'in Puertos Jina chjino chjasin Lasea.

⁹ Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárcō chrítaón ntayaon kixin ó kóchjina tí nchakuen kin. Méxra ch'ín Pablo nixjehe tí sín a.

¹⁰ Ntáchro ch'án kixin:

—Tinhínrá tí nkehe tsoxrjanka. T'íkuān kixin nchónhya kjuachrakon tsonhen. Sinchek'itjáyanni tí ntabárcō a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuente tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárcō la ko tí nkehe chrónka tí ìnché tí ntabárcō a ntá tí nkehe ntáchro ch'ín Pablo la náhí. ¹² Jehya jína kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jína sátsjixínni ntiha kixin ákué xitjahya chrókjuijini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatsínkajia tí nchakuen kin.

Tí xrintō chjéhe chrítaón ntayaon

¹³ Ntá kjuankixin chjehe xrintō kjuixin nó sur kjánchó kánhyó fuerte ntá kjuenkayáxin sín kixin kjá jína sátsjini.

Ntá sákjuixínni ntiha kjánchó kjónté naxa sákjuíni chjinaxón tí chrínta ti isla Creta a.

¹⁴ A ntá chr'éxin ikjui ijnko xrintō kjuixin noroeste k'uíntaté tí ntabárcō. ¹⁵ La kjuankixin xrintō sákjuíko tí ntabárcō kixin tsjachahyani sátsjini tí sítjixin tí xrintō a. Ntá t'ichjánxin kuítóheni sákjuíko xrintō tí ntabárcō tjejóxenhenni. ¹⁶ Ntá k'uátsínkani chjino ijnko isla ntsí it'in Clauda kixin ntiha mé kánhyó tjian chjéhe xrintō. Ntá imá xra k'uitjáianni tí ntabárcō ntsí t'etenixín nóton ntabárcō jíé. ¹⁷ Ntá kjuixin kjuínchek'it'ótjen sín tí ntabárcō ntsí ntá imá chrakon sín ntá kjuínchenteto sín tí ntabárcō jíé kixin kohya nkehe tsonhen. Kjaxin tóxakonhen sín chrakon sín tsíkjine nchesen tí ntabárcō tí tsjiji sín tí it'in Sirte. Ntá kuakjinjin sín tí ka chóna ntabárcō ntá kuítóhe sín sátsjiko xrintō. ¹⁸ Ntá tí yaon chr'éxin ntá naxa imá tjian chjéhe xrintō. Ntá ik'ue sín tí nkehe sítjinká tí ntabárcō a chrínta ntayaon kixin kánhyó tsoye. ¹⁹ A ntá tí yaon nixin a mé itjani ó kuakitsjexínni tí nkehe kuente tí ntabárcō. ²⁰ Isé k'uíkonhyani yaon la k'uíkonhyani konotsé kixin imá tjian chjéhe xrintō la ko kjaxin ó k'uitjáyenhenni kaín tí tjenkayáxinni kixin naxa chrókuaáni.

²¹ Ntá ó k'uatsínka itsjé yaon kjónehyani ntá k'uínkatjen ch'ín Pablo nixjehe ch'án kaín tí sín tjejóxenhnen ntabárcō a ntáchro ch'án kixin:

—Chrókuítekáonrá tí nkehe xrjanka kixin chrókuítóheni tí estado Creta ntá chrók'uitjáyenhanyi tí nkehe tjinká tí ntabárcō a. ²² A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárcō la ts'itjáyan. ²³ Ntá tí tie a mé k'uíkuān ijnko ángel tsíchr'án Dios tinkachónkia la ko t'ahā xra. ²⁴ A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'etōan la kjaxin Dios la tsjinkitsa jaha la ko tí sín tjejókoa kixin ts'enhya sín.” ²⁵ Méxra chróchrakonhyará jahará kixin tí Dios tinkachónkia la chaxín nchexiteyá tíha, éxí tsíntáchro tí ángel. ²⁶ Kjónté ó jehí t'ichjánxin sátsjikoni xrintō ijnko nonte jnkosiné ntayaon —ichro ch'án.

²⁷ Kjuixin k'uátsínka iyó semana ntá ijnko tie ntá kjuíjini ijnko ntayaon it'in Adria ntá sákjuíko tí ntabárcō ijnko lado la í jnko lado ti xrintō. Ntá chjino k'áxrótjen ntá tí sín tjiko ntabárcō mé ó kónohe sín kixin ó chjina kjuixraká sín ijnko nonte xámá. ²⁸ Ntá kjuáchrōa sín tí nkekjaín ninkaxín tí ntá mé chóna treinta y seis metro ninkaxín. Ntá sákjuíni kjínhya la ó xíkjachrōa sín la veintisiete metro ó ninkaxín. ²⁹ Imá chrakon sín kixin ts'itjatōn tí ntabárcō itjō ntá kjuinkajin sín noó chica gancho tí nóton tí ntabárcō a kixin ntahó tsochónhen tí ntabárcō hasta chrók'uinkaséyan. ³⁰ Ntá tí sín tjiko ntabárcō kjuenkayáxin sín sáchrókjui sín ntá kjuankixin kjuinkajin sín tí ntabárcō ntsí chrítaón ntá éxí tjinkaon sín chrókjuinkajin sín tí gancho chóna tí kja ntabárcō. ³¹ A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsitōehya tí sín i ntihi nkaxenhen ntabárcō ntá xitjahya tsaará —ichro ch'án.

³² Ntá tí sín soldado a mé kóchrínjint'ò sín tí hno kuènte ntabárcò ntsí tsítóhe sín tsjankí nta.

³³ Ntá chjina t'inkaséyan a ntá ch'ín Pablo nixjehe ch'án kaín tí sín siín ntiha ntáchro ch'an kixin chrókjóné sín ichrén nkehe. Ntáchro ch'án kixin:

—Ó k'uátsínka iyó semana k'uejóchrinhyará la ko kjóntehyará. ³⁴ Tinhínrá t'ichjánxin chrókjónterá ichrén nkehe tí tjinkáonrá tsaará kixin ntihi la kohya nkexro ts'itjáyan la nijnko tí kaxihi chóna kjará ts'itjáyan.

³⁵ Ntá xíkaha ichro ch'ín Pablo ntá kuákja ch'án ijnko niotja a la ntiha tí tjejó kaín sín ntá kjuanchia ch'án kjuasáyé Dios ntá kóchrít'ò ch'án ntá kjuankíxin kjóne ch'án. ³⁶ Ntá kóchéhe sín kaín sín kjuankíxin kjóne sín kjaxin. ³⁷ Kaínni tsík'ixenhenni ntabárcò mé iyó ciento setenta y seis chojni. ³⁸ Ntá kjuixin kjóne sín la kókjehe sín ntá ik'ue sín tí noa trigo a tjinká tí ntabárcò a chrínkí tí ntayaon a kixin kánhyó tsoye tí ntabárcò a.

Tí ntabárcò kjuixin k'uániánkí nta

³⁹ A ntá ó k'uínkaséyan, a ntá tí sín tjiko ntabárcò la kjuátsoanhya sín tí nonte ntá k'uíkon sín ijnko chrínta nta. Ntáchro sín kixin ákué tsjachahya sín sátsjiko sín tí ntabárcò ntiha.

⁴⁰ Ntá kóchrínjint'ò sín tí hno síchroéxin tí gancho kixin ntahó tsítóhe chrínkí ntayaon. Ntá kjuínchentá sín tí nkehe tjikoxín sín tí ntabárcò a. Ntá kjuínchek'it'ótjen sín tí ka tjiko nkayakon tí ntabárcò. A ntá tí ntabárcò kjuankíxin sákjuí chrínta nta. ⁴¹ Xrínahya kjuíji ntabárcò tí iyó kójnkojiéxin ntayaon ntá ntiha kjuíkiat'ó tí kja tí ntabárcò tí nchesen siín ntiha. Ntá í xitjahya nchekinkí ninkehó, a ntá nóton tí ntabárcò kjuankíxin síxíka kixin imá sítji chjéhe nta a. ⁴² Ntá tí sín soldado a mé tjinkaon sín chrók'óyan sín tí sín tjejóchjina kixin tjinkakonhya sín kixin ninkexró sáchrókjui ókjé. ⁴³ A ntá tí ch'ín t'etuenhen tí sín soldado a mé tjinkakonhya ch'án kixin its'en ch'ín Pablo ntá kjuanjonhya ch'án kjuachaxin. Íchá k'uetóan ch'án kixin tí sín jína tjitaón nta la senó sátsji sín kixin tsjiji nonte xámá ⁴⁴ la ko tí sín noehya tsjitaón nta a mé sátsjiko sín ti ntatabla o it'ò tí ntabárcò. Ntá xíkaha kaín ni kjuíjini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kixin tí isla la mé nchek'in sín Malta. ² A ntá tí sín chjasin ntiha mé imá jína kjuínkítsa sín kaín ni la kjuaka sín ijnko xrohi jíé kixin imá kin kixin sít'aniá chrin. Ntá k'uèya sín kixin tsochjinani kaín ni tsochjixroheni. ³ A ntá ch'ín Pablo mé sákjuíakaja ch'án í so njo tsixámá ntá kjuasinkáte ch'án tí xrohi a. Ntá xrínahya k'uaxrjenkíxin ijnko konche tí xrohi a kixin imá sóa ntá xrínahya k'uísímá itja ch'ín Pablo. ⁴ Ntá tí sín chjasin ntiha mé k'uíkon sín tí konche kjítjankítjen itja ch'án ntá ikjo sín kichó sín. Ntáchro sín kixin:

—Kjá tí ch'ín a la ijnko chojni tsíkjàya a kixin kjónté kuaá ch'án k'uénxinhya ch'án ntayaon la Dios la í tjinkakonhya kixin naxa tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi kixin ntiha ts'anótjen tí konche, ntá jehe ch'an la kohya nkehe kónhen ch'án. ⁶ Ntá kaín sín tjejóchónhen sín kixin ách'e ts'atjoyé itja ch'án o ách'e its'en ch'án. Ntá kjuixin k'uejóchónhen sín isé la k'uíkon sín kixin kohya nkehe kónhen ch'án ntá kjuitóxin sín tí nkehe kjuenkayáxin sín la ntáchro sín kixin jehe ch'án mé ijnko dios tíha, ichro sín.

⁷ Ntá chjino tí k'uejóni a mé itjen nontee ijnko ch'ín t'etóan kuènte isla me it'in Publio. Mé jína kjuanjon ch'án kjuachaxin k'uejóni ntóe ch'án la kjuanjon ch'an nkehe kjóneni iní yaon. ⁸ Ntá it'é tí ch'ín Publio a mé tjetsínka ch'án kixin níhi ch'án chóna ch'án sóa la ko chinjni. Ntá ch'ín Pablo sákjuítsjehe ch'án la kjuixin nixjehe ch'án Dios, ntá kjuák'etja itja ch'án tí ch'ín a ntá kuítóhe ch'án jína. ⁹ Mé xíkaha kjaxin kóchjina í so tí sín níhi siín tí

isla ntá kaín sín kuítóhe sín jína. ¹⁰ Na ntá imá kjuikosáyehe sín ch'án. A ntá chr'éxín tió kjuixin k'uíxenhenni ntabárcō inaá ntá kjuanjon sín kaín nkehe t'ichjánxinhinni sátsjikoni.

Kjuíji ch'ín Pablo chjasin Roma

¹¹ Ntá k'uátsínka iní nitjō tjejóni tí isla ntá k'uíxenhenni ijnko ntabárcō mé ntahó tsíkitohe k'uátsinkajia tí nchakuen kin. Tí ntabárcō a mé tsíkjin chjasin Alejandría la ko mé chóna nkehe tsíkjanoya chóna ihnié dios Cástor la ko Pólux. ¹² Ntá sákjuíni ntá kjuíjini puerto chjasin Siracusa la ntaha kuítóheni iní yaon. ¹³ Ntá xík'ixenhenni tí ntabárcō la k'uátsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxín a ntá kjuankíxin chjéhe xrintō kjuixín nó sur, ntá yaon yóxin ntá kjuíjini chjasin Puteoli. ¹⁴ Ntá ntiha xetani iso kíchó ni, a ntá tjinkaon sín ts'ejókoni sín ntiha. Ntá k'uéjókoni sín ijnko semana ntá chr'éxín sákjuíni chjasin Roma. ¹⁵ Ntá tí sín kíchó ni chjasin Roma la ó nohe sín kíxin tsjijini. Ntá iso sín la xetani sín ntia chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. ¹⁶ Ntá tió kjuíji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuítóhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

¹⁷ Ntá k'uátsínka iní yaon ntá tí ch'ín Pablo a mé k'uíyehe ch'án kaín tí sín judío tjetan kuènte chjasin Roma. Ntá tió kjuixin kójnkotsé kaín sín ntá ntáchro ch'án kíxin:

—Kíchóni, kohya ninkehó jie kjuásian kíxin chrókónínkakonna tí sín judío la jehya kíxin ninkakonxian tí nkehe k'uékinkáchónki tí sín tsík'axrjeníxinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a. ¹⁸ Ntá k'uitjahya sín ninkehó jie chonta. Ntá tjinkaon sín chrók'uatjántana sín kíxin k'uitjahya sín ninkehó jie chrók'uénxian. ¹⁹ A ntá tí sín judío a mé imá kónínkaon sín tjanchia sín jie. Ntá t'ichjánxín tsjanchiani kíxin tí ch'ín César mé chrókjuinchekitóexín ch'án nkehe tí jie chóntani, kjónté chóntahyani ninkehó jie ts'eka tí sín tí nación kuénténi. ²⁰ Méxra k'uíyahará kíxin tjinkaonni ts'íkuañ tí jahará la ko tsonixjaharáni kíxin tinkáchónkini tí nkexro tjejóchónhen kaín tí sín israelita mé xíkaha t'ikonrá kíxin tjechrontetoxínni cadena ntihi.

²¹ Ntá ntáchro sín kíxin:

—K'uáyéhyani ninkehó xroon chrókjuixin Judea kuènte tí jaha la ko kuihya nijnko tí sín kíchó ni judío chróntáchro sín ichrén nkehe jínahya tsík'ich'e. ²² Tjinkaonni chrókuinhinni nkexrí tjenkayáxian kíxin ó noheni kíxin itsjé chjasin t'ántaxínhin sín tí nkehe níxin tjákua —mé xíkaha ichro sín.

²³ Ntá chr'éxín kjuéyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuènte Dios. Nixjéhe ch'án sín kíxin chrókuitekaon sín tí nkehe kjuako ch'ín Jesús, la chrónkaxín ch'án kíxin nkexrí nixja tí ley kuènte ch'ín Moisés la ko tí tsíkjin tí sín profeta ósé. ²⁴ Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekakonhya sín. ²⁵ Ntá jnkokoáhya kjuenkayáxín tí jehe sín la iso sín tjinkaon sín kíxin sáchrókjuí sín, ntá ch'ín Pablo mé ntáchro ch'án kíxin:

—Ntoá nixja tí nkehe chénka Nchakuen Dios tí sín tsík'axrjeníxinni ósé chrónkaxín ch'ín profeta Isaías ntáchro kíxin:

²⁶ Sátjia nixjehé tí chojni a

kíxin jehe sín kjónté tjejótinhin sín la tienxínhya sín,
la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha
la ntatsjon sín la tsík'ikjehe
la ikon sín la tsíchr'áto
kíxin t'ikonxínhya sín

kixin tinhín sín la tjinkakonhya sín chrókuienxín sín,
la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá janhan
chrókujintakitohá sín jína.*

Mé xikaha tsíkjin ch'ín Isaías. ²⁸ Méxra chrókónohará jahará kixin ijie tí sín jehya judío me
ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xikaha ichro ch'ín Pablo ntá tí sín judío sákjuí sín la tinkákjo sín kichó sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon ch'án
kjuachaxin k'uéjótí sín kjuíjitsjehe ch'án. ³¹ La kjuako ch'án tí kjuachaxin kuènte Dios la
ko kjuako ch'án kuènte Ìnchéni Jesucristo. La kohya ninkexró k'uínkákonhen tió kjuako
ch'án. Ó tjen.

* 28:27 28.26-27 Isaías 6.9-10

Tí xroon ikjin ch'ín Pablo chr'énhen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'aha xra Jesucristo mé kjian tí xroon i. Kjueyána Dios kixin sít'aha ch'án xra tsjákuá tí tan jína tsaáxinni.

² Tíha mé tsintáchro Dios senó kixin tsoxiteyá éxí nixja tí xroon nixjaxin tí sín tsíchronka itén ch'án ósé. ³ Tí tan a mé chrónka nkexrí tjen Ìnchéni Jesucristo Xjeen Dios. Jehé ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David. ⁴ Tí kjuachaxin jie mé kjuakoxin kixin jehe ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tjetóan. ⁵ Kjuasáyé Jesucristo k'uáyéheni kjuachaxin kixin sich'ehe ch'án xra sátsjichronkaxinni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrótjuèhe sín ch'án. ⁶ Jahará k'uék'ejorá éxí tjejó tí jehe sín, a ntá jie la kjueyará Dios kixin chrókuítekaonrá Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuàhará Dios la kjueyará ch'án kixin tjóá chrók'uejórá. Kjuasáyé It'eni Dios la ko Ìnchéni Jesucristo kixin kjuanjón ch'án kjuaxróxin k'uayéhérá.

Ch'ín Pablo tjinkaon chrókjuitsjehe ch'án chjasin Roma

⁸ Xrankíxín kjuachaxièn Jesucristo tjánchàxian Dios kjuasáya kixin jahará ó kuítekaonrá ch'án la ko nkuíxín chjasintajni nixja sín nkexrí tinkachónkirá ch'án. ⁹ Dios, tí nkexro t'aha xra kaín asenná xrjanka tí tan jína kuènte Xjeen ch'án, mé nohe ch'án kixin xráxín xráxinkavan tí jahará tió nixjahá ch'án. ¹⁰ Xráxín tjáncháha Dios kixin tí chrókjuanjón ch'án kjuachaxin la chrókjuasántsjahará. ¹¹ Kixin tjínkavan chrókjuasántsjahará tí jahará kixin chrókjuínkítsa tí jahará kixin chrók'uitjará jína nkexrí chrók'uejórá ntoá. ¹² Me xíkaha tsocháhará la ko tsochána kixin jnkokoá tinkáchónkini Ìnchéni, jahará la ko janhan.

¹³ Kíchóni, tjínkavan chrókónohará kixin nchónhya veces tjínkavan chrókjuásantsjahará kjánchó naxa xitjahya tsjasán. Tjínkavan chrókjuasán kixin chrókjuít'a xra kuènte Ìnchéni kixin chrókjuachani nchónhya chojni chrókuinkáchónki Dios éxí kjuít'a xra í so chjasin naxa chónhya sín Dios. ¹⁴ T'ichjánxin tsjákoḥa kaín chojni, á chojni griego o á chojni jehya griego o á chojni nohe o á chojni noehya. ¹⁵ Mé xíkaha xra ó tjéchonhan chrókjuasán chrókjuákohará tí tan tsaáxinrá tí jahará tjejórá chjasin Roma.

Tí kjuachaxin kuènte tí tan jína

¹⁶ Tósuànahya xrjanka tí evangelio kixin táha ijnko tan jína kixin chóna kjuachaxin kuènte Dios chrókuaáxin kaín xín tí chojni chrókuitekaon, mé saoxín tí sín judío la ko kjaxin tí sín jehya judío. ¹⁷ Kixin tí tan jína kuènte Dios tjakuexin tí jeheni kixin chrókótjuáxin ijjiéni kixin tinkáchónkini ch'án la jehó ch'án tinkáchónkini. Exí ntáchro xroon itén Dios kixin: “Tí nkexro kótjóá kixin kuítekaon sín Dios mé táhó ts'ejóchónxin sín.”*

Tí jie tjasin chojni

¹⁸ Dios tjen nkaya nkajni mé tsonínkakonhen ch'án tí sín jínahya tjasin jie, mé sinchek-jasóte sín ch'án. Tí jie jínahya tjasin sín mé t'inkákonhen kixin chrókónohe sín tí nkehe jína chaxín. ¹⁹ Jehé sín ó nohe sín jína nkexrí tjen Dios kixin jehe ch'án kjuakuexin ch'án tí jehe sín. ²⁰ Tí kjuachaxin kuènte Dios kjónté t'ikonhyani la kjánchó noexinni kixin tí nkehe kjuích'éna ch'án. Kixin tí naxa k'ónahya chjasintajni kónoxín kixin jehó ch'án mé Dios t'etóan la ko chóna ch'án kjuachaxin jnkochrixin. La ntá tí sín jínahya xitjahya tsontáchro

* 1:17 Habacuc 2.4

sín kixin k'ueñoehya sín. ²¹ Kjónté nohe sín kixin xikaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sínkíhya kixin jínahya asén sín la tí sítié ó kuítóhe sín. ²² Kjónté ntáchro sín kixin imá nohe sín kjánchó imá lontj sín kixin antsí kjuasin sín jie. ²³ A ntá ó kjuixin kjuinkí sín tí nkehe tinkáchónki sín la ko kuítekakonhya sín tí kjuachaxién Dios itjen jnkochrín, t'enhya. A ntá ijie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko iko chóna noó toté.

²⁴ A ntá xikaha Dios kuítóhe ch'án tí jehe sín kixin chrókjuich'e sín tí nkehe jínahya tjenkayáxin sín ntá xikaha ch'e sín ijnko nkehe chrókósuèxin sín ch'ehe kichó sín ²⁵ kixin kuítekakonhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuích'éna sín dios kuènte sín tí nkehe tsíkjach'éna Dios. A ntá tí nkexro kjuích'éna tí nkehe la titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe siín mé kuènte ch'án. Amén.

²⁶ La ntá xikaha kjuích'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuèxin sín chrókjuich'e sín. Kjónté tí chojni chjin la kuítóhe sín tí ichjin sín la ntá kjuích'éna sín asén sín chojni ntoa. ²⁷ A ntá kjaxin xikaha tí chojni ntoa kuítóhe sín chróchóna sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'ehe kichó sín jnkokón ntoa sín. Mé xikaha mé tí cuerpo kuènte sín mé tsjasótéxin sín tí jie kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítóhe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'ehya sín. ²⁹ Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóna sín itsjé nkehe, la ko imá tjasin sín jie, la ko jehe sín chjinoxínhin sín, la ko tjinkaon sín chrók'óyán sín kichó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia. ³⁰ T'ántaxínhin sín kichó sín la ko nínkakonhen sín Dios, la ko jehó sín chrók'ueñoan sín, la ko nchehnke sín, la ko jehó sín ch'éna sín nkehe jínahya tjasixín chojni jie, la ko tjikosáyehya sín it'é sín la ko iné sín. ³¹ Tienxínhya sín la nchexiteyáhya sín nkehe nixja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichrén jie kjuasinhin kichó sín, la ko tikonóehya kichó sín. ³² Jehe sín ó nohe sín jina kixin nkexrí k'ueñoan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naxa tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitoexín ch'án tí jie tjasin chojni

¹ Mé xikaha jahará xitjahya tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexrí chrókjuasótéxinrá kjaxin kixin jahará jnkokón jie tjásinrá. ² Ó noheni kixin ntoá sinchekitoexín Dios tí jie kjuasin chojni kixin sinchekjasóte ch'án tí sín xikaha tjasin jie. ³ A ntá jahará la tékará jie í so chojni ntá jahará kjaxin la xikaha jnkokón jie tjásinrá. ¿Á tjenkayáxinrá kixin tsjachará tsinkeherá tí sinchekjasótiará Dios ní? ⁴ ¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naxa nínkakuanyhará ch'án? A ntá jahará la kuiénxinhyará kixin Dios tjuàhará kixin tjinkaon ch'án chrókuítóhérá tí nkehe jínahya tjenkayáxinrá. ⁵ Kjánchó jahará imá icha asánrá, tjinkákonhyará chrókuítóhérá tí nkehe jínahya tjenkayáxinrá, a ntá antsí má nchek'ánkirá tí nkehe jínahya tsjasótéxinrá tí yaon tsjixixín tió tsonoxín kixin sinchekjasóte Dios chojni. ⁶ Jehe ch'án mé tsjenkehe ch'án jnkoinko chojni nkehe tí xra tsíkjach'e sín. ⁷ Tsjanjon ch'án kjuachón ts'áyéhe tí sín tjejá sín tí nkehe náxrjón la ko tí kjuachaxin ts'itjáyanyha la ko xráxín kjuích'e xra jina. ⁸ A ntá tsonínkaon Dios

sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. **A** ntá náhí, la íchá má kóxrjínhín sín kjuích'e sín tí nkehe jínahya. ⁹ Mé xíkaha tsjasóte sín la ko kjuaxróxinhya tsonhen kaín tí sín kjuích'e tí nkehe jínahya, mé senó tí sín judío la ko kjaxin tí sín jehya judío. ¹⁰ **A** ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuích'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínkí. ¹² Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. **A** ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótexín sín. ¹³ Jehya tí sín ó chrókuinhón tí ley la ó chrókótjuáxin ijíe sín. Náhí. Tí sín sinchexiteyéhe sín tí nkehe k'uetóan Dios mé tsotjuáxin ijíe sín. ¹⁴ **A** ntá tí sín jehya judío chóntahya sín tí ley t'etuñhen sín la ntá tíó jehó sín chrókjuinchexiteyéhe sín éxí nixja tí ley la jehí jehó sín t'etuñhen asén sín. ¹⁵ Kixin tí kjuínchexiteyá sín ch'e sín tí nkehe jína mé tjákoxin sín kixin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín ó náhí. ¹⁶ Itsi tí yaon la Dios mé sinchekitoexín kjuachaxin Inchéni Jesucristo kaín nkehe imó kjuích'e chojni éxí nixja tí tan jína tjákua janhan.

Tí sín judío la ko tí ley tsíkjin ch'ín Moisés

¹⁷ **A** ntá jahará ntáchorá kixin jahará judíorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios. ¹⁸ Ó nohará tí nkehe tjinkaon Dios la ko tí ley ó kjuakohará kixin chrókjuéyará tí nkehe jína. ¹⁹ Ihnkerá kixin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sítié, ichrorá. ²⁰ Ntáchorá kixin nohará tsjákohérá tí sín noehya la ko tsjínkítsará tí sín tienxínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá. ²¹ Jahará tjákohérá í so chojni, **a** ntá jahará, ¿nkekuènté tjákoéhyará asánrá xíkaha? Jahará tjákohérá chojni kixin chrókueéhya sín, **a** ntá jahará la, ¿nkekuènté teerá? ²² Ntáchorá kixin xitjahya tsochóna chojni yaá chojni chjin, **a** ntá jahará la, ¿nkekuènté xíkaha ch'erá? Ntáchorá kixin titekákonhyará tí nkehe tsíkjanoya, kjánchó jahará, ¿nkekuènté teerá tí nkehe tjete siín nkaxenhen ninko? ²³ Nchehnkerá kixin chontará tí ley, **a** ntá jahará chontahyará kjuasáyé Dios kixin kjuínchexiteyéhyará éxí k'uetóan tí ley. ²⁴ Ntoá ntáchro tí xroon itén Dios kixin: “Tí sín jehya judío la t'ántaxínhín sín Dios kixin tí ijíará.”

²⁵ **A** ntá tí chaxín kjuínchexiteyará tí ley tsíkjin ch'ín Moisés la ntá jehya chónkó tsíkará xroye. **A** ntá tí kjuínchexiteyéhyará tí ley la éxí tsíkahyará ninkehó xroye. ²⁶ **A** ntá tí sín tsíkahya xroye kjánchó titekaon sín nkexrí t'etoan tí ley la tjejó sín éxí ó tsíka sín xroye kjónté chaxínhya chóna sín. ²⁷ **A** ntá tí nkexro kuáhya xroye tí cuerpo chóna kjánchó nchexiteyéhe tí ley, mé jehe sín tsjanchia sín jie tí jahará kixin jahará kuitekákonhyará kjónté chontará tí xroon nixja tí ley la ko kjónté ó tsíkará xroye. ²⁸ **A** ntá tí xíkaha la chaxínhya judío jahará kixin ó ntója ó chontará xroye la chaxínhya tsíkará xroye kixin chrítaón cuérporá ó, chontará. ²⁹ **A** ntá tí chojni chaxín judío la t'ichjánxín chróchóna sín xroye nkaya asén sín. Jehya tí ley chrók'uetóan xíkaha chrókonhen. Náhí. Táha la Nchakuen Dios. Jehya kixin chojni chrókóxrjínhín kixin ó nchoxon. Náhí. Dios mé tsqxrjínhín kixin nchoxon tíha.

3

¹ ¿**A** ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye? ² Chaxín xíkaha jína kixin Dios kjuanjon tí itén ch'án saoxín k'uáyéhe tí sín judío kixin chrókjuinchexiteyá sín. ³ **A** ntá ¿nkehe tsonhen tí jnkójín tí jehe sín chrókjuinchexiteyáhya sín? Kjónté xíkaha chrókjuich'e sín la, ¿á chrókuítóhe Dios chrókjuinchexiteyáhya ch'án tí nkehe tsíntáchro ch'an? ⁴ Kjá náhí. Dios la sinchexiteyá kaín nkehe tsíntáchro ch'án kjónté kaín chojni chrókjuich'ia. Ntáchro xroon itén Dios kixin:

Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie.*

⁵ Tí jie chóntani mé tjakoxin kixin Dios mé nohe nkexrí sinchekitoexín ch'án ijíé chojni. ¿A ntá nkehe chróchroni? ¿Á ntoáhya chrókjuich'e Dios kixin chrókjuinchekjasóteni ní? (A ntá janhan nixja éxí nixja chojni ó.) ⁶ Kjá náhí. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitoexín ch'án ijíé chojni chjasintajni?

⁷ A ntá tí chrókjuínkítsa tí kjuach'ia kuéntana kixin chrókónoaxínrá tí nkehe chaxín kuènte Dios, ¿a ntá nkekuènté ts'ékaráni jie kixin janhan mé ijnko chojni chóna jie? ⁸ Tí xikaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xikaha ichro iso chojni t'ekani jie kixin xikaha tjakoni, ichro sín. Tí sín a chrókjuasóte sín kixin xikaha ichro sín.

Káinni chóntani jie

⁹ ¿Ntá nkexrí? Jeheni judíoni la, ¿á antsí má tjetoanni, a ntá tí sín í so la, á náhí? Kjá náhí. Kixin kaín ni chojni judíoni la ko tí sín jehya judío mé kaín ni kjuínchexiteyéheni tí jie kjuasinni. ¹⁰ Ntáchro tí xroon itén Dios kixin:

Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,

Kohya ninkexró chrókjuéyá Dios.

¹² Kaín chojni k'uék'aji sín tí ntia jínahya la ko kaín chojni jnkokón k'uáji sín ntoáhya, kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxí tòye tsíxrankehe tsíxravá chojni kixin tí nejen chojni ch'iyaxín.

La tí veneno kuènte konche chóna ir'va chojni.‡

¹⁴ Tí ir'va chojni tsíkaón nkehe jínahya la ko kjuanínkaon.§

¹⁵ Xritinká sín kixin tjinkaon sín chrók'óyán sín chojni.

¹⁶ Tí ntia k'uáji sín tió xikaha kjuich'e sín mé kjuínchek'itjáyan sín kaín kjuaxróxin k'uéchóna ókjé chojni.

¹⁷ Chónhya sín tí ntia tjanjon kjuaxróxin*

¹⁸ kixin kjuenkayáxinhya sín chróchrakonhen sín Dios.†

Mé xikaha ntáchro itén Dios.

¹⁹ Ó noheni kixin kaín tí nkehe nixja tí xroon chóna tí ley mé k'uetuènen kaín tí sín tinkáchónki tí ley kixin ntá kaín chojni chjasintajni chrótání sín kixin kaín chojni tsjasóte kixin Dios mé sinchekitoexín ijíé kaín chojni. ²⁰ Kixin ninkexró chrókjuacha chrókótjuáxin ijíé sín kixin chrókjuinchexiteyéhe sín tí nkehe t'etqan tí ley. Tí ley la jehó ch'e xra tsonoexínni kixin chóntani jie.

Tsaáxinni kixin tinkáchónkini Cristo

²¹ A ntá jehya tí ley chrókuaáxinni. La ntá ó kónoxín nkexrí Dios tsaáxinní la kjaxin tí xroon chóna ley la ko tí nkehe nixja tí sín profeta la ó nixja xikaha. ²² Tsotjuáxin ijíéni kixin titekaonni Jesucristo kixin kaín chojni chrókuaáxin tí tsitekaon sín tí jehe ch'án kixin t'ikon ch'án kixin jnkokón tsjehe kaín chojni. ²³ Kixin kaín xín chojni kjuasin jie la k'uáyèhya sín tí kjuachaxin chrókuaáxin sín. ²⁴ A ntá kjuasáyé Dios kixin k'uenyákonhenni Cristo Jesús la kótjuáxin ijíéni. ²⁵ Dios mé ichr'án ch'án Cristo, kuámá ijíéni, k'uenyákonhenni ch'án kixin chrókuinkáchónkini ch'án ntá chrókuaáxinni. Mé xikaha kjuich'e Dios kixin kjuakoxin ch'án kixin ntoá kjuenkayáxin ch'án kixin kónínkakonhya ch'án kjónté nchónhya jie tsíkjasinni senó. ²⁶ Xikaha kónhen kjuakoxin Dios kixin jína ch'án ijie la naxa tjechónhen ch'án sinchetjóá ch'án ijíé tí sín kuítekaon Jesús.

* 3:4 Salmo 51.4 † 3:12 3.10-12 Salmo 14.1-3, Salmo 53.1-3 ‡ 3:13 Salmi 5.9, 140.3 § 3:14 Salmo 10.7

* 3:17 Isaías 59.7-8 † 3:18 Salmo 36.1

²⁷ A ntá ¿nkekuènté chrókjuinchehnkeni? Xitjahya sinchehnke chojni nkayakon Dios kixin jehya kixin kjuínchexiteyéheni tí nkehe k'uętoan tí ley ntá chrókuaáxinni. Náhí. Kixin Ìnchéni kuítekaonni ntá kuaáni. ²⁸ Mé xikaha ó noheni kixin tsotjuáxin ijiéni tí tsitekaonni Dios kixin Dios tahya cuenta á kjuínchexiteyéheni tí nkehe k'uętoan tí ley.

²⁹ ¿Xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío. ³⁰ Kixin kohya í jnko Dios la jehe ch'án sinchetjóá ch'án ijiéni kixin tinkáchónkini ch'an la tahya ch'an cuenta á chóntani xroye o náhí. ³¹ A ntá tí tinkáchónkini Ìnchéni, la ¿á í chrókjuinchehnkeni tí ley? Kjá náhí. Íchá antsí má jina chrókjuinchehnkeni tí ley.

4

Tí kjuakoxin ch'ín Abraham

¹ ¿Nkehe tsixroni kixin nkehe k'uitja ch'ín Abraham, tí nkexro k'uaxrjeníxinni ósé? ² Ntá ch'ín Abraham tí chrókótjuáxin ijié ch'án kixin tí xra kjuích'e ch'án ntá chrókóhnke ch'án, kjónté jehya nkayakon Dios. ³ A ntá ntáchro xroon itén Dios kixin: “Ch'ín Abraham kuítekaon Dios ntá táhó kuaáxin ch'án la ko kótjuáxin ijié ch'án.”* ⁴ Jnkojín chojni kjuích'e xra la jehya k'uáyéhekoá ch'án tí chichaon. Náhí. Táha la tí xra kjuích'e ch'án mé kjuacha ch'án. ⁵ A ntá kjónté jnkojín chojni kjuích'ehya ninkehó xra ntá chrókuítekaon ch'án Dios a ntá Dios la sinchetjóá ch'án kjónté tí nkexro chóna jie, kixin tí kuítekaon ch'án Dios la táhó mé kuaáxin ch'án. ⁶ Mé kjaxin tsintáchro ch'ín David kixin náxrjón tí nkexro kótjóá kixin Dios kuáhya kuentá nkerí jie tsíkjasin ch'án. ⁷ Ntáchro ch'ín David kixin: Náxrjón tjejó tí nkexro kjuíncheyaon Dios kjónté jínahya kjuích'e sín la kjuakjìn ch'án ijié sín.

⁸ Náxrjón tjejó tí nkexro kixin Ìnchéni kuáhya ch'án kuentá tí jie k'uéchóna sín.†

⁹ ¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chóntahya xroye? Ó chrónkani kixin Dios la kuikonóehé tí ch'ín Abraham kixin kuítekaon tí jehe ch'án la táhó mé kótjuáxin ijié ch'án.‡ ¹⁰ ¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naxa náhí? Kjá naxa náhí. Senó tsíkjincheyaon Dios tí jehe ch'án. ¹¹ Ntá chr'éxin ch'ín Abraham ikuá ch'án tí xroye éxí ijnko sello kjuakoxin Dios kixin ó kótjuáxin ch'án kixin kuinkáchónki ch'án Dios. Kixin ntá xikaha ts'óna ch'ín Abraham xjeen kaín chojni tinkáchónki Dios, kjónté chojni tsíkahya xroye. Ntá kjaxin jehe sín la Dios sinchetjóá ijié sín. ¹² La ko jehe ch'ín Abraham mé ts'axrjeníxin ch'án kaín tí sín tsíka xroye kixin ntá chrókuinkáchónki sín éxí kuinkáchónki tí jehe ch'án kjónté naxa tsíkahya ch'án xroye.

Tí nkehe tsintáchro Dios la tsoxiteyá kixin tinkáchónki sín tí jehe ch'án

¹³ Dios tsintáche ch'ín Abraham kixin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya kixin kuítekaon ch'án tí ley. Náhí. Ts'áyéhe ch'án tíha kixin kuítekaon ch'án Dios la ntá Dios mé kjuínchetjóá ijié ch'án. ¹⁴ A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xikaha la ko tí nkehe tsintáchro Dios la kjá ninkehó sínkíhya tí xikaha. ¹⁵ Kixin tí ley la tjikao kixin tsjasótexín chojni, a ntá tí chrókókohya ley la chrókókohya nkehe chrókjuanchia jie.

¹⁶ Méxra tí nkehe tsintáchro Dios la kjuasáyé ch'án tsjanjon ch'án kixin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhí. Kjaxin tí sín tsitekaon éxí kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni. ¹⁷ Éxí nixja xroon itén Dios kixin: “Janhan kjuánjuan

* 4:3 Génesis 15.6 † 4:8 4.7-8 Salmo 32.1-2 ‡ 4:9 Génesis 15.6

kjuachaxin kixin jaha ts'óna it'é nchónhya chojni chjasintajni.”⁸ Mé xikaha tjetsjehe Dios kixin jina kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etōan ch'án kixin ts'óna tí nkehe naxa kohya.

¹⁸ Kjonté k'uéchóntahya ch'ín Abraham xjeen ch'án la kuítekaon ch'án la chónhen ch'án kixin ts'óna ch'án it'é nchónhya chojni éxí tsíchronka Dios kixin xikaha nchónhya chojni ts'axrjenixin ch'án. ¹⁹ Ch'ín Abraham k'uéchónta ch'án chjina ijnko ciento nánó la kjánchó k'uitjáyenhya ch'án tinkáchónki ch'án Dios, kjonté jehe ch'án la ko tjan Sara mero its'en sín la ko ó má táda nána sín kixin naxa chróchónta sín xjeen sín. ²⁰ Ch'ín Abraham la kóxakuenhya ch'án la ko chrakonhya ch'án kixin tí nkehe tsjanjon Dios. Náhí. Íchá antsí má kuinkáchónki ch'án Dios la ko kjuanchehe ch'án kjuasáyé Dios. ²¹ Ó nohe ch'ín Abraham kixin Dios chóna kjuachaxin sinchexiteyá kaín nkehe tsintáchro ch'án. ²² Dios k'uíkon kixin jehe ch'ín Abraham kuítekaon ch'án ntá Dios kjuínchetjóá ijíé ch'án.

²³ La jehya kixin tsík'óna tí xroon kixin tí ch'ín Abraham ó. ²⁴ Náhí. Tsíkjin sín xroon kixin kjaxin jeheni chrókótjuáxin ijíéni kixin tsitekaonni Dios. Tíhi mé tí nkexro kjuínchexechón Ìnchéni Jesucristo. ²⁵ Jehe ch'án mé k'uenyákonhenni ch'án kixin tí jje chóntani. Ntá xechón ch'án inaá kixin tsotjuáxin ijíéni kixin ó kuítekaonni tí jehe ch'án.

5

Kótjuáxin tí jje chóntani

¹ Kótjuáxin tí jje chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo. ² Kjuasáyé Cristo kixin jina tsochjineheni Dios kixin tinkáchónkini ch'án ntá ts'áyéheni kjuachaxin kuénte ch'án. Ntá tí kjuachaxin la jina tsjinkitsa kixin jina ts'ejóni la ko tsochéheni ts'ejóchónhenni kixin ntá tsjintaxín ts'áyéheni tí kjuachaxin jíe kuénte Dios. ³ Kjaxin jehya táhó. Náhí. Kjaxin tsochéheni kjonté nchónhya nkehe tsonhenni kixin ó noheni kixin xikaha tsonhenni kixin ntá ts'itjani tsonínkakonhyani. ⁴ A ntá tí xikaha jina chrók'uejóni ntá tsjachani kixin jina ts'ejóchónhenni. ⁵ A ntá tí tjejóchónhenni la tósuehyani kixin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

⁶ Tí jehóni xitjahya chrókuaáni. A ntá tío ikui Cristo la k'uenyákonhenni ch'án kixin tí jje chóntani. ⁷ Kjá ninkexró chróntáchro chrók'uenyákonhen sín í jnko chojni kjonté ijnko chojni imá jina tjuèhe kichó. Kohya nkexro xikaha chrókjuich'e. ⁸ A ntá Dios mé kjuakoxin kixin imá tjuèheni ch'án kixin kjonté naxa chóntani jje la Cristo k'uenyákonhenni. ⁹ A ntá Dios mé kjuínchetjuáxin ch'án ijíéni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótexínni. ¹⁰ Kjonté naxa k'uénínkakonhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án. ¹¹ La jehya chrókótíhó. Kjaxin tsochéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxínni kjuaxróxin tí tjen Dios.

Adán la ko Cristo

¹² Mé xikaha ó jnko nkexro kjuasin jje ntá k'uíxin jje kuenté chjasintajni. Mé xikaha kjuankixin k'uén chojni ntá kaín chojni kjuankixin k'uén kixin kaín sín kjuasin sín jje. ¹³ Kixin ósé la k'uékohya ley ntá ó xráxín k'uíxin jje chjasintajni kjánchó naxa kohya ley chrókjuanchia jje chrókjuasótexín sín. ¹⁴ Desde kjuák'e ch'ín Adán hasta kjuák'e ch'ín Moisés la k'uéchónta kjuachaxin tí kjuach'én kixin tí jje kjuasin sín mé k'uenxín sín. Kjánchó tí jje kjuasin sín la yóehya tí nkehe kjuích'e ch'ín Adán, kuítekakonhya ch'án tí nkehe k'uetoan Dios. Ntá ch'ín Adán yóhe tsotsjehe éxí tí nkexro tsi chr'éxin.

¹⁵ Ntá tí jje kjuasin ch'ín Adán la xitjahya chrókóyóhe tí nkehe tsjanjon Dios kixin tí jje kjuasin jnkokóá chojni la ntá nchónhya chojni k'uenxín. A ntá tí tsaáxinni la kjuasáyé

Dios ichr'án jnkokoá nkexro mé Jesucristo la antsí má jína tíha kíxin tsaáxin nchónhya chojni. ¹⁶ A ntá tí jie kjuasin jnkokoá chojni la tóyóehya tí nkehe tsjanjon Dios tsaáxinni. Kíxin tí jie kjuankíxin kjuasótexín chojni kíxin kjuasin jnkokoá chojni jie. A ntá tí tsaáxinni la kjuasáyé Dios sinchekaáni ch'án la ko nchetjóa ch'án tí jie chóntani kjónté nchónhya jie kjuasin chojni. ¹⁷ Tí kjuach'én la k'uéchónta kjuachaxin kíxin tí jie kjuankíxixin kjuasin jnkokoá chojni. A ntá kjuasáyé Dios kjuínchetjóa ch'án tí jie chóntani la ntá antsí tsochóntani kjuachaxin ts'ejóni jína kíxin k'uenyákonhenni jnkokoá nkexro, mé Cristo tíha.

¹⁸ A ntá tí jie kjuasin ch'ín Adán la ntá kaín chojni kjuasin sín jie chrokjuasótexín sín. A ntá ijie la Cristo mé kótjuáxin ijie kaín chojni kíxin tí jína ch'án k'uenyákonhenni ch'án. ¹⁹ Mé xikaha kuítekakonhya jnkokoá chojni, mé Adán tíha, ntá nchónhya chojni kjuasin jie. A ntá jnkokoá nkexro jína kuítekaon kjuakoxin, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jie.

²⁰ Ikui tí ley kuínhin sín ntá kónoxín kíxin íchá antsí kjuasin sín jie. A ntá antsí k'uíxin jie la kjónté xikaha la antsí má kuikonóeheni Dios kíxin jehe ch'án tsjinkitsani ch'án tsaáxinni. ²¹ Mé xikaha tí jie k'uíxin k'uéchónta kjuachaxin kjuikao kjuach'én chrók'uenxinni. A ntá kjuasáyé Dios kjaxin antsí má chóna ch'án kjuachaxin sinchetjóa ch'án tí ijieni la ko tsjanjon ch'án kjuachón jnkochrín kíxin Inchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jie ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jie kíxin ntá Dios naxa chrókjuakoxin ch'án kíxin chrókuikonóeheni ch'án? ² Kjá náhi. A ntá jeheni la éxi chojni tsík'en chrokjuahya tsjasin jie. ¿A ntá nkekuènte naxa chrókjuasinni jie inaá? ³ ¿Á noahyará jahará kíxin tí kuíkiteni kíxin tinkáchónkini Cristo la yóhe k'uénkoni ch'án? ⁴ Tí kuíkiteni la éxi yóhe xravákoni Cristo la ko tsík'enkoni ch'án kíxin ntá ó xechónni ntá chrók'uajini ijnko ntia nixin mé xikaha Cristo xechónxin ch'án tí kjuachaxin jie chóna tí It'é ch'án.

⁵ Kíxin tí chaxín k'uénxinni éxi ik'uén tí jehe ch'án la ntá kjaxin tsoxechónni éxi xechón tí jehe ch'án. ⁶ Ó noheni kíxin nkexrí k'uejóni senó mé táha mé k'uénxín Cristo kjuák'enkánixín ch'án ntacruz kíxin ntá chrók'uitjáyaxín kaín tí jie k'uékjasinni kíxin ijie í chrókjuinchexiteyèhyani tí jie. ⁷ Tí nkexro ó k'uén la ntá ó kuitohe tí jie. ⁸ A ntá jeheni tí k'uénxinni Cristo la ó noheni kíxin ts'ejókoni tí jehe ch'án. ⁹ Kíxin ó noheni kíxin Cristo jnkokoá vez xechón ch'án a ntá í ts'enhya ch'án inaá kíxin tí kjuach'én í chóntahya kjuachaxin kíxin naxa ts'óyán tí jehe ch'án. ¹⁰ Tí ik'uén Cristo la ó naá ik'uén ch'án kíxin k'uenyákonhenni ch'án kíxin tí ijieni. Ntá xechón ch'án ijie kíxin tsjak'eko ch'án Dios. ¹¹ A ntá kjaxin jahará chrókjuenkayáxinrá kíxin ik'uénrá, xitjahya tsjásinrá jie kíxin ntá ijie la xíxechonrá chrókjuich'eherá xra Dios kíxin tinkachónkirá Cristo Jesús, mé Inchéni tíha.

¹² Méxra chrókuitoéhyará kíxin chrókjan tí jie chrók'uetuhenen tí cuérporá inaá kíxin tí jie chrók'uetōan kíxin chrókjuinchexiteyéhérá tí nkehe tjenkayáxinrá. ¹³ Tjánjonhyará tí cuérporá kíxin chrók'óna nkehe chrókjuásixínrá jie. A ntá íchá jína chróchjehérá asánrá Dios éxi ijnko chojni tsík'en ó xíxechón inaá. Chjehérá Dios tí cuérporá ts'óna ijnko nkehe sich'exín ch'án xra jína. ¹⁴ Kíxin tí jie la í chóntahya kjuachaxin ts'etuhenen tí jahará. Jehya tí ley ts'etōan ijie. Náhi, jehó kjuasáyé Dios.

Kjuíncheyóexin ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jie kíxin í t'etuhenhyani tí ley? Kjá náhi. Kjuasáyé Dios tsaáxinni la kjá í chrókjuasinhyaní jie. ¹⁶ Jahará ó nohará jína kíxin tí sich'eheni ijnko lámō xra la tsitekakonhenni ch'án la tí xikaha la t'ichjánxin ch'eheni xra tí lámō la t'ichjánxin sinchexiteyèhenni ch'án. Mé xikaha tónhen tí naxa sinchexiteyèhenni tí jie

la táha mé ts'enxínni. A ntá tí tsitekaonni Dios la mé chrók'uejóni jnkojína. ¹⁷ Jahará la ósé k'uékjásinrá jie, a ntá ijie kjuasáyé Dios kuikonóahará ch'án kixin kaín asánrá kuítekáonrá tí nkehe xrakohará. ¹⁸ A ntá ó kuítóhéré tí k'uékjinchexiteyéhéré tí jie. A ntá ijie ó kjuánjonrá asánrá kixin sich'erá xra jína kuènte Ìnchéni. ¹⁹ A ntá jie nixja éxí ijnko chojni ó kixin jahará la tiénxinhyará jína tí nkehe i. A ntá xikaha tí senó kjuinchexiteyéhéré tí nkehe ntoáhya la ko jínahya kixin sich'erá tí nkehe jínahya. A ntá ijie la xikaha chrókjuánjonrá tí cuérpo kuéntará kixin chrókjuich'exínrá tí xra jína éxí tjinkaon Dios kixin ntá jehe ch'án chrókjuinchetjóará ch'án.

²⁰ A ntá tí jahará tió naxa kjuinchexiteyéhéré tí jie la ntá xitjahya sich'erá tí xra jína ntoá. ²¹ ¿A ntá nkehe chrókjuachará kixin xikaha kjuich'erá tí nkehe chrókósuàxinrá ó? Ntá xikaha kjuéyará tí nkehe ts'énxinrá ó. ²² Na ntá ijie ó kjuìn tí nkehe k'uék'etuñhanrá k'uékjásinxínrá jie. A ntá ijie ch'eherá xra Dios. Táha la tsjinkitsa kixin ts'ejoxínrá jína kixin ntá tsjixixín tsotjuáxinrá ts'ayéhéré kjuachón jnkochríxín. ²³ A ntá tí chrókjuasinni jie la chrókjuachani kixin éxí chrók'uenni ó. A ntá tí nkehe chrókjuinchekitonhenni Dios la kjuachón jnkochríxín kixin tinkáchónkini Ìnchéni Cristo Jesús.

7

Kjuíncheyóexin ch'ín Pablo kuènte tí sín tsíkótehe

¹ Kíchéni, jahará ó choxinrá tí ley la ó nohará kixin tí ley chóna kjuachaxin ts'etuñhen tí chojni naxa tjejóchón ó. ² Tíha mé ts'axrjéxín éxí ijnko chojni chjin tsíkótehe la tí xìi tjan chóna kjuachaxin ts'etuñhen tjan kixin naxa tjechón ch'án. A ntá tió tsík'en tí xìi la ntá tí tjachjin la ó kuítóhe tí k'uék'etuñhen ch'án tjan. ³ A ntá tí jehe tjan chrókuakja í jnko chojni ntoa tí naxa tjechón xìi tjan la ó chrókjuasin tjan jie. A ntá tió tsík'en xìi tjan la jehe tjan la ó kuítóhe tí k'uék'etuñhen ch'án tjan la jína tsotehe tjan í jnko chojni ntoa la jehya jie tíha.

⁴ Mé xikaha jahará kíchó ni mé k'uenyákonhenni Cristo la ntá jahará la éxí tsík'enrá kixin í t'etuñhyará tí ley la éxí chrókuákjára í jnko xíará la mé xikaha tinkachónkirá Cristo. Cristo mé xechón ch'án inaá kixin ntá jína chrókjuich'ehe ni xra Dios. ⁵ Tió naxa k'uékjasinni jie a ntá tí ley chrókjuich'e xra kixin chrókjuasinhanyi jie, a ntá íchá antsí má kjuasixínni jie tí cuerpo kuénténi, la táha mé kjuixín tí ts'enxínni. ⁶ A ntá ijie la éxí yóhe ik'uénni, a ntá tí ley chónahya kjuachaxin naxa ts'etuñhenni. A ntá ijie í kohya nkehe t'inkákonhen kixin jína sich'ehe ni xra Dios kixin k'ónani ijnko chojni nixin kixin tí Nchakuen Dios k'uáyéhe ni. A ntá í t'etuñhyani tí ley ntaxin tsík'óna.

Tí jie naxa chonta

⁷ A ntá tí xikaha la, ¿nkehe chróchroni? Kixin tí ley la, ¿á jie táha ní? Kja náhí. Kjánchó janhan chrókónonahya nkehe tí jie tí chrókohya tí ley chróchronka. Chrókónonahya kixin tí nkehe ókjé chrókjuakéhya asenná tí chróchronkahya tí ley kixin chrókjuakéhya asenná tí nkehe ókjé. ⁸ A ntá tió kónóna tí ley a ntá tí jie antsí kjuacha k'uetóan. La ntá k'uíxin kaín nkehe ntáchro asenná. A ntá tí chrókohya ley la chrókónoxínhya tí jie chrók'uenxian. ⁹ A ntá tí ósé la nonahya nkehe tí ley. A ntá tió nóna nkehe tí ley, a ntá antsí kjuásian jie la ntá ó nóna kixin tí jie kjuásian me ts'énxian. ¹⁰ Mé xikaha kónhen kixin tí ley chrókjuanjon kjuachón ntá kjuikao tí ts'enxínni. ¹¹ Ntá tí jie mé kjuacha k'uetóan kixin sintaxiteyáhya tí ley. A ntá tí ley mé kjuanchia jie ts'énxian.

¹² Mé xikaha tí ley la chaxín jína la ko tí nkehe t'etóan Dios la kjaxin jína. ¹³ Mé xikaha tí nkehe jína la ¿á táha chrók'uénxian? Kja náhí. Tí jie kjuásian mé ts'énxian. Mé xikaha kjuakoxin tí nkehe jie kixin tsonoxín tí jie kixin tí ley la jína. Mé xikaha kjuakoxin tí ley kixin tí jie tjasin chojni mé imá jínahya tíha.

¹⁴ Ó noheni kixin tí ley la kuènte Dios tíha. A ntá janhan la kjuintaxiteyáha tí ntáchro asenná kixin tí jie kjuacha k'uetuanna. ¹⁵ A ntá tí janhan la tí nkehe tjét'a la kjaxin

naxa tianxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a. ¹⁶ A ntá tí nkehe tjínkakonhya chrókjuít'a la tíha me it'a la mé xikaha tjátsoanxián kixin tí ley la jína. ¹⁷ A ntá jehya janhan it'a tíha. Náhí tí jie chonta mé ch'e tíha. ¹⁸ Kixin janhan ó nòna kixin tí ntáchro asenná la kohya nkehe jína chrókjuít'a. Tjínkavan chrókjuíntaxiteyá tí nkehe jína kjánchó tjachahya sít'a tíha. ¹⁹ T'ahya tí nkehe jína chrókjuít'a. Tí nkehe jínahya tjínkakonhya chrókjuít'a mé it'a. ²⁰ A ntá tí it'a tí nkehe jínahya tjínkakonhya chrókjuít'a la ntá jehya janhan it'a tíha. Náhí. Tí jie chonta mé ich'e tíha.

²¹ Tónòna tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya. ²² Kjónté xikaha la tóxrjínna chrókjuíntaxiteyáha tí ley kuènte Dios. ²³ T'íkuan kixin tí nkehe ntáchro asenná mé t'inkákonhen tí nkehe tjínkavan chrókjuít'a. A ntá tí jie chonta mé éxí tjéchinaxián tíha.

²⁴ Nòna tí janhan. ¿Xá nkexro chrókjuatsen tí jie chóna tí cuerpo kuèntana chrók'uenxian? ²⁵ Kjuasáya tjaha Dios kixin ikui Ìnchéni Jesucristo kuaáxinni. Mé xikaha tí janhan la it'ona tjenkayáxian kixin chrókjuíntaxiteyáha Dios a ntá tí t'ona mé ntáchro asenná chrókjuíntaxiteyáha tí nkehe kuènte tí jie.

8

Tjejóchónxinni Nchakuen Dios

¹ A ntá ijie tí sín tinkáchónki Cristo Jesús la kohya jie chrókjuasótexín sín. Jehé sín í tjínkakonhya nchexiteyá sín xikaha ntáchro asén sín. Jehó tjínkaon sín sinchexiteyéhe sín Nchakuen Dios. ² Kixin tí nkehe t'etoan Nchakuen Dios mé tjanjon kjuachón kixin tinkáchónkini Cristo Jesús. Tíha mé kjuatsen tí nkehe kuènte jie chrók'uenxinni. ³ A ntá Dios kjuích'e tí nkehe kjuachahya kjuích'e tí ley kuènte ch'ín Moisés kixin jeheni kjuachahyani chrókjuinchexiteyéheni tíha. A ntá Dios mé ichr'án ch'án Xjeen ch'án k'óna éxí chojni. La xra ó kui ch'án k'uenyákonhen ch'án tí ijiéni kaín ni ntíhi chjasintajni la kjuatsen ch'án tí jie chrók'uitjáyanxinni. ⁴ Mé xikaha kónhen kixin ntá jeheni jína chrókjuinchexiteyéheni tí nkehe t'etoan tí ley la chrókjuinchexiteyéhyani tí nkehe ntáchro asénni ó. Náhí. Chrókjuinchexiteyéheni tí nkehe ntáchro Nchakuen Dios.

⁵ A ntá tí sín tjínkaon nchexiteyéhe tí nkehe ntáchro asén sín ntá táhó tjenkayáxin sín. A ntá tí sín tjínkaon nchexiteyéhe Nchakuen Dios la ntá xritjeyá sín tí nkehe kuènte Nchakuen Dios. ⁶ A ntá tí sín tóxakonhen tí nkehe ntáchro asén sín la táhó ts'enxín sín. A ntá tí sín tóxakonhen tí nkehe kuènte Nchakuen Dios la tsochóntaxín sín kjuachón la ko kjuaxróxin. ⁷ A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kixin tjínkakonhya sín la ko titekakonhya sín tí ley. ⁸ Tí sín tóxrjínhin sín tí nkehe ntáchro asén sín ó la xitjahya sinchechéhe sín Dios.

⁹ A ntá jahará la nchexiteyéhyará tí nkehe ntáchro asánrá. Náhí. Jahará nchexiteyéhérá Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo. ¹⁰ A ntá tí Cristo tjejókoará tí jahará la tí asánrá la tjechón kixin Dios kjuikonóghará, kjuínchetjóá ch'án tí ijiará, kjánchó tí cuerpo la éxí tsík'en kixin tí jie chontará. ¹¹ A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjéhe ch'án kjuachón nixin tí cuerpo kuèntará kjónté chóna jie kixin tí Nchakuen Dios chontará jahará.

¹² Mé xikaha kichó ni, ó chóntani nkehe sinchexiteyéheni, kjánchó í chrókjuenkayáxinhyani tí nkehe ntáchro asénni. ¹³ A ntá jahará tí chrók'uejorá éxí ntáchro asánrá la tíha la mé chrók'uenxínrá. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínrá.

¹⁴ Kaín tí nkexro t'etuenhen Nchakuen Dios la mé ó k'óna xjeen Dios. ¹⁵ Ntá Nchakuen Dios ó k'uayéherá jahará la jehya tí nchakuen tí nkehe k'uék'etuanhanrá ósé kixin chróchrakonrá. Náhí. Ntá tí Nchakuen chóntani la k'ónaxínni xjeen Dios. A ntá tí Nchakuen ch'án nchexraxinkaonni tsontáchroni kixin: "It'eni Dios kuéntá tí jeheni." ¹⁶ Tí Nchakuen Dios tónoexín nchakuenni kixin k'ónani xjeen Dios. ¹⁷ A ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxí tsíntáchro ch'án ósé. Mé ts'áyèkoni Cristo tí nkehe tsjanjon Dios. Tí chaxín tsjasóteni éxí Cristo kjuasóte ntá chr'éxin ts'ejókoni ch'án kjuaxróxin.

Tí kjuachaxin jié itsi chr'éxin

¹⁸ A ntá ijie la tóxakuenhyani kjónté nkehe ts'atsínkani tsjasótexínni kixin tíha la ninkehó sínkíhya kixin tíha la xitjahya tóyóhe tí nkehe ts'áyéheni chr'éxin kixin antsí má jína náxrjón tíha. ¹⁹ Tí nkehe tsík'óna tjejóchónhen kixin ts'ikon tí sín tsík'óna xjeen Dios. ²⁰ Kjónté kaín nkehe tsík'óna síin la ts'itjáyan tíha la jehya kixin xikaha tjinkaon tí nkehe tsík'óna. Náhí. Jehí xikaha tsík'etōan Dios. Ntá tjejóchónhen kaín nkehe tsík'jich'éna Dios ²¹ kixin chróchónta kjuachaxin chrók'uitjáyanhya. Ntá náxrjón ts'ixin kaín nkehe éxí náxrjón ts'ejó tí sín tsík'óna xjeen Dios. ²² Ó noheni kixin kaín tí nkehe kjuích'éna Dios la naxa tsjasóte éxí yóhe tjetéxin ijnko chojni nchekokjíhi xjeen. ²³ A ntá jehya jehó tí nkehe tsík'óna t'ikon chojni chrókjoté. Náhí. Kjaxin jeheni tjasóteni kjónté chóntani Nchakuen Dios kixin tí Nchakuen Dios la mé tí nkehe xrankíxixín kuákjani la naxa ts'áyéheni inaá tí nkehe naxa tsjanjon Dios. Tjejóttjasóteni la ko tjejóchónhenni kixin tsjintaxín ts'ónani xjeen Dios la ko ts'áyéheni tí cuerpo chónhya ts'en. ²⁴ Mé ó kuaáxinni la naxa tjejóchónhenni tí nkehe t'ikonhyani. Tí k'uíkonni tí nkehe tjejóchónhenni ntá t'ichjánxinhya chrók'uejóchónhenni. Tí nkehe ó t'ikonni la t'ichjánxinhya chrók'uejóchónhenni naxa chrók'uikonni inaá. ²⁵ A ntá tí chónhenni tí nkehe naxa t'ikonhyani la ntá t'ichjánxin tsonínkakonhyani tsochónhenni.

²⁶ Mé kjaxin xikaha tí Nchakuen Dios tjinkitsani tí noehyani nkexrí tsonixjeheni Dios kixin chaxín noehyani tsonixjeheni ch'án éxí chrónixjani. A ntá tí Nchakuen Dios tjinkitsa nixjaxin ch'án tí jeheni kjónté noehyani nkexrí tsochrónóaxinni éxí tjinkaon ch'án. ²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxí tjinkaon Dios la nixjaxin ch'án tí sín tinkáchónki Dios.

²⁸ Ó noheni kixin Dios la k'uetōan kaín nkehe chrók'uaxrje jína kixin tí sín tjuèhe ch'án kixin tsík'jeyá ch'án sín kixin xikaha tjinkaon ch'án. ²⁹ Tí sín tsík'jeyá Dios ósé la ntá tsík'íyehé ch'án kixin ts'óna sín éxí tí Xjeen ch'án kixin ntá tí Xjeen ch'án mé ts'etuenhen nchónhya tí sín kichó ch'án. ³⁰ Mé xikaha tí sín tsík'jeyá Dios ósé mé kjaxin k'uíyehé ch'án sín la ko tí sín k'uíyehé ch'án la kjuínchetjóá ch'án ijie sín la ntá tí sín kjuínchetjóá ch'án ijie la kjuanjon ch'án kjuachaxin kuènte ch'án tsochónta sín.

³¹ ¿A ntá nkehe chróchroni tí xikaha? Tí Dios tjuèhe tí jeheni, ¿a ntá nkexro chrókjuacha chrókónínkakonhen tí jeheni? ³² Kixin Dios la kjiakuènhya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án. ³³ ¿Nkexro chrókjuacha chrókjuanchia jié chrókónínkakonhen tí sín kjueyá Dios? Kixin Dios la ó kjuínchetjóá ijie tí sín a. ³⁴ ¿Nkexro chrókjuinchekjasóte tí jehe sín? Kixin Cristo la ó k'uenyákonhen sín la kjaxin xechón ch'án inaá la itjen ch'án tí tja chjina Dios tjen nkaya nkajní la tjechronòa ch'án kixin kaín tí jeheni. ³⁵ ¿Xá nkexro chrókuakitsjeheni tí tjuèheni Cristo? Kjónté ichrén nkehe chrókónhenni la ko chrókónínkakonhen chojni tí jeheni la ko kjónté chrók'uenxínni kjinta la ko chróchóntahyani ikéni o kjónté tí kjuaxikaon chrók'uenxínni la chrókuítōehya ch'án tí jeheni. ³⁶ Éxí ntáchro xroon itén Dios kixin:

Tí tinkáchónkini tí jaha la síin kjuaxikaon kaín yaon chrók'uenxínni.

Chrók'óyánni sín éxí t'óyán sín kolélo tí matanza.*

³⁷ Kaín tíha la antsí chrókjuachaxinni kixin kjuachaxién tí nkexro tjuèheni. ³⁸ Ó noheni kixin ninkehó nkehe tsjachahya tsakitsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxién tí jínahya, o kjónté tí nkehe sítónhen ijie, o tí nkehe tsonhen chr'éxin, ³⁹ o kjónté tí nkehe síin nkaya nkajní, o tí nkehe imá ninka síin chjasintajni, o í jnko nkehe kjuích'éna Dios. Mé kohya nijnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Ìnchéni Jesucristo.

9

Dios kjueyá tí sín Israel

¹ Ntoá xrxanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxín. ² Imá t'ává asenná la ko náxrjónhya tjèn ³ kixin tjínkavan kjónté chrók'uitjáyanxinna tí tinkachónkia Cristo kixin ntá jína chrókuinkáchónki Cristo tí sín kichiná naxa kjéhyana. ⁴ Jehe sín mé tsík'axrjeníxin sín tí sín Israel la Dios k'uáyéhe sín éxí xjeen ch'án la ko Dios chónthehe tí jehe sín la kjuanjon kjuachaxién ch'án la kjaxin k'uáyéhe sín tí nkehe k'uetōan Dios la ko ti ley tsíkjin ch'ín Moisés la ko k'uáyéhe sín kjuachaxin ts'etōan sín kixin nkehe tí xra tsonhen nkaxenhen ninko la ko k'uáyéhe sín tí nkehe tsíntáchro Dios. ⁵ Tsík'axrjeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tió k'óna ch'án chojni. Jehe ch'án mé Dios kuènte kaín nkehe la tinkáchónkini ch'án jnkochríxín. Amén.

⁶ A ntá tí nkehe chrókuakja tí sín Israel kjuanjon Dios la jehya kixin chróxiteyáhya tíha. Náhí. Kixin jehya kaín tí sín tsík'axrjeníxin tí sín israelita mé chrók'óna sín chojni chjasin Israel. ⁷ Kixin kénhya tí sín k'uxrjeníxin ch'ín Abraham chrók'óna xjeen ch'án. Dios mé tsíntáche ch'ín Abraham kixin: “Tí sín ts'óna kjéhya jaha mé ts'axrjeníxin sín ti ch'ín Isaac.”* ⁸ Tíhi mé tienxínni kixin ninkexró xitjahya ts'óna xjeen Dios kixin tí tsík'axrjeníxin sín chojni ó. Náhí. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án. ⁹ Tí nkehe tsíchenka Dios tí ch'ín Abraham mé tíhi: “Itsi ijnko yaon mé tjan Sara sich'éna tjan ijnko xjan.”†

¹⁰ A ntá jehya táhó. Náhí. Kjaxin tí yaá chánjan tsíkjich'éna tjan Rebeca mé chóna jnkokoá it'é xjan mé it'in Isaac, mé tsík'axrjeníxinni ch'án. ¹¹ A ntá tí xjan la naxa kokjéhya xjan la ninkehó nkehe jína o jínahya kjuích'e xjan. Ntá kjuakoxin Dios kixin chóna ch'án kjuachaxin éxí tsíkjenkayáxin ch'án tsjeyá ch'án nkexro ts'íyehé ch'án la tahya ch'án kuentá nkehe tí xra kjuích'e sín. ¹² Ntá kjónté la ntá chenka ch'án tí tjan Rebeca kixin: “Tí ch'ín sao mé sich'ehe xra tí ch'ín tsoyo.”‡ ¹³ Mé kjaxin xikaha ichro xroon itén Dios kixin: “Tjuahā Jacob, a ntá Esaú la náhí.”§

¹⁴ ¿A ntá nkehe chróchroni? ¿Á ntoáhya tjenkayáxin Dios? Kjá náhí. ¹⁵ Kixin tsíntáche Dios tí ch'ín Moisés kixin: “Tsojtjuahā tí nkexro tjínkavan tsojtjuahā la ko tsíkonóahā tí nkexro tjínkavan tsíkonóahā.”* ¹⁶ Jehya éxí tjinkaon chojni o jehya kixin tí nkehe ch'e chojni. Náhí. Ó jehí Dios tsíkikonóehé ti jehe sín. ¹⁷ Tí ntáchro xroon itén Dios mé nixjehe Dios tí ch'ín rey Egipto kixin: “Kjuánjuan kjuachaxin kixin jaha k'óna rey kixin tjínkavan chrókjuakoxian kjuachaxin kuèntana kixin ntá kuenté chjasintajni chrókónohe la chrókuitekaon tí nina.”† ¹⁸ Mé xikaha tí tjinkaon Dios tsíkonóehé ch'án chojni la tsíkonóehé ch'án, a ntá tí nkexro tjinkakonhya ch'án tsíkonóehé ch'án la tsíkonóehya ch'án.

¹⁹ A ntá tsontáchorrá kixin: “A ntá tí xikaha la, ¿nkekuènté t'eka Dios chojni jie? ¿Nkexro chrókjuacha chrókjuanjonko tí nkehe t'etōan Dios?” ²⁰ ¿Xá nkexro tí jahará

* 8:36 Salmo 44.22 * 9:7 Génesis 21.12 † 9:9 Génesis 18.10 ‡ 9:12 Génesis 25.23 § 9:13 Malaquías 1.2-3

* 9:15 Éxodo 33.19 † 9:17 Éxodo 9.16

kixin chróntácherá Dios xikaha? ¿Á ti chí tsík'óna nchetje chróntáche tí ìnché chí kixin: “¿Nkekuènté xikaha kjuich'énani?” chróchro. ²¹ A ntá kjaxin tí nkexro ch'éna chí mé chóna kjuachaxin tjinkaon sich'éna ch'án tí nkehe tóxrjínhin ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhya.

²² Tjinkaon Dios chrókjuakoxin ch'án tí kjuachaxin kuènte ch'án chrókjuincheckjasóte ch'án chojni la kjónté xikaha kónhen la kjuacha ch'án kónínkakónhya ch'án la kuikonóehé ch'án tí sín chrókjuincheckjasóte ch'án kixin chrókjuincheck'itjáyan ch'án sín. ²³ Mé xikaha kjuich'e ch'án kjuakoxin ch'án tí kjuachaxin imá jié chóna ch'án kixin jehe ch'án kuikonóeheni ch'án kixin xikaha tsíkjenkayáxin ch'án ósé kixin náxrjón chrók'uejókoni tí jehe ch'án. ²⁴ Mé xikaha Dios tsíkjejá ch'án iso tí sín judío la ko iso tí sín jehya judío. ²⁵ Mé xikaha ntáchro tí xroon tsíkjin ch'ín Oseas kixin:

Tí sín jehya chjasenná la mé sintak'ian chjasenná.

La tí sín k'uetjuahya mé tsotjuaha sín ijie.‡

²⁶ Tí chjasin ntiha tsintáchro ch'án kixin: “Jahará jehya chjasenná”,

a ntá ijie sintak'ian xjeen Dios tjechón.§

Mé xikaha ichro itén Dios. ²⁷ Kjaxin nixja ch'ín Isaías kuènte tí sín israelita tsintáchro ch'án kixin: “Nchónhya chojni ts'axrjeníxin tí sín Israel éxí tí nchónhya nchesen síin ntayaon kjánchó tsjéhya tí jehe sín tsjacha sín tsaá sín. ²⁸ Ntá tjoka tsonhen tí nkehe tsintáchro Ìnchéni sinchexiteyá ch'án.”* ²⁹ Ntá kjaxin ch'ín Isaías tsintáchro ch'án ósé kixin:

Tí Ìnchéni chóna kaín kjuachaxin kuítóehya chrók'uitjáyan kaín tí sín k'uaxrjeníxin Israel éxí k'uitjáyan tí sín chjasin Sodoma la ko Gomorra.†

Tí sín judío la ko tí tan jina

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijie sín ntá kjónté la k'uitja sín kixin tsotjóá ijie sín kixin tinkáchónki sín Cristo. ³¹ A ntá tí sín israelita chrókjuincheckiteyéhe sín ley kixin chrókótjuáxin ijie sín kjánchó kjuachahya sín kjuínchexiteyéhe sín tíha. ³² ¿A ntá nkekuènté kixin xikaha k'uitjahya sín nkexrí chrókuinkáchónki sín Dios? Kixin kjueyáhya sín nkexrí chrókjuinchetjóá ch'án ijie sín kixin tinkáchónki sín ch'án. Jehó tí xra kjuich'e sín chrókuaáxin sín, ichro sín. La méxra xikaha tjen tí xro kóténkixin sín. ³³ Mé xikaha chronkaxín xroon itén Dios kixin:

Mé xikaha kjuaké tí xro chjasin Jerusalén mé tí xro tsóténkixin sín la ko tí tjó ts'ánótjenxin sín.

A ntá tí sín chrókuitekaon tí jehe la chrókósuèhya sín.‡

10

¹ Kíchóni, kaín asenná níxjaha Dios kixin tjínkavan kixin tí sín israelita chrókuaá sín. ² Janhan ntáxrjan kixin tí sín israelita imá tjinkaon sín chrókjuich'ehe sín xra Dios kjánchó chaxínhya kixin jehe sín la tienxínhya sín. ³ Kjaxin noehya sín kixin nkexrí chrókjuinchetjóá Dios tí ijie sín. A ntá jehó sín xritjejá sín nkexrí chrókótjóá sín la tjinkakónhya sín chrókjuincheckiteyéhe sín Dios. ⁴ A ntá Cristo mé kjuínchexiteyá kaín nixja tí ley. A ntá ijie kaín tí sín kuítekaon tí jehe ch'án mé sinchetjóá ch'án ijie sín.

⁵ A ntá tí chrókótjóá ijie sín kixin tí ley la ch'ín Moisés mé tsíkjin ch'án xikihi: “Tí nkexro chrókjuincheckiteyéhe kaín tí ley la táhó chrókuaáxin sín.”* ⁶ A ntá tí chrókjuinchetjóá Dios tí ijieni kixin tí tinkáchónkini ch'án ó mé ntáchro xikihi: “Ntáchrohyará kixin, ¿Xá nkexro sáchrókjuí nkaya nkajní? (Tí xikaha la t'axrjexín kixin náxa chrókui Cristo.) ⁷ La ko ntáchrohyará kixin: ¿Xá nkexro chrók'uinkajin tí imá ninka?” (Mé t'axrjexín tíha kixin chrókjuíkajín sín Cristo chrók'uaxrjetaón ch'án kixin itjen ch'án tí síin tí sín tsík'en, ichro

‡ 9:25 Oseas 2.23 § 9:26 Oseas 1.10 * 9:28 Isaías 10.22–23 † 9:29 Isaías 1.9 ‡ 9:33 Salmo 118.22 * 10:5 Levítico 18.5

sín.) ⁸ ¿A ntá nkehe ichro? Ntáchro kixin: “Itén Dios la chjinaxón tjen tí tjejorá kixin ó nohará la ko xraxinkaon asánrá.”† Tí tan a mé tí nkehe tinkáchónkini kjuakoni. ⁹ Tí ir'va tsontáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá. ¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchroxian kixin choxian Jesucristo ntá sinchekeá ch'án tí jaha.

¹¹ Ntáchro xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”‡ ¹² Dios la t'ikon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. ¹³ Mé xikaha ntáchro xroon itén Dios kixin: “Kaín tí sín tjanchaxín nkehe ihnié Ìnchéni la tsaá sín.”§ ¹⁴ ¿A ntá nkexrí chrókjuanchehe sín ch'án kixin chrókjuinkitsa ch'án sín tí naxa kuítekakonhya sín ch'án? ¿A ntá nkexrí chrókuitekaon sín tí jehe ch'án tí naxa kuíenhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakõhe sín tí itan a? ¹⁵ ¿La nkexrí chrókjuichronka sín tí tan tí kohya nkexro ichr'án sín sátsji? Éxí ntáchro xroon chóna itén Dios kixin: “Náxrjón tí sín xrichronka itan jína.”*

¹⁶ Kjánchó kénhya sín titekaon sín tí itan tsaáxinni. Tsintáchro ch'ín Isaías kixin: “Ìnchéni ¿xá nkexro ó kuítekaon tí tan xrichronkani?”† ¹⁷ Méxra t'ichjánxìn tsinhin sín, a ntá chrókuitekaon sín, a ntá tí tan tsinhin sín mé itén Cristo.

¹⁸ A ntá tjánchánkía kixin: ¿Á kuíenhya sín tí tan? Kjá ó kuínhin sín. Ntáchro xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni.

Tí nkehe nixja sín la ó kjuixraká hasta kjuèxin chjasintajni.”‡

¹⁹ Ntá tjánchánkía inaá: ¿Xá tí sín Israel la naxa kíenxínhya sín ní? Senó ntáchro ch'ín Moisés kixin:

Ijnko chjasin jehya chjasin kuèntana la tsoninkákonhénra sín

kixin injko chjasin tjinkakonhya tsinhin la tsoninkákonhénra sín. §

²⁰ Ntá ntáchro ch'ín Isaías kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

²¹ La ko nixja ch'ín Isaías kuènte tí sín israelita kixin: “Kuenté yaon k'uíyaha injko chjasin síin chojni titekakonhya sín la ko jièhe sín.”†

11

Tí sín Israel tsíkjejá Dios

¹ A ntá ijie tjánchánkía kixin: ¿Dios la á kuítóhe ch'án tí sín Israel? Kjá náhi, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín.

² Kixin ósé tsíkjejá Dios tí sín israelita kixin ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehe ch'án Dios tjanchia ch'án jiè kuènte tí sín Israel? Mé ntáchro xikihi: ³ “Ìnchéni, jehe sín k'óyán sín tí sín chrónka itán la ko k'óxíka sín tí altar kuèntá ntá jehóni kuítóheni tjechónni la tjinkaon sín kjaxin chrók'óyán sín tí jeheni.”*

⁴ A ntá Dios kjuátehe ch'án kixin: “Naxa kuítóhe yato mil chojni kuítekaon sín tí janhan kjuíxienhya sín toch'in sín tí nkehe tsíkjanoya Baal.”† ⁵ Ntá kjaxin xikaha ijie naxa kuítóhe iso tí sín naxa tinkáchónki Dios. Kjuasáyé Dios kixin kuíkonóhe ch'án tí sín la tsíkjejá ch'án kixin tsaá iso ti jehe sín. ⁶ Mé xikaha kjuasáyé Dios sinchekeá ch'án tí jehe sín kixin

† 10:8 Deuteronomio 30.12-14 ‡ 10:11 Isaías 28.16 § 10:13 Joel 2.32 * 10:15 Isaías 53.1 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 * 10:20 Isaías 65.1 † 10:21 Isaías 65.2 * 11:3 1 Reyes 19.10, 14 † 11:4 1 Reyes 19.18

jehya tí xrā kjuích'e sín chrókuaáxin sín. Náhi. Kjuasáyé Dios mé sinchekaá sín ch'án. Kíxin tí xrā chrókjuich'e sín ntá chrókuaáxin sín la jehya kjuasáyé Dios tí xíkaha.

⁷ Ā ntá tí xíkaha la, ¿nkexrí? Tí sín israelita la k'uitjahya sín tí nkehe xritjeyá sín. Ā ntá tí sín kjueyá Dios la k'uitja sín. Ā ntá tí sín í so a la icha asén sín la kuítekakonhya sín.

⁸ Éxí ntáchro xroon itén Dios kíxin: “Dios kjuanjonha kjuachaxin chrókiénxín tí sín a la ko mé kjaxin xíkaha naxa sítóhenen tí yaon ijie. La kjuanjonha ch'án kjuachaxin kíxin chrók'uikon sín la ko chrókiénxín sín.”[‡] ⁹ Kjaxin tsintáchro ch'ín David kíxin:

Tí kia tjasin sín mé tjasixín sín jje,
tsjasótexín sín.

¹⁰ Tí ikon sín ts'ikonxínhya sín kíxin ts'óna sín ntakótán
ntá tí jje kuènte sín mé jnkochrín yámá sín. §

Tsaá tí sín jehya sín judío

¹¹ Ā ntá ijie tjánchánkiá: Tí sín judío la tí kjuasin sín jje la ¿á ó naá kuítóexón Dios tí jehe sín? Kjá náhi. Tió kuítekakonhya tí sín judío ā ntá tí sín jehya judío la mé kjuacha sín kuaá sín. Ā ntá tí sín israelita la kónínkaon sín kíxin kjuachahya sín. ¹² Ā ntá tí jje kjuasin tí sín judío, ā ntá kuítóhe Dios tí jehe sín, ā ntá tí sín jehya judío antsí k'uitja sín nkexrí tsinkáchónki sín Dios. Ā ntá tí nkehe ntoáhya kjuích'e tí sín judío ntá tí sín jehya judío kjuacha sín kuaá sín. Ā ntá tí chrókjan tí sín judío chrókuitekaon sín Cristo la antsí má náxrjón tíha.

¹³ Chonta iso nkehe chrókuinhínrá jahará jehya judíorá kíxin Dios mé chr'ánna kíxin tsjakohā tí sín jehya judío la antsí tjetoan tí xrā kuènte Ìnchéni chrókjuít'a. ¹⁴ Tjínkavan kíxin tí sín chjasenná chrókóchjinoxínhin sín kíxin jahará tinkachónkirá Dios kíxin ntá chrókjuacha chrókuaá iso tí jehe sín. ¹⁵ Kuítóhe Dios tí sín judío, ā ntá iso tí sín jehya judío k'uitja sín tí kjuaxróxin kuènte Dios. Ā ntá tí chrókuitekaon tí sín judío kjaxin la yóhe éxí chróxechón chojni tsík'en tí jehe sín. ¹⁶ Tí chrókjuinchetjóá Dios tí niotja xrankíxixín chrók'óna tí ich'o la ntá kuenté tí ch'o chrókjuinchetjóá ch'án. Ā ntá kjaxin tí chrókjuinchetjóá ch'án tí nuéé ijnko nta la kjaxin kaín tí chaon tí nta chrókjuinchetjóá ch'án.

¹⁷ Ntá isó tí sín judío la éxí iso chaon tí nta olivo mé xíkaha tsíchrinjin la ntá jahará la éxí ijnko chaon nta olivo nteje tsík'óna injerto mé xíkaha ts'ejóchónxin tí nta chaon tí tronco tí nta olivo jína xráxin tjechón. ¹⁸ Ntáchrohyará kíxin tí chaon tí nta la antsí jína. Íchá jína tsontáchrórá kíxin jehya tí nta t'etuenhen tí nuéé nta. Náhi. Tí nuéé mé tsjinkitsa tí nta mé xíkaha tí jahará.

¹⁹ Ntá jahará tsontáchrórá kíxin: “Ā ntá tí chaon tí nta la tsíchrinjin kíxin ntá jeheni tsitoheni lùké tí nta chaon tsíchrinjin”. ²⁰ Tíha la chaxín. Kjánchó chrínjin kíxin kuítekakonhya Dios. Ā ntá jahará la tjejorá ntiha kíxin tinkachónkirá Dios. Ā ntá chrokjuinchehnkehyará. Íchá jína chróchrakonrá. ²¹ Kíxin Dios la kuikonóehya ch'án tí nta chaon kuènte tí nta tronco la ntá mé xíkaha kjaxin tí jahará la tsíkonóahyará ch'án. ²² Tsjehérá kíxin Dios la imá jína kjánchó kjaxin sinchekjásóte ch'án tí sín titekakonhya. Ā ntá jína ch'án la kjuínkítsa ch'án tí jahará. Kjánchó chrók'uejorá jnkojína éxí tjínkaon tí jehe ch'án. Ā ntá tí náhi la chaxín jahará la tsítóhará ch'án. ²³ Ā ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco ínaá kíxin jehe ch'án la imá chóna ch'án kjuachaxin kíxin xíkaha sich'e ch'án. ²⁴ Ā ntá jahará jehya judíorá mé tsíkóchrínjinrá ch'án nta olivo nteje. Ā ntá antsí má xrā tsotséxin tí nta olivo jína. Ā ntá tí sín judío la nta chaon kuènte tí tronco nta olivo jína la antsí xrahya tsjatsuenhen tsotséxin kíchó ínaá kíxin ó nta chaon kuènte.

‡ 11:8 Deuteronomio 29.4; Isaías 29.10 § 11:10 Salmo 69.22-23

Tí tsjixixín ntá tsaáxin tí sín Israel

²⁵ Kíchóni, tjínkavan tsonohará tí nkehe jehó Dios nohe kixin sinchehnkehýará jahorá kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon. ²⁶ Tió xikaha tsonhen ntá kaín tí sín Israel tsaá sín kixin tí xroon itén Dios ntáchro kixin:

Tí nkexro sinchekaáni mé tsixín ch'án chjasin Jerusalén la tsjatsen ch'án ti jie kuènte tí sín tsík'axrjenixin ch'ín Jacob.

²⁷ Tíhi mé kjuachaxin nixin kuèntana ts'áyéhe tí jehe sín kixin janhan mé kjuatsiyān ijíé sín.*

²⁸ Xikaha kixin tí tan nixin tsaáxinni ntá tí sín judío mé tsonínkakohen sín Dios kixin ntá jahará ts'ayéherá tí nkehe kuènte Dios. Kjánchó Dios naxā tjuèhe tí jehe sín judío kixin jehe ch'án tsíkjeýá ch'án tí sín tsík'axrjenixin tí jehe sín. ²⁹ Kixin tí kaín nkehe kjuanjon Dios la tsakitsjehya ch'án la ko tsítóehya ch'án tí sín tsík'íyehē ch'án. ³⁰ Senó la jahará k'uékítekákonhyará Dios a ntá ijie la tí sín judío titekakonhya sín. A ntá jahará la kjónté la kuikonóahará Dios. ³¹ Mé xikaha jehe sín kuítekakonhya sín Dios la ntá kjónté xikaha la jehe ch'án tsíkonóehē tí jehe sín éxí kuikonóahará ch'án. ³² Kixin Dios la kuítóhe ch'án kaín chojni kixin chrókjuasin sín jie kixin ntá tsjakoxin ch'án tí kjuachaxin kuènte ch'án kixin sinchetjóá ch'án kaín sín kjónté chojni chóna jie.

³³ A ntá tí kjuachaxin kuènte Dios la imá jie la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntja kuènte ch'án. ³⁴ Ntáchro xroon itén Dios kixin: “¿Xá nkexro chrókienxín nkexrí tjenkayáxin Ìnchéni la xá nkexro chrókjuinkitsa chrókjuakohe tí jehe ch'án? ³⁵ ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe inaá?”† ³⁶ Kixin kaín nkehe la tixín tí tjen Dios kixin kaín nkehe la kjuích'éna ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

12

Chjehérá cuérporá Dios kixin sinchetjóá ch'án

¹ Mé xikaha kíchó ni, xrjanóahará kixin Dios ó kuikonóahará ch'án ntá jahará chróchjehérá cuérporá Dios éxí ijnko nkehe tjechón kixin jehe ch'án ó kjuíntatjóará ch'án la mé xikaha chrókóxrjínhin ch'án. Tíhi mé ijnko nkehe ntoá t'ichjánxin chróchjeheni ch'án. ² Chrókóxrjíanhyará tí nkehe siín chjasintajni. Náhí. Chrókónixin tí nkehe tjenkayáxinrá kixin jína chrókjuenkayáxinrá. Xikaha ntá chrókónohará kixin nkexrí tjinkaon Dios kixin ntoá chrók'uejorá éxí tóxrjínhin ch'án.

³ Kjuasáyé Dios kjuanjon ch'án tí xra tjet'aha ch'án. Mé xikaha nixjahará kaín rá kixin chrókjuenkayáxinhyará kixin imá tjetoanrá. Náhí. Chrókjuenkayáxinrá jína éxí tí kjuachaxin tjáhará Dios éxí nkexrí tinkachónkirá ch'án. ⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xra chrókjuich'e. ⁵ Mé kjaxin xikaha tí jeheni kjónté nchónhyani la ts'ónani jnkokoá cuerpo kuènte Cristo. Mé xikaha jnkokoá chrókjuenkayáxin kixin ó k'ónani jnkokoá cuerpo.

⁶ Dios kjuanjon nchónhya clase xra éxí tjinkaon ch'án chróchjéhe ch'án jnkoinko chojni tí xra. Ntá t'ichjánxin jína sich'eni tí xra kjuanjon ch'án. A ntá tí kjuanjon ch'án kjuachaxin kixin tsochronkaxinni tí tan kuènte ch'án ntá t'ichjánxin sich'eni tí xra éxí titekaonni ch'án. ⁷ A ntá tí kjuanjon ch'án xra tsjinkitsani í jnko nkexro ntá t'ichjánxin jína sich'eni tí xra a. A ntá tí nkexro tsík'áyéhe kjuachaxin tsjako la t'ichjánxin jehó tí xra a chrókjuako. ⁸ Tí nkexro tsík'áyéhe kjuachaxin nhexraxinkaon í jnko nkexro la kaín asén chrókjuich'e ch'án tí xra a. A ntá tí nkexro tsjanjon ichrén nkehe la chrókójiehya

* 11:27 Salmo 14.7, Isaías 59.20 † 11:35 Isaías 40.13-14

chrókjuanjon ch'án. A ntá tí nkexro t'etōan la jína chrókjuich'e ch'án xra la ko tí nkexro chrókjuinkĩtsa tí sín chóntahya la kjuaxróxin chrókjuinkĩtsa sín.

Tí nkehe chrókjuich'e tí sín tinkáchónki Cristo

⁹ Kaín asánrá chrótjuèherá kichuárá. Chrókũtōhérá tí nkehe jínahya tjenkayáxinrá la chrókjuenkayáxinrá tí nkehe jína. ¹⁰ Chrótjuèherá kichuárá la ko chaxín chrókjuĩkosáyehérá kichuárá.

¹¹ Chrókósáhyará la chrókjuich'eherá Ìnchéni xra kaín asánrá.

¹² Chrókócháhará kixin tjejóchonhénra la chrókóninkákonhyará kjónté chrókjuasótiará. Chrókũtōéhyará chrónixjehérá Dios.

¹³ Chrókjuinkĩtsará tí sín tinkáchónki Ìnchéni tí chóntahya sín nkehe sine sín. Chjehérá kjuachaxin ts'ejó tí sín tsjijnixjahará sín.

¹⁴ Nixjehérá Dios la tsjancheherá ch'án kixin sincheyaon ch'án tí sín chonkíhará. Tjancheherá Dios tsjinkĩtsa tí jehe sín la jehya kixin chrókóninkákonhénra sín.

¹⁵ Tócháhaakoárá tí sín tjejóchéhe sín la ko tí tjejótsjanka sín la koírá chrótsjankará.

¹⁶ Kjuaxróxin chrók'uejorá. Chrókjuĩnchehnkehyará. Náhí. Chrókóyóhará éxí tí sín nòa. Chrókjuĩnchehnkehyará kixin nohará.

¹⁷ Chrókjuich'ehyará jínahya tí sín kjuít'ahará ichrén nkehe jínahya. Náhí. Íchá jína chrókjuákoxinrá nkehe jína kixin chrók'uikon kaín chojni. ¹⁸ Chrókjuéyará jnkójina chrók'uejorá. Exí nkexrí chrókjuachará la kjuaxróxin chrók'uejorá kaín rá. ¹⁹ Tjuahará kichó ni, la chrókjuĩnchekjasótehyará jahorá tí sín ichrén nkehe kjuít'ahará. Náhí. Tĩtōhérá kixin Dios sinchekjasóte tí sín a. Ntáchro xroon itén Dios kixin: “Ixra kuèntana sintakitoaxián tíha. Janhan tsjénkahá tí sín a, ichro Ìnchéni.”* ²⁰ Kjaxin ntáchro xroon itén Dios kixin: “Tí sín nínkakonhan t'enxín sín kjinta la chróchjehé sín nkehe chrókjóné sín la tí t'enxín sín ntá la kjaxin chróchjehé sín nkehe chrók'ui sín. Mé xikaha chrókjuich'e kixin chrókósuèhe sín kixin tí nkehe kjuích'e sín.”† ²¹ Chrókũtōéhyará kixin chrókjuacha tí nkehe jínahya chrók'uetuanhanrá. Náhí. Chrókjuich'erá tí nkehe jína kixin chrókjuachahya tí nkehe jínahya chrók'uetōan.

13

¹ Kaín chojni t'ichjánxin sinchexiteyèhe sín tí gobierno kixin tí kjuachaxin chóna sín la Dios tsíkjanjon kixin kohya nijnko gobierno chrók'uejó tí jehya kjuachaxién Dios. ² Mé xikaha tí sín tjanjonko tí sín t'etōan la kjaxin nínkakonhen sín tí nkehe k'uetōan Dios. A ntá tí sín xikaha ch'e la mé jehe sín tjejá sín jje tsjasótexín sín. ³ A ntá tí sín gobierno t'etōan la sinchekjasótehya sín tí nkexro titekaon ch'e nkehe jína. Náhí. Tsonínkakonhen sín tí nkexro ch'e tí jínahya. Tí tjinkáonrá tsonínkakuanhyará sín la chrók'uejorá jnkójina. Chrókjuĩnchexiteyéhérá sín kixin chrókónínkakuanhyará sín. ⁴ Kixin Dios k'uetōan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhí. Chóna sín kjuachaxin sinchekjasótiará sín kixin jehe sín la Dios k'uetōan tjejó sín tí xra a kixin sinchekjasóte sín tí sín jínahya tjenkayáxin. ⁵ Mé xikaha t'ichjánxin sinchexiteyéhérá tí gobierno la jehya jehí kixin chrókjuĩnchekjasótiahyará sín. Náhí. Ó jehí jahará chrórxáinkáonrá kixin t'ichjánxin sinchexiteyéhérá sín. ⁶ La kjaxin jehya táhó. Náhí. T'ichjánxin chrókjuenkehérá gobierno tí chichaon kuènte tí xra ch'erá tjanchia sín kixin tí gobierno la Dios k'uetōan tjejó sín t'etōan sín.

⁷ Kjaxin chrókjuenkehérá kaín chojni tjasikéhérá. Tí nkexro síká kuènte xra la chrókjuenká sín kuènte tí xra, la tí nkexro síká ichrén nkehe nchekji ntá tíha kjaxin chrókjuenká sín, la kjaxin chrókjuĩkosáyehérá tí sín t'etōan. ⁸ Kjaxin chrókjuasikéhyará ninxeró. T'ichjánxin chrótjuèherá kichuárá kixin tí nkexro tjuèhe kichó la mé xikaha

* 12:19 Deuteronomio 32.35 † 12:20 Proverbios 25.21-22

kjuínchexiteyá tí nkehe k'uetōan tí ley. ⁹ Kíxin ntáchro tí mandamiento kíxin: “Tjakéhya asánrá í jnko chojni chjin la ko t'oyánhyará kichuárá la ko teehyará la nixjahyará kjuach'ia kuènte í jnko chojni. La ko tjaké hya asánrá nkehe ókjé.”* Kaín tíha la ko í so nkehe t'etōan Dios mé tienxínni t'axrjexín kíxin: “Chrótjuèheni kichó ni éxí tjuèxín asénni.” ¹⁰ Tí chojni tjuèhe kichó la ninkehó nkehe jínahya sich'ehe kichó. Mé xíkaha chrótjuèhe kichuárá la mé xíkaha mé chróxiteyá jína tí nkehe nixja tí ley.

¹¹ Kaín tíha chrókónoheni tí tjejóni kíxin ó kui tí hora chrók'uejótsheni chrók'uajuahyani. Tí nkexro tsaáxinni la í séhya itsi ch'án ijie, a ntá tí kjuankíxinni kuítekaonni itén ch'án la ísé tsixín ch'án. ¹² A ntá tí tie la í séhya tsjak'e kíxin ó tsi tí t'inkáséyan la chrókuítóheni tí nkehe ch'eni kuènte sítié la chróchóntani kjuachaxin kuènte Nchakuen Dios kíxin tsjinkítsa ts'ajini tí t'inkáséyan, éxí ijnko soldado t'inkáyate ch'án ka tsík'óna chica kíxin kohya nkehe tsonhen ch'án. ¹³ Chrók'uejóni jnkojína éxí nkexrí chrók'uajini chaxín ntoá tí t'inkáséyan a. Chrókjuasinhanyi kia chrókjuanjōnxin chojni la ko chrókókoanhanyi la ko chrókjuenkayáxinhanyi chróchóntani nchónhya chojni chjin la ko chrókjuenkayáxinhanyi tí nkehe ntáchro asénni la ko chrókjuéyáhyani kjuanínkaon la ko chrókóchjinoxíenhanyi. ¹⁴ A ntá jahará tákjára tí kjuachaxin kuènte Ìnchéni Jesucristo tsjinkítsará la tíha mé éxí chrók'uínkayará nkehe tsík'óna chica kíxin kohya nkehe chrókónhanrá. La ko chrókjuenkayáxinhayará tí nkehe ntoáhya tjenkayáxin chojni jínahya.

14

Tjontahyará kichuárá

¹ A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjóntahyará ch'án kjónté kánhyó nohe ch'án. ² A ntá iso sín chaxín nohe sín la tjinkaon sín chrókjóne sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónehya sín nto, ntá kayoa ó chrókjóne sín. ³ Tí nkexro chrókjóne kaín nkehe chrókjōñehya tí nkexro tjinkaon chrókjónehya nkehe. A ntá tí sín chrókjónehya nkehe chrókjontahya sín tí sín chrókjóne sín kaín nkehe kíxin kjónté xíkaha la Dios tsakja tí jehe sín. ⁴ ¿Xá nkexro jaha kíxin chrókjónta tí nkexro ch'ehe xra í jnko nkexro? Tíha la xra kuènte tí lámōé ch'án tsontáchro á jína kjuích'e ch'án xra o náhí. A ntá kjá tsjak'e ch'án jína kíxin Ìnchéni chóna ch'án kjuachaxin tsjinkítsa ch'án tsjak'e tí ch'ín a jína.

⁵ Iso sín tjenkayáxin sín kíxin imá tjetōan ijnko yaon a ntá í jnko yaon la náhí. La í so sín ntáchro sín kíxin kaín yaon la ó jnkokón. Ntá jnkojnko sín la jehó sín chrókjuenkayáxin sín kíxin nkehe tí chaxín titekaon sín. ⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xíkaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kíxin xíkaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xíkaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kíxin jehóni chrók'uetōanni la ko jehya jehí chrók'uenni. ⁸ Tí tjejóni la tjejóni kíxin sich'eheni xra Ìnchéni la kjónté its'enni la kuènte ch'án tí jeheni. Méxra kjónté chrók'uejóhónni o kjónté chrók'uenni la kuènte ch'án tí jeheni. ⁹ Méxra xíkaha ntá Cristo la ik'uén ch'án la ko xechón ch'án ínaá kíxin k'óna ch'án Ìnché tí sín tsík'en la ko tí sín tjejóhón.

¹⁰ A ntá jahará la, ¿nkekuènte tjóntará tí kichuárá o nkekuènte chontehyará kaín sín kjuasáya? Kíxin kaín ni tsochjinani tí tjen Dios kíxin tsontáchro ch'án á jína xra kjuích'eni o náhí. ¹¹ Ntáchro xroon itén Dios kíxin:

Méxra janhan takjénxian asenná, ichro Ìnchéni, kíxin tí tjèn la ts'ejóxin toch'in kaín chojni

* 13:9 Éxodo 20.13-15, 17; Deuteronomio 5.17-19, 21; Levítico 19.18

kíxin kaín chojni la tsjanchia sín kjuasáya kíxin janhan mé Dios kuènte sín.*

¹² Mé xíkaha jnkojnkoní chrókónoheni kíxin tsochenkani Dios nkexrí kjuích'eni.

Tjachruehyará kíchuára

¹³ Méxra chrókjóntahyará kíchuára. Íchá jína kíxin ninkehó nkehe chrókjúich'ehyará kíxin ntá tí sín kíchó ní chrókjuasinxinhya sín jië kíxin tí chrókjuasin sín jië ntá xíkaha chrók'uitjáyanxín tí tinkáchónki sín Ìnchéni. ¹⁴ Janhan tinkachónkia Ìnchéni Jesús la ntá xíkaha ó nòna kíxin kohya ninkehó nkehe jehí tjuáhya. A ntá ijnko nkexro tjenkayáxin kíxin jehya nkehe jína tíha ntá chaxín tjuáhya tí nkehe kíxin xíkaha tjenkayáxin ch'án. ¹⁵ Tí tjenkayáxin tí kíchuá kíxin tí nkehe inte la ntoáhya a ntá tí xíkaha ch'e la tjuèhya tí kíchuá. Kíxin jehya tí nkehe chrókjónte ó chrókjúinchek'itjáyanxián tí kíchuá kíxin Cristo k'uenyákonhen ch'án kjaxin. ¹⁶ Chrókjúich'ehyará nkehe jínahya kíxin ntá xíkaha chrók'uántaxínhín sín tí nkehe jína tinkachónkirá. ¹⁷ Kíxin tí kjuachaxiën Dios la jehya tí nkehe chrokjóneni o tí nkehe chrokw'ui. Náhí. Tí tjen tí kjuachaxiën Dios la chrók'uejóni jnkojína la ko kjuaxróxin chrók'uejóni la ko chrókóchéheni kíxin chóntani Nchakuen Dios. ¹⁸ Tí nkexro ch'ehe Cristo xra mé chrókjúinchechéhe Dios la ko chrókjúinchechéhe chojni.

¹⁹ Mé xíkaha chrókjueyáni kaín tí nkehe tjikao kjuaxróxin kíxin ntá tsjinkitsani tí sín kíchó ní kíxin ntá kjaxin sín antsí chrókuinkáchónki sín Ìnchéni. ²⁰ Chrókjúinchek'itjáyanhyará tí xra kuènte Dios kíxin tí nkehe chrókjónterá ó kíxin kaín nkehe chrókjónterá la ó tsíkjinchetjóá Dios. Tí jínahya la tí chrókjóneni ókjé nkehe ntá xíkaha la í so chojni chrók'uitjáyanxín tí nkehe tinkáchónki sín. ²¹ Ntá íchá jína chrókjóntehyará into la ko chrók'uihyará vino la ko ninkehó nkehe chrókjúich'ehyará tí xíkaha chrókjuasixín jië kíchuára. ²² Tí nkehe tinkachónkirá la jahorá chrókónohará kíxin Dios la tjetsjehe ch'án. A ntá jína tsjak'e tí nkexro tí chrókjuasixínhya ch'án jië tí nkehe tjenkayáxin ch'án. ²³ A ntá tí nkexro ine nkehe la tjenkayáxin sín kíxin tsjasixín sín jië ntá chaxín xíkaha yámá sín jië kíxin kénhya asén sín kjóne sín tí nkehe. La tió kénhya asén sín tjenkayáxin sín la ó kjuasin sín jië.

15

Nchechéhéra kíchuára la jehya jahorá

¹ Tí antsí tinkáchónkini Ìnchéni ntá chrókjúinkitsani tí sín kánhyó tinkáchónki tí jehe ch'án la chrókjúich'ehyani tí nkehe chrókóchéxinni jehóni. ² Kjaxin kaín ní chrókjúinchechéheni kíchó ní kíxin chrók'uejó sín jína la ko kíxin antsí chrókuinkáchónki sín Ìnchéni. ³ Kíxin kjaxin Cristo kjuích'ehya ch'án tí nkehe chrókóchéxin ch'án jehó ch'án. Náhí. Kjuínchexiteyá ch'án éxí ntáchro xroon itén Dios kíxin: “K'uinka kjuasótexinna kaín tí kjuanínkaon chóna tí sín nínkakonhen Dios.”* ⁴ Kaín nkehe chrónka xroon itén Dios senó la tsíkjin sín ósé kíxin chrókónoheni kíxin ntá chrók'uejóchónhenni la chrókónínkakonhyani kíxin tíha mé nchechéheni. ⁵ Dios, mé tí nkexro tjinkitsani la ko nchechéheni, la kjaxin tsjinkitsa ch'án tí jahará kíxin ts'ejorá jnkojína la ko jnkokón tsjenkayáxinkoará kíchuára kíxin xíkaha kjuakoxin Cristo Jesús. ⁶ Kíxin kaín ní jnkokoá chrók'uákjenxinni Dios la chrókjúancheheni kjuasáyé ch'án mé jehe ch'án mé It'é Ìnchéni Jesucristo.

Tí tan jína xrakohé tí sín jehya judío

⁷ Chrókjúanjonrá kjuachaxin ts'ejó í so chojni la chrótjuèherá sín kíxin éxí Cristo tsík'áyéhe ch'án tí jahará mé xíkaha tsjikosáyehérá Dios. ⁸ Janhan jína chróntáxrjan kíxin Cristo ikui sich'ehe xra tí sín judío kíxin tsoxiteyá tí nkehe tsíchenka Dios tí sín tsík'axrjeníxinni ósé kíxin xíkaha tsjakoxin kíxin Dios la jína ch'án la sinchexiteyá ch'án tí nkehe tsíntáchro ch'án. ⁹ La kjaxin ikui ch'án kíxin kjónté tí sín jehya sín judío la

* 14:11 Isaías 45.23 * 15:3 Salmo 69.9

chrokjuanchehe sín kjuasáyé Dios kixin kuikonóhe ch'án sín éxí chrónka tí xroon itén Dios kixin:

Janhan la ko tí sín tjejó ókjé nación mé tsjancheheni kjuasáyé Dios

la ko tsotsjeni himno kixin ts'ákjenxinni ihnié ch'án.†

¹⁰ Kjaxin ntáchro í jnko parte xroon itén Dios inaá kixin:

Tsocháha_{ko}ará kaín tí sín kuènté Dios.‡

¹¹ Kjaxin ntáchro xroon itén Dios inaá kixin:

Tjancheherá kjuasáyé ìnchéni Dios kaín rá kjónté jehya judíorá

mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkjin kixin:

Ts'axrjeníxin ch'ín Isaí ijnko nkexro

la ts'etuenhen ch'án kaín tí sín jehya judío,

a ntá tí sín a mé tsinkáchónki sín tí nkexro a.*

Mé xikaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe ch'án kixin ntá ts'ánkí tí kjuachéhe tjejóchónhenni kjuachaxién Nchakuen ch'án.

¹⁴ Kíchóni, chaxín tónòna kixin jahará la jína tjejorá la kaín xín kjuaxrexinkaon jína tjenkayáxinrá la nohará tsjínkítará chénkará kíchuará. ¹⁵ La kjónté xikaha la chrakonhya ikjian tí xroon i chr'anhánrá xrjanka kaín tí nkehe kixin chrók'uitjáyanhyará chróxráxinkáonrá kaín nkehe. Mé xikaha it'a tí xrá kixin kjuasáyé Dios kjuanjon ch'án tí xrá. ¹⁶ Kixin sít'aha Jesucristo xrá tsotjanka tí sín jehya judío tí itén Dios. Tí xrá mé tjákua tí tan jína tsaáxin chojni kixin ntá janhan tsjánjuan tí sín jehya judío ts'áyéhe Dios éxí ijnko nkehe tsoxrjínhin ch'án kixin Nchakuen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xikaha siín kjuachaxin tsochàna kixin t'ahá xrá Dios. ¹⁸ Chrokjuahya tsohnke tsontáxrjan í jnko nkehe. Jehó tsoxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuítekaon sín kixin tí itan kjuákua la ko tí nkehe jína kjuít'a. ¹⁹ Kixin tí kjuachaxién Dios mé kjuáko_xian tí kjuásian kjuaxroan la ko kjuáko_xian tí kjuachaxin kuènte Nchakuen Dios. Mé xikaha kjuintaxíxin kjuákua tí tan jína tsaáxin chojni Cristo xrankíxixín chjasin Jerusalén la nkuíxín chjinaxón ntiha la hasta estado Ilírico. ²⁰ Mé xikaha tjínkavan tsjínkákua tí tan tsaáxinni tí chjasin naxa tienhyé sín ihnié Cristo kixin tí janhan tjínkakonhya tsjírónkáxian tí xrá kuènte í jnko chojni xráxín tjech'e xrá. ²¹ Íchá jína éxí ntáchro xroon itén Dios kixin:

Chrókuinhin tí sín naxa kienhyé sín tí tan kuènte ti jehe ch'án.

La ko chrókienxín tí sín naxa kienhyé tí tan kuènte ch'án.†

Ch'ín Pablo tjenkayáxin ch'án sátsji ch'án chjasin Roma

²² Nchónhya veces tjínkavan chrókjuasántsja_{ha} tí jahará kjánchó naxa xitjahya kjuasán ntiha. ²³ Kjánchó ijie la ó kjuixinna tí xrá nkuíxín tí tjèn ntihi. Ntá itsjé nánó tjínkavan chrókjuasántsja_{ha} tí jahará ²⁴ a ntá ijie ts'atsínka tsonixjahará tí sátsjia nación España. Ntá tsochàna ts'íkuan tí jahará ntá tsjixin ntá chr'éxin tjínkavan kixin jahará tsjínkítará tí sátsjia. ²⁵ A ntá ijie la sátsjiya chjasin Jerusalén, sátsjikian tí nkehe tsjínkítáa tí sín kíchó ni ntiha. ²⁶ Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'énhen sín tí sín kíchó ni ntiha tsochjéhe tí sín nòa tjejó chjasin Jerusalén. ²⁷ Jehe sín kóxrjínhin sich'e sín xikaha kixin tí sín judío tinkáchónki Cristo kjuínkítáa tí jehe sín tsonohe sín itén Dios. Ntá ijie la jehe sín chrókjuinkítáa sín inaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni. ²⁸ A

† 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11 Salmo 117.1 * 15:12 Isaías 11.10

† 15:21 Isaías 52.15

ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará. ²⁹ Ó nòna kixin tió sátsjia la Cristo mé imá sincheyaon ch'án tí janhan la ko tí jahará.

³⁰ Kíchóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèheni kichó ni mé xrjannóahará kixin jnkokoá chrókjuenkayáxinni kixin tí xra tjet'a la ko chrónixjehérá Dios kixin tí janhan. ³¹ Tjanchehérá Dios kixin tsjinkitsa ch'án tí janhan kixin kohya nkehe tsonna kixin kaín tí sín titekakonhya Dios siín chjasin Judea. La ko tjanchará kixin jina sátsjikian tí nkehe tsjinkitsa tí sín kichó ni tjejó chjasin Jerusalén kixin jina chrók'uáyéhe sín. ³² Ntá tí tjinkaon Dios la tsochàna tsjasán ti tjejorá jahará la ko kjuaxróxin tsjak'é tí tsjasántsjahará. ³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehé ch'án tí sín chóxin ch'án

¹ Tétuanhanrá tsjinkitsará tí tjan kichó ni Febe ch'e tjan xra ninko chjasin Cencrea ² mé tjanjonrá kjuachaxin tsjak'e tjan kjuachaxién ihnié Ìnchéni éxí ch'eherá í so sín kichó ni tinkáchónki Ìnchéni. Tsjinkitsará tjan ichrén nkehe t'ichjánxinhin tjan kixin jehe tjan kjaxin kjuinkitsa tjan nchónhya chojni la kjaxin kjuinkitsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuích'ekoni xra kixin kjaxin sín mé ch'ehe sín Cristo xra. ⁴ Jehe sín chrók'uenxín sín kixin kjuinkitsana sín tí janhan mé xikaha tjaha sín kjuasáya la jehya janhván, kjaxin kaín sín kichó ni ninkoé tí sín jehya judío. ⁵ Nixjehérá kjaxin kaín kichó ni tóchjina ntoe tjan Priscila la ko ch'ín Aquila. Nixjehérá tí ch'ín choxian jina Epeneto mé jehe ch'án la saoxín kuítekaon ch'án Cristo estado Acaya. ⁶ Nixjehérá tjan María kixin kjaxin tjan kjuích'e tjan xra tí tjejorá ntiha. ⁷ Kjaxin nixjehérá tí sín tsíkixxin chjasenná mé ch'ín Andrónico la ko ch'ín Junias. Tí k'uikjèna ntoechiso la kjaxin tí jehe sín k'uikjehe sín. Kjaxin kaín tí í so sín apóstol la tjikosáyehe sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tjuaha tinkáchónki Ìnchéni. ⁹ Nixjehérá ch'ín Urbano kixin jnkokoá kjuít'akian ch'án xra kuènte Jesucristo la ko nixjehérá tí ch'ín choxian Estaquis. ¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo. ¹¹ Kjaxin nixjehérá tí ch'ín kjéhya Herodión la ko kjaxin nixjehérá kaín tí sín kjéhya ch'ín Narciso kixin kjaxin sín tinkáchónki sín Ìnchéni. ¹² Nixjehérá tjan Trifena la ko tjan Trifosa. Kjaxin jehe sín kjuích'e sín xra kuènte Ìnchéni la ko nixjehérá kjaxin tí tjan kichó ni Pérsida. Kjaxin kjuinkitsa tjan kjuích'e tjan xra kuènte Ìnchéni. ¹³ Kjaxin nixjehérá ch'ín Rufo, ijnko chojni tsíkjejá Ìnchéni la ko nixjehérá tí iné ch'án kjaxin kixin kjaxin tjan kjuinkitsa tjan tí janhan la éxí naná k'uikuan tí jehe tjan. ¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kichó ni tjejóko tí jehe sín ntiha. ¹⁵ Nixjehérá kjaxin ch'ín Filólogo la ko tjan Julia la ko ch'ín Nereo la ko tí tjan kichó ch'án la ko ch'ín Olimpas la ko kaín tí sín kichó ni tinkáchónki Ìnchéni tjejóko sín ntiha.

¹⁶ Kjaxin tsehérá tja kíchuará kjuachaxin ihnié Ìnchéni. Kaín tí sín ninko kuènte Cristo ntihi xraxinkaon sín tí jahará la nixjahará sín.

¹⁷ Kíchóni, xrjanóahará kixin chrótsjehérá nkexro tí sín tjixrónkaxin chrók'óxíka tí sín jnkokoá tinkáchónki Ìnchéni. Jehe sín titekakonhya sín tí itén Dios kjuákohará k'uitjará. Tí xikaha ch'e sín la chrók'uaxrjekjanxínrá ntiha. ¹⁸ Tí nkexro xikaha ch'e la jehya Ìnchéni Jesucristo ch'ehe xra. Náhí. Jehí tjinkaon sín chrókjuixrónkaxin sín la nixja sín tí nkehe náxrjón ó la xikaha ch'iyehé sín asén tí chojni naxa noehya. ¹⁹ Kaín chojni

ó nohe kixin jahará la ó kuítekáonrá Ìnchéni. Mé xikaha chàna tí janhan la tjínkavan chrókóxakonhanrá chrókjuich'erá xra jína. Jehya kixin chrókjuich'erá nkehe jínahya. ²⁰ Tí Dios tjanjon kjuaxróxin mé tjoka tsinkátja Satanás, í ts'etuenhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehé ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetōan ch'ín Pablo la kjaxin nixjahará kjuachaxiën Ìnchéni.

²³ Ch'ín Gayo nixjahará ch'án. Jehé ch'án kjuanjon kjuachaxin kjuak'é janhan ntōe ch'án la ko kaín tí sín kuènte n̄n̄ko tójnkotsé ntōe ch'án. La ko nixjahará ch'ín Erasto. Jehé ch'án mé tesorero kuènte chjasin la ko tí ch'ín kichó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjinkitsa ch'án kixin jína chrók'uejorá éxí chrónka tí tan jína tsaáxinni la ko éxí kjuakoni kuènte Jesucristo. Tíha mé chaxín chrónka éxí Dios k'uetōan nchenoheni ch'án tí nkehe ninkexró k'uénoehya desde k'óna chjasintajni. ²⁶ A ntá ijie kaín ni tsonoexinni nkexrí nixja xroon ikjin tí sín profeta kixin nkexrí k'uetōan Dios itjen jnkochrín. Ntá kaín nkehe k'uénoehya ninkexró a ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokóá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Ìnchéni Jesucristo jnkochrín. Amén. Ó tjen.

Tí xroon saoxín ikjin ch'ín Pablo chr'énhen ch'án tí sín tinkáchónki Cristo siín chjasin Corinto

Ch'ín Pablo mé ikjin ch'án xroon ichr'án ch'án tí ninko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókjuít'aha ch'án xra. Janhan la ko kichó ni Sóstenes mé ² ikjinni tí xroon i chr'ánhanráni tí jahará tójnkotsérá ninko chjasin Corinto. Ó kjuínchetjóará Ìnchéni Jesucristo na mé kjueyára Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kaín xín tí sín tjanchehe sín Ìnchéni Jesucristo kixin chrókjuinkítsa ch'án sín, tíha mé Ìnché sín la ko Ìnchéni. ³ Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochrínín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuènte ch'án ntá xikaha antsí jína nohará chrónkaxínrá kixin nkexrí tinkachónkirá Ìnchéni la ko kjaxin antsí jína tiénxinrá kaín nkehe chaxín ntoá. ⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá. ⁷ Ntá jahará ó chontará kaín xín tí kjuachaxin kuènte Nchakuen Dios, la í ninkehó t'itjáyankíhya tí kjuachaxin kuènte ch'án k'uayéhérá nachrohe tjejochonhénrá tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kixin tsítóéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án. ⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsikjeyará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrjanóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoará kichuárá. ¹¹ Kichóni, ó kuínhan tí nkehe chrónka tí sín kjéhya ch'ín Cloé kixin siín kjuanínkaon tí tjejorá tójnkotsérá ntiha. ¹² Na mé ntáxrjan kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin jahará chréhérá tí ch'ín Pedro, la ko í sorá ntáchrórá kixin chréhérá Cristo. ¹³ ¿Xá nkekjaín Cristo siín kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitexínrá tí nina ní? ¹⁴ Tjáncháha Dios kjuasáya kixin nijnko tí jahará kuíkitiahyará ntiha. Jehó ch'ín Crispo la ko ch'ín Gayo mé kuíkite janhan. ¹⁵ Na mé nijnkorá xitjahya tsontáchrórá kixin nina kuíkitexínrá. ¹⁶ Kjaxin jehó kuíkite tí ch'ín Estéfnas la ko tí sín kjéhya ch'án. Xráxinkakonhya á kuíkite í so sín o náhi. ¹⁷ Kixin tí xra chjina Cristo jehya kixin chrókuíkite chojni. Náhi. Tí xra chjina Ìnchéni kixin tsóxrjankaxián tí tan tsaáxinni. Tjínkakonhya kixin chrókjuákoxián palabra náxrjón noi kixin xikaha chrókjuákua ntá chrókjuintamá tí kjuachaxin jie kónoxín tí k'uénxin Ìnchéni Jesús tí ntacruz, kjuák'enkáni ch'án, k'uényákonhenni ch'án.

Cristo mé tjákoxin tí kjuachaxién Dios la ko tjákoxin ch'án kixin imá nohe Dios

¹⁸ Chronkaxínni kixin k'uényákonhenni Cristo tí ntacruz. A ntá tí tsinhin tí sín xráxín ts'itjáyan ntá ts'ikon sín tíha éxí nkehe chónkó. A ntá kaín ni chojni kuaáni mé t'ikonni

kixin kjuachaxin jié tíha. ¹⁹ Mé xikaha ntáchro xroon itén Dios tsíkjín sín ósé kixin Dios mé sinchek'itjáyan tí nkehe tjenkayáxin tí sín imá nohe, la ko tsítóenta ch'án tí nkehe ntáchro tí sín imá tienxín sín.*

²⁰ ¿Mé nkehe tsonhen ntáchro sín kixin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe síin chjasintajni ó. A ntá Dios mé t'ikon ch'án kixin lontj sín kixin xikaha ichro sín. ²¹ Kixin Dios antsí nohe ntá xikaha kuítóehya ch'án kixin kjuachaxin kuènte sín ó chrókjuacha sín chróchóxixín sín ch'án. Ntá kóxrjínhin Dios chrókjueya ch'án chrókjuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jié, ichro sín. A ntá tí sín nkíva griego mé xritjeyá sín kixin antsí chrókónohe sín, ichro sín. ²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjakoxinni. Chrónkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijnko nkehe chrókósuèheni chrókuinkáchónkini tíha, ichro sín. A ntá tí sín jehya judío ntáchro sín kixin chojni lontj tí jeheni kixin xikaha tinkáchónkini, ichro sín. ²⁴ A ntá tí sín kjueya Dios, kjónté judío sín na o griego sín, la kaín ni ntáchroni kixin Cristo mé k'uenyákonhenni ch'án. Mé xikaha tjakoxin Dios tí kjuachaxin jié la ko tí kjuaxrexinkaon jína kuènte ch'án. ²⁵ Ntá jehe sín ntáchro sín kixin éxí ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjaxin ntáchro sín kixin jiéhya tí kjuachaxin chónka Dios. A ntá tí sín antsí má chónka kjuachaxin ntihi chjasintajni kjónté la tóyóehya sín Dios kixin antsí chónka ch'án kjuachaxin t'etóan ch'án. ²⁶ Kíchóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxí t'ikon tí sín chjasintajni la kjónté kjueyará Dios tí jahará. La ko tsjéhyará imá kuétóanrá la ko tsjéhyará k'uaxrjeníxinrá tí sín imá k'uék'etóan. ²⁷ Ntá kjónté Dios mé kjueya iso tí sín noehya éxí t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá nohe ntihi chjasintajni. La ko kjaxin kjueya Dios iso tí sín chóntahya kjuachaxin éxí t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá chónka kjuachaxin ntihi chjasintajni. ²⁸ Dios mé kjueya ch'án iso tí sín t'etóanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuinчек'itjáyan ch'án kjuachaxién tí sín jehó chrók'uetóan. ²⁹ Méxra xikaha ninkexró tsjachahya sinchehnke tí tjen Dios. ³⁰ A ntá tí kjuachaxin kuènte Dios mé tinkáchónkirá Cristo Jesús, a ntá chóntaxinni Cristo kjuaxrexinkaon jína, la ko tí kjuachaxin kuènte ch'án kóxíka tí jié kuènteni, la ko tí kjuachaxin kuènte ch'án sinchetjuáxinni ch'án, la ko tí ijnje ch'án k'uénaxinni ch'án. ³¹ Mé xikaha éxí chrónka tí xroon tsíkjín sín ósé ntáchro kixin: “Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kixin imá t'etóan tí kjuachaxin kuènte Dios.”†

2

Ch'ín Pablo mé tjako ch'án kixin Jesucristo kjuák'enkáni ch'án ntacruz

¹ Kíchóni, tió kjuasán ntiha chjasánrá níxjehará chrókjuákohará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá. ² Kixin tió k'uéjóni jnkokoá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz. ³ K'uéjóni jnkokoá ntiha la ntá jahará ó nohará kixin janhan kjuak'é éxí chrókjuachahya kixin síxránkana, chrákonna. ⁴ Tí kjuankíxian níxjehará la ko xrjankaxián tí tan tsaáxin chojni, la tjínkakhonhya chrókjuáchruáxinrá tí nkehe náxrjón níxja chojni tsíkónohe má. Náhi. Tió kjuákohará kónoxín kixin tjékian Nchakuen Dios la ko kónoxín tí kjuachaxin jié kuènte

* 1:19 Isaías 29.14 † 1:31 Jeremías 9.23

ch'án, ⁵ kixin jehya kjuaxrexinkaon kuènte chojni tsíkónohe má chrókuinkachónkirá. Náhí. Tí kjuachaxin kuènte Dios mé chrókuinkachónkirá.

Nchakuen Dios mé tsochóxixínni ch'án

⁶ Kjánchó tió tjákoḥa tí sín chaxín ó nohe sín tinkáchónki Ìnchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etoan chjasintajni, na mé tí kjuachaxin kuènte sín la tjoka ts'itjáyan. ⁷ Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naḥa k'ónahya chjasintajni kixin nkexrí tsaáxinni. ⁸ Nijnko tí sín t'etoan chjasintajni kienxínhya sín tí nkehe tsíkjenkayáxin Dios. A ntá tí chrókienxín sín tíha la ntá chrókjuak'enkanihya sín Ìnchéni tjetoan tí ntacruz. ⁹ Éxí ntácho xroon itén Dios tsíkjin sín ósé kixin:

Naḥa k'uíkonhya chojni la ko naḥa kienhya chojni,
la ko naḥa kjuenkayáxinhya chojni

kixin nkexrí siín kaín xín nkehe kjuích'éna Dios ts'áyéḥe tí sín tjuèhe ch'án.*

¹⁰ A ntá Dios mé nchenoexínni kaín tíha kixin chóntani Nchakuen ch'án. Na mé tí Nchakuen Dios mé tjetsjehe kixin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

¹¹ Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén. Méxra xíkaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe. ¹² A ntá jehya tí nchakuen chojni chjasintajni k'uáyéheni. Náhí. Tí Nchakuen kuixín tí tjen Dios mé k'uáyéheni kixin ntá tsonoexínni kixin kaín xín nkehe kjuínchekitonhenni Dios. ¹³ Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhí. Tí Nchakuen Dios mé nchenoexínni nkexrí tsjakoxéxinni tí sín chóna Nchakuen ch'án.

¹⁴ Kjánchó tí sín naḥa chóntahya Nchakuen Dios mé xitjahya ts'áyéḥe sín tí nkehe tjanjon Nchakuen Dios. Na mé éxí lóco t'ikon sín kaín tíha kixin jehó tí sín chóna Nchakuen Dios mé tsjacha sín tsienxín sín tíha. ¹⁵ A ntá tí nkexro chóna Nchakuen Dios mé chrókjuacha chrókónohe nkexrí siín kaín xín nkehe. Kjánchó tí nkexró chóntahya Nchakuen Dios tsjachahya tsjanchia jje tí jehe ch'án. ¹⁶ Méxra ntácho xroon itén Dios kixin: ¿Xá ninkexró chrókónohe kixin nkexrí tjenkayáxin Ìnchéni kixin chrókjuacha sín chrókjuakoḥe sín ch'án inaá?† Kjánchó jeheni la ó chóntani tí kjuaxrexinkaon kuènte Cristo.

3

Tí sín jnkokoá kjuích'ehe sín Dios xra

¹ Mé xíkaha, kichó ni, kjuachahya janhan chrónixjahará éxí chojni t'etuēnhen asén sín Nchakuen Dios. Náhí. Éxí chojni naḥa nchexiteyéḥe sín tí nkehe ntácho asén sín, na mé éxí xjan ntsíntsí na ntá kjuankixin kuinkáchónki Cristo mé xíkaha tí jahará. ² Janhan na kjuákoáxinrá nkehe xrahya éxí yóḥe ijnko xjanhnté tí jahará naḥa nchekakí iné tsjen kixin naḥa xitjahya sine nkehe cha. Mé xíkaha tí jahará naḥa xitjahya sinterá nkehe cha ³ kixin naḥa éxí chojni ó nchexiteyéhéra tí nkehe ntácho asánra kixin tí naḥa siín kjuachjinoxínhin la ko siín kjuanínkaon la ko jnkokoáhya tjenkayáxinrá, la mé tjejoch'erá éxí ch'e kaín xín chojni chjasintajni. ⁴ Isorá ntáchorá kixin chréhéra tí janhan Pablo, la ko í sorá ntáchorá kixin chréhéra tí ch'ín Apolos. Na mé éxí chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkachónkirá Ìnchéni kixin janhan kjuákoḥará. Jnkojnkoní kjuích'eni tí xra kjuanjon Ìnchéni. ⁶ Janhan kuènka, a ntá ch'ín Apolos inta kjuáka ch'án,

* 2:9 Isaiás 64.4 † 2:16 Isaiás 40.13

a ntá Dios la mé kjuínchek'ánkí ch'án tí nkehe a. ⁷ Méxra tí nkexro k'ueñkaxin la ko tí nkexro tjáka ntá la kánhyó tjeoan kixin Dios mé chóna kaín kjuachaxin la jehe ch'án nchek'ánkí kaín nkehe siín. ⁸ A ntá tí sín t'enka la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuích'e sín. ⁹ Méxra jeheni mé jnkokoá ch'eheñi Dios xra, a ntá jahará mé éxí tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án. ¹⁰ Janhan mé tí maestro ch'éna nchia kixin Dios kjuanjon kjuachaxin tsjaké tí xro xrankixixín, a ntá í jnko nkexro sich'éna nchia chrítaón tí xro a. A ntá jnkojnko nkexro t'ichjánxin ntoá chrókjuich'éna sín nchia chrítaón tí xro a, ¹¹ kixin kohya ninkexró tsjacha tsjak'e í jnko xro xrankixixín tí nchia a kixin táha la ó tsíkjin tsík'óna, kixin Jesucristo tíha. ¹² A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xro náxrjón tjeje, la ko inta tabla, la ko kani, la kontaxro. ¹³ Na mé tsonoxín nkehe tí xra kjuích'e jnkojnko chojni tió tsi tí yaon tsjixixín. Kixin tí yaon a mé tsi xrohi. A ntá tí xrohi mé tsjakoxin nkexéhe tí xra tsoche la ko nkexéhe tí xra tsochehya. ¹⁴ A ntá tí jnkojin chojni kjuích'éna ijnko nchia tsochehya la mé tsjacha ch'án tí xra kjuích'e ch'án. ¹⁵ A ntá tí chróche tí nchia kjuích'éna ijnko chojni, ntá chrók'uitjayan kuenté. A ntá tí nkexro kjuích'éna nchia la tsaá éxí yóhe chrókuinkéhe ch'án xrohi.

¹⁶ ¿A noahyará kixin jahará kaín rá na mé ijnko ninkoe Dios la ko Nchakuen Dios mé chóna asánrá? ¹⁷ A ntá jnkojin nkexro tjinkaon ts'óxika tí ninkoe Dios na mé Dios mé sinchek'itjayan tí nkexro xikaha sich'e kixin tí ninkoe Dios la tjóá tíha. A ntá tí ninko a mé jahará tíha.

¹⁸ Ninkexró chrókjuenkayáxin kixin imá nohe. Tí jnkojinrá tónhen asánrá kixin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kixin ntá chrók'uitjára chrók'ónará ijnko chojni chaxín nohe. ¹⁹ Tí nkehe nohe tí chojni chjasintajni la mé ijnko nkehe lontj t'ikon Dios. A ntá ntáchro tí xroon itén Dios tsíkjin sín ósé kixin: “Tí nkehe tsík'itjá sín ch'iyaxín sín la tíha mé tsokjan ts'enxín sín.”* ²⁰ La ko kjaxin ntáchro xroon itén Dios kixin: “Inchéni la ó nohe ch'án kixin kaín nkehe tjenkayáxin tí sín ntáchro sín kixin imá nohe sín la mé ijnko kjuaxrexinkaon lontj tíha, ichro Dios.”† ²¹ Méxra chrókjuínchekhehyará jahará kixin chréhérá ijnko chojni imá nohe, kixin kaín xín nkehe siín la kuéntará jahará, ²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxin, la kaín la kuéntará tí jahará. ²³ A ntá jahará la Cristo mé t'ayakonhanrá. Kixin Cristo la jehe ch'án la mé kuente Dios.

4

Tí xra kjuích'e tí sín kjueya Inchéni

¹ Jahará chrók'uikonrá tí jeheni éxí chojni ch'ehó Cristo xra k'uáyéheñi tí xra tjakoni tí nkehe kuente Dios ninkexró k'uénoehya. ² A ntá ijnko chojni k'uáyéhe xra ts'etjan chrókjuakoxin kixin jina ch'án la ko jina ch'e ch'án xra. ³ A ntá janhan tóxakonnahya tí nkehe chróntáchrorá jahará chrókjuanchiará jie tí janhan kixin tí xra t'aha Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná. ⁴ Kjánchó janhan tjenkayáxinhya kixin chonta jie. Kjánchó jehya xikaha tsontáxrjan kixin Dios t'ikon kixin chontahya jie janhan. Náhí. Jehe Inchéni mé tsotsjehe ch'án nkehe tí jie chonta janhan. ⁵ Méxra naxa kjuixrakáhya yaon chrókjuínchekitoexínrá ichrén jie. Chonhénrá tí tsi Inchéni kixin jehe ch'án mé sinchenoxín ch'án kaín tí nkehe síma ti sítié, la ko sinchenoxín ch'án kaín xín nkehe imó tjenkayáxixín asén chojni. A ntá Dios mé tsjanjon ch'án tí nkehe tsjacha jnkojnko chojni.

* 3:19 Job 5.13 † 3:20 Salmo 94.11

⁶ Kíchóni, nixjahará tí nkehe i kixin jína chrók'uejorá jahará ntá xíkaha kjuintayóaxian éxí ch'ín Apolos la ko éxí janhan kixin chrók'uitjará kixin chrók'juenkayáxinrá jehó tí nkehe tsíkjin sín ósé, kixin nijnko nkexro chrók'juinchehnkehya kixin chréhe sín ijnko chojni, a ntá tsochóntehya sín kjuasáyé tí í jnko chojni. ⁷ ¿Méxra nkexro ntá chro kixin jahará antsí tjetoaná? ¿Xá nkehe chontará naxa kjuanjonha Dios kixin? Tí kjuanjon Dios kaín nkehe chontará, ¿ntá nkekuènte nchehnkerá kixin jahórá tsíkjéyará tíha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxí ijnko rey, la í t'ichjánxianhyará ninkehó tí jeheni kixin naxa chrók'juinkitsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'ueñoanni. ⁹ Ntá tónhen asenná kixin jeheni chojni kjueyá Ìnchéni mé kjuanjon Dios kixin jeheni chrók'juixixín chrók'uejóni éxí chojni kuìtonhenni kixin noxín chrók'ueenni ts'ikon kaín xín chojni chjasintajni la ko ts'ikon tí sín ángel kjaxin. ¹⁰ A ntá jeheni tinkáchónkini Cristo, a ntá xíkaha t'ikon sín tí jeheni éxí chojni lontí. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté naxa jie jeheni t'enxínni kjinta, la ko t'enxínni nta, la ko chóntahyani ikéni, la ko nínkakohenni chojni, la ko chóntahyani nkerí ts'ejóni. ¹² La ko tóxrjéni kixin itjani ch'exínni xra. A ntá tió t'ántaxínhinni sín la tjancheheni Dios kixin sincheyaoon ch'án tí jehe sín. La ko tió chónkíhi sín tí jeheni la tónínkakuenhyani sín. ¹³ Tió t'ántaxínhinni sín la jnkójina tjateheni tí jehe sín. T'ikon sín tí jeheni éxí chjínínó ntihi chjasintajni, na mé éxí ijnko nkehe ninkehó sínkíhya la ko mé xíkaha naxa sítónhen tí yaon jie.

¹⁴ Ikjian tíhi na jehya kixin chrók'juintasuaàhará. Náhí. Tjínkavan chrók'juintaxráxinkáonrá kixin éxí xjanna t'íkuan tí jahará, tjuahará. ¹⁵ Kjónté chróchontará ite mil chojni chrók'juakohará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonrá Cristo Jesús kixin kjuákoohará tí tan jína tsaáxinni. ¹⁶ Mé xíkaha xrjanóahará kixin chrók'juákoxinrá éxí tí janhan.

¹⁷ Méxra kuétuanhan tí ch'ín Timoteo kixin tsjiji ch'án ntiha. Na mé éxí xjanna t'íkuan tí jehe ch'án, tjuaha ch'án, kixin kjuákooha ch'án ntá kuítekaon ch'án Ìnchéni ntá xráxín jína ch'e ch'án xra. Ntá tsjiji ch'án sintaxraxinkáonrá ch'án nkexrí tjákoxian tí ntje Cristo éxí xráxín tjákua kaín xín njnko t'atsínka tí janhan. ¹⁸ Ntá iso tí jahará imá ihnkerá kixin tjenkayáxinrá kixin chaxínhya chrók'juasántsahará. ¹⁹ A ntá tjoka chrók'juasántsahará tí chaxín xíkaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuinhan. Náhí. Na mé ts'íkuan á chaxín chóna sín kjuachaxin kixin xíkaha nixja sín. ²⁰ A ntá tí kjuachaxièn Dios la jehya tí nkehe tsonixjani ó. Náhí. Tí tjákoxinni la tí kjuachaxièn Dios. ²¹ ¿Nkehe tjínkáonrá tí jahará, kixin á chrók'juasán chrók'juintakjasótíará? o ¿á tjínkáonrá kixin jnkójina chrók'juasán?

5

Tsitoexín ijnko jie tjachehe kichó chojni

¹ ¿Á chaxín tsík'ikon sín kixin tí tjejorá ntiha la ijnkorá mé chontará nájoaná éxí ichjiánrá? Tíha mé ijnko jie jie, la mé kjónté tí sín chónhya Dios la xíkaha ch'e sín. ² A ntá kjónté xíkaha tsíkónhen la imá ihnkerá. Íchá jína imá chrók'uavará. A ntá tí xíkaha ch'e ijnko chojni ntá chrókuétuenhénra ch'án sáchrók'juí ch'án, chrók'uejokoahyará ch'án ntiha. ³ A ntá ntáxrjan janhan kjónté tjenhya cuerpo kuéntana tí tjejorá ntiha la tí tjenkayáxian la ntaha tjèn éxí chrók'juak'é janhan, ntá t'akjénxian ihníé Ìnchéni Jesu-cristo la ntáxrjan kixin ó kjuixin kjuenkayáxian kixin nkexrí chrók'juasóte tí ch'ín xíkaha tsík'ich'e. ⁴ Tió tsojnkotsérá kaín rá ntiha la éxí koyá tsjak'é ntiha la kjánchó nchakuennà ó la ko koí tí kjuachaxièn Ìnchéni Jesús ts'ejókoará ntiha. ⁵ A ntá tí ch'ín a la nchek'ayéhéra

tí ch'ín Tsochren kixin tsjasóte tí cuerpo kuènte ch'án. Ntá tió tsokjan Ìnchéni mé tsaá asén ch'án.

⁶ Jahará chrókjuinchehnkehýará kixin tí nkehe tsíkónhen ntiha. ¿Á noahýará nkehe ntáchro sín, kixin tí ch'o a mé tjiko intsíkoá tí xroan nchek'ánkí niotja, ntá kjónté la tsosán kaín tí ch'o? ⁷ Méxra chrókuakítsjerá ntója kaín tí xroan ntaxin nchek'ánkí niotja, kixin ntá jahará ts'ejorá éxí niotja tsík'óna ch'o nixin tsíkjikohya xroan nchek'ánkí niotja. Éxí niotja ine sín tí yaon pascua, mé jahará tíha. Kixin jehe Cristo, éxí ijnko kolélo t'óyán sín tí yaon pascua, mé k'uenyákonhenni ch'án. ⁸ A ntá chrókjuasinni tí kia a la kaín asénni chróxraxinkaonni, tíha la éxí tí niotja chóntahya xroan nchek'ánkíxin. La jehya kixin chrókjuasinni tí kia naxa chróchóntani kjuanínkaon kixin táha la yóhe tí xroan ntaxin nchek'ánkí tí niotja a.

⁹ A ntá íjnko xroon chr'anhánrá k'uéntáxrjan kixin ninkehó chrók'uítohyará tí sín tjasin jie chóna chojni chjin ókjé. ¹⁰ Ntá jehya kixin kuétuanhanrá kixin chrók'uítohyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhi. Tí xikaha chrókjuich'erá la t'ichjánxin chrók'uaxrjéxinrá tí chjasintajni. ¹¹ Méxra ó kuétuanhanrá kixin chrók'uítohyará ninkehó jnkójin chojni ntáchro sín kixin kichó ni tí jehe sín, ntá naxa tjasin sín tí jie chóna sín chojni chjin ókjé, la ko tjinkaon sin jehó sín tsochóna sin itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjuóntekoahýará sín. ¹² Jehya xrana chrókjuintakitoaxián tí ijie tí sín jehya kuènte nínko ntiha. A ntá tí xra kuéntará jahará kixin chrókjuinchekitoexínrá tí ijie tí sín kichó ni tójnksé nínko ntiha. ¹³ A ntá Dios mé sinchekitoexín ch'án ijie tí sín jehya kuènte nínko. Méxra, takítsjekjanxinrá tí ch'ín jínahya kjuasin jie tí tjejorá ntiha.

6

Chrókjuikjanchahya sín jie nkayakon tí ch'ín juez tinkáchónkihya Ìnchéni

¹ A ntá jnkójinrá chrókjuánjonkoará kichuára chrókjuikjanchahýará jie nkayakon tí ch'ín juez tinkáchónkihya Ìnchéni. Íchá jína chrókjuirá chróchenkará tí sín tinkáchónki Dios. ² ¿Á noahýará kixin tí sín tinkáchónki Ìnchéni mé sinchekitoexín sín ijie kaín xín chojni chjasintajni? A ntá xikaha sinchekitoexínrá ijie kaín xín chojni chjasintajni, ¿ntá nkekuènte tsjachahýará sinchekitoexínrá kjónté ijnko jie ntsí? ³ ¿Á noahýará jahará kixin kjónté tí sín ángel tsotsjeheni nkehe tí xra kjuích'e sín? A ntá ijnko nkehe intsí ntihyó, la ¿á xitjahya chrókjuásiyóxinrá? ⁴ A ntá xikaha chrókjuánjonkoará kichuára, ¿ntá nkekuènte tjikjanchiará jie nkayakon tí sín tkiníxinhya kuènte nínko? ⁵ Ntáxrjan xikaha kixin chrókjuintasuàhará. ¿Xá kohya ninkexró kichó ni ntiha chóna kjuaxrexínkaon jína tsjacha sincheyóxinhin ijie kichó ni? ⁶ Jahará jnkokoá kichuára ntá tjanjonrá, la ko kjaxin sátjéjanchiará jie nkayakon tí ch'ín juez tinkáchónkihya Ìnchéni.

⁷ Kjónté ijnko jie ntsí ntá imá tjanjonkoáxinrá kichuára; tíha mé t'óna ijnko jie jie. Íchá jína chrókóninkákonhýará kixin tí nkehe jínahya kjuít'ahará sín. Íchá jína chrókuítóhéra sín kjónté tsaáhará sín. ⁸ Kjánchó kjaxin jahará ntoáhya tjejoch'erá kixin kjónté jnkokoá kichuára la teeherá sín.

⁹ ¿Á noahýará kixin tí sín jínahya ch'e la ts'áyèhya sín kjuachaxin kuènte Dios? Chrókuítóéhyará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ó chjin, t'ó ntoa, la ko tí sín jnkokón ntoa sín tóxrjínhin kichó sín, ¹⁰ la ko tí xichee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé

ts'áyèhya sín kjuachaxin kuènte Dios. ¹¹ Xikaha k'uéjórà isorà senó. Ntá jie ó k'uíjmárà, kjuínchetjóará Dios, ntá ó xíka ijjárà kjuachaxin ihnié Ìnchéni Jesucristo la ko kjuachaxin kuènte Nchàkuen Dios.

Tí cuerpo ó tsíkótjóá

¹² Siín kjuachaxin kaín nkehe chrókjuít'a, kjánchó iso nkehe la ó chónkó. Siín kjuachaxin kaín nkehe chrókjuít'a, kjánchó chrókuítóahya ninkehó nkehe chrók'uetuanna. ¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjáyan yóí tíha. A ntá k'ónahya tí cuerpo kuènteni kixin chrókjuasixínni jie. Náhí. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni. ¹⁴ Méxra Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kixin jnkójnko cuerpo kuèntará mé it'ò tí cuerpo kuènte Cristo? ¿Á chrókjuít'a janhan kixin it'ò tí cuerpo kuènte Cristo chrók'óna it'ò cuerpo kuènte ijnko chojni chjin ch'iehe nchónhya chojni ntoa? Méxra kjá náhí. ¹⁶ ¿Á noahyará kixin tió ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín chrók'óna sín jnkokoá cuerpo? Kixin ntáchro xroon itén Dios kixin: “Yóí sín la ts'óna sín jnkokoá chojni.”* ¹⁷ A ntá tí jnkójín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

¹⁸ Méxra chrókuítóhérahá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín. ¹⁹ ¿Á noahyará kixin jnkójnko cuerpo kuèntará mé éxí ijnko nínko itjen Nchàkuen Dios kjuanjón ch'án k'uayéhérahá, la ko chontará tí Nchàkuen ch'án tjóá? Jahará la jehya ìnché tí cuerpo kuèntará ²⁰ kixin jahará la tjete k'uénaxínrahá Dios. Méxra chjééxinrahá kjuasáyé Dios tí cuerpo kuèntará la ko tí nchàkónrá kixin yóí la kuènte Dios.

7

Chenka ch'án tí sín tsíkótehe kixin nkexrí chrók'uejó sín

¹ A ntá jie tsjataha tí nkehe tsíkjinrahá kjuanchankínarà, na mé ntáxrjan kixin chaxín chrókójína kixin tí chojni ntoa chrókuakjahya ichjién. ² Kjánchó tí xikaha imá tjinkaon sín tsochóna sín itsjé chojni chjin tjasinko sín jie, la íchá jína jnkójnko chojni ntoa chróchóna jnkójnko ichjién kuènte la ko jnkójnko chojni chjin chróchóna jnkójnko xì kuènte. ³ Tí chojni ntoa la ko tí chojni chjin chrókjuinchexiteyéhe sín kichó sín. ⁴ Tí chojni chjin jehya ìnché tí cuerpo kuènte tjan, na mé kuènte xì tjan. Ntá kjaxin xikaha tí chojni ntoa la jehya ìnché tí cuerpo kuènte ch'án, na mé kuènte ichjién ch'án. ⁵ Chrókjuíncheniéhérahá kíchuará, jehí jnkokoá chrókjuenkayáxinrahá yóírahá kixin tsochonteherá iso yaon kixin ntá kaín asánrahá chrónixjehérahá Dios. Ntá tsjixin ntá chrókóchjineherá kíchuará inaá kixin chrókuítóéhyará kixin ch'ín Tsochren chrókjuacha chrókjuachroerá ch'án chrókjuásinrahá jie.

⁶ Kaín tíhi tjónkará kixin tsonohará kixin siín kjuachaxin xikaha na kjánchó jehya kixin xikaha tétuanhanrahá. ⁷ A ntá janhan ntáxrjan kixin chrókójína kixin kaín rá chojni ntoará chrókóyóhará éxí tí janhan. Kjánchó Dios chjéhe kjuachaxin jnkójnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxa tóteehya la ko tí chojni tsíkó'án na ntátjan sín kixin chrókójína kixin xikahó chrók'uejó sín chrókóteehya sín éxí tí janhan xikaha. ⁹ Kjánchó tí chrókjuachahya

* 6:16 Génesis 2.24

sín tí tjak'e asén kichó sín, naxa chrókjuasin sín jie, ntá íchá jína chrókótehe sín kixin jehya jína kixin jnkochrín chrókjuak'ó asén sín.

¹⁰ A ntá jahará ó tsíkjin tsikótahará, la tétuanhanrá tíhi: a ntá jehya kixin kjuachaxin kuéntana tétuanxínrá. Náhí. Kjuachaxin kuente Ìnchéni mé tétuanxínrá kixin tí chojni chjin chrókjuákehya xii. ¹¹ A ntá tí chrókjuákehya ijnko chojni chjin tí xii, ntá xikahó chrókuitohe tjan jehó tjan la ko chrókójína chrókóyóxin, chrókjuínhin tí kjuanínkaon kixin tí kjuákehya kichó sín. Kjaxin xikaha tí chojni ntoa la chrókjuákehya tí ichjién.

¹² A ntá tí nkehe tétuanhan tí í so sín jaí la kuéntana janhvàn, jehya kuente Ìnchéni, kixin tí tjan ijnko ch'ín kichó ni chóna ch'án ichjién ch'án tinkáchónkihya Ìnchéni, na kjónté naxa tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. ¹³ La ko tí tjan ijnko tjan kichó ni chóna xii tjan tinkáchónkihya Ìnchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. ¹⁴ Kixin tí xii tjan tinkáchónkihya Ìnchéni ntá jie ó kótjóá ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kixin tí xii tjan mé tinkáchónki Dios. A ntá tí xikahya, la tí xjeen sín chrókótjuáhya, na ntá jie la mé ó kótjóá tí xjeen sín. ¹⁵ A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehya kichó sín, la ája nohe sín tjákehya kichó sín, kixin Dios tjinkaon kixin kjuaxróxin chrók'uejorá. ¹⁶ Jahará chojni chjinrá, ¿nkexrí chrókónohará kixin nkexrí chrókuaá xiará? La ko jahará chojni ntoará, ¿nkexrí chrókónohará kixin nkexrí chrókuaá ichjiánrá?

¹⁷ A ntá jnkojnko chojni chrók'uejó sín éxí tsíkjanjon Ìnchéni kjuachaxin tsík'áyehya sín, la ko éxí tí k'uejó sín tió k'uíyehya sín Dios, kjánchó chrókuitohehya sín tí jehe ch'án. Mé xikaha tétuanhan kaín tí njnko. ¹⁸ Tí chrók'uíyehya Dios ijnko ch'ín chóna xroye, ntá xikahó chrókuitohe ch'án. A ntá tí chrók'uíyehya Dios ijnko ch'ín chónahya tí xroye a, ntá kjónté chrókuaahya ch'án tí xroye a. ¹⁹ Na mé tjetuanhya á chóna chojni tí xroye o á chónahya chojni tí xroye. Na mé tí nkehe tjetuan kixin chrókjuínchexiteyeheni tí nkehe k'uetuan Dios. ²⁰ Chrók'uejóni jnkojnkoní éxí k'uejóni tí k'uíyehya Dios. ²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuaákjá tíha. ²² Kixin tí nkexro kjuích'exón xra tió k'uíyehya Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uituenhya tió k'uíyehya Ìnchéni la mé jie mé ch'ehe ch'án xra Cristo. ²³ Dios imá tjete k'uenaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna ìnchárá. ²⁴ Méxra kichó ni, éxí k'uejorá tió k'uíyáhará Dios kixin tsinkáchónkirá ch'án, la xikahó naxa chrók'uejorá jie kixin chontará Ìnchéni tsjinkitsa.

²⁵ A ntá tí chojni naxa tóteehya sín na mé janhan chontahya nkehe kuente Ìnchéni chrókuétuanhan sín. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kixin kuikonóna Ìnchéni. ²⁶ Mé xikaha tónna kixin chrókójína kixin jnkojnko chojni chrókuitohe sín éxí tjejó sín chrókóteehya sín, kixin ijie la kjuaxróxinhya tjejóni. ²⁷ A ntá tí chontará ichjiánrá ntá chrókjuákehya tjan. A ntá tí chontahyará ichjiánrá ntá íchá jína chrókjuéyahya. ²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsíkótehe la tsochóna sín kjuaxikaon, mé xikaha janhan chrókjuínkitsa sín kixin chróchónahya sín kjuaxikaon.

²⁹ Mé xikaha tjetjonkará kichó ni kixin tsjéhya yaon naxa t'itjáyan tsokjan Ìnchéni. Mé xikaha tí chojni ntoa chóna ichjién sín, la antsí tjetuan saxín chróxraxinkaon sín Ìnchéni, la ntá chr'éxin chrótjuéhe sín ichjién sín. ³⁰ A ntá tí sín tsjánka la chrók'uejó sín éxí chrótsjánkahya sín. La ko tí sín chéhe la chrók'uejó sín éxí chéhya sín. La ko tí sín t'ena nkehe la chrók'uejó sín éxí chónahya sín tí nkehe tsík'ena sín. ³¹ La ko tí sín kjuacha nkehe

siín chjasintajni la chrók'uejó sín éxí ninkehó chróchóntahya sín, kixin kaín nkehe t'ikonna chjasintajni ntihi mé tjoka tsjeje.

³² Tjínkəkonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuènte Ìnchéni chrókjuinchexiteyéhe ch'án tí nkehe tóxrjínhin Ìnchéni. ³³ A ntá tí ch'ín tsíkótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án. ³⁴ Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí asén tjan. A ntá tí tjan tsíkótehe mé tóxakonhen tjan tí nkehe siín chjasintajni kixin xikaha sinchechéhe tjan xii tjan.

³⁵ Tjétjonkará tíhi kixin tjínkəvan kixin jína chrók'uejorá, jehya kixin xikaha chrókuétuanhanrá. Náhi. Tjínkəvan kixin kjuasáya chrók'uejorá jnkójina la jehó Ìnchéni chrókjuich'eherá xra.

³⁶ A ntá jnkójínrá tjenkayáxinrá kixin chrókójina chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsotehe tjan na mé jehya jie. ³⁷ A ntá jnkójínrá tjinkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha. ³⁸ Mé xikaha tí tjtóhéra xjaanrá chjin kixin tsotehe tjan la ó nchoxon. La ko kjaxin tí tjinkakonhya tjan kixin chrókótohe tjan na mé antsí jína tíha.

³⁹ Tí tjan tsíkótehe mé k'úituenxín tjan kjuachaxin tí ley kixin tsjak'eko tjan tí xii tí naxa tjechón ch'án. A ntá tí chrók'uen ch'án ntá tsochónta tjan kjuachaxin tsotehe tjan inaá tí nkexro tsoxrjínhin tjan, kjánchó jehó ijnko nkexro tinkáchónki Ìnchéni mé chrókótehe tjan. ⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuènte Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsoxrjanka kuènte ti ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kixin tí chrók'uitjani má ntá chrókóhnkeni má. Antsí tjetooan chrótjuèheni kichó ni kixin xikaha antsí chrókuinkáchónkini Ìnchéni. ² Tí jnkójín nkexro ntáchro kixin nohe ch'án, na mé chaxínhya tíha la naxa t'itjayan tí nkehe chrókónohe ch'án. ³ A ntá jnkójín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuanhya ninkehó ntihi chjasintajni, la ko ó noheni kixin jnkokoá Dios tjen. ⁵ A ntá siín nkehe nchek'in sín díos nkaya nkajní la ko chjasintajni na, kjánchó tí xikaha la kjá chrók'uixin itsjé díos la ko itsjé ìnché sín. ⁶ A ntá jeheni chóntani jnkokoá Dios na mé It'éni tíha, la jehe ch'án mé kjuích'éna ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe siín la kjuích'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuènnen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko dios, kixin naxa noehya sín má, ntá ntáchro sín kixin ó kuámá sín tí jie kuènte tí nkehe tsíkjanoya. ⁸ Ó noheni chaxín kixin jehya kixin chrókóxrjínhin Dios tí jeheni kixin tí nkehe jína chrókjóneni. Náhi. Jehya kixin chrók'uejóxinni jína kixin tí nkehe chrókjóneni na ko tí nkehe chrókjónehyani. ⁹ Méxra tjtóéhyará kixin tí kjuachaxin chontará sinterá kaín xín nkehe mé xikaha chrókjuachroe ijnko chojni kichó ni naxa noehya jína tinkáchónki Ìnchéni ntá tíha chrókjuasixín sín jie. ¹⁰ A ntá tí chrók'uikon sín kixin jahará ó nohará jína ntá ts'ejorá sinterá nkehe

nkaxenhen ijnko n̄inkoe nkehe tsíkjanoya, ntá tí chojni kichó ni naxa noehya jína ntá chrók'uikon sín xikaha ntá kjaxin jehe sín tsotjinkaon sín sine sín tí nkehe tsíkjokehe chojni ijnko dios chaxínhya. ¹¹ A ntá jahará ó nohará jína ntá xikaha tjejoch'erá itsará sinchek'itjáyanrá tí kichó ni naxa noehya jína tinkáchónki Ìnchéni kixin Cristo k'uenyákonhen tí jehe ch'án kjaxin. ¹² Méxra tí xikaha chrókjuich'erá la chrókjuásinhínrá jie tí sín kichó ni naxa tinkáchónkihya sín Ìnchéni jína, na mé xikaha kjaxin chrókjuásinrá jie chrókuitekákuenhyará Cristo. ¹³ Méxra tí xikaha chrókjuasixín jie ijnko kichó ni kixin tí nkehe chrókjóneni, ntá íchá jína chrókjónehyani nto ínaá kixin xikahya ntá chrókjuichroexín tí sín kichó ni ntá chrókjuasixín sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjeýá Ìnchéni kixin janhan k'uikuān ch'án. Jahará mé tjákoxinrá tí xra kjuít'a kuente Ìnchéni. ² Iso sín ntáchro sín kixin tjátsōanhyana sín kixin ijnko apóstol tsíkjeýá Ìnchéni. Ntá jahará kaín rá mé chrókjuátsōanrá tí janhan kixin tí kuítekáonrá kuinkachónkirá Ìnchéni mé xikaha tjákoxinrá kixin chaxín janhan tsíkjeýána ch'án.

³ Méxra janhan jína chrókjuátaha tí sín xritjontana, chróntáxrjan kixin: ⁴ Janhan chonta kaín kjuachaxin chrók'uayáha nkehe chrókjonè la ko chrók'uia. ⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxí chóna tí í so sín tsíkjeýá Ìnchéni, la ko tí sín kichó Ìnchéni, la ko éxí chóna ch'ín Pedro. ⁶ ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítóheni tí xra sich'exínni tjani? ⁷ ¿Nkexro ch'e xra soldado ntá chichákoen ch'án ó chrókuicháxinhin? Nkexro k'uēnkā nta to uva ntá kjónehya ch'án to? ¿La ko nkexro t'ayakonhen kolélo ntá k'uíhya tí tsjen t'énhen sín va? ⁸ Ntáchrohýará kixin janhvàn kjuenkayáxian tíha kixin kjaxin xroon tsíkjin ch'ín Moisés xikaha nixja. ⁹ Méxra kjaxin ntáchro tí xroon tsíkjin ch'ín Moisés ósé kixin: “Chrókjuéjójáhyará kamposa ir'va koxinta tí tsinkátja va noatrigo tió tsónkéhe sín noa.”* Tíha mé t'axrjexín kixin jehya koxinta ó tóxakonhen Dios. ¹⁰ Náhí. Tóxakonhen ch'án kixin tí jeheni. Méxra xikaha nixja tí xroon kixin chrók'uejójinni jína. A ntá tí nkexro kjuínchenta nche la ko tí nkexro tsónkéhe noa, yóí sín la chróchónhen sín chrók'uáyéhe sín tí nkehe k'óna. ¹¹ A ntá tí k'uēnkani tí itén Dios asánrá, la kjá chróchóntani kjuachaxin chrókjuanchaharáni ichrén nkehe t'ichjánxinhinni. ¹² A ntá tí xikaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uáyéheni nkehe.

Kjonté chóntani kjuachaxin xikaha la kjuanchahyani nkehe, kjonté kánhyó náxrjón k'uejóni kixin tjinkakonhyani chrókjuanchiani nkehe chrók'uichjánxinhinni kixin ách'e xikaha ntá chrók'uinkákonhen tí itén Cristo chrókjuakoni. ¹³ Jahará ó nohará kixin tí sín ch'e xra kúente n̄inko mé ntaha xránjon nkehe ine sín. La ko tí sín t'óyáxin sín ko tí altar tsochjéhe sín Dios kjaxin ine sín tí ntōe tí ko t'óyáxin sín ntiha. ¹⁴ Méxra xikaha kjaxin k'uetōan Ìnchéni kixin tí sín ch'e tí xra ó chrónka sín tí tan tsaáxinni na mé tí xra a chrók'uaxrjeníxin tí nkehe chrókjóne sín. ¹⁵ Kjonté janhan síin kjuachaxin xikaha chrókjuít'a, la xikahya kjuít'a la ko kjaxin xikahya ikjian tí xroon i kixin jahará chróchjñará ichrén nkehe. Náhí. Kjonté chrók'uénxian kjinta chrókjuáncháhyará nkehe kixin tjínkakhonya kixin ninkexró chrókuakitsjena tí kjuachéhe chonta.

¹⁶ Jehya kixin chrokjuintahnke chrókjuákua tí tan tsaáxinni. Náhí. Janhan na ó jehí sít'a tí xra a. Nòa tí janhan tí chrókjuákohya tí tan jína chrókuaáxin chojni. ¹⁷ A ntá tí janhvàn tjínkavan chrókjuákua la xikahó chrókjuacha janhan. A ntá tí tjákua itén Dios kixin xikaha

* 9:9 Deuteronomio 25.4

kuítuanna ntá xikahó ntaxiteyá tí xra chjina Dios. ¹⁸ ¿A ntá nkehe chrókjuacha janhan? Tíha mé chrókjuacha janhan kixin chrókóchàna má kixin chrókjuàkua tí itan tsaáxinni la ninkehó chrókjuánchàhya chrókjuacha la ntá tí xikaha la chrókuákjaáhya tí kjuachaxin tí chrókjuàkua.

¹⁹ Méxra kohya nkexro t'etuanna. Kjánchó ó jehí chrókjuít'aha kaín xín chojni xra kixin xikaha antsí tsjé chojni chrókjuacha janhan kixin chrókuitekaon sín Cristo. ²⁰ Ti tjèn tí siín tí sín judío ntayóha éxí jehe sín xikaha janhan kixin xikaha chrókjuacha jnkojín sín chrókuitekaon sín. Na mé t'axrjexín kixin tí chrókjuacha iso tí sín nchexiteyèhe tí ley k'uetóan ch'ín Moisés, la t'ichjánxin kixin kjaxin janhan chrókjuíntaxiteyá tí ley kjónté janhan la xikahya t'etuanna tí ley. ²¹ A ntá tí chrókjuacha jnkojín tí sín nchexiteyèhya tí nkehe k'uetóan ch'ín Moisés la ntayóha éxí tí jehe sín xikaha janhan kjaxin, kjónté chaxín t'etuanna tí nkehe k'uetóan Dios méxra ntaxiteyá tí nkehe k'uetóan Cristo. ²² Tió tjèn tí siín tí sín tienxínhya jina, ntá kjaxin janhan t'óna éxí tí jehe sín kixin xikaha chrókjuacha jnkojín tí jehe sín chrókuitekaon sín. Méxra ntayóha éxí kaín xín chojni xikaha janhan kixin xikaha chrókjuacha janhan kixin chrókuaá iso tí jehe sín. ²³ Mé xikaha kaín tíha tjét'a kixin chrókuinhin sín tí tan chrókuaáxin sín la ko kjaxinna antsí má chrókjuíntayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsitonhen nkehe. A ntá jahará xikaha chrókuinkará kixin chrók'uayéhérá tí nkehe chrókjuítonhanrá. ²⁵ Tí sín tinkáko kichó sín na mé jina t'ayakonhen sín asén sín, títohe sín kaín xín nkehe chrókjuich'ehe sín daño kixin tjinkaon sín chrókjuacha sín, chrók'uáyéhe sín kjónté ijnko corona tsík'óna kayoa ó tjoka tsoxamá. Kjánchó jeheni ch'eni xra kuènte Ìnchéni kixin ntá ts'áyéheni ijnko nkehe chónhya tsoxamá. ²⁶ A ntá janhan jehya éxí ijnko chojni t'ikonhya chrókuinka. Jehya éxí xrínto ó chrókjuánjonkian. ²⁷ Náhi. Janhan tjánjonkian tí cuerpo kuèntana, tétuanhan kixin jina chrókjuinchexiteyàna kixin tóxakonna kixin chrókjuásian ichrén jie ntá janhan chrókjuachahya kjónté senó kjuákoḥa itsjé chojni.

10

Tí nkehe t'etoan ch'án kuènte tí nkehe tsíkjanoya

¹ Tjínkavan janhan kixin chrókónohará kichó ni kixin tí sín k'uaxrjeníxinni ósé, kaín sín k'uixinkánki sín chrínki tí tjuí, la ko kaín sín k'uátòye sín Ntayaon Kjátse, ² la ko kaín sín k'uéchréhe sín ch'ín Moisés éxí yóhe chrókuikite sín kixin jnkokoá k'uéjó sín tí tjen tí tjuí la ko tí ntayaon la ko kjuínchexiteyèhe sín ch'án kixin jehe ch'án k'uék'etoan ch'án. ³ La ko kaín sín kjóne sín jnkokón nkehe kuixín nkaya nkajní ⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuíncheyaon Dios, na mé tí tjo a la mé t'axrjexín kixin Cristo tíha. ⁵ Kjánchó itsjé tí jehe sín kjuínchexèhya sín Dios, méxra kónínkaon ch'án la tí nteje ó k'uénxin tí sín a.

⁶ Kaínxín tíha kónhen kixin chróxaxinkakonxínni jeheni, chróntáchrohya asénni chrókjuich'eni tí nkehe jínahya éxí kjuích'e tí jehe sín. ⁷ Méxra chrókuinkachónkihyará jahará nkehe tsíkjanoya éxí k'uékinkáchónki iso tí jehe sín, éxí ntáchro tí xroon itén Dios tsíkjin sín ósé kixin: “Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín”.* ⁸ Méxra chrókjuasinkohyani jie chojni chjin ókjé éxí kjuích'e iso jehe sín ntá ik'uén sín, ventitres mil sín, jnkokoá yaon.† ⁹ Kjaxin chrókjuinchekóninkakonhyani Ìnchéni éxí kjuích'e sín ntá ik'uén sín kixin kjónehe sín konche,‡ ¹⁰ la ko chrók'uántaxíenhyani Dios éxí k'uántaxínhin tí jehe sín ntá tí ángel kuènte kjuach'én mé kui k'óyán sín.§

¹¹ Kaín tíha kónhen tí sín k'uaxrjeníxinni ósé kixin chrókónoexínni la ko k'óna xroon chrónka xikaha kixin nchexaxinkaonni tí jeheni tjejóni jie kixin í séhya tsjixixín tsjeje

* 10:7 Éxodo 32.6 † 10:8 Números 25.6-9 ‡ 10:9 Números 21.5-6 § 10:10 Números 16.41-49

chjasintajni. ¹² A ntá tí nkexro ntáchro kixin ntoá tjen na chrókóxakonhen kixin chrókjuichroehya. ¹³ Jahará naxa k'uatínkahyará ninkehó nkehe tí chrókjuachahya chojni chrókónhen. Méxra jahará chróxráinkáonrá Dios kixin jehe ch'án chrókuítóehya ch'án tí jahará kixin chrók'uatínkará nkehe imá xra chrókjuachahyará. Méxra tí itsi ichrén nkehe tsonhanrá la Dios tsjinkitsará ch'án kixin chrókjuachará chrók'uatínkará tí nkehe chrókónhanrá.

¹⁴ Méxra tjuahará jahará kichó ni, la ntá ntáxrjan kixin chrókuítóhérá tí nkehe tsíkjanoya. ¹⁵ Nixjahará jahará kixin jahará chojni ó tienxín. Méxra jahórá chrókjuenkayáxinrá kixin á jina tí nkehe ntáxrjan. ¹⁶ Tí tjanchiani kjuasáya kixin tí nkehe it'ini na mé kaín ni jnkokoá tjakoxinni tí ijnié Cristo ó k'uitji. La ko tió tóchrít'oni tí niotja ineni, na mé kaín ni jnkokoá tjakoxinni tí cuerpo kuènte Cristo. ¹⁷ Kjonté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuènte Cristo.

¹⁸ Chrókónohará nkexrí ch'e tí sín chjasin Israel, na mé ine sín tí ko tsíkjokehé sín Dios ntá xikaha tjakoxin sín kixin xikaha tinkáchónki sín. ¹⁹ Ntáxrjanhya kixin tí nkehe tsíkjanoya la chóna kjuachaxin, la ko ntáxrjanhya kixin tí nto tsíkjokehé sín tí nkehe tsíkjanoya la antsí chóna kjuachaxin. ²⁰ Náhí. Ntáxrjan kixin tí nkehe tjanjon tí sín chónhya Dios na mé tjokehé sín tí nchakuen tí jínahya la jehya Dios tjokehé sín tíha. Méxra janhan tjínkakhonhya kixin xikaha chrókjuich'erá jahará chróxráinkáonrá tí nchakuen tí jínahya. ²¹ Tí its'ini tí nkehe xraxinkakonxínni ijnié Ìnchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jina tí xikaha chrókjuich'eni chrók'uini. Tí sineni tí nkehe xraxinkakonxínni tí cuerpo kuènte Ìnchéni ntá kjaxin tí chrókjóneni tí nkehe xraxinkakonxín sín tí nchakuen tí jínahya la jehya jina tí xikaha chrókjuich'eni chrókjóneni tí nkehe. ²² ¿A jina chrókjuinchekóninkaonni Ìnchéni ní? ¿Á jeheni antsí chóntani kjuachaxin la ntá jehe ch'án la náhi ní?

Chóntani kaín kjuachaxin kaín xín nkehe na kjonté antsí tjetoan tsotjuèheni kichó ni

²³ Siín kjuachaxin ichrén nkehe chrókjuich'eni. Kjánchó jehya kixin kaín nkehe la jina. Siín kjuachaxin ichrén nkehe chrókjuich'eni na kjánchó kénhya nkehe chrókjuinkitsa chrókónoheni tí nkehe kuènte Dios. ²⁴ Chrókjuéyáhyará tí nkehe chrók'uejóxinnrá jina jahórá. Náhí. Kjaxin chrókjuéyará tí nkehe chrók'uejóxin jina í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin tí xikaha ntá ntoáhya chrókjuenkayáxinrá, ²⁶ kixin kuenté chjasintajni la kaín xín nkehe siín la kuènte Ìnchéni.

²⁷ A ntá jnkójín chojni tinkáchónkihya Ìnchéni chrók'uíyahará sín kixin chrókjontekoará sín la ko tjínkáonrá sáchrókuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó. ²⁸ Kjánchó tí chróntáchro jnkójín sín kixin tí nto la ó tsíkjokehé sín ijnko nkehe tsíkjanoya, ichro sín, ntá tí xikaha la chrókjontehyará jahará, chrókóxakonhanrá kixin ntoáhya chrókjuenkayáxin tí nkexro chrónka xikaha. ²⁹ Méxra ntáxrjan tíhi kixin tjínkakhonhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankínará kixin nkekuènte chrókóxakonhanrá nkehe chrókjuenkayáxin ókjé chojni kixin tí kjuachaxin chontará. ³⁰ Tí tjáncháha Dios kjuasáya kixin tí nkehe inè, ¿ntá nkekuènte kixin chrókjontana chojni kixin kuènte kjonè? ³¹ Tí chrókjónterá nkehe la ko chrók'uirá nkehe la ko ichrén xra chrókjuich'erá la chrókjuákoxinrá kixin Dios kjuínkitsará. ³² Ch'ehyará ninkehó nkehe chrókjuichroexin í so chojni kjonté judío sín la kjonté jehya judío sín la o tí chojni ninkoe Dios. ³³ Janhan mé tjéyá kixin kaín xín xra tjét'a chrókóxrjínhin kaín xín chojni, na mé jehya kixin tjéyá kixin janhvàn chrókjuak'é jina. Náhí. Kjaxin tjínkavan kixin chrókuaáxin í so chojni.

11

1 Chrókjuákoxinrá jahará éxi kjuákoxiān janhan kixin janhan mé kjuákoxiān éxi kjuákoxin Cristo.

Jína chrók'uejó tí chojni chjin tió tójnkotsé chojni

2 Kíchóni, chàna kixin xráxin xráxin káonrá tí janhan la ko nchexiteyéhérá tí nkehe kjuákohará. 3 A ntá tjínkavan kixin chrókiénxinrá kixin Cristo t'etuenhen jnkojnko chojni ntoa, la ko kjaxin xikaha jnkojnko chojni ntoa mé t'etuenhen tí ichjién, la ko kjaxin xikaha Dios mé t'etuenhen Cristo. 4 A ntá tí jnkojín chojni ntoa xrasixín kachjinke ch'án tí tjenixjehe ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjákoxin ch'án kixin chóntehya ch'án kjuasáyé tí Ìnchéni t'etuenhen ch'án. 5 A ntá ijnko chojni chjin tjóchin kja tjan tí tjenixjehe tjan Dios la o tjóchin kja tjan tí tjechronka tjan iten Dios, mé xikaha tjákoxin tjan kixin chóntehya tjan kjuasáyé tí xì tjan. Mé tóyóhe éxi tsíkjin tjan xikaha. 6 A ntá tí chojni chjin tjinkakonhya kixin chrók'uiáxin kja tjan nkehe mé chrókjin tjan. Kjánchó tí chrókósuèhe tjan chrókjin tjan, ntá chrók'uiáxin kja tjan tóte tió tójnkotsérá. 7 Kixin tí chojni ntoa chrókjuasinhya ch'án kachjinke ch'án kixin jehe ch'án mé éxi retratoé Dios la ko t'inkaséyanxín ch'án tí kjuachaxin kuente Dios. A ntá tí chojni chjin mé t'inkaséyanxín tjan tí kjuachaxin kuente tí xì tjan. 8 Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhí. Tí chojni chjin mé k'uaxrjeníxin tí chojni ntoa. 9 Chaxín k'ónahya tí chojni ntoa kixin jehó tsjak'e ch'án. Náhí. Tí chojni chjin mé k'óna kixin tsjak'ekotoxin ch'án. 10 Ntá t'ichjánxin kixin tí chojni chjin ts'íáxin kja sín tóte chrókjuákoxin sín kixin t'ítuenhen sín kixin xikaha ts'ikon tí sín ángel. 11 Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa. 12 Kixin chaxín tí chojni chjin na tí chojni ntoa k'uaxrjeníxin. A ntá jie tí chojni chjin na mé t'axrjeníxin tí chojni ntoa. A ntá kaín ni k'uaxrjeníxinni Dios.

13 Jahará nkechorá, ¿á ó nchoxon kixin ijnko chojni chjin tjóchin kja tjan chrónixjehe tjan Dios? 14 Jahorá chrókónohará kixin chrókósuèhe tí chojni ntoa chóna kaxihi kjínjin. 15 A ntá tí chojni chjin chóna kaxihi kjínjin la mé ntoá tíha kixin ó kujtuenxin tjan kixin tsochóna tjan kaxihi tjan kjínjin kixin tsotjóchinhya kja tjan. 16 A ntá tí tjen jnkojín nkexro titekakonhya tíha xikaha ntá chrókónohará kixin jeheni la ko kaín xín tí sín ninkoe Dios la xikahó kuènhenni.

Ntoáhya kjóne sín tí niotja xraxinkakonxín sín Ìnchéni

17 Méxra tí nkehe tjékjian la mé ijnko nkehe tóxrjinnahya tjejoch'erá. Tió tójnkotsérá ntiha la ijnko nkehe jína chrókjuich'erá. A ntá náhi la ijnko nkehe jínahya tjejoch'erá. 18 Na mé saoxín na mé ntáchro sín kixin tió tójnkotsérá la jnkokoáhya tjenkayáxinrá. Ntáxrjan kixin ách'e chaxín xikaha tjejorá. 19 ¿Xá t'ichjánxin kixin chrók'uaxrjentará kixin chrókónoexinni kixin nkexro chaxín tinkáchónki Ìnchéni la ko nkexro tí náhi? 20 Méxra tí xikaha jnkokoáhya tjenkayáxinrá ntá tió tójnkotsérá chrókjónterá niotja la chaxinhya xraxinkakonxínrá Ìnchéni tí xikaha. 21 Kixin tió sinterá la senó isorá tjejonterá tí nkehe tsíkjasánkoará, la isorá la kjónté naxa t'énxinrá kjinta, la í sorá la tsíkókoanrá. 22 ¿Á chontahyará nchia ntópará? Ntahó chrókjontexínrá la ko chrók'uíxinrá nkehe. Mé xikaha chontahyará kjuasáyé tí ninkoe Dios la ko nchesuèhérá tí sín nò chónahya ninkehó. ¿Nkehe tsontáxrjan? ¿Á tsontáxrjan kixin jína tjejoch'erá? Kjá náhi. Jehya jína tjejoch'erá.

Jína chróxraxinkakonxínni Ìnchéni

(Mt. 26.26-29; Mr. 14.22-25; Lc. 22.14-20)

23 Kixin Ìnchéni mé chjina ch'án tí nkehe kjuákohará: kixin tí tie tsíkóxi ch'án na mé jehe ch'án kuákja ch'án tí niotja 24 ntá kjuixin kjuanchia ch'án kjuasáya ntá kóchrít'o ch'án tí niotja ntá ntáchro ch'án kixin: “Tíhi mé ntona xránjon its'en kixin jína ts'ejóxin

tí jahará. Méxra xikaha sich'era kixin tsoxraxinkákonxínrá tí janhan”, ichro ch'án. ²⁵ La ko kjaxin xikaha tió kjuixin kjóne sín ntá kuákja ch'án tí vaso la ntáchro ch'án kixin: “Tíhi mé tjakoxin kixin chaxin tsoxiteyá ijnko nkehe nixin kuènte Dios kixin ts'itji jnina. Tió its'irá tíhi mé tsoxraxinkákonxínrá tí janhan”, mé chro ch'án. ²⁶ Kixin tí interá tí niotja la it'irá tí ínté to uva mé xikaha tjeotjákoxinrá kixin xikaha k'uénxin Ìnchéni. Mé xikaha tsjákoxinrá tsjixrakájia yaon tsokjan ch'án.

Ntoá chrókjóneni tí niotja kuènte Ìnchéni

²⁷ A ntá jnkójín nkexro chjini chrókjóne sín tí niotja la ko chrók'ui sín tí ínté to uva xraxinkakonxínni Ìnchéni, mé xikaha chrókjuasin sín jie chrókjuikosáyehya sín tí cuerpo la ko tí ijnié Ìnchéni. ²⁸ Méxra jnkójnkoni chrókjuenkayáxinni senó kixin á chóntahyani jie na ntá chrókjóneni tí niotja la ko chrók'uini tí ínté to uva. ²⁹ A ntá tí xikaha chjini chrókjóneni la ko chjini chrók'uini la chaxínhya chróxraxinkakonxínni tí cuerpo kuènte Ìnchéni la mé tí xikaha chrókjuich'eni la chrókjuasótexínni tíha. ³⁰ Mé xikaha itsjérá níhará la ko itsjérá tsankahyará la ko jnkójínrá k'uénrá. ³¹ A ntá tí chrókjuatsõanni nkexrí tjen asénni jeheni ntá Ìnchéni t'ichjánxienhya chrókjuincheckjasóteni ch'án. ³² A ntá kjónté chrókjuincheckjasóteni Ìnchéni ntá chrók'uitjani chrókjuincheckiteyéheni ch'án, ntá chrókjuasótehyani éxí tsjasóte tí í so chojni chjasintajni.

³³ Méxra kichó ni, tió tójkotsérá sinterá la chróchonhénrá chrókui tí í so sín ntá chrókjóntekoará sín jnkokoá. ³⁴ A ntá tí nkexro ik'uén kjinta la íchá jina senó chrókjónexín nkehe ntõé ó kixin ntá chrókjuincheckjasótehyará Dios kixin xikaha ntoáhya tójkotsérá. A ntá tí í so nkehe la tsjásiyóxian janhan tió tsjasántsahará.

12

Nchakuen Dios mé chjéhe kjuachaxin jnkójnko chojni

¹ Kichóni, tjínkavan kixin tsonohará jina kixin nkexrí siín tí kjuachaxin tjanjon Nchakuen Dios t'áyéhe jnkójnko chojni.

² Jahará ó nohará jina kixin tió naxa kuinkachónkehyará Ìnchéni na mé kuinkachréhéra tí nkehe tsíkjanõya nixjahya. ³ Méxra chrókónohará kixin nijnko nkexro nixjaxin kjuachaxin Nchakuen Dios tsjacha ts'ántaxínhin Jesús, la ko nijnko nkexro tsjacha tsontáchro sín kixin Jesús mé Ìnché sín tí nixjaxínhya sín tí kjuachaxin Nchakuen Dios.

⁴ A ntá nchónhya xra kuènte kjuachaxin Nchakuen Dios siín la kjánchó jnkokoá Nchakuen Dios mé tjetjanjon. ⁵ La ko siín nchónhya nkexrí sich'eheni xra Ìnchéni, kjánchó Ìnchéni la ójnkó nkexro tíha. ⁶ La ko nchónhya nkehe t'axrjexín tí xra ch'e jnkójnko chojni la kjánchó jnkokoá Dios tjetjanjon tí kjuachaxin ch'exínni xra kaín ni. ⁷ Jnkójnko chojni mé kujtonhen kixin chrókjuakoxin kjuachaxin kuènte Nchakuen Dios kixin xikaha chrókjuinkítsa kichó. ⁸ Iso chojni mé ts'áyéhe kjuachaxin tsonixja sín kjuaxrexinkaon jina kixin tjinkítsa Nchakuen Dios, la ko í so chojni ts'áyéhe kjuachaxin tsochronka ijnko nkehe kuènte Dios noehya tí í so sín kixin Nchakuen Dios mé tjinkítsa sín tsonixja sín. ⁹ La ko í so chojni mé ts'áyéhe kjuachaxin antsí tsinkáchónki Dios kixin Nchakuen Dios mé tjinkítsa. La ko í so chojni mé ts'áyéhe kjuachaxin sincheckitohe chojni jina. ¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsõanxín á kjuachaxin kuènte Nchakuen Dios o á kjuachaxin kuènte ijnko nchakuen jínahya chronkaxín ijnko chojni, la ko í so chojni mé ts'áyéhe kjuachaxin kixin ijnko nkiva ókjé naxa k'uitjahya sín tsonixjaxin sín ijnko nkehe kuènte Dios, la ko í so chojni mé ts'áyéhe kjuachaxin tsochronkaxín nkexrí t'axrjexín tí nkehe ókjé nkiva tsíchronka tí í jnko chojni. ¹¹ Kjánchó kaín tíha jnkokoá Nchakuen

Dios mé tjinkitsa, na mé k'uáyéhe jnkojnko chojni jnkojnko kjuachaxin éxi tjinkaon tí Nchakuen Dios nkerí xrā chrókjuich'e sín.

Kaínni k'ónani jnkokoá cuerpo kuènte Cristo

¹² Cristo la éxi yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Inchéni Cristo la ójnkó tí jehe ch'án. ¹³ Kaínni kjónté chojni judío la kjónté chojni jehya judío, la kjónté chojni ch'exón xrā, la kjónté chojni t'ítuenhya, kaín ni na mé jnkokoáxón Nchakuen Dios kuíkitexínni, na kaín ni k'ónani jnkokoá cuerpo kuènte Cristo, na mé éxi jnkokoá nkehe ik'uúni kaín ni na mé k'uáyéheni tí jnkokoá Nchakuen Dios.

¹⁴ Kíxin tí cuerpo kuènteni la jehya jnkokoá parte chóna. Náhí. Itsjé parte chóna tí cuerpo. ¹⁵ Tí chróntáchro tí toteni kíxin: “Jehya itja tí jeheni na mé jehya jeheni kuènte tí cuerpo”, na mé chaxínhya tíha kíxin ó jehe cuerpo kuènte. ¹⁶ Kjaxin tí chróntáchro ijnko ntatsjoni kíxin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kíxin ó jehe cuerpo kuènte. ¹⁷ Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni? ¹⁸ A ntá Dios kjuanjon ch'án kjuachaxin nkexrí ch'e xrā jnkojnko nkehe kuènte cuerpo kuènteni kíxin jehe ch'án nkexrí tjinkaon ch'án kóxrjínhin ch'án. ¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? ²⁰ Kjánchó jie nchónhya parte chóna tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kíxin: “T'ichjánxienhyani tí jaha”, la ko kjaxin tí kjani xitjahya tsontáche tí toteni kíxin: “T'ichjánxinnahya tí jaha.” ²² Náhí. Tí nkehe kuènte tí cuerpo tónhenni kíxin tjetuanhya na mé kjónté antsí má t'ichjánxin ²³ la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakohenni kíxin tsonoxínhya. ²⁴ A ntá tí nkehe náxrjón na mé t'ichjánxienhya ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni ²⁵ kíxin ninkehó xitjahya chrókikayehe tí cuerpo kíxin kaín tí nkehe la jnkokón tjinkitsa kichó. ²⁶ Tió tsikónihi ijnko parte kuènte tí cuerpo la kaín tí í so parte la kjaxin tjtóté; la ko tió tjikosáyehe sín ijnko parte la kuenté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. ²⁸ Méxrā Dios kjueyá ch'án chojni sich'ehe ch'án xrā kuènte nínko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so kjojni chjéhe ch'án kjuachaxin antsí tjinkitsa kichó, la ko kjaxin kjueyá ch'án í so chojni chjéhe ch'án kjuachaxin ts'etoan xrā kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjaxin sín í jnko nkiva. ²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan, ³⁰ la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkiva ókjé, la ko kénhya chojni chóna kjuachaxin tsochronkaxin sín nkexrí t'axrjexin tí nkehe chrónka tí sín nixjaxin ijnko nkiva ókjé. Chaxín kjá náhi. ³¹ Méxrā tjéyará tí kjuachaxin antsí jína chrótjáhará Dios. Ntá jie tsjákohará ijnko ntja antsí jína chrók'uejorá.

13

Chrótjuèheni kichó ni

¹ Tí chróníxja nkívee chojni ó la ko kjaxin chróníxja éxí nixja tí sín ángel, ntá naxa chrótjuahya kíchó ni la ó chónkó tíha la mé éxí chrókóyòna chica tsjánka ó la ko éxí ijnko chica platillo nchevékjan sín ó, kixin ninkehó sòn chóntahya. ² La ko tí chróníxja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónòna kaín nkehe, la ko antsí chrókuinkachónkia Dios ntá chrókjuacha chróntátjan ijnko jnà sáchrókjui ókjé, kjónté tí xikaha ntá naxa chrótjuahya kíchó ni, ntá ninkehó sínkíhya tí janhan. ³ Tí chrókjuintakitonhan tí sín nòa kaín nkehe chonta, la ko tí chrókjuánjuan kjuachaxin kixin chróchena kuenténa, kjónté tí xikaha ntá naxa chrótjuahya kíchó ni la ntá ninkehó sínkíhya tíha.

⁴ Tí tjuèheni kíchó ni na ts'ejóchónhenni kíchó ni, tsonínkakuenhyani kíchó ni, la ko sinchejína asénni, la ko tsochjinoxiénhyani, la ko sinchehnkehyan, la ko tsohnkehyan, ⁵ la ko ch'ehyan ninkehó nkehe náxrjónhya, la ko tjejáhyani nkehe kuènteni ó, la ko tsonínkakonhyani tjoka, la ko tsochóntahyan kjuanínkaon isé, ⁶ la ko kjaxin tsochèhyani tió í jnko chojni tjasin jie. Náhí. Chrókóchéheni tió ijnko nkehe jína sítónhen. ⁷ Tí tjuèheni kíchó ni la kjónté kaín nkehe chrókjuasótéxínni la chrókuitekaonni kixin jína sín la ko naxa chrok'uejóchónhenni chrókónínkakonhyani.

⁸ Tí tjuèheni kíchó ni la jnkochrín tsjak'e ts'itjáyanhya. A ntá itsi ijnko yaon í t'ichjánxinhya tsochrónka chojni itén Dios, la ko tsokohya kjuachaxin tsonixjxin chojni ókjé nkíva, la ko tsokohya kjuachaxin tsonohe chojni má. ⁹ Naxa t'itjáyan tí nkehe chrókónoheni la ko naxa t'itjáyan tí nkehe chróchronkaxínni. ¹⁰ A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyan.

¹¹ Tió naxa chánjan janhan k'uéníxja éxí chánjan la ko k'uékjenkayáxian éxí chánjan. Ntá kóntetona ntá kuitoha tí nkehe kuènte chánjan. ¹² Méxra éxí ijnko xrosenta t'ikonxínhyani jína jie, ntá tsi ijnko yaon chr'éxin ntá ts'íkonxínni jína kaín nkehe. Ijie naxa t'itjáyan tí nkehe chrókónòna; ntá tsi ijnko yaon tsonòna jína kaín xín nkehe éxí xikaha kjaxin Dios chóxin ch'án tí janhan. ¹³ Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kíchó. A ntá iní nkehe síin, la kjánchó antsí má t'ichjánxin tsotjuèheni kíchó ni.

14

Tí nixjxin chojni ókjé nkíva

¹ Chrókóxakonhanrá kixin chrótjuèhéra kichuára la ko kjaxin chrókjuéyára kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios. ² Méxra, tí nkexro nixjxin ijnko nkíva ókjé mé nixjehe sín Dios ó la ntá chojni la náhí, kixin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín. ³ A ntá tí nkexro chronkaxín ijnko nkíva tienxín tí í so sín ijnko nkehe kuènte Dios mé nixjehe chojni ntá xikaha tjinkítsa tí í so sín kixin antsí chrók'uitja sín nkehe kuènte Dios la ko chrókóchéhe sín. ⁴ A ntá tí nkexro nixjxin ijnko nkíva ókjé la mé tjinkítsa jehó ch'án antsí tsonohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkítsa tí sín kuènte njnko kixin antsí chrók'uitja sín nkehe kuènte Dios.

⁵ Tjínkavan kixin kaín rá chróchontará kjuachaxin chrónixjxinrá ijnko nkíva ókjé. Kjánchó antsí tjetoan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetoan chrónixjxinrá ókjé nkíva tí noahyará tsochronkaxínrá nkexrí t'axrjéxín tí nkehe chróchronkará kixin chrókuinhin kaín tí sín tinkáchónki Inchéni kixin antsí chrók'uitja sín nkehe kuènte Dios. ⁶ A ntá kíchó ni, tí chrókjuasántsahará chrónixjaáxinrá ijnko nkíva ókjé la ó chónkó tíha. Íchá jína chrónixjaáxinrá ijnko nkíva tiénxinrá chróxrjankaxián ijnko nkehe kjuínchenòna Dios

la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókuákoáxinrá ókjé nkehe nixin.

⁷ Kíxin kjaxin tí ison flauta la ko tí isón arpa, tí jnkokónhya chróntácho jnkojnko són, ntá chrókuachahyani chrókuatsoanni nkehe tí ntácho tí són a. ⁸ La ko éxi yóhe tí siín guerra, tjanjonko kichó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókuikjanjonko kichó sín. ⁹ Kjaxin xikaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchorá? Mé xikaha tjejonixjará éxi chjéhe xrinto ó. ¹⁰ Chaxín siín itsjé nkíva chjasintajni la ko kaín nkíva la siín chojni tienxín sín. ¹¹ Kjánchó tí chrókianxinhya janhan tí nkehe tsontácho ijnko nkexro, ntá tí nkexro a ts'ikon tí janhan éxi ijnko nkexro tsíkjin ókjé la ko kjaxin janhan ts'ikuán tí jehe ch'án éxi ijnko nkexro tsíkjin ókjé. ¹² Méxra jahará imá tjinkáonrá chrók'uayéhérá ijnko xra kuènte Nchakuen Dios, ntá chrókójina chrókuéyará tí xra chrókuinkitsa tí í so sín kuènte njnko kíxin antsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkíva ókjé la chrókuanchehe Dios kíxin chrókuinkitsa chróchronkaxín ch'án nkexrí t'axrjexín tí tan a. ¹⁴ Kíxin tí tsonixjaxian Dios ijnko nkíva ókjé, ntá tí nchakuenná ó mé tjenixjehé Dios, la ntá tí kjuaxrexinkaon kuèntana la ókjé tjen. ¹⁵ A ntá tí xikaha, ¿nkehe chrókuít'a? Íchá jina chrónixjaxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan. ¹⁶ Kíxin tí tsochjeéxinrá kjuasáya Dios nchakuanrá ó ntá tjejótinhin í so chojni, ¿ntá nkexrí kíxin tí sín naxa kienxínhya sín tí nkehe nixjehérá Dios chróntácho sín “Amén, ó nchoxon”? ¹⁷ Kjónté imá náxrjón tí chrókuanchehérá Dios kjuasáya la ntá chrókienxínhya tí sín tjejótinhin, ntá chrokuinkitsahya kíxin chrók'uitja sín nkehe kuènte Dios. ¹⁸ Tjáncháha Dios kjuasáya kíxin antsí chonta janhan kjuachaxin tsonixjaxian ókjé nkíva, la ntá jahará la kánhyó nixjará xikaha. ¹⁹ Kjánchó tió tójnksé chojni kichó ni la mé ntáxrjan kíxin antsí tjínkavan chróníxa janhan kjónté in'ó palabra ó tienxín sín kíxin xikaha chrókuákuaxian sín, la ntá kánhyó chrókójina kjónté ite mil palabra chróníjaxian ijnko nkíva ókjé tienxínhya chojni.

²⁰ Kichóni, chrókjuenkayáxinhyará éxi chánjan. Kjánchó chrók'uejorá éxi chánjan naxa noehya nkehe jínahya. A ntá chrókjuenkayáxinrá éxi chojni nteto. ²¹ Tí xroon tsíkjin sín ósé nkexrí k'uetqan Dios mé ntácho kíxin: “Janhan tsonixjaxian ókjé nkíva la ko itén chojni ókjé kíxin tsinhin tí nación Israel na kjónté tsitekakonhya sín, xikaha ichro Ìnchéni.”* ²² A ntá tí kjuachaxin tsonixjaxin chojni ókjé nkíva mé xránjon kíxin chrókuakoxin chojni chrókuinhin tí sín tinkáchónkihya Ìnchéni, jehya kíxin t'ichjánxin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kíxin chrókuakoxin chojni chrókuinhin tí sín tinkáchónki Ìnchéni, jehya kíxin chrókuinhin tí sín tinkáchónkihya Ìnchéni. ²³ A ntá tió tójnksérá kaín rá tinkáchónkirá Ìnchéni, a ntá kaín rá chrónixjaxinrá ókjé nkíva, ntá tí chrók'uixenhen nchia ijnko chojni naxa kuènhya sín xikaha, o chrók'uixenhen nchia ijnko chojni naxa tinkáchónkihya Ìnchéni ntá chrókuinhin sín xikaha la kjá tsontácho sín kíxin ó k'uixikjánrá. ²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnchéni, o chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chróxraxinkaon sín tí jie chóna sín ntá chrókuítóhe sín kaín jie chóna sín. ²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontácho sín kíxin chaxín tjejókoará Dios.

Ntoá chrókuich'eni kaín xín nkehe tió tójnkséni

* **14:21** Isaías 28.11-12

²⁶ A ntá kichó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuàkorá, la ko isorá chróchronkará ijnko nkehe kjuínchenohará Dios, la ko isorá chrónixjaxínrá ijnko nkìva ókjé, la ko isorá chróchronkaxínrá nkexrí t'axrjexín tí nkehe nixjaxín tí í so sín ókjé nkìva. Kjánchó kaín tíha tsonhen kíxin tí sín kuènte nínko chrók'uitja sín nkehe kuènte Dios. ²⁷ A ntá tí chrónixjaxín sín ijnko nkìva ókjé na mé yaá o iy'á chojni chrónixja sín la ko chrók'uixinkí chojni tsonixja, la ko t'ichjánxin kíxin jnkojín nkexro nohe tsochronkaxín nkexrí t'axrjexín tí nkehe nixja sín. ²⁸ A ntá tí kohya ninkexro tí nínko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjaxínhya sín ókjé nkìva tí tjejótojnkotsé sín, na mé chrónixjehe sín asén sín ó la ko chrónixjehe sín Dios ó. ²⁹ Tjánjonrá kjuachaxin kíxin tsonixja yaá o y'á chojni k'uáyéhe sín kjuachaxin tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxin sín á ó nchoxon tí nkehe kuínhin sín. ³⁰ A ntá tí xrínahya chrókjuinchenohe Dios ijnko nkehe ijnko nkexro tjetjaxín ntá chróchronka ch'án tíha. A ntá tí nkexro senó kjuankíxin chrónka nkehe la chróchónhen ch'án chrónixjahya ch'án. ³¹ Ó nchoxon jnkojnkora chróchronkará nkehe tjáhará Dios kíxin xíkaha kaín rá chrók'uitjará la ko chrókócháhará. ³² A ntá tí nkexro k'uáyéhe kjuachaxin tsochronka nkehe kjuínchenohe Dios kjaxin t'ichjánxin chróchónhen tsochronkaxín í jnko nkexro. ³³ Kíxin Dios tjanjon tí kjuaxróxin, a ntá tjinkakonhya ch'án kíxin yóxinhya chrók'uejóni.

Tió tójnkotsé chojni kichó ni tinkáchónki Ìnchéni ³⁴ chrónixjahya tí chojni chjin jnkosiné servicio. Kohya kjuachaxin xíkaha, na mé chrókjuinhexiteyéhe sín tí sín ntoa éxí t'etoan tí ley kuènte Dios. ³⁵ Tí tjinkaon sín tsonohe sín nkehe na mé chrókjuanchankíhi sín xii sín tió tjiji sín ntqe sín. Náxrjónhya chrónixja ijnko chojni chjin nkehe jnkosiné servicio.

³⁶ Chrókónohará kíxin tí itén Dios xrankíxixínhya tí tjejora la ko jehya jahóra k'uayéhérá tíha. ³⁷ A ntá tí tjen jnkojín nkexro tjenkayáxin kíxin nixja itén Dios o tjenkayáxin kíxin tí Nchakuen Dios tjinkítsa tí jehe ch'án ntá chrókónohe ch'án kíxin tí nkehe tjékjian mé ijnko nkehe tsík'etoan Ìnchéni. ³⁸ A ntá tí nkexro titekakonhya tíhi na ntá jahará chrókuitekákuénhyará ch'án kjaxin.

³⁹ Méxra kichó ni, chrókjuéyará kíxin chrók'uayéhérá kjuachaxin chróchronkará nkehe kjuínchenohará Dios la ko chrókuitohérá tsonixjaxín chojni ókjé nkìva. ⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kichó ni, tjínkavan chróxaxinkáonrá nkehe tí tan kuaáxinrá kjuákohará. Tíha mé kuitekáonrá, la mé tíha mé tjejóxinrá jína. ² Kjaxin tí nkehe kjuákohará mé kuaáxinrá, tí titoéhyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Saoxín, kjuákohará tí nkehe k'uayáha kíxin Cristo k'uenyákonhen ijíeni, na mé xíkaha kjuínchexiteyá ch'án tí nkehe ntáchro tí xroon itén Dios ⁴ la ko tsíkjavá sín ch'án la ko tsíxechón ch'án tí níxin yaon éxí ntáchro tí xroon itén Dios. ⁵ Ntá k'uíkon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uíkon sín tí jehe ch'án. ⁶ A ntá chr'éxin chjina quinientos chojni kichó ni jnkokoá k'uéjó sín k'uíkon sín ch'án. A ntá jie itsjé tí sín a naxa tjejó sín, a ntá jnkojín sín na ó tsík'en sín. ⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol inaá.

⁸ A ntá kjuixixín janhan k'uíquau Ìnchéni éxí ijnko xjan naxa xetjahya yaon chrókokjíhi. ⁹ Kjánchó janhan kánhyó tjeotan la mé tóyóehya tí í so sín tsíkjeýá Ìnchéni la ko tósuàna chrók'óna ijnko nkexro ch'ehe xra Ìnchéni kíxin janhan mé k'uénínkakonhan tí sín nínkoe Dios. ¹⁰ Kjónté jínahya kjuít'a la kjuasáyé Dios la ko kjuachaxin kuènte ch'án mé kjuitóxinhin tí kjuenkayáxian, na mé chónkóhya kuíkonóana ch'án, kíxin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhi. Dios kjuínkítsana ch'án

kjuít'a xra. ¹¹ Kjánchó tjetuanhya á janhan o á jehe sín kjuako sín, kixin xikaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuènte ntáchrórá jnkojínrá kixin tsoxechónhya chojni tsík'en? ¹³ Tí chrókóchaxín tí nkehe ntáchrórá kixin tsoxechónhya chojni tsík'en, ntá kjaxin chróxechónhya Cristo. ¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá. ¹⁵ A ntá tí chaxínhya xikaha tsíkónhen, la jeheni la ijnko chojni ntoáhya chrónka kuénté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en ¹⁶ kixin tí chróxechónhya tí chojni tsík'en, ntá kjaxin Cristo chróxechónhya ch'án. ¹⁷ A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kixin naxa chrókjuínhya tí ijjárá. ¹⁸ La ko tí chrókóchaxín tíha ntá chrók'uitjáyán tí sín kuítekaon Cristo ik'uén sín. ¹⁹ Méxra tí chrókuinkáchónkini Cristo kixin chrókjuinkítsa ch'án tí jeheni chjasintajni ntihyó, ntá kohya chojni chrókóyóhe tí jeheni, imá chrókónòéni chrók'uejóni kaín ni.

²⁰ Kjánchó náhi, la chaxín ó xechón Cristo. Jehe ch'án éxí tí nkehe tsík'óna saoxín kixin jehe ch'án saoxín xechón ch'án. ²¹ Méxra jnkokoá chojni ntoa kjuankixin kjuasin jie, ntá kjuankixin k'uén kaín xín chojni chjasintajni, la ko kjaxin jnkokoá chojni ntoa xechón, ntá xikaha tsoxechón kaín chojni tsík'en. ²² Kixin tí jie kjuasin ch'ín Adán ntá kaín xín chojni sít'enxín sín. A ntá Cristo la kaín ni tsochóntaxínni kjuachón. ²³ Jnkojnkonni éxí tsonhenni tocar, na mé saoxín xechón Cristo, a ntá chr'éxin tió tsokjan ch'án ntá tsoxechónni kaín ni kuítekaonni tí jehe ch'án. ²⁴ A ntá ó tsi yaon tsjixixín ntá sinchek'itjáyán Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kixin ts'áyéhe It'é ch'án Dios. ²⁵ Na mé t'ichjánxin ts'etóan Cristo tsjixrakájia tí yaon tsjachahya tí sín nínkakonhen ch'án. ²⁶ A ntá tí nkehe tsjixixín ts'itjáyán la mé tí kjuach'én. ²⁷ A ntá Dios kjuanjon kjuachaxin kixin kaín nkehe siín mé chrók'uetuenhen Cristo.* Kjánchó tió xikaha ntáchró tí xroon itén Dios tsíkjin sín ósé kixin kaín xín nkehe mé ts'etuenhen ch'án, ntá ó noheni jína kixin jehya kixin Dios la chrók'uituenhen ch'án inaá. Náhi. Jehe ch'án mé chjéhe Xjeen ch'án kaín kjuachaxin ts'etuenhen ch'án kaín xín nkehe. ²⁸ A ntá tió tsjixin tsjacha Cristo ts'etuenhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuenhen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuènte xikaha ch'e sín tí titekakonhya sín kixin tí sín tsík'en tsoxechón sín inaá?

³⁰ A ntá tí xikaha, ¿nkekuènte kixin kaín yaon kjuaxróxinhya tjejóni nínkakonhenni chojni? ³¹ A ntá kichó ni, kaín yaon siín kjuachrakon chrók'uén janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo. ³² Kjónté kónínkakonna chojni chjasin Éfeso éxí iko jiehe la kjónté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xikaha la ó nchoxon tí nkehe ntáchró tí sín titekakonhya Ìnchéni kixin chrókjóné sín la ko chrók'ui sín kixin ijie la o ntóye chrók'uen sín.

³³ Chrókuítóéhyará chrokjuít'áyahará sín. Éxí ntáchró sín kixin: “Tí chrók'uejókotoxínni chojni jínahya ntá chrók'uitjáyán tí nkehe jína tjenkayáxinni.” ³⁴ Chrókjanrá ntia jína ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kixin chrókósuahará.

Nkexrí tsoxechón tí sín tsík'en

³⁵ Kjá jnkojínrá tsjanchankínará kixin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochónta sín?” ³⁶ Lontirá tjanchankínará xikaha. Tí noatje t'enkanı

* 15:27 Salmo 8.6

nonte t'ichjánxìn its'en ts'itjáyan kixin tsjak'echón tí nkehe ts'ayan. ³⁷ Tí nkehe t'enkanı la jehya tí ka a. Náhí. Tí nkehe t'enkanı la noatrigo o í jnko tje. ³⁸ Kjánchó Dios kjuanjon kjuachaxin kixin jnkojnko nta ts'óna éxí tjinkaon ch'án, la ko jnkojnko nta tsochónta tje kuènte. ³⁹ A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxe, la ko í jnko la cuerpo kuènte koche. ⁴⁰ Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko. ⁴² Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyanhya. ⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chóntahya kjuachaxin, la ntá tí nkehe tsoxechón la ijnko nkehe tsochónta kjuachaxin. ⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochónta kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochónta kjuachaxin kuènte Nchakuen Dios.

⁴⁵ A ntá éxí ntáchro tí xroon itén Dios kixin: “Tí chojni nto a k'óna saoxín mé ch'ín Adán tíha mé k'uáyéhe ch'án kjuachón ó.”† A ntá tí ó kjuixixín ikui í jnko ch'ín éxí yóhe Adán, kjánchó jehe ch'án mé chóna ch'án nchakuen tjanjon kjuachón. ⁴⁶ Kjánchó jehya saoxín k'óna tí cuerpo antsí chóna kjuachaxin kuènte Nchakuen Dios. Náhí. Saoxín k'óna cuerpo kuènte chojni chjasintajni ó, la ntá chr'éxin k'óna cuerpo antsí chóna kjuachaxin kuènte Nchakuen Dios. ⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kuixín ch'án. ⁴⁸ Tí cuerpo siín chjasintajni mé yóhe tí cuerpo k'uéchónta tí nkexro tsík'óna nche. A ntá tí cuerpo siín nkaya nkajní mé yóhe tí cuerpo chóna tí nkexro kuixín nkaya nkajní. ⁴⁹ Éxí senó tóyóhèni tí nkexro k'óna nche, ntá xikaha chr'éxin tsoyóhèni tí nkexro kuixín nkaya nkajní.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhe tí nkehe tsjejehya. ⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani. ⁵² A ntá xrínahya titàya tjejóni ntá éxí chróchr'áton konni la ko chrókuakitjenkini konni xikaha tió tsjixixín tsinhinni tsontáchro trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani. ⁵³ A ntá tí cuerpo chóntani la tsjeje, ntá t'ichjánxìn ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxìn ts'inkáya nkehe chónhya ts'en. ⁵⁴ A ntá tió tí cuerpo chóntani la tsjeje, na mé t'ichjánxìn ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxìn ts'inkáya tí nkehe chónhya ts'en. Ntá tí xikaha na ntá tsoxiteyá éxí nixja tí xroon itén Dios ntáchro kixin: “Tsjachahya tí kjuach'én la mé tsjacha tí kjuachón.”‡ ⁵⁵ “Jaha kjuach'én, ¿kjá tí kjuachaxin kuènta kixin chrókjuacha jaha? Jaha kjuach'én, ¿kjá tí kjuachaxin kuènta kixin chrók'oyánni?”§ ⁵⁶ Tí jie tjasinni mé kuixín tí ts'enni. A ntá tí ley k'uetōan ósé antsí k'uixixín jie. ⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

⁵⁸ A ntá jahará kichó ni, imá tjuahará. Chrókuitoéhyará tinkachónkirá Ìnchéni. Jnkochríxín chrókjuich'ehérá Ìnchéni xra antsí jína kixin ó nohará jahará kixin tí xra ch'eheheni Ìnchéni jehya chónkó tíha.

† 15:45 Génesis 2.7 ‡ 15:54 Isaías 25.8 § 15:55 Oseas 13.14

16

Tí ofrenda tjenájín sín tsochr'énhen sín tí sín tjejó chjasin Jerusalén

¹ A ntá tí chichaon tjenájínrá kixin tsjínkĩtsará tí sín kichó ni tinkáchónki Ìnchéni na mé chrókjuich'erá éxí kuétuanhan tí sín ninko estado Galacia. ² Jnkojnko domingo jnkojnkorá chrókuakitsjenteherá nkerí síká chichaon kjuachará tí semana kjuich'erá xra kixin t'ichjánxinhya chrókjuasánjia janhan ntá chrókjuénájínrá chichaon. ³ A ntá tió tsjasán janhan tsétuanhan tí sín tsjéyará kixin sátsji sín chjasin Jerusalén, na ntá tsokjian xroon tsjikoxín sín tí chichaon tsíkjenájínrá tsjikaán tí sín kichó ni ntiha. ⁴ A ntá tí chrókójina kjaxin janhan sáchrókjuiyá, a ntá sáchrókjuíkian tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxín ts'atsínka janhan estado Macedonia ntá chr'éxin tsjasán ntiha chjasin Corinto. ⁶ Ach'e ntaó chrókuítõna chrók'uatínkajia nchakuen kin. A ntá jahará chrókjuínkĩtsará tí janhan tió sátsjia ókjé chr'éxin. ⁷ Méxra tjínkakonhya chrók'uatínkoá chrótsjahará ó. Náhí. Tjínkavan chrókuítõna iso yaon tí tjejorá ntiha tí Ìnchéni chrókjuanjon kjuachaxin. ⁸ Kjánchó tsitõna chjasin Éfeso tsjixrakájia yaon Pentecostés, ⁹ kixin ntihi antsí chonta kjuachaxin chrókjuít'a xra kuènte Ìnchéni la ko jina chrókónhen tí xra kjónté nchónhya chojni nínkakonna.

¹⁰ A ntá tí tsjiji ch'ín Timoteo ntiha la antsí jina chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xra éxí janhan. ¹¹ Kaín tí jahará chróchonteherá ch'án kjuasáya. Tjínkĩtsará ch'án kixin jina itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² A ntá tí kichó ni Apolos la imá xrjanóaha ch'án kixin kjaxin chrókjuijiko ch'án tí í so kichó ni, kjánchó tjínkakonhya ch'án jie. Chr'éxin tsjiji ch'án tió ts'íxranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuítóéhyará tí tinkáchónkirá Ìnchéni. ¹⁴ Kaín nkehe chrókjuich'erá la koí chrótjuèhérá kíchuará.

¹⁵ Na ntá kichó ni, ó nohará kixin tí sín kjéhya ch'ín Estéfanos saoxín kuínkáchónki sín tí tan tsaáxin chojni tí estado Acaya, la ko jehe sín kuákja sín xra a tjínkĩtsa sín tí sín kichó ni tinkáchónki Ìnchéni. ¹⁶ Tjínkavan kixin chrókjuínchexiteyéhérá tí sín tjínkĩtsa éxí tí jehe sín la ko kaín tí sín ch'e xra. ¹⁷ Chána kixin ó kui ch'ín Estéfanos la ko ch'ín Fortunato la ko ch'ín Acaico, kixin jahará kjónté tjejohyará. ¹⁸ A ntá jehe sín kjuínchechéhe sín asenná éxí kjuínchecháhará sín. Chróchonteherá kjuasáyé chojni xikaha.

¹⁹ Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntõe sín ima xraxinkaon sín tí jahará kixin tinkáchónkirá Ìnchéni. ²⁰ Kaín tí sín kichó ni ntihi xraxinkaon sín tí jahará. Nixjehérá kíchuará kaín rá tsehérá tja kíchuará jnkójina.

²¹ Janhan Pablo xráxinkavan tí jahará ikjian xroon chr'anhánrá la tjaná kjinxian tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrakía.

²³ A ntá kjuasáyé Ìnchéni Jesucristo mé sintayaonrá ch'án. ²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énnen ch'án tí nínko chjasin Corinto

¹ Janhan Pablo mé kjueyána Dios kixin sít'aha Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará nínkoe Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya. ² Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehe It'eni mé tikonóeheni ch'án la ko xráxín nchechéheni ch'án. ⁴ Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxí yóhe jehe ch'án kjuínchechéhe ch'án tí jeheni. ⁵ Mé xíkaha tjejótjasóteni éxí yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án. ⁶ Tjejótjasóteni kixin tí jahará chrókóchàxínrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxí tjasóteni jeheni. ⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhe Dios tí jeheni kaín ni.

⁸ Kichóni, tjinkaonni kixin chrókónohará kixin nkexrí imá kjuasóteni tí k'uejóni tí estado Asia. Imá náxrjónhya kjuasóteni la chrókjuachahyani, la k'uitjáyenheni tí tjenkayáxinni kixin chrók'uaxrjexínni ntiha naxa chrók'uejóhónni. ⁹ Ó kónoheni kixin chrók'uenxínni ntiha. Mé xíkaha kónhenni kixin chrókónoexínni kixin tí jehóni la chrókjuachahyani tíha. Náhí. Chrókuinkáchónkini Dios, mé tí nkexro nchexechón chojni tsík'en. ¹⁰ Jehe Dios mé kjuínchekaáni ch'án la ko naxa sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehe ch'án sinchekaáni ch'án ¹¹ tí tjínkítsaráni tjancheherá Dios kixin tsjinkítsani ch'án. A ntá tí tsjé chojni chrókjuanchehe Dios kixin tsjinkítsani ch'án ntá chr'éxin itsjé chojni tsjanchehe sín ch'án kjuasáyé kixin xíkaha jehe ch'án kjuínkítsani ch'án.

Nkekuènte sákjuíhya ch'ín Pablo tí chjasin Corinto

¹² Chéheni kixin noheni kixin ntoá k'uejóni ntihi chjasintajni kjuích'iyehyani chojni, mé xíkaha k'uejókoaráni. Ntá jehya kjuachaxin kuènteni kjuachaxinni xíkaha. Náhí. Kjuachaxin kuènte Dios mé kjuínkítsani kixin xíkaha k'uejóni. ¹³ Tió chr'ánhanráni xroon, kjinhyani nkehe chrókiénxinhyará. Náhí. Jehó tí nkehe chrókjuínchekuáxinrá chrókiénxinrá. Tjéchonhan kixin chrókiénxinrá jína. ¹⁴ A ntá ó tinkakiénxinrá ntsí kixin tió tsokjan Ìnchéni Jesús tsöcháhará kixin xíkaha kjuakoharáni jeheni la ko kjaxin tsöchéheni kixin jahará kuítekáonrá.

¹⁵ Mé xíkaha kjuenkayáxian kixin saoxín chrókjuasántsahará tí jahará kixin chrókócháhará kixin yáya chrókjuasántsahará. ¹⁶ Kjuenkayáxian janhan chrókjuasántsahará saoxín tió sáchrókjuia estado Macedonia la ko chrókjuasántsahará ínaá tió chrókjanxian ntiha. Mé xíkaha chrókjuínkítsarána tió sáchrókjuiyá janhan estado Judea. ¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya? ¹⁸ Méxra tjetsjehe Dios kixin xíkaha kjuáteheni tí jahará kixin chrókjuijini la ko chrókjuijihyani. ¹⁹ Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuakoxian janhan tí k'uejóni ntiha, mé xíkaha k'uechronka ch'án, kjuích'iyahya ch'án ninkehó. Náhí. Kaín nkehe tjakoni kuènte

Cristo la chaxín tíha. ²⁰ Kíxin kaín nkehe tsíchronka Dios la mé jehe Cristo kjuínchexiteyá ch'án. Mé xíkaha tió tjancheheni Dios kjuasáya la mé ntáchroni “Amén, ó nchoxon” kíxin tí kjuachaxin kuènte Cristo Jesús. ²¹ A ntá Dios mé kjuínkítsa ch'án tí jeheni la ko tí jahará kíxin kaín ni ntoá chrókuinkáchónkini Cristo la ko jehe ch'án mé kjueyáni ch'án. ²² Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochónta asénni senó kíxin tsonoexínni kíxin chaxín ts'áyéheni nkehe chr'éxin.

²³ A ntá tí naxa kjuasánhya janhan chjasánra Corinto éxí kjuenkayáxian la tjetsjehe Dios kíxin tjínkakonhya kíxin chrókóxakonhanrá tí chrókjuéntuáhára tí jahará inaá. ²⁴ Jehya kíxin chrókuétuanhánra kíxin nkexrí chrókuinkachónkirá Ìnchéni kíxin ó nòna kíxin ntoá tinkachónkirá ch'án. Ó jehí tjinkaonni chrókjuinkítsaráni kíxin antsí má chrókócháhará.

2

¹ Mé xíkaha kjuenkayáxian kíxin chrókjuasánhya janhan ntiha inaá tí naxa xrásinrá kjuanínkaon. ² A ntá tí naxa chrókjuintak'ávára, ¿a ntá nkexro chrókjuinchechàna inaá tí chrókjuinchechànahyará jahará kíxin janhan kjuintak'ávára? ³ Mé xíkaha ikjian tí xroon chr'anhánra senó kíxin tjínkakonhya chrókjuasán chrókjuinchekóxakonnará inaá. Náhí. Jahará chrókjuinchechànará. Méxra ó nòna kíxin tí chrókóchána janhan ntá chrókócháhará kaín rá. ⁴ Kjánchó tió ikjian tí xroon a chr'anhánra senó la imá kóxakonhen asenná tsjanja kjaxin. Kjánchó jehya kíxin ikjian tí xroon a chr'anhánra kíxin chrókjuintak'ávára. Náhí. Ikjian tí xroon chr'anhánra kíxin chrókónoaxínra kíxin imá tjuahará tí jahará.

Ch'ín Pablo chrókjuinchek'itjáyenhen ch'án tí jie kjuasin tí nkexro a

⁵ A ntá tí nkexro kjuínchexakonna la jehya janhvàn kóxakonna. Náhí. Kaínra kóxakonhanrá. Kjánchó tjínkakonhya tjetóxin tsontáxrjan tíha. ⁶ Na mé itsjé tí jahará nixjehérá ch'án kóyakoterá ch'án kíxin chrókjuasinhya ch'án jie xíkaha la táhó la ó tjen. ⁷ Ntá jie chrók'uitjáyanhanrá tí jie kjuasin ch'án, chrókjuínkítsará ch'án, kíxin tí náhí la ts'itjáyanxín ch'án tí kjuancheníhi. ⁸ Méxra xrjanóahára kíxin chrókjuákoxinrá inaá kíxin chaxín tjuèhérá ch'án. ⁹ Mé xíkaha senó ikjian xroon chr'anhánra kuènte tí kjuanínkaon chontará kíxin tsononaxian á chrókjuinchexiteyànará kaín nkehe chrókuétuanhánra. ¹⁰ A ntá tí sìnchek'itjáyenhenrá ijnko chojni ichrén jie kjuasin ch'án ntá janhan kjaxian sìnchek'itjáyanhan ch'án tí jie kjuasin ch'án. Méxra tí chaxín k'ué ichrén jie chrókjuintak'itjáyanhan ijnko chojni la ó kjuixin kjuintak'itjáyanhan ch'án tí jie a kíxin chrók'uejorá jnkojína. Kjaxin xíkaha tjetsjehe Cristo, ¹¹ kíxin ntá tí ch'ín Tsochren na tsjachahya ch'án tsjachroe ch'án tí jeheni, kíxin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

¹² A ntá tió kjuasán tí chjasin Troas chrókjuàkua tí tan jína kuènte Cristo la antsí xránjon kjuachaxin kíxin chrókónhen xra kuènte Ìnchéni. ¹³ Kjánchó náxrjónhya tjen asenná kíxin k'uitjahya tí kichó ni Tito. Ntá tuénxín níxjaha tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochónta sín kjuachaxin kuènte Cristo

¹⁴ Kjuasáyé Dios kíxin xráxín jehe ch'án tjínkítsani ch'án ntá tjachani kíxin chóntani tí kjuachaxin kuènte Cristo Jesús. Ntá kaín nketí sáchrókjuini mé tjakoxxínni tí tan kuènte ch'án éxí ijnko nkehe xraxé náxrjón chrókóxrjínhin kaín xín chojni. ¹⁵ Kaínni la éxí yóhe tí xraxé náxrjón kuènte chjincq chrókjuanjon Cristo chrók'uáyéhe Dios kíxin tíha mé chrókónoexín tí sín tsaá la ko kjaxin chrókónoexín tí sín ts'itjáyan. ¹⁶ Tí sín ts'itjáyan mé tókaxraxéhe sín éxí ts'enxín sín tí xraxé a. A ntá tí sín tsaá mé tóxrjínhin sín kíxin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? ¹⁷ A ntá jeheni mé xrinchekjihyani nkexrí nixja itén Dios éxí ch'e nchónhya chojni chrókjuacha

sín chichaon. Náhi. Kaín asénni tjakoni itén Dios kixin kjueyáni ch'án sich'eheeni Cristo xra, la ko tjetsjehe ch'án tí xra tjejóch'eni.

3

Tí pacto nixin

¹ A ntá xikaha ntáchroni, ¿á tjenkayáxinrá kixin kjuankíxinni tsochronkani inaá kixin jína tí jeheni, o á t'ichjánxin kixin chrókjuujikoni xroon kixin tsonoaxínrá kixin jína tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jína tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jína tí jeheni éxi ch'e í so sín? ² Náhi. T'ichjánxienhyani nijnko xroon kixin jahará mé éxi yóhe ijnko xroon tsíkjin xrikoni chróchóxin la ko chrókjuinchekuáxin kaín xín chojni tsonoexín sín kixin jeheni mé ch'eheeni Cristo xra. ³ T'ikon sín noxín kixin tí jahará mé éxi yóhe ijnko xroon tsíkjin Inchéni Cristo xrikoni nchekuáxin chojni. Kjánchó jehya ntahni tsíkjinxin ch'án. Náhi. Kjuanjon ch'án Nchakuen ch'án tjechón chontará la kjaxin jehya xrotabla tsíkjin ch'án. Náhi. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjinkitsani Cristo. ⁵ Jehya kixin ó jehí chróchóntani kjuachaxin kixin chrókjuich'eni xra. Náhi. Kaín tí xra ch'eni na Dios tjetjanjon kjuachaxin. ⁶ Jehe ch'án mé kjuanjon ch'án kjuachaxin kixin chrókjuich'eheeni ch'án xra tsochenkani chojni tí tan nixin kui. Tíha jehya ijnko nkehe tsíkjin chojni chrókjuinchexiteyéheeni. Náhi. Tíha mé kjuachaxin kjuanjon Nchakuen Dios kixin sinchexiteyéheeni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákini tsjehe ikon ch'án.* Kjánchó tí t'inkaséyan kjuankíxin ó tinkák'anka. Méxra tí xikaha tí ley tjanjon kjuach'én mé kuikao ijnko t'inkaséyan imá náxrjón. ⁸ ¿á chrókójehya kixin antsí má t'inkaséyan kuikao tí tan nixin kuixin kjuachaxin Nchakuen Dios? ⁹ Méxra xikaha tí ley k'uéchónta kjuachaxin jié kjónté ntáchro kixin its'en chojni, a ntá antsí má jína tí tan chrónka Dios kixin tsotjuáxin tí jié chóntani. ¹⁰ Méxra tí kjuachaxin k'uéchónta tí ley k'uék'etōan ósé la ninkehó tóyóehya tí kjuachaxin jié tjen jie. ¹¹ A ntá tí k'uéchónta kjuachaxin tí nkehe séhyó ntá tinkákjeje, a ntá antsí má chónta kjuachaxin tí nkehe tsjak'e jnkochrín.

¹² Mé xikaha tí nkehe tsjejehya tjejóchónhenni ntá chrakonhyani chronkaxínni kaín tíha. ¹³ Ch'ehyani éxi kjuich'e ch'ín Moisés k'uikjèxin ch'án ka ikon ch'án kixin tsonoehya tí sín israelita kixin ó tinkákjeje tí t'inkaséyan chónta ch'án. ¹⁴ Kjánchó jehe sín naxa kienxínhya sín la ko naxa xikaha tjejó sín ijie tió nchekuáxin sín tí nkehe k'uítuenhen sín ósé kixin tí ka naxa t'inkákonhen tí chrókiénxín sín kixin naxa kjuínhya tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a. ¹⁵ A ntá kjónté jie tió nchekuáxin sín tí xroon tsíkjin ch'ín Moisés la tjejó sín éxi naxa t'inkákonhen tí ka a kixin tienxínhya sín. ¹⁶ A ntá tió ijnko chojni tsjankíxin tsinkáchónki Inchéni ntá tí ka t'inkákonhen la tsjin. ¹⁷ A ntá Inchéni mé Nchakuen Dios tíha. A ntá tí tjen Nchakuen kuènte Inchéni Dios la ntiha kohya nkehe ts'inkákonhen. ¹⁸ A ntá jeheni kaín ni kohya nkehe t'inkákonhen ikonni la mé tjejóni éxi xrosenta tjákini tí kjuachaxin kuènte Inchéni, na mé tinkák'ixitóxín tí kjuaxrexinkaon kuènténi kixin antsí chrókóyóheeni éxi tí jehe ch'án kixin antsí tsochóntani tí kjuachaxin kuènte ch'án, kixin Inchéni, na tí Nchakuen a, mé xikaha ch'e xra.

* 3:7 Éxodo 34.29-35

4

¹ Méxra xikaha chrókóxrjéhyani chrókjuich'eni tí xra kjuanjon Dios kixin jehe ch'án kuikonóeheni ch'án. ² Ó kuitoheni kaín nkehe imó la ko kaín nkehe chrókósuèxinni, la ko ch'iyehyani kichó ni, la ko tjitoxienhyani itén Dios. Náhí. Jehí tí nkehe ntoá chrónkani. A ntá xikaha chrókónoexín kaín xín chojni kixin ntoá tjejóni éxí tjinkaon Dios. ³ A ntá jeheni mé tjakoni tí itan tsaáxinni, kjánchó iso sín kjónté xikaha tinhin sín mé tienxínhya sín kixin xráxín jehe sín la ts'itjáyan sín. ⁴ A ntá jehe sín kuítekakonhya sín, a ntá tí dios kuènte chjasintajni mé kjuínchek'ikonhya sín kixin chrókienxínhya sín, kixin ntá chrók'uikonhya sín tí t'inkaséyan kuènte tí tan kuènte Cristo, mé tí nkexro chóna kjuachaxin, a ntá jehe ch'án la mé yóhe éxí tsjehe Dios. ⁵ Tió tjakoni na mé jehya tjakoni kixin jeheni chrókuitekáonrá. Náhí. Chronkaxínni kixin chrókuitekáonrá Jesucristo mé Ìnchéni la ko chrónkani kixin jeheni mé t'aharáni xra tsjinkitsani tí jahará kixin tjuahará Jesús. ⁶ Na mé jehe Dios k'uetóan kixin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asénni kixin chrókjuachani chrókónoheni nkexrí tjen tí kjuachaxin jíe kuènte Dios t'inkaséyanxín Ìnchéni Jesucristo.

Nkexrí chrók'uejóni kixin tinkáchónkini Ìnchéni

⁷ A ntá tí cuerpo kuènteni la yóhe ijnko chí tsík'óna nchetje tjinká nkehe tjete, mé xikaha ts'ikon sín kixin tí kjuachaxin jíe chóntani la kuixín tí tjen Dios kixin jehya kuènteni tíha. ⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títoehyani tinkáchónkini ch'án. ⁹ Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékonní kjuítsínkani kjánchó kjuínchek'itjáyanhyani sín. ¹⁰ Kjónté nketí sátjini xráxín chrók'uenxínni éxí k'uénxín Ìnchéni Jesús, kixin xikaha tjakoxínni tí kjuachón chóna ch'án. ¹¹ Méxra jeheni naxa tjejóchónni la xráxín sínn kjuaxikaon kixin chrók'uenxínni kixin tinkáchónkini Jesús kixin kjaxin xikaha chrókjuakoxínni tí kjuachón chóna ch'án kjónté chrók'uen tí cuerpo chóntani. ¹² Kjónté xikaha chrók'uenxínni, a ntá jahará tsochontará kjuachón.

¹³ Éxí ntáchro tí xroon itén Dios tsíkjin sín ósé kixin: “Kuítekavan ntá xikaha xrjanka.”* A ntá kjaxin jeheni kuítekaonni ntá xikaha chrónkani. ¹⁴ A ntá ó noheni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. ¹⁵ Kaín tíha kónhen kixin jahará jína chrók'uejoxinrá. La ko kjaxin xikaha nchónhyará chrók'uayéhérá tí kjuasáyé Dios, ntá antsí tsje chojni ts'ejóni tsjancheheni Dios kjuasáyé kixin tí kjuachaxin jíe chóna ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuénteni. ¹⁷ A ntá tí nkehe tjasótéxínni tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jíe la ko í tsjejehya tíha. ¹⁸ Ntá chrókomáhyani tí nkehe sínn chjasintajni ntihyó. Náhí. Chrókjueyáni tí nkehe naxa t'ikonhyéni kixin tí nkehe t'ikonxínni ikonni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

5

¹ A ntá ó noheni kixin tió tsjeje tí cuerpo chóntani na mé yóhe éxí ijnko nchia tjoka tsjeje, a ntá Dios mé kjuích'éna jnkojnko nchia nixin ts'itjáyanhya jnkochrínín nkaya nkajní kixin jehya tja chojni kjuích'énaxín tíha. ² Tí naxa chóntani cuerpoéni ntihi la náxrjónhya tjejóni tjinkaonni tí ókjé cuerpo tsochóntani nkaya nkajní ³ kixin táha ts'inkáyani éxí ijnko ka, ntá xitjahya chrókótjóchínni. ⁴ Tí naxa tjejóchónxinni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuitekóni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyan tí

* 4:13 Salmo 116.10

chrók'uenxínni la ntá chrókuakjani tí kjuachón nixin. ⁵ Dios mé kjuenkayáxin ch'án kixin xikaha sinchekitonhenni ch'án ntá kjuínchekitonhenni ch'án tí Nchakuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

⁶ Mé xikaha xráxín ó noheni kixin tí naxa tjejóni ntihi naxa chóntani cuerpoéni ntá naxa tjejókohyani Ìnchéni. ⁷ A ntá jeheni tjejóni tinkáchónkini ch'án kjónté t'ikonhyani ch'án. ⁸ Kjánchó jeheni na imá chéheni tjinkaonni chrókuítóheni tí cuerpoéni chóntani jie kixin sáchrókjuini tí tjen Ìnchéni, chrók'uejókoni ch'án ntiha. ⁹ Méxra xikaha tjinkaonni chrókjuinchechéheni Ìnchéni kjónté naxa chróchóntani cuerpoéni ntihi la o í chróchóntahyani, la naxa chrókuinkáchónkini ch'án. ¹⁰ Kixin kaín ni t'ichjánxin tsochjineheni Cristo tí tjen ch'án t'etqan ch'án kixin nkehe ts'áyéheni jnkojnkonni kixin nkerí xra kjuích'eni á jína o náhi tí naxa k'uéchóntani cuerpoéni ntihi chjasintajni.

Tí tan tjanjon kjuaxróxin

¹¹ Méxra xikaha noheni chróchrakonhenni tí kjuachaxin jie kuènte Ìnchéni ntá tóxakonhenni tjakoheni chojni kixin chrókuinkáchónki sín ch'án. Ó nohe Dios kixin nkexrí tjejóni la ko tjinkaonni kixin kjaxinrá chrókónohará. ¹² Jehya kixin chrótjonkará inaá kixin jína ch'eni xra. Náhi. Jehí ntáchroni kixin síin nkehe chrókóchàxinrá kixin tí jeheni ntoá chrónkani kixin chrókónohará nkexrí chrókjuátéherá tí sín imá nchehnke sín kixin imá náxrjón nixja sín a ntá xraxinkakonhya sín tí jie chóna asén sín. ¹³ A ntá tí lóconi na mé tíha kixin tjinkaonni chrókjuich'eheheni Dios xra. A ntá tí jehya lóco tí jeheni la mé jehí tjinkaonni chrókjuinkítsani tí jahará. ¹⁴ Kixin Cristo la imá tjuèhe kaín xín chojni ntá t'etuènhenni ch'án kixin ó noheni jína kixin jehó ch'án k'uenyákonhenni ch'án tí ijíeni kaín ni kixin éxi kjaxinni ik'uénni kaín ni kixin jehe ch'án k'uenyákonhenni ch'án. ¹⁵ Mé xikaha Cristo mé k'uenyákonhen ch'án kaín ni. Na ntá jeheni tjejóhónni mé tjejóhónxinni ch'án la jehya tí kjuaxrexinkaon kuènteni chrókjuinchexiteyéheni. Náhi. Chrókjuinchexiteyéheni ch'án kixin k'uenyákonhenni ch'án la ko xechón ch'án inaá kixin tsaáxinni ch'án. ¹⁶ A ntá jie jeheni tjenkayáxinhyani éxi tjenkayáxin chojni chjasintajni ó. Kjánchó senó k'uéchóxinni Cristo kixin nkexrí kjuák'e ch'án chjasintajni ó, a ntá jie la xikahya t'ikonni ch'án. ¹⁷ Méxra tí nkexro tinkáchónki Cristo mé k'óna ijnko chojni nixin. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

¹⁸ Kaín tíha mé tí xra kjuích'e Dios. Jehe ch'án mé kjuanjon ch'án kjuaxróxin kixin jína chrók'uejókoni ch'án kixin k'uenyákonhenni Cristo. Ntá jie jeheni k'uáyéheni tí xra tsochénkani í so chojni kixin kjuaxróxin chrók'uejóko sín ch'án. ¹⁹ A ntá ó noheni kixin Dios ichr'án Cristo k'uenyákonhenni ch'án, ntá xikaha Dios tjinkaon kixin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chóna chojni, a ntá jeheni k'uáyéheni tí xra tsjakoni itén ch'án. ²⁰ Ntá jeheni kjuachaxin kuènte Cristo chronkaxínni kixin Dios chrónóaxinrá ch'án tí jeheni. Mé xikaha tí kjuachaxin kuènte Cristo chrónóaxinráni kixin kjuaxróxin chrók'uejókoará Dios. ²¹ A ntá Cristo la ninkehó jie kjuasinhya ch'án, ntá ijíeni k'uénxin ch'án. Kjánchó Dios k'uíkon kixin éxi tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6

¹ Ntá kaín ni jnkokoá ch'eheheni Dios xra, ntá chrónóaharáni kixin chrókuitoéhyará tí kjuasáyé Dios kjuakuaxinrá ch'án. ² Kixin ntáchro xroon itén Dios kixin:

A ntá tí yaon kóxrjínhin Dios kuínhin ch'án tí nkehe chronòa chojni;

Tí yaon tsaáxin chojni mé kjuínkítsa ch'án tí jehe sín.*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

³ Ch'ehyani ninkehó nkehe jínahya kixin ntá chrók'uántaxínhin sín tí xra tjejóch'eni. ⁴ Náhi. Kaín nkehe ch'eni tjakoxinni kixin ch'eheheni Dios xra. Na mé

* 6:2 Isaias 49.8

tjachani tónínkakonhyani kjónté nchónhya nkehe tjasótexínni, la kjónté ichrén nkehe t'ichjánxinhinni, la kjónté ichrén kjuaxikaon síin. ⁵ Na mé k'uékonní, la k'uéjóchjinani, la nchónhya k'uíxite chojni kóninkakonhenni sín, la ko tí xra kjuích'eni la imá xra. Kjaxin k'uájua hyani la ko kjónehyani. ⁶ Tjakoxinni kixin tjóá tjenkayáxinni, la ko tjakoxinni kixin ó noheni tí nkehe chaxín, la ko tjakoxinni kixin tónínkakonhyani, la ko tjakoxinni kixin ch'eni tí jína. La ko chóntani Nchakuen Dios, la ko kaín asénni tjuèheni kíchó ni, ⁷ la ko chrónkani tí tan ntoá kuènte Dios, la ko tjakoxinni kixin chóntani tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsonhenni. ⁸ Iso sín náxrjón nixjehé sín tí jeheni la ko iso sín náxrjónhya nixjeheni sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'íkon sín tí jeheni éxí chojni ch'ia la ko iso sín ntáchro sín kixin jeheni chojni ntoá chrónka. ⁹ Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín. ¹⁰ T'áváni la kjónté xraxinkaonni kixin Ìnchéni t'ayakonhenni la chéheni. Éxí nòani jeheni na kjónté chénkani itsjé chojni tí itén Dios tsaáxin sín éxí chróchjéheni sín ijnko nkehe imá tjete xikaha. Éxí chóntahyani ninkehó nkehe la kjónté la kaín nkehe chóntani.

¹¹ Kíchóni tjejorá chjasin Corinto, ntoá chrónkani nixjaharáni la ninkehó t'ayahyaráni la mé kaín asénni tjuahará. ¹² Jehya jeheni chrók'uitjáyan kixin chrótjuahará. Náhí. Jahorá t'itjáyan kixin chrótjuèhérá tí jeheni. ¹³ Janhan xrjanóahará éxí ijnko it'é xjan chrónóghé tí xjeen ch'án kixin kjaxinrá kaín asánrá chrótjuèhérá tí jeheni éxí tjuèheni tí jahará.

Jeheni mé éxí ninkoe Dios tjechón

¹⁴ Chrók'uitohyará tí sín tinkáchónkihya Ìnchéni kixin tíha mé éxí yóghé ijnko yunta, jnkokónhya koxinta. ¿La ko nkexrí chrók'óyóghé ijnko chojni ó kótjóá la ko ijnko chojni naxa náhí? ¿La ko nkexrí chrók'óyóghé tí t'inkáséyan la ko tí sítié? ¹⁵ Xitjahya chrók'uiixin kjuaxróxin tí tjen Cristo la ko tí Tsochren. Xitjahya ts'ejóko kíchó ijnko chojni tinkáchónki Cristo la ko ijnko chojni tinkáchónkihya. ¹⁶ Xitjahya chrók'uito tí ninkoe Dios la ko tí nkehe tsíkjanoya. Kixin jeheni mé tí ninkoe Dios tjechón, kixin jehe ch'án tsintáchro ch'án kixin:

Ntaha tsjak'é la ko xritjak'é tí tjejó tí jehe sín,
 a ntá janhan mé ts'óna Dios kuènte sín
 la ko jehe sín mé ts'óna chjasin kuèntana.†

¹⁷ Méxra xikaha kjaxin ntáchro Ìnchéni kixin:
 T'axrjekjanxínrá tí jehe sín na ókjé tjejorá;
 tsehyará tí nkehe tjuáhya.

A ntá janhan mé ts'ayáha tí jahará.‡

¹⁸ Ntá janhan mé ts'óna It'ará,
 a ntá jahará ts'ónará xjanna ntoa la ko xjanna chjin,
 ichro Ìnchéni Dios chóna kaín kjuachaxin. §

7

¹ Mé xixaha kíchó ni, tí nkehe i mé tsintáchro Dios tsjanjon ch'án. Méxra t'ichjánxín kixin tjóá chrók'uejóni, chrókuítóheni kaín nkehe chrókjuinçekjita tí cuérpóeni la ko tí asénni. Ntá chrókóxakonhenni chróchrakonhenni Dios la t'ichjánxín chrókjuancheheni ch'án chrókjuinchetjóáni ch'án kixin jehó ch'án chrókuinkáchónkini.

Tí sín Corinto kjuitoxinhin sín ntje sín

² Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuích'iyehyani ninkexró. ³ Jehya ntáchroni tíhi

† 6:16 Levítico 26.12, Ezequiel 37.27 ‡ 6:17 Isaías 52.11 § 6:18 Oseas 1.10

kixin chrókuékará jie. Náhi. Ó nohará kixin ósé chrónkani kixin kaín asénni tjuèheni tí jahará kixin jnkokoá chrók'uejóni la ko jnkokoá chrók'uenni. ⁴ Janhan la imá tjikosáyahará tí jahará la ko imá chàna kixin jína tjejorá. Kjónté kaín nkexrí tjejótjasóteni na imá chàna.

⁵ A ntá tió kjuíjini estado Macedonia la xitjahya chrók'ok'éheni kixin nkuixín síin chojni nínkakhenni la ko kóxakonhen asénni. ⁶ Kjánchó Dios na mé tí nkexro nchechéhe asén kaín tí sín tsíkóxrjé mé kjuínchechéhe ch'án asénni kixin ó kjuíji ch'ín Tito. ⁷ Ntá jehya kixin tí kjuíji ch'án ó chrókóchéxinni. Náhi. Chéheni kixin jahará kjuínchechéhéra ch'án. Chrónka ch'án kixin imá tjinkáonrá chrók'uíkonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuahanrá. Mé kuínhan kaín tíha ntá antsí má kóchána.

⁸ Kjuíntak'ávára kixin tí xroon kjian chr'anhánrá la kjónté la ntá jie í tóxakonnahya. Na mé senó kóxakonna ntá k'uíkuan kixin tí xroon kjuíntaxakonhanrá kjánchó kánhyó isé tíha. ⁹ Ntá jie chàna, kjánchó jehya kixin tí nkehe kjuíntak'ávára. Náhi. Chàna kixin tí kjuat'ává a ntá ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjínhin ch'án. Méxra xikaha jeheni la ninkehó nkehe jínahya kjuít'aharáni. ¹⁰ A ntá tí kjuat'ává kjuacha chojni ntá sinchechéhe sín Dios kixin kjuítóxinhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuitóehya tí nkehe kuènte chjasintajni mé t'ává sín kixin táhó ts'enxín sín. ¹¹ A ntá jahará kjuachará k'uátsínkará tí kjuat'ává éxi kóxrjínhin Dios, a ntá jie kónohará kixin jína tjejorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuínhínrá ntá kjuínchekónínkaonrá la ko kjaxin kjuínchechrakonrá. Ntá chr'éxin ntá tjinkáonrá chrók'uíkonrá tí janhan. Ntá kjuínchekjasóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsíkónhen. ¹² A ntá tí nkehe kjian la jehya kixin kjuenkayáxian janhan kuènte tí ch'ín kjuasin jie, la ko jehya kixin kjuenkayáxian janhan kuènte tí ch'ín k'uává ó. Náhi. Íchá jína kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetóanni. ¹³ Mé xikaha kjuich'erá ntá kóchéheni.

Kjánchó antsí má kóchéheni kixin k'uíkonní kixin kóchéhe ch'ín Tito kixin jahará kaín rá kjuínkítsará kixin kjuaxróxin kjuák'e ch'án ntiha. ¹⁴ Janhan k'uétjanka tí ch'ín Tito kixin chàna kixin tí jahará la jehya kjuach'ia tíha la kósuànahya. Náhi. Kaín nkehe k'uétjonkará la chaxín la ko kjaxin kaín nkehe k'uéntátjan ch'ín Tito la chaxín kixin chéheni kixin kuítekáonrá. ¹⁵ A ntá jie antsí tjuahará ch'án kixin xráxinkaon ch'án kixin nkexrí jína kuítekáonrá la ko nkexrí imá kjuíkosáyehéra ch'án kjuánjonrá kjuachaxin kuitóhe ch'án ntiha. ¹⁶ Ntá imá chàna kixin ó nòna kixin jahará sinchexiteyànará.

8

Antsí má chrókjuínkítsa sín kíchó sín

¹ Ntá jie kíchó ni, tjinkaonni chrókónohará kixin nkexrí tí sín tinkáchónki Ìnchéni tójnkotsé sín estado Macedonia kjuákoxin sín nkexrí tí kjuasáyé Dios. ² Kjónté nchónhya nkehe tsíkónhen sín la kjónté la kóchéhe sín; la ko kjónté nòna sín la antsí má kjuínkítsa sín tí sín í so éxi chojni chóna itsjé chichaon xikaha kjuich'e sín. ³ Chaxín k'uíkuan kixin kjuanjon sín éxi tí nkehe chóna sín la ko antsí má xíkjanjon sín ínaá kixin xikaha kjuenkayáxin sín. ⁴ Nchónhya chrónóehé sín tí jeheni kixin chrókjuanjonni kjuachaxin kixin chrókjuínkítsa sín tí sín kíchó ni tinkáchónki Dios. ⁵ Na mé antsí má kjuanjon sín la xikahya kjuenkayáxinni kixin xikaha chrókjuanjon sín, na mé senó kuinkáchónki sín Ìnchéni, ntá kjuixin ntá kjuínchexiteyéhe sín tí jeheni éxi tóxrjínhin Dios. ⁶ Méxra chrónóeheni tí ch'ín Tito kixin chrókjuenájín ch'án chichaon tí tójnkotsérá ntiha éxi kjuankixin ch'án senó. ⁷ A ntá jahará la tjákoxinrá jína kixin antsí tinkáchónkirá Ìnchéni, la ko antsí k'uitjará chrónkaxínrá itén Dios, la ko antsí k'uitjará nkehe kuènte Dios,

la ko antsí chontará kjuachéhe, la ko antsí tjuèhéra tí jeheni. Méxra xikaha antsí chrókjuákoxinrá tí xra jina chrókjuínkĩtsará tí sín kichó ni.

⁸ Jehya ntáxrjan tíhi kixin chrókuétuanhanrá xikaha. Náhi. Jehi tjínkavan chrókónohará nkexrí jina kjuích'e tí í so sín kixin kjaxinrá chrókjuákoxinrá kixin tjuèhéra kíchuára. ⁹ Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónò ch'án kixin imá tjuèhe ch'án tí jahará kixin tí kónóaxin ch'án mé jahará kóríkoxinrá.

¹⁰ Méxra tsotjonkará tí nkehe tjenkayáxian janhan kuente tí xra i kixin jahará tí nánó k'uátsínka kjuankixinrá kjuínkĩtsará kjuánjonrá nkehe, la mé jehya kixin ó jehi kjuínkĩtsará sín. Náhi. Kjaxin imá kócháhará kixin kjuínkĩtsará sín. ¹¹ A ntá jie chrókjuintaxín chrókjuánjonrá éxí tí chrókjuachará chrókjuánjonrá éxí xrankixixín tsíkjatéherá tsjínkĩtsará tsjánjonrá nkehe. ¹² Mé xikaha tí chaxín tjínkaon jnkojín chojni chrókjuanjon sín nkehe, ntá tsoxrjínhin Dios tí tjanjon sín tí nkehe chóna sín. Dios la tjanchahya ch'án tí nkehe chónahya chojni.

¹³ Jehya kixin xikaha tí í so sín chrók'uejó sín jina kixin tí nkehe kjuínkĩtsará sín la ntá jahará chrók'uitjáyan nkehe t'ichjánxinhanrá. Náhi. ¹⁴ Chrókójina chrókóyóhe chróchontará nkehe jnkokón. A ntá jie jahará chontará tí nkehe chónahya tí í so sín. A ntá í jnko yaon jehe sín tsochóna sín tí nkehe tsochontahyará. Chrókjuínkĩtsará tí sín chónahya kixin chróchontará nkehe jnkokón. ¹⁵ Éxí ntáchro xroon itén Dios kixin: “Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.”*

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxí tóxakonna kixin tí jahará. ¹⁷ Ntá kóxrjínhin ch'án tí nkehe k'uetuenhenni ch'án, la ntá kjaxin jehe ch'án kóxakonhen ch'án kixin á jina tjejorá, ntá jehe ch'án tjínkaon ch'án chrókjuíjitsjehe ch'án tí jahará.

¹⁸ Kjaxin k'uetqanni sátsjikotoxin tí ch'ín Tito í jnko kichó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xra jina tjech'e ch'án tjako ch'án tí tan tsaáxinni. ¹⁹ La ko kjaxin tí sín kaín tí nínko ntihi kjueyá sín tí nkexro kichó ni kixin sátsjikotoxin ch'án tí jeheni tí xra sátsjikoni tí chichaon tsjikénhenni tí sín nò. Na mé tí xra ch'eni kixin xikaha tsjikosáyeheni Ìnchéni la ko xikaha tjákoxinni kixin tjínkaonni chrókjuínkĩtsani sín. ²⁰ Tjínkaonni kixin tsókohya nkexro chrók'uántaxínhinni kixin tí chichaon xrenájín kjuíjijikoni. ²¹ Méxra tjínkaonni chrókjuích'eni tí nkehe ntoá, jehya jehó tí nkehe chrókóxrjínhin Ìnchéni. Náhi. Kjaxin tjínkaonni kixin chrók'uikon chojni kixin jina tjejóch'eni.

²² La ko kjaxin k'uetuenhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuákoxin ch'án kixin chéhe ch'án chrókjuínkĩtsa ch'án kixin itsjé xra kjuích'e ch'án. A ntá jie antsí má chrókjuích'e ch'án xra kixin chóxin ch'án tí jahará. ²³ A ntá jnkojín sín tsjanchankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjínkĩtsa ch'án tí janhan kixin xikaha tjínkĩtsa ch'án tí jahará. A ntá tí tsjanchankí sín kixin nkehe tí xra ch'e tí í so kichó ni ntá chenkará sín kixin tí sín kaín nínko k'uetqan sín kixin sátsji sín ntiha kixin mé xikaha tsjikosáyehé sín Cristo. ²⁴ Méxra chrókjuákoxinrá kixin chaxín tjuèhéra kíchuára kixin tsoñohe tí sín kichó ni í so nínko la ko kjaxin tsoñohe sín kixin chaxín chéheni kixin tí jahará.

9

Tí chichaon xrenájín tsjínkĩtsa tí sín kichó ni

* 8:15 Éxodo 16:18

¹ A ntá tí xrenájín chichaon kixin tsjínkĩtsará tí sín kichó ni tinkáchónki Ìnchéni, la t'ichjánxienhya tsokjian xroon tsochr'anhánrá ² kixin xráxín kónòna kixin jahará tjinkáonrá chrókjuínkĩtsará, na mé xikaha chàna la tjanka tí sín tjejó estado Macedonia kixin jahará chojni estado Acaya desde tí nánó k'uátsínka xráxín tjejorá tjinkáonrá chrókjuínkĩtsará. A ntá antsí tsjé sín estado Macedonia tjinkaon sín chrókjuinkĩtsa sín kixin jahará xikaha kjuákoxinrá nkexrí tjinkáonrá chrókjuínkĩtsará. ³ A ntá ichr'an tí sín kichó ni kixin tjínkavan kixin tsontáchrohya sín kixin chaxínhya tí nkehe jína ntátjan sín senó. Mé xikaha jahará chrókóyaxínhanrá chrókjuínkĩtsará tí sín kichó ni éxí ntátjan sín senó. ⁴ Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonrá ntá chrókósuèheni tí jeheni kixin imá chóxinni kichó ni la ko kjá chrókósuàhará kjaxinrá. ⁵ Méxra xikaha tóna kixin t'ichjánxín tsontátjan tí sín kichó ni kixin sátsji sín tsitónxin sín ntia tsjijitsjehe sín tí jahará senó tsjinkĩtsa sín kixin tsjenájínrá tí chichaon tsintáchorá senó kixin chrókjuánjonrá. A ntá chrókóyaxínhanrá kixin chrókjuánjonrá tí chichaon éxí ijnko nkehe chaxín tjinkáonrá chrókjuánjonrá la jehya éxí ijnko nkehe chrókjuanchaharáni afuerza.

⁶ Xráxinkáonrá kixin tí nkexro k'uēnkā tsjéhya na mé tsjéhya tsotjá. A ntá tí nkexro k'uēnkā itsjé mé tsotjá itsjé. ⁷ Méxra jnkojnko chojni chrókjuanjón tí nkehe kjuenkayáxixín sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjuèhe ch'án tí nkexro chéhe tjanjon nkehe. ⁸ A ntá Dios chóna kaín kjuachaxin jié ntá tsotjáhará ch'án kaín nkehe t'ichjánxínhanrá kixin tsochontará nkehe tsochjehérá í so chojni chóntahya kixin xikaha sich'erá kaín xra jína. ⁹ Éxí ntáchro tí xroon itén Dios kixin:

Tí nkexro t'óxikayēhe ch'án itsjé nkehe nchekitonhēn ch'án tí sín nòna

na mé nunca tsjejhya tí xra jína ch'e ch'án.*

¹⁰ Dios mé tjanjon noatje kixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxínhanrá la ko jehe ch'án sinchek'ánkí ch'án tí nkehe ts'ènkará la ko jehe ch'án sinchek'ánkí ch'án tí xra jína tjejoch'erá. ¹¹ A ntá tsochontará kaín nkehe tjete kixin ntá antsí tsjachará tsjínkĩtsará tí í so sín kichó ni. A ntá xikaha tsjijikenhenni sín tí nkehe tsochjehérá tí sín kichó ni ntá tsjanchehe sín Dios kjuasáya. ¹² Kixin xikaha chrókjuínkĩtsará tí sín kichó ni na jehya kixin chrók'uáyéhe sín tí nkehe t'ichjánxínhin sín ó, la mé kjaxin chróchjéhe sín Dios kjuasáya. ¹³ Mé xikaha tsjanchehe sín Dios kjuasáya kixin tí nkehe kjuánjonrá kjuákoxinrá kixin nchexiteyéhérá tí tan kuènte Cristo. Kjaxin tsjikosáyehe sín Dios kixin tí í so nkehe kjuánjonrá k'uáyéhe sín la ko tí nkehe k'uáyéhe í so chojni. ¹⁴ La ko jehe sín tsjanchehe sín Dios kixin tsjinkĩtsa ch'án tí jahará kixin jehe sín tjuahará sín kixin t'ikon sín kixin tjákoxinrá kixin tí kjuasáye Dios chontará. ¹⁵ Tjancheheni Dios kjuasáya kixin kjuínchekitonhēnni ch'án ijnko nkehe imá jié tsaáxinni la tsjachahyani tsochronkaxínni kaín tíha.

10

Kjuachaxin chóna ch'ín Pablo kixin tsik'óna ch'án apóstol

¹ Janhan Pablo tió xrjanóahará nkehe la jnkojína xrjanóahará la mé tjákoxian éxí toxrjínhin Cristo. Ntáchorá kixin tió tjèn tí tjejorá ntiha la tósuàna, a ntá tí kjín tjèn la imá jiēna, ichrorá. ² Méxra xrjanóahará kixin tí tsjasántsahará tjínkakonhya kixin chrókjuínchekóninkáonráni kixin ntá tsonínkakonhánrá jnkojínrá kixin tsékaráni jiē kixin ixria éxí chojni chjasintajni ó, tsixrorá. A ntá xra ó tsjasán tsjentuáha tí jehe sín. ³ Chaxín tjejóni éxí chojni ó, na kjánchó tió tjanjonni la tjanjonhyani éxí tjanjon chojni chjasintajni. ⁴ Kixin tí nkehe xraáni tjanjonxinni jehya nkehe kuènte chjasintajni. Náhí. Táha la kjuachaxin kuènte Dios la tíha mé tsjacha sinchek'itjáyann kaín kjuachaxin kuènte tí Jínahya. ⁵ Na mé tsjachani sinchek'itjáyanni tí nkehe ntoáhya tjenkayáxin

* 9:9 Salmo 112.9

chojni la ko kaín nkehe nchehnkexín sín t'inkákonhen kixin chrókóchóxin chojni Dios. **A** ntá kjuachaxin kuènte Cristo tjakoheni kaín chojni kixin ntá tsítóhe sín kaín nkehe ntoáhya tjenkayáxin sín, **a** ntá chrókuitekakonhen sín tí jehe ch'án ⁶ la ko tjejóchónhenni sinchekjasóteni kaín tí sín ntiha **naxa** tjinkakonhya sín chrókjuinchexiteyá sín tí tsjixin tsonoheni kixin á chaxín tsjachará **sínchexiteyará** jína.

⁷ **A** ntá jahará tékaráni **jié** kixin tí nkehe t'ikonrá ó. **A** ntá tí nkexro tjenkayáxin kixin chaxín ch'ehe Cristo **xra** la mé kjaxin chrókjuátsoan kixin kjaxinni jeheni la ch'eheeni Cristo **xra**. ⁸ **A** ntá tí chrókjuintahnkena ntsí kixin tí kjuachaxin chonta janhan ntá chrókósuànahya kixin **Ìnchéni** kjuanjon tí kjuachaxin kixin chrókjuínkítsa tí jahará kixin **antsí** chrók'uitjará kuènte Dios, la mé jehya kixin chrókjuintak'itjáyanrá. ⁹ Tjínkakonhya kixin chrókjuintachrakonxínrá tí xroon chr'anhánrá. ¹⁰ Kixin ntáchro sín kixin ixra la ko **jiéhe** tí nkehe ikjian janhan, **a** ntá tí chrókjuak'é ntiha la **jiénahya** la ko kánhyó chonta janhan kjuachaxin tí **nixja** janhan. ¹¹ Kjánchó tí nkexro **xikaha** ntáchro chrókónohe ch'án kixin jnkokón **nixja** janhan **éxí** **nixja** tí xroon tsíkjian **kjónté** ikjín **tjèn** la ko **kjónté** tí chrók'uejóni ntiha.

¹² Tjinkakonhyani chrókjuenkayáxinni kixin chrókóyóhēni tí í so sín ntáchro sín kixin jína tí jehe sín. Jehe sín mé **lontj** sín kixin ncheyóhe sín **asén** sín í so chojni. ¹³ **A** ntá jeheni la chrókjuinchehnkexínhyani **ijnko** **xra** jehya **xra** kuènteni. Dios mé kjuako nketí sich'eni **xra** la kjuanjon ch'án kjuachaxin kixin **kjuíjini** **kjuích'eni** **xra** tí tjejorá chjasin Corinto. ¹⁴ Jehya kixin chrókóntahyani kjuachaxin chrók'uetuanhanráni. Tí chaxín jehya jeheni **saoxín** **kjuíjini** tí tjejorá ntá **xikaha** chrókóntahyani kjuachaxin. Ntá **náhi**, kixin jeheni **saoxín** **kjuíjini** ntiha **kjuakoharáni** itan kuènte Cristo. ¹⁵ Chrókjuinchehnkexínhyani **ijnko** **xra** **kjuích'e** ókjé chojni **éxí** **xra** chrókjuich'eni jeheni. **Náhi**. Tjinkaonni kixin **antsí** chrók'uitjará tsinkachónkirá **Ìnchéni** ntá **xikaha** la **antsí** chrókjuínkítsani tí jahará kixin **jehó** tí **xra** k'uáyéhēni tjejóch'eni. ¹⁶ Kjaxin tjinkaonni chrókjuakoni tí itén **Ìnchéni** chrókuaáxin chojni í so chjasin **sáchrókjuini** la ko kjaxin chrókjuinchehnkexínhyani tí **xra** chrókjuich'e ókjé chojni.

¹⁷ **A** ntá jnkojín sín tjinkaon sín chrókjuinchehnke sín ntá **jehó** chróntáchro sín kixin kjuachaxin **Ìnchéni** mé **chónta** sín.* ¹⁸ Kixin **tóxrjénhya** Dios **ijnko** nkexro **jehó** chróntáchro kixin jína ch'án. **Náhi**. **Ìnchéni** mé **tsontáchro** ch'án nkexro chaxín jína.

11

Ch'ín Pablo la ko tí sín chaxínhya apóstol

¹ Tjínkavan chrókuinhínrá ntsí tí **lontjina**. ¿Á chrókjuachará chrókuinhínrá nkehe tsontáxrjan? ² Janhan tjínkakonhya kixin í jnko nkexro chrókuinkachónkirá. Kjaxin **xikaha** tjinkakonhya Dios. Ó **ikjua** Cristo kixin chrókuakja ch'án tí jahará. Tjínkavan chrókjuánjuan tí jahará chrókuakja tí jehe ch'án **éxí** **yóhe** **ijnko** tjan **tjarisoá** chrókótehe **jnkokoá** **xii**. ³ **Tóxakonna** kixin **éxí** tí **konche** tí kjuach'ia **xriko** ntá **kjuích'iyehe** tjan **Eva**, ntá **xikaha** kjaxinrá jahará **tsítóhéra** **sit'ayahará** ókjé chojni ntá **tsítóhéra** tí nkexrí **kaín** **asánrá** **tinkachónkirá** Cristo. ⁴ **A** ntá jahará **cháhará** **tjánjonrá** kjuachaxin **tjiji** ókjé chojni ntiha **chronkaxín** sín í jnko **Jesús** ókjé jehya **éxí** tí **chronkaxínni** jeheni, la ko kjaxin **cháhará** k'uayéhérá ókjé **nchakuen** jehya tí **Nchakuen** Dios k'uayéhérá **saó**, la ko **cháhará** chrókuitekáonrá **ijnko** nkehe ókjé **chrókuaáxinrá** jehya **éxí** tí nkehe **kuitekáonrá** **senó**. ⁵ Ó **nóna** kixin **chaxínhya** **ninkehó** **sínkíhyana** janhan, **a** ntá **antsí** **sínkí** tí sín **chréhérá** jahará, **ichrorá**. ⁶ **Kjónté** **kánhyó** **náxrjón** **nixja** janhan la jehya kixin **kánhyó** **chrókónóna** **chrókjuàkua**. **A** ntá **tjákoáxinrá** jahará **tíhi** kixin **kaín** nkehe t'a.

* **10:17** Jeremías 9.24

⁷ ¿Á ntoáhya kjuít'a janhan xrjankaxián tí tan tsaáxinni kíxin ninkehó kjuáncháhya chrókjuacha la ko éxí ijnko chojni noè kjuak'é janhan kíxin tjínkavan chrókjuínkítsará chrók'uitjará? ⁸ Tí sín í so nínko kjuínkítsana sín kjuanjón sín chichaon k'uayáha kíxin tsjak'é tsjákohará jahará. ⁹ Tí kjuak'é tí tjejorá jahará la kjónté t'itjáyan nkehe la ninkexró kjuáncháhya nkehe. Jehó tí sín kíchó ni kjuixín estado Macedonia kjuikao sín tí nkehe t'ichjánxinna. Méxra tjínkakhya kíxin chrótjahará xra tí jahará la ko xíkaha naxa tjét'a jie. ¹⁰ Xíkaha chaxín choxian tí tan chaxín ntoá kuènte Cristo, a ntá kohya ninkexró nkuixín estado Acaya tsjacha tsakitsjena tí kjuachéhe chonta. ¹¹ ¿Nkekuènte xíkaha ntáxrjan? ¿Á xíkaha ntáxrjan kíxin tjuahyará tí jahará ní? Náhí. Dios la ó nohe kíxin imá tjuahará.

¹² Kjánchó ó jehí tsjintaxín xíkaha sít'a kíxin tjínkakhya tsjánjuan kjuachaxin kíxin nchehnkexín tí sín ixri ntáchro kíxin jnkokón kjuachaxin chóna tí nkehe tjákua la ko tí nkehe tjako sín. ¹³ Kjánchó jehe sín ijnko apóstol chaxínhya mé ch'ia sín ncheyóhó sín éxí chojni kjueyá Cristo. ¹⁴ Jehya ijnko kjuachakon tíha kíxin kjaxin ch'ín Tsochren kjaxin xíkaha ncheyóhe ch'án éxí ijnko ángel kuènte tí t'inkaséyan. ¹⁵ Méxra xíkaha kjaxin kuènenhén tí sín ch'ehe tí Jínahya xra mé ncheyóhe sín tí sín jína. Ntá tsjixixín mé tsjasótexín sín tí xra jínahya kjuích'e sín.

Kjuasóte ch'ín Pablo kíxin apóstol tí jehe ch'án

¹⁶ Ntáxrjan ínaá kíxin nijnkorá chrókjuenkayáxinrá kíxin lócona. Kjánchó tí xíkaha tjenkayáxinrá la títóherá tsonixja janhan éxí lócona kíxin kjaxinna jína chrókjuíntahnke ntsí. ¹⁷ Tí xíkaha ntahnkexián la jehya kjuachaxin kuènte Inchéni ntáxrjanxian tíha. Náhí. Jehí éxí ijnko chojni lóco nixja. ¹⁸ A ntá nchónhya chojni síin nchehnkexín sín tí nkehe nohe sín a ntá jie la kjaxin janhan sintahnke. ¹⁹ Kíxin jahará ntáchrórá kíxin imá nohará ntá cháhará tjejó tí sín lóco. ²⁰ Kíxin tjánjonrá kjuachaxin t'etuahanhá sín la nchexiteyéherá sín la ko takitsjehará sín tí nkehe chontará la ko ch'éna asén sín éxí inché sín tí jahará, la ntá kjoniehýará sín la ko tjate sín nkaya ikonrá. ²¹ Kjónté chrókósuàna tsontáxrjan kíxin jeheni la kánhyó jiehe k'uetuahanháni.

Kjánchó tí nkehe nchehnkexín sín la janhan ntahnkexián kjaxinna, kjónté ntáxrjan tíhi éxí ijnko chojni lóco. ²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'ín Abraham? Kjaxin janhan k'uaxrjeníxian ch'án. ²³ Ch'ehe sín Cristo xra kjánchó janhan la antsí má la jehe sín la kénhyó, kjónté ntáxrjan tíhi éxí ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntqechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uíxin kjuaxikaon kíxin chrók'uén. ²⁴ In'ó veces tí sín judío kjuatena sín la ko treinta y nueve tí kjuatjoté. ²⁵ Níya kjuatexínna sín inta la ko í jnko vez kjuak'e sín xro. Níya k'uániánki ntabarco nta ntá ijnko yaon la ko ijnko tie tjénkataván ntayaon. ²⁶ K'uájia má, k'uíkuan kjuaxikaon chrók'uénxian tí ntarío la ko chrók'óyánna tí xíchee la ko chrók'óyánna tí sín chjasenná la ko tí sín tsíkjixín ókjé. K'uíkuan kjuaxikaon tí chjasin jie la ko tí nteje la ko tí ntayaon la ko chrók'óyánna tí sín chaxínhya tinkáchónki Inchéni. ²⁷ Kóxrjéna kíxin tí xra kjuít'a la ko itsjé nkehe náxrjónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén nta la ko itsjé yaon kjonéhya ninkehó la ko kókinna la ko chontahya kaná.

²⁸ Kjónté kaín tíha la ko í so nkehe kónna la mé jnkójnko yaon imá tóxakonna kíxin kaín tí sín tójnkotsé sín kaín tí nínko. ²⁹ ¿Á tjen jnkójínra níhará? A ntá tí xíkaha la koína éxí nina. ¿Á tjen jnkójínra kjuásinra jie? A ntá tí xíkaha la kjaxin tóxakonna. ³⁰ Tí chrókjuíntahnkexian nkehe la mé tjínkavan kíxin jehó chrókjuákoxian kíxin kánhyó jiéna. ³¹ Dios, It'é Inchéni Jesucristo, na mé tí nkexro chróxraxinkaonni jnkochrínín mé ó nohe ch'án kíxin chaxín tí nkehe ntáxrjan. ³² Ntá tí kjuak'é chjasin Damasco la mé tí ch'ín

governador kjuích'ehe ch'ín rey Aretas xra mé k'uetuēnhen ch'án tí sín soldado kixin tsochónhen sín tí ntója tí chjasin kixin chrótséna sín chrókjuak'échjina. ³³ Kjánchó siín nkexro k'uínkajinxinna ijnko ntaxra ijnko ventana tí tjat'ò k'uantatjen chjasin la mé xikaha kuaána, tséhyana sín.*

12

Tí nkehe k'uíkon ch'ín Pablo

¹ Ninkehó tsjachahya tí nkehe tsoxrjanka kuèntana ó. Íchá jina tsoxrjanka tí nkehe k'uíkuan la ko tí nkehe kjuínchenóna Inchéni. ² Choxian ijnko nkexro tinkáchónki Cristo. A ntá k'uátsínka catorce nánó sátsíkji ch'án tí nixin nkajní. Nonahya á sátsíkjiko ch'án cuerpo kuènte ch'án o asén ch'án ó. Jehó Dios mé nohe. ³ Méxra ó nòna kixin xikaha sátsíkji ch'án la ntá nonahya á koí cuerpo kuènte ch'án o asén ch'án ó. Jehó Dios mé nohe. ⁴ A ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka. ⁵ Jina chrókjuintahnkexián kixin xikaha kónhen tí nkexro a. A ntá tí chrókjuintahnkexián kixin kjuachaxin kuèntana la jehya jina tíha. Íchá jina chrókjuákoxian kixin janhvàn la chontahya kjuachaxin. ⁶ Tí chrókjuintahnkexián tí nkehe kónna la chrókólócohyana kixin chaxín tí nkehe chróxrjanka. Kjánchó xikahya t'a kixin tjínkakhonhya kixin xikaha chrókjuenkayáxin chojni kixin antsí jina janhan. Náhí. Tjínkavan kixin tí xra t'ikon sín la ko tí nkehe tinhin sín mé chrókjuenkayáxixín sín kixin á jina tí janhan, tsixro sín.

⁷ Méxra chrókjuintahnkexinhyana ntá xikaha xránjon kjuachaxin kixin chrók'uayáha ijnko kjuatjoté éxi ijnko ch'i kuikjiáte cuerpo kuèntana mé ijnko nkehe tsík'etuēnhen ch'ín Tsochren ikui kjuínchekjoténa. ⁸ Iní veces xrjanógha Inchéni kixin chrókjuatsen ch'án tí kjuatjoté chonta. ⁹ Kjánchó ntáchro Inchéni kixin jehó tí kjuachaxién ch'án chrókjuachaxian janhan. Kixin tí kjuachaxién ch'án antsí tsjakoexín chojni fuértehya. Méxra ntá chàna kixin fuértehyana kixin ntá xikaha tsjákoexian tí kjuachaxin kuènte Cristo. ¹⁰ Méxra chàna kjónté fuértehyana la ko kjónté t'ántaxína sín la ko kjónté t'ichjánxinna nkehe la ko kjónté chónkina sín chrók'óyánna sín la ko kjónté siín kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

Tóxakonhen ch'ín Pablo kixin tí sín tjejó ninko chjasin Corinto

¹¹ ¿Á lócona kixin xikaha xrjanka? Kjánchó jahará kuítekákonhyará ntá xikaha xrjanka. Jahará chróchronkará xikaha kixin jina janhan. Jehya kixin kánhyó sínkina la ntá tí sín chréhérá la antsí sínkí sín. Náhí. Kjónté janhan la chaxín ninkehó sínkíhyana. ¹² Kjuásian itsje kjuaxroan jié la jina kjuak'é kónínkakhonhya kjuákoxian kixin chaxín janhan ijnko nkexro tsíkjeýá Inchéni. ¹³ ¿Xá k'uíkuan tí jahará éxi kánhyó sínkírá a ntá tí í so ninko la antsí sínkí sín kixin tí kjuasán janhan la ninkehó xra tjaáhyará? A ntá tí xikaha ntoáhya kjuít'a la tóninkákonhyará.

¹⁴ A ntá ijie ó yaxinna tí nixin vez chrókjuasántsjahará la ko tjaáhyará ninkehó xra. Janhan la tjeyáhya tí nkehe chontará. Tí nkehe tjeyá janhan la mé jahará kixin jahará éxi yóhe xjanna t'íkuan. Méxra tí sín it'é xjan chrókjuenájín sín chichaon chrók'uayakuēnxín sín xjeēn sín. Jehya xra kuènte tí xjan chrókjuenájín xjan chichaon chrók'uayakuēnxín sín tí it'é xjan. ¹⁵ Tóxakonnahya kjónté chrókjuintakjeje kaín nkehe chonta janhan o kjónté chrók'uénxian kixin tí jahará la jina chrók'uejorá. A ntá janhan imá tjuahará la kjánchó éxi tóna janhan kixin jahará kánhyó tjeèherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrorá kixin kjuít'ayahará, ichrorá. ¹⁷ ¿Xá kjuít'ayahará kixin jnkojín sín ichr'an kjuíjitsjehe sín tí

* 11:33 Hechos 9.23-25

jahará? ¹⁸ Kjuáncháha tí ch'ín Tito kixin tsjijitsjehe ch'án tí jahará la ko kjaxin kuétuanhan tí í jnko kichó ni sátsjikotoxin ch'án. ¿Á kjuít'ayahará ch'ín Tito ní? ¿Á chaxínhya jína k'uéjóni yóini ntiha kixin jnkokón Nchakuen Dios chóntani?

¹⁹ ¿Á tjenkayáxinrá kixin xikaha kjuáteheni kixin chóntani jie ní? Kjánchó xikahya. Dios tjetsjehe kixin nixjani éxi chojni tinkáchónki Cristo. Kichóni tjuahará la kaín tíha ntáxrjan kixin tjínkavan kixin antsí chrókuinkachónkirá Ìnchéni. ²⁰ Tóxakonna kixin tió tsjasántsahará la tsoxrjinnahya nkexri tjejorá la ko kjaxinrá tsoxrjíanhyará tí nkehe tsontáxrjan. Tóxakonna kixin naxa ts'ixin kjuanínkaon la ko naxa ts'ixin kjuachjinoxínhin la ko tsoninkákonhénra kichuára la ko chrókuétoanra jahóra la ko naxa tsinkachónkirá kjuach'ia la ko naxa ts'ántaxínhínra kichuára la ko naxa chontará kjuahnke la ko jnkokoáhya tsjenkayáxinrá. ²¹ Tóxakonna kixin tió tsjasántsahará inaá la tí Dios kuéntana mé sinchesuána tí tjejorá la ntá imá tsotsjanka kixin itsjérá tsíkjásinrá jie tí ósé la naxa titoéhyará tí nkehe tjuáhya ch'erá la ko naxa titoéhyará chontará chojni chjin ókjé tjásinkoará jie la ko titoéhyará kaín tí í so nkehe jínahya k'uékjich'erá ósé.

13

Nhexraxinkaon ch'án sín la ko tsjixixín nixja ch'án

¹ A ntá jie la níyaxín tsjasántsahará. A ntá tí kaín nkehe tjinkáonra tsonona la mé chróchrónka yaá o iy'á chojni tsík'ikonxín kon sín tí nkehe tsíkónhen. ² Nixjahá tí sín tsíkjasin jie ósé, la ko nixjahará kaín rá kixin kjónté ikjín tjèn la inaá nixjahará éxi nixja tí kjuak'é k'uéjóni tí iyó kjuasántsahará kixin tió tsjasán inaá la í tsikonóahya tí sín kjuasin jie. ³ Jahará tjinkáonra tsinhínra á chaxín níjjaxian kjuachaxin kuente Cristo. Jehya kixin Cristo tsjachahya tsjakoxin ch'án tí kjuachaxién ch'án tí tjejorá ntiha. Náhí. Chaxín tjakoxin ch'án tí kjuachaxin chóna ch'án tí tjejorá ntiha. ⁴ Chaxín tí k'uénxin ch'án tí ntacruz la mé éxi chóntahya ch'án kjuachaxin. Kjánchó ijie tjechónxin ch'án tí kjuachaxin kuente Dios. Kjaxinni jeheni éxi kjuák'e ch'án k'uéchóntahyani kjuachaxin la ntá ijie tinkáchónkini tí jehe ch'án la tjejóchónxinni tí kjuachaxin kuente Dios kixin jína tsjinkitsani tí jahará.

⁵ Jahará chrókjuenkayáxinrá á nchoxon tjejorá, á kaín asánra tinkachónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxín tinkachónkirá o náhí. ⁶ Kjaxin tjínkavan chrókónohará kixin jeheni la jehya chojni chaxínhya tinkáchónki Ìnchéni. ⁷ Nixjeheni Dios kixin chrókuítóehya ch'án tí jahará kixin ninkehó nkehe jínahya chrókjuich'erá. Jehya kixin chrókjuakoxinni kixin jína tí jeheni. Náhí. Jehí tjinkaonni kixin jahará chrókjuich'erá nkehe jína. Ántosénni kjónté tsóntáchro sín kixin chóntani jie. ⁸ Ninkehó nkehe chrókjuich'eni kixin chrókjuinchek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín. ⁹ Méxra chrókóchéheni tí t'ichjánxinhya imá chrók'uetoanni, tí chaxín jína chrók'uejorá. Ntá naxa tsonixjeheni Dios kixin chrókjuixraká chrók'uejorá ntoá. ¹⁰ Mé xikaha ikjian tíhi senó naxa tsjasántsahýará ntiha kixin ntá tió tsjasán la ts'ichjánxinhya naxa sinchekóninkáonrána tsoníjjaxian tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuíntak'itjáyannrá. Náhí. Kjuanjon ch'án tíha kixin jahará antsí chrókuinkachónkirá Ìnchéni.

¹¹ Na ntá kichó ni, chrókóchahará. Tjéyará kixin jína chrók'uejorá. Chrókjuinchechéhéra kichuára la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án. ¹² Nixjehéra kichuára jnkójina la tsehéra tja kichuára. ¹³ A ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkitsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí ninko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjueyána la ko jehya chojni ichr'ánna. Náhí. Kjueyána Jesucristo la ko It'eni Dios, mé tí nkexro kjuínchexechón Jesús. ² Janhan la ko kaín tí sín kichó ni tjejókoni ntihi ikjinni tí xroon ts'áyéhe tí ninko siín estado Galacia. ³ Tjancheheni It'eni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéhérá tí kjuaxróxin kuènte ch'án. ⁴ Jesucristo mé k'uenyákonhen ch'án ijiéni ntá kuaáxinni la mé ijie tsjachahya tí nkehe jínahya siín chjasintajni tsjachroeni mé xíkaha tjinkaon It'eni Dios. ⁵ Tjáncháha Dios kjuasáya jnkochrín mé xíkaha tsoxiteyá. Amén.

Kohya í jnko tan tsaáxinni

⁶ Janhan tóxakonna kixin jahará imá tjoka tinkakítóhéra Dios kjueyára kjuasáyé Cristo. Jahará la tjoka ó kjuankíxinrá chréhérá ókjé tan chrókuaáxinrá. ⁷ A ntá chaxínhya xíkaha. Kohya í jnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuítóxinhin sín tí tan chrókuaáxinni kuènte Cristo. ⁸ A ntá tí jnkojín nkexro chrókjuakohará ókjé tan chrókuaáxinrá yóehya tí nkehe ó kjuakoni la tí xíkaha la Dios mé sinchekjasóte tí sín kixin xíkaha sich'e sín, kjónté á janhan o jnko ángel chrókjuixin nkaya nkajní. ⁹ Senó xrjanka la inaá tsoxrjanka kixin jnkojín nkexro chrókjuako jnko tan ókjé tsaáxinrá yóehya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kixin chrókóxrjínhin chojni tí xra t'a. Náhí. Tjínkavan kixin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya jnko nkexro ch'ehe xra Cristo.

Ch'ín Pablo k'óna jnko chojni tjako itén Dios

¹¹ Jahará kichó ni chrókónohará kixin tí tan tjàkua tsaáxinni mé jehya jnko nkehe kjuenkayáxin chojni ó. ¹² Jehya chojni chjina tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhínrá nkexrí k'uékjak'é tió naxa k'uéchráha tí sín judío. Ó nohará kixin k'uéchonkíha tí sín tinkáchónki Ìnchéni la ko tjínkavan chrókjuintak'itjáyan sín.* ¹⁴ Tí naxa k'uék'ájikian tí sín judío la antsí má k'uénòna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekavan tí nkehe k'uék'etóan tí sín tsík'axrjeníxinni. ¹⁵ Kjánchó Dios kjueyána kjónté naxa tókjínahya la kjuasáyé ch'án kjueyána ch'án kixin xíkaha kóxrjínhin ch'án. ¹⁶ Kjuínchenòna ch'án nkexrí tjen tí Xjeen ch'án kixin tsjàkoha tí sín jehya judío tí tan tsaáxinni. Tió kjueyána Dios la ninkexró kjuakonahya. ¹⁷ La ko kjaxin kjuítsjàhya janhan tí sín tsík'óna apóstol siín chjasin Jerusalén. Náhí. Janhván tuénxín sákjuia chjasin Arabia, a ntá chr'éxin ikjan tí chjasin Damasco.

¹⁸ A ntá iní nánó chr'éxin na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekian ch'án quince yaon. ¹⁹ Kjánchó k'uíkónhya tí í so sín apóstol. Jehó k'uíkuan ch'ín Jacobo kichó Ìnchéni. ²⁰ Ó tjetsjehe Dios kixin tí nkehe ikjian la mé chaxín tíha.

²¹ A ntá chr'éxin ntá sákjuia nó estado Siria la ko Cilicia. ²² A ntá tí sín kichó ni tinkáchónki Cristo tjejó estado Judea la naxa tjatsoanhyana sín. ²³ A ntá ó kuínhón sín kixin tí nkexro k'uéchréhe sín chrók'óyán sín la ntá ijie mé tjako tí tan chrókjuinchek'itjáyan ch'án. ²⁴ A ntá ijie tjanchia sín kjuasáya kixin janhan ó tinkachónkia Ìnchéni.

* 1:13 Hechos 8.3; 22.4-5; 26.9-11

2

Tí iso sín kjueyá Jesús k'uáyéhe sín ch'ín Pablo

¹ La ntá catorce nánó chr'éxin ntá sákjuiyá chjasin Jerusalén inaá la sákjuikian ch'ín Bernabé la ko kjaxin ch'ín Tito. ² Sákjuiyá ntiha kixin Dios kjuínchenona kixin sáchrókjuiyá. Ntiha chjasin Jerusalén la kójnkotsékoni tí sín t'etoan nínko ntiha la ntá xrjankaxián nkexrí tí tan tsaáxinni tjákoḥa tí sín jehya judío. Mé xikaha kjuít'a kixin janhan tjínkavan jnkokoá chrókjuenkayáxinni kixin ntá tí xra kjuít'a la jehya chrókóchónkó. ³ A ntá kjónté tí ch'ín Tito kjuák'ekian ch'án la jehe ch'án mé griego ch'án la k'uetuanyha sín kixin chrókua ch'án xroye. ⁴ Á ntá iso tí sín kichó ni chaxínhya tinkáchónki Inchéni k'uéjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuente Cristo chóna kjuachaxin. A ntá jehe sín tjinkaon sín kixin chrókjuinchexiteyeheni inaá tí nkehe k'uék'etoan tí ley. ⁵ A ntá tahyani kuenté nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etoan kjuakonahya sín ninkehó. A ntá jeheni la tahyani kuentá á chojni t'etoan o náhi kixin Dios la jnkokón t'íkon ch'án kaín chojni. ⁷ A ntá kjuátsoan sín kixin Dios ó chjina tí xra tjákoḥa tí sín jehya judío tí tan jina éxi yóhe tsíchjéhe Dios xra ch'ín Pedro tjákoḥe ch'án tí sín judío. ⁸ Tí Dios tsík'etuñhen ch'ín Pedro ts'óna apóstol tsjákoḥe ch'án tí sín judío la ko kjaxin tsík'etuanna ch'án ts'óna apóstol tsjákoḥa tí sín jehya judío.

⁹ Méxra ch'ín Jacobo la ko ch'ín Pedro la ko ch'ín Juan, mé tí sín t'etoan kuente nínko, mé kjuátsoan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xra la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjákoḥeni tí sín jehya judío la jehe sín nachrohe tsjákoḥe sín tí sín judío. ¹⁰ Jehó k'uetuon sín kixin tsoxraxinkaonni la ko tsotjuèheni tí sín nòla la xráxín tóxakonhenni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquía

¹¹ A ntá tió kjuíji ch'ín Pedro chjasin Antioquía la kjuentuáha ch'án kixin ntoáhya kjuích'e ch'án. ¹² Senó k'uékjineko ch'án iso chojni kjónté jehya sín judío. Ntá ikui iso sín kuixin tí tjen ch'ín Jacobo. A ntá kjuankixin k'uaxrjenta ch'án la kuitohe kjónekohya ch'án tí sín jehya judío a. Xikaha kjuích'e ch'án kixin chrakonhen tí sín kui kixin tí sín neko ch'án naxa tsikahya sín xroye. ¹³ Tí iso sín kichó ni judío kjaxin kúitekakonhen sín tí ch'ín Pedro kjónté ntoáhya kjuenkayáxín ch'án. Kjaxin ch'ín Bernabé la kjuacha kjuachroe sín ch'án kixin tí nkehe ntoáhya kjuích'e sín. ¹⁴ A ntá tió k'uikuñ kixin tí nkehe kjuakoxin sín la tóyóehya tí chrónka tí tan jina tsaáxinni tjako sín la ntá níxjaha tí ch'ín Pedro nkayakon kaín tí sín tsíkójnkotsé. Ntáxrjan kixin: “Jaha mé ijnko chojni judío la kjónté itjen éxi jehya ijnko chojni judío. ¿A ntá kuente tétuñhén tí sín jehya judío kixin chrók'uejó sín éxi chrókóyóhe tí sín judío?”

Tí sín judío la ko tí sín jehya judío la jnkokón tsaá sín kixin chóna sín fe

¹⁵ Jeheni la k'uaxrjeníxinni chojni judío desde tí kokjíexinni la jeheni na chóntahyani jie éxi tí í so chojni chónhya Dios. ¹⁶ Kjónté xikaha la ó noheni kixin tsotjuáxinhya ijie chojni tí nkehe tsík'etoan ch'ín Moisés. Jehó tí sín tinkáchónki Jesucristo mé tsotjóá ijie sín. Méxra kjaxinni tinkáchónkini Jesucristo kixin tjinkaonni sinchetjóá ch'án ijieni kixin titekaonni ch'án. Méxra ninkexró tsjachahya tsotjuáxin ijie sín kixin chrókjuinchexiteyehé sín tí nkehe t'etoan tí ley.

¹⁷ Tí tjinkaonni tinkáchónkini Cristo kixin tsotjuáxin ijieni, a ntá jeheni kjaxin xraxinkaonni kixin ó kjuasinni jie. A ntá í jehya Cristo k'uetuon kixin chrókjuasinni jie. Kjá chaxín náhi. ¹⁸ Tí kuitoheni tí ley la ntá naxa chrókjanni chrókuinkáchónkini tí ley inaá la tíha la ó jie kuènteni tíha. ¹⁹ A ntá tí ley la kjuanchia jie k'uénxian. A ntá ijie la tjéchuñ kixin tinkáchónkia Dios. ²⁰ Janhan la ó tsík'en kixin ó k'uénkian Cristo. A ntá ijie la janhya tjéchuñ. Cristo mé tjechónxin tí janhan. La ntá jie la tjéchonxian tí cuerpo chonta

kíxin tinkachónkia tí Xjeen Dios kíxin jehe ch'án la tjuana ch'án la k'uenyákonhenni ch'án. ²¹ Tjínkəkonhya tsjanoá tí kjuasáyé Dios. Tí chrókótjuáxin ijíé chojni tí ley tsík'etəan ch'ín Moisés, a ntá ó chónkó ik'uén Cristo tí xíkaha.

3

Tí ley o tí fe

¹ Jahará kichó ni gálatas imá lontirá. ¿Nkexro kjuít'ayahará? Kíxin tí nkehe kjuákoHará mé kuinhínrá kíxin Cristo k'uenxín tí ntacruz k'uenyákonhenni ch'án. ² Jnkokoá nkehe tjínkəvan chrókjuateherá. ¿Á k'uayèxínrá Nchəkuen Dios kíxin kuítekáonrá tí nkehe tsík'etəan ch'ín Moisés o á k'uayèxínrá Nchəkuen Dios kíxin kuítekáonrá tí tan chrónkani kuinhínrá? ³ Imá lontirá jahará. Tí kjuankíxixínrá la kuítekáonrá kjuəchəxién Nchəkuen Dios. A ntá jie la tjínkáonrá jahórá sinchekjintaxínrá tí xra. ⁴ ¿Á chónkó kaín tí nkehe tsík'atsínkará? Kjá chrókjuinkitsa chrókjuich'e xra tíha. Jehya chónkó tí nkehe kjuasótiaxínrá. ⁵ ¿Nkekuènté kjuanjon Dios tí Nchəkuen ch'án la ko kjuasin ch'án kjuaxroan k'uíkonrá? Jehya k'uayèxínrá tíha kíxin kuítekáonrá tí nkehe tsík'etəan tí ley. Náhí. K'uayèxínrá tí nkehe kíxin kuinkachónkirá tí tan kuinhínrá.

⁶ Ch'ín Abraham kuítekaon tí nkehe k'uetəan Dios ntá Dios k'uíkon kíxin jína ch'án. ⁷ Méxra chrókónohará jahará kíxin tí sín chaxín tikínixin sín ch'ín Abraham a mé tí sín a chaxín tinkáchónki Dios. ⁸ Tí xroon itén Dios mé chrónka kíxin tí sín jehya judío mé sinchetjóá Dios ijíé sín kíxin tsinkáchónki sín ch'án. Mé xíkaha Dios mé chénka ch'ín Abraham ósé tí tan jína, ntáchro ch'án kíxin: “Ijnko nkexro ts'axrjeníxin tí jaha mé tsoyaonxín kaín nación.”* ⁹ Mé xíkaha kjaxin kaín sín tinkáchónki Dios mé tsoyaon sín jnkokón éxí kóyaon ch'ín Abraham kíxin kuítekaon ch'án.

¹⁰ Kaín sín jehó tinkáchónki tí nkehe tsík'etəan ch'ín Moisés la tsjasóte sín kíxin ntáchro xroon itén Dios kíxin: “Tsjasóte kaín tí sín tsjachahya sinchexiteyéhe tí nkehe tsík'etəan tí xroon chóna ley.”† ¹¹ Ntá ó ntoá ntáchro kíxin kohya nkexro tsotjuáxin ijíé sín tí tsitekaon sín tí ley. Xroon itén Dios ntáchro kíxin: “Tí nkexro tsíkótjóá la tjejóchónxin sín kíxin tinkáchónki sín Dios.”‡ ¹² Ntá tí chrókuinkáchónkini tí ley tsík'etəan ch'ín Moisés la chrókuinkáchónkihyani Cristo. Ntáchro xroon itén Dios kíxin: “Tí nkexro sinchexiteyá tí ley la táhó chrók'uejóchónxin sín.”§

¹³ A ntá Cristo kjuətsen ch'án kaín tí chrókjuasótexinni tí ley. Tí náhi la chrókjuasóteni kíxin chrókjuachahyani sinchexiteyéheni tí ley. Jehe ch'án kjuenkə ch'án tí ijíeni kíxin k'uenyákonhenni ch'án. Ntáchro xroon itén Dios kíxin: “Kaín tí chojni chóna jie ts'ejótjjan sín ijnko nta ntá its'en la mé xíkaha k'uáyéhe sín tí kjuanínkaon kuènte Dios.”* Mé xíkaha k'uíkon sín tí ch'ín Jesús. ¹⁴ Mé xíkaha kónhen kíxin ntá tí nkehe chénka Dios tí ch'ín Abraham senó mé ts'áyéhe tí sín jehya judío kíxin kjuəchəxién Cristo Jesús. Ntá xíkaha kaín ni ts'áyéheni tí Nchəkuen Dios kíxin tinkáchónkini ch'án mé xíkaha tsíntáchro ch'án.

Tí ley la ko tí nkehe kjuanjon Dios

¹⁵ Kichóni, tíhi mé sintayóaxian kuènte chojni ó. Tió ijnko chojni ch'éna ijnko xroon tsochóna firma kuènte sín la ntá xitjahya ts'óxíka í jnko nkexro la xitjahya í jnko nkexro sich'éna í so nkehe. ¹⁶ A ntá Dios mé tsíkjo ch'án tí ch'ín Abraham kíxin tsjanjon ch'án nkehe ts'áyéhe tí nkexro ts'axrjeníxin ch'án. Tí xroon itén Dios ntáchrohya kíxin kaín nkexro ts'axrjeníxin ch'ín Abraham chrók'uáyéhe tíha. Náhí. Ntáchro kíxin ts'áyéhe jnkokoá nkexro ts'axrjeníxin ch'án la mé Cristo tíha.† ¹⁷ Méxra xrjanka tíhi. Dios chénka tí ch'ín Abraham ijnko nkehe chaxín la tsoxiteyá tíha kíxin éxí yóhe ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uéchrónka ch'ín Moisés. La ntá kjónté xíkaha la xitjahya tsoxíka tí nkehe tsíchrónka Dios o tsontáchro

* **3:8** Génesis 12.3 † **3:10** Deuteronomio 27.26 ‡ **3:11** Habacuc 2.4 § **3:12** Levítico 18.5 * **3:13** Deuteronomio 21.23 † **3:16** Génesis 12.7

chojni kixin tjettoanhya tí nkehe tsíntáchro ch'án.† 18 Tí chrókjuanjon Dios nkehe kixin chrókjuinchexiteyáni tí nkehe k'uetōan tí ley la ntá tí nkehe tsíntáchro Dios senó mé chróxiteyáhya. A ntá Dios mé tsíchénka ch'ín Abraham kixin sinchekitonhen ch'ín Abraham tí nkehe kjuasáyé ch'án.

19 ¿A ntá xikaha la nkehe tsonhen tí ley tsík'etōan ch'ín Moisés? Chr'éxin kjuanjon Dios tí ley kixin tsonoxénni nkehe tí jie tjasinni. K'uetōan Dios sinchexiteyéhe chojni tí nkehe tsík'etōan ch'ín Moisés tsijia tí nkexro ts'axrjeníxin ch'ín Abraham, mé tí nkexro kjueyá Dios kixin xikaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án. 20 A ntá tí nixjehe Dios tí ch'ín Abraham la jehó ch'án la ko jehó Dios la méxra t'ichjánxinhya í jnko nkexro.

Tí xra kuènte tí ley

21 ¿A ntá á chrók'uaxrjexín kixin tí ley tsík'etōan ch'ín Moisés chrókjuanjonko tí nkehe tsjanjon Dios? Kjá náhi. Tí chrók'uixin ijnko ley chrókjuanjon kjuachón la ntá chrókótjuáxin ijieni tí chrókuitekaonni tí nkehe t'etōan tí ley. 22 A ntá tsíntáchro xroon itén Dios kixin tí jie mé t'etuenhen kaín xín chojni kixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchrónka Dios.

23 A ntá tí naxa kuihya Cristo la ntá tí ley la k'uetuenhen kaín ni la k'uejóchónhenni kixin chrókónoxín tí nkehe chrókuinkáchónkini. 24 Tí ley la éxí ijnko maestro kuènte chánjan k'uetōan. A ntá jie ikui Cristo la jehe ch'án mé kótjuáxinni ch'án kixin titekaonni ch'án. 25 A ntá ijie ó titekaonni Cristo la í nchexiteyèhyani kaín tí nkehe t'etōan tí ley.

26 A ntá jahará ó k'ónará xjeen Dios kixin ó tinkachónkirá Jesucristo. 27 Kaínrá kuíkitiaxínrá kjuachaxién Cristo mé xikaha jehe ch'án kótjuáxinrá ch'án. 28 A ntá jehya tjettoan á chojni judío o á chojni jehya judío o á chojni ch'exón xra o á chojni t'etōan o á chojni ntoa o á chojni chjin. Kaínni la ó k'ónani jnkokoá kixin tinkáchónkini Cristo. 29 A ntá tí tinkáchónkini Cristo chaxín la ntá tí xikaha ó chaxín tsík'axrjeníxinni ch'ín Abraham la ts'áyéheni tí nkehe tsíchrónka Dios.

4

1 Mé xikaha ntáxrjan tíhi. A ntá ijnko chánjan tío chrók'uen tí it'é ntá chrókuitōeko tí nkehe kuènte tí it'é la jehe ch'án la tóyóhó ijnko nkexro ch'exón xra kixin tí jehe la xitjahya t'etōan xra kjónté chaxín kuènte ch'án kaín tí nkehe a. 2 Síin nkexro t'ayakonhen ch'án la t'etōan tí xra kuènte ch'án tsjixrakájia tí yaon tsíntáchro tí it'é. 3 Mé xikaha kónhen tí jeheni. Kixin tí naxa k'uéchánjanni la kuítekaonni kaín tí nkehe kuènte chjasintajni. 4 A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxin ch'án ijnko chojni chjin. La kjuínchexiteyá ch'án kaín tí nkehe tsík'etōan tí ley kuènte Moisés. 5 Ikui ch'án xikaha kixin tsaáxinni ch'án kjónté senó k'uék'etuenhenni tí ley. A ntá jie la chrók'uáyéhe Dios tí jeheni éxí xjeen ch'án.

6 A ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochóna asénni la tí Nchakuen ch'án mé t'eyaxín: “It'eni jaha mé kuéntá tí jeheni.” 7 Méxra xikaha jahará la jehya ijnko nkexro ch'exón xra. Náhi. Jahará mé xjeen Dios. Jahará mé xjeen ch'án la jehe ch'án tjinkaon sinchekitonhanrá tí nkehe kuènte ch'án kixin tinkachónkirá Cristo.

Ch'ín Pablo tóxakonhen ch'án kixin tí sín tinkáchónki Inchéni

8 Ósé la jahará k'uéchonhyará Dios la kjuínchexiteyéhérá tí dios chaxínhya. 9 A ntá ijie la ó choxínrá Dios, o íchá jína chróntáchroni kixin Dios la ó chóxin ch'án tí jahará. A ntá jehya jína kixin naxa chrókuinkachónkirá inaá tí nkehe chóntahya kjuachaxin la ko tí nkehe chónkó kixin tí xikaha naxa chrókjuínchexiteyéhérá tí nkehe tinkáchónki chojni. 10 A ntá

† 3:17 Éxodo 12.40

jahará la tjásinrá kia ichrén tí yaon la ko tí nitjó la ko tí yaon kia tí nánó. ¹¹ Imá tóxakonna kixin á chónkó tí xra kjuít'a kjuákohará.

¹² Kíchóni, xrjanóahará kixin chrókóyóhara éxi tí janhan kixin janhan mé tóyóhe éxi k'uejorá senó kixin t'etuenhyani tí ley. Janhan la tékahyará ninkehó jie. ¹³ Ó nohará kixin tió saoxín kjuákohará tí tan tsaáxinni la k'uétsankahyana kixin k'uénina k'uéchonta ijnko chin k'uékjínchekjoténa. ¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxi chrók'uayéhérá ijnko ángel kuènte Dios o éxi chrók'uayéhérá jehe Ìnchéni Jesucristo mé xikaha kjuak'é jína ntiha. ¹⁵ ¿Nkehe kónhen tí kjuachéhe k'uéchontará? Kixin ntáxrjan kixin jína tí jahará kixin tjinkáonrá kjónté ikonrá chrókuakítsjerá chróchjinará tí janhan. ¹⁶ A ntá ijie la, ¿á ninkákònnará jehó kixin kuinhínrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuítóhéra tí jeheni kixin ntá tjinkaon sín kixin jahará chróchréhérá tí jehe sín. ¹⁸ Jína chrókótjinkáonrá tí í so sín kjánchó ntoá chrókjuenkayáxinrá kixin jehya tí chrókjuak'é tí tjejorá ó chrókuítekáonrá jína. ¹⁹ T'ikonni tí jahará éxi xjeenni. Ijie la imá kjuíncheníhi asenná kixin tóxakonna tí jahará. Éxi yóhe ijnko ìné xjan tsjoté tjan tió sinchekokjíhi tjan xjeen tjan mé xikaha janhan la naxa tsjasótena kixin tjínkavan kixin Cristo chrókjuinchetjóá tí jahará. ²⁰ Chrókójína ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

²¹ A ntá jie chronkará nkehe. Jahará naxa tjinkáonrá chrókjuínchexiteyéhérá tí ley tsík'etóan ch'ín Moisés la ¿á kuiénhyará nkehe chro tí ley? ²² Ntáchro kixin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuenhya.* ²³ Tí xjeen tjan ch'exón xra kokjíhi ch'án éxi tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kixin tsoxiteyá tí nkehe tsíntáchro Dios. ²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etóan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxi chojni ch'exón xra tí jehe sín kixin t'ítuenhen sín. ²⁵ Mé xikaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kixin tí chjasin la ko tí sín tjejó ntiha la mé t'ítuenhen sín la ko kaín xjeen sín. ²⁶ A ntá tí chjasin Jerusalén itjen nkaya nkajní la mé t'ítuenhya. Náhí. Mé jeheni la kuènteni tíha. ²⁷ Ntáchro xroon itén Dios kixin:

Jaha chojni chjin chontahya chánjan kjónté chrokócháha.

Jaha k'uíkonhya ninkehó kjuatjoté kixin kjuínchekokjíehya xjan la kjónté chrokócháha.

Tí tjan kuítsínkehe na mé nchónhya ìnté tjan ts'ikon tjan,

a ntá tí tjan kjuak'eko xì tjan la kánhyó ts'ikon.†

²⁸ Kíchóni jeheni la éxi yóhèni ch'ín Isaac kixin kaín ni la xjeen Dios kixin xikaha tsíntáchro ch'án. ²⁹ A ntá éxi senó tí xjan kokjíhi éxi tokjíhi chojni ó la jehe ch'án k'uéchónkíhi ch'án tí xjan kokjíexín kjuachaxién Nchakuen Dios. Mé xikaha kjaxin sítónhen jie. ³⁰ A ntá ntáchro tí xroon itén Dios kixin: “Tétuenhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsítònhen tí xjeen tí tjan t'ítuenhya.”‡ ³¹ Méxra kichó ni, kaín ni la jehya xjeen ijnko tjan ch'exón xra. Náhí. Jeheni mé xjeen tí tjan t'ítuenhya.

5

Jína chrók'uejorá kixin kuaáxinrá

* 4:22 Génesis 16.15; 21.2 † 4:27 Isaías 54.1 ‡ 4:30 Génesis 21.10

¹ Cristo mé kuaáxinni la ntá ó tí ley la t'etuenhyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuenhen inaá.

² Tinhínrá, janhan Pablo mé ntáxrjan kixin tí chrókuará tí xroye a ntá ó chónkó chrókuinkachónkirá Cristo. ³ Tjínkavan tsóxrjanka inaá kixin tí jnkójín nkexro itsa tí xroye la jehe ch'án mé t'ichjánxin sinchexiteyéhe ch'án kaín tí ley tsíkjin ch'ín Moisés. ⁴ A nta jahará la xritjéyará tsotjuáxin ijiará kixin sinchexiteyéhérá tí ley la ntá ó kuítóhérá Cristo la ko ó kuítóhérá tí kjuasáyé Dios tjuahará. ⁵ A nta jeheni la tinkáchónkini Cristo la chóntani Nchakuen Dios la ntá tjejóchónhenni kixin tsjintaxín tsotjóá ijiéni. ⁶ Jeheni mé tinkáchónkini Jesucristo la ntá kánhyó tjetóan tí xroye. Antsí tjetóan chrókuinkáchónkini Ìnchéni la ntá tí tinkáchónkini Ìnchéni la chrótjuèheni kichó ni.

⁷ Jahará la jína kjuankíxinrá tinkáchónkirá Ìnchéni. ¿A ntá nkexro k'ueṭoan kixin chrókuítóhérá tí nkehe chaxín? ⁸ Jehya nkehe kuènte Dios tí tjejóch'erá méhe. Méxra jehe ch'án la kjueyará ch'án. ⁹ Ntáchro sín kixin tí ch'o t'óna niotja tsjiko intsíkoá tí xroan nchek'ánki niotja, a ntá ts'ánki kaín tí ch'o. ¹⁰ A nta janhan tinkáchónkia Ìnchéni la ko ó nòna kixin jahará kjaxin tinkáchónkirá ch'án la kjá í chrókjuenkayáxinhyará í jnko nkehe. A nta Dios mé sinchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

¹¹ Kichóni, tí naxa chrókuétoan chrókua chojni xroye la ntá tí sín judío chrókóninkakonnahya sín. Tí xikaha la chrók'uántaxienhya sín tí tan jína chrónka nkexrí k'uenxín Cristo tí ntacruz. ¹² Méxra tí sín ntaxakonhanrá la t'etóan sín itsará xroye la íchá jína naá chrók'uátsínkó chrókóchrít'o sín kaín.

¹³ Jahará kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhi. Chrókjuinkitsani kichó ni la ko chrótjuèheni kichó ni. ¹⁴ Mé xikaha tí ley mé t'axrjexín kixin: “Chrótjuèhérá kichuárá éxi tjuèxinrá asánrá.”* ¹⁵ A nta tí chrókjóntehéra kichuárá la ko chrókjónterá kichuárá la ntá chrókóxakonhanrá kixin tí xikaha la chrókjuinçek'itjáyanrá kichuárá.

Tí jie chrókjuasin chojni la ko tí nkehe t'etóan Nchakuen Dios

¹⁶ A nta ntáxrjan kixin chrók'uejorá éxi tjinkaon Nchakuen Dios, a ntá chrókjuéyáhyará tí nkehe jínahya chrókjuenkayáxinrá. ¹⁷ A nta tí nkehe jínahya tjenkayáxinrá la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kichó. Méxra jahará la xitjahya ch'erá tí nkehe tjinkáonrá chrókjuich'erá. ¹⁸ A nta tí Nchakuen Dios tjetjinkitsará, a ntá jehya tí ley t'etuanhanrá jie.

¹⁹ Xrahya ts'ikonna tí jie tjasin chojni jínahya tjenkayáxin. Mé tíha la tí sín tjasinko jie chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin, ²⁰ la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni nínkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjinkaon jehó tsochónta itsjé nkehe, la ko tí chojni tjinkaon ts'axrjenta, la ko tí chojni t'óxika kichó, ²¹ la ko tí chojni chjinoxínhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóhe xikaha. Na mé éxi yóhe senó mé k'uetjonkará la ko ijie la xikaha tjetjonkará inaá kixin tí nkexro xikaha tinkákjasin jie mé xitjahya ts'áyéhe sín tí kjuachaxin kuènte Dios.

²² A nta tíó chóntani Nchakuen Dios ntá tsotjuèheni kichó ni, la ko tsochéheni, la ko kjuaxróxin ts'ejóni, la ko tsochónhenni tsonínkakonhyani, la ko jnkójína ts'ejókoni kichó ni, la ko nchexiteyáni jnkójína. ²³ La ko tsohnkehyan, la ko ts'etuenhenni asénni kixin tsjasinhyani jie. Kohya nijnko ley chrókjuinçekjasóteni kixin tí jína chrók'uejóni xikaha. ²⁴ Mé tí chojni tinkáchónki Jesucristo la kaín jie k'uéchónta sín la ko tí jínahya

* 5:14 Levítico 19.18

k'uékjenkayáxin sín la ó kjuenká Ìnchéni kjuák'enkáni ch'án ntacruz. ²⁵ A ntá tí tjejókoni Nchakuen Dios t'ichjánxin tsítóheni kixin Nchakuen Dios ts'etuehenni.

²⁶ Méxra chrókjuinchehnyani la ko chrókjuachaxinhyani kichó ni la ko chrókóchjinoxienhyani.

6

Tjínkĩtsará kichuára

¹ Kichóni, a ntá tí chrók'uíkonrá jnkójín nkexro kjuasin ichrén jie a ntá tí jahará tí chaxín chontará Nchakuen Dios la chrókjuéntuéhéra sín la chrókjuínkĩtsará sín. A ntá jnkójína chrónixjehérá sín, a ntá jahará la chrókóxakonhanrá kixin xikahya chrókónhanrá chrókjuásinrá jie kjaxin. ² Tsjínkĩtsará kichuára kixin jóhya tsamára tí nkehe ye. Kixin tí xikaha la ó chrókjuinchehnyani tí nkehe t'etóan Cristo.

³ Ntá jnkójín nkexro ntáchro kixin imá tjetoan tí jehe ch'án la chaxínhya tíha la jehó ch'iyehé asén. ⁴ Jnkójnko chojni chrórxaxinkaon á nchoxon tjenkayáxin la chrókónohe kixin ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni.

⁵ Kixin jnkójnko chojni yamá tí jie kuènte.

⁶ Tí nkexro xrakohe tí tan jína la chrókjuinkĩtsa sín chrókjuanjon sín nkehe chrók'uáyéhe tí nkexro tjako.

⁷ Sích'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá. ⁸ Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'ensín sín. A ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochrín ts'áyéhe sín. ⁹ Mé xikaha chrókóxrjéhyani chrókjuich'eni kaín nkehe jína kixin tí tsóxrjéhyani la ntá chaxín tsjixraká tí yaon tsjachani ts'áyéheni tí nkehe jína. ¹⁰ Méxra xikaha xráxin chrókjuich'eni nkehe jína la antsí t'ichjánxin chrókjuinkĩtsani tí sín kichó ni tinkáchónki Ìnchéni.

Ch'ín Pablo nchexraxinkaon tí sín ntíha la ko kjuixixín nixja ch'án

¹¹ Tsjehérá kixin imá ihyé tí letra tjékjinxian tjaná. ¹² Tí sín tjinkaon ts'etuanhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuènte Cristo. ¹³ Kjónté tí sín tsíka xroye la nchexiteyáhya sín kaín tí nkehe t'etóan tí ley. A ntá tjinkaon sín kixin chrókuará xroye kixin ntá kjaxin sín tsóhnke sín kixin tsontáchro sín kixin jahará kjaxinrá tjinkáonrá tsochontará xroye tí cuerpo kuèntará. ¹⁴ A ntá janhan mé tóxrjínahya sintahnke ninkehó. Íchá jína chróntáxrjan kixin Cristo k'uenyákonhenni. A ntá xikaha k'uenxín Cristo tí ntacruz la ntá tí nkehe k'uék'etóan kuènte chjasintajni la kjaxin k'uitjayan la ko janhan kjaxin kuítóha tí nkehe kuènte chjasintajni. ¹⁵ La ntá ninkehó sínkíhya á tsíka chojni xroye o náhi. Tí nkehe sínkí la chrók'ónani ijnko chojni nixin. ¹⁶ A ntá tí sín ts'áyéhe kjuaxróxin kixin kuikonóehe Dios tí jehe sín la mé kaín tí sín kuítekaon tí nkehe t'etóan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkakonhya kixin chrók'uekana jie ninkexró. Janhan mé chaxín chonta tí tsíkjatsoenxín tsíchrít'o cuerpo kuèntana kixin kjuasótexinna kixin kjuít'aha xra Ìnchéni Jesús.

¹⁸ Kichóni tjáncháha Ìnchéni Jesucristo kixin kjuasáyé ch'án chrókjuincheyaon ch'án kaín rá. Mé xikaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí nínko chjasin Éfeso

¹ Janhan Pablo tsíkjeýána Jesucristo kixin xikaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejórá chjasin Éfeso tinkachónkirá Dios la ko títékáonrá Cristo Jesús. ² Tjéjtáncháha It'eni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jína tixin nkaya nkajní kjuanjón ch'án. ⁴ Dios mé kjueyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án. ⁵ Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjínhin ch'án. ⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án. ⁷ Imá tjuèhe Dios tí jeheni la xikaha kuaáxinni ijñé tí Xjeen ch'án k'úitji la xikaha tsjixín kaín ijñéni. ⁸ Dios kjuakoxin ch'án kixin imá tjuèheni ch'án. Kjuanjón ch'án kaín kjuachaxin kixin chrókuiénxinni jína la ko kjuanjón ch'án kjuaxrexinkaon jína. ⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjínhin ch'án tsoxiteyá. ¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjón kjuachaxin kixin Jesucristo ts'etuenhen ch'án kaín xín nkehe siín nkaya nkajní la ko chjasintajni.

¹¹ Dios kjueyáni kixin chrókuinkáchónkini Cristo la ntá xikaha chrók'uáyéheni tí nkehe tsík'áyéhe ch'án. Kaín tíha la mé xikaha tsonhen éxí tóxrjínhin Dios. ¹² Mé xikaha kjuích'e ch'án kixin ntá jeheni kuítekaonni Cristo saoxín chrók'uejóni chrókjuancheheni kjuasáya Dios kixin tí kjuachaxin jie chóna ch'án. ¹³ A ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsintáchro ch'án. ¹⁴ Tí Nchakuen Dios kujitonhenni mé kjuínchenoexinni Dios kixin tsakjani kaín nkehe tsjanjón ch'án tió tsaáxin kaín ni tinkáchónkini ch'án. Ntá xikaha kaín ni tsjancheheni kjuasáyé ch'án kixin tí kjuachaxin jie chóna ch'án.

Ch'ín Pablo kjuanchehe Dios kixin antsí chrókónohe tí sín tinkáchónki Ìnchéni

¹⁵ Méxra ó kuinhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios. ¹⁶ Ntá janhan nunca títuahya nixjahá Dios tjáncháha kjuasáya kixin ó tinkachónkirá ch'án. ¹⁷ Tjénixjahá Dios, mé jehe ch'án mé ichr'án Ìnchéni Jesucristo, mé It'eni imá tjetóan la tjéjtáncháha ch'án kixin tsotjáhará ch'án kjuaxrexinkaon jína kuènte Nchakuen ch'án kixin ntá antsí chrókuiénxinnrá jína tí nkehe kuènte ch'án kixin ntá antsí má chróchoxinnrá ch'án. ¹⁸ Kjaxin tjéjtáncháha Dios kixin tsjinkitsa ch'án tsjanjón ch'án ijnko kjuaxrexinkaon jína kixin ntá tsonohará ts'ejochonhénra kixin xikaha kjueyára ch'án. La ko tsonohará kixin imá tjetóan tí nkehe sinchekitonhenni ch'án kixin jeheni mé tinkáchónkini ch'án. ¹⁹ La ko kjaxin tjéjtáncháha Dios tsjinkitsará ch'án tsonohará kixin tí kjuachaxin kuènte ch'án mé ijnko nkehe imá jie noehyani nketí kjuèxín. Tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chónatani la ko tí kjuachaxin imá jie kjuakoxin ch'án ²⁰ tió kjuínchexechón ch'án Cristo. Ntá Cristo sákjui kjuák'etjaxin ch'án tja chjina tí It'é ch'án itjen nkaya nkajní. ²¹ Mé xikaha

kjuanjon Dios kjuachaxin kixin Cristo ts'etuēhen ch'án kaín xín gobierno la ko kaín tí sín t'etōan. Ijie tjet'etuēhen ch'án kaín xín nkehe síin chjasintajni la ko chr'éxin ts'etōan ch'án kjaxin. ²² Cristo k'uáyéhe ch'án kjuachaxin ts'etuēhen kaín xín nkehe síin. Jehe ch'án mé ts'etuēhen kaín tí sín k'óna ninkoé ch'án. ²³ Tí ninko mé éxi tí cuerpo kuēnte ch'án la jehó ch'án mé t'etuēhen ch'án. Jehó ch'án mé kuēnte ch'án kaín xín nkehe síin.

2

Kuaáxinni kjuachaxiēn Dios

¹ La ntá ijie Dios mé kjuínchekitonhanrá tí kjuachón jnkochrín kixin tinkachónkirá Cristo. Senó la jahará la éxi tsík'enrá kixin tí jínahya k'uékjich'erá la ko tí jie k'uékjásinrá. ² Mé xikaha k'uéchréhérá éxi sítónhen chjasintajni. K'uékjinchexiteyéhérá éxi tóxrjínhin tí nchakuen jínahya t'etuēhen tí xrínto la ko t'etuēhen kaín xín tí chojni titekakuenhya Dios. ³ Kaínni xikaha k'uék'ejóni tí ósé a naxa kjuínchexiteyéheni tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchóntani. A ntá tí naxa xikahó chrókjuich'eni la Dios imá chrókjuinchejasóteni éxi tsjasóte tí í so sín. ⁴ A ntá Dios mé imá kuikonóeheni ch'án la ko imá tjuèheni ch'án. ⁵ La ntá kjuanjon ch'án tí kjuachón éxi chóna Cristo. Jeheni la éxi chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxinrá ch'án. ⁶ Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajní. ⁷ Mé xikaha kjuích'e ch'án kjuakoxin ch'án la naxa tjetjakoxin ch'án kixin tjuèheni ch'án la ko kjuínkítsani ch'án kixin tinkáchónkini Cristo Jesús. ⁸ Kjuasáyé Dios kixin kuaáxinrá ch'án kixin tinkachónkirá ch'án kixin táha la jehya jahórá k'uitjará tíha. Náhí. Táha la mé kjuasáyé Dios kixin tjáhará ch'án. ⁹ Kixin jehya ichrén nkehe jína kjuích'eni kixin chrókjuinchehnkexínni. ¹⁰ Dios mé kjuích'éna tí jeheni ntá chr'éxin kjuínkítsa ch'án kixin tsinkáchónkini Cristo Jesús, kixin ntá chrókjuich'eni tí xrá jína kixin xikaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

¹¹ Méxrā jahará la jehya chojni judiórá. Mé tí sín judío ntak'inrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuēnte sín, mé nchek'in sín asén sín tí chojni chóna xroye. ¹² Xráxinkáonrá kixin tí senó la k'úechonhyará Cristo. Jahará la jehya kuēnte tí nación Israel la xikaha k'úechonhyará tí nkehe tsík'etōan Dios la ko tí nkehe tsintáchro ch'án tsjanjon ch'án. Mé xikaha k'uék'ejorá la k'úechonhyará Dios la k'úechoénhyará kixin chrókuaárá. ¹³ La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'úitji ijnié ch'án. ¹⁴ Jehe Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókjuenkayáxin sín kixin k'óna éxi jnkokoá chjasin. Cristo k'óxíka ch'án tí kjuanínkaon éxi ijnko tjat'ō k'uinkákonhēn. ¹⁵ Jehe ch'án kjuasóte ch'án, la kjuatsen ch'án tí ley. Tí iyó chjasin k'uéjō kjuích'éna ch'án jnkokoá chjasin nixin kixin tinkáchónki sín ch'án. Mé xikaha kjuanjon ch'án kjuaxróxin. ¹⁶ Mé xikaha k'uenyákonhēnni ch'án k'uenxín ch'án tí ntacruz la kjuakjìn ch'án tí kjuanínkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxi jnkokoá cuerpo kuēnte ch'án.

¹⁷ Cristo mé ikui la kjuakohē ch'án kaín chojni tí tan jína kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uéjō. ¹⁸ A ntá kjuachaxin kuēnte Cristo la kaín ni kjónté jeheni o í so chojni mé tsochjineheni It'ēni Dios kixin jnkokoá k'uáyéheni Nchakuen ch'án. ¹⁹ A ntá jahará la í tóyóahyará chojni tsíkixín ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án. ²⁰ Jahará la mé tsík'ónará ijnko nchia tjat'ō jie k'óna chrítaón tí xrō k'uejo tí sín kjueyá Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xrō imá t'etōan kuēnte tí

tjät'ò a. ²¹ Tí xrankíxixín mé Cristo la chrítaón k'óna kuenté nchia la tinkák'ánkí tí nchia kixin jína tsjak'e, ntá tsjixraká kixin ts'óna ijnko nínko tjóá kuènte Ìnchéni. ²² Mé xíkaha jahará tinkachónkirá Cristo la tsojnkotsérá kaín rá ts'óna éxí ijnko nchia kuènte Dios la ntaha tsjak'exenhen tí Nchakuen ch'án.

3

Ch'ín Pablo k'uáyéhe ch'án tí xra tsjakohe ch'án tí sín jehya judío tí tan jína

¹ Mé xíkaha janhan Pablo mé tjéchinaxián tí tjàkua itén Cristo Jesús kixin jína ts'ejorá kjónté jehya chojni judío tí jahará. ² Chrókónohará kixin kjuasáyé Dios kjuanjon ch'án tí xra k'uayáha kixin tsjakohará. ³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xíkaha ikjian ijnko xroon kánhyó tsjé nixja k'uayéhérá. ⁴ Tió sinchekuáxinrá tíha ntá tsonohará kixin ó nóna tí nkehe kuènte Cristo ninkexró k'uénoehya. ⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xra la ko tí sín chrónka itén ch'án. ⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxí ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

⁷ Janhan k'uékítekakonhya, a ntá jie kjuasáyé Dios kjuanjon ch'án tí xra i sít'a kixin tsjækua tí itén ch'án kixin tí kjuachaxin kuènte ch'án. ⁸ Janhan mé kánhyó tjetoan kixin janhan la imá intsína la kaín tí í so sín tsíkjinchetjóá Dios la antsí tjetoan sín. Kjónté la Dios mé kjuínchekitonna tí xra imá tjetoan kixin tsojtjanka tí sín jehya sín judío tí tan jína nkexrí imá tjetoan tí nkehe kuènte Cristo. ⁹ La k'uayáha tí xra tsojtjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuích'éna ch'án kaín xín nkehe. ¹⁰ Mé xíkaha kónhen kixin ntá tí sín kuènte nínko tsjakuexin sín kaín xín tí sín t'etoan nkaya nkajní kixin tsonohe sín kixin xíkaha kaín nkehe jína tsíkjenkayáxin Dios. ¹¹ Kaín tíha kjuích'e Dios éxí tsíkjenkayáxin ch'án ntá Ìnchéni Jesucristo la ó kjuínchexiteyá tíha. ¹² Kjuasáyé Cristo ntá ó chóntani kjuachaxin tsochjineheni Dios kixin tinkáchónkini ch'án. ¹³ Méxra xrjanóahará kixin chrókuitoéhyará chrókuinkachónkirá ch'án kjónté tjétjasótena kixin kaín tíha kónhen kixin jahará chrók'uejoxinrá jína.

Cristo imá tjuèheni

¹⁴ Méxra xíkaha tjak'éxian tóch'ian nkayakon It'é Ìnchéni Jesucristo. ¹⁵ Mé tsík'áyéhe ihnié Dios kaín xín chojni tinkáchónki ch'án mé tí sín siín nkaya nkajní la ko tí sín siín chjasintajni. ¹⁶ Tjáncháha It'éni kixin tsjanjon kjuachaxin kuènte ch'án ts'ayéhérá kjuachaxién Nchakuen ch'án ¹⁷ kixin Cristo chróchóna asánrá kixin tinkachónkirá ch'án la ntá ntoá chrók'uejorá éxí ijnko nta tsíkji nuèe nínka la chrótjuèhérá kichuárá. ¹⁸ Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kjínxin la ko nínkaxín la ko ntetoxín kixin nkexrí tjuèheni Cristo. ¹⁹ Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxínni kaín tíha. A ntá tí jehe ch'án chrókuinkitsani ch'án la antsí chrókuiénxinni tí kjuachaxin kuènte ch'án.

²⁰ Ijie la chjéheni kjuasáya Dios kixin jehe ch'án chóna kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkítsa tí jeheni. ²¹ Kjuasáyé Dios itjen jnkochrín kixin Cristo Jesús kjuínchekaá ch'án tí nínko, mé xíkaha ó xiteyá jnkochrín. Amén.

4

Jína chrók'uejókoni kíchó ni kixin chóntani Nchakuen Dios

1 Janhan mé tjéchjinaxián tí xra kuènte Ìnchéni. Méxra xrjanóahará kíxin jína chrók'uejorá kíxin xikaha Dios tsíkjejá tí jahará. 2 Méxra chrókjuinchehnkehýará la ko chrókójiáhyará la ko chrókójinará chrókóninkákonhyará la ko chrótjuèhérá kíchuára. 3 Méxra jína chrók'uejokoará kíchuára kíxin chrókjuinkitsa Nchakuen Dios kjuaxróxin chrók'uejorá la ko jnkokoá chrókjuenkayáxinrá. 4 Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kíxin jnkokoá nkehe ts'ejóchónhenni. 5 Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni. 6 Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

7 Jnkójnkoni k'uáyéhéni kjuachaxin sich'ehe ni Dios xra kíxin xikaha kjuanjon Cristo.

8 Méxra xikaha nixja xroon itén Dios kíxin:

“Jehe ch'án sákjuí ch'án nkaya nkajní la ko sákjuíko ch'án tí sín tjejóchjina, la ntá kjuínchekitonhen ch'án chojni jnkójnko kjuachaxin kuènte ch'án.”*

9 ¿Ntá nkexrí t'axrjexín kíxin sákjuí ch'án? Tíhi mé t'axrjexín kíxin jehe ch'án mé senó k'uínkajinxin ch'án nkaya nkajní la kjuák'e ch'án chjasintajni. 10 Jehe ch'án mé k'uínkajinxin ntiha mé ntá jie sákíkjí ch'án tí nkajní imá noi. La ntá tjet'etuenhen ch'án kaín xín nkehe. 11 Jehe ch'án mé kjuínchekitonhen ch'án ijnko kjuachaxin jnkójnko chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án. 12 Mé xikaha tí xra k'uáyéhé tí sín kjueyá ch'án kíxin sich'ehe sín ch'án xra kíxin ntá ts'ánkí tí sín k'óna tí cuerpo kuènte Cristo. 13 Ntá xikaha kaín ni jnkokoá tsinkáchónkini tí Xjeen Dios la ko tsochóxinni ch'án jína kíxin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo. 14 Méxra chrók'ónahyani éxí xjan ntsíntsí. Tí xjanntsí la xrahya tsjinkí kjuaxrexinkaon éxí ijnko nkehe sákjuíko xrinto xikaha kíxin sich'iyehe sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroeni sín í jnko ntia ntoáhya kíxin chrók'uitjáyhenni Cristo ntá chrókjuasinni jie. 15 A ntá íchá jína chrónixjani tí nkehe chaxín ntoá la kaín asénni chrótjuèhenni kíchó ni ntá xikaha chrókónoheni kíxin xikaha tjinkaon Cristo. Jehe ch'án mé tí kja t'etuenhen tí cuerpo kuènte ch'án. 16 A ntá kjuachaxién Cristo kuenté tí cuerpo, tí ch'e xra jnkokón la tjinkitsa kuenté. Ntá jnkójnkoni jína ch'eni xra la mé xikaha ts'ánkí tí xra kuènte ch'án la mé jína chrótjuèhenni kíchó ni.

Tí kjuachaxin nixin kuènte Cristo

17 Tíhi mé ntáxrjan la ko tétuanhanrá kjuachaxién ihnié Ìnchéni. Ijie la chrók'uejohýará éxí ch'e tí sín chónhya Dios. Kaín nkehe tjenkayáxin sín la ntoáhya tíha. 18 Tí nkehe tjenkayáxin sín la sítié la chónhya sín tí kjuachón tjanjon Dios kíxin tienxínhya sín kíxin chrohya tsitekaon sín Dios. 19 Ó tsíkjinchek'itjáyan sín tí kjuaxrexinkaon kuènte sín la í tósuèhya sín chrókjuasin sín jie. Imá tóxrjínhin sín chrókjuich'e sín kaín nkehe jínahya. 20 A ntá jahará xikahya xrakohará tí nkehe kjuako Cristo, 21 tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án. 22 Méxra títóhérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínahya naxa t'ayahará. 23 Jahará t'ichjánxin kíxin chrókónixin tí kjuaxrexinkaon kuéntará la ko tí nchakuanrá. 24 Méxra chrókuákjára tí kjuaxrexinkaon nixin kjuích'éna Dios xikaha tjinkaon ch'án la ntá chrókuákoxinrá ijnko ntia jína ntoá.

25 Méxra chrókuítóhérá tí kjuach'ia. Méxra jnkójnkorá chrónixjehérá kíchuára ntoá kíxin kaín ni tsík'ónani jnkokoá cuerpo.

26 Tí chrókóninkáonrá la chrókjuásinhyará jie la chrókóninkákonhyará kuenté yaon.

27 Chrókuítóéhyará kíxin Tsochren chrókjuít'ayahará.

* 4:8 Salmo 68.18

²⁸ Tí jnkojínra kueerá la t̄toherá kjuachee. Íchá jína kixin itjára chrókjuich'exínra xra kixin tsochontará chichaon s̄inchekit̄onhénra jnkojín nkexro t'ichjánxinhin.

²⁹ Nixjahyará tí nkehe náxrjónhya. Nixjará ijnko tan jína kixin tsjinkitsará ts'ánki kjuaxrexinkaon kuente kíchuará la xikaha tsjinkitsará tí sín tjejótinhin. ³⁰ Nchek'aváhyará tí Nchakuen Dios kixin tíha mé k'uayéxinra éxi ijnko xroye kixin tsonoaxínra kixin jahará mé tinkachónkirá Dios la ko tsochonhénra tí yaon itsi ch'án ntá tsjintaxín tsaára.

³¹ T̄toherá tí kjuanínkaon chontará la ko t̄toherá tí nkehe ntoáhya tjenkayáxinra la ko t̄toherá tí kjuanot̄on la ko kaín nkehe jínahya. ³² A ntá chrókójinará chrókuiikonóehérá kíchuará. S̄inchekit̄jáyenhénra ijíe kíchuará kixin Dios kjuatsen tí jie chontará kixin tinkachónkirá Cristo.

5

Jína chrók'uejó tí sín k'óna xjeen Dios

¹ Jahará ó k'óna xjeen Dios la tjuahará ch'án. Méxra chrókóxakonhanra chrókjuákoxinra éxi kjuakoxin tí jehe ch'án. ² Chrótjuèherá kíchuará éxi Cristo tjuèhe tí jeheni kixin jehe ch'án la k'uenyákonhenni ch'án, éxi yóhe ijnko kolélo xikaha kjokehe sín Dios la kóchéhe Dios k'uáyéhe ch'án tí xraxé náxrjón.

³ Ntá jahará mé tsík'ónará chojni kuente Dios la ntá chrónixjahyará kuente í jnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánra tí nchónhya nkehe chróchontará. ⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuente Cristo tíha. Íchá jína antsí má chrókjuancheherá Dios kjuasáya. ⁵ Ó nohará kixin tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchóna sín la mé tíha ó yóhe tí nkexro tinkáchónki nkehe tsíkjanoya xikaha. Mé tí nkexro xikaha ch'e mé tsjachahya ts'ixenhen tí tjet'etoan Cristo la ko Dios. ⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xikaha ntá itsi tí kjuanínkaon kuente Dios la tsjasóte tí sín titekakuenhya sín tí jehe ch'án. ⁷ Méxra chrók'uítohyará tí sín xikaha ch'e.

⁸ Senó la k'uék'ájirá nt̄ia sítié. A ntá ijie ó k'ónará chojni kuente Ìnchéni la ó xritjejorá tí nt̄ia t'inkaséyan kuente ch'án. Méxra tjenkayáxinra jína éxi tí sín xritjejó tí nt̄ia t'inkaséyan. ⁹ Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá. ¹⁰ Tóxakonhanra chrókjuich'erá tí nkehe tóxrjínhin Ìnchéni. ¹¹ Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjákoxinra tí xra tí itjen tí t'inkaséyan. ¹² Chrókósuèheni chrónixjani kuente tí nkehe imó ch'e tí sín jínahya. ¹³ Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe. ¹⁴ Mé xikaha ntáchro xikihi:

T'aya jaha tjéchrian t'inkatjenxian tí síin tí sín tsík'en.
Cristo mé tjetjoka xrohi.

¹⁵ Méxra imá chrókóxakonhanra jnkojína chrók'uejorá. Jehya éxi tí sín noehya chrók'uejorá. Náhi. Chrók'uejorá éxi ijnko chojni nohe má. ¹⁶ Chrókóxakonhanra chrókjuich'erá xra tí jie kixin itsi ijnko yaon jínahya xitjahya s̄ich'erá xra. ¹⁷ Chrókólont̄ihyará. Chrókóxakonhanra chrókuiénxinra tí nkehe tóxrjínhin Ìnchéni. ¹⁸ Chrókókoanhyará kixin tíha mé chrók'uitjáyaxínra. Íchá jína chrókjuánjonra kjuachaxin chrók'uetuanhanra Nchakuen Dios. ¹⁹ Chrónixjéxinra kíchuará tí salmo la ko tí himno la ko chrótsjerá la xikaha kaín asánra chrókjuancheherá kjuasáyé Ìnchéni. ²⁰ Jnkochríxín chjehérá kjuasáya It'eni Dios kixin kaín nkehe kjuanjon ch'án la ko chrókjuanchaxínra kjuasáya kjuachaxién ihnié Ìnchéni Jesucristo.

Jína chrók'uejókoní tí sín kjéhyani kixin tinkáchónkini Ìnchéni

21 Títekákonhénrá kíchuára kíxin ó tinkachónkirá Ìnchéni. 22 Tí chojni chjin chrókjuinchexiteyéhe xì sín éxí nchexiteyéhe sín Ìnchéni. 23 Tí chojni ntoa chóna kjuachaxin ts'etuenhen ichjién éxí Cristo mé ikja t'etuenhen tí nínko. Kjaxin jehe ch'án kjuínchekaá ch'án tí nínko, mé tí cuérpóé ch'án. 24 Méxra éxí tí nínko nchexiteyéhe Cristo mé xíkaha kjaxin tí chojni chjin chrókjuinchexiteyéhe tí xì.

25 Tí chojni ntoa chrótjuèhe tí ichjién kíxin éxí Cristo la tjuèhe tí nínko la k'uenyákonhen ch'án. 26 Mé xíkaha kjuích'e Cristo kíxin sinchetjóá ch'án tí nínko mé kjuínchetjuáxin ch'án tí nta kuíkitexín sín kjuachaxién itén ch'án. 27 Ntá tsjanjon ch'án tí jeheni éxí ijnko nínko imá jína chónahya jie la ko chónahya ninkehó nkehe náxrjónhya, mé ijnko nínko tjóá la ko ntoá. 28 Mé xíkaha tí chojni ntoa chrótjuèhe tí ichjién sín éxí tjuèxín ch'án cuérpóé ch'án. Tí nkexro tjuèhe ichjién mé kjaxin tjuèhe asén ch'án. 29 Kohya ninkexró nínkakonhen tí cuerpo kuènte. Kaín chojni la ine sín la t'ayakonhen sín cuérpóé sín la mé xíkaha Cristo t'ayakonhen tí nínko. 30 Kaínni mé k'ónani cuerpo kuènte ch'án. Jeheni mé ntóe ch'án la ko huésóé ch'án. 31 Ntáchro kíxin: “Méxra ijnko chojni ntoa mé tsítóhe it'é la ko ìné kíxin tsakja ichjién la yóí sín mé ts'óna éxí jnkokoá chojni.”* 32 Tíhi mé ijnko nkehe imá jie tienxínhya ninkexró. Mé janhan xrjanka kuènte Cristo la tíha mé nínkoé ch'án. 33 Méxra kjaxin tjéxrjanka kíxin chojni ntoa t'ichjánxin tsotjuèhe ichjién sín éxí tjuèxín asén sín la tí chojni chjin chróchónthehe sín kjuasáya tí xì sín.

6

1 Jahará chánjanrá la t'ichjánxin sinchexiteyéhéra it'ará la ko ìnará kíxin tjuèhéra Ìnchéni kíxin tí xíkaha mé jína. 2 Tí nkehe saxín tsík'ítuenhenni kíxin chrókuitekaonni ntá chrókjuanjón Dios nkehe mé tíhi: “Chrókjuíkosáyehéra it'ará la ko ìnará 3 kíxin mé náxrjón chrók'uejorá la isé chrók'uejorá ntíhi chjasintajni.”*

4 Jahará it'é xjan la chrókjuínchekónínkakonhyará tí xjaanrá. Íchá jína kíxin sinchek'ánkíxinrá xjaanrá ijnko kjuaxrexinkaon jína kíxin ts'ánkíxin xjan tsinkáchónki xjan Ìnchéni.

5 Jahará chojni ch'e xra mé chrókuítekákonhénrá tí lámóará ntíhi chjasintajni la chróchontehéra sín kjuasáya. Sích'eherá sín xra éxí ch'eherá xra Ìnchéni Cristo.

6 Chrókjuích'erá xra jína la jehya kíxin tí tjejó sín tjejótsjehe sín kíxin ntá xíkahó ntá jína chrók'uejoxínrá. Náhi. Éxí ch'eherá xra Cristo kaín asánrá sích'erá xra kíxin mé xíkaha tóxrjínhin Dios. 7 Kaín asánrá chrókjuích'erá xra éxí ch'eherá xra Ìnchéni la jehya éxí chojni ó chrókjuích'eherá xra. 8 Ó nohará kíxin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kíxin nkexrí tí xra jína kjuích'e sín.

9 Tí jahará chojni lámó mé jnkojína chrókuétuènhénrá tí sín t'ahará xra la séchrókóninkákonhénrá sín. Xráxinkáonrá kíxin jahará la ko jehe sín mé jnkokón chrókjuínchexiteyéhéra Ìnchéni itjen nkaya nkajní kíxin kaín chojni la jnkokón t'ikon ch'án.

Tí nkehe tjinkítsa t'ayakonhen tí sín tinkáchónki Ìnchéni

10 A ntá jie kíchó ni, nchefuerte asánrá kíxin tjejókoni Ìnchéni la tjetoan tí kjuachaxin kuènte ch'án. 11 Chrókuaáxinrá kaín tí kjuachaxin tsjanjon Dios kíxin ntá xíkaha jína chrók'uejorá la chrókjuít'ayahará Tsochren. 12 Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya síin chjasintajni. Tíha mé tjinkaon chrók'uetóan tí chjasintajni sítié. 13 Méxra chrókuákjárá kaín tí kjuachaxin kjuanjón Dios kíxin ntá chrókjuachará tí itsi tí yaon jínahya ntá tí xíkaha chrókjuích'erá

* 5:31 Génesis 2.24 * 6:3 Éxodo 20.12; Deuteronomio 5.16

la chr'éxin la jína chrók'uejorá. ¹⁴ Nchefuérte asánrá. Jína chrók'uejorá. Chrókuítekáonrá tí itan chaxín kixin tí nkehe ntoá mé chrók'uayakonhanrá. ¹⁵ Méxra listo chrók'uejorá sátsjichronkará tí tan tjanjon kjuaxróxin. ¹⁶ La antsí tjetóan chrókuinkachónkirá Ìnchéni. Tíha mé chrok'uinkákonhen tí chica flecha tsochr'án Tsochren. ¹⁷ Tí chrókuaáxinrá la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios. ¹⁸ La ko kjaxin chrókuítóéhyará chrónixjehérá Dios la jnkochrín chrókjuanchehérá ch'án kaín nkehe t'ichjánxinhanrá la chrokjuanchatóxixínrá Nchakuen ch'án. Chrók'uejotsjehérá la chrókjuanchiará kixin tsjinkítsa Dios kaín tí sín tinkáchónki ch'án. ¹⁹ Chrónóehérá ch'án kixin kjaxin janhan tsjinkítsana ch'án tsjanjon ch'án tí tan t'ichjánxin tsoníjja janhan kixin ntá janhan antsí jína chrónixja kixin ntá tsinhin sín tí nkehe ninkexró k'uénoehya kixin nkexrí tjen tí itén ch'án tsaáxin chojni. ²⁰ Dios mé ichr'ánna tsoxrjanka tí itén ch'án, mé xikaha tjéchinaxián ijie. Nixjehérá ch'án kixin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkexro imá tjuèheni la ko xráxin ch'ehe xra Ìnchéni mé tsochenkará ch'án tí jahará nkexrí tjen la ko nkexrí tí xra tjet'a. ²² Mé xikaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xikaha chrókócháhará.

²³ Tjáncháha It'éni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsotjuèhe kichó sín la ko tsinkáchónki sín ch'án. ²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí sín siín chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'ehe ni xra Jesucristo, mé ikjinni tí xroon i chr'anhánrá kaín tí jahará kichó ni tinkachónkirá Cristo Jesús tjejorá chjasin Filipos la ko tí sín t'etōan kuènte nínko ntiha. ² Tjanchiani kixin It'éni Dios la ko Ìnchéni Jesucristo kjuasáyé ch'án imá chrókjuincheyaonrá ch'án la ko chrók'uáyéhérá kjuaxróxin.

Ch'ín Pablo tjechrónóhe ch'án Dios kixin tí sín tinkáchónki Jesús ntiha

³ A ntá tió xráinkavan tí jahará la imá tjaha Dios kjuasáya ⁴ la ko níxjaha Dios la imá chàna tjáncháha ch'án kixin tsjinkitsa ch'án kaín tí jahará. ⁵ Jahará la kjuínkitsará tió kjuàkua tí tan jína tí saoxín kuinhínrá itén Dios la naxa tjejotjínkitsará ijie. ⁶ Ó nòna chaxín kixin xikaha Dios ó kjuankixin ch'án ch'e ch'án xra jína kixin kuítekáonrá mé xikaha naxa tsjintaxín sich'e ch'án tsjixrakája tí yaon tsokjan Jesucristo. ⁷ Jína kixin tjenkayáxian kuènte kaín tí jahará. Méxra xikaha imá tjuahará. Jahará la ko janhan la jnkokón kjuachaxin k'uáyéhe ni la kjónté janhan tjéhjina o itjén tí tjejó tí sín t'etōan tjéxrjanka kixin jína tí tan tsaáxinni. ⁸ Dios la ó nohe kixin imá tjínkavan chrók'uíkuañ kaín tí jahará kixin éxi tjuàxinrá Cristo. ⁹ Tjáncháha Dios kixin tsjinkitsa ch'án tí jahará kixin antsí má chrótjuèhéra ch'án la ko chrók'uánkí tí kjuaxrexinkaon kuéntará kixin antsí chrókuiénxinrá kaín nkehe. ¹⁰ La ntá chrókónohará chrókuákjára tí nkehe jína. A ntá tí xikaha chrókjuich'era la jína tjóá chrók'uejorá la ko kohya nkehe chrókjuanchia jie tió tsokjan Jesucristo. ¹¹ Méxra jahará chrókjuich'era xra jína éxi ijnko nkehe jína chrók'óna kixin kjuasáyé Jesucristo la ntá xikaha la chrókjuíkosáyehérá Dios.

A ntá janhan la tjéxonxian Cristo

¹² Kichóni tjínkavan tsonohará kixin tí nkehe kjuasótexinna la kjuínkitsa kixin kuínhin chojni tí itén Dios tsaáxinni. ¹³ Kaínxín tí chojni siín palacio la ko kaín tí í so sín mé nohe sín kixin tjéhjinaxián kixin tinkachónkia Jesucristo. ¹⁴ A ntá tí tjéhjina la itsjé tí sín kichó ni antsí má kóxrjínhin sín tjako sín itén Ìnchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinoxínhin sín kixin tjínkaon sín chrókjuachaxinna sín. A ntá í so sín tjako itén ch'án kixin tjínkaon sín jína chrókjuinkitsana sín. ¹⁶ Kjánchó iso sín tjínkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjínkaon sín chrók'uekana sín antsí má jie kixin naxa tjéhjina. ¹⁷ La í so sín nixja sín kuènte Cristo kixin tjuèhe sín ch'án la ko tjuana sín la ó nohe sín kixin ntihi tjén kixin tsoxrjanka tí itan tsaáxinni. ¹⁸ Kjánchó ántosenná kjónté á chaxín kaín asén sín tjako sín o náhi, la imá chàna kixin chrónka sín tí tan jína kuènte Cristo la antsí má chéhe asenná.

¹⁹ Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyará jahará tjejónixjehérá Dios la ko tí Nchakuen Jesucristo mé tjetjinkitsana. ²⁰ Jína tjéxonhan kixin Dios la tsítōehya tí janhan kixin ichrén nkehe jínahya chrókóna. Tjínkavan tsochonta kjuachaxin kixin jína tsonixja kaín asenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoxín sín kixin Cristo imá chóna kjuachaxin kjónté á naxa tjéchuān o á ó tsík'ena. ²¹ Kixin janhan na Cristo tjéxonxian la ntá kjónté ts'énxian xikaha la mé chrókjuácha. ²² A ntá tí naxa tsjak'é naxa tjéchuān ntá naxa jína sít'aha Ìnchéni xra. Nonahya nkehe tí chrókuákjaá, á chrók'uén o á chrókjuak'échuān. ²³ Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékian Cristo. A ntá janhan la ntáxrjan kixin íchá jína tíha.

²⁴ Kjánchó t'ichjánxin naxa chrókjuak'é kixin naxa chrókjuínkítsa tí jahará. ²⁵ Méxra ó nòna kixin naxa tsitona tí tjejorá kixin chrókjuínkítsa ti jahará kixin ntá antsí chrókónohará la chrókócháhará kixin jína chrókuinkachónkirá Ìnchéni. ²⁶ Ntá tió tsjasán janhan ts'ejóni ínaá la imá tsocháhará la tsjanchehéra kjuasáyé Jesucristo.

²⁷ A ntá jahará chrókjuákoxinrá chrók'uejorá jína éxí ntáchro tí tan kjuakoxin Ìnchéni Cristo. Mé xikaha tí tsjasántsjahará o náhi la tjínkavan chrókuinhan kixin naxa imá tinkachónkirá Cristo la ko jnkokoá tjenkayáxinrá la ko jnkokoá tjejoch'era xra tjàkorá tí itan jína tsaáxinni. ²⁸ Chrókuitoéhyará kixin tí sín nínkakonhanrá chrókjuintachakonrá sín. Tí xikaha chróchrakonhyará la chrókónoexín sín kixin ts'itjayan sín, a ntá chrókónoxín kixin jahará mé chaxín tsaárá. Tíha mé Dios tsjinkítsará. ²⁹ Ó kuitonhanrá tí kjuachaxin kixin tsinkachónkirá Jesucristo la ko kjaxin kuitonhanrá kjuachaxin tsjasótiaxinrá kixin jahará mé tinkachónkirá ch'án. ³⁰ Jahará la ko janhan jnkokón ch'eni xra. Jahará ó k'uikonrá senó nkexrí kjuít'a xra la ó kuinhínrá ijie kixin naxa tjét'a xra kjónté nínkakonna sín.

2

Kuítóhe Jesús tí kjuachaxin chrók'ueṭoan ch'án ntá ijie imá tjetoan ch'án

¹ Tí chaxín tí Cristo nchextraxinkaonrá la tí chaxín Cristo tjuàhará ch'án nchecháhará ch'án la tí chaxín tí Nchakuen ch'án xrikoára la tí chaxín nohará kixin tikonóahará ch'án² la nchecháhará kixin jnkokoá chrók'uejokoará kichuára la ko jnkokoá chrótjuèhéra kichuára la ko jnkokoá chrókjuenkayáxin nchakuanrá la ko jnkokoá xra chrókjuich'era. ³ Chrókjuenkayáxinhyará chrókuétoanrá la ko chrókjuinchehnkehyará. Náhi. Chrók'ónará chojni t'etoanhya. Chrók'uikonrá éxí antsí tjetoan tí í so sín, a ntá kánhyó tjetoan tí jahará. ⁴ Ninkexró chrókjueyá tí nkehe kuènte jehó. Náhi. Chrókjuéyará tí nkehe chrókjuinkítsa tí í so chojni.

⁵ Jahará chrókjuenkayáxinrá éxí kjuenkayáxin Cristo Jesús. ⁶ Jehé ch'án chóna ch'án kaín kjuachaxin kuènte Dios la kjónté xikaha la tjinkakonhya ch'án chrókjuincheyéhe ch'án éxí Dios. ⁷ A ntá kuítóhe ch'án ntáha tí kjuachaxin k'uechóna ch'án la k'óna ch'án ijnko chojni ntoa chjasintajni la ko kjuích'e ch'án xra. ⁸ La éxí ijnko chojni k'ueṭoanhya kjuák'e ch'án la kjuínchexiteyéhe ch'án Dios kaín asén ch'án kixin ik'uén ch'án, mé k'uénxin ch'án tí ntacruz. ⁹ Méxra Dios imá kjuikosáyehe tí jehé ch'án la ko kjuínchek'in ch'án ijnko ihnié imá tjetoan. ¹⁰ Kixin ntá tsinhin kaín chojni tí ihnié Jesús ntá ts'ejóxin toch'in sín, mé tí sín siín nkaya nkajni la ko ti sín siín chjasintajni la ko tí chojni siín chrínkínche. ¹¹ La ko kaín xín chojni tsochrónka sín kixin Jesucristo mé Ìnché sín mé xikaha tsjikosáyehe sín It'eni Dios.

Tí sín tinkáchónki Cristo tóyóhe éxí xrohi t'inkaséyanxín chjasintajni

¹² Jahará kichó ni imá tjuàhará la xráxín kjuínchexiteyànará tí k'uék'ejóni. A ntá ijie la chrókjuínchexiteyànará kjónté ikjín tjén. Chrókuitoéhyará tí nkehe tsjanjon kjuachón la chrók'uayakonhénra jnkójina ¹³ kixin Dios ntaxraxinkaonrá sich'era tí nkehe jína tjinkaon ch'án.

¹⁴ Kaín xra ch'era la chrókóninkákuénhyará kichuára la ko chrókjuíntahyará kichuára ¹⁵ kixin tsokohya ninkexró tsontáchro kixin jahará la chontará jie. Kixin jahará la mé tí xjeen Dios chróchontahyará jie, la tjejorá tí siín tí sín jínahya tjasin jie. Na ntá jahará chrók'uinkaséyanxín tí jehé sín éxí tí konotsé t'inkaséyanxín tí chjasintajni sítié. ¹⁶ Méxra jahará chrók'uayakonhénra jína tí tan tjanjon kjuachón. Tí xikaha chrókjuínchexiteyárá jnkójina ntá tió tsi Cristo tsochéhe asenná kixin xikaha xra tjejoch'era kixin ntá tsonóna kixin jehya ó chónkó kjuak'ékjit'a xra. ¹⁷ Kjónté chrók'uénxian la éxí nkehe chrókjuanchatóxixínra Dios chrók'uikonrá tí janhan. Mé xikaha chrókjuintaxín tí nkehe chróchjehéra ch'án kixin tinkachónkirá ch'án, la ntá mé janhan mé tsochána la ko

tjínkavan kixin kaín rá xikaha chrók'uayéhérá kjuachéhe. ¹⁸ Méxra chrókócháhará jahará kjaxin la chrók'uayéhérá éxi tí kjuachéhe chonta.

Ch'ín Timoteo la ko ch'ín Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'ín Timoteo tsjijitsjehe ch'án tí jahará kixin ntá tsochàna tsinhan nkexrí tjejorá. ²⁰ Kohya í jnko nkexro chrókjuenkayáxin éxi tí janhan la ko chrókóxonhen kixin jahará chrók'uejorá jína. ²¹ Kaín tí í so sín tjejá sín tí nkehe tóxrjnhin sín ó la jehya tí nkehe tóxrjnhin Jesucristo. ²² A ntá jahará ó nohará kixin ch'ín Timoteo ó kjuakoxin ch'án kixin jína asén ch'án kixin jehe ch'án kjuít'akian ch'án xra kjuakoni tí tan jína. Éxi ijnko xjanna xikaha kjuínkítsana ch'án. ²³ Mé xikaha tjínkavan tsochr'an ch'án tsjijitsjehe ch'án tí jahará tió tsonòna nkexrí tsji tí xra kuèntana. ²⁴ La ko kjaxin chonhan kixin Ìnchéni tsjinkítsana kixin tjoka tsjasán kjaxinna.

²⁵ A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehe ch'án mé jnkokoá ch'ekoni ch'án xra kjónté nínkakonhenni chojni. Jahará k'uechr'anrá ch'án ntihi kixin jehe ch'án tsjinkítsana ch'án kaín nkehe tjínkavan. ²⁶ Imá tóxonhen ch'án tsjijitsjehe ch'án tí jahará kixin ó nohe ch'án kixin tsíkinhínrá kixin k'uéníhi ch'án. ²⁷ Chaxín k'uéníhi ch'án ó mero chrók'uen ch'án, a ntá Dios kuikonóehe tí jehe ch'án kjánchó jehya jehó ch'án, kjaxin kuikonóna Dios tí janhan kixin kánhyó chrók'uavá. ²⁸ Méxra tjínkavan tsochr'an ch'án kixin ó nòna kixin tsocháhará ts'ikonrá ch'án inaá la ko xikaha janhan í kánhyó chrók'uavá. ²⁹ Imá chrókócháhará chrókjuiji ch'án kixin jehe ch'án mé ijnko kichó ni tinkáchónki Ìnchéni la ko chrókjuikosáyehérá ch'án éxi chrókjuikosáyehérá kaín tí í so sín éxi jehe ch'án. ³⁰ Jehe ch'án ó mero chrók'uenxín ch'án tí ch'ehe ch'án xra Cristo. Mé siín kjuaxikaon chrók'uenxín ch'án kixin jehe ch'án kjuínkítsana ch'án kixin jahará xitjahya ts'inkará tsjinkítsará tí janhan.

3

Tí nkehe chaxín sínki

¹ A ntá ijie, kichó ni, chrókócháhará kixin jahará la kuènte Ìnchéni. A ntá tí janhan la xrahya tsokjatee tsokjian tí nkehe ó kjian kixin tíha la chrókjuinkítsa tí jahará. ² Chróchontará cuidado ti sín ch'e jínahya éxi konjá la tóchrít'o sín cuérpoé sín. ³ A ntá tí chojni chaxín chóna xroye la mé tí jeheni kixin jeheni chaxín xraxinkakonxíni Dios kjuachaxièn Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpoéni chrókóchrínjinni. ⁴ A ntá janhan kjaxin jína chróntáxrjan kixin chrókóchrít'o tí cuérpoé chojni. Ninkexró antsí chróchóna kjuachaxin kixin chrókuitekaon tí nkehe a. ⁵ Janhan mé tsíkana xroye tí k'uechonta ijní yaon la ko janhan mé tikiníxian tí sín israelita la tsík'axrjeníxinna tí sín tsík'axrjeníxin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxi tinkáchónki tí sín fariseo. ⁶ A ntá imá k'uénínkakonhan k'uechonkíha tí sín tinkáchónki Jesús la ko imá kjuíntaxiteyáha tí ley la kohya ninkexró tsontáchro kixin chaxínhya tíha. ⁷ Ntá kaín tíha la tí ósé k'uekjenkayáxian janhan kixin sínki tíha, a ntá ijie la tinkáchónkia Cristo la ntá tí nkehe k'uekóxrjinná k'uekjít'a la ntá jie la ninkehó sínkíhya. ⁸ La kjaxin kaín xín nkehe t'íkuan éxi chónkó tíha kixin antsí má tjetoan tsochoxián Ìnchéni Jesucristo. Kaín kjuaxrexinkaon jínahya k'uechonta la kjuíntak'itjáyan kixin ijie ó tinkáchónkia Cristo la kaín xín tí nkehe k'uechonta la t'íkuan éxi chjínínó ó kixin ntá xikaha jína chrókjuak'ékian Cristo. ⁹ Chrókóchàna kixin jnkokoá chrók'uejókoni ch'án. Tjeyáhya kixin tí ley chrókjuínxín ijieni tí chrókjuínchexiteyéheni. Náhí. Tinkáchónkia Cristo la tsaáxinni kixin Dios la tsjakjìin tí ijieni kixin tinkáchónkini ch'án. ¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tió xechón

ch'án la ko tjínkavan tsjasótexinna éxí kjuasóte ch'án la ko kjónté chrók'uénna éxí k'uénxin ch'án ¹¹ kixin ntá tjínkavan tsjácha tsoxechónna ínaá.

Ch'ín Pablo tjinkaon chrókjuacha ch'án

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'án senó xíkaha.

¹³ Kíchóni, ntáxrjanhya kixin janhván kjuácha tíha. Náhi. Janhan mé ts'itjáyanna kaín xín tí nkehe ó kuítóhe senó la t'ichjánxin kaín asenná tjichráha tí nkehe naxa t'itjayan tsjácha.

¹⁴ Kixin xíkaha ntá chrókjuácha chrók'uayáha kaín tí nkehe jína tsjanjon Dios. Jehe ch'án la sinchexiteyá kaín tíha kixin tinkachónkia Jesucristo.

¹⁵ Kaínni tí tinkáchónkini Jesús kaín asénni la méxra xíkaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha. ¹⁶ A ntá t'ichjánxin chrók'uejóni éxí tí nkehe ó kjuachani.

¹⁷ Kíchóni, chrók'uejorá éxí kjuak'é janhan la ko chrótsjehérá nkexrí tjejó tí í so chojni tjejóch'e éxí kjuakoni kixin xíkaha kjuakoharáni tí jahará. ¹⁸ Nchónhya xrjanakaxián senó la ntá xrjanka ínaá la imá tsjanka kixin siín nchónhya sín tjejó sín éxí nínkakonhen sín tí Cristo k'uénxin ntacruz. ¹⁹ Tí sín a mé ts'itjayan sín. Tí dios kuénte sín la mé tí nkehe ntáchro asén sín ó la ko tjinkaon sín chrókjuinchehnkexín sín tí nkehe chrókósuèxin sín. Jehó tjenkayáxin sín tí nkehe siín chjasintajni ó. ²⁰ A ntá jeheni kaín ni la mé chojni kuénte nkajní la tjejóchónhenni kixin ts'inkajinxin nkaya nkajní tí nkexro tsaáxinni, mé Inchéni Jesucristo. ²¹ Ntá jehe ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhe éxí tí cuerpo náxrjón chónta ch'án. Tíha mé tsoxiteyá kjuachaxién ch'án jié kixin ó chónta ch'án kjuachaxin ts'etuñhen ch'án kaín xín nkehe.

4

Jnkochrín chrókócháhará kixin tinkachónkirá Inchéni

¹ Jahará kíchó ni imá tjuahará la ko imá tjínkavan chrókjuasántsahará tí jahará kixin jahará imá nchechànará kixin jahará mé éxí ijnko nkehe ó kjuácha. Méxra jína chrók'uejorá chrókuinkachónkirá Inchéni kixin tjuahará kíchó ni.

² Xrjanóaha tjan Evodia la ko tjan Síntique kixin jnkokoá chrókjuenkayáxin sín kixin jehe sín la jnkokoá kíchó sín kixin tinkáchónki sín Inchéni. ³ Jaha la jína k'uéjóni kjuích'eni xra, méxra xrjanóaha tjínkítsa tí sín chjin kíchó ni kixin jnkokoá chrókjuenkayáxin sín. Jehe sín kjaxin kjuích'e sín xra tió kjuakoni tí tan jína tsaáxinni. Koí tí ch'ín Clemente la ko í so sín kjuích'ekoni xra. Tí ihnié sín la ó ts'ínixín ts'ínixín ihnié chojni tsaá.

⁴ Nchechéhérá asánrá jnkochrín kixin tjejókoará Inchéni. Ínaá kjatée xrjanka nchechéhérá asánrá. ⁵ Kaín chojni chrókónohe kixin jahará la chojni jínará. Chrórxáinkáonrá kixin í séhya tsokjan Inchéni.

⁶ Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjaxin chrókjuancheherá ch'án kjuasáya. ⁷ A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuénte ch'án kixin imá ijié tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuanhanrá kíchó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xíkaha tjenkayáxinrá kaín xín tí nkehe náxrjón la ko tí nkehe tóxrjínhin Dios.

⁹ Chrókjuích'erá kaín tí nkehe kjuákohará la ko tí nkehe kuínhínrá xrjanka la ko tí nkehe kuétuanhánrá la ko tí nkehe k'uíkonrá kjuít'a, mé kaín tíha chrókjuinchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkitsa sín tí ch'ín Pablo

¹⁰ Ìnchéni imá nchechàna kixin jahará xráxinkáonrá tí janhan ínaá. Ntáxrjanhya kixin tsík'itjáyanhanrá tí janhan kixin jahará xitjahya k'uékjínkitsará tí janhan. ¹¹ Jehya kixin ntáxrjan tíha kixin imá t'ichjánxinna kixin janhan na ó kuàna kjuaxróxin tjén kjónté tí nkehe chonta ó. ¹² Janhan ó kuàna tjén kjónté nóana la ko kjaxin ó kuàna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántosénna. ¹³ Kaín xra tsjácha sít'a kixin Cristo tsjinkitsana. ¹⁴ Kjánchó jahará jína kjuich'erá kixin kjuínkitsará kjuánjonrá nkehe t'ichjánxinna.

¹⁵ Tió sákjuíxián estado Macedonia la kjuankíxian kjuàkua tí tan tsaáxinni ínaá la jahórá tí nínko chjasin Filipos ichr'anrá chichaon k'uayáha kixin cháhará kjuákohará itén Dios. ¹⁶ Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuínkitsará tí nkehe k'uichjánxinna ntiha. ¹⁷ La jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará ántsí má chrókjuich'erá tí nkehe tjinkaon Dios kixin ntá ántsí chrókjuachará. ¹⁸ Ó k'uayáha kaín nkehe tsíkánjonrá la ántsí itsjé chonta. Ó k'uayáha tí nkehe tsíchr'anrá mé tí nkehe kujukao ch'ín Epafrodito, la kaín tíha la ó tsjácha. Tíha la éxí yóhe ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjínhin ch'án. ¹⁹ Tí Dios kuéntana mé tsotjáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjete la tsjanjon ch'án kixin jahará la tinkachónkirá Cristo Jesús. ²⁰ Kjuasáyé It'éni Dios jnkochrín. Mé xikaha tsoxiteyá. Amén.

Tsjixixín nixja ch'ín Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kíchó ni tzejókoni ntihi nixjahará sín. ²² Kjaxin kaín tí sín tinkáchónki Dios la ko tí sín ch'ehe xra tí ch'ín t'etoan romano mé nixjahará sín. ²³ Tjáncháha kixin Ìnchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énhen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjeýána Jesucristo t'ahá ch'án xra kixin xikaha tjinkaon Dios, la ko kichó ni Timoteo ² mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tjejorá chjasin Colosas. Kjuasáyé It'eni Dios chrókjuintayaonrá kixin kjuaxróxin chrók'uejorá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochrín tjancheheni kjuasáya Dios la ko tjanchiani kixin chrókjuinkitsa ch'án tí jahará mé jehe ch'án It'é Ìnchéni Jesucristo. ⁴ Ó kuínhinni kixin jína tinkachónkirá Ìnchéni Jesucristo la ko tjuèhéra kaín tí sín ó tsíkjinchetjóá Dios. ⁵ Mé xikaha tjejochonhénra kixin ts'ayéhéra tí nkehe chóna Dios tjen nkaya nkajní. Jahará la xikaha tjejochonhénra kixin tjejotinhénra tí tan chaxín kuente Dios tsaáxinni. ⁶ Tí tan i mé kuínhin chojni la itsjé sín tinkáki tekaon sín la tinkák'ánkí tí kjuachaxin kuente Dios kuenté chjasintajni. Mé xikaha kónhen tió kuinhénra la ko kuítekáonrá kixin chaxín tjuahará Dios. ⁷ Tíhi mé kjuakohará kichó ni Epafra. Jehe ch'án la jnkokóá kjuích'ekoni ch'án xra kixin jehe ch'án la jína ch'ehe ch'án xra Cristo kixin xikaha tjinkitsa ch'án tí jahará. ⁸ Jehe ch'án mé kui ch'án ntihi chrónka ch'án nkexrí tjuèhéra kichuára kixin Nchakuen Dios tjinkitsa tí jahará.

⁹ Méxra xikaha tí yaon tió kuínhinni nkexrí tjejorá la títoehyani tjancheheni Dios kixin tsjinkitsa tí jahará kixin tsonohará jína nkexrí tóxrjínhin ch'án la ko tjanchiani kixin tsjanjon ch'án kjuachaxin kixin tsiénxínra kaín nkehe kuente ch'án. ¹⁰ Tjancheheni ch'án kixin jína chrók'uejorá kixin tinkachónkirá Ìnchéni la ko chrókjuitoéhyará chrókjuich'erá éxí tóxrjínhin tí jehe ch'án. Ntá jína chrókjuachará chrókjuich'erá xra kuente ch'án la ntá chrókónohará jína nkexrí tjen Dios. ¹¹ Tjanchiani kixin jehe ch'án chrókjuinkitsa kixin chrók'uejorá fuerte kixin tí kjuachaxin jíe kuente ch'án kixin ntá chrókjuachará la kjónté ichrén nkehe chrókónhanra la chrókóninkákonhyará. ¹² La ko chrókócháhará chróchjehéra kjuasáya It'eni Dios kixin kjuanjon ch'án kjuachaxin kixin ts'áyéheni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án. ¹³ Jehe ch'án mé kuakitsjekjanxinni ch'án tí sítié la ntá kjuanjon ch'án kjuachaxin ts'ejóni tí t'etoan tí Xjeen ch'án, tjuèhe ch'án. ¹⁴ Jehe ch'án kjuínchekaáni ch'án kixin k'uenyákonhenni ch'án la tí ijnié ch'án mé kjuenka ch'án tí ijiéni.

Kjuaxróxin ts'ejókoni Dios kixin k'uenyákonhenni Cristo

¹⁵ Éxí tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxín tjen tí naxa t'ónahya ninkehó. ¹⁶ Kjuachaxién tí jehe ch'án kjuích'énaxín Dios kaín tí nkehe síin nkajní la ko chjasintajni la ko kaín tí nkehe naxa t'ikonhyani la ko tí nkehe ó t'ikonni. Kjaxin kaín tí sín ángel t'etoan la ko chóna kjuachaxin la mé jehe ch'án kjuích'éna ch'án kixin sich'ehe sín ch'án xra. ¹⁷ Cristo la ó xráxín tjen kjónté naxa t'ónahya ninkehó la jehe ch'án t'ayakonhen ch'án kaín nkehe síin kixin tí kjuachaxin kuente ch'án. ¹⁸ La kjaxin jehe Cristo mé tí kja t'etuñhen tí cuerpo mé tíha mé tí nínko. Jehe ch'án senó xechón ch'án kixin jehe ch'án mé ts'etuñhen ch'án kaín nkehe síin. ¹⁹ Dios tjinkaon chróchjéhe ch'án tí Xjeen ch'án kjuachaxin éxí tí kjuachaxin chóna tí jehe ch'án. ²⁰ Kjaxin tjinkaon Dios kixin kjuachaxién Cristo chrók'uixin kjuaxróxin nkuíxín mé chjasintajni la ko nkaya nkajní. Mé xikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

21 Jahará la ósé ikjín k'uék'ejorá la k'uéninkákonhénrá Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios 22 kixin k'uenyákonhánrá Cristo, kjuasóte tí cuérpoé ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahyará ninkehó jie. 23 Méxra xikaha chrókuitoéhyará chrókuinkachónkirá Ìnchéni la ko chrókuitoéhyará tí nkehe tjejochonhénrá kixin ó kuinhínrá tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjínkítsa xrjanka xikaha.

Ch'ín Pablo ch'e ch'án xra kuènte nínko

24 Méxra ijie la tjasótexinna kixin tí jahará la chàna kixin xikaha mé tsjintaxín tjasóte janhan kixin tí nkehe t'itjáyan tí naxa chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpoé ch'án. 25 Mé xikaha Dios kjueyána kixin sít'a xra kuènte nínko kixin xikaha tí xra k'uetuanna ch'án kixin ntá jína chrók'uejoxinrá tí jahará kixin chrókjuintaxín chróxrjankaxián tí itan kuènte Dios. 26 Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án. 27 Dios tjinkaon chrókjuinchenohe tí jehe sín tí nkehe tjemá náxrjón tjete ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénrá ts'ayéhérá tí kjuachaxin jie kuènte ch'án.

28 Jeheni mé chronkaxínni nkehe kuènte Cristo la nchexraxinkaonni kaín chojni la ko tjakoheni sín kixin chrókuienxín sín jína. Ntá jnkojnko sín chrók'uánki kjuaxrexinkaon kuènte sín kixin tinkáchónki sín ch'án. 29 Méxra xikaha tí xra it'a la kaín asenná it'a xra tí kjuachaxién chjina Cristo.

2

1 Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'íkonhya tí janhan. 2 Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuèhe sín kichó sín. Mé xikaha chrók'uánki kjuaxrexinkaon kuènte sín chrókuienxín sín jína kixin ntá chrókónohe sín tí nkehe ninkexró k'uénoehya kuènte It'eni Dios, mé Cristo tíha. 3 Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe. 4 Kaín tíha xrjanka kixin ntá ninkexró chrókjuít'ayahyará tí jahará kixin tí náxrjón chrónixja sín ó. 5 Kjónté tjenhya tí cuerpo kuèntana tí tjejorá la ntá nchakuenná la mé tjen ntiha kixin xráinkavan tí jahará la chàna kixin t'íkuan kixin jína tjejorá naxa tinkachónkirá Cristo.

6 Méxra xikaha kuinkachónkirá Ìnchéni Jesucristo la mé xikaha jnkokoá chrókjuenkayáxinkoará tí jehe ch'án. 7 Éxí ijnko nta tsíkji nuée nínka mé xikaha chrókuinkachónkirá tí jehe ch'án éxí kjuakohará ch'án la ko chrókjuanchehérá Dios kjuasáya jnkochríxín.

Cristo tjanjon ijnko ntia nixin

8 Chrókuitoéhyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhi. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

9 Kaínxín kjuachaxin chóna Dios mé chóna Cristo kjónté k'óna ch'án chojni. 10 La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuenhen ch'án kaín nkehe síin la ko t'etuenhen ch'án kaín nchakuen t'etoan. 11 Kjaxin tió kjuankixinrá tinkachónkirá Cristo ntá jehe ch'án kjuanjon ch'án jnko xroye k'uayéhérá kjánchó jehya tí xroye kuènte tí cuerpo. Náhi. Kjuakjiiin ch'án tí jie k'uékóxrjínhanrá la kjuíntakaará ch'án, mé tíha mé tí xroye kjuanjon Cristo. 12 Tí kuíkiterá jahará mé xikaha éxí xravákoará Cristo. Ntá ó xechón tí jehe ch'án la kjaxinrá xechónrá

kixin ó kuítekáonrá tí kjuachaxin kuènte Dios kixin Cristo la ó xechón ch'án ínaá. ¹³ Jahará ósé la éxí tsík'en asánrá k'uék'ejorá kixin tí jië k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxí xechónrá kixin Cristo kjuatsen tí jië chontará. ¹⁴ Mé Dios kjuatsen ch'án kaín tí nkehe tsík'etōan ch'án ósé kjuachahyani nchexiteyáni la ko kjuatsen ch'án kaín tí jië k'uéchóntani kixin Cristo kjuák'enkáni ch'án tí ntacruz la xikaha kjuatsenxin ch'án tíha. ¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchónta tí nchakuen jínahya kixin jehe ch'án kjuínchesuèhe ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe síin nkaya nkajní

¹⁶ Méxra ninkexró chrókjontahyará kixin tí nkehe chrókjónterá o tí nkehe chrók'uirá o á tjíkosáyehérá tí yaon kia o tí nitjó nixin o tí yaon t'ok'éheni. ¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. ¹⁸ Méxra chrókuítóéhyará kixin ninkexró chróntáchro sín kixin ts'itjáyánrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchrién sín t'ikonxín sín la nchehnke sín kixin tí nkehe t'axrjeníxin kja sín ó. ¹⁹ A ntá jehe sín la chaxínhya tinkáchónki sín Cristo kixin jehe ch'án mé tí kja t'etuenhen kaín ni la jehe ch'án mé ch'éna ch'án jnkokoá cuerpo kuènte ch'án kaín ni la nchek'ánkí ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

²⁰ A ntá jahará la ó k'uénkoará Cristo la kuitohérá tí nkehe k'uék'etōan kuènte chjasintajni ó. ¿A ntá nkekuènté naxa tjejorá éxí tí chojni síin chjasintajni chrókjuínchexiteyará tí nkehe t'etōan sín? ²¹ Mé xikaha t'etōan sín kixin jahará chrótsehyará tíha la chrókjontehyará tí nkehe la chrókuákjáhýará nkehe. ²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjeníxin ikja chojni ó. ²³ Chaxín kixin jehe sín ntáchro sín kixin jína xikaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpōé sín, kjánchó kaín tí nkehe ch'e sín xikaha la chónkó kixin tjinkítsahya kixin chrókuítóhe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxra chrókjuéyará tí nkehe síin nkaya nkajní kixin Cristo la ntiha tjetjaxín ch'án tí tja chjina Dios. ² Chrókjuenkayáxinrá tí nkehe síin nkaya nkajní. Chrókjuenkayáxinhyará tí nkehe síin chjasintajni. ³ Kixin jahará la ó ik'uenrá la ntá ijie la Cristo la ko Dios chónthehe tí kjuachón kuéntará. ⁴ Jehe Cristo mé chontaxínrá kjuachón jahará la tió tsokjan tí jehe ch'án ntá kjaxinrá ts'ejókoará ch'án ntá ts'íkonrá tí kjuachaxin jié kuènte ch'án.

Tí ntia ntaxin la ko tí ntia nixin

⁵ A ntá chrókuítóhérá kaín tí jië tjenkayáxinrá chjasintajni. Ninkexró chrókjuasinko jië chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kjaxin chrókóxrjienhya sín chróchónta sín itsjé nkehe kixin tíha mé yóhe tí chrórxaxinkaon sín tí nkehe tsíkjanoya. ⁶ Méxra tí nkexro titekakonhya tí nkehe t'etōan Dios la tsonínkakonhen Dios tí jehe sín la sinchekjasóte sín ch'án. ⁷ Mé xikaha k'uékjich'erá jahará tí ósé. ⁸ Méxra ijie chrókuítóhérá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kíchuará la ko tí nkehe jínahya t'axrjexín ir'vará. ⁹ Chrókjuich'iyéhyará kíchuará kixin ósé xikaha k'uékjich'erá a ntá jie la ó chrókuítóhérá kaín tí nkehe ntaxin k'uékjich'erá. ¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxí tí jehe ch'án kixin jehe ch'án kjuíchéna ch'án tí jahará. Mé xikaha chrókjuixraká chróchoxínrá tí jehe ch'án jína. ¹¹ Jehya tjetōan á chojni judío o náhi o á chojni tsíka xroye o náhi o á chojni

tsíkji_xin kjín o náhí o á chojni noehya o á chojni ch'exón xra o á chojni t'etoan. Tí nkehe tjetoan la tinkáchónkini Cristo la jehó ch'án t'etuēnhen kaín nkehe.

¹² Dios la tjuèhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókui_{konó}ehérá kichuárá la jína chrók'uejorá la ko chrókju_{inchehn}kehýará la ko chrókó_{jia}hýará la ko chrókóninkákonhýará.

¹³ Chrókóninkákuénhýará kichuárá la chrók'uitjáyanhanrá ichrén jiē kjuasinhanrá í jnko chojni kixin Cristo la k'uitjáyenhen ch'án tí jiē kjuásinrá la kjaxin jahará la xikaha chrókju_{ich}'erá. ¹⁴ Mé xikaha chrótjuèhé_{rá} kichuárá la jnkokoá chrókjuen_{kayá}xinrá.

¹⁵ Tí kjuaxróxin kuēnte Cristo mé chrók'ue_{tuen}hen asánrá kixin xikaha kjuenkayáxin Dios k'uíyahará ch'án kixin chrók'ónará jnkokoá cuerpo kuēnte ch'án mé xikaha chrókjuancheherá ch'án kjuasáya.

¹⁶ Tí tan kuēnte Cristo jnkochrín_{in} chróchónta asánrá. Mé xikaha chrókjuá_{kohé}rá kichuárá la chrókju_{inchech}éhérá kichuárá kaín kjuaxrexinkaon jína. Chrótsjerá salmo la ko himno la ko canto kuēnte Dios la chrókjuancheherá Dios kjuasáya kaín asánrá.

¹⁷ Kaín xra chrókju_{ich}'erá la ko tí nkehe chróntáchrórá la kaín táha chrókjuanchaxín_{rá} ihnié Ìnchéni Jesús la chrókjuancheherá kjuasáya It'éni Dios kjuachaxi_{én} Jesucristo.

Jnkojína chrók'uejóko kichó tí sín tinkáchónki Cristo

¹⁸ Jahará chojni chjin la chrókju_{inche}xiteyéhérá tí xiyará kixin mé t'ichján_{xin} xikaha chrókju_{ich}'erá kixin tinkachónkirá Ìnchéni. ¹⁹ Jahará chojni ntoa la chrótjuèhé_{rá} tí ichjián_{rá} la chrókóninkákuénhýará tí jehe tjan. ²⁰ Jahará chánjanrá la chrókju_{inche}xiteyéhérá it'ará la ko inará kaín nkehe chrók'ue_{toan} sín kixin xikaha mé tóxrjín_{hin} Ìnchéni. ²¹ Jahará it'é xjan la chrókju_{inche}kónínkakonhýará tí xjaanrá kixin tí xikaha la chrókju_{inche}k'ávahýará tí jehe xjan. ²² Jahará chojni ch'exón xra chrókju_{inche}xiteyéhérá tí lámóará ntihi chjasintajni. Jehya kixin tí tjejótsjehe sín ó chrókju_{ich}'erá xra kixin ntá jína chrók'uejoxín_{rá}. Náhi. Kaín asánrá chrókju_{ich}'erá xra kixin ó nohará kixin xikaha ch'eherá Ìnchéni xra. ²³ Kaín nkehe chrókju_{ich}'erá la kaín asánrá chrókju_{ich}'erá xra éxi chrókju_{ich}'eherá xra Ìnchéni la jehya kixin éxi chojni ó chrókju_{ich}'eherá xra. ²⁴ Ó nohará kixin Ìnchéni la sintak_{iton}hanrá tí nkehe chón_{ta} ch'án kixin jahará ch'eherá Cristo xra la jehe ch'án mé chaxín Ìnchéni. ²⁵ A ntá tí sín ch'e tí jínahya tsjacha sín tí nkehe jínahya kjuí_{ch}'e sín kixin Dios la tikonó_{ehya} ninke_{xro} ch'e tí nkehe jínahya.

4

¹ Méxra jahará lámorá la jína chrónixjehérá tí sín t'ahará xra. Chró_{xr}áxinkáonrá kixin kjaxinrá jahará chontará ijnko Dios tjen nkaya nkajni.

² Chrókui_{to}éhýará nixjehérá Dios la ko chrókjuancheherá ch'án kjuasáya. ³ Kjaxin tjancheherá ch'án tsjink_{itsa} tí jeheni kixin tsjanjon Ìnchéni kjuachaxin chróku_{inhin} chojni tsochrónkaxí_{nni} tí itén Cristo. Tí xra k'uénoehya ninke_{xro} mé tje_{chjin}axián jie.

⁴ Tsjancheherá Dios kixin tsjink_{itsa} ch'án tí janhan kixin chrók_{ian}xian jína chrókju_{akua} éxi tjinkaon Dios.

⁵ A ntá jahará la jína chrókjuá_{kohé}rá itén Dios tí sín naxa tinkáchónkihya Ìnchéni kixin kánhyó tiempo siín kixin tsjàkorá. ⁶ Chrónixjehérá sín jnkojína kixin chrókó_{xrjín}hin sín la chrókónohará chrókju_{áte}herá nkexrí tsixro jnkojnko chojni.

Kjuixin nixja ch'ín Pablo

⁷ Kichóni Tíquico, mé ijnko nkexro jína tjink_{itsa} tí janhan ch'ehe Ìnchéni xra, mé tsjiji ch'án tsochrónka ch'án nkexrí tjén janhan. ⁸ Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókó_{chá}hará. ⁹ Jehe ch'án la ko kjaxin ch'ín Onésimo mé tjuèheni kichó ni la ko jehe ch'án mé kjaxin jína ch'e ch'án xra, la mé

tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sítónhen tí tjejóni ntihi.

¹⁰ Ch'ín Aristarco mé jnkokoá tjechjinakian ch'án ntoechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína. ¹¹ Kjaxin nixjahará ch'ín Jesús, kjaxin tikitexín sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xra tjet'a la chrónkaxín sín nkehe kuènte tí kjuachaxin kuènte Dios. La tí sín a mé imá kjuínchechána sín tí janhan. ¹² Ch'ín Epafra nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánrá. Jehe ch'án jnkochrín chrónóehé ch'án Dios tjinkaon ch'án kixin kaín asánrá chrókuinkachónkirá Dios éxí tjinkaon ch'án. ¹³ Ó nòna kixin ch'ín Epafra la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis. ¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kichó ni tjejó chjasin Laodicea la kjaxin nixjehérá tjan Ninfas la ko tí sín tójkotsé ntøe tjan. ¹⁶ Tió tsjixin sinchekuáxinrá tí xroon tsíkijji tí tjejorá ntiha la ichr'anrá xroon sátsji sinchekuáxin tí sín tjejó ninko chjasin Laodicea la ko kjaxin sinchekuáxinrá tí xroon tsíkijjihi tí jehe sín tió tsjiji tí xroon tí tjejorá. ¹⁷ Kjaxin chenkará ch'ín Arquipo kixin chrókuinchexiteyá ch'án jína tí xra tsíkjanjon Inchéni sich'e ch'án.

¹⁸ Janhan Pablo tjaná kjinxian tí palabra nixjahará. Jahará chróxráxinkáonrá kixin janhan la tjechjina la Dios mé chrókjuintayaonrá. Amén. Ó tjen.

Xroon saoxín ikjin ch'ín Pablo chr'énnen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni ninko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. Kjuasáyé It'éni Dios la ko Ìchéni chrók'uejorá.

Tí sín ókjé chjasin mé kjuíncheyóhe sín tí sín Tesalónica

² Jnkoyaxón chjéheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkitsa ch'án tí jahará. ³ Tió nixjeheeni It'éni Dios xraxinkaonni kixin kaín asánrá kuítekáonrá Ìnchéni, a ntá tjejoch'era xra la ko imá tjuèhéra kichuára ntá jnkokoá tjejochonhénra tsokjan Ìnchéni Jesucristo. ⁴ Kichóni jahará, imá tjuahará Dios la ó noheni kixin jehe ch'án tsíkjeýará ch'án tí jahará. ⁵ Na mé xikaha tió kjuíjini chjasánra kjuakoharáni tí tan jina nixin tsaáxinni chrónkani na jehya iténni ó. Náhí. Kjaxin kjuachaxién Nchakuen Dios kjuakoxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jina kixin nkexrí k'uejóni tí tjejorá kixin xikaha chrók'uejorá chrókjuakoxinra.

⁶ Mé xikaha kjuíncheyóhéra tí jeheni la ko kjuíncheyóhéra tí Ìnchéni Jesucristo. A ntá tió kuínhínra tí itén Dios ntá kaín asánra kuinkachónkirá Ìnchéni la ko kócháhará kixin tí Nchakuen Dios mé t'etuenhen asánra kjónté nchónhya nkehe k'uatsínkará. ⁷ Mé xikaha kjuákuexinra kaín tí sín tinkáchónki Ìnchéni ntiha estado Macedonia la ko tí sín estado Acaya. ⁸ Jahará kjuakoxinra tí itén Dios la jehya jehó estado Macedonia la ko tí estado Acaya kjuakoxinra. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya í jnko nkehe naxa chróchronkani, ⁹ kixin ijie jehe sín mé tjejóchronka sín kixin nkexrí kjuíjini chjasánra a ntá kaín rá kjuánjonra kjuachaxin k'uejóni la ko kuítekáonra tí itén Dios kjuakoharáni la ntá kuítóhéra kaín tí nkehe tsíkjanoya kixin ntá kjuankixinra kuinkachónkirá Dios tjechón chaxín. ¹⁰ La ko kjaxin tjejóchronka sín kixin jahará tjejochonhénra tsokjanxin nkaya nkajni tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasótexínhyani tí nkehe jínahya chrókjuasótexínni itsi.

2

Tí xra tsíkjih'e ch'ín Pablo tí chjasin Tesalónica

¹ Kónohará kaín rá kichó ni kixin jehya chónkó kjuíjini chjasánra. ² Ó kónohará kixin senó tí sín chjasin Filipos k'uekjinchekjasóteni sín la ko k'uek'ántaxínhinni sín. Kjánchó Dios mé kjuínkitsa ntá chrakonhyani kjuakoharáni tí tan tsaáxinni kuénte Dios kjónté imá k'uenínkakonhenni sín. ³ Kónohará kixin jehya ntoáhya kjuakoharáni la ko jehya ijnko nkehe náxrjónhya kjuakoni la ko kjuít'ayahyaráni ninkehó. ⁴ Náhí. Dios mé kjueya ch'án tí jeheni kixin chrókjuakoni tí tan tsaáxinni, mé xikaha ntoá tjakoni. Jehya kixin chojni ó nchechéheni. Náhí. Nchechéheni Dios tí nkexro nohe nkehe tónhen asénni. ⁵ Ó nohará kixin kjuích'iyaxínhyani itan imá náxrjón kixin xikaha chrókuakitsjexínni chichaon chrókjuachani. Náhí. Dios la ó nohe ch'án kixin xikahya kjuích'eni. ⁶ Tjeyáhyani kixin chojni chrókjuikosáyeheni sín la á jahará la o í so chojni. Náhí, xikahya ch'eni, kjónté chóntani kjuachaxin chrók'uetuanhanráni kixin chrókjuánjonra nkehe chrók'uáyéheni kixin jeheni ch'eheni xra Cristo. ⁷ Jnkójina k'uenixjaharáni k'uek'ejóni. Éxí yóhe ijnko

iné xjan t'àyakonhen xjeen kixin ts'ánki xjan mé xikaha jeheni k'uàyakonhanráni tí jahará. ⁸ Imá tjuàhará ntá jehya jehó tí itén Dios chrókjuakoharáni. Náhi. Kjonté chrók'uenxinni tí tjakoharáni kixin xikaha imá tjuàhará. ⁹ Kichóni, chrórxaxinkáonrá kixin tió k'uejóni chjasánrá la mé nchónhya xra kjuích'eni nchakotjin la ko tie ntá kjuachani chichaon k'uenaxinni nkehe sineni kixin tjinkakonhyani kixin chrótjáharáni xra chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kixin chaxín jína k'uejókoaráni jahará chojni tinkáchónki Ìnchéni. Nijnko nkexro ts'ekahyani jie kixin ichrén nkehe jínahya chrókjuich'eni. ¹¹ Jahará ó nohará kixin kjuakoharáni la ko kjuínchechéheni tí jahará jnkojnkorá éxi ch'e ijnko it'é xjan tjuèhe xjeen ch'án. ¹² La ko k'uetuanhanráni kixin jína chrók'uejorá éxi tjinkaon Dios chrók'uejó tí sín tinkáchónki ch'án kixin jehe ch'án ó k'uíyahará ch'án kixin chrók'uayéhérá tí kjuachaxin kuènte ch'án.

¹³ Méxra jnkochrín tjancheheni Dios kjuasáya kixin tió kuínhínrá tí tan jína kuènte ch'án kjuakoharáni na ntá kjuátsoanrá kixin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxítóxin ntjará. ¹⁴ Mé xikaha jahará kichó ni kjuasótiará kónínkakonhanrá tí sín chjasánrá éxi yóhe kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankixin kuinkáchónki sín Ìnchéni ntá tí sín judío chjasén sín mé kjuankixin sín kónínkakonhen sín chrók'óyán sín. ¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuích'e sín la kónínkakonhen sín kaín chojni. A ntá Dios la kóxrjénhya ch'án kixin xikaha kjuích'e sín. ¹⁶ A ntá tjinkaonni kixin chrókjuakoheni tí sín jehya judío tí tan jína chrókuaáxin sín a ntá tí sín judío tjinkakonhya sín chrókjuakoni. Na mé xikaha imá nchek'ánki sín tí jie kuènte sín. A ntá xikaha kjuích'e sín ntá Dios sinchekjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kichóni, tió kuítóheni tí jahará a ntá kjonté ókjé k'uejóni la k'uérxaxinkaonni kaín asénni tí jahará la ko imá tjinkaonni chrókjuijitsjeheni tí jahará inaá. ¹⁸ Na mé xikaha janhan Pablo itsjé veces mé tjinkavan chrókjuasántsahá tí jahará, a ntá tí ch'ín Tsochren mé k'uínkakónna ntá xitjahya tsjasán. ¹⁹ ¿Nkehe tsohnen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochèxinni tió tsi Ìnchéni Jesucristo kixin kuítekáonrá ch'án. ²⁰ Méxra jahará mé kóchéxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójína jehóni chrókuítóheni chjasin Atenas ² na ntá ichr'ánni tí kichó ni Timoteo a tsjijitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén Ìnchéni la ko sinchechéhe ch'án asánrá ³ kixin tsoxrjéhya asánrá má kixin tí kjuaxróxinhya tjejot'atsínkará. Kixin xikaha ó nohará kixin t'ichjánxin tsjasótéxinni tí xra kuènte Ìnchéni. ⁴ Naxa k'uejóni jnkokoá ntiha la ó tjonkará kixin kaín ni kjuaxróxinhya tsohneni tsjasóteni. A ntá jie la ó nohará kixin chaxín xikaha kónhen. ⁵ Méxra imá kóxakonna ntá ichr'an kichó ni Timoteo kjuijitsjehe ch'án nkexrí tjejorá, á naxa tinkachónkirá Ìnchéni o ách'e ch'ín Tsochren chrókjuachroerá chrókuítóhérá tí ntje Ìnchéni a ntá chrókóchónkó kaín tí xra kjuich'eni kjuakoharáni.

⁶ Na ntá ó kjanxin ch'ín Timoteo chjasánrá Tesalónica chrónka ch'án kixin jína tjejorá naxa tinkachónkirá Ìnchéni, la ko naxa tjejorá tjuéhérá kichuárá la ko chrónka ch'án kixin xraxinkáonrá tí jeheni tjinkáonrá chrókjuijitsjeheni tí jahará. Kjaxin jeheni xikaha tjinkaonni chrók'uikonni tí jahará. ⁷ Mé xikaha kichó ni tjejót'atsínkani kjuaxróxinhya ntihi na ntá kjonté kóchéhe asénni kuínhinni kixin kaín asánrá naxa tinkachónkirá Ìnchéni.

⁸ A ntá kuínhinni xíkaha kixin jína tjejorá naxa tinkachónkirá Ìnchéni Jesús a ntá antsí kóchéheni. ⁹ Ntá imá tsjancheheni Dios kjuasáya kixin xíkaha imá chéhe asénni kixin tí jahará tinkachónkirá ch'án. ¹⁰ Tie la ko nchakotjin chronóeheni Dios kixin tsjanjon ch'án kjuachaxin tsjijitsjeheni tí jahará inaá kixin naxa t'itjáyan iso nkehe chrókjuakoharáni naxa chrók'uitjára nkexrí jína chrókuinkachónkirá Ìnchéni.

¹¹ Tjejótjancheheni T'eni Dios la ko Ìnchéni Jesucristo kixin chrókjuinkitsani ch'án chrókjuijitsjeheni tí jahará ¹² la ko tjancheheni Ìnchéni kixin chrókjuinkitsa ch'án tí jahará kixin antsí má chrótjuèhéra kichuára la ko chrótjuèhéra kaín xín chojni éxí yóhe tjuàhará. ¹³ Tjancheheni ch'án kixin sintaxraxinkaonrá ch'án kixin kaín asánrá chrókuitekáonrá ch'án kixin ntá tsochóntahya asánrá ninkehó jie nkayakon It'eni Dios tió tsokjan Ìnchéni Jesús tsikao ch'án kaín tí sín ó tsíkótjóá.

4

Nkexrí tóxrjínhìn Dios chrók'uejóni

¹ Jahará kichó ni chronóaharáni la ko ntaxraxinkaonráni tí kjuachaxin ihnié Ìnchéni Jesús kixin jína chrók'uejorá tinkachónkirá Ìnchéni éxí tjejoch'erá jie kixin éxí kjuakoharáni. Mé xíkaha jína sinchechéhéra Dios.

² Ó nohará tí nkehe kjuakuaxinráni kjuachaxin kuènte Ìnchéni Jesús. ³ Tí nkehe tjinkaon Dios kixin jína tjóá chrók'uejorá la ko chrókjuásinkoahyará jie í jnko chojni chjin ókjé. ⁴ Jnkojnkorá chrókónohará chróchontará jnkojnko ichjiánrá la ko jína chrók'uejorá chrótjuèhéra kichuára. ⁵ Jehya kixin chrókjuakéra asánrá tí nkehe jínahya chrókjuich'erá éxí ch'e tí chojni chónhya Dios. ⁶ Nijnkorá chrókjuich'iyehéra ichjién kichuára xíkaha kixin Ìnchéni mé imá sinchekjasóte ch'án tí chojni xíkaha sich'e mé xíkaha kjuíntaxraxinkaonráni senó. ⁷ Dios mé k'uíyeheni ch'án kixin jína chrók'uejóni, jehya kixin naxa chrókjuasinni jie. ⁸ A ntá tí sín chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhí. Chóntehya sín kjuasáyé Dios, tí nkexro kjuanjon tí Nchakuen chóntani.

⁹ A ntá tí tjuèhéra kichuára la í t'ichjánxinhya naxa chrókjinni tsochronkani kixin nkexrí chrótjuèhéra kichuára kixin jehe Dios mé tjetjakohará ch'án nkexrí chrótjuèhéra kichuára. ¹⁰ Xráxín xíkaha tjejoch'erá tjuèhéra kaín tí sín kichó ni tjejó estado Macedonia. Kjánchó chronóaharáni kichó ni kixin antsí má chrótjuèhéra kichuára. ¹¹ Tóxakonhanrá kixin kjuaxróxin chrók'uejorá. Jnkojnkorá nohará nketí xra chrókjuich'exínrá tjára éxí k'uetuanhanráni. ¹² Na mé xíkaha chrók'uikon tí sín chónhya Dios ntá chróchóntahará sín kjuasáya la ko chrók'uitjáyanhya ninkehó nkehe chrókuicháxinhanrá.

Itsi Ìnchéni Jesús

¹³ Kichóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankàmara sín chrókóyóahyará tí sín tinkáchónkihya sín Ìnchéni naxa chóenhya sín kixin chróxechón sín inaá. ¹⁴ Kuítekaonni kixin ik'uén Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani tí jahará tí nkehe kjuako Ìnchéni kixin tí naxa tjejóchónni tió tsi ch'án na kjónté naxa tsitónxinhanyi ntia, naxa tsochónhenni tí sín tsík'en. ¹⁶ Jehe Ìnchéni mé ts'inkajinxin ch'án nkaya nkajní la ko itsen tsonixja ch'án kixin tí kjuachaxin jie kuènte ch'án la ko ts'èya tí ángel t'etoan la ko tsontáchro tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. ¹⁷ A ntá chr'éxin kaín xínni tjejóchónni la ko kaín xín tí sín tsíxechón mé jnkokoa tsochrinni kixin tí kjuachaxin jie kuènte Ìnchéni. A ntá xrikjan tjuí tsoxetani ch'án. Mé xíkaha ts'ejókoni ch'án jnkochrín.

18 Méxra xikaha chrókjuinchechéxínrá kichuárá tí tan i kixin xikaha tsonhen tió tsokjan Ìnchéni.

5

1 A ntá tí yaon tsonhen tíhi kichó ni t'ichjánxinhya naxa tsokjinni í jnko nkehe tsinhínra. 2 Jahará ó nohará jína kixin titàya itsi tí yaon tsokjan Ìnchéni éxí yóhe chrókui ijnko xichee tí tie a. 3 Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrínahya titàya itsi tí kjuaxikaon jié la ko kjuachrakon mé ts'itjáyanxín tí kjuachón chróchónta sín éxí yóhe ijnko tjan tjejá xrínahya titàya tsjankíxin ts'óntáki tjan kixin sinchekokjíhi tjan xjeen tjan na mé jehe tjan xitjahya tsontácho tjan “Náhi”, mé xikaha jehe sín chóntahya sín nkerí tsaáxin sín. 4 Ntá jahará kichó ni sítiéhya tjejorá ntá chróchrakonhyará tí yaon itsi Ìnchéni. Tí náhi chróchrakonrá éxí chrókui ijnko xichee chrókjuintachrakonrá. 5 Ntá jie kaín rá mé tjejorá tí ntia t'inkáséyan. Jeheni la jehya tjejóni tí ntia sítié a. 6 Méxra xikaha chrók'uejójuahyani éxí tjejójua tí sín í so na mé chrók'uejótsjeheni chrókjuenkayáxinni jína. 7 A ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a. 8 A ntá jeheni na tjejóni tí ntia t'inkáséyan t'ichjánxín kixin jína chrók'uejóni chrókjuasinhyani jie. Chrókuinkáchónkini Ìnchéni la ko chrótjuèheni ch'án. Ntá jeheni na Ìnchéni ts'ayakonhenni ch'án tsaáxinni ch'án éxí tí ch'ín soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejóchónhenni itsi Ìnchéni tsaáxinni ch'án na mé éxí tí ch'ín soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án. 9 Kjueyáhya Dios tí jeheni kixin chrókjuinchekjásóteni ch'án. Náhi. Kjueyá ch'án tí jeheni kixin chrókuáxinni Ìnchéni Jesucristo. 10 Jehe Jesucristo mé k'uenyákonhenni ch'án kixin chrók'uejókoni ch'án jnkochrín kjónté naxa tjejóchónni o kjónté ó tsík'enni tió tsokjan ch'án. 11 Méxra xikaha chrókjuinchechéhéra kichuárá la ko chrókjuínkítsará kichuárá kixin jína chrók'uejó sín éxí xráxín tjejoch'erá.

Ch'ín Pablo mé nchexraxinkaon ch'án tí sín tinkáchónki Cristo

12 Kichóni chronoàharáni kixin chróchontehérá kjuasáyé tí sín tjejóch'e sín xra kuènte Dios ntiha tjejótjitaón sín ntia chrónka sín itén Ìnchéni. 13 Na mé chróchontehérá sín kjuasáya la ko chrótjuèhéra sín má kixin tí xra tjejóch'e sín. A ntá jahará kaín rá jnkojína chrók'uejokoará kichuárá.

14 Méxra tétuanhanráni kichó ni kixin chrókjuéntuéhérá tí sín tjinkakonhya sich'e sín xra la ko chrókjuinchechéhéra asén tí sín kóxrjé asén sín la ko chrókjuínkítsará tí sín naxa noehya sín jína la ko chrókóninkákuénhyará ninkexró.

15 Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejotjenkayáxinrá.

16 Méxra nchechéhéra asánrá jnkochrín. 17 Chrókuítóéhyará chrónixjehérá Dios jnkochrín. 18 Kjónté ichrén nkehe chrókónhanrá la chróchjehérá Dios kjuasáya kixin xikaha mé tjinkaon ch'án chrókjuákoxinrá kixin tinkáchónkirá Ìnchéni Cristo Jesús.

19 T'ók'ankahyará tí xrohi t'inkáséyanxín Nchakuen Dios. 20 Chontehérá kjuasáyé nkehe tjako tí sín kichó ni chronkaxín sín kjuachaxin kuènte Nchakuen Dios. 21 Chrótsjehérá jína tí nkehe tjejóch'e sín. A ntá tí jína na chrókuítekáonrá. 22 Chrókuítóhéra kaín xín nkehe jínahya.

23 Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'ayakonhen ch'án nchakuanrá la ko asánrá la ko cuerpo kuéntará kixin tsochóntahya ninkehó jie tió tsi Ìnchéni Jesucristo. 24 Dios tí nkexro kjueyá tí jahará mé jína ch'án la ko kaín tí nkehe ntácho ch'án la tsoxiteyá.

Ch'ín Pablo kjuixixín nixjehē ch'án sín la ko tjanchehe ch'án Dios kixin chrókuincheyaoon tí jehe sín

²⁵ Kíchóni chrónóehérá Dios kixin tsjinkitsani ch'án kaín ni.

²⁶ La ko nixjehérá kaín xín tí sín kichó ni ntiha tsehérá tja sín.

²⁷ T'etoxáninni tí kjuachaxin kuènte Ìnchéni kixin nchekuáxinrá tí xroon chr'anhánrá tsinhin kaín xín tí sín kichó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'in Silvano la ko ch'ín Timoteo ikjinni tí xroon i chr'anhánrá kíchó ni ninko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. ² Kjuasáyé It'éni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoexín ch'án tí ijíé chojni tió tsokjan Ìnchéni Cristo

³ Kíchóni chrókjuancheheni Dios kjuasáya jnkochrín kixin tí jahará. Na mé jína xikaha chrókjuich'eni kixin tinkák'ánki tí tinkachónkirá Ìnchéni Jesús la ko tinkák'ánki tí tjuèhéra kichuárá tjejorá ntiha. ⁴ Ntá chéheni chenkaní tí sín kíchó ni kaín tí ninko Dios kixin naxa tjákoxinrá kixin naxa tinkachónkirá Ìnchéni kjónté síin chojni nínkakonhanrá la ko kjónté t'atsínkará itsjé kjuaxróxinha. ⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xikaha tjejtjasótexínrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie. ⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajní tsikao ch'án kaín tí sín ángel t'etoan kuènte ch'án na mé tsikao ch'án xrohi nene. ⁸ Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína kuènte Ìnchéni Jesucristo chrókuaáxin sín. ⁹ A ntá tí sín kuítekakonhya mé tsjasóte sín jnkochrín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etoanxín ch'án. ¹⁰ Xikaha tsonhen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuènte ch'án. Mé xikaha kjaxinrá jahará kixin ó kuítekáonrá tí nkehe kjuakoharáni.

¹¹ Mé xikaha jnkochrín tjancheheni Dios kixin jína chrók'uejorá éxí tjinkaon ch'án chrók'uéjó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkitsará ch'án kixin chrókjuachará ch'erá kaín tí xra jína tjinkáonrá chrókjuich'erá kixin tinkachónkirá ch'án. ¹² Mé xikaha kaín xínrá tsjikosáyehérá tí ihnié Ìnchéni Jesucristo la ko jehe ch'án mé kjaxin tsjikosáyahará ch'án kixin tinkachónkirá ch'án. Mé xikaha kjuasáyé Dios la ko Ìnchéni Jesucristo kixin kuikonóeheni ch'án.

2

Tsonoxín ijnko ch'ín jínahya

¹ Kíchóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni ² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkojín nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxí jeheni tsikjanjonni chrónka kixin xikaha tsonhen. ³ Títóéhyará kixin jnkojín nkexro chrókjuít'ayahará xikaha. Naxa tsihya tí yaon ntá senó itsjé chojni tsonínkakohen sín Dios, la ko tsonoxín ijnko ch'ín jínahya chóna jie, na ntá tíha mé tsjasóte jnkochrín. ⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxin ch'án nkaxenhen tí ninko Dios kixin jehe ch'án mé sich'éna asén ch'án éxí Dios tí jehe ch'án.

⁵ ¿Á xráxinkákonhyará kixin xikaha k'uexrjanka senó tí naxa k'uejóni jnkokoá? ⁶ Ntá jahará ó nohará nkehe tí kjuachaxin naxa chónthehe kixin naxa tjexrakáhya tí yaon tsonoxín tí ch'ín jínahya. ⁷ Ntá jie imó ch'e xra tí kjuachaxin jínahya. Kjónté naxa t'itjayan kixin sáchrókjuí tí nkexro chónthehe. ⁸ A ntá tí ch'ín jínahya tsonoxín ch'án. Ntá tió tsi Ìnchéni Jesús ntá tí itén ch'án ts'axrjexín ir'va ch'án ó mé ts'enxín tí jínahya a kixin mé xikaha sinchek'itjayanxín ch'án tí jínahya tí kjuachaxin jie tsikao ch'án. ⁹ Méxra tí ch'ín jínahya mé tsikao ch'án tí kjuachaxin kuènte ch'ín Tsochren la mé xikaha tsochóna ch'án kjuachaxin jie tsjakoxin ch'án sich'iyaxín ch'án tsjasin ch'án kjuaxroan ntoáhya. ¹⁰ Mé xikaha kaín nkehe jínahya sich'iyexín ch'án tí sín xráxín ts'itjayan sín kixin chrohya sín chrókuitekaon sín tí tan chaxín ntoá chrókuaáxin sín. ¹¹ Méxra tsítóhe Dios tí jehe sín kixin tsitekaon sín kaín nkehe chaxínhya ¹² kixin ntá tsjasóte kaín tí sín kuítekakonhya sín tí tan chaxín chrókuaáxin sín na mé antsí kóxrjínhin sín chrókjuasín sin jie tsjasótexín sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsíkjeýá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuítekaonrá. ¹⁴ Méxra xikaha k'uíyahará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jie kuènte Ìnchéni Jesucristo.

¹⁵ Mé xikaha kichó ni, jína chrók'uejorá chrók'uitjayanhyará tí nkehe kjuakoharáni tió k'uejóni jnkokoá la ko tí nkehe chrónka tí xroon ikjinni k'uayéhérá. ¹⁶ Ntá Ìnchéni Jesucristo la ko It'éni Dios na mé tí nkexro kjuasáyé ch'án tjuèhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni ¹⁷ na mé sinchechéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kixin tsjinkitsa kaín ni

¹ Méxra kjuixixín chrónóaharáni kichó ni kixin chrókjuancheherá Dios kixin chrókjuinkitsa ch'án tí jeheni kixin tjoka sáchrókjuikjakoni itén Ìnchéni nkuíxín kixin ntá tsinhin chojni la tsjikosáyehe sín ch'án éxi yóhe kuítekaonrá jahará. ² Kjaxin nixjehérá Dios kixin chrókjuinkitsani ch'án kixin kohya nkehe chrókónhenni tí siín chojni jínahya nínkakonhenni kixin kénhya sín tinkáchónki Ìnchéni. ³ Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkitsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá. ⁴ Ó noheni kixin Ìnchéni la tsjinkitsa ch'án tí jahará kixin naxa sich'erá xra éxi k'uetuanhanráni. ⁵ Ìnchéni tsjinkitsará ch'án tsonohará kixin Dios la tjuahará ch'án la ko tsjinkitsará ch'án kixin chrókóninkákonhyará éxi kónínkakonhya Cristo.

T'ichjánxin chrókjuich'eni xra

⁶ Kichóni t'etōanxinni tí kjuachaxin ihnié Ìnchéni Jesucristo kixin chrók'uaxrjekjanxínrá tí sín kichó ni tjinkakonhya sich'e xra la ko xrihya sín éxi kjuakoharáni. ⁷ Ó nohará kixin nkexrí chrók'uejorá chrókjuákoxinrá éxi k'uejó tí jeheni kixin tí k'uejókoaráni la jehya kixin kjuích'ehyani xra. ⁸ Jehya kixin kjóneni niotjé jnkójín nkexro ntá chrókjuenkahyani. Náhí. Kóxakonhenni nchakotjin la ko tie kjuích'eni xra kixin ninkehó chóntiaxinhyani tí jahará kixin chrókjuánjonrá tí nkehe chrókjóneni. Náhí. ⁹ Kjónté chóntani kjuachaxin chrókjuanchaharáni kixin chrókjuínkitsará tí jeheni kjánchó jeheni na kjuích'eni xra kjuakoxinni kixin xikaha jahará chrókjuich'erá xra. ¹⁰ Kixin tí naxa k'uejóni jnkokoá ntiha k'uetōanni kixin: Tí nkexro tjinkakonhya ch'e xra la kjaxin

chrókjonehya. ¹¹ Ó kuínhinni kixin tjejorá jnkóijnrá ninkehó xra ch'ehyará a ntá kjuach'ia ó xríkoará. ¹² A ntá tí kjuachaxiën Ìnchéni Jesucristo t'etoanxínni la ko chrónóexinni tí sín a kixin chrókóninkakonhya sín chrókjuich'e sín xra kixin chrókjuacha sín chichaon chrók'uite tí nkehe chrókjone sín.

¹³ Ntá jahará kichó ni, chrókóxrjéhyará chrókjuich'erá tí nkehe jína. ¹⁴ A ntá tí tjen jnkóijn nkexro titekakonhya tí nkehe t'etoanxínni tí xroon i la tsjehérá jína nkexro tíha la ntá chrók'uitoahyará ch'án la ntá chrókósuèhe ch'án. ¹⁵ Kjánchó jehya kixin chrókjuánjonkoará ch'án. Náhí. Chrókjuinchexraxinkáonrá ch'án jnkóijna éxí ijnko chojni kichó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochrixin kjónté ichrén nkehe chrók'uatsínkará. Jehé ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxiän tí nkehe nixjahará. Mé xikaha chrókjuátsoanxínni tí letra kaín carta tsíkjian.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi. ² Ikjian tí xroon chr'anhan jaha Timoteo. T'íkuan éxí xjanna tí jaha kixin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókuikonóaha ch'án kixin kjuaxróxin tsjak'e jaha.

Chrókjuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxí xrjannóaha tió sákjuia estado Macedonia la mé jaha chrókuitoaha tí chjasin Éfeso la ntaha chrókuétuénhén iso tí sín ntiha kixin chrókjuakohya sín tí nkehe ntoáhya. ⁴ La ko chrókuétuénhén sín kixin chrókuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkitsahya kixin sinchexiteyéheni Dios kixin tinkáchónkini ch'án.

⁵ Tí nkehe tjinkaonni la chrótjuèheni kichó ni kaín ni kixin ó kótjóá asénni la ko ó noheni kixin jina tjenkayáxinni la ko kaín asénni tinkáchónkini Cristo. ⁶ Iso sín la kjuíchròe sín kixin itjo tí nkehe chónkó. ⁷ Tjinkaon sín chrók'óna sín maestro chrókjuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jina tí chrokjuakoni éxí tjinkaon Dios. ⁹ Ó noheni kixin tí sín tjasinhya jie t'ichjánxienhya sín tí ley tsík'etoan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jie la ko tí sín chóntahya kjuasáyé Dios la ko tí sín t'óyán it'é la ko ìné sín la ko kaín tí sín tjàya. ¹⁰ La ko tí sín tjasinko jie ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakohen tí nkehe jina tjakoni. ¹¹ Tí nkehe tjakoni mé chaxín tí tan jina sinchekaá chojni la tí Dios tjetotan mé k'uetuanna kixin tsjàkua tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo kixin imá kjuínkitsana ch'án la ko k'uíkon ch'án kixin jina sít'aha ch'án xra ntá chjina ch'án tí xra i. ¹³ Mé xíkaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkíha sín la ko chrók'oyán sín. Kjónté la Dios imá kuikonóehé ch'án tí janhan kixin ó nohe ch'án kixin k'uékinkachónkihya janhan tí jehe ch'án la ko k'uénonahya nkehe tí xra k'uékjit'a. ¹⁴ Méxra Ìnchéni antsí má kjuíncheyaonna kixin ntá kjuanjon ch'án kjuachaxin kixin tsinkachónkia ch'án la ko tsotjuaha ch'án. Mé xíkaha kaín ni chóntani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ni chrókuitekaonni. Ikui Jesucristo chjasintajni kixin sinchekaá ch'án tí sín kjuasin jie. Ntá janhan mé antsí má kjuásian jie. ¹⁶ Kjónté xíkaha kjuít'a la Dios antsí má kuikonóana ch'án tí janhan kixin xíkaha kjuakoxin Jesucristo kixin kónínkakonyha ch'án. Mé xíkaha tsjákuaxian kaín nkexro tsitekaon tí jehe ch'án kixin tsochóna sín kjuachón jnkochrín. ¹⁷ Ntá jnkochrín tsochónteheni kjuasáyé tí Rey t'etoan. Jehe ch'án mé ijnko nkexro xráxín tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxí xjanna t'íkuan tí jaha, la kaín tí xra i tjaha kixin tsjanjonkoa tí jínahya la tsjacha kixin tinkachónkia jina Ìnchéni la ko tjenkayáxian tí nkehe jina. Mé xíkaha

sinchexiteyá tí nkehe kuínhín senó kixin tí sín kichó ni chrónkaxín ihñié Dios. ¹⁹ Í so sín la kjuenkayáxinhya sín tí jína ntá kjuíchròe sín kuítóhe sín tí nkehe tinkáchónki sín. ²⁰ Mé xikaha kónhen ch'ín Himeneo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xikaha ts'itja sín kixin í ts'ántaxienhya sín Dios.

2

Nkexrí chrónixjehe ni Dios

¹ A ntá saoxín la xrjanóaha kixin kaín chojni chrónixjehe sín Dios la chrókjuanchehe sín kjuasáyé ch'án kixin chrókjuinkitsa ch'án kaín xín chojni. ² Chrókjuanchia sín kixin Dios imá chrókjuinkitsa ch'án kaín tí sín t'etòan la ko tí sín gobierno kixin ntá kjuaxróxin ts'ejóni la ko sinchexiteyéhèni Dios la ko ntoá ts'ejóni. ³ Xikaha mé imá jína la tóxrjínhìn Dios, mé tí nkexro tsaáxinni. ⁴ Jehe ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsonohe chojni tí nkehe chaxín ntoá. ⁵ Mé itjen jnkokoáxón Dios la ko itjen jnkokoáxón nkexro nixjayákonhèni kixin tsochóxinni Dios. Tíha mé Jesucristo mé k'óna chojni ikui ch'án chjasintajni. ⁶ Jehe Jesucristo mé k'uenyákonhèni kaín xinni, kjuenkayákonhen ch'án ijíeni kixin tsaáxinni ch'án. Táha mé xiteyá tí tsintáchro Dios ósé kixin xikaha tsonhen ch'án. ⁷ Méxra tí xra mé kjueyána Dios kixin tsíjkákoha tí sín jehya judío kixin tsinkáchónki sín Jesucristo la ko tsonohe sín tí nkehe chaxín. Janhan mé tinkachónkia Cristo la xrjanka tí nkehe chaxín mé t'ayahya.

⁸ Méxra tjínkavan kixin kaín tí sín ntoa mé chrónixjehe sín Dios la chrókjuaya sín tja sín la chrókótjóá asén sín la ko chrókónínkakonyha sín la ko chrókjuéhya sín kjuanínkaon. ⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxihi sín nkehe tjete xroxrjo náxrjón la ko chrók'uitsahya sín ika imá tjete. ¹⁰ Íchá jína kixin tí chojni chjin chrókjuich'e sín tí xra jína éxi chrókjuich'e kaín tí sín tsíkjinchetjóá Dios. ¹¹ Tí chojni chjin t'ichjánxìn chrókuinhin sín itén Dios la chrónixjahya sín la ko chrók'uetòanhyha sín. ¹² A ntá janhan tjánjonhyha kjuachaxin kixin chojni chjin chrókjuako tí nchónhyha chojni sín la ko tjánjonhyha kjuachaxin chrók'uetuènen sín chojni ntoa. Jehe sín la tání sín chrók'uejó sín ¹³ kixin saoxín la Dios kjuích'éna ch'án tí ch'ín Adán la ntá chr'éxìn kjuích'éna ch'án tjan Eva. ¹⁴ A ntá ch'ín Adán la ninkexró kjuích'iyehya ch'án. Náhi. Tí tjachjin mé tsíkitekakonhen tjan tí nkexro tsíkjich'iyehè tjan ntá xikaha xrankíxixín k'uíxìn jje. ¹⁵ A ntá tí chojni chjin la kjónté xikaha kjuích'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejó tí sín t'etuènen tí nínko

¹ Ijnko nkehe chaxín tjonka. Tí nkexro tjinkaon sich'e xra kuènte nínko mé imá jína xra tjinkaon ch'án. ² Tí ch'ín chrók'uetòan mé ntoá chrókjuak'e ch'án kixin kohya nkexro chrók'ueka ch'án jje la ko kjaxin chróchónta ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchónta ch'án kjuasáyé ch'án la ko kjaxin jína chrónixjehe ch'án tí nkexro tjiji ntoe la ko kjaxin chrókónohe ch'án tí nkehe chrókjuako ch'án. ³ La ko kjaxin chrókókoanhyha ch'án la ko chrókjuéhya ch'án kjuanínkaon la ko kjaxin chrókóxrjienhyha ch'án kixin chrókjuacha ch'án nchónhyha chichaon. A ntá chrókójièhyha ch'án la ko kjuaxróxin chrókjuak'e ch'án la ko chrókóxrjienhyha ch'án chróchónta ch'án itsjé chichaon. ⁴ Jehe ch'án mé kjaxin jína chrók'uetuènen ch'án tí sín tjejó ntoe ch'án la ko chrókjuentuèhe ch'án xjeen ch'án kixin tsitekaon xjan la tsjikosáyehe xjan it'é xjan. ⁵ Tí tsjachahya ch'án ts'etuènen ch'án tí sín tjejó ntoe ch'án la ¿ntá nkexrí chrók'uetòan ch'án tí nínko kuènte Dios? ⁶ Íchá jína

kíxin jehya ijnko nkexro na ntá k'uíxehen chrókjuako kíxin tí nkexro na ntá k'uíxehen la imá chrókjuinchehnke ch'án la ntá chrókjuasin ch'án jie éxí kjuasin ch'ín Tsochren ijie senó. ⁷ Kjaxin t'ichjánxin kíxin kaín xín tí sín naxa tinkáchónkihya Ìnchéni mé tsochónta sín kjuasáyé tí ch'ín t'etōan a. Tí náhí la ts'eka sín ch'án jie ntá tí xíkaha la ch'ín Tsochren tsjacha tsjachròe tí ch'ín a ntá tsjasin ch'án jie.

Nkexrí chrók'uejó tí sín tsjinkítsa tí xra kuènte nínko

⁸ Kjaxin tí sín diácono ch'e xra kuènte nínko la kjaxin ntoá chrók'uejó sín kíxin chróchóntehe sín kjuasáyé chojni. Kjaxin t'ichjánxin kíxin chrókjuinchehiteyá sín tí nkehe ntáchro sín la ko chrókókoanhya sín la ko kjaxin chróchóntiaxinhya sín itsjé chichaon chrókjuacha sín. ⁹ T'ichjánxin chrókónohe sín jína tí nkehe tinkáchónki sín kíxin jehe sín chrórxaxinkaon sín á nchōxon tí xra ch'e sín. ¹⁰ Saōxín chrótsjehe kaín chojni á ninkehó jie chóntahya tí nkexro la ntá tí chaxín jína jehe ch'án la ninkehó jie chóntahya ch'án ntá jína ts'ixehen ch'án tí xra kuènte nínko. ¹¹ La ko kjaxin tí chojni chjin mé chrók'uejó sín jína kíxin chróchónta sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchehiteyá sín kaín nkehe. ¹² Tí sín diácono la mé chróchónta sín jnkokoá ichjién sín la jína chrók'uetuēnhen sín xjeen sín la ko jína chrók'uetōan sín ntoe sín. ¹³ T'ichjánxin ijnko xra jína sich'e sín kíxin ntá tsjacha sín ts'áyéhe sín ijnko nkehe jína tsjanjon ìnchéni la ko kjaxin tsosuehya sín tsochrónka sín nkexrí tinkáchónki sín Cristo Jesús.

Dios mé kjuínchenoheni tí nkehe k'uékiēnxínhyani

¹⁴ Tjínkavan tjoka chrókjuasántsjaḡa tí jaha kjánchó senó tsokjian tí xroon i. ¹⁵ A ntá tí tsōxrjenna isé ntá kjónté tsonoha nkexrí chrók'uejó tí sín naxa kjéhya Dios mé tí sín t'óna nínkoe Dios tjechón. Jeheni kaín ni mé tjejó'tayakonhenni tí tan chaxín ntoá. ¹⁶ Ninkexró chróntáchrohya kíxin chaxínhya tí nkehe tinkáchónkini mé ijnko nkehe imá jie tíha la ninkexró k'uénoehya tí senó a.

Dios mé ikui k'óna chojni;

ikui ch'án kjuakōxin ch'án kjuachaxiēn Nchakuen Dios chóna ch'án kíxin jína tí jehe ch'án.

La ntá tí sín ángel mé k'uíkon sín ch'án

la kuenté chjasintajni mé ó kuínhin sín nkehe chrónka ch'án

ntá itsjé sín kuítekaon sín ch'án.

Ntá Dios k'uáyéhe tí jehe ch'án nkaya nkajní.

4

Tí sín kuítóhe tinkáchónkihya Cristo

¹ A ntá ntáchro Nchakuen Dios kíxin tí chjina tsjeje chjasintajni mé iso sín mé tsítóhe sín í tsinkáchónkihya sín Ìnchéni la ntá tsitekaon sín nchakuen tí jínahya sich'iyehé sín la ko tsitekaon sín tí nkehe tjako tí sín demonio. ² Mé tsinhin sín tí nkehe tjako tí chojni tjuáhya la ch'ia sín. Kjónté imá tsjasin sín jie la í tsosuehya sín kíxin éxí tsíchján tí tjenkayáxixín sín la í tjenkayáxinhya sín jína. ³ Jehe sín mé tjinkakonhya sín kíxin chrókótehe chojni la ko kjaxin tjinkakonhya sín kíxin chrókjóneni nto. A ntá jeheni ó noheni kíxin Dios mé kjuích'éna ch'án kaín xín nkehe ineni la tjinkaon ch'án kíxin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni. ⁴ Méxra kaín xín tí nkehe kjuích'éna Dios la jína la kohya nkehe chróntáchroni kíxin jehya jína sineni. Chrókjuancheheni Dios kjuasáya la ntá jína chrókjóneni ⁵ kíxin tió tsōrxaxinkaonni itén Dios la tsonixjeheni ch'án la ntá sincheyaon ch'án tí nkehe sineni.

Ijnko chojni jína ch'ehe xra Jesucristo

⁶ Jaha tjákohe tí sín kichó ni kaín tí nkehe i la ntá xikaha imá jína sich'ehé xra Jesucristo la ko antsí tsjinkitsa ch'án ts'ánki kjuaxrexinkaon kuéntá tí tinkáchónkia tí tan kuénté ch'án la ko naxa tjákua tí nkehe jína ó xrákoha. ⁷ Jaha mé tahya kuenté tí cuento chónkó la ko tí nkehe ntoáhya tinkáchónki iso sín. **A** ntá jaha la chrókuitoéhya chrókuinkáchónkia Dios. ⁸ Tí chojni tsítán la jína tíha kjánchó antsí má tjetoo chrórxaxinkaonni Dios. Tíha la tsjinkitsa kixin jína xritjejóni ijie la ko kjaxin tsjinkitsa kixin ts'áyéheni kjuachón jnkochrín tió tsokjan Ìnchéni. ⁹ Kaín tíhi mé chaxín la kaín chojni chrókuitekaon. ¹⁰ Mé xikaha kjónté t'ántaxínhinni chojni la jína ch'eni tí xra i kixin tinkáchónkini Dios tjechón. Jehe ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'ichjánxin tsétoo la ko tsjákua. ¹² Jaha chrókuitoéhya kixin chrokjuanoá sín kjónté naxa ntasoyá. Chrókuákoexián tí sín tinkáchónki Ìnchéni nkexrí chrónixja sín la ko nkexrí ntoá chrók'uejó sín la ko nkexrí chrótjuèhe sín Dios la ko nkexrí chrókuitekaon sín Ìnchéni la ko nkexrí tjóá chrók'uejó sín. ¹³ Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sinchexraxinkávan kaín tí sín kichó ni la ko tjákohe sín. ¹⁴ Sinchek'itjáyanhya tí kjuachaxién Dios k'uayéhé tió tí sín t'etoo kuente nínko kjuachaxién Dios k'uejotja tja sín chrítaón ikjá.

¹⁵ Chrókóxakonhan chrókjuinchexiteyá kaín tíha kixin kaín chojni tsotsjehe sín kixin jína noha. ¹⁶ Chrókuenkayáxian jína tí nkehe tjákua kixin jína chrókuak'e jaha, chrókjuinchexiteyá kaín nkehe la ntá tí xikaha sich'e la tsaá jaha la ko tí sín tjejótinhin tjákua la tsaá sín kjaxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó táda. Náhi íchá jína chrónixjehé sín jnkójina éxi chrónixjehé it'á. La kjaxin tí sín ntasoá chrónixjehé sín éxi chrónixjehé kichuá mero. ² **A** ntá tí sín ó nána la mé chrónixjehé sín éxi chrónixjehé iná xikaha. Kjaxin tí sín tjarisoá mé jnkójina chrónixjehé sín éxi chrónixjehé kichuá mero la kjaxin chróchóntehé sín kjuasáya.

³ La ko kjaxin chrókuinkitsa tí síchjin tsíkók'án la ko nchekitonhén sín nkehe sine sín tí chaxín kohya nkexro tsjinkitsa sín. ⁴ **A** ntá tí chojni chjin tsíkók'án chóna xjeen o chóna ìnté, **a** ntá tí jehe sín mé chrók'uitja sín chrókuinkitsa sín kixin sine tí sín kjéhya sín. Tíha mé chrókuenkaxin sín tí it'é, ìné sín kixin kjuínchek'ánki sín, kixin xikaha mé jína tóxrjínhin Dios. ⁵ Tí tjan chaxín tsíkók'án na jehó tjan tjan mé jehó Dios tinkáchónki tjan la imá chrónóehé tjan Dios tie la ko nchakotjin. ⁶ **A** ntá tí sín tsíkók'án ixri sín tjasin sín jie la kjónté tjejóchón sín la éxi tsík'en sín xikaha tjejó sín. ⁷ Tétuenhén tí sín kixin sinchexiteyá sín kaín tíha kixin tsokohya nkexro tsjanhia jie. ⁸ **A** ntá tí nkexro tóxakuenhya kixin tí sín naxa kjéhya la ko kjaxin tóxakuenhya kixin tí sín tjejó ntøe ch'án mé xikahó tjakoxin kixin ninkehó tinkáchónkihya ch'án Dios. Mé xikaha antsí chóna ch'án jie **a** ntá tí sín tinkáchónkihya Ìnchéni la kénhyó.

⁹ Tí ts'ínixín ihnié tí sín tsíkók'án la chrók'uínixín jehó tí sín chóna sesenta nánó la ko tí sín k'uéchóna sín jnkokoá xì. ¹⁰ Kjaxin chrókuakoxin tjan kixin jína ch'e tjan xra la ko chrókuakoxin tjan kixin jína kjuínchek'ánki xjeen tjan la ko kjaxin jína nixjehe tjan tí nkexro tjiji ntøe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkitsa tjan tí sín níhi la ko í so xra jína kjuích'e tjan.

¹¹ **A** ntá chrók'uénixínhya ihnié tí sín tsíkók'án naxa tsjéhya nánó chóna kixin tsontáchro asén sín kixin í jnko chojni ntoa tsøtehe sín inaá la ntá tsítóhe sín ixra kuente Cristo. ¹² Ntá xikaha tsjasin sín jie kixin sinchexiteyáhya sín tí nkehe tsintáchro sín. ¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jína tí xikaha chrónixja sín. ¹⁴ Méxra tí sín tsíkók'án naxa tjarisoá sín la íchá jína chrókótehe sín chróchóna sín xjeen sín la ko

chrók'uàyakonhen sín ntoe sín. A ntá tí xíkaha la tí sín nínkakonhan la chrókjontahya sín tí jaha. ¹⁵ A ntá iso tí sín tsíkók'án ó kuítóhe sín tinkáchónki sín Ìnchéni kixin ch'ín Tsochren tsíkjachróde sín.

¹⁶ A ntá jnkójín chojni tinkáchónki Cristo ts'ikon sín kixin tsíkók'án tí síhjin kjéhya sín ntá t'ichjánxìn tsjinkĩtsa sín kixin sine tí sín a kixin tsochóntiahya sín tí nínko tsjinkĩtsa. Méxra jehó tí sín chaxín tsíkók'án chóntahya ninkexró tsjinkĩtsa mé chrókuinkĩtsa tí nínko.

¹⁷ Tí nkexro jína t'etóan xra kuènte nínko la jehe sín chrókuacha sín la ko kjaxin antsí chrókuikosáyehe chojni tí sín chaxín xra ó tjejóchronkaxín sín la ko tjako sín. ¹⁸ Kixin xroon itén Dios mé ntáchro kixin: “Chrók'uejójáhyará kamposa ir'va tí koxinta tjejóch'e xra”, la ko kjaxin ntáchro kixin: “Tí sín ch'e xra la siín kjuachaxin chrókuacha sín.”*

¹⁹ Chrókuahya kuenté jnkójín nkexro tsjikao kjuach'ia t'eka jie tí nkexro t'etóan xra kuènte nínko. T'ichjánxìn tsonoxín yaá o iy'á sín tsochrónka kixin chaxín chóna jie tí nkexro a. ²⁰ Chrókuéntuéhé tí sín tjasin jie nkayakon kaín sín kixin ntá tsinhin tí í so sín kixin tsochakon sín, í tsjasinhya sín jie. ²¹ Tétuaxian kjuachaxién Dios la ko Ìnchéni Jesucristo la ko tí sín ángel kjueyá ch'án kixin jnkokón tsjéntuéhé kaín chojni la ko jnkokón tétuénhén sín kaín tí nkehe xrxanka. ²² Chrókuéyáhya chjini jnkójín sín kixin ts'etóan sín xra kuènté nínko kixin tí chróchóna sín jie la kjaxin jaha chrókuamá tí jie. A ntá jaha chrókuítóhé kaín nkehe jínahya.

²³ Jaha la jnkoyaxón tóníha tjeté tsaa. Jehya ìnta ó chrók'uia. Kjaxin intsí xranvino chrók'uia ntá chrókuítóaxián jína.

²⁴ Tí ijie jnkójín chojni la t'ikonni noxín tí naxa kuítóexínhya ijie sín. A ntá í so sín nóxinhya tjasin sín jie kjánchó tió tsjixixín la tsonoxín tí jie tjasin sín. ²⁵ Mé xíkaha kjaxin ó t'ikonni kixin iso chojni imá ch'e sín tí xra jína. A ntá í so sín kjónté t'ikonhyani la xitjahya tsjak'emá sín tí nkehe jína ch'e sín.

6

¹ Tí sín ch'exín xra mé t'ichjánxìn tsochóntehe sín kjuasáya tí lamo kuènte sín, kixin ntá tí í so sín la ts'ántaxiénya sín ihnié Dios la ko ts'ántaxiénya sín tí nkehe tjakoni. ² A ntá tí sín ch'exín xra la chóna sín lámóe sín tinkáchónki Cristo la mé chrókuítóehya sín tsjikosáyehe sín tí lamo kixin jnkokoá kichó sín. La mé antsí jína chrókuinkĩtsa sín kixin ó nohe sín kixin tjinkĩtsa sín ijnko nkexro tinkáchónki Cristo la chrótjuèhe sín kichó sín. Jaha mé tjákehé sín kaín tíha.

Tí nkehe tinkáchónkini tsochèxinni

³ Iso sín tjako tí nkehe jehó sín tjenkayáxin sín la tóyóehya tí nkehe jína kjuako Ìnchéni Jesucristo la ko jehya tí nkehe tinkáchónkini. ⁴ Ó jehí nchehnke sín la nínkehó noehya sín. Tí ntoáhya nixja sín la tíha mé éxí ijnko chin chóna sín la tíha mé tjixín tí kjuachjinoxínhin la ko tjanjonko kichó sín la ko t'ántaxínhin sín kichó sín la ko chóntehya sín kichó sín kjuasáya. ⁵ Mé tí sín la náxrxónhya tjenkayáxin sín la jnkochrín tjanjonko kichó sín la noehya sín tí nkehe chaxín. Mé tjenkayáxin sín kixin tinkáchónki sín Ìnchéni kixin xíkaha chrókuacha sín nchónhya chichaon, ichro sín. Jaha la chrókuítóhé tí sín xíkaha ch'e. ⁶ Tí tinkáchónkini Ìnchéni la ijnko nkehe imá tjetóan la ko tjeté tíha a ntá kjuaxróxin chrók'uejóni kjónté tí nkehe chóntani ó. ⁷ A ntá tí kokjihini la ninkehó kuikohyani tí kuini chjasintajni la kjaxin tió ts'enni la ninkehó nkehe xitjahya sátsjikoni. ⁸ A ntá tí chóntani nkehe sineni la ko chóntani ikéni la kjónté táhó la chrókóchéheni. ⁹ A ntá tí sín tjinkaon sín imá chrókóríko sín mé tí sín a mé tsjichróde sín la lontí sín kixin xíkaha tjenkayáxin sín, la mé ts'itjáyanxín sín tíha. ¹⁰ Tí imá tjuèheni chichaon la tíha mé nuèé kaín nkehe

* 5:18 Deuteronomio 25.4, Mateo 10.10; Lucas 10.7

jínahya. Jnkojín chojni imá tjinkaon sín tsochónta sín chichaon ntá tsjichròe sín tsítóhe sín tsinkáchónki Ìnchéni la tíha mé imá sinchekjásótexín sín asén sín.

Jína tí nkehe tinkáchónkini

¹¹ Jaha mé tinkachónké Dios la títóhé kaín tí nkehe i. Chrókjuak'e ntoá la ko kaín asán chróxráxinkávan Dios la ko chrókuinkachónkia ch'án la ko chrótjuéhé kíchua la ko chrókónínkákonhya tjoka la ko chrókjuinchehnkehya asán. ¹² Tjanjonkoa kaín nkehe jehya tí jína la ko kaín asán tinkachónkia Ìnchéni kixin ntá chrókjuacha chrók'uayéhé tí kjuachón jnkochrín kixin mé xíkaha k'uíyaha Dios tí jaha. Jaha la ó tsíchronka kixin tinkachónkia Ìnchéni la ó kuínhin la ko k'uíkon nchónhya chojni. ¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé tétuanhan ¹⁴ kixin sinchexiteyá kaín tí nkehe t'etōan Dios kixin í chrókjuínkíhya tí nkehe chrókuinkachónkia la ntá tsokohya ninkexró ts'eka jie tió tsjixrakája tí yaon tsokjan Ìnchéni Jesucristo. ¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chóntha ch'án kjuachaxin ts'etōan ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Ìnché kaín chojni. ¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya ninkexró tsjacha tsochjina tí tjen ch'án. Ninkexró k'uíkonhya tí jehe ch'án la ko ninkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chóntha ch'án kjuachaxin ts'etōan jnkochrín. Amén.

¹⁷ Tí sín chóntha itsjé nkehe chjasintajni mé tétuenhén sín kixin sinchehnkehya sín la ko tétuenhén sín kixin tsochóntiaxinhya sín tí nkehe chóntha sín kixin jnkochrínhya tsochóntha sín tíha. Íchá jína chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xíkaha tjinkaon ch'án tsochéheni. ¹⁸ Tétuenhén sín kixin chrókjuich'e sín tí nkehe jína kixin tí chaxín chrókóríko sín la chrókjuinkítsa sín kíchó sín la chrók'óxikayēhe sín tí nkehe chóntha sín. ¹⁹ Mé xíkaha chrókjuacha sín tí nkehe tjete kixin chr'éxin la jína chrók'uejó sín kixin chrókjuacha chróchóntha sín tí kjuachón jnkochrín.

Kjuixixín k'uítuenhen ch'ín Timoteo

²⁰ Jaha Timoteo t'ayakonhén tí xra la tiénhya tí nkehe ntoáhya nixja chojni. Ntáchro sín kixin imá nohe sín kjánchó chaxínhya tíha. ²¹ Iso sín ó xíkaha ntáchro sín kixin imá nohe sín la ntá kjuíchròe sín í tinkáchónkihya sín Ìnchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'énnen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo mé kjueyána Jesucristo t'ahá ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochónta chojni kjuachón jnkochrínín tí tsinkáchónki sín Jesucristo. ² Ikjian tí xroon i chr'anhan jaha kichó ni Timoteo. T'íkuan éxi xjanna tí jaha mé imá tjuaha. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókuikonòaha ch'án la ko chrótjáha ch'án kjuaxróxin.

Chróchronka ch'án kixin tinkáchónki ch'án Jesucristo

³ Xráxinkavan tí jaha tió níxjaha Dios nchakotjin la ko tie la ko tjétjáncháha kjuasáyé Dios kixin imá tinkachónkia ch'án. Jehe ch'án mé t'ahá xra kaín asenná éxi xikaha mé k'uékjich'e tí sín tsík'axrjeníxinna. ⁴ Xráxinkavan jnkochrínín nkexrí tsjanika la tjínkavan kixin chrótsjaha tí jaha inaá kixin tsochéhe asenná. ⁵ Ó nòna kixin kaín asán tinkachónkia Jesucristo. Kjaxin náchrja tjan Loida la ko iná tjan Eunice mé saoxín kuinkáchónki sín Ìnchéni Jesús la ntá ó nòna kixin kjá kjaxin jaha xikaha tinkachónkia ch'án.

⁶ A ntá ijie ntaxráxinkavan kixin chrók'uitjáyanhya tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha. ⁷ Dios la kjuanjonhya Nchakuen ch'án kixin tsochrakonni. Náhí. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni. ⁸ Chrókósuàhya chróchronka kixin tinkachónkia Ìnchéni la ko kjaxin chrókósuàhya chróchronka kixin janhan tjéchiñaxián tí xrjanika itén ch'án. Kjónté la íchá jína chrókjuasótexián tí tjákua tí tan tsaáxinni kixin tí kjuachaxin kuènte Dios ó k'uayéhé. ⁹ Jehe Dios mé kuaáxinni la ko kjueya ch'án tí jeheni kixin jína chrók'uejóni. La jehya tí xra jína kjuích'eni ntá chrókuaáxinni. Náhí. Kjuasáyé Dios kjueya ch'án tí jeheni kixin tsinkáchónkini Jesucristo. Tí naxa xrankixínnya chjasintajni mé tsíkjenkayáxin ch'án tíha kixin jehe ch'án mé imá tjuèheni ch'án. ¹⁰ Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyan ch'án tí kjuachaxin k'uéchónta tí kjuach'én kixin kjuacha ch'án xechón ch'án inaá. Chronkaxín itén ch'án nkexrí tsaáxinni ntá ó kónoexinni kixin tí kjuachón kjuakoxin ch'án mé xitjahya ts'itjáyan.

¹¹ Dios mé k'uetuanna sátsjixrjanika itén ch'án la ko kjueyána ch'án tsjakoḥa tí sín jehya sín judío tí tan jína. ¹² Mé xikaha tjétjasótexinna kaín tí nkehe i la kjónté tósuànahya kixin ó choxian jína tí nkexro tinkachónkia. Mé ó nòna kixin chónka ch'án kjuachaxin ts'àyakonhenni ch'án tsjixrakájia tí yaon tsokjan ch'án. Méxra janhan tjaha ch'án asenná kixin ts'ayakonhen ch'án.

¹³ T'itjáyanhya tjákua kaín nkehe jína ó kjuakoḥa. Naxa títekávan la ko tjuéhé kichuára kixin tinkachónkia Cristo Jesús. ¹⁴ Kjuachaxién tí Nchakuen Dios chóntani jnkoinkoni mé t'àyakonhén jína tí tan tjákua kjuíntakitonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehe sín kuítõna sín la ko kjaxin tí ch'ín Figelo la ko ch'ín Hermógenes. ¹⁶ Tjáncháha Ìnchéni kixin imá tsíkonóehé ch'án tí sín tjejó ntõe tí ch'ín Onesíforo kixin jehe ch'án mé imá kjuínkítsana ch'án la ko kósuèhya ch'án ikui ch'án kjónté tjéchiña. ¹⁷ Tí nantá kjuíji ch'án chjasin Roma ntá kuítõehya ch'án kjueyána ch'án hasta k'uitjana. ¹⁸ Tjáncháha Ìnchéni kixin tí yaon itsi ch'án ntá chrókuikonóehé ch'án tí ch'ín a kixin jaha ó noha jína kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóexin ch'ín Pablo kixin jeheni éxí yóhē ijnko soldado jina kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjinkitsa kixin tinkáchónkini ch'án. ² Tí nkehe kuínhín kjuàkua nkayakon nchónhya chojni mé xikaha chjehé tí xra tí sín jina choxian jina ch'e xra kixin ntá jehe sín mé xikaha chrókjuakohe sín í so chojni ínaá.

³ Jaha la kjónté nchónhya nkehe kjuasótia la chrókjuacha kixin ijnko soldado jina kuènte Jesucristo. ⁴ Kohya nijnko soldado jina ch'e xra chrók'uixenhen ókjé xra kixin t'ichjánxin jnkójínxón xra sich'e ch'án kixin éxí tjinkaon tí nkexro t'etuenhen ch'án. ⁵ Mé xikaha éxí yóhē ijnko nkexro tsotsítán. Ntá tsjachahya ts'áyéhe ch'án nijnko nkehe tí sinchexiteyèhya ch'án tí sín t'etōan. ⁶ La éxí yóhē ijnko nkexro ch'e xra nonte ntá chóna ch'án kjuachaxin saxín tsakja ch'án tí nkehe ts'óna. ⁷ Chróxraxinkávan jina kaín tí nkehe xrjanka la ìnchéni mé tsjinkitsa tsiénxian kaín nkehe.

⁸ Xráxinkávan kixin Jesucristo la ó xechón ch'án. Jehe ch'án mé k'uaxrjenixin ch'án ch'ín rey David. Tíha mé tí tan jina tsaáxinni tjétjākua. ⁹ Tí tan tjéxrjanka mé tjasótexinna. Tíha mé tjéchrontetoxinna cadena éxí ijnko chojni tsíkjàya la kjónté tí itén Dios la jehya tjechrontetoxín cadena. ¹⁰ Méxra kjónté nchónhya t'atsínka tí janhan la ntaxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochrín kixin tinkáchónki sín Jesucristo.

¹¹ Tíhi mé chaxín;

Tí jehe ch'án k'uénxinni ch'án a ntá chr'éxin ts'ejókoni ch'án.

¹² La tí tjasótexinni tí jehe ch'án la ntá kjaxin ts'áyéheni kjuachaxin kuènte ch'án ts'etōanni.

A ntá tí chrókjuinchemáni tí jehe ch'án na ntá kjaxin ch'án la xikaha sich'e ch'án.

¹³ Kjónté nchexiteyèhyani ch'án la jehe ch'án tjenchexiteyá ch'án kixin Dios la xitjahya sich'ia ch'án.

Chrókjuich'eni tí xra jina

¹⁴ Nchexraxinkávan sín kaín tí nkehe i. Dios tjetsjehe tétuenhén sín kixin chrókuítóhe sín tí nixja sín tjanjonxin sín kixin ó chónkó tíha la ninkehó sínkíhya. Tí xikaha ch'e sín la sinchek'itjayan sín tí sín tjejótinhin. ¹⁵ Sich'e xra jina kixin tsoxrjínhin Dios tí xra tjech'e a. Ntoá chrókjuàkua tí tan jina chaxín kixin ntá chrók'uichjánxinhya chrókósuàha. ¹⁶ La tìtohé tí nkehe náxrjónhya la ko chónkó nixja iso sín kixin tí sín nixja xikaha la antsí tsinkák'ánkí tí nkehe jínahya nixja sín. ¹⁷ Tí nkehe jehya jina tjako sín mé éxí yóhē ijnko itōn sóa sítinkáchr'enka. Mé xikaha tjako tí ch'ín Himeneo la ko ch'ín Fileto. ¹⁸ Jehe sín mé ó kjuixin kuítóhe sín tí ntja ntoá la ntáchro sín kixin ó kjuixin k'uátsínka tí tsoxechón chojni. Ntá xikaha ch'iyehe sín tí í so sín la tsjitóxinhin sín tí nkehe tinkáchónki sín. ¹⁹ Kjánchó tí sín tinkáchónki Dios éxí yóhē tí xro xrankíxixín tjat'ō xitjahya tsoxíka la chóna éxí ijnko sello tí itén Dios ntáchro kixin: “Ìnchéni mé tjatōan ch'án tí chojni kuènté ch'án”,* la kjaxin ntáchro kixin: “Kaín tí sín tinkáchónki Cristo mé t'ichjánxin chrókuítóhe sín kaín nkehe jínahya,” mé xikaha ichro itén Dios.

²⁰ Ijnko nchia jié kuènte tí sín rico la síin vaso tsík'óna chica oro la ko vaso tsík'óna chica plata. La kjaxin síin nkehe tsík'óna ntachiso la ko nkehe tsík'óna nchetje. Iso la xra ó tsík'óna kuènte tí xra tjetōan la í so la tsík'óna kuènte tí xra tjetuanhya. ²¹ A ntá ijnko chojni chrókuítóhe kaín jie chrókóyóhē éxí ijnko vaso tjóá jina kixin chrókuicháxinhin Ìnchéni. A ntá tí nkexro xikaha chrókjuich'ehya tí nkehe jínahya kixin chrókuicháxinhin Ìnchéni tí xra jina.

²² Tìtohé kaín tí nkehe jehya tí jina tóxrjínhin í so tí sín ntasoá a. Chrókjuak'e tí ntja ntoá la ko kaín asán chrókuinkachónkia Cristo la ko chrótjuèhé kaín chojni la ko kjuaxróxin

* 2:19 Números 16.5; Juan 10.14

chrók'uejokoa kaín sín. Mé xikaha chrók'uejó kaín xín tí sín kótjóá asén mé kaín tí sín tinkáchónki Ìnchéni. ²³ Jaha chrókuahya kuènté tí sín lontj tjenkayáxinhya jína kixin jaha ó noha kixin xrahya chrókjuanjonko kichó sín. ²⁴ A ntá ninkexro ch'ehe xra Ìnchéni chrókjuanjonko kichó sín kixin jína chrókjuinkitsa kichó sín. Chrókónohe sín kaín nkehe jína chrókjuako sín la ko chrókónínkakuenhya sín kichó sín. ²⁵ Kaín asén sín jnkojína chrónixjehe sín tí sín titekakonhya kixin chróchónhen sín kixin Dios chrókjuinkitsa tí sín a chrók'uixinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín ²⁶ kixin t'ichjánxin chrókónohe sín nkexrí chrókuaáxin sín kixin ch'ín Tsochren tjinkaon chrókjuich'iyehé sín ntá chrókjuasin sín jie.

3

Nkexrí ts'ejó tí chojni chjasintajni tí yaon tsjixixín

¹ T'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni. ² Tí sín chjasintajni tsinkáchónkihya Ìnchéni mé imá chrók'uetōan sín jehó la ko imá tsoxrjínhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko ìné sín la ko tsochóntahya sín kjuasáya la ko tsinkáchónkihya sín ninkehó dios. ³ Tsotjuèhya sín kichó sín la ko tsikonóehya kichó sín la ko tsjonta sín kichó sín la ko ninkexró tsochrakuenhya sín la ántosén sín tsjasin sín jie, la ko imá tsojiehe sín la ko imá tsonínkakohen sín kaín nkehe jína. ⁴ Jehe sín mé sinchekji kichó sín la ko tsjenkayáxinhya sín jína la ko sinchehnke sín. Tsotjinkaon sín tsjeyá sín tí nkehe ntáchro asén sín ó a ntá tsjeyáhya sín Dios. ⁵ Jehe sín la éxí chojni tinkáchónki Dios xikaha ts'ejó sín. Kjánchó chaxínhya. Tsinkáchónkihya sín tí kjuachaxin kuènte Dios chaxín ntoá.

Méxra jaha la chrókuankíehya tí chojni ch'e xikaha. ⁶ Iso tí sín a mé ixri sín t'ixenhen ntoe ókjé chojni la ch'iyehé sín tí chojni chjin lontj tjasin jie la nchexiteyèhe sín kaín tí ntáchro asén sín. ⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá. ⁸ A ntá éxí yóhe tí sín k'uékjinchexroan mé ch'ín Janes la ko ch'ín Jambres mé k'uénínkakohen sín ch'ín Moisés mé xikaha tí sín tjako ijie nínkakohen sín tí nkehe chaxín ntoá. Imá jínahya tí kjuaxrexinkaon kuènte sín la ko titekakonhya sín tí nkehe chaxín tinkáchónkini. ⁹ Kjánchó tsjachahya sín sich'ia sín isé kixin kaín chojni tsonohé kixin tí sín a mé lontj sín kixin éxí xikaha tsíkónhen tí yaá sín k'uékónínkakohen ch'ín Moisés.

Tí nkehe kjuixixín k'uetuēnhen ch'ín Pablo tí ch'ín Timoteo

¹⁰ A ntá jaha mé ó kuítekáván tí nkehe kjuakua. Ó noha nkexrí kjuak'é janhan la ko ó noha tí xra kjuít'a janhan. Ó noha nkexrí tinkáchónkia Ìnchéni la ko noha kixin tjokahya kónínkavan la ko noha nkexrí tjuahá chojni. Ó noha kixin kjónté kónínkaon chojni la kuitōahya tí xra a ¹¹ kjónté chónkàna sín la ko kjuasótena. Ó noha nkehe konna tí chjasin Antioquía la ko Iconio la ko Listra. Chrók'óyáanna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna. ¹² Kaínxín tí sín tjinkaon tjóá chrók'u'ejó sín nchexiteyèhe Cristo Jesús la t'ichjánxin tsjasóte sín. ¹³ A ntá tí sín jínahya la ko tí sín ixri ch'ia sín mé ts'óna sín antsí jínahya. Jehe sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'uíjtá la ko tí nkehe ó kuítekáván. Jaha la ó noha tí nkexro kjuakōha. ¹⁵ Jaha la desde xjanntsia k'uíjtá nkexrí nixja xroon itén Dios la tíha mé tónoexínni kixin Cristo Jesús tsaáxinni kixin tinkáchónkini ch'án. ¹⁶ Ntá kuenté xroon Biblia kjuachaxiēn Nchakuen Dios kjuínkítsa tí nkexro ikjin la tíha mé jína tsoxrácuxinni tí nkehe chaxín la ko tíha mé jína tsjentuēheni la ko tsjinkítsani tsonoheni nkexrí chrók'uejóni ntoá ¹⁷ kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

4

¹ Kjuachaxién Dios la ko Ìnchéni Jesucristo, tí nkexro itsi éxí ijnko rey la sinchekitoexín ijíé kaín chojni tjejóchón la ko tí chojni tsík'en, ² mé tétuanhan chrókjuákua itén Dios kaín asán kjónté á chrókuinhin sín o náhí. Nixjehé sín jnkojína kíxin tsitekaon sín la ko tjéntuéhé sín jnkojína. Chrókóninkákonhya chrókjuákohé sín. ³ Itsi ijnko yaon ntá tsotjinkakonhya sín tsinhin sín tí nkehe jína. A ntá sinchexiteyéhe sín tí nkehe ntáchro asén sín ó. Tsjeyá sín nchónhya maestro tsjakohe sín jehó tí nkehe tóxrjínhin sín chrókuinhin sín. ⁴ Méxra tsítóhe sín tí nkehe chaxín ntoá la ntá itsa sín kuènté kaín nkehe chaxínhya. ⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókjuákohé chojni itén Dios tsaáxinni mé xíkaha sinchexiteyá jína tí xra chonta.

⁶ Ntá janhan ó kjuixraká tí hora tsjasótina la ko ó kjuixraká tí hora its'èn. ⁷ Ó kjuánjonkian jína kaín tí nkehe jínahya la ko ó kjuixinna tí xra kuèntana la ko kuítóahya jína kuinkachónkia Ìnchéni. ⁸ A ntá ijie la tí nkehe tsítonna mé tjechónhen kíxin jína kjuak'é ntihi. Tíha mé tsjanjon Ìnchéni tí yaon itsi ch'án. Jehé ch'án mé ijnko juez jína. Jehya kíxin janhván tsákjaá tí nkehe tsjanjon ch'án. Náhi, kjaxin kaín tí nkexro kuítekaon sin ch'án la ko chéhe sín tjejóchónhen sín tió tsi ch'án.

Ch'ín Pablo k'uetōan tsjijtsjehe sín ch'án

⁹ Jaha chrókóxakonhan tjoka chrók'uinkatsjehé tí janhan ¹⁰ kíxin ch'ín Demas la kuítóhe ch'án tí janhan kíxin imá kóxrjínhin ch'án tí nkehe kuènte chjasintajni. Sátsíkji ch'án chjasin Tesalónica. Ch'ín Crescente mé sátsíkji ch'án chjasin Galacia a ntá ch'ín Tito sátsíkji ch'án chjasin Dalmacia. ¹¹ Jehó ch'ín Lucas naxa tjékian ch'án. Tjékjéyá ch'ín Marcos la tsjúkuana ch'án ntihi kíxin jehé ch'án mé jína tsjinkítsa ch'án tí xra chonta ntihi. ¹² A ntá ch'ín Tíquico mé kuétuanhan ch'án sátsji ch'án chjasin Éfeso. ¹³ Tió ts'inka ts'inkakuana tí ka t'ítsate kuítóha chjasin Troas ntoé ch'ín Carpo la ko kjaxin ts'inkakuana tí libro kuèntana la ko koí tí tjoé iko tsík'óna xroon.

¹⁴ Tí ch'ín Alejandro tí ch'ín ch'e xra chica mé nchónhya nkehe jínahya kjuích'ena ch'án. Kjánchó Ìnchéni mé tsjenkehe ch'án kaín nkehe kjuích'e ch'án. ¹⁵ Jaha mé tóxakonhan kíxin tí jehé ch'án kíxin imá nínkakonhen ch'án tí nkehe tjakoni.

¹⁶ A ntá tí saoxín k'uèya tí síxree tí kjuia tí tjejó sín la ninkexró kjuinkítsahyana. Kaín sín me kuítóna sín janhván. Kjónté xíkaha la tjáncháha Dios kíxin chrókuahya ch'án kuèntá kíxin xíkaha kjuích'e sín. ¹⁷ Kjánchó Ìnchéni mé chaxín kjuínkítsana ch'án la kjuanjon ch'án kjuachaxin kíxin tsjachana naxa jína tsjækua itén ch'án. Ntá kuínhin kaín tí sín jehya judío. A ntá Ìnchéni kjuínkítsana kíxin kjónehyaana koxra. ¹⁸ Ìnchéni mé tsjinkítsana kíxin naxa tsónnahya kaín nkehe jínahya. Jehé ch'án mé ts'ayakonna ch'án ts'ixanhan tí tjet'etōan ch'án nkaya nkajní. Kjuasáyé ch'án kíxin xíkaha jnkochrínín tsoxiteyá. Amén.

Ch'ín Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín siín ntoe ch'ín Onesíforo. ²⁰ Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kíxin kóníhi ch'án. ²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kíchó ní ntihi nixjaha sín jnkojína.

²² Ìnchéni Jesucristo chrók'uajikoa ch'an la Dios chrókjuintayaonrá kaín rá mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí ch'ín Tito

Ch'ín Pablo nixjehe tí ch'ín Tito

¹ Janhan Pablo mé t'aha xra Dios la ko tsíkjeýána Jesucristo kixin tsjákoḥa tí í so sín tsíkjeýa Dios kjaxin kixin ts'itja sín tsonohe sín kixin nkexrí chrókuinkáchónki sín tí nkehe chaxín. ² Ntá ts'ejóchónhen sín tsochónṭa sín kjuachón jnkochr'íxín. Dios la xitjahya sich'ia la kaín tí nkehe tsíchronka ch'án ósé tí naxa k'ónahya chjasintajni la mé xikaha tsonhen. ³ Ntá tí yaon tsíntáchro Dios la mé jie ó xiteyá la ntá kónoxín tí tan kuènte ch'án. A ntá Dios tí nkexro tsaáxinni mé k'ueṭoan kixin sít'aha ch'án xra tsjáku itén ch'án. ⁴ Ikjian tí xroon i chr'anhan jaha Tito. T'íkuan éxí chaxín xjanna tí jaha kixin yóini tinkáchónkini Jesús. Kjuasáyé It'eni Dios la ko Jesucristo tí nkexro tsaáxinni, chrókjuintayavan la ko chrókuikonóḥa ch'án la ko chrótjáha ch'án kjuaxróxin.

Tí xra sich'e tí ch'ín Tito chjasin Creta

⁵ Kujtoḥa jaha tí isla Creta kixin jaha chrókuétuēnhén tí sín siín ntiha kixin nkexrí chrók'uejó sín la ko chrókónoxín nkexro ts'etoan kuènte jnkojnko nínko jnkojnko chjasin éxí tí kuétuanhan jaha. ⁶ T'ichjánxin kixin tí nkexro ts'etoan xra kuènte nínko la jina chrókjuak'e kixin kohya nkexro chrók'ueka jie, la ko chróchónṭa jnkokoá ichjién la ko tí xjeen sín chrókuinkáchónki Ìnchéni kixin tsokohya nkexro chrókjuanchia jie kixin jehya tí jina tjejóch'e sín, la ko kjaxin chrókójiehya sín. ⁷ Mé xikaha tí nkexro ts'áyéhe tí xra ts'etoan xra kuènte nínko mé ts'etoan nkexrí tsonhen xra kuènte Dios la ntá t'ichjánxin ijnko nkexro tsjenkayáxin jina, chrókjuasinhya jie. La chrókjuinchehnkehya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjeýa kjuanínkaon la ko chrókóxrjienhya sín chrókjuich'ia sín ntá chrókjuacha sín chichaon. ⁸ Kjaxin jina chrókjuak'e ch'án kixin tí tsjiji ijnko nkexro ntoe ch'án chrókjuanjon ch'án kjuachaxin chrókjuak'e tí nkexro a. La ko jina chrókjuak'e ch'án la ko jina chrókjuenkayáxin ch'án kixin ijnko nkexro ó tsíkjinchetjóá Dios la ko chróchónṭa ch'án kjuasáyé ch'án. ⁹ Kjaxin t'ichjánxin chrókuítōehya ch'án tí tan jina xrákoḥe ch'án kixin ntá jina tsjákoḥe ch'án í so chojni tí nkehe ntoá la kjónté nkexro tjinkakonhya tsinhin la jina chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxí lontj sín mé xikaha ch'iyehé sín chojni. ¹¹ Tí sín a la chrók'uíkjeḥeni ir'va sín kixin tjachròe sín nchónhya chojni kixin tjako sín tí nkehe jehya jina kixin chrókjuich'ia sín chrókjuacha sín nchónhya chichaon.

¹² Ijnko ch'ín kuènte chjasin Creta la mé tsíchronka ch'án nkexrí tjejó tí sín chjasén ch'án. Ntáchro ch'án kixin: “Kaín tí chojni chjasénni mé imá ch'ia sín la ko imá jiehe sín la ko imá kóchjinka sín la ko séhe sín”, mé xikaha chrónka ch'án. ¹³ Tí nkehé tsíchronka ch'án mé chaxín ntoá. Méxra antsí fuerte chrókjuéntuéhé sín kixin ntá jina chrók'uejó sín chrórxaxinkaon sín Dios. ¹⁴ Nixjehé sín kixin chrókuahya sín kuenté kaín tí nkehe tsík'axrjeníxin kja tí sín judío tjako la ko chrókuitekakonhya sín tí nkehe t'etoan tí sín nínkakonhen tí nkehe chaxín.

¹⁵ Tí sín chaxín tjóá kjuaxrexinkaon kuènte sín ntá kaín nkehe ch'e sín la jina. A ntá tí nkexro titekakonhya la tjuáhya kjuaxrexinkaon kuènte la kohya ninkehó nkehe jina tí kjuaxrexinkaon kuènte sín la kaín nkehe tjenkayáxin sín mé tjuáhya. ¹⁶ Ntáchro sín kixin chóxin sín Dios a ntá tí t'ikonni nkexrí ch'e sín ó noexínni kixin chaxínhya tíha la ch'ia sín. Jehé sín mé ntoáhya tjenkayáxin sín la ko jiehe sín la ko titekakonhya sín. A ntá tí xikaha ch'e sín la, ¿nkexrí chrókjuich'e sín tí xra jina?

2

Chrókjuako ch'ín Tito tí tan chaxín

¹ A ntá jaha chrókjuakua éxí tí chrónka tí tan jína chaxín. ² Tjákohé tí sín ó táda kixin chrókókoanhya sín la ko jína chrók'uejó sín la ko chróchónta sín kjuasáyé sín la ko chróchónta sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kichó sín la ko chrókónínkakonhya sín kjónté tsjasóte sín. ³ A ntá kjaxin xikaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxin sín ijnko kjuaxrexinkaon jína ⁴ kixin xikaha chrókjuakuexin sín tí chojni chjin tjarisoá a kixin chrótjuèhe sín xii sín la ko chrótjuèhe sín xjeen sín ⁵ la ko chrókjuich'e sín xra jína la ko ntoá chrókjuenkayáxin sín la ko jína chrók'uàyakonhen sín nchia ntóé sín la ko chrókójina sín la ko chrókuitekakonhen sín xii sín. Tí xikaha chrókjuich'e sín chrókjuinchexiteyá sín la kohya nkexro chrók'uántaxínhin tí itén Dios tinkáchónkini.

⁶ Kjaxin xikaha chrókjuinchextraxinkávan tí sín ntasoá kixin jína chrók'uejó sín chróchónta sín kjuasáyé sín. ⁷ Jaha mé chrókjuákoéxian sín kaín nkehe jína la ko chrókjuákohé sín kixin ntoá chrók'uejó sín. ⁸ Jaha la chrónixja tí nkehe jína kixin kohya nkexró chrók'uántaxín la ntá xikaha chrókósuèhe tí sín nínkaon la ntá kohya nkehe jínahya chróntáchro sín kuènte tí jeheni.

⁹ Tétuènhén tí sín xrich'exón xra kixin chrókjuinchexiteyéhe sín tí lamo kuènte sín la ko chrókójina sín la ko chrónixjankjehya sín tí nkexro ch'ehe sín xra ¹⁰ la ko kjaxin chrókueéhya sín kixin jehya ijnko chojni chee tí jehe sín. Ntá kaín chojni chrók'uikon sín kixin tjakoxin sín kixin náxrjón tí itén Dios chrókuaáxinni.

¹¹ Kixin Dios mé kjuakoxin ch'án kixin nkexrí tjuèheni ch'án kixin jehe ch'án mé tsaáxin kaín chojni. ¹² Kjuasáyé Dios mé tjakoheni ch'án kixin chrókuítóheni kaín nkehe jie la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios. ¹³ Kjaxin chrók'uejóni jína kixin chrókóchéheni chrók'uejóchónhenni tí yaon kjuachaxién Dios jie itsi Dios la ko Jesucristo tí nkexro tsaáxinni. ¹⁴ A ntá jehe ch'án mé k'uenyákonhenni ch'án kixin tjinkaon ch'án tsaáxinni ch'án kixin tsotjuáxin kaín jie chóntani kixin ntá jeheni mé ts'ónani ijnko chojni sich'ehe ch'án xra la ko tsoxrjínhinni sich'eni kaín xra jína tjinkaon ch'án.

¹⁵ Tíhi mé chrókjuakua la ko chrókjuinchextraxinkávan sín la ko chrókuétuènhén sín kjuachaxién Dios. Chrókuítóéhya kixin ninkexró chrókókjoniéhya tí nkehe tjakua jaha.

3

Jína chrók'uejó tí sín tinkáchónki Cristo

¹ Chrókjuinchextraxinkávan sín kixin sinchexiteyéhe sín tí gobierno la ko tsitekaon sín ichrén xra ts'etóan tí síxreé kixin chrókjuich'e sín kaín xra jína ts'etóan tí sín a. ² La ko chrók'uántaxiénya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxin sín kixin jehya ijnko chojni nchehnke la chrókjuikosáyehe sín kaín chojni.

³ Jeheni kjaxin ósé k'uélontini la ko k'uékitekakonhyani Dios. Chjini k'uék'ajini la k'uékóxrjínhinni kaín nkehe jínahya. La ko jehya jína k'uék'ejóni la ko k'uéchóntani kjuachjinoxínhin la ko k'uéchjinoxíenhenni í so chojni. ⁴ A ntá tí Dios tsaáxinni mé kjuakuexinni ch'án kixin jína ch'án la ko tjuèhe ch'án kaín chojni. ⁵ Jehe ch'án kuaáxinni ch'án la jehya kixin ichrén xra jína chrókjuich'ehehe ch'án. Náhí, ó jehí kuikonóeheni ch'án la ntá kjuínchekaáni ch'án la ko kjuínchetjóáni ch'án. Ntá kokjínini nixin kixin tí Nchakuen ch'án la mé k'uáyèxinni kjuachón nixin. ⁶ Kjuasáyé Jesucristo tí nkexro tsaáxinni ntá kjuínchekitonhenni Dios Nchakuen ch'án kixin tsochóntani kjuachaxin kuènté ch'án.

⁷ A ntá xikaha kjuasáyé ch'án kjuínchetjóáni ch'án kixin ntá tjejóchónhenni tí kjuachón jnkochrín tsjanjon ch'án.

⁸ Kaín tíha mé chaxín. Tjínkavan kixin jaha chrókuétoan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkitsa kaín chojni. ⁹ A ntá jaha mé titohé tí sín tjachaxin kichó sín lontj sín la ko titohé tí nkehe tinkáchónki sín kuènte tí sín tsík'axrjenixin sín la ko titohé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰ Jnkójín nkexro tjinkaon tsjixrónkáxin tí tójnkotsé nínko ntiha la nixjehé ch'án jnkójína senó la ko yóxin ínaá ntá tí titekakonhya ch'án ntá titohé sátsji ch'án ¹¹ kixin ó noha kixin tí chojni xikaha a mé ntoáhya tjenkayáxin sín kixin jehó sín nchek'ánkí sín ijé sín.

Tí nkehe k'uetqan ch'ín Pablo

¹² Tí tsétuanhan ch'ín Artemas la ko ch'ín Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsínkajia tí nchakuen kin. ¹³ Jína chrókjuínkítsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanhya tí t'ichjánxinhin sín. ¹⁴ Ntá tí sín í so chrók'uitja sín nkexrí sich'e sín tí xra jína la ko chrókjuinkítsa sín kichó sín ichrén nkehe t'ichjánxinhin sín kixin chrókjuakoxin sín kixin jína tjejó sín.

Ó kjuixixín nixja ch'ín Pablo

¹⁵ Kaín tí nkexro tjékian janhan ntihi nixjahá sín jnkójína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyaonrá ch'án kaín rá. Amén. Ó tjen.

TÍ xroon chr'énhen ch'ín Pablo tí ch'ín Filemón

Ch'ín Pablo nixjehé ch'ín Filemón

¹ Janhan Pablo tjéchinaxián tí xra kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóch'eni xra kuènte Dios. ² Kjaxin chrókuinhin kaín tí sín tinkáchónki Ìnchéni tójnksé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxí tí jeheni. ³ Kjuasáyé It'eni Dios la ko Ìnchéni Jesucristo chrókuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xráxín tjáncháha kjuasáyé Dios tí xráxinkavan tí jaha tí nixjaha Dios ⁵ kixin ó kuinhan kixin imá tinkachónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios. ⁶ Tjáncháha Dios kixin tsjinkitsa ch'án tí sín kuítekaon tió kjuákohe sín kixin ntá tsienxín sín jína nkexrí kaín tí nkehe chóntani kixin kjuíncheyaonni Cristo Jesús. ⁷ Imá chàna kixin ó nòna kixin jaha kichó ni imá tjuèhé tí sín kichuá ntiha la ko imá kjuínchechéhé asén tí sín tinkáchónki Ìnchéni.

Ch'ín Pablo chrónóghé tí ch'ín Filemón kixin tsikonóghé ch'án tí ch'ín Onésimo

⁸ Janhan na kjueyána Jesucristo t'aha ch'án xra méxra chonta kjuachaxin tsétuanhan jaha tí nkehe chrókuich'e. ⁹ A ntá íchá jína jehó xrjannóaha tsítekavan kixin jaha tjuèhé tí janhan. Janhan Pablo mé ó tádana la ko tjéchinaxián tí xra kuènte Jesucristo. ¹⁰ Méxra xrjannóaha tsjinkitsa tí ch'ín Onésimo. Jehé ch'án mé t'íkuan éxí xjanna kixin kjuankixin ch'án tsinkáchónki ch'án Jesucristo tí tjéchinakian ch'án ntihi.

¹¹ A ntá tí ósé ch'ín Onésimo mé kjuít'ahya xra jína. A ntá ijie ó nòna kixin imá jína sit'aha ch'án xra tí jaha la ko jína sich'ena ch'án xra kjaxin. ¹² Ntá ijie tsétuanhan ch'án tsjiji ch'án tí tjen jaha inaá. Chrótjuèhé ch'án éxí chrótjuèhé tí janhan. ¹³ Janhan tjínkavan chrókuitonakian ch'án ntihi kixin chrókuinkitsana ch'án chrínki tí chrókuak'e jaha kixin tjéchinaxián tí itén Jesucristo. ¹⁴ Kjánchó tjínkakhya tsjáncháha xikaha tí tjínkakhya jaha. Jehya kixin jaha chrókuinkitsani kixin chrókuétuanhan xikaha. Náhí. Jehí tjinkaonni éxí jaha tóxrjínhan chrókuich'e. ¹⁵ Tí ch'ín Onésimo kuítóha ch'án iso yaon a ntá jie la tsochonta ch'án jnkochrín. ¹⁶ Ijie la jehya éxí ijnko chojni tsík'íná chrók'uikuan ch'án. Náhí. Ntá jie la éxí ijnko nkexro ch'e xra antsí jína mé éxí ijnko kichua chrótjuèhé ch'án. Janhan na tjuaha ch'án kjánchó tí jaha la antsí má chrótjuèhé ch'án. Jehya éxí chojni ó chrók'uikuan ch'án. Náhí. Chrók'uikuan ch'án éxí ijnko kichua kuènte Ìnchéni.

¹⁷ Méxra tí chaxín t'íkuan tí janhan éxí kichó ni jnkokoá tinkáchónkini Ìnchéni ntá chrók'uayéhé ch'án éxí chrók'uayéhé tí janhan. ¹⁸ A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha. ¹⁹ Janhan Pablo mé tjaná kjinxian tí xroon i na mé janhan tsjénkaha tíha. A ntá janhan tjínkakhya chrókuintaxraxinkavan tí jaha kixin kaín tí nkehe tjasikàna tí janhan kixin kjuákohá jaha. ²⁰ Méxra kichó ni tsotsenkavan sich'e tí nkehe tjáncháha chaxín tinkachónkia Ìnchéni. Mé xikaha sinchechéhé asenná kixin jaha mé kichó ni tinkachónki Cristo.

²¹ Méxra ikjian tí xroon i chr'anhan kixin ó nòna kixin jaha la sinchexiteyá tíha la ko ó nòna kixin jaha la sich'e antsí má que tí nkehe tjáncháha jaha. ²² Kjaxin tjáncháha kixin tjéyá ijnko nchia tsjak'é. Tjéchonhan kixin jahará la nixjehérá Dios la ntá Dios chrókuanjon kjuachaxin kixin chrókuasantsjehará.

Kjuixín nixja ch'ín Pablo

²³ Kjaxin ch'ín Epafra mé nixjaha ch'án jnkojína. Jehe ch'án mé tjéchinakian ch'án jnkokoá tí ntóéchiso ntihi kixin kjaxin tinkáchónki ch'án Cristo Jesús. ²⁴ Ch'in Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkojína. Jehe sín mé tjinkitsana sín tí xra.

²⁵ Tjéjtáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsík'axrjeníxinni nchónhya veces kixin nchónhya nkexrí chrókienxín sín, nixjaxin ch'án tí sín k'uéchrónka tí itén ch'án. ² A ntá jie tió tsjixixín Dios nixjaxin ch'án tí Xjeen ch'án, na mé Dios kjuích'éna ch'án kaín xín nkehe siín kixin kjuachaxién tí Xjeen ch'án, mé tí nkexro k'uáyéhe kaín xín nkehe. ³ Jehe ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxí tsjehe Dios xikaha tsjehe tí jehe ch'án. Jehe ch'án t'aykonhen ch'án kaín xín nkehe siín kixin tí kjuachaxin jie chóna tí tan nixja ch'án. A ntá kjuixin kjuínchetjóa ch'án tí jie chóntani, ntá sákjuí ch'án kjuák'etjaxin ch'án tí tja chjina It'é ch'án tí tjen ch'án t'etoan ch'án nkaya nkajní.

Tí Xjeen Dios imá t'etoan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuénhen tí sín ángel, kixin tsík'áyéhe ch'án tí kjuachaxin kuènte It'é ch'án, a ntá imá t'etoan ch'án, a ntá tí jehe sín la náhí. ⁵ Méxra Dios ntáchehya nijnko ángel kixin:

Jaha mé Xjanna,

janhan mé kjuít'ána tí jaha ijie.

la ko kjaxin ntáchrohya Dios kuènte nijnko ángel kixin:

Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokoá Xjeen Dios chjasintajni, ntá ntáchro Dios kixin:

Kaín tí sín ángel kuènte Dios chrókjuikosáyehe tí jehe ch'án.†

⁷ A ntá ntáchro Dios kuènte tí sín ángel kixin:

Tí sín ángel ch'éna ch'án éxí xrinto kixin nchakuen sín ó,

la ko tí sín ch'ehe ch'án xra la ch'éna ch'án éxí xrohinene.‡

⁸ A ntá ntáche ch'án tí Xjeen ch'án kixin:

Tí trono kuèntá itjen jnkochrín, jaha Dios,

la mé jaha mé ijnko nkexro t'etoan jína.

⁹ Jaha tóxrjínhan tí nkehe jína, a ntá ninkákonhén tí nkehe jínahya.

Mé xikaha tí Dios tsíkjejá jaha, la Dios kuèntá kjuíntacháha má,

a ntá tí í so sín k'uájikoa la kánhyó.§

¹⁰ Kjaxin ntáchro kixin:

Jaha Ìnchéni, tí xrankíxixín kjuích'éna chjasintajni,

la ko jaha kjuích'éna nkajní.

¹¹ Táha mé ts'itjáyan, a ntá jaha la tsjak'e jnkochrín.

Kaín tíha tsontaxín éxí iké chojni,

¹² éxí ijnko iké chojni xikaha tsoxrát'o,

ts'ixinkí éxí ijnko iké chojni.

A ntá jaha la ts'ixitóxinhya jnkochrín tsjak'e,

a ntá tí kjuachón chonta jaha la nunca tsjejehya.*

¹³ Dios la ntáchehya nijnko tí sín ángel kuènte ch'án kixin chrók'uejó sín tja ch'án chjina ntahó chrók'uejoan sín, tsjixinjian kaín xín tí sín nínkakonhen sín la chrókjuachahya sín

* **1:5** Salmo 2.7; 2 Samuel 7.14; 1 Crónicas 17.13 † **1:6** Deuteronomio 32.43 ‡ **1:7** Salmo 104.4 § **1:9** 1.8-9 Salmo 45.6-7 * **1:12** 1.10-12 Salmo 102.25-27

chrók'uetōan sín.† 14 Kaín tí sín ángel mé nchakuen sín ó mé ch'ehe Dios xra mé k'uítuenhen sín tsjinkitsa tí sín ts'áyéhe kjuachaxin tsaá sín.

2

Chrókjoniehyani tí nkehe tsaáxinni

1 Mé xikaha chrókjuenkayáxinni jína tí nkehe ó kuínhinni kixin chrókuítōehyani tí ntia ó kuákjani. 2 A ntá tí tan tsíchronka tí sín ángel ósé la mé tsíkónoxín kixin chaxín tíha. A ntá tí sín kuítekakonhya sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín. 3 ¿Xá nkexrí chrókuaáni tí chrókuaahyani kuentá tí nkehe jie chrókuaáxinni? Jehe Ìnchéni tsíchronka ch'án saoxín nkexrí chrókuaáxinni, a ntá chr'éxin tí sín tsíkinhin mé kjuakōhe sín tí jeheni. 4 Méxra Dios kjuakoxin ch'án kjuaxroan jie la ko kjuachaxin jie kixin chaxín tíha, la ko noexinni kaín tí kjuachaxièn Nchakuen ch'án tsík'áyéheni éxi tjinkaon ch'án tsjanjon ch'án.

Jesucristo k'óna ch'án chojni

5 Dios la tsíchjéhya tí sín ángel kjuachaxin kixin chrók'uetōan chjasintajni chr'éxin éxi tí jie tjeónixjani. 6 Náhí. Éxi nixja xroon itén Dios chronkaxín kixin:

¿Xá nkexéhe tí chojni a, jaha It'éni Dios, kixin imá xráxinkávan tí jehe ch'án?

¿Xá nkexro tíha kixin imá tóxakonhan kixin tí jehe ch'án?

7 Jaha tsíkijch'éna ch'án éxi ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin,

a ntá jie la imá kjuíkosáyehé ch'án;

8 la jaha tsíchjéhe ch'án kjuachaxin kixin kaín nkehe ts'etuenhen ch'án.*

Mé xikaha ntáchro tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuítōehya ninkehó nkehe chrókuitekakuenhya ch'án. Kjánchó naxa t'ikonhyani kixin á kaín nkehe titekakonhen ch'án. 9 Kjánchó ó noheni kixin Jesús la tsíkijch'éna Dios éxi chojni t'etōanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuèhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhe ch'án kjuachaxin náxrjón la ko Dios tjikosáyehé tí jehe ch'án kixin tí kjuasóte ch'án, ik'uén ch'án.

10 Kaín nkehe síin la kuènte Dios la ko tjejó kixin tí kjuachaxin kuènte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjen ch'án tí t'inkaséyan.

Méxra Dios kjuanjon Ìnchéni Jesucristo kixin tsjasóte ch'án kixin ntá jína kjuakoxin ch'án kixin ntá jehe ch'án tsaáxinni ch'án. 11 Kaín tí sín tsíkótjóá la ko tí nkexro kjuínchetjóá na mé chóna jnkokóá It'é. Méxra tí Xjeen Dios tósuèhya ch'án tsontáchro ch'án kixin kichó ch'án tí jehe sín. 12 Éxi ntáchro tí xroon itén Dios kixin:

Tsochénkani tí sín kichó ni kixin nkexro tí jaha,

tsjikosáyahani tsotsjeni himno tí tójnkotsékoni tí sín kichó ni.†

13 Kjaxin ntáchro kixin:

Janhan titekavan Dios.‡

La ko kjaxin ntáchro inaá kixin:

Ntihi tjékian tí xjeen Dios tsíkjanjon ch'án tsík'ayáha.§

14 A ntá tí xjeen chojni mé jnkokóá kichó la k'óna nto la ko ijni; la kjaxin ch'ín Jesús xikaha tsík'óna ch'án nto la ko ijni kixin jína its'en ch'án kixin jína sinchek'itjáyan ch'án tí nkexro chóna kjuachaxin t'óyan chojni, na mé t'axrjexín kixin diablo tíha, 15 mé xikaha chrókjuinchekaá ch'án kaín tí sín chrakonhen sín tí kjuach'en, tjejó sín éxi t'ítuenhen sín kaín yaon tjejó sín. 16 Kjaxin kuihya ch'án kixin chrókjuinkitsa ch'án tí sín ángel. Náhí. Ikui ch'án kixin tsjinkitsa ch'án tí sín tsík'axrjenixin ch'ín Abraham. 17 A ntá

† 1:13 Salmo 110.1 * 2:8 2.6-8 Salmo 8.4-6 † 2:12 Salmo 22.22 ‡ 2:13 Isaías 8.17,18 § 2:13 Isaías 8.17,18

t'ichjánxin chrókóyóhe ch'án éxí tí sín kichó ch'án kixin jína chrók'óna ch'án nchát'á t'etōan kuènte Dios la chrókuikonōeheni ch'án, ntá jína tsjatsen ch'án ijie kaín chojni kixin k'uenyákonhenni ch'án. ¹⁸ Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí Jínahya kixin chrókjuasinhya sín jie.

3

Antsí tjetoan ch'ín Jesús, a ntá ch'ín Moisés la kánhyó

¹ A ntá kichó ni, jahará la tsikótjóará, la mé Dios tsík'iyahará ch'án kixin ts'ónará xjeen ch'án, a ntá chróxaxinkáonrá jína Cristo Jesús na mé jehe ch'án mé tí apóstol la ko tí nchát'á t'etōan kuènte tí nkehe tinkáchónkini. ² Tí ch'ín Jesús jína kuítekakonhen ch'án Dios, mé tí nkexro tsíkjeýá ch'án sich'ehe ch'án xra, éxí kjaxin ch'ín Moisés jína kjuích'e ch'án xra k'uáyakonhen ch'án ntōe Dios. ³ Dios antsí kjuikosáyehe tí ch'ín Jesús, a ntá ch'ín Moisés la kénhyó, éxí antsí tjikosáyehe sín tí nkexro kjuích'ena ijnko nchia, a ntá tí nchia la kénhyó tjikosáyehe sín. ⁴ Jnkojnko nchia k'óna kixin siín nkexro kjuích'ena, kjánchó Dios mé kjuích'ena kaín nkehe siín. ⁵ Ch'ín Moisés jína kjuích'e ch'án xra k'uáyakonhen ch'án tí nchia kuènte Dios. Tí xra kjuích'e ch'án mé k'uénixja ch'án kuènte tí nkehe tsontácho Dios chr'éxin. ⁶ A ntá Cristo la mé Xjeen Dios tí jehe ch'án, ntá kjuínchexiteýá ch'án jína la t'ayakonhen ch'án tí nchia kuènte Dios, la tíha mé jeheni, kixin tí tsítōehyani ch'án la naxa tsinkáchónkini ch'án ntá tsochéheni kixin tí nkehe tjejóchónhenni.

Ts'ok'éheni tí tjen Dios

⁷ Mé xikaha éxí ntácho Nchakuen Dios nixja xroon itén Dios kixin:

A ntá jie tí chrókuinhínrá tí nkehe ntácho Dios,

⁸ chrókjuích'ehyará éxí kjuích'e tí sín ósé kuítekakonhya sín Dios tí yaon kjuích'ehe sín prueba Dios tí nteje.

⁹ A ntá ntaha tí sín tsík'axrjeníxinrá ósé kjuích'ena sín prueba, kjónté cuarenta nánó k'uíkon sín tí xra kjuít'a.

¹⁰ Méxra kónínkakonhan tí chojni a, ntáxrjan kixin: “Xrácín xrichoe asén sín, tjinkakonhya sín tsochóxin sín ntjaná.”

¹¹ Méxra kónínkakonhan tí jehe sín, ntátjan sín

kixin chaxín tsoxiteýá kixin ts'ixenhya sín ts'ok'éhe sín tí tjen janhan.*

¹² Kichóni, chrókóxakonhanrá kixin chrókókohya nijnko tí jahará chróchontará asánrá jínahya chrókuítōhérá Dios tjechón chrókuítekákuenhyará tí jehe ch'án.

¹³ Chrókjuínchechéhérá kichuárá jnkojnko yaon naxa tjen tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchohya asánrá kixin naxa chrókójiáhará. ¹⁴ A ntá tí chrók'uejóni jnkojína hasta tsjixixín éxí kuinkáchónkini tí xrankíxixín, ntá siín kjuachaxin ts'ejókoni Cristo.

¹⁵ Mé xikaha ntácho kixin:

A ntá jie tí chrókuinhínrá jahará tí nkehe ntácho Dios,

chrókjuích'ehyará éxí kjuích'e tí sín ósé kuítekakonhya sín Dios.†

¹⁶ ¿A ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsíkakitsjexín ch'ín Moisés tí nación Egipto? ¹⁷ ¿A ntá nkexro tí kónínkakonhen Dios tí cuarenta nánó? ¿Á jehya tí sín kjuasin jie k'uénxin nteje? ¹⁸ ¿A ntá nkexro ntáche Dios kixin chaxín tsoxiteýá kixin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya? ¹⁹ A ntá ó noheni kixin kjuachahya sín k'uíxenhén sín kixin kuítekakonhya sín.

* 3:11 3.7-11 Salmo 95.7-11 † 3:15 Salmo 95.7-8

4

¹ Méxra, tsíntáchro Dios kixin tsjanjon ch'án kjuachaxin ts'ixenhenni ts'ok'éheni tí tjen ch'án, a ntá tóxakonhenni kixin ách'e jnkojín tí jahará chrókjuachahyará chrók'uixenhenrá ntiha. ² Kixin kjaxin jeheni kuínhinni itén ch'án tsaáxinni éxí kuínhin tí jehe sín, kjánchó tí jehe sín la ninkehó kjuínkítsahya sín tí tan jína kuínhin sín, kixin kjónté kuínhin sín tí tan na kuítekakonhya sín. ³ A ntá jeheni kuítekaonni, ntá ts'ixenhenni ts'ok'éheni ntaha, éxí tsíntáchro Dios kixin:

Méxra kóninkakonhan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjén janhan.*

Kixin Dios la tió kjuixinhin ch'án xra kjuích'éna ch'án chjasintajni ntá kjuák'e ch'án k'ok'éhe ch'án. ⁴ Mé xíkaha í jnko nketí nixja tí xroon itén Dios chrónka kuènte tí yaon yatoxin ntáchro kixin:

Kjuixinhin Dios kaín xra ntá kjuák'e ch'án k'ok'éhe ch'án tí yaon yatoxin.†

⁵ A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjáyan jnkojín chojni chrók'uixenhen sín chrók'ok'éhe sín. A ntá tí sín saoxín kuínhin tí tan chrókuaáxin sín la k'uixenhya sín kixin kuítekakonhya sín tí tan a.

⁷ Méxra Dios tsíkjeýá ch'án í jnko yaon, mé tí yaon jie, a ntá chr'éxin nixjaxin ch'án tí nkehe tsíchrónka ch'ín David éxí ntáchro tí xroon itén Dios kixin:

A ntá jie tí tsinhínra tí nkehe ntáchro Dios, chrókjuínchexiteyará.§

⁸ Kixin tí chrókjuanjon ch'ín Josué kjuachaxin kixin chrók'ok'éhe tí sín israelita,* ntá Dios la í chrónixjahya ch'án kuènte í jnko yaon. ⁹ A ntá naxa tjechónhen tí ts'ok'éhe tí sín tinkáchónki Dios; ¹⁰ kixin tí nkexro ts'ixenhen ts'ok'éhe tí tjen Dios tsíkjixinhin ch'án tí xra kuènte ch'án éxí yóhe kjaxin Dios kjuixinhin ch'án tí xra kuènte ch'án ntá kjuák'e ch'án k'ok'éhe ch'án. ¹¹ T'ichjánxin kixin kaín asénni chrókjueyáni nkexrí chrók'uixenhenni chrók'ok'éheni, kixin chrókóyóehyani éxí tí sín kuítekakonhya.

¹² Kixin tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí ninka asén chojni la ko nchakuen chojni hasta tí nkaya asén chojni. Tíha mé nchexraxinkaon chojni kaín nkehe tjenkayáxin sín la ko kaín nkehe ntáchro asén sín. ¹³ Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kixin kaín nkehe la noxín siín t'ikon tí nkexro ts'áyéhe kuentá.

Jesús mé tí nchat'á imá tjetooan

¹⁴ Jesús tí Xjeen Dios mé tí nchat'á tjetooan kuénténi mé k'uixenhen tí tjen Dios la méxra chrókuíteohyani tí tinkáchónkini tí jehe ch'án. ¹⁵ Méxra jehe ch'án mé tí nchat'á tjetooan kuénténi mé tsjinkítsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxí sítónhen tí jeheni, kjánchó jehe ch'án la ninkehó jie kjuasinhya ch'án kjónté xíkaha kónhen ch'án. ¹⁶ Méxra kaín asénni chrókóchjineheni Dios tí tjen ch'án t'etooan ch'án kixin chrókuíkonóeheni ch'án la ko chrókjuinkítsa ch'án tí jeheni tí nkehe chrók'uichjánxinhinni.

5

¹ Kaín nchat'á t'etooan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjáyanxín tí jie kuènte chojni.

² Kjaxin tí nchat'á a la fuértehya kixin chojni ó, a ntá chrókóninkakuenhya ch'án tí sín noehya la ko tí sín tsíkjichroe. ³ Kjaxin jehe ch'án, kixin fuértehya ch'án t'ichjánxin tsjanjon ch'án iko its'en kixin tí jie chóna ch'án jehe ch'án éxí tjanjon ch'án nkehe kuènte tí í so chojni chóna jie.

* 4:3 Salmo 95.11 † 4:4 Génesis 2.2 ‡ 4:5 Salmo 95.11 § 4:7 Salmo 95.7-8 * 4:8 Josué 22.4

⁴ Ninkexró xitjahya jehó sich'éna asén nchat'á t'etōan. Náhí. Jehó tí sín tsíkjeýá Dios tsík'áyéhe tí xra éxí tsík'áyéhe ch'ín Aarón. ⁵ Mé xíkaha Cristo, kjuích'énahya ch'án jehó ch'án asén ch'án nchat'á t'etōan. Náhí. Dios mé kjuikosáyehe ch'án mé tsíkjanjon tí xra éxí tsintáchro kixin:

Jaha mé xjanna;

Janhan mé kjuít'ána ijie.*

⁶ Kjaxin í jnko nketí nixja xroon itén Dios ntáchro kixin:

Jaha mé ijnko nchat'á tsjak'e jnkochrín,

éxí yóhe k'uékjak'e ch'ín Melquisedec.†

⁷ Tió kjuák'e Cristo ntihi chjasintajni imá tsjánka ch'án la ko itsen chrónóhe ch'án Dios, kixin Dios chóna kjuachaxin chrókjuinchekaá ch'án kixin chrók'uenhya ch'án; la Dios la kuínhin kixin xíkaha kuítekaon ch'án. ⁸ Méxra Cristo, kjónté Xjeen Dios, la kuítekaon ch'án kjuínchexiteyá ch'án kjónté tí kjuasote ch'án. ⁹ Mé kjuínchexiteyá ch'án, ntá kjuacha ch'án k'óna ch'án tí nkexro sinchekaá jnkochrín kaín tí chojni sinchexiteyéhe tí jehe ch'án.

¹⁰ A ntá Dios mé tsíkjach'éna ch'án nchat'á t'etōan éxí yóhe kjuák'e ch'ín Melquisedec.

Jehya jína chrókuítóheni tí tinkáchónkini Inchéni

¹¹ Chóntani nchónhya nkehe chróchrónkani kuènte tíha, kjánchó imá xra chróchrónkaxínni tíha kixin tiénxinyará jahará. ¹² Ntá k'uátsínka nchónhya tiempo, a ntá ó jína chrók'ónará maestro, ntá náhi kixin naxa t'ichjánxinhanrá nkexro chrókjuakohará inaá tí nkehe xrahya kuènte itén Dios. Éxí xík'ónará lontirá, t'ichjánxin chrók'uirá tsjen inaá kixin xitjahya sinterá nkehe cha. ¹³ A ntá tí sín it'i tsjen ó, na mé yóhe chánjan takí tsjachahya sín tsjeyá sín nkexrí chrók'uejó sín jína. ¹⁴ Á ntá tí nkehe cha mé ine tí chojni nteto kixin ó nohe sín ti nkehe jína la ko tí nkehe jínahya.

6

¹ Naxa chrókjueyáni kixin jína chrókjuenkayáxinni éxí chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxín kuènte Cristo. Náhí. T'ichjánxinhya naxa chrókjuakoharáni kixin chrókuítóhérá tí jie k'uékjásinrá chrók'uénxinrá, la ko nkexrí chrókuinkachónkirá Dios, ² la ko nkexrí chrókuikite chojni, la ko nkexrí ts'ejotja tjará chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítóexín ijie chojni. ³ A ntá tí Dios chrókjuanjon kjuachaxin la chrókjuakoni í so nkehe.

⁴ A ntá tí sín ó tsík'áyéhe sín tí xrohi, la ko ó tsjexín sín tí nkehe kjuanjon Dios, la ko tsík'áyéhe sín tí Nchakuen Dios, ⁵ la ko kóxrjínhin sín tí nkehe jína kuènte itén Dios, la ko kónohe sín nkexrí tí kjuachaxin tsochóna tí chjasintajni chr'éxin, ⁶ a ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín inaá, kixin tí xíkaha la éxí chrókjuak'enkani sín ntacruz tí Xjeen Dios inaá la ko chrókjuanoá sín ch'án nkayakon nchónhya chojni. ⁷ Éxí nonte jnkojnko vez t'aniá chrin la tsjatan la ts'óna jína, a ntá kjuacha tí sín kjuích'e xra kixin Dios kjuíncheyaon ntiha. ⁸ A ntá tí t'óna ntach'í la ko kach'í la ninkehó sínkíhya la tsonínkakonhen Dios, la tí tsjixixín mé tsoche.

Tí nkehe tjejóchónhenni mé tjinkítsa kixin jína ts'ejóni

⁹ Kjónté nixjani xíkaha, kichó ni, ó noheni kixin chaxín jína tjejorá k'uitjará tí ntia tsaáxinrá. ¹⁰ Kixin Dios la jína, la ts'itjáyenhya ch'án tí xra jína tjejoch'erá kixin tjuèherá kichuára, mé xíkaha kjuákoxinrá kixin kjuínkítsará tí kichuára tinkáchónki Cristo la naxa tjejótjinkítsará sín xíkaha. ¹¹ Tjinkaonni kixin jnkojnkorá chrókjuákoxinrá hasta tsjixixín kixin chontará kjuachéhe chrókjuínkítsará kichuára kixin chaxín ts'ayéhérá tí nkehe tjejochonhérra. ¹² Tjinkakonhyani kixin chrókjanrá chrókósáhará. Náhí. Tjinkaonni kixin

* 5:5 Salmo 2.7 † 5:6 Salmo 110.4

chrókjuáko_xinrá éxí tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsíntáchro Dios kixin tsjanjon ch'án.

¹³ A ntá Dios, tió tsíntáchro ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjenxin asén kixin kohya nkexro antsí tjetooan chrók'uákjenxin ch'án. ¹⁴ Ntáchro ch'án kixin chaxín sincheyaon ch'án tí ch'ín Abraham la ko nchónhya chojni ts'axrjeníxin tí jehe ch'án.* ¹⁵ Ch'ín Abraham kjuák'echónhen ch'án isé kixin ts'áyéhe ch'án tí nkehe tsíntáchro Dios. ¹⁶ A ntá tió t'ákjenxin chojni ijnko nkexro la mé t'ákjenxin sín ijnko nkexro antsí tjetooan, a ntá jehó sín la náhi. A ntá ts'ákjenxin sín tí xikaha kixin ijnko nkehe tsoxiteyá, a ntá kohya nkexro tsontáchro ninkehó. ¹⁷ Méxra Dios k'uákjenxin ch'án asén ch'án tsíntáchro ch'án kixin chaxín tsoxiteyá, kixin tjinkaon ch'án chrókjuáko_xin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsíntáchro ch'án la í tsjitóxiénhya ch'án ninkehó tíha. ¹⁸ Mé xikaha siín yaá nkehe xitjahya ts'ixitóxin, kixin Dios la xitjahya sich'ia; kixin tíha Dios nchenoexínni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni tí nkehe tsjanjon ch'án. ¹⁹ Tí tjejóchónhenni xikaha la jína ts'ejó asénni éxí yóhe tí ntabárcó chóna gancho tjechrúexin kixin kohya nketí sátsji. Méxra xikaha kjaxin tí nkehe tjejóchónhenni la sátsíkji hasta nóton tí ka cortina tjen nkaxenhen nínko tjen nkaya nkajní, ²⁰ tí senó k'uixenhen Jesús kuakitjehe ch'án ijnko ntja ts'ixenxínni. Mé xikaha jehe ch'án k'óna ch'án nchat'á t'etooan jnkochrín éxí yóhe kjuák'e tí ch'ín Melquisedec.

7

Ch'ín Jesús mé nchat'á éxí yóhe k'uékjak'e ch'ín Melquisedec

¹ Tí ch'ín Melquisedec mé k'ué rey kuènte chjasin Salem la ko nchat'á kuènte Dios tjen nkaya nkajní. A ntá tió ch'ín Abraham kjanxin ch'án tí tsíkjikjanjonko ch'án tí í so sín rey, kjuacha ch'án, ntá ch'ín Melquisedec kjuíxinhin ch'án ntja ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham. ² A ntá tí ch'ín Abraham chjehe ch'án tí ch'ín Melquisedec diezmo kaín xín nkehe tsíkjacha ch'án tí tsíkjikjanjonko ch'án tí sín rey.* A ntá ihnié ch'ín Melquisedec mé t'axrjexín saoxín kixin “ijnko rey jína”; a ntá jehe ch'án k'ué rey kuènte chjasin Salem, tíha mé t'axrjexín kixin “kjuaxróxin”, la mé xikaha jehe ch'án mé “ijnko rey tjanjon kjuaxróxin”. ³ A ntá ch'ín Melquisedec la noehya sín nkexro it'é ch'án la ko nkexro ìné ch'án la ko nkexro tsík'axrjeníxin ch'án; la ko noehya sin nkesá tsíkokjíhi ch'án la ko nkesá tsík'en ch'án. Mé xikaha tóyóhe tí Xjeen Dios kixin jehe ch'án mé ijnko nchat'á jnkochrín.

⁴ A ntá jie, tsjehérá kixin imá t'etooan tí ch'ín Melquisedec kixin tí ch'ín Abraham k'uaxrjeníxinni, la tsíchjehe ch'án tí ch'ín Melquisedec diezmo tí nkehe tsíkjacha ch'án tí tsíkjanjonko ch'án tí sín rey. ⁵ Éxí nixja ley tsík'etooan ch'ín Moisés, kixin tí sín nchat'á tsík'axrjeníxin tí ch'ín Leví chóna sín kjuachaxin tsjanchehe sín kaín xín chojni diezmo kjónté naxa kjéhya sín, tsík'axrjeníxin sín tí ch'ín Abraham éxí tí jehe sín. ⁶ A ntá ch'ín Melquisedec, kjónté tsík'axrjeníxinhya ch'án tí ch'ín Leví, na mé kjuích'ehe ch'án cobra tí ch'ín Abraham, mé tí ch'ín tsík'áyéhe tí nkehe tsíntáchro Dios. Mé xikaha tí ch'ín Melquisedec tsíkjincheyaon ch'án tí ch'ín Abraham. ⁷ Kohya nkexro tsontáchro kixin chaxínhya kixin tí nkexro ncheyaon la antsí má t'etooan, a ntá tí nkexro tsíkóyaon la t'etooanhya. Náhi. ⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntáchro tí xroon itén Dios kixin tí ch'ín Melquisedec mé ijnko chojni naxa tsík'enhya, la naxa tjechón. ⁹ Mé t'axrjexín kixin ch'ín Leví la ko kaín xín tí sín nchat'á tsík'axrjeníxin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sin diezmo tí ch'ín Melquisedec tió tsíkjenka ch'ín Abraham, ¹⁰ kixin naxa tjiko cuerpo kuènte ch'án tí sín ts'axrjeníxin ch'án, naxa kokjéhya sín tió xeta ch'án tí ch'ín Melquisedec.

* **6:14** Génesis 22.16-17 * **7:2** 7.1-2 Génesis 14.17-20

11 Tí sín nación Israel tsík'áyéhe sín tí ley kixin tí sín nchat'á levita, mé tsík'axrjenixin sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naxa chrókónoxín í jnko nchat'á í chrókóyóehya éxí tí ch'ín Aarón. A ntá kjuachahya sín xikaha ntá t'ichjánxín chrókónoxín ijnko nchat'á chrókóyóhe éxí tí ch'ín Melquisedec. 12 A ntá tí chrók'uixinkí tí nchat'á la kjaxin chrók'uixinkí tí ley. 13 A ntá tí xroon itén Dios chrónka tíhi kuènte Ìnchéni. A ntá jehe ch'án la tsík'axrjenixin ch'án í jnko nkexro kuènte Israel la kohya ninkexró tsík'óna nchat'á tsík'axrjenixin tí sín a. 14 Kixin ó noxín kixin Ìnchéni tsík'axrjenixin ch'án tí ch'ín Judá, a ntá ch'ín Moisés la chrónkahya ch'án ninkehó kuènte tí sín ts'axrjenixin tí ch'ín a tió nixja ch'án kuènte tí sín nchat'á.

15 A ntá tíhi la antsí má kónoxín kixin tí nchat'á nixin la tóyóhe éxí ch'ín Melquisedec 16 kixin tió k'óna ch'án nchat'á la jehya kixin xikaha chrók'uetoan ijnko ley kixin nkexro chrók'uaxrjenixin ch'án. Náhí. Ó jehí k'óna ch'án nchat'á kixin tí kjuachaxin chóna ch'án la xitjahya ts'itjáyan. 17 Kixin nixja Dios kixin nkexrí tjen tí jehe ch'án, ntáchro kixin:

Jaha mé ijnko nchat'á tsjak'e jnkochrixin,
éxí yóhe k'uékjak'e ch'ín Melquisedec.†

18 Méxra tí nkehe k'uék'etoan senó mé ch'ehya xra jie kixin kánhyó kjuachaxin k'uéchóna la ko kjuachahya, 19 kixin tí nkehe k'uetoan ch'ín Moisés kjuachahya kjuínchetjóá ninkehó nkehe. A ntá jie chónatani ijnko nkehe antsí jina tjejóchónhenni kixin tíha mé antsí jina tsochjinexinni Dios.

20 A ntá tió ntáchro Dios tíha la tsík'ákjenxin ch'án asén ch'án jehó ch'án. 21 La ntá tí í so nchat'á, tió tsíkónoxín sín, tsík'ákjenxinhya Dios asén ch'án. A ntá tió tsíkónoxín tí nchat'á í la Dios tsík'ákjenxin ch'án asén ch'án. A ntá ntáchro xroon itén Dios kixin:

Ìnchéni tsík'ákjenxin asén ch'án
a ntá ts'ixitóxinhya tí nkehe tsíntáchro ch'án:
“Jaha mé ijnko nchat'á tsjak'e jnkochrixin
éxí yóhe k'uékjak'e ch'ín Melquisedec.”‡

22 Méxra ch'ín Jesús ntáchro kixin tí pacto t'etoan ch'án la antsí má jina, a ntá tí pacto senó la náhi. 23 Ntá k'uixin nchónhya sín nchat'á, kjánchó nkák'en sín, ntá xitjahya naxa chrókjuich'e sín tí xra a. 24 A ntá ch'ín Jesús la ts'enhya ch'án la t'ichjánxinhya kixin í jnko nkexro chrókuakja tí xra kuènte ch'án chrók'óna nchat'á. 25 Méxra jehe ch'án tsjacha sinchekaá ch'án jnkochrixin tí sín tsochjinehe Dios kixin tinkáchónki sín tí jehe ch'án kixin itjen ch'án jnkochrixin chrónóehé ch'án Dios kixin chrókjuinchekaáni ch'án.

26 Mé xikaha Jesús mé tí nchat'á t'etoan t'ichjánxinhinni; jehe ch'án mé ijnko nkexro tjóá, chónahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní. 27 Ntá tóyóehya tí í so nchat'á t'etoan, kixin t'ichjánxín ts'óyan sín iko tsjanjon sín tsochjéhe sín Dios kaín yaon, saxín kixin tí jie kuènte sín, a ntá chr'éxin kixin tí jie chóna tí í so chojni. A ntá ch'ín Jesús jnkokoaxón vez kjuanjon asén ch'án ik'uén ch'án. 28 Tí ley k'uék'etoan ch'ín Moisés t'etoan kixin chojni naxa chóna jie chrók'óna nchat'á, a ntá Dios tsík'ákjenxin asén ch'án tió kjuixin k'óna tí ley, ntáchro ch'án kixin tí Xjeen ch'án mé ts'óna nchat'á t'etoan kixin jina kjuínchexiteyá ch'án jnkochrixin.

8

Ch'ín Jesús nixjaxin ch'án ijnko pacto nixin

1 Tí nkehe antsí má tjetjoan chrónkani la mé tíhi kixin tí nchat'á kuènteni mé t'etoan ch'án, la ko tjetjaxin ch'án nkaya nkajní, nó chjina tí trono t'etoanxín Dios, 2 k'óna ch'án nchat'á tí nínko chaxín tsík'jich'éna Ìnchéni, la jehya chojni tsík'jich'éna tíha. 3 Kaín nchat'á t'etoan tsík'áyéhe xra kixin tsjanjon nkehe la ko iko its'en. Méxra Jesucristo t'ichjánxín kixin tsjanjon ch'án ichrén nkehe. 4 Tí chrókjuak'e ch'án chjasintajni, chrók'ónahya ch'án

† 7:17 Salmo 110.4 ‡ 7:21 Salmo 110.4

nchat'á kixin naxa siin nchat'á tjanjon nkehe k'uetōan tí ley tsík'áyéhe ch'ín Moisés. ⁵ A ntá tí sín nchat'á k'uekjanjon nkehe tóyóhó tí nkehe siin nkaya nkajní. Noheni kixin tóyóhó kixin tió ch'ín Moisés chrókjuich'éna ch'án ninko la ntáche Dios tí jehe ch'án kixin: “Tjenkayáxian jína, a ntá sich'éna jaha éxí tí nkehe kjuákuáxian chrítaón jna.”* ⁶ A ntá tí nchat'á t'etōan kuènteni tjech'e ch'án xra antsí jína kixin jehe ch'án mé tí nkexro nixjaxin tí pacto nixin tsintáchro Dios chrónka tí nkehe jína tsonhen chr'éxin.

⁷ A ntá tí pacto tsík'etōan saoxín la tí chróxiteyá jína, la t'ichjánxinhya chrók'óna yóxin pacto. ⁸ A ntá Dios k'uikon kixin kjuínchexiteyáhya tí sín a, éxí ntáchro xroon itén Dios kixin: Ntáchro Ìnchéni kixin: Itsi ijnko yaon

mé tsjánjuan ijnko pacto nixin tsochóna tí sín nación Israel la ko tí sín chjasin Judá.

⁹ Jehya xikaha tí pacto kuétuanhan tí sín tsík'axrjeníxinrá ósé, tí yaon kjuínkítsa sín k'uaxrjexín sín tí nación Egipto; kjánchó kjuínchexiteyáhya sín tí pacto kuétuanhan sín, méxra kuitōha sín, ichro Ìnchéni.

¹⁰ Tí pacto tsétuanhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráxinkavan asén sín tí ley tsétōan,
a ntá tí kjuaxrexinkaon kuènte sín tsokjian tí nkehe tsétuanhan sín.

A ntá janhan ts'óna Dios kuènte sín,
a ntá jehe sín mé ts'óna chjasin kuèntana.

¹¹ Ts'ichjánxinhya naxa tsjakōhe kichó sín

kixin chróchóxin sín Ìnchéni,
kixin kaín sín tsochóxinna sín,
kjónté chojni imá ntsínsí la ko chojni imá hyé.

¹² Sintak'itjáyán tí nkehe jínahya kjuích'e sín
la ko í tsoxráxinkakonhya inaá tí jie chóna sín.†

¹³ Xikaha nixja Dios kuènte tí pacto nixin ts'etōan ch'án kixin tsíkóntaxin tí pacto saoxín k'uetōan ch'án, tíha mé tinkákóntaxin la ko tinkákjeje, na í séhya ts'itjáyán.

9

Tí ninko chjasintajni la ko tí ninko nkaya nkajní

¹ A ntá tí pacto saoxín t'etōan nkexrí chróxraxinkaonni Dios, kixin tí ninko ntihyó chjasintajni. ² A ntá tí ninko k'uekjak'e mé tí cuarto saoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejókjen tí niotja k'uexraxinkakonxín sín Dios.

³ Nóton tí yóxin ka cortina kjuák'e tí cuarto k'uekjinchek'in sín tí Cuarto Antsí Tjóá. ⁴ Ntiha k'uekjak'e tí altar tsík'óna chica oro k'uekjakaxín sín tí chjincō la ko k'uekjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uekjak'e ijnko nchésen tsík'óna chica oro k'uek'inka maná k'óna niotja, la ko kjaxin k'uekjak'e tí nta k'uekjixín ch'ín Aarón kjuankixin k'uayan nta ntahnte, la ko kjaxin ntiha kjuák'e tí xro chóna tí tan k'uetōan Dios. ⁵ Chrítaón tí ntacajón k'uek'ejó yaá ángel tsíkjanoya tsíkjentoá kanēnee chrítaón tí kjuák'e tí kjuachaxin kuènte Dios; ntaha k'uekjlinxín tí jie k'uechóna chojni. A ntá ijie la t'ichjánxinhya naxa tsonixjani kuènte tíha.

⁶ A ntá xikaha k'uejó tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuènte ninko kixin tí xra ch'e sín kuènte ninko. ⁷ A ntá tí yóxin cuarto jehó tí nchat'á t'etōan t'ixenhen ch'án jnkokoá vez jnkoinko nánó; a ntá tí t'ixenhen ch'án t'ichjánxin ts'ixenko ch'án ijnié iko tsochjéhe ch'án Dios tsotjuáxin ijie ch'án la ko ijie tí i so chojni.

⁸ A ntá tí Nchakuen Dios nchenoexínni tíhi kixin nachrohe k'uekjich'e xra tí cuarto saoxín la naxa tjexrankehya kixin chrók'uixenhenni tí Cuarto Antsí Tjóá. ⁹ Kaín tíha tjakoxin

* 8:5 Éxodo 25.40 † 8:12 8.8-12 Jeremías 31.31-34

ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín kixin á chaxín kótjóá tí jie k'uéchóna sín kixin xikaha k'uéxraxinkaon sín Dios. ¹⁰ A ntá tíha jehó t'etóan kuènte tí nkehe chrókjóné sín la ko tí nkehe chrók'ui sín la ko tí chrók'ónti sín kixin chrókótjuáxin ijíé sín, kaín tíha mé k'uítuenhen sín kuènte cuerpo ó la jehó k'uéchóna kjuachaxin tí naxa kjuinkíhya Dios nkexrí chróxraxinkaon sín ch'án.

¹¹ A ntá ó kui Cristo, jehe ch'án mé nchat'á t'etóan kuènte tí nkehe antsí jína itsi. A ntá tí nínko ch'e ch'án xra la antsí jína la ko antsí ntoá, la jehya chojni tsíkjich'éna tíha kixin jehya chjasintajni ntihi tjen. ¹² Tió k'uíxnenhen Cristo tí Cuarto Tjóá, la jehya kixin chrókjuanjon ch'án ijnié kotèntsò la ko ijnié koxintáxjan. Náhi. Ijnié ch'án kjuanjon ch'án; mé xikaha k'uíxnenhen ch'án jnkokoá vez ntiha mé xikaha kjuenká ch'án kixin chrókuaáxinni jnkochrín. ¹³ A ntá tí ijnié koxinta la ko ijnié kotèntsò la ko tí nteso kuènte tí koxintáxjan tsíchexín tí altar tikitexín tí sín tjuáhya la mé tíha chóna kjuachaxin tsotjuáxin tí chrítaón ó. ¹⁴ A ntá tí xikaha, la kjá antsí má chóna kjuachaxin tí ijnié Cristo. Kixin tí kjuachaxin Nchakuen Dios tjen jnkochrín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chónahya ch'án. A ntá ijnié ch'án nchetjóá tí nkehe kjuích'eni senó chrók'uenxínni kixin ntá jie la jína chrókjuich'ehe ni xra Dios tjechón.

¹⁵ Méxra Jesucristo nixjaxin ch'án tí pacto nixin k'uetoan Dios. Kixin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuenhenni senó; kixin tí sín k'uíyehé Dios la jína chrók'uáyéhe sín tí nkehe tsjejehya kixin jehe ch'án xikaha tsintáchro ch'án tsjanjon ch'án. ¹⁶ A ntá tí siín ijnko nkehe tsintáchro ijnko chojni kjuák'e na ntá ik'uén la t'ichjánxin tsonoxín kixin chaxín tsík'en tí nkexro tsíkjich'éna. ¹⁷ A ntá tí nkehe tsintáchro ch'án la sínkíhya tí naxa tjechón tí nkexro tsíkjich'éna; jehó tió chrók'uen ch'án mé sínkí. ¹⁸ Méxra tí pacto xrankíxín tsík'etóan Dios kjuankíxin kjuích'e xra kixin k'uítji ijni. ¹⁹ Ch'ín Moisés tsíchronka ch'án kaín nkehe tsík'etóan tí ley kuínhin kaín tí chojni; a ntá chr'éxin kuákja ch'án ichjóén kolélo kjátse la koí ntarama hisopo, ntá kjuínchekjatjaxin ch'án ijnié koxintáxjan la ko ijnié kotèntsò tsíkjiko ìnta, ntá kuíkjanjin ch'án tí libro chóna ley la ko kuíkjanjin ch'án kaín tí chojni. ²⁰ A ntá ntáchro ch'án kixin: “Tí jni i tsoxiteyáxin tí pacto k'uetoan Dios chrókjuínchexiteyéherá jahará.”* ²¹ Tí ch'ín Moisés kjaxin kuíkjanjin ch'án jni tí nínko la ko kaín nkehe t'ichjánxin tí nkaxenhen nínko. ²² Kixin xikaha ntáchro tí ley kixin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uixikjanjinhya jni.

Tí ik'uén Cristo mé tsjìnxín ijíéni

²³ Méxra t'ichjánxin kixin ik'uén iko kótjuáxin tí nkehe a, táha mé tóyóhó tí nkehe siín nkaya nkajni; a ntá tí nkehe chaxín kuènte nkaya nkajni t'ichjánxin ijnko nkehe antsí jína chrók'uen. ²⁴ A ntá Cristo k'uíxnenhya tí nínko tsíkjich'énaixin chojni tja, táha mé ijnko nkehe tóyóhó tí nínko chaxín. Náhi. Jehe ch'án mé k'uíxnenhen ch'án tí nkaya nkajni, a ntá jie mé tjen ch'án tí tjen Dios nixjaxin ch'án kaín ni. ²⁵ A ntá jehe ch'án la jehya jnkoyaxón k'uíxnenhen ch'án ntiha k'uenyákonhenni ch'án. Náhi. A ntá tí nchat'á t'etóan t'ixenhen tí Cuarto Tjóá jnkoinko nánó kixin tsjanjon ch'án ijnié ko ó. ²⁶ A ntá tí xikaha chrókónhen Cristo la t'ichjánxin kixin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kixin tsjìnxín ijíéni. ²⁷ Mé xikaha kaín ni its'enni jnkokoá vez, a ntá chr'éxin tsitoxén ijíéni. ²⁸ Mé xikaha kjaxin Cristo jnkokoá vez ik'uén ch'án kixin tsjìnxín ijíé nchónhya chojni. A ntá chr'éxin itsi ch'án inaá, jehya kixin naxa tsjatsen ch'án ijíé chojni. Náhi. Sinchekaá ch'án tí chojni ó tsíkótjóá tjejóchónhen itsi ch'án.

* 9:20 9.19–20 Éxodo 24.6–8

10

¹ A ntá tí ley k'ue_{to}anxín ch'ín Moisés la tóyóhó tí nkehe jína tsi la jehya tí nkehe chrókuaáxinni. Méxra tí ley kjuachahya kjuínchetjóá tí sín kóchjinehe Dios kjuanjon sín iko its'en jnkojnko nánó. ² A ntá tí chrókjuacha tí ley chrókjuinchetjóá ijíé sín, ntá chrókjuenkayáxinhya sín kixin naxa chróchónta sín jie, la chrókuítóhe sín, í chrókjuanjonhya sín iko its'en. ³ A ntá xikaha ich'e sín t'óyán sín ko, la jnkojnko nánó xraxinkakonxín sín tí jie tsíkjasin sín ⁴ kixin ijníé koxinta la ko ijníé kotèntso xitjahya tsjìnxín ijíé chojni.

⁵ A ntá tió Cristo kui chjasintajni ntáche ch'án Dios kixin:

Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhi. Jaha tsíkjih'éna ijnko cuerpo kixin tsochonta janhan.

⁶ Jaha tóxrjíanhya iko tsíchján la ko tí í so nkehe chrókjuanjonni chrókjuakjìnxian ijie.

⁷ A ntá ntátjan ch'án kixin: “A ntá ijie la ntihi tjén janhan kixin sintaxiteyá tí nkehe tóxrjínhan jaha Dios,

éxí nixja xroon chrónka nkexrí chrókjuít'a.”*

⁸ Senó ntáchro kixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni chrókjuínxín ijíéni kjónté tí ley k'ue_{to}an kixin xikaha chrókónhen. ⁹ A ntá chr'éxín tsíntáchro kixin: “A ntá k'uinka janhan kixin sintaxiteyá tí nkehe tóxrjínhan jaha Dios,” ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe nixin. ¹⁰ Dios kjuínchetjuáxinni kixin Jesucristo kjuínchexiteyá éxí tóxrjínhin Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrín.

¹¹ A ntá kaín nchát'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjìnxín ijíé chojni. ¹² A ntá Jesucristo mé jnkokoá vez k'uenyákonhenni ch'án kixin tsotjuáxin ijíéni la tíha mé sich'e xra jnkochrín. A ntá kjuixin ntá sákjuí ch'án kjuák'etjaxín ch'án nó tí tja chjina kuènte Dios. ¹³ A ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'etoan sín. ¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsíkótjóá.

¹⁵ A ntá tí Nchakuen Dios nchenoheni tíhi kixin senó tsíntáchro kixin:

¹⁶ Tí pacto tsotjaha tí jehe sín tió ts'atsínka tí yaon a, ichro Ìnchéni;

Sintaxráinkavan asén sín tí ley tsétoan,

a ntá tí kjuaxrexinkaon kuènte sín tsokjian tí nkehe tjínkavan.†

¹⁷ Kjaxin ntáchro kixin:

Í tsoxráxinkakonhya inaá tí ijíé sín la ko tí nkehe jínahya kjuích'e sín.‡

¹⁸ Mé xikaha tí ó kótjóá ijíéni la t'ichjánxinhya í so nkehe chrókjuanjonni chrókótjuáxin tí ijíéni.

Méxra t'ichjánxín tsochjineheni Dios

¹⁹ Kíchóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijníé Jesucristo, ²⁰ chréheni tí ntia nixin mé tí ntia tjechón kuakitjehe ch'án nóton tí ka cortina, tíha mé tí cuerpo kuènte ch'án. ²¹ Jesús mé tí nchát'á tjetóan kuènteni t'etoan tí ntóe Dios. ²² Méxra xikaha chrókóchjineheni Dios kaín asénni chrókuinkáchónkini ch'án chaxín kixin jehe ch'án tsíkjinchetjóá ch'án asénni kixin chrókjuenkayáxinhyani kixin naxa chóntani jie kixin tí cuerpo kuènteni kótjuáxin tí ntá jehó. § ²³ Chrókuítóehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsíntáchro ch'án. ²⁴ Chrókjueyáni nkexrí chrókjuinkítsani kichó ni kixin chrótjuèheni kichó ni la chrókjuich'eni tí nkehe jína. ²⁵ Chrókuítóehyani chrókójnkséni, chrókóyóehyani éxí tí sín í tójnkséhya sín. Náhi. Chrókjuinchechéheni kichó ni antsí má jie kixin ó noheni kixin í séhya tsokjan Ìnchéni.

* **10:7** 10.5-7 Salmo 40.6-8 † **10:16** 10.16-17 Jeremías 31.33-34 ‡ **10:17** 10.16-17 Jeremías 31.33-34 § **10:22** Zequiel 36.25

26 **A** ntá tí naxa chrókjuenkayáxinni chrókjuasinni jje tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jje chóntani. 27 **A** ntá jehó itjen tí kjuachrakon jje tsitoexín jje la ko tí xrohi tjeche ts'itjáyanxín tí sín nínkakohen Dios. 28 **A** ntá tí tjen jnkojín nkexro titekakonhya tí ley k'uetoxán ch'ín Moisés, la tsonoxín yaá o y'á tí sín tsík'ikon tí jje tsíkjasin sín, tíha mé ts'enxín sín la kohya nkexro tsíkonóehé tí jehe sín. 29 ¿Á tjenkayáxinhyará kixin antsí má chrókjuasóte tí sín kuítekakuenhya tí Xjeen Dios la ko chóntehya sín kjuasáya tí ijnié ch'án la ko t'ántaxínhin sín tí Nchakuen Dios tjuèheni? Kixin tí jni chrónkaxín kixin ts'etoxán tí pacto la ko tí jni k'uíjmáxinni. 30 Noheni kixin tsintáchro Ìnchéni kixin: “Janhan mé tóna tocar sintakitoaxián ijje chojni la ko janhan tsjénkahá sín.”* Kjaxin tsintáchro kixin: “Ìnchéni sinchekitoexín ijje tí sín tinkáchónki ch'án.”† 31 Méxra kjuachrakon jje chrók'uanótjenyáni tí tja Dios tjechón.

32 **A** ntá chróráxinkáonrá jahará tí nkehe tsíkónhen óse kixin tió jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá. 33 **A** ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkítsa tí sín tsík'ekon. 34 **A** ntá jahará kuíkonóehérá tí sín tjejóhchina ntóechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajni chontará nkehe antsí jina chónhya tsjeje. 35 Chrókuítóehyará tí nkehe tinkáchónkirá kixin ó nohará kixin tíha mé ts'ayéxinrá nkehe chr'éxin. 36 Kjaxin jahará t'ichjánxin chrók'uejochonhénrá chrókóninkákonhyará kjónté ichrén nkehe chrókónhanrá, kixin sich'erá tí nkehe tjinkaon Dios, kixin xikaha chrók'uayéhérá tí nkehe tsintáchro tí jehe ch'án. 37 Kixin xikaha ntáchro xroon itén Dios kixin:

Kánhyó sé

itsi tí nkexro tsi, í sinchexrjenhya.

38 Tí sín kótjóá asén mé tjejóchónxin sín kixin tinkáchónki sín Dios;

a ntá tí sín tsítóhe tí janhan la í tsochánahya tí xikaha ch'e sín.‡

39 Kjánchó jeheni jehya xikaha chrókuítóheni chrókuinkáchónkihyani tí jehe ch'án kixin ntá chrókjuasinni jje chrók'uitjáyanxinni. Náhí. Tinkáchónkini ch'án la tíha chrókuaáxinni.

11

Tífe

1 Tí fe chóntani la mé noexínni chaxín kixin tsoxiteyá ts'áyéheni tí nkehe tjejóchónhenni, la ko noexínni chaxín kixin kjónté ijnko nkehe t'ikonhyani la chaxín tjen. 2 Tí sín tsík'axrjeníxinni óse la kóxrjínhin Dios kixin k'uéchónta sín fe.

3 Tí fe mé noexínni kixin Dios tsíkjich'éna kaín nkehe tí kjuachaxin tí nixja ch'án la ko noexínni kixin tí nkehe t'ikonni mé tsík'óna tí nkehe t'ikonhyani.

4 **A** ntá tí fe k'uéchónta ch'ín Abel mé k'óyán ch'án ijnko kolélo chjehe ch'án Dios. Tíha ijnko nkehe antsí jina kjuanjon ch'án, a ntá tí nkehe tsíkjanjon ch'ín Caín la náhí. Méxra Dios kóxrjínhin tí nkehe kjuanjon ch'ín Abel ntá ntáchro Dios kixin jina tí ch'ín a. Kjónté ó tsík'en ch'ín Abel la tí nkehe tsíkjich'e ch'án naxa tjakoxin kixin jina tí fe k'uéchónta ch'án.*

5 **A** ntá tí fe k'uéchónta ch'ín Enoc la Dios sátsíkjiko tí jehe ch'án la k'uénhya ch'án, a ntá k'uitjahya sín ch'án kixin Dios sátsíkjiko. Naxa sákjuihya ch'án la xráxin kóxrjínhin Dios nkexrí k'uékjak'e ch'án.† 6 **A** ntá tí chróchóntahyani fe la xitjahya chrókjuinchechéheni Dios, kixin t'ichjánxin kixin tí sín chrókóhchinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

7 **A** ntá tí fe k'uéchónta ch'ín Noé tí Dios chénka tí jehe ch'án tí nkehe naxa k'uíkonhya ch'án tsonhen, la kuítekaon ch'án kjuích'éna ch'án ntabárcq kixin tsaáxin ch'án la ko tí sín

* 10:30 Deuteronomio 32.35-36 † 10:30 Deuteronomio 32.35-36 ‡ 10:38 10.37-38 Habacuc 2.3-4 * 11:4 Génesis 4.3-10 † 11:5 Génesis 5.21-24

naxa kjéhya ch'án. Tí fe k'uéchóna ch'án kjuakoxin kixin tí í so chojni chjasintajni la jínahya sín tsjasóte sín. **A** ntá kóxrjinhin Dios tí jehe ch'án kixin kuítekaon ch'án la tí xra kjuích'e ch'án mé kuaáxin ch'án.‡

8 **A** ntá tí fe k'uéchóna ch'ín Abraham tí k'uíyehē Dios tí jehe ch'án la kuítekaon ch'án sákjui ch'án tí nonte tsjanjon Dios ts'áyehē ch'án, ntá k'uaxrjexín ch'án chjasén ch'án kjónté noehya ch'án nketí nó sátsji ch'án.‡ **9** **A** ntá tí fe k'uéchóna ch'án k'uékjak'e ch'án tí nonte chrókjuanjon Dios, éxí jehya nontee ch'án tíha. Kjuák'e ch'án nchia tsík'óna ka, la ko kjaxin xikaha k'uéchóna ch'ín Isaac la ko ch'ín Jacob la ko kjaxin jehe sín tsík'áyehē sín tí nkehe tsíntácho Dios.* **10** **A** ntá ch'ín Abraham k'uékjak'echónhen ch'án tí chjasin tsík'jich'éna Dios ts'itjáyanhya.

11 **A** ntá tí fe k'uéchóna tjan Sara kjónté ó nána tjan, k'uáyehē tjan kjuachaxin sich'éna tjan ijnko xjan; a ntá kjuích'éna tjan ijnko xjan kixin kuítekaon tjan kixin Dios sinchexiteyá tí nkehe tsíntácho ch'án.† **12** Kjaxin xikaha ch'ín Abraham, kjónté ó mero chrók'uen ch'án kixin ó táda ch'án, la k'uaxrjeníxin ch'án nchónhya chojni éxí konotsé siín nkajní o éxí nchesen siín chrínta ntayaon, xitjahya ts'ekini.‡

13 **A** ntá kaín tí chojni a ik'uén sín k'uáyehya sín tí nkehe tsíntácho Dios kixin chrók'uáyehē sín, a ntá k'uéchóna sín fe, la kjónté ikjín k'uíkon sín la ko kuítekaon sín kóchéhē sín. Mé xikaha k'uéchrónka sín kixin tí chjasintajni jehya chjasén sín. **14** Mé xikaha k'uénixja sín la tienxínni jína kixin naxa xritjeyá sín nketí chrók'óna chjasén sín. **15** **A** ntá tí chrórxaxinkaon sín tí chjasin tsík'axrjexín sín ntá jína chrókjan sín ntiha inaá. **16** Kjánchó tjinkaon sín ijnko chjasin antsí má jína, tíha mé chjasin nkaya nkajní. Méxra Dios la tósuèhya ch'án kixin chrókjuinçek'in sín ch'án tí Dios kuènte tí jehe sín, kixin ó tjechónhen tí chjasin ts'áyehē tí jehe sín.

17 **A** ntá fe k'uéchóna ch'ín Abraham kixin Dios kjuích'e prueba tí jehe ch'án kjuanchia tí xjeen ch'án Isaac, a ntá kjuíkao ch'án chrók'óyán ch'án, chrókjuanjon ch'án. Tjechónhen ch'án chrókjuanjon ch'án kjónté jnkokoáxon xjeen ch'án tsíkjanjon Dios‡ tsíntácho kixin: **18** “Tí ch'ín Isaac ts'axrjeníxin nchónhya xjan.”* **19** **A** ntá ch'ín Abraham kjuátsoan ch'án kixin Dios imá chóna kjuachaxin, la kjónté chojni tsík'en na nchexechón ch'án, la éxí yóhē chrók'uen tí xjeen ch'ín Abraham ntá chrók'uáyehē ch'án inaá.

20 **A** ntá tí fe k'uéchóna ch'ín Isaac kjuíncheyaon ch'án tí xjeen ch'án ch'ín Jacob la ko Esaú, kixin jína ts'ejó sín.† **21** **A** ntá tí fe k'uéchóna ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójixin ch'án nixjehē ch'án Dios.‡ **22** **A** ntá tí fe k'uéchóna ch'ín José tió chjina its'en ch'án tsíntácho ch'án kixin tí sín israelita la chr'éxin ts'axrjexín sín chjasin Egipto, tsík'etoan ch'án kixin tió sátsji sín la sátsjiko sín tí huesoé ch'án.‡

23 **A** ntá tí fe k'uéchóna it'é la ko ìné ch'ín Moisés tió kokjíhi ch'án kjuak'emā sín ch'án iní nitjó kixin tsík'ikon sín kixin ijnko xjan ntoa náxrjón tsjehe ch'án, la ko chrakuenhya sín tí nkehe tsík'etoan tí ch'ín rey kixin chrók'óyán sín xjan.* **24** **A** ntá tí fe k'uéchóna ch'ín Moisés tió kónteto ch'án la chrohya ch'án its'in ch'án xjeen tí tjan xjeen ch'ín rey Egipto.† **25** Náhi. Kjueyá ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jje. Náhi. **26** Kjuenkayáxin ch'án kixin antsí tjetean chrókjuasótexín ch'án tí tinkáchónki ch'án tí Cristo itsi chr'éxin, a ntá kánhyó tjetean chróchóna ch'án kaín nkehe tjete siín chjasin Egipto. Kjuenkayáxin ch'án kixin chrók'uáyehē ch'án tí nkehe chrókjuanjon Dios. **27** **A** ntá tí fe k'uéchóna ch'ín Moisés sákjuixin sín tí chjasin Egipto,‡ chrakonhya ch'án kjónté

‡ **11:7** Génesis 6.13–22 § **11:8** Génesis 12.1–5 * **11:9** Génesis 35.27 † **11:11** Génesis 18.11–14; 21.2 ‡ **11:12** Génesis 22.17 § **11:17** Génesis 22.1–14 * **11:18** Génesis 21.12 † **11:20** Génesis 27.27–29,39–40 ‡ **11:21** Génesis 47.31–48.20 § **11:22** Génesis 50.24–25 * **11:23** Éxodo 1.2; 2.2 † **11:24** Éxodo 2.10–12 ‡ **11:27** Éxodo 2.15

kónínkaon tí ch'ín rey, a ntá kuítóehya ch'án tí tinkáchónki ch'án Dios kixin éxí t'ikon ch'án tí Dios ninkexró t'ikonhya.

²⁸ A ntá tí fe k'uéchóna ch'ín Moisés kjuasin ch'án tí kia pascua, k'uetōan ch'án kixin chrókuikjanjin sín jni tí puerta, kixin tí ángel t'óyán chojni chrókjuincheníehya nijnko tí xjan sao kuènte tí sín Israel. § ²⁹ A ntá tí fe k'uéchóna tí sín israelita k'uátòye sín tí Ntayaon Kjátse kixin k'óna nche xamá, a ntá tió tí sín Egipto tjinkaon sín chróchréhe sín xikaha la kjánchó kjuínhin sín tí ntá a.*

³⁰ A ntá tí fe k'uéchóna tí sín israelita la xítjen tí tja't'ò t'inkákuènxín tí chjasin Jericó, tió kjuixin k'uántatjen sín yato yaon tí chjasin a. † ³¹ A ntá tí fe k'uéchóna tí tjan Rahab, na mé ijnko tjan k'uéchóna nchónhya chojni ntoa, ntá k'uénkohya tjan kaín tí sín jiehe kuítekakonhya, kixin tsíkjanjon tjan kjuachaxin kixin kjuaxróxin tsíkitohe ntōe tjan tí sín israelita kjuíjitsàya sín tí chjasin Jericó. ‡

³² ¿Nkehe naxa chróntáxrjan? Sintak'itjáyan tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefe, la ko ch'ín David, la ko ch'ín Samuel, la ko tí sín profeta. ³³ Kixin tí fe k'uéchóna tí jehe sín kjuacha sín k'uetōan sín jina ókjé chjasin, la ko jina kjuínchekitōexín sín ijie chojni, la ko k'uáyéhe sín tí nkehe tsintáchro Dios kixin tsjanjon ch'án, la ko k'uikjehe sín ir'va koxra, ³⁴ la ko k'uanka tí xrohi chróchexín sín, la ko kjuachahya tí espada chrók'uènxín sín. A ntá tí sín chrakon la kófuerte sín, k'óna sín chojni tsehe kjuacha sín kjuánjonko sín tí sín soldado tsíkjin ókjé. ³⁵ Kjaxin k'uék'ixin chojni chjin k'uáyéhe inaá tí chojni tsík'en kuènte sín tsíxechón inaá.

A ntá í so sín la kjuasote sín k'uènxin sín kixin kjuínchemáhya sín kixin kuinkáchónki sín Dios kixin ó nohe sín kixin tsoxechón sín antsí jina inaá. ³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín. ³⁷ Í so sín la ixro k'uènxin sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uènxin sín espada, la í so sín k'uék'aji sín tsík'inkáya sín tjo kolélo la ko tjo kotentsō, nòa sín, kjuasóte sín, kjuaxróxinhya la náxrjónhya k'uéjō sín. ³⁸ A ntá tí sín chjasin ntiha kjuikosáyehya tí sín a la ntá k'uínkite sín, la tí sín a la chóntahya chjasén sín la sákjuj sín nteje, la ko jna, la ko tjo síxrja la ko tōye. ³⁹ Kaín tí sín a kónhen sín prueba kixin á chaxín chóna sín fe la kjónté xikaha k'uáyèhya sín tí nkehe tsintáchro Dios kixin tsjanjon ch'án ⁴⁰ kixin Dios kjuenkayáxin ch'án ijnko nkehe antsí jina kixin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakoxin sín tí fe k'uéchóna sín, la ntá chrókuítóheni ntáha kaín tí nkehe t'inkákonhen, la ko tí jie chrókjuachroeni, a ntá chrókjuich'eni jina tí xra chóntani la ntá chrókjuachani antsí má chrókónoheni. ² Jehó Jesús chrókuinkáchónkini kixin jehe ch'án kjuanjon tí fe chóntani kixin jina kjuakoxin ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuèhya ch'án tí nkehe kónhen ch'án ik'uén ch'án, kixin nohe ch'án kixin tsjixin tsjasóte ch'án ntá náxrjón tsjak'e ch'án la ko tsochéhe ch'án kixin tsjak'etjaxin ch'án tí tja chjina tí trono kuènte Dios.

³ Méxra chrókjuenkayáxinrá jahará nkexrí kjuakoxin ch'ín Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án. ⁴ A ntá jahará naxa k'uènxinhyará tí tjanjonkoará tí jie. ⁵ ¿Á k'uitjáyanhanrá tí jahará tí nkehentaxraxinkaonrá Dios kixin éxí xjeen ch'án t'ikon ch'án tí jahará? Éxí ntáchro xroon itén Dios kixin:

§ 11:28 Éxodo 12.21-30 * 11:29 Éxodo 14.21-31 † 11:30 Josué 6.12-21 ‡ 11:31 Josué 2.1-21

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.
 6 Kíxin Ìnchéni mé tjentuéhe tí sín tjuèhe ch'án la ko nchekjasóte kaín tí sín ts'áyéhe ch'án ts'óna xjeen ch'án.*

7 Chrókuítekáonrá tí nkehe t'etōan Dios kíxin Dios t'ikon kíxin éxí xjeen ch'án tí jahará. ¿Á siín ijnko it'é xjan chrokjuentuéhya tí xjeen? 8 A ntá tí chrókjuentuáhyará Dios tí jahará éxí tjentuéhe ch'án kaín tí xjeen ch'án, ntá jahará kjá jehya xjeen ch'án chaxín. 9 A ntá tí naxa k'uéchánjanni, na mé it'eni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuinchexiteyéheni It'eni tjen nkaya nkajní kíxin chróchóntaxínni kjuachón. 10 It'eni ntihi chjasintajni kjuentuéhene ch'án kjónté kánhyó sé éxí nkexrí kóxrjínhjn ch'án; a ntá It'eni Dios tjentuéhene ch'án kíxin jnkójina chrók'uejóni, kíxin chrók'ónani tjóá kíxin jehe ch'án la tjóá ch'án. 11 Chaxín ninkehó xikaha chrókjuinchekjasóte Dios tí jeheni chrókóxrjínhjn tí nantá chrókónhenni kíxin tí kjuatjoté. A ntá xikaha ts'itjaxínni tí kjuaxróxin éxí ijnko nkehe náxrjón kjuachani.

Tí sín tjanoá tí kjuasáyé Dios

12 Méxra tjsójirá tí tjára tsíkóxrjé la ko tóch'innrá chóntahya fuerza, 13 la ko chrókjuéyará tí ntja ntoá. A ntá tí totará níhi xitjahya tjixinrá chrókuitohe jína la ko chrókóniéhya ínaá.

14 Chrókóxakonhanrá kíxin kjuaxróxin chrók'uejorá kaín rá, jnkójina tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni. 15 Chrókóxakonhanrá kíxin nijnkorá chrókuitoéhyará tí kjuasáyé Dios la ko nijnkorá chrók'ónahyará éxí ijnko nuèe ka tsjá chóna veneno chrókóniéxín tí í so chojni. 16 Nijnko tí jahará chrókjuásinkoará jie ijnko chojni chjin ókjé, la ko chrókjoniéhyará tí nkehe tjóá éxí kjuích'e ch'ín Esaú, kíxin jnkokoá comida kjuínchekjixin ch'án tí nkehe chróchóna ch'án kíxin xjan saō jehe ch'án.† 17 Jahará ó nohará kíxin chr'éxjn, tió tjinkaon ch'án kíxin chrókjuincheyaon it'é ch'án tí jehe ch'án la í xitjahya tsoyaon ch'án kíxin kohya nkexrí chrók'uixitóxjn tí nkehe tsikjich'e ch'án kjónté imá chrótsjánka ch'án.‡

18 A ntá jahará la jehya kóchjinará éxí kóchjina tí sín israelita tí jna jína chrótsé sín tí síchr'ákjen xrohi, tí tjen tí sítié t'inkaséyanhya la ko tí chjéhe xrinto. 19 Na ni tsíkíenhyará tí tsintáchro trompeta, la ko tí itén Dios nixja. A ntá tí sín tsíkinhin tí tan a na mé chronòa sín kíxin í chrónixjahya ch'án ínaá,§ 20 mé xikaha ichro sín kíxin tsjachahya sín sinchexiteyá sín tí nkehe k'uetōan ch'án kíxin “Tí nkexro tsinkátja tí jna mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jna la chrók'uen.”* 21 Ijnko kjuachrakon jie tí nkehe k'uíkon sín la kjónté ch'ín Moisés tsintáchro ch'án kíxin: “Kjaxin síxrànkana chrakonna.”†

22 A ntá jahará tsíkóchjineherá tí jna Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel 23 tsíkójnkotsé sín kíxin tsochjéhe sín kjuasáyá Dios, la ko tí sín tsíkójnkotsé sín tsík'óna sín xjeen Dios saoxín ts'ínixín ihnié sín nkaya nkajní. Jahará tsíkóchjineherá Dios, jehe ch'án mé Juez sinchekitoexín ch'án ijie kaín chojni, la ko tsíkóchjineherá tí nchakuen chojni jína ó tsíkjinchetjóá Dios, 24 la ko tsíkóchjineherá ch'ín Jesús, jehe ch'án mé nixjaxjn ch'án tí pacto nixjn kíxin tí ijnié ch'án k'uítji kjuínchetjuáxinni ch'án. A ntá antsí jína chrónkaxín tí ijnié ch'án, a ntá kánhyó tí ijnié ch'ín Abel.

25 Chrókóxakonhanrá chrókuítekákonhénrá tí nkexro tjenixja. Kíxin tí sín kjuanoá Dios tió kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kujixjn nkaya nkajní. 26 A ntá tí itén Dios tí yaon a kjuínchekinkí nonte. A ntá jie tsintáchro ch'án kíxin: “A ntá ínaá jehya nonte ó sintakinkíá. Náhí. Kjaxin nkajní sintakinkíá”,‡ 27 A ntá tí tsintáchro

* 12:6 Job 5.17; Provérbios 3.11–12 † 12:16 Génesis 25.29–34 ‡ 12:17 Génesis 27.30–40 § 12:19 Éxodo 19.16–22, 20.18–21 * 12:20 Éxodo 19.12–13 † 12:21 Deuteronomio 9.19 ‡ 12:26 Hageo 2.6

ch'án kixin “ínaa” mé t'axrjexín kixin tsjakjin ch'án tí nkehe jina tsinkí, a ntá tsítóhe ch'án tí nkehe xitjahya tsinkí. ²⁸ A ntá tí ts'áyeheni tí kjuachaxin kjuanjon Dios la xitjahya ts'ixinkí tíha. Méxra chróchjeheni Dios kjuasáya chróxraxinkaonni ch'án chróchrakonhenni ch'án ²⁹ kixin tí Dios kuènteni mé éxí ijnko xrohi tsjacha sinchek'itjáyan kaín nkehe. §

13

Nkexrí chrók'uejóni kixin chrókóchéhe Dios

¹ Méxra chrókuítóehyará chrótjuèherá kichuárá. ² Chrók'uitjáyanhyará chrókjuánjonrá kjuachaxin chrókuítóhe ntóará tí sín tsíkjin kjin. Mé xikaha kjuich'e iso sín la kjónté ángel tsík'áyéhe sín la kónoehya sín.*

³ Xráxinkáonrá tí sín tjejóchjina éxí kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxí kjaxin tí jahará xikaha chrókonhanrá kjaxin.

⁴ Kaínrá chróchonteherá kjuasáya tí kótehe chojni. A ntá jahará tsikótahará la jina chrók'uejokoará kichuárá chrótjuèhéherá kichuárá. A ntá tí sín tjinkaon tsochónta chojni chjin ókjé la Dios sinchekjasóte sín kixin xikaha ich'e sín.

⁵ Kénhyó má chrókóxrjínhanrá itsjé chichaon. Chrókócháhará kjónté tí kánhyó tsjé chontará; kixin tsintáchro Dios kixin: “Janhan na tsítóahya tí jahará la ko ts'itjáyanahya tí jahará.”† ⁶ Mé xikaha chrakonhyani tsontáchroni kixin:

Ìnchéni mé tjinkitsani,

méxra chróchrakonhyani kjónté ichrén nkehe chrókjuich'eheni chojni.‡

⁷ Chróxráxinkáonrá tí sín kjuínkítsa tí jahará kjuakohará sín itén Dios, chrókjuenkayáxinrá nkexrí k'uejó sín ntá xikaha chrókóyóhará sín éxí tí fe k'uéchónta sín.

⁸ Jesucristo mé itjen ch'án ijna la ko ijie la ko jnkochrín. ⁹ Chrókuítóehyará chrókjuakohará chojni ijnko nkehe ókjé chrókuinkachónkirá. Íchá jina tí asánrá chrók'uáyéhe fuerza kixin Dios tjuahará la jehya tjetoan chrókjuinchexiteyeheni tí nkehe t'etoan nkehe sineni. Mé xikaha tí sín kjuich'e xikaha kjuínchexiteyá tí nkehe k'uituenhen sín nkexrí chrókjóné sín la ninkehó kjuínkítsahya tíha.

¹⁰ A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuich'e xra nkaxenhen njnko ósé. ¹¹ A ntá tí nchat'á t'etoan judío kjuíko sín tí ijnié ko nkaxenhen tí Cuarto Antsí Tjóá kixin tí nkehe la tsjatsen tí ijie sín. A ntá tí cuérpóé tí ko kjuakaxín sín ikon tí chjasin k'uejó sín. ¹² Kjaxin Ìnchéni Jesús kjuasóte ch'án k'uénxin ch'án ikon chjasin kixin tsotjuáxin kaín ijie chojni tí ijnié ch'án. ¹³ Tsochréheni Ìnchéni Jesús éxí k'uénxin ch'án ikon chjasin kjónté tsjasóteni éxí kjuasóte tí jehe ch'án kjuikosáyehya sín tí jehe ch'án. ¹⁴ A ntá ntihi chjasintajni chóntahyani njnko chjaséni chrók'uitjáyanhya; a ntá xritjeyáni tí chjasin itsi chr'éxin. ¹⁵ Méxra chrókuítóehyeni chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjéhe sín Dios. Yóhe xikaha chrókjuanjonni kixin ir'vani ó chrókjuikosáyexínni ch'án. ¹⁶ Chrók'uitjáyanhyará chrókjuich'erá xra jina la ko chrókjuínkítsará kichuárá. Tí xikaha chrókjuich'erá la imá tóxrjínhin Dios.

¹⁷ Chrókuítekákonhénrá tí sín tjakohará chrókjuinchexiteyéhéherá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuentá tí tjen Dios. Tsjínkítsará sín kixin tsochéhe sín sich'e sín xra la tsonínkakonyha sín. A ntá tí chrókjuínchek'ávára sín, ntá ninkehó tsjachahya sín tsjinkítsa sín tí jahará.

¹⁸ Nixjehéherá Dios kixin tí jeheni kaín ni, kixin chaxín jina kjuenkayáxinni la ko tjinkaonni kixin jina chrók'uejóni. ¹⁹ Tjánchíá xra ó kixin chrónixjehéherá Dios kixin chrókjuanjon ch'án kjuachaxin kixin tjoka chrókjan janhan chrók'uejóni.

§ 12:29 Deuteronomio 4.24 * 13:2 Génesis 18.1-8, 19.1-3 † 13:5 Deuteronomio 31.6 ‡ 13:6 Salmo 118.6

Tjanchia ch'án kixin chrókóyaon sín

²⁰ Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetoan t'ayakonhen tí kolélo, la tí ijnié ch'án mé tsoxiteyáxin tí pacto sich'e xra jnkochrín, ²¹ jehe Dios mé tsjinkitsa tí jahará kixin jína chrók'uejorá la ko kaín xra jína chrókjuich'erá kixin xíkaha tjinkaon ch'án; kixin jehe ch'án t'etuenhenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xíkaha chjéheni Cristo kjuasáya jnkochrín. Amén.

²² Kíchóni, xrjanóahará kixin tóninkákonhyará kixin tí palabra xrjanka sintaxraxinkáonrá. Méxra ikjian tí xroon kjónté kánhyó tsjé nixja ts'ayéhérá.

²³ Chrókónohará kixin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

²⁴ Nixjéhérá jnkójina kaín tí sín tjítaón ntja tjako la ko kaín tí sín kíchó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayehe

¹ Janhan Santiago mé t'aha xra Dios la ko Ìnchéni Jesucristo nixjaha kaín tí sín tsík'axrjeníxin tí teyó xjeen ch'ín Israel tsíxikayehe sátsíkji kuenté chjasintajni.

Dios mé tsjanjon tí kjuaxrexinkaon jína

² Jahará kichó ni, chrókócháhará kjónté chrók'uat'sínkará ichrén nkehe náxrjónhya. ³ Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará. ⁴ Chrókónohará kixin tí chrókóninkákonhyará la tíha mé ijnko xra jína chaxín kixin ntá jahará ijnko chojni chaxín kjuacha titekaon la í t'itjáyanhya ninkehó.

⁵ Tí jnkójín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehe ch'án mé xráxín tsjanjon ch'án kaín nkehe ts'áyéhe tí chojni tjanchia la tsonínkakonhya ch'án. ⁶ Tió chrókjuancheherá Dios nkehe la kénxín asánrá chrókjuanchiará la chrókjóhya asánrá ninkehó. A ntá tí chojni tjo asén la éxí ntayaon tjiko xrínto ijnko lado la í jnko lado. ⁷ A ntá tí xíkaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni. ⁸ A ntá tí nkexro xíkaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

⁹ Tí kichó ni tinkáchónki Cristo la kjónté nòda chóntahya itsjé nkehe chjasintajni la kjónté xíkaha chrókóchéhe kixin tí tinkáchónki ch'án Ìnchéni la antsí má sínkí tíha. ¹⁰ A ntá tí nkexro rico kjónté chrók'uitjáyan tí nkehe chóna la antsí chrókóchéhe kixin tinkáchónki ch'án Ìnchéni, kixin tí nkehe chóna ch'án la kánhyó sínkí la ts'itjáyan éxí itsjo tsík'óna ka. ¹¹ Tió tsjítton yaon la tsosóa imá la tí ka tsoxámá la ko tí tsjo la ts'ánótjen la tí náxrjón tsjehe la tsjeje. Mé xíkaha tsonhen tí ch'ín rico, ts'itjáyan ntá tsítóhe ch'án tí xra k'uéchóna.

Tí nkehe tsonhen chojni

¹² Náxrjón tí nkexro tsjacha ts'atsínka tí nkehe náxrjónhya tsonhen. A ntá tí tsjacha ch'án ts'atsínka kaín tí nkehe náxrjónhya tsonhen ntá ts'áyéhe ch'án tí corona kuènte kjuachón kixin Dios tsíntáchro ch'án kixin tíha mé tsochjéhe ch'án tí sín tjuèhe ch'án. ¹³ A ntá jnkójínrá tí chróntáchro asánrá chrókjuich'erá ichrén nkehe jínahya, la chróntáchrohyará kixin Dios tsíkjanjon kjuachaxin xíkaha sich'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetōan ch'án kixin ninkexró chrókjuich'e ijnko nkehe jínahya. ¹⁴ A ntá jnkójín chojni tí ó jehó tjenkayáxixín asén tí jínahya la mé xíkaha tsjachroe, tsjasin sín jie. ¹⁵ Mé xíkaha tí nkehe jínahya tjenkayáxin chojni mé tjixín tí jie. La mé xíkaha ts'ánkí tí jie la ntá tíha ts'enxín chojni.

¹⁶ Kichóni, chrókjuich'iyéhyará asánrá. ¹⁷ Kaín nkehe jína ntoá t'áyéheni mé tixín nkajní tí tjen Dios tí nkexro kjuich'éna kaín tí xrohi kuènte nkajní. Jehe ch'án mé Dios jnkochrín la jehe ch'án mé xitjahya ts'ixitóxin. ¹⁸ Jehe ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxí tí nkehe senó tsík'óna, mé xíkaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chróxráxinkáonrá tíhi jahará kichó ni. Kaínrá chrók'uejorá chrókuinhínrá jína la tjokahya chrónixjará kixin tjokahya chrókóninkáonrá. ²⁰ A ntá tí chojni tjoka tónínkaon la ch'ehya tí xra jína éxí tóxrjínhin Dios. ²¹ Méxra títōhéra tí nkehe tjuáhya la ko tí nkehe jínahya kjuachjinoxínhin siín nkuíxín la chrókjuinchehnkehyará, chrók'uayéhéra tí itén Dios chrók'uinka nkaya asánrá. Tí tan a mé chóna kjuachaxin kixin chrókuaáxinrá.

²² Jehya kixin chrókuinhónrá; jahará chrókjuich'erá éxí tí nkehe tjako tí tan a. A ntá tí náhí la jahóra ch'iyehérá asánrá. ²³ A ntá tí chojni tsinhón tí tan la ntá sinchexiteyáhya la éxí ijnko chojni tsjexín xrosentá tí kon ó. ²⁴ A ntá tí k'uíkon tí kon la sátsji la tuénxín k'uitjáyenhen nkexrí tsjehe. ²⁵ A ntá tí nkexro k'uitjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etoan tíha la ntá náxrjón tsjak'e kixin kjuínchexiteyá ch'án.

²⁶ A ntá jnkójín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'iyehé asén la ninkehó sínkíhya tí nkehe tinkáchónki ch'án. ²⁷ A ntá tí nkexro tinkáchónki Dios chaxín jína la ko tjasinhya jie nkayakon It'eni Dios la mé tíhi: mé chrókjuinkítsa tí chojni nòe la ko tí chojni k'án chóntahya nkehe sine sín o níhi sín, la ko chrókjuasinhya tí jie jínahya síín chjasintajni.

2

Jnkokón chrókjuikosáyehe kichó ni

¹ Kichóni, jahará tinkáchónkirá Inchéni Jesucristo imá tjetoan la t'ichjánxín chrókjuikosáyeherá kaín chojni jnkokón. ² Éxí ijnko chojni rico chrók'uixenhen tí tójnkotsérá la chóna koch'aninko oro la ko chóna iké náxrjón, a ntá ntiha kjaxin chrók'uixenhen ijnko chojni nòa chóna iké ntaxin. ³ A ntá tí chrókjuikosáyeherá tí chojni t'itsa ka jína la tsontácherá ch'án kixin: “Ntihi antsí jína tjak'e.” A ntá tí chojni nòa tsontácherá ch'án kixin: “Jaha la tjak'éxian totá ntiha o tjak'e nonte ó.” ⁴ Mé xikaha la jnkokónhya tjikosáyeherá kichuárá la tí nkehe jínahya tjenkayáxinrá.

⁵ Kichóni tjuahará, tsinhínrá tíhi: Dios tsíkjeýá tí sín nòa ntihi chjasintajni kixin antsí má tsinkáchónki sín tí jehe ch'án kixin ts'áyéhe sín tí kjuachaxin kuente ch'án éxí tsintáchro ch'án tsochjéhe ch'án tí sín tjuèhe ch'án. ⁶ A ntá jahará mé tjikosáyeheará tí sín nòa. A ntá tí sín rico mé tjikosáyeherá. ¿Á jehya tí sín rico tjanchia sín jie sáttjiko sín tí jahará nkayakon tí sín t'etoan ní? ⁷ ¿La á jehya jehe sín t'ántaxínhin sín tí ihnié Cristo tjikosáyeheheni?

⁸ A ntá jahará la jína tjejoch'erá tí nchexiteyárá éxí t'etoan tí ley éxí nixja tí xroon itén Dios kixin: “Chrótjuèherá kichuárá éxí tjuèxíná asánrá”. ⁹ A ntá tí jnkokónhya tjikosáyeheará chojni la ntá xikaha la tjásinrá jie la nchexiteyéhýará éxí tí nixja tí ley kuente Dios. ¹⁰ A ntá ijnko nkexro titekaon kaín tí ley la ntá kjuínchexiteyáhya jnkokóá tí nkehe tjetoan la mé tí xikaha la kjuínchexiteyéhýa kaín tí nkehe t'etoan tí ley. ¹¹ Ntá Dios tsintáchro kixin: “Chrókuákjahýará í jnko chojni chjin ókjé”, la kjaxin tsintáchro ch'án kixin: “T'oyánhýará kichuárá.” A ntá tí nkexro kuákjahya í jnko chojni chjin ókjé kjánchó kjuàya la kjuínchexiteyéhýa tí nkehe t'etoan tí ley. ¹² A ntá jahará chrónixjará la ko chrókjuínchexiteyárá kixin chrókjuanchiahya jie tí ley sinchekaáni. ¹³ A ntá tí nkexro kuíkonóehya í jnko chojni la kjaxin tsíkonóehya Dios tí jehe. A ntá tí nkexro kuíkonóehé kichó la mé xikaha tsjacha tsaáxin ch'án tí yaon tsjixixín tsitoexín jie.

Tí fe ch'ehya xra la tsík'en

¹⁴ Kichóni, ¿nkehe tsonhen ntáchrórá kixin chontará fe a ntá ninkehó nkehe jína tjákoxinhyará? ¿Á ntáchrórá kixin xikahó chrokuaáxinrá? ¹⁵ Éxí ijnko kichó ni ntoa o kichó ni chjin chóntahya iké o chóntahya nkehe sine sín t'ichjánxínhin sín jnkójín yaon. ¹⁶ Ntá jnkójín tí jahará tsontácherá sín kixin: “Sátjia jnkójína la ko ts'itsa ká la ko sinte jína.” A ntá tí kjuánjonhyará tí nkehe t'ichjánxínhin tí cuerpóe sín la sínkíhya tí nkehe ntáchrórá. ¹⁷ La mé xikaha tónhen tí fe la tí tjákoxinhyará ninkehó nkehe jína kjuich'erá la éxí nkehe tsík'en tí ntáchrórá.

¹⁸ A ntá jnkójín chojni tsontáchro kixin: “Jaha chonta fe a ntá janhan it'a tí xra jína.” Tí xikaha la jaha tjákoxian tí fe kjónté kohya xra la janhan tsjákoxian tí fe la ko tí xra jína tjét'a. ¹⁹ Jaha títekávan kixin jnkokóá Dios itjen la chaxín jína xikaha, kjánchó kjaxin tí jínahya titekaon tíha la ko síxránká chrakon. ²⁰ T'ónahýará lontí. Jahará la nohará kixin tí

fe ch'ehya xra la chónkó tíha. ²¹ Dios kóxrjínhin tí nkehe chrókjuich'e ch'ín Abraham, tí nkexro k'uaxrjeníxinni ósé, tíó chrók'óyán ch'án tí xjeen ch'án Isaac la chrókjuanjon ch'án chrók'uáyéhe Dios. ²² Chrókónohará kixin tí fe k'úechóna ch'ín Abraham la kjuakoxin ch'án tí xra kjuích'e ch'án la ntá xikaha kjuakoxin ch'án kixin antsí má kuinkáchónki ch'án Dios. ²³ Mé xikaha xiteyá éxí ntáchro xroon itén Dios kixin: “Abraham kuítekaon Dios la ntá Dios ntáchro kixin jína ch'án”, la ntá Dios kjuínchek'in ch'án amigo kuènte ch'án.

²⁴ Chrókónohará jahará kixin Dios la t'áyéhe ch'án chojni la nchetjóá ch'án kixin tí xra jína ch'e sín la jehya kixin jehó chrókuinkáchónki sín ch'án. ²⁵ Mé kjaxin xikaha kónhen tí tjan Rahab, tí tjan k'úechóna nchónhya chojni ntoa. Jehe tjan kjuanjon tjan kjuachaxin kuítóhe ntøe tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntia, a ntá Dios la kóxrjínhin tí nkehe kjuích'e tjan. ²⁶ Éxí tí cuerpoé chojni chóntahya nchakuen la tsík'en la kjaxin xikaha tí fe la tsík'en tí ninkehó tjakoxinhya tí nkehe jína chrókjuich'e sín.

3

Tí kjuachaxin chóna nejen chojni

¹ Kíchóni, chrók'ónahya tí jahará nchónhya maestro kixin tí ntoáhya chrókjuàkorá la tíha mé chrókjuasótiaxínrá imá. ² Kaínni chóntani jie, a ntá tí nkexro ninkehó jie ntáchrohya la ijnko chojni jína tíha la ó tsjacha ch'án ts'etuñhen ch'án kuenté tí cuerpo kuènte ch'án. ³ Éxí tí kokate tsochóna chica freno tí ir'va va kixin tsitekaon va la sátsjiko tí ìnché va la tsjacha ch'án ts'etuñhen kuenté tí cuerpo kuènte va. ⁴ Tjenkayáxinrá kjaxin nkexrí tjejó tí ntabarco kjónté imá jié la tsjacha tí xrintø chjéhe tjian sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án. ⁵ Mé xikaha tí ir'va chojni. Kjónté ijnko nkehe imá ntsí kuènte tí cuerpo kjánchó nchónhya nkehe jínahya ntáchro éxí ijnko xrohi ntsí la tsjacha tsochéxin kuenté ijnko jna jié. ⁶ Mé xikaha tí ir'vani la éxí ijnko xrohi kixin nchónhya jie t'axrjexín la éxí ijnko veneno ncheníhi cuerpo mé xikaha mé tsjasixín kuenté cuerpoé chojni jie. La tí kjuachaxin kuènte ir'vani la mé tjixín tí infierno la tíha mé tjixín tí ts'itjáyanxínni. ⁷ Tí chojni la tsjacha sinchesáncho kaín ko jiehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va. ⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxí ijnko nkehe chóna nchónhya veneno ts'énxín chojni. ⁹ Tí ir'vani la kjaxin tjikosáyexinni It'éni Dios la tíha kjaxin t'ántaxíenxinni chojni tsíkích'éna Dios éxí tsjehe tí jehe ch'án. ¹⁰ Kjaxin tí ir'vani t'axrjexín tí nkehe itsjeni kuènte Dios la kjaxin tíha t'ántaxínxínni. Kíchóni, xikahya chrókjuich'era. ¹¹ Jnkokoá tòye xitjahya ts'axrje ntá xé la ko kjaxin ntá tsjá. ¹² Kíchóni, ¿á jína tí nta higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntá xíjnta la ko ntiha kjaxin chrók'uaxrje ntá xé.

Tí kjuaxrexinkaon jína

¹³ Tí tjen jnkojín nkexro tí tjejorá nohe jína la ko tienxín la chrókjuakoxin ch'án jnkojína la ko chrókjuinchehnkexínhya ch'án tí nkehe imá nohe ch'án. ¹⁴ A ntá tí jahará chóna kjuachjinoxínhin asánrá la tjinkáonrá jahórá chrókuétoanrá. A ntá tí xikaha la chrókjuinchehnkexínhyará tí nkehe nohará kixin tí xikaha la ch'iyará la tjinkákonhyará chróchronkará tí nkehe chaxín ntoá. ¹⁵ A ntá tí xikaha sinchehnkerá la jehya tí kjuaxrexinkaon kujxin tí tjen Dios. Tí xikaha la kjuachaxin kuènte chojni chjasintajni ó la ko kuènte ch'ín Tsochren. ¹⁶ A ntá tí xikaha síin kjuachjinoxínhin la ko tjinkaon chojni jehó chrók'uetøan la ntá xitjahya tsonhen xra yóxin kixin xikaha síin nkehe jínahya. ¹⁷ A ntá tí síin kjuaxrexinkaon jína tsíkixín tí tjen Dios la saxín tjejó chojni jína la ko kjaxin kjuaxróxin tjejó sín la ko náxrjón tjejó sín la ko jnkojína nixjehe kíchó sín la ko kjaxin

tikonóehē kichó sín la ko tí xra jína tjejóch'e sín la tí nkehe ntoá nixja sín. ¹⁸ Tí nkexro tjejá tí kjuaxróxin xikaha chrók'ueñka sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

¹ ¿Nketí tjiñin tí guerra la ko tí kjuanínkaon tjanjonkoaxínra kichuára? Táha la mé jahóra t'axrjenínra kaín tí kjuanínkaon a. ² Jahará tjinkáonra tsochontará ichrén nkehe ntá chontahyará ntá tónínkáonra t'oyánra kichuára. Tóchjinoxínhanra kixin tsjachahyará sincheyóherá í so chojni ntá tónínkáonra. Jahará ts'ayéhyará tí nkehe tjinkáonra kixin tjanchehyará Dios. ³ La tí tjanchará la ts'ayéhyará kixin ntoáhya kjuanchiará kixin tjinkáonra chrókuicháxinhanra ó la chrókuinchehnkexínra. ⁴ Jahará chojni titekakonhya Dios. ¿Á noahyará tí jahará kixin tí imá tsotjuèhéra chjasintajni la ntá tsoninkákonhéna Dios? A ntá tí jnkojínra tjinkáonra tsotjuèhéra chjasintajni la tsokjanra tsoninkákonhéna Dios. ⁵ ¿Á tjenkayáxinra kixin tí nkehe ntáchro xroon itén Dios la á chónkó? Ntáchro xikihi: “Tí Nchakuen Dios kjuanjon ch'án k'uayéhéra la tjuahará ch'án la tsonínkaon tí tsitohéna ch'án.” Mé xikaha ichro Dios. ⁶ Kixin Dios la imá tjinkitsani ch'án, méxra ntáchro xroon itén Dios kixin: “Dios la nínkakonhen tí chojni nchehnke a ntá tjinkitsa ch'án tí chojni nchehnkehya.”* ⁷ Méxra chrókuinchehnkehýará. Íchá jína chrókuítekáonra Dios la chrókuánjonhyará kjuachaxin tí jínahya chrók'uetuñhanra ntá chrók'uikon tí jínahya kixin chrók'uetuñhya ntá sáchrókjui. ⁸ Chrókóchjineherá Dios, la tí jehe ch'án kjaxin tsochjinahará ch'án. Jahará chojni chóna jie la chrókjonemára tjára. Chrókuinchetjóára asánra kixin chrótjuèhéra Dios la kánhyó chrótjuèhéra chjasintajni. ⁹ Chrók'uavára la ko chrótsjankará. Chrókuínkíra tí tjanorá la chrótsjankará la chrókuínkí tí cháhará la chrók'uavára. ¹⁰ Chrókuinchehnkehýará chróxráxinkáonra Ìnchéni a ntá jehe ch'án chrókuínkítsa ch'án antsí chrókónohará.

Chrók'uántaxíenhyani kichó ni

¹¹ Kichóni, chrók'uántaxíenhyará kichuára. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jie tí ley. A ntá tí t'eka ch'án jie tí ley la mé t'óna juez chrínkí chrókuitekaon tí ley. ¹² Kixin jnkokoa nkexro kjuanjon tí ley la tí nkexro a mé tí juez la jehe ch'án sinchekaá ch'án chojni la ko sinchekjasóte ch'án chojni. ¿A ntá nkexro tí jaha kixin chrókuanchéhé jie tí kichuá?

Ínoehyani nkehe tsonhen ntóye

¹³ A ntá jie jahará chrókuinhínra tíhi kixin tsíntáchrora kixin: “Tjie o ntóye sáchrókuini ijnko chjasin la ntiha chrók'uejóni ijnko nánó chrókuinchekjini nkehe chrókuachani chichaon.” ¹⁴ A ntá jahará noahyará nkehe tsonhen ntóye kixin tí tjejóchónni la éxí ijnko tjuí nonte ts'ikonni a ntá tuénxín ts'itjáyan. ¹⁵ Íchá jína chróntáchrora kixin: “Tí tjinkaon Ìnchéni la naxa chrók'uejóchónni la chrókuich'eni tíhi o tíha.” ¹⁶ A ntá jahará tí nixjará la imá ihnkerá la kaín tí kjuahnke la mé jínahya. ¹⁷ A ntá tí nkexro nohe chrókuich'e tí nkehe jína la ntá ch'ehya xikaha la mé antsí tjasin jie.

5

Tí nkehe chrókuinhin tí sín rico

¹ Jahará rícorá chrókuinhínra tíhi. Chrótsjankará la ko chrók'uíyatorá kixin tí nkehe tsonhanra tsjasótiará. ² Tí nkehe rícoxínra la ó tsíkótje la ko tí ka chontará la ó tsík'in kué. ³ Tí oro la ko tí plata chontará ó tsíkóchjisen. Tíha mé tjakoxin kixin nkexrí tsonhen ntoará tsoche. ¿Nkehe tsonhen kjuásintonra nkehe kixin ó tsi tí yaon tsjixixín? ⁴ A ntá

* 4:6 Proverbios 3.34

tí nkehe chrókjuacha tí sín kjuít'ahará xra la kjuénkehyará sín la ntá tjanchia sín jie tí jahará la t'èya sín, ntá Ìnchéni imá t'etōan mé kuínhin kixin xikaha ichro tí sín kjuích'e xra. ⁵ A ntá ntihi chjasintajni la náxrjón tjejorá la kaín nkehe tóxrjínhanrá ch'erá la éxí iko imá jína ine la tsíkótsanka la ntá itsji yaon ntá its'en la mé xikaha tsonhanrá. ⁶ Kixin jahará la kjuínchekjasóterá la k'oyánrá chojni ninkehó jie chóntahya kjónté kohya nkehe kjuít'ahará sín.

Chrókóninkakonhyani chróchónhenni la chrónixjeheni Dios

⁷ Méxra kichó ni, chrókóninkákonhyará chróchonhénrá tsokjanjian Ìnchéni. Éxí tí ch'ín ch'e xra nontee chónhen xrakoa chrin senó la ko tí chrin tsjixixín ntá tsojtá ch'án tí nkehe náxrjón k'óna. ⁸ Mé xikaha jahará la kjaxin chrókóninkákonhyará chróchonhénrá chrókóxrjéhyará kixin tí yaon itsi Ìnchéni la ó chjina tsi. ⁹ Kichóni, chrókoninkákuenhyará kichuárá kixin ntá chrókjuanchahya Dios jie tí jahará kixin Dios la mé tí juez la ó tjen ch'án tí ntója puerta. ¹⁰ Kichóni, chrókuankíhírá éxí tí sín k'uéchrónka itén Dios k'uéchrónkaxín sín kjuachaxin ihnié Ìnchéni. Jehé sín kjónté kjuasóte sín la kónínkakonhya sín. ¹¹ A ntá jeheni ntáchroni kixin kóchéhe tí sín a kjónté kjuasóte sin la kjuacha sín. Jahará la ó kuinhínrá kixin nkexrí kónhen ch'ín Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la kuikonóehé ch'án tí ch'ín a.

¹² A ntá kichó ni, chrókuakjénxinhýará ihnié Dios tjen nkaya nkajní la ko ni chjasintajni la nijnko nkexro chrók'uakjénxinhýará. Tí chróntáchorá chaxín la chaxín la tí náhí la náhí kixin Dios la chrókjuínchekjasótiahýará.

¹³ A ntá jnkójín tí jahará náxrjónhýa tjejorá la chrónixjehérá Dios, a ntá jnkójínrá náxrjón tjejorá la chrótsjerá kuénte Dios. ¹⁴ A ntá tí jnkójín nkexro níhi la chrók'uíyehé sín tí sín táda t'etōan kuénte njnko kixin ntá chrónixjehé sín Dios kixin tí sinníhi la ko chróchjéhe sín aceite tí sín a kjuachaxín ihnié Ìnchéni. ¹⁵ Chrónixjehérá Dios kaín asánrá kixin tí sinníhi chrókuítóhe jína la ntá Ìnchéni chrókjuínkítsa sín, a ntá ichrén jie kjuasin sín la jehe ch'án sinchek'itjáyan tíha. ¹⁶ Méxra chróchenkará kichuárá tí jie chontará la ko chrónixjehérá Dios kixin chrókuitohará jína. Tí nixjehé Dios ijnko chojni jína tinkáchónki Ìnchéni la chóna nchónhya kjuachaxin tíha. ¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án kixin ts'aniáhya chrin la ntá k'uániáhya chrin chjasintajni iní nánó ko t'o. ¹⁸ A ntá chr'éxin kjuanchehe ch'án Dios kixin ts'aniá chrin la ntá k'uániá chrin inaá chjasintajni la jína k'óna tí nkehe k'uenka sín.

¹⁹ Kichóni, tí jnkójín chojni chrókjuichroe chrókuítóhe tí nkehe ntoá la í jnko nkexro chrókjuínkítsa kixin chrókjan tí nkexro a ²⁰ la chrókónohará tí jahará kixin jnkójín chojni tjínkítsa ijnko nkexro chóna jie tsokjanxin tí ntia jínahya k'uék'aji ch'án la ntá ó kjuínkítsa kixin tsaáxin asén tí ch'ín a kixin ts'itjáyanhýa ch'án la ntá chrók'uitjáyan tí nchónhya jie k'uéchóna ch'án. Ó tjen.

TÍ xroon saoxín tsíkjin ch'ín Pedro

Ch'ín Pedro ikjin ch'án xroon chr'énhen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahā ch'án xra mé ikjian tí xroon chr'anhánrá jahará sátsíkjin ókjé chjasin tjejórá, mé tjejórá estado Ponto, la ko Galacia, la ko Capadocia, la ko Asia, la ko Bitinia. ² Kjueyará It'eni Dios kixin jehe ch'án tsíkjenkayáxin ch'án ósé xikaha. Kótjuáxinrá Nchakuen ch'án kixin chrókuítekáonrá ch'án la ko kótjuáxinrá ijnié Jesucristo. Kjuasáyé ch'án chrókjuintayaonrá ch'án kixin antsí chrókuákjárá tí kjuaxróxin kuènte ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kuikonóeheni ch'án kixin éxi kokjiéxinni nixin kixin xechón Jesucristo. Mé xikaha tjejóchónhenni sinchekaáni ch'án. ⁴ Mé xikaha ts'ayéhérá jahará tí nkehe tsjanjon Dios chóntha ch'án nkaya nkajni mé ijnko nkehe chónhya ts'itjayan, la ko chónhya tsokjita, la ko chónhya tsqxámá. ⁵ Dios mé t'ayakuanxínrá ch'án tí kjuachaxin kuènte ch'án kixin jahará tinkachónkirá ch'án kixin ntá tsjacha tsaará éxi tsíkjenkayáxin ch'án ósé mé tjinkaon ch'án kixin chrókuaará tí tsjixixín tsjeje chjasintajni.

⁶ Méxra xikaha chrókócháhará kjónté ichrén nkehe chrókónhanrá iso yaon kixin jehí t'ichjánxin xikaha itsjé nkehe chrókónhanrá. ⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxi yóhe chica oro xikaha t'ichjánxin ts'atsínka tí siín xrohi tsotsjexín sín á chaxín jina kohya nkehe tsonhen. A ntá antsí má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsonhanrá kixin tsontáchro Dios kixin jina kjuachará ntá ts'ayéhérá kjuachaxin tió tsi Jesucristo.

⁸ Jahará tjuéhérá Jesucristo kjónté k'uíkonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jie kohya nkehe sincheyóhenni kixin imá náxrjón tíha. ⁹ Mé xikaha k'uitjará nkexrí tsaáxin asánrá. Tíha mé tí nkehe tjejochónhénrá tinkachónkirá.

¹⁰ Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjón ch'án chrók'uayéhérá tí jahará. ¹¹ Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'áyéhe ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkesá tsonhen tí nkehe chrónkaxín Nchakuan Ìnchéni. ¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uéjé sín. Náhí. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kujxin nkaya nkajni mé kjuínkítsa tí jehe sín. Kjaxin tí sín ángel tjinkaon sín chrók'uinkon sín nkexrí tíha.

Dios k'uíyehé ch'án tí jeheni kixin tjóá chrók'uejóni

¹³ Méxra chrókjuenkayáxinrá jina nkehe chrókjuich'erá kixin chrók'uejórá jnkójina. Kaín asánrá chrók'uejochónhénrá kixin tí nkehe sintakjtonhanrá Dios tió tsi Ìnchéni Jesucristo. ¹⁴ Éxi ijnko xjan titekaon mé xikaha jnkójina chrók'uejórá jahará, chrókjuenkayáxinhyará éxi k'uékjenkayáxinrá senó naxa k'uéchonhyará Dios. ¹⁵ Náhí. Jnkójina tjóá chrók'uejórá kixin Dios k'uíyáhará la mé jina ch'án la ko tjóá ch'án. ¹⁶ Kixin ntáchro xroon itén Dios kixin: “Jahará chrók'uejórá tjóá kixin janhan na mé ijnko nkexro tjóá.”*

* 1:16 Levítico 11.44

¹⁷ Tí ntáchrórá jahará kixin It'ará mé Dios la ko ó nohará kixin jehe ch'án sinchekitoexín ch'án ijie jnkojnko chojni, kixin t'ikon kixin jnkokón sínkí jnkojnko chojni, a ntá jahará chróxráxinkáonrá ch'án jnkochrín t'í naxa tjejóhónrá ntihi chjasintajni. ¹⁸ Dios mé kjuíntakaará ch'án kixin chrók'uejohyará éxi k'uék'ejó t'í sín tsík'axrjeníxinrá. Jahará ó nohará jína kixin t'í nkehe k'uínáxinrá tsaáxinrá jehya ijnko nkehe chrók'ueje éxi chica oro o chica plata. ¹⁹ Náhí. Ná mé k'uínáxinrá ijnie Jesucristo imá tjete. Jehe ch'án mé k'óyán sín la k'uáyéhe Dios éxi ijnko kolélo ninkehó xéhya va. ²⁰ Kixin Cristo mé ósé tsíkónoxín ch'án t'í naxa k'ónahya chjasintajni. Kjánchó jehya tuénxín kónhen tíha hasta t'í chr'éxin ntá kónoxín ch'án kixin jína chrók'uejoxínrá t'í jahará. ²¹ Ntá xikaha kónhen Cristo a ntá jie jahará la kuítekáonrá Dios, mé t'í nkexro kjuínchexechón Cristo la ko kjuikosáyehe ch'án. Mé xikaha jahará tinkachónkirá Dios la ko tjejóhónhérrá sintakaará ch'án.

²² A ntá jie ó kuítekáonrá t'í tan chaxín ntoá kixin tjinkitsará Nchakuèn Dios. Tíha mé kótjuáxin asánrá kixin ntá tsotjuèhérrá kichuárá. Mé xikaha chrótjuèhérrá kichuárá kaín asánrá. ²³ Méxra jahará kokjihará nixin, jehya kixin naxa chrók'uaxrjeníxinrá it'ará chjasintajni ntiho ts'itjáyan. Náhí. Kokjixínrá itén Dios itjen jnkochrín. ²⁴ Kixin ntáchró xroon itén Dios kixin:

Kaín chojni chjasintajni tóyóhe kayoa ó,
a ntá t'í kjuachaxin chóna la tóyóhe itsjo t'óna kayoa.
Tí ka la tsóxámá a ntá t'í tsjo la ts'anótjen

²⁵ a ntá t'í tan kuènte Ìnchéni la tsjak'e jnkochrín.†

Tí tan í mé tsaáxinni la kuínhínrá t'í jahará.

2

¹ Méxra t'itohérrá kaín nkehe jínahya, la ko kaín kjuach'ia, la ko t'í ntoáhya tjenkayáxinrá, la ko t'í kjuachjinoxínhin, la ko t'í xrikoará kaín xín kjuach'ia. ² Chrók'uejorá éxi chánjan na ntá tsíkók'j'íhi la itsjen ó chrók'ui, mé xikaha jahará chrók'uejorá itén Dios, tíha mé chrókónohará la chrók'uánkíxin kjuaxrexinkaon kuéntará kixin chrókuaáxinrá, ³ t'í chaxín kjuátsōanrá kixin Ìnchéni la jína.

Cristo mé t'í xro tjechón

⁴ Chrókóchjineherá Ìnchéni, mé jehe ch'án me éxi t'í xro tjechón. A ntá t'í chojni la kuítekakonhya t'í xro a, a ntá Dios la kjuéyá ch'án t'í xro a imá tjete sínkí. ⁵ Mé xikaha Dios kjuích'énará t'í jahará éxi xro tjechón la Dios chrók'juich'éna ch'án t'í jahará jnkokoá ninko kuènte ch'án, la mé ts'ónará nchát'á tsíkjinchetjóá Dios, a ntá chróchjehérrá ch'án t'í nkehe tóxrjínhin ch'án kixin tinkachónkirá Jesucristo. ⁶ Mé xikaha kjaxin xroon itén Dios ntáchró kixin:

Tsjaké chjasin Jerusalén ijnko xro t'etōan ts'óna nchia, ijnko xro tsíkónoxín imá tjete sínkí a ntá t'í sín tsitekaon t'í jehe ch'án mé tsosuehya sín.*

⁷ A ntá jahará t'itekáonrá t'í xro kixin imá tjete. A ntá t'í sín kuítekakonhya, la mé tsoxiteyá éxi ntáchró xroon itén Dios kixin:

Tí xro náxrjónhya kuítóenta t'í sín ch'éna tjat'o,
mé ijie mé k'óna t'í xro tjejoan.†

⁸ La ko kjaxin tsoxiteyá t'í nkehe ntáchró xroon itén Dios kixin:

Tí xro mé tsóténkixín sín la mé tíha ijnko tjo tsjitsínkaxín sín.‡

Kjánchó jehe sín kóténkixín sín t'í xro kixin kuítekakonhya sín t'í itén Dios mé xráxín tsíkitoenxín sín xikaha tsonhen sín.

Tí sín tinkáchónki Dios

⁹ A ntá jahará tsík'axrjeníxinrá t'í sín tsík'jeyá Dios la ko tsík'ónará nchát'á ch'eherá xra t'í rey, la ko tsík'ónará ijnko nación tjóá, la ko tsík'ónará ijnko chjasin kuènte Dios kixin ntá

† 1:25 1.24-25 Isaías 40.6-8 * 2:6 Isías 28.16 † 2:7 Salmo 118.22 ‡ 2:8 Isaías 8.14

tsochronkará tí xra náxrjón kuènte Dios. K'uíyahará ch'án kixin ts'axrjéxinrá tí sítié ntá ts'ixenhénrá tí síin xrohi náxrjón t'inkaséyan kuènte ch'án. ¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uékikonóahyará. A ntá jie la kuikonóahará Dios.

Chrók'uejóni ch'ehe ni xra Dios

¹¹ Kíchóni, xrjanóahará tí jahará kixin éxi chojni tsíkixin ókjé chrók'uejorá ntihi chjasintajni chrókjuánjonhyará kjuachaxin chrókóxrjínhin asánrá tí nkehe síin chjasintajni, mé tí nkehe tjanjonko asánrá. ¹² Jína chrók'uejorá tí síin tí sín chónhya Dios kixin kjónté t'ántaxínhanrá sín éxi chojni jínahya chóna jie tí jahará, ichro sín, la ntá tí chrók'uikon sín kixin jína tjejoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Inchéni chrókjuínchexiteyéhérá kaín tí sín t'etoan kuènte chjasintajni, á tí ch'ín rey kixin imá t'etoan ch'án, ¹⁴ o á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jína. ¹⁵ Dios tjinkaon kixin jína chrók'uejorá kixin tí sín noehya la ko tí sín lontí la kohya jie ts'ekará sín tí jahará.

¹⁶ Chrók'uejorá éxi chojni t'ítuenhya, a ntá tí kjuachaxin chontará jehya kixin chróchontaxínrá kjuachaxin kixin chrókjuich'erá tí jínahya. Náhí. Chrókjuákoxinrá éxi chojni ch'ehe Dios xra. ¹⁷ Chrókjuíkosáyehehérá kaín chojni. Chrótjuéhérá tí sín kíchó ni, la ko chróchontehérá Dios kjuasáya, la ko chrókjuíkosáyehehérá tí ch'ín gobierno t'etoan.

Tóyóexin éxi tí nkehe kjuasótéxin Cristo

¹⁸ Jahará chojni ch'exón xra, chrókjuínchexiteyéhérá tí lámoará, chróchontehérá kjuasáyé sín, kjónté tí sín jína la o tí sín jínahya. ¹⁹ Tíha mé ijnko nkehe jína chrókjuákoxinrá kjónté chrókjuasótiaxínrá ijnko nkehe jínahya kixin xikaha mé chrókjuínchexiteyéhérá Dios. ²⁰ A ntá tí tjejoch'erá ichrén nkehe jínahya, ntá nchekjasótiaxínrá sín la ¿nkehe tsonhen kixin chrókóninkákonhyará? A ntá tí chrókjuasótiaxínrá ijnko nkehe jína la ntá chrókjuachará chrókóninkákonhyará, la tíha mé tóxrjínhin Dios. ²¹ Méxra xikaha k'uíyahará Dios kixin Cristo kjuasóteyákonhánrá. Tíha mé kjuákoxin ch'án kixin mé xikaha chrókjuich'erá. ²² Kixin Cristo la ninkehó jie kjuasinhya ch'án la ko ninkehró kjuich'yehya ch'án, ²³ la ko ninkehó kjuátéehya ch'án tió k'uántaxínhin sín ch'án; a ntá tió kjuínchekjasóte sín ch'án la ninkehó k'ókjanxinhya ch'án. Náhí. Jehé ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nchekitoxin ijíé chojni. ²⁴ Cristo mé kuamá ch'án tí ijíeni kixin tí cuérpoé ch'án kjuák'enkáni ntacruz kixin éxi tsík'enni k'uék'ejóni kixin tí jie k'uéchóntani, a ntá jie chrók'uejóni jnkojína. Kixin Cristo kjuasóte ch'án, chrít'o ch'án kixin jahará chrókuitoaxínrá jína. ²⁵ A ntá jahará k'uék'ejorá éxi kolélo tsíkichroe. A ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsíkótehe

¹ Kjaxin jahará chojni chjin ó tsíkótahará chrókuítekákonhénrá tí xìyará, kixin kjaxin jnkojín tí sín titekakonhya itén Dios chrókuítekaon sín kixin jína tjen tí tjachjin, kjónté t'ichjánxinhya chróchrónka tjan kixin jína tjen tjan, ² kixin chrók'uikon sín xikaha kixin jína tjen tí tjachjin chóna kjuasáyé tjan. ³ Chrókjuínchehnkexinhyará nkehe náxrjón chróchontará la ko tí nkehe náxrjón chróchóna kaxíhará la ko nkehe náxrjón tsík'óna chica oro la ko tí ikará imá náxrjón. ⁴ Náhí. Chrókjuínchejínará asánrá, kixin tí nkehe náxrjón chrók'uitjáyanhya na mé tí asén chojni tójehya la ko náxrjón. Tíha mé imá sínkí nkayakon Dios. ⁵ A ntá tí ósé xikaha k'uékjenkayáxin tí chojni chjin jína. Jehé sín mé kuínkáchónki sín Dios la ko kjuínchexiteyéhe sín xìi sín. ⁶ Mé xikaha kjuich'e tjan Sara kjuínchexiteyéhe tjan tí ch'ín Abraham, mé kjaxin ntáchro tjan kixin inché tjan tí jehe ch'án.

A ntá tí jahará tí xjeen tí jehe tjan la chrókjuinchexiteyará jína la ko ninkehó kjuachrakon chróchontahyará.

⁷ Kjaxin jahará chojni ntoará tsikótahará chróchontehérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjáhará Dios tí kjuachón. Xikaha chrókjuich'erá ntá tió chrónixjehérá Dios la kohya nkehe chrók'uinkákonhen.

Tí sín tjasótexín sín kixin jína kjuich'e sín

⁸ Méxra, jnkokoá chrókjuenkayáxinrá kaín rá chrókuiikonóehérá kichuárá, chrótjuèhérá kichuárá. Jnkójina chrónixjehérá kichuárá la chrókjuinchehnkehyará asánrá. ⁹ Tí ichrén nkehe jínahya chrókjuít'ahará sín la jahará la xikahya chrókjuich'ehérá sín. Tí chrók'uántaxínhanrá sín la jahará chrók'uantaxíenhyará sín. Náhí. Íchá jína chrókjuancheherá Dios kixin chrókjuincheyaon ch'án sín kixin Dios la k'uíyahará ch'án kixin chrók'uayéhérá kjuachaxin kuènte ch'án. ¹⁰ Kixin:

Tí nkexro tjinkaon tsotjuèhe asén kixin jína chrókjuak'e kaín yaon

la chrónixjahya ch'án ninkehó nkehe jínahya

la ko ninkehó kjuach'ia chrók'uaxrjexínhya ir'va ch'án.

¹¹ Tí nkexro la chrókuítóhe tí nkehe jínahya la íchá jína chrókjuich'e tí nkehe jína, la ko íchá jína chrókjuéyá ch'án kjuaxróxin chrókjuak'e ch'án.

¹² Kixin Ìnchéni t'ayakonhen tí nkexro jína

la ko tinhin ch'án tí nixjehe sín ch'án,

a ntá tí sín ch'e tí jínahya la tjinkitsahya ch'án.*

¹³ ¿Xá nkexro chrókjuít'ahará nkehe jínahya tí jahará tjejoch'erá nkehe jína? ¹⁴ Kjónté chrókjuasótexínrá tí nkehe jína tjejoch'erá kjónté la chrókócháhará chróchrakuenhyará ninkexró la ko chróchrakonhyará. ¹⁵ Náhí. Íchá jína chrókjuíkosáyehérá Cristo nkaya asánrá kixin Ìnchárá. Chrók'uejorá listo chrókjuáteherá tí nkehe chrókjuanchankíhará kaín chojni kixin nkexrí tinkachónkirá Ìnchéni, la chrókjuinchehnkehyará la kjuasáya chrókjuáteherá. ¹⁶ Chróchontará ijnko kjuaxrexinkaon jína kixin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuèhe sín kixin tí nkehe ntáchro sín la ntoáhya. ¹⁷ Íchá jína chrókjuasótiaxínrá kixin tí jína tjejoch'erá tí xikaha tjinkaon Dios, a ntá chrókósuàhará chrókjuasótiaxínrá tí ichrén jie chrókjuich'erá.

¹⁸ Kixin Cristo kjuasóte ch'án la ko k'uénxin ch'án tí jie kuènteni, ónaá k'uén ch'án kixin para jnkochrín. Jehe ch'án la jína ch'án la kjuasóteyákonhenni ch'án kjónté jínahyani, kixin ntá jína sáchrókjuíkoni ch'án tí tjen Dios. A ntá ik'uén ch'án éxí chojni, a ntá Nchakuen ch'án la k'uénhya mé xechón inaá, ¹⁹ kixin tí Nchakuen ch'án sákjuíkjakohe tí nchakuen tí sín tsík'en tjejóhina. ²⁰ Tí sín a mé kuítekakonhya sín tí ósé tió kjuák'e ch'ín Noé na mé Dios la kónínkakonhya ch'án kjuák'echónhen ch'án nachrohe sít'óna tí arca, na mé ijníkoá chojni kuítekaon sín mé kuaá sín tí kuíte sín nta. ²¹ Tí nta a mé tóyóhe tí tikitexín chojni ijie kixin tí xikaha tsonhenni la tsaáxinni ijie. A ntá tí tikite chojni la jehya kixin tsotjuáxin tí cuerpo. Náhí. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ìnchéni Jesucristo, ²² mé tí nkexro sátsíkji nkaya nkajní itjen ch'án itja chjina Dios. A ntá jehe ch'án la mé t'etuenhen tí sín ángel la ko tí sín t'etoan.

4

Chrókjuich'eheni Dios xra éxí tí kjuachaxin kjuanjon ch'án

¹ Méxra éxí Cristo kjuasóte tí cuérpoé ch'án ntá kjaxinrá kjónté xikaha chrókjuasóterá chrókóxakuanhyará kixin tí nkexro kjuasóte tí cuérpoé la ó kuítóhe tí jie. ² A ntá tí naxa chrók'uejochónrá intsí la chrók'uejorá éxí tóxrjínhin Dios. Jehya éxí k'uékóxrjínhanrá. ³ A

* 3:12 3.10-12 Salmo 34.12-16

ntá tí ósé nchónhya nkehe k'uékjich'erá éxí ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jie k'uéchontará ókjé chojni chjin la ko k'uékókoanrá la k'uekjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjanoya. ⁴ A ntá ijie la jahará t'itohyará tí sín a kixin tí jínahya ch'e sín. Méxra xikaha t'ántaxínhanrá sín. ⁵ A ntá tí jehe sín tsjanjon sín kuentá tsochéinka sín tí nkexro tjechónhen sinchekitoexín ijie tí sín tjejóhón la ko tí sín tsík'en. ⁶ Méxra kjónté tí sín tsík'en tsíxrákòhe sín tí itén Dios kixin tí nchakuen sín chrók'uejó éxí tjinkaon Dios kjónté naxa k'uejó sín ntihi chjasintajni la kuítóexín tí ijie sín éxí tsitòexín ijie kaín chojni.

⁷ Ó kuichjina tsjeje chjasintajni a ntá xikaha chrók'uejorá jnkójina la ko chrók'uejotsjehérá chrónixjehérá Dios. ⁸ Tí nkehe imá tjetóan kixin antsí chrótjuèhérá kichuárá. A ntá tí tjuèhérá kichuárá la mé tíha chrók'uitjáyaxín tí nchónhya jie chonteherá kichuárá. ⁹ Chrókjuánjonrá kjuachaxin chrókuitohe jnkójín kichuárá ntoará chrókóninkákuénhyará nijnko tí jehe sín. ¹⁰ Jnkójnkorá nkehe tí xra tjáhará Dios k'uayéhérá chrókjuínkitsará kichuárá. Xikaha jina chrókjuákoxinrá tí kjuasáyé ch'án tjáhará ch'án kixin nchónhya xra k'uayéhérá. ¹¹ Tí jnkójínrá tjinkáonrá chrónixjará ichrén nkehe la chrónixjará éxí nixja itén Dios. Tí jnkójínrá tjinkáonrá chrókjuínkitsará la chrókjuákoxinrá tí kjuachaxin tjáhará Dios. Kaín tí xra chrókjuich'erá chrókjuanchehérá Dios kjuasáya kixin kjuasáyé Jesucristo tinkachónkirá tí jehe ch'án. Kixin jehe ch'án la kaín tí kjuachaxin siín la kuènte ch'án jnkochrín. Mé xikaha chaxín. Amén.

Íchá jina chrókjuasótexínni kixin tí tinkáchónkini Cristo

¹² Kíchóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xikaha tsonhanrá. Chróntáchrohyará kixin ókjé nkehe tjasótiaxinrá. ¹³ Náhí. Íchá jina chrókócháhará kixin xikaha chrókjuasóterá éxí kjuasótexín Cristo, kixin kjaxinrá tsocháhará imá tió ts'ikonrá tí kjuachaxin tsíkao Inchéni tí itsi ch'án. ¹⁴ Chrokócháhará tí t'ántaxínhanrá sín kixin tinkachónkirá Cristo kixin tí Nchakuen Dios chóna kjuachaxin t'ayakonhanrá. Jehe sín t'ántaxínhin sín ch'an, a ntá jahará tjíkosáyehérá ch'án. ¹⁵ A ntá tí jnkójínrá tjejtjasóterá chrókójehya kixin ichrén nkehe chrókjuich'erá chrókjuàyará o chrókueerá o ichrén nkehe jínahya chrókjuich'erá o chrókjiatérá kjuanínkaon kuènte ókjé chojni. ¹⁶ Náhí. A ntá jnkójínrá chrókjuasótiaxinrá kixin tinkachónkirá Cristo la chrókósuàhyará. Náhí. Chrókjuanchehérá Dios kjuasáya kixin xikaha kónhanrá.

¹⁷ Ntá jie ó kui tí tsitòexín ijie chojni mé xrankíxín tí sín tsík'óna xjeen Dios. A ntá tí xikaha tsitòexín ijie tí jeheni xrankíxín, a ntá íchá tí ó tsjixín tí sín titekakonhya tí itén Dios. ¹⁸ Íchá tí sín jina la ko xikaha tsonhen sín ntá tsaá sín a ntá íchá tí sín jínahya chóna jie kjá antsí tjasóte sín.* ¹⁹ A ntá tí nkexro tjasóte éxí tjinkaon Dios la kjónté xikaha la naxa chrókjuich'e sín nkehe jina la ko chrókjuanjon sín asén sín chrók'uayakonhen Dios mé tí nkexro kjuich'éna sín la mé jehe ch'án xráxin jina ch'án.

5

Tí k'uituenhen tí sín t'etóan kuènte ninko

¹ Tjínkavan tétuanhan tí chojni t'etóan kuènte tí ninko tjejorá ntiha kixin kjaxin janhan tétóan kuènte ninko éxí tí jehe sín, a ntá janhan mé k'uíkuan kixin nkexrí kjuasóte Cristo, la ko kjaxin janhan mé tsochonta kjuachaxin kuènte Dios éxí tsochóna tí jehe sín tió itsi Inchéni chr'éxin. ² Jahará chrók'uayakonhénrá tí kolélo kuènte Dios ntiha kixin xikaha tí xra k'uayéhérá. Jnkójina chrókjuínkitsará sín éxí tjinkaon Dios la jehya kixin ijnko chojni chrók'uetuanhanrá chrókjuich'erá xra, la ko kjaxin jehya kixin imá chrókóxrjínhanrá chichaon. Náhí. Kaín asánrá chrókjuich'erá xra jina. ³ Jehya jahará kuèntará tí jehe sín

* 4:18 Proverbios 11.31

kixin chjini chrókuétuēnhénrá sín. Náhi. Jnkojína chrókjuákoéxínrá tí jehe sín. ⁴ A ntá tió tsi tí Pastor chaxín t'etōan ntá jahará ts'ayéhérá ijnko corona náxrxjón tsjehēhya.

⁵ Kjaxin jahará ntasoará chrókjuinchehiteyéhérá tí sín t'etōan kuēnte n̄nko. Kaínrá chrókjuinchehiteyéhérá kichuárá chrókjuinchehnkehýará kixin:

Dios la tsonínkakohen tí sín nchehnke,
a ntá tí sín nchehnkehya mé tsjinkitsa ch'án.*

⁶ Méxra chrókjuinchehnkehýará, chrókjuinchehiteyéhérá Dios kixin jehe ch'án imá ts'etōan ch'án kixin tsjixraká tí yaon mé jehe ch'án tsotjáhará ch'án kjuachaxin kixin ts'etōanrá. ⁷ Chróchjehérá Dios kaín tí kjuaxrexinkaon chontará kixin kjaxin jehe ch'án tóxakohen ch'án tí jahará.

⁸ Chrókóxakonhanrá jína chrók'uejorá. A ntá ijie ixri tí nkexro nínkakohanrá mé tí ch'ín Tsochren éxi ijnko koxra tsjanka va xritjeyá va nkehe sine va. ⁹ Tjánjonhyará kjuachaxin kixin jehe ch'án chrókjuacha ch'án chrókjuachroerá ch'án, kixin ó nohará kixin kaín tí sín kichuárá nkuíxín chjasintajni xikaha tjejótjasóte sín kixin tinkáchónki sín Ìnchéni.

¹⁰ Kjánchó kánhyó sé tsjasótiará, a ntá Dios antsí tsjinkitsará ch'án kixin tsjachará ts'ejorá jína. A ntá jehe Dios a mé tjuahará ch'án la k'uíyahará ch'án kixin ts'ejokoará ch'án jnkokoá tí tjen Jesucristo chóna kjuachaxin jnkochrín. ¹¹ Jehe ch'án tsjancheheni ch'án kjuasáya kixin chóna ch'án kjuachaxín ts'etōan ch'án jnkochrín. Amén.

Kjuixixín nixja ch'ín Pedro

¹² Ch'ín Silvano mé t'íkuan ijnko kichó ni jína mé kjuínkitsa ikjinni tí xroon kjónté kánhyó tsjé nixja, la ntaxraxinkáonrá kixin kjuíntayaonrá Dios ntá xikaha kjuakoxin ch'án kixin chaxín tjuahará ch'án. Méxra xikaha jína chrók'uejorá kixin tjuahará ch'án.

¹³ Tí n̄nko tjen Babilonia mé tsíkjeyá Dios éxi tsíkjeyá ch'án tí jahará nixjahará sín la ko kjaxin nixjahará ch'ín Marcos, mé éxi xjanna t'íkuan tí jehe ch'án.

¹⁴ Nixjehérá kichuárá jnkojína. Kjuaxróxin chrók'uejorá tinkachónkirá Jesucristo. Amén.

* 5:5 Proverbios 3.34

Xroon yóxin tsíkjin ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'ahā xrā Jesucristo. Ikjian tí xroon ts'ayéhérá jahará ó tinkáchónkirá Ìnchéni éxí tinkáchónkini jeheni kixin Dios la ko Jesucristo tí nkexro sinchekaáni na mé jina ch'án. ² Sintayaonrá Dios la ko antsí ts'ayéhérá kjuaxróxin kixin ó nohará nkexrí tjen Dios la ko Ìnchéni Jesús.

Jina chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jina chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrā imá jié kjuích'e ch'án. ⁴ Mé xikaha kjuanjon ch'án kaín xín tí nkehe a, táha la mé imá jié la ko imá tjete sínkí. Mé xikaha kjuakoxin ch'án kixin chrók'uayéhérá kjuachaxin chrók'uejorá éxí tjinkaon ch'án la ko chrókuítóhérá tí nkehe jínahya kixin chrók'uitjáyanxínhyará tí nkehe k'uékjenkayáxinrá síin chjasintajni. ⁵ A ntá jahará tinkáchónkirá Ìnchéni la kjaxin chrókjuéyará kixin chrók'uejorá jnkojína; a ntá tí jina tjejorá ntá chrókjuachará antsí chrókónohará; ⁶ a ntá tí kónohará ntá chrókjuachará chrókjuenkayáxinrá jina; a ntá tí tjenkayáxinrá jina ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios; ⁷ a ntá tí chaxín xráxinkáonrá Dios ntá chrókjuachará chrótjuèhérá kíchuará; a ntá tí tjuèhérá kíchuará ntá chrókjuachará chrótjuèhérá kaín chojni.

⁸ A ntá xikaha tjejoch'erá tinkák'ánkí tí kjuaxrexinkaon kuéntará, ntá jehya kixin chónkó kuinkáchónkirá Ìnchéni Jesucristo. ⁹ A ntá tí nkexro ch'ehya xikaha la mé éxí ijnko chojni t'ikonhya o ijnko chojni t'ikonhya jina, kixin ó k'uitjáyenhen kixin Ìnchéni ó kjuixin kjuínchetjóá tí jié k'uéchóna ósé. ¹⁰ Méxrā xikaha kíchó ni jnkojína chrók'uejorá kixin ntá tsonohará jina kixin Dios tsíkjeýará tí jahará la ko tsík'íyahará ch'án kixin xikaha jina chrókjuenkayáxinrá, a ntá xitjahya chrókjuichroerá. ¹¹ A ntá xikaha chrókuítekáonrá ntá tsojtáhará Dios kjuachaxin ts'ixenhenrá tí tjen Ìnchéni Jesucristo t'etōan ch'án jnkochrín. Jehe ch'án mé tí nkexro kjuínchekaáni.

¹² Méxrā titoahya ntáxráxinkáonrá kaín tí nkehe i, kjónté ó nohará tí nkehe ntoá kjuákohará. ¹³ Ntáxrān kixin jina tí naxā tjén chrókjuíntaxráxinkáonrá kaín tí nkehe a ¹⁴ kixin Ìnchéni Jesucristo kjuínchenóna kixin í séhya its'én janhan. ¹⁵ Na mé kaín tíha tjet'a kixin tíó its'én, ntá jahará tsoxráxinkáonrá jnkochrín kaín tí nkehe kjuít'a.

Tí sín k'uíkon tí kjuachaxin kuènte Cristo

¹⁶ Tí nkehe kjuakoharáni kuènte tí kjuachaxin kuènte Ìnchéni Jesucristo la ko nkexrí itsi ch'án na mé jehya ijnko cuento kjuíchéna chojni chrókjuich'iyaxín. Náhí. Ikonní k'uíkonxínconi Ìnchéni la ko tí kjuachaxin kuènte ch'án. ¹⁷ K'uíkonni tíha tíó It'éní Dios kjuikosáyehe ch'án tí Xjeen ch'án, la ntá kuínhinni nixja Dios tjen nkaya nkajní ntáchro ch'án kixin: “Tíhi mé xjanna tjuahā ch'án. Imá chàna kixin nchexiteyá ch'án éxí tjínkavan janhan,” ichro Dios. ¹⁸ Mé kuínhinni itén Dios kuixín nkaya nkajní kixin xikaha ntáchro tíó k'uejókoní Ìnchéni chrítaón tí jnā tjóá.

¹⁹ Mé xikaha k'uéchrónka tí sín tsíkjin itén Dios ósé ntá noexínni kixin chaxín tsoxiteyá. A ntá jahará chrók'uejorá chrókuinhínrá jina nkehe k'uéntáchro sín kixin tí tan mé éxí ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xikaha ts'inkaséyanxín nkaya asánrá. ²⁰ A ntá tjetōan chrókónohará tíhi: kixin ninkehó xroon itén Dios tsík'óna jehó chojni chrókjuacha chrókienxín. ²¹ Náhí. Tí

sín k'uéchrónka itén Dios la nixjahya sín tí nkehe jehó sín chrókjuenkayáxin sín. Náhi. Tsíkjinchetjóá Dios tí jehe sín, a ntá Nchakuen Dios kjuínkítsa k'uénixja sín itén Dios.

2

Tí sín tjako kjuach'ia (Judas 4-13)

¹ Kjaxin k'uék'ixin tí sín ntoáhya k'uéchrónka itén Dios tí chjasin Israel, mé kjaxin xikaha tí jie ts'ixin maestro sit'ayahará. Jehe sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xikaha sinchemá sín tí Ìnchéni chrókuaáxinni. Tíha mé tsjixin tsjasótexín tí jehe sín. ² Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxíenxín chojni tí ntia ntoá kuènte Ìnchéni. ³ Tsoxrjínhin sín tsochónta sín nchónhya chichaon, ntá tsjanchiaxínrá sín chichaon tí nkehe ntoáhya tsjakohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

⁴ Dios la kjónté tí sín ángel kjuasin jie la kuikonóehya ch'án sín la k'uetōan ch'án kixin sátsji sín tsjasóte sín sátsjik'íkjehe sín tí sítié na tjejóchjina sín tsjixrakája tí tsitoexín ijié sín. ⁵ La ko kjaxin kuikonóehya Dios tí sín k'uéjō chjasintajni ósé ntá ichr'án ch'án ntá kuíteé tí sín jínahya, a ntá Dios kjuínchekaá jehó tí ch'ín Noé, na mé tí nkexro kjuako tí tan jína la ko kjuínchekaá ch'án tí yato sín ó. ⁶ Kjaxin Dios kjuínchek'itjáyan tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxin kixin xikaha tsonhen sín. ⁷ Kjánchó Dios kjuínchekaá ch'án tí ch'ín Lot kixin ijnko chojni jína tí jehe ch'án la ko imá kóxakonhen ch'án tí k'uíkon ch'án tí jie kjuasin tí sín jínahya. ⁸ Tí ch'ín Lot mé jína asén ch'án mé k'uékjak'e ch'án tí síin tí sín jínahya ntá kaín yaon kóxakonhen asén ch'án k'uíkon ch'án la ko kuínhin ch'án tí nkehe jínahya k'uékjich'e sín. ⁹ A ntá Ìnchéni na sinchekaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsitoexín ijié chojni.

¹⁰ Dios antsí sinchekjasóte ch'án tí sín nchexiteyéhe tí nkehe jínahya ntáchro asén sín a ntá nchexiteyéhya sín tí nkehe t'etoan Ìnchéni. Titekakonhya sín la ko chrakonhya sín chrók'uántaxínhin sín tí sín ángel chóna kjuachaxin. ¹¹ A ntá tí sín ángel imá tsehe sín la ko imá chóna sín kjuachaxin la kjónté tjinkakonhya ts'ántaxínhin tí sín a nkayakon Ìnchéni.

¹² A ntá tí chojni a la éxi yóhe iko tjenkayáxinhya ninkehó la nchexiteyéhe tí nkehe ntáchro asén, la kokjíhi kixin ts'óyán kichó ó. T'ántaxínhin sín tí nkehe tienxínhya sín, mé xikaha its'en sín éxi its'en tí ko a. ¹³ Tíha mé tsjasótexín sín kixin jehe sín kjuínchekjasóte í so chojni. Xrácín tóxrjínhin sín ich'e sín tí nkehe ntáchro asén sín. Ijnko kjuatósuehe kixin tjejóntaxín sín ntekoará sín tí kia chontará la kjónté tí xikaha la naxa tjasin sín jie.

¹⁴ Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótexín sín. ¹⁵ Kuítóhe sín tí ntia ntoá ntá chréhe sín ntia kuènte ch'ín Balaam xjeen ch'ín Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án. ¹⁶ A ntá t'ichjánxin tsjasóte ch'án kixin tí jie kjuasin ch'án. A ntá ijnko kolócho chjin xitjahya nixja la xrínahya nixja itén chojni la kjuentuéhe tí ch'ín Balaam kixin tí jie chóna ch'án ntá kuítóhe ch'án tí nkehe jínahya chrókjuich'e ch'án. §

¹⁷ Tí chojni tjako mé éxi yóhe tōye tjiáhya ntá la ko éxi tjuí tjakáko xríntō ó; ó kjuixin k'uítuenhen sín sátsji sín tí imá sítié tsjasóte sín jnkochríxín. ¹⁸ Kaín nkehe jínahya nixja sín, a ntá tí jie tjasin sín tóxrjínhin sín chojni chjin ókjé ntá tjachroexín sín tí sín na ntá tjinkaon chrókuítóhe sín tí jie. ¹⁹ Chrónka sín kixin kaín nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'uetuenhen sín. ²⁰ A ntá tí nkexro ó chóxin Ìnchéni Jesucristo tsaáxinni mé

* 2:5 Génesis 6.1-7.24; 8.18 † 2:6 Génesis 19.24 ‡ 2:8 2.7-8 Génesis 19.1-16, 29 § 2:16 Números 22.35-46

kuítóhe sín tí nkehe chrók'uitjáyanxín sín kuènte chjasintajni. A ntá chr'éxin tí chrókuakja sín ntia jínahya ínaá tí chrókjuacha tí jínahya chrókjuachroe sín, a ntá antsí má jínahya chrókónhen tí jehe sín. ²¹ Íchá jína chrókónoehya sín tí ntia jína. A ntá jehya jína tí ó nohe sín ntá tsítóhe sín tí nkehe k'uetōan Dios kuínhin sín. ²² A ntá tí jehe sín kjuínchexiteyá sín éxí ntáchro tí proverbio kíxin: “Tí konia t'ókjan ntá xíkjan xíkjine ínaá,* la ko tí cochíno na ntá tsík'ónti tjóá ntá xíkjan kjíankí tí nchet'o kjita.”

3

Tiό tsi Ìnchéni

¹ Kíchóni tjuahará tíhi la xroon yóxin ikjian ts'ayéhérá. Yóí tí xroon a ntáxráxinkáonrá kíxin jína chrókjuenkayáxinrá. ² Chróxráxinkáonrá tí nkehe tsíchrónka tí sín k'uéchrónka itén Dios ósé la ko tí nkehe k'uetōan Ìnchéni, mé tí nkexro tsaáxinni, kjuakohará tí sín kjueyá ch'án.

³ Tjetoan chrókónohará tíhi kíxin tí yaon tsjixixín la itsi chojni tsjanoá tí tan jína kuènte Ìnchéni, la sinchexiteyéhe sín kaín nkehe jínahya ntáchro asén sín. ⁴ Tsjanchankí sín nkehe kónhen tí nkehe tsíntáchro Cristo kíxin tsokjan ch'án, kíxin desde ik'uén tí sín tsík'axrjeníxinni k'uéjé ósé la xikahó naxa sítónhen éxí tió k'óna chjasintajni. ⁵ Tí sín a titekakonhya sín kíxin ósé k'uénixja Dios ntá k'óna nkajní la ko chjasintajni na mé kjuiin tí ntá ntá kuítóhe nonte xamá. ⁶ A ntá tí ntá k'uitjáyanxín chjasintajni ínaá. ⁷ A ntá tí nkajní la ko tí chjasintajni naxa tjejó jie tjejóchónhen tsoche kíxin xikaha k'uetōan Dios kíxin xrohi tsochexín tí yaon tsjixixín tsitōexín ijíé chojni la ko kaín tí sín jínahya tsjasóte sín.

⁸ A ntá kíchó ni, chrók'uitjáyanhyará kíxin Ìnchéni tí ijnko yaon t'ikon ch'án éxí mil nánó la ko mil nánó t'ikon ch'án éxí ijnko yaon ó.* ⁹ Ntá Ìnchéni í séhya sinchexiteyá ch'án tí nkehe tsíntáchro ch'án la jehya éxí tjenkayáxin í so chojni kíxin ó má sé tjejóchónhen sín. Náhi. Jehí tjechónhen ch'án kíxin ninkexró chrók'uitjáyanhya kíxin tjinkaon ch'án kíxin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxí xíchee itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe síín.

¹¹ A ntá tí xikaha kaín nkehe ts'itjáyan, a ntá jahará la jína chrók'uejorá chróxráxinkáonrá Dios. ¹² Chrók'uejochónhénrá tí yaon itsi Dios chrókóxakonhanrá chrókjuich'erá xra kíxin ntá tjoka chrókui Ìnchéni. A ntá tí yaon tsjixixín mé ts'itjáyan nkajní tsoche, la ko kaín nkehe tsoxíka ts'itjáyan kíxin imá tsosóa. ¹³ A ntá jeheni tjejóchónhenni nkajní nixín la ko chjasintajni nixín éxí tsíntáchro Dios kíxin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

¹⁴ Méxra xikaha kíchó ni, nachrohe tjejochónhénrá kíxin itsi tí yaon tsonhen xikaha la kaín asánrá chrókjuéyará jnkójina chrók'uejorá kíxin ts'ikon Dios kíxin kjuaxróxin tjejorá chontahyará jie. ¹⁵ Chrókónohará kíxin naxa tjechónhen Ìnchéni, tjokahya itsi ch'án kíxin í so chojni naxa chrókuitekaon sín ch'án. Kjaxín xikaha tsíkjin tí kíchó ni Pablo tí xroon chr'ánhanrá ch'án éxí tí kjuachaxién Dios tsík'áyéhe ch'án chrónka xikaha. ¹⁶ Jnkójnko tí xroon tsíkjin ch'án nixja xikaha la imá xra chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrjexín tí nixja tí xroon tsíkjin ch'án la ko kjaxín ntoáhya tjako sín í so nkehe nixja xroon itén Dios. Ntá xikaha jehó sín tjejá sín nkehe ts'itjáyanxín sín.

¹⁷ Méxra kíchó ni, ó nohará tí nkehe senó, ntá chrókóxakonhanrá kíxin chrókjuachruèhyará tí kjuach'ia xriko tí sín jínahya ntá chrókuitōhérá tí nkehe jína

* 2:22 Proverbios 26.11 * 3:8 Salmo 90.4

ntoá tinkachónkirá. ¹⁸ Ìchá jína ąntsí má chróchoxínrá Ìnchéni Jesucristo, mé tí nkexro sinchekaáni la ko ąntsí chrók'uánkí tí kjuąchąxién ch'án chróchontará. Méxra tsjikosáyeheni ch'án ijie la ko jnkochrín. Amén. Ó tjen.

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéherá kixin tsonohará kuènte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uíkoxín konni. Kixin tí nkexro mé k'uíkoni la ko tí nkexro kuákóxin tjani, mé tí nkexro nixja tí tan tsjanjon kjuachón. ² Kjuakoxin ch'án nkexrí kjuák'e ch'án, a ntá kaín tí jeheni k'uíkoni ch'án, mé xikaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrixín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. ³ Chrónkaxínni tí nkehe k'uíkoni la ko tí nkehe kuínhinni, kixin kjaxinrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'éni Dios la ko tí Xjeen ch'án Jesucristo. ⁴ Mé xikaha ikjinni tí nkehe i, kixin chrókjuintaxín chrókócháhará la ko chrókóchéheni.

Dios mé tí xrohi

⁵ Tí tan i mé Inchéni Jesucristo kjuakohe tí jeheni, a ntá jie tjakoहारáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án. ⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítié, na mé xikaha ch'iani kixin ch'ehyani tí nkehe ntáchroni. ⁷ A ntá tí xritjejóni tí t'inkaséyan kixin tí Dios mé jehe ch'án tí t'inkaséyan, na mé xikaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'íjmaxin kaín jie chóntani.

⁸ Tí chróntáchroni kixin ninkehó jie chóntahyani, mé xikaha la jehóni ch'iyeheni asénni, a ntá tí nkehe chaxín la chóntahyani. ⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jina ch'án la ts'itjáyenhen ch'án kaín jie chóntani la ko sinchetjóáni ch'án kixin kaín tí nkehe jínahya kjuích'eni. ¹⁰ A ntá tí tsontáchroni kixin kjuasinhyani ninkehó jie, la éxí chróntáchroni kixin Dios la ch'ia ch'án, a ntá tí xikaha tsixroni la chaxínhya tsík'áyéheni tí tan kuènte ch'án.

2

Cristo mé tsonixjayákonhenni ch'án

¹ Kíchóni, éxí xjanna t'íkuan tí jahará, a ntá tjéjian tí xroon ts'ayéherá tsochrónka kixin chrókjuásinhyará jie. A ntá tí jnkójnra chrókjuásinra jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jina. ² Jesucristo mé k'uenyákonhenni ch'án kixin tí jie chóntani; a ntá jehya ijieni ó. Náhí. Ijie kaín chojni síin chjasintajni.

³ Tí tsitekaonni tí nkehe k'uetōan Dios ntá tsonoexínni chaxín kixin chóxinni ch'án. ⁴ A ntá jnkójn nkexro ntáchro kixin chóxin Dios, a ntá titekakonhya tí nkehe tsík'etōan Dios, la mé ch'ia la noehya tí nkehe chaxín. ⁵ A ntá tí nkexro titekaon tí nkehe tsík'etōan Dios la chaxín tjuèhe Dios; mé xikaha noheni kixin chaxín jnkokoá tjejókoni ch'án. ⁶ Tí nkexro ntáchro kixin chaxín tinkáchónki Dios chrókjuak'e éxí kjuák'e Jesucristo.

Tí mandamiento nixin

⁷ Kíchóni, méxra tí nkehe tjéjian jehya ijnko nkehe nixin tsík'etōan Dios. Náhí. Tíha mé tí nkehe k'uayéherá tí xrankíxixín, mé tí mandamiento ósé tjen, mé tí nkehe ó tsíkinhínra. ⁸ Kjánchó tí nkehe ikjian mé yóhe ijnko nkehe nixin, éxí kjuakoxin Cristo mé xikaha tjakoxinni, kixin tí sítié la tinkák'itjáyan kixin ijie la ó t'inkaséyanxín tí xrohi chaxín.

⁹ A ntá tí nkexro tsontáchro kixin ixri tí t'inkaséyan, a ntá naxa nínkakonhen kíchó, na mé tí xikaha naxa itjen tí sítié a. ¹⁰ A ntá tí nkexro tjuèhe kíchó mé tjen tí t'inkaséyan, a ntá xikaha jina tjen, chóntahya jie la chrókjuachruèhya ch'án ninkexró kixin chrókjuasin sín jie

ínaá. ¹¹ A ntá tí nkexro nínkakonhen kíchó mé tjejó sín la ko ixri sín tí sítié a la ko noehya sín nketí nó sátsji sín kixin tí sítié la kjuích'éna ntakótán sín.

¹² Éxí xjanna t'íkuān tí jahará, la méxra tjejkian tí xroon ts'ayéhérá kixin tsonohará kixin kjuachaxin ihnié Dios kjuínchetjuáxinrá tí ijjará kixin k'uenyákonhenni Ìnchéni Jesucristo. ¹³ Jahará it'é xjan, ikjian tí xroon ts'ayéhérá jahará kixin choxínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéhérá jahará kixin kjuachará kixin kjuachahya tí Jínahya chrók'uetuānhanrá.

Ikjian tí xroon ts'ayéhérá jahará chánjanrá, kixin choxínrá It'éni. ¹⁴ A ntá jahará it'é xjan ikjian tí xroon ts'ayéhérá kixin ó choxínrá tí nkexro itjen tí xrankíxixín tí naxa t'ónahya chjasintajni. Ikjian tí xroon ts'ayéhérá jahará ntasoírá, kixin naxa fuérterá, la ko k'uayéhérá tí itén Dios, la ko kjuachará kixin kjuachahya Tsochren chrók'uetuānhanrá.

¹⁵ Chrótjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'éni Dios. ¹⁶ Kixin ninkehó tí nkehe chrókjuanjon chjasintajni chrókuixín tí tjen It'éni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni kixin itsjé nkehe chróchóntani. ¹⁷ A ntá tí chjasintajni sítinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínhin Dios mé ts'ejó sín jnkochrísín.

Tí nkehe chaxín la ko tí nkehe kjuach'ia

¹⁸ Éxí xjanna t'íkuān tí jahará, la chrókónohará kixin ó kuichjina tí yaon tsjixixín. Jahará ó kuínhínrá kixin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kixin ó kuichjina tí yaon tsjixixín. ¹⁹ Jehe sín tsík'axrjekjanxín sín tí tjejóni; kjánchó chaxínhya kuinkáchónki sín éxí tinkáchónkini. Náhí. Tí chaxín chrókuinkáchónki sín éxí tinkáchónkini la chrók'uaxrjekjanxínhya sín tí tjejóni, naxa chrók'uejókoni sín jnkokoá. A ntá xíkaha kónhen k'uaxrjekjan sín kixin tsonoxín kixin kuinkáchónkihya sín éxí tinkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéhérá kaín rá, ntá jie tiénxinrá intsí kuènte ch'án. ²¹ Ikjian tí xroon ts'ayéhérá kixin ó nohará tí nkehe chaxín, jehya kixin chrókónoahyará; jahará la ó nohará kixin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kixin Jesús la jehya tí Cristo. Tí nkexro a mé nínkakonhen Cristo, mé titekakonhya It'éni Dios la ko tí Xjeen ch'án. ²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kixin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínrá tí xrankíxixín la chróxráxinkáonrá jnkochrísín. A ntá xíkaha tí chróxráxinkáonrá jnkochrísín tí nkehe tsíkinhínrá tí xrankíxixín, la kjaxin xíkaha jnkokoá chrókuinkachónkirá tí Xjeen Dios la ko tí It'é ch'án. ²⁵ Kixin Jesucristo tsíntáchro ch'án kixin tsjanjon ch'án tí kjuachón jnkochrísín.

²⁶ Méxra xíkaha tjejkian tí xroon i ts'ayéhérá kixin chrókónohará kuènte tí sín tjinkaon chrókjuít'ayahará. ²⁷ Kjánchó jahará la ó chontará Nchakuen Dios tsítjáhará Jesucristo, a ntá xíkaha la í t'ichjánxínhya kixin ókjé nkexro chrókjuakohará, kixin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

²⁸ A ntá jie éxí xjanna t'íkuān tí jahará, chrókuítóéhyará chrókuinkachónkirá Cristo, kixin tió tsi ch'án la antsí chróchoxínrá ch'án la ko chrókósuàhyará chrókóchjinará tió tsi ch'án, ²⁹ kixin ó nohará kixin Jesucristo la jína ch'án. A ntá chrókónohará kixin kaín nkexro jína la xjeen Dios tíha.

3

Tí sín xjeen Dios

¹ Chrókónohará kixin It'eni Dios, imá tjuèhe tí jeheni kixin nchek'in ch'án xjeen ch'án tí jeheni, la mé chaxín jeheni tíha. Mé xikaha tí sín chjasintajni chónhya sín tí jeheni kixin jehe sin la xráxín chónhya sín Dios. ² Mé xikaha kichó ni, ó tsík'ónani xjeen Dios, a ntá naxa tjakoxinhya ch'án nkehe tsonhenni tí tsjixixín. Kjánchó ó noheni kixin tió itsi Ìnchéni Jesucristo la ts'ónani éxí tí jehe ch'án, kixin ts'ikonni kixin nkexrí tjen tí jehe ch'án. ³ A ntá kaín nkexro tjejóchónhen tí tsi ch'án la chrókuítóhe sín ijié sín kixin tsotjóá sín kixin jehe ch'án la tjóá ch'án.

⁴ Kixin kain tí nkexro tjasin jie mé jínahya ch'e sín, kixin tió tjasin chojni jie la mé xikaha kuítekakonhya sín tí ley a. ⁵ Jahará ó nohará kixin Jesucristo kui chjasintajni kixin tsjatsen ch'án tí ijiéni, a ntá jehe ch'án la ninkehó jie chóntahya ch'án. ⁶ Mé xikaha kaín tí sín chaxín tinkáchónki tí jehe ch'án la mé tjasinhya sín jie; a ntá kain tí sín tinkákjasin jie la tsík'ikonhya sín ch'án la ko xráxín chónhya sín ch'án. ⁷ Éxí xjanna t'íkuan tí jahará; méxra chrókuítóéhyará kixin ninkexró chrókjuít'ayahará; a ntá tí nkexro ch'e nkehe jína la jína ch'án, kixin Ìnchéni la jína ch'án. ⁸ A ntá tí nkexro xritjasin jie la mé kuènte tí Jínahya; kixin tí Jínahya mé kjuankixin kjuasin jie desde tí xrankixixín k'óna chjasintajni. Méxra tí Xjeen Dios mé kui chjasintajni kixin sinchek'itjáyan ch'án kaín tí xra kjuích'e tí Jínahya.

⁹ Nijnko tí chojni tsík'axrjeníxin Dios naxa chrónkákjasin jie, kixin ó chóna tí kjuachón kjuanjon Dios; la í xitjahya naxa chrókjuasin jie kixin ó tsík'óna xjeen Dios. ¹⁰ Mé xikaha tónoxín kixin nkexro tí xjeen Dios la ko nkexro tí xjeen tí Jínahya, kixin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kichó ni

¹¹ Méxra tí tan tsíkinhínrá tí xrankixixín mé tíhi, kixin chrótjuèheni kichó ni. ¹² Chrókjuich'ehyani éxí kjuích'e ch'ín Caín, kixin jehe ch'án mé kuènte tí Jínahya, kixin k'óyán ch'án tí kichó ch'án. ¿Nkekuènte kixin k'óyán ch'án? Kixin tí ch'ín Caín la tí nkehe jínahya kjuích'e ch'án, a ntá tí kichó ch'án la kjuích'e ch'án tí nkehe jína.

¹³ Kichóni, chróchrakonhyará tí nínkakonhanrá tí sín siín chjasintajni. ¹⁴ A ntá noheni kixin k'uatínkani tí kjuach'én, a ntá kjuachón, mé noexínni tíhi kixin tjuèheni kichó ni. Tí nkexro tjuèhya kichó la éxí tsík'en sín xikaha xritjejó sín. ¹⁵ Kaín tí nkexro imá nínkakonhen kichó na mé chojni tjàya tíha, la ko ó nohará kixin ijnko chojni tjàya la xitjahya tsochóna kjuachón jnkochríxín. ¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni. ¹⁷ A ntá tí tjen ijnko nkexro rico t'ikon kixin ijnko tí kichó ch'án t'ichjánxinhin nkehe, a ntá tí tsjinkítsahya tí kichó, ¿a ntá nkexrí chrótjuèhe ch'án Dios kaín asén ch'án? ¹⁸ Éxí xjanna t'íkuan tí jahará, méxra chrótjuèxínhyani tí kichó ni tí tan náxrjón chrónixjani ó. Náhí. Chrókjuakoxinni tí nkehe jína chrókjuich'eni.

Jína tsochjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxí tjinkaon Dios. ²⁰ A ntá tí tjoní asénni kixin chóntani ichrén jie, a ntá Dios la imá nohe ch'án la nohe ch'án kaín nkehe tónhen asénni. ²¹ Mé xikaha kichó ni, tí tjohya asénni kixin naxa ichrén nkehe jínahya tjenkayáxinni, a ntá antsí jína tsochjineheni tí tjen Dios, ²² a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'ueṭoan ch'án la ko ch'eni tí nkehe tóxrjínhin ch'án. ²³ Tí nkehe tsík'etoan ch'án la mé tíhi kixin chrókuítekaonni tí Xjeen ch'án Jesucristo, la ko chrótjuèheni kichó ni éxí k'ueṭoan ch'án. ²⁴ Tí nkexro nchexiteyéhe tí nkehe k'ueṭoan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

¹ Kíchóni, chrókuitekákonhyará kaín tí sín ntáchro sín kixin Nchakuen Dios mé nixjxin tí jehe sín. Náhi. Chrótsjehérá tí nkehe ch'e sín kixin chrókónohará kixin á chaxín chóna sín Nchakuen Dios o náhi, kixin tí chjasintajni la ixri nchónhya chojni ch'ia, ntáchro sín kixin nixja sín tí itén Dios. ² A ntá xikaha mé chrókónoaxínrá kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxi chojni mé chóna sín Nchakuen Dios. ³ A ntá tí nkexro titekakonhya kixin xikaha tsíki Jesús, na chónahya sín Nchakuen Dios. Náhi. Chóna sín tí nchakuen tí nkexro nínkakonhen Cristo. Jahará ó kuínhínrá kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxi xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetōan, kixin tí nkexro tjejókoará la imá t'etōan, a ntá tí nkexro t'etōan chjasintajni la kánhyó t'etōan. ⁵ Kixin jehe sín la kuente chjasintajni ó, méxra nixja sín tí nkehe kuente chjasintajni ó. A ntá tí chojni kuente chjasintajni ó mé tjejótinhin sín. ⁶ A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjatsoanxínni nkexro chóna tí Nchakuen tí nkexro chaxín la ko nkexro chóna tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kichó ni, kixin tí tjuèheni kichó ni mé tixín tí tjen Dios. Kaín nkexro tjuèhe kichó mé xjeen Dios, la ko chóxin Dios. ⁸ A ntá tí nkexro tjuèhya kichó na mé chónhya Dios kixin Dios la xráxin tjuèhe chojni. ⁹ Dios la ó kjuakoxin ch'án kixin tjuèhe tí jeheni kixin tsíchr'án ch'án tí jnkokoá Xjeen ch'án chjasintajni kixin tsochóntaxínni kjuachón tí jehe ch'án. ¹⁰ A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhi. Jehe ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xikaha Dios tjuèhe tí jeheni, a ntá kjaxinni jeheni xikaha chrótjuèheni kichó ni. ¹² A ntá Dios la ninkexró k'uíkonhya. Kjánchó tí chrótjuèheni kichó ni la Dios ts'ejókoni ch'án, a ntá tsjinkítsa ch'án kixin chaxín tsotjuèheni kichó ni. ¹³ Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani. ¹⁴ Jeheni mé k'uíkonxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni síin chjasintajni. ¹⁵ A ntá jnkojín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xikaha mé noexínni la ko titekaonni kixin Dios la tjuèhe tí jeheni. Dios mé xráxin tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín. ¹⁷ Mé xikaha chaxín chrótjuèheni Dios kixin ntá chróchrakonhyani tí yaon tsitōexín ijíeni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án. ¹⁸ Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkojín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kixin jehe ch'án senó tjuèhe ch'an tí jeheni. ²⁰ A ntá jnkojín nkexro ntáchro kixin jehe mé tjuèhe Dios, a ntá tuénxín nínkakonhen kichó mé kjuach'ia xriko. Tí tjuèhya ch'án tí kichó chóxin ch'án, la kjaxin xitjahya tsotjuèhe Dios kixin tsík'ikonhya ch'án Dios. ²¹ Tíhi mé tsík'etōan Jesucristo kixin tí nkexro tjuèhe Dios la mé kjaxin chrótjuèhe kichó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kixin Jesús mé tí Cristo la jehe mé tsík'axrjenixin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a. ² A ntá tí tjuèheni Dios la ko nchexiteyáni tí nkehe t'etōan ch'án, a ntá noheni kixin kjaxin tjuèheni tí sín tsík'óna xjeen Dios. ³ Tí tjuèheni Dios la t'ichjánxin kixin chrókuitekaonni tí nkehe k'uetōan ch'án, kixin tí nkehe t'etōan ch'án la jehya ijnko nkehe imá xra ⁴ kixin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Ìnchéni la mé tsjachaxinni la tsjachahya tí chjasintajni. ⁵ A ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'etuenhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxin tí ìnta la ko tí jni. La jehya kixin jehó tí ìnta kjuakoxin ch'án. Náhi. Kjaxin ìnta la ko ijni kjuakoxin ch'án. A ntá tí Nchakuen Dios mé chrónkaxín tíha, kixin tí Nchakuen Dios la chaxín ntoá. ⁷ Siín iní nkexro chrónkaxín nkaya nkajni: ijnko la It'éni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. ⁸ A ntá siín iní tí nkehe chrónkaxín ntihi chjasintajni, mé tí Nchakuen Dios, la ko tí ìnta la ko tí jni; a ntá tí iní mé jnkokón chrónka. ⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjetōan kixin táha la Dios tsíchrónkaxín kixin nkexrí tjen tí Xjeen ch'án. ¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kixin Dios la ch'ia ch'án kixin kuitekakonhya sín tí nkehe tsíntáchro Dios kixin nkexrí tjen Xjeen ch'án. ¹¹ Tí nkehe tsíchrónka Dios mé tíhi kixin tsjanjon ch'án kjuachón jnkochrín, a ntá tí kjuachón mé chóna tí Xjeen ch'án. ¹² A ntá tí nkexro chóna tí Xjeen Dios mé kjaxin chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kixin jahará ó titekáonrá tí Xjeen Dios, kixin mé tsonoaxínrá kixin chaxín chontará kjuachón jnkochrín.

¹⁴ Tíhi mé chóxixinni Dios kixin noheni kixin ichrén nkehe tsjancheheni ch'án éxi tjinkaon ch'án la jehe ch'án la tsinhin ch'án. ¹⁵ A ntá tí xikaha ó noheni kixin Dios tjetinhin tí nkehe nixjeheni ch'án, a ntá kjaxin ó noheni kixin ó chóntani tí nkehe kjuancheheni ch'án.

¹⁶ A ntá jnkójínrá ts'ikonrá ijnko kichuára tjasin jie, a ntá tí jehya ijnko jie chrók'uenxín ch'án, la chrókjuancheherá Dios kixin chrókjuinchexraxinkaon ch'án kixin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kixin íchá jina chrókjuanchehyará Dios kixin chrókjuinkitsa tí ch'ín a. ¹⁷ Kaín nkehe jínahya la ijie tíha. Kjánchó siín jie ts'enxínhya chojni.

¹⁸ Ó noheni kixin tí nkexro tinkáchónki It'éni Dios tjasinhya sín jie, kixin tí Xjeen Dios tjinkitsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kixin Dios t'ayakonhen tí jeheni, a ntá tí Jínahya chóna kjuachaxin t'etuenhen kuenté chjasintajni.

²⁰ Ó noheni kjaxin kixin Xjeen Dios kui, la ko kjuínkitsa ch'án tí jeheni kixin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxinni ch'án kjuachón jnkochrín. ²¹ Éxi xjanna t'íkuan tí jahará, la títōherá tí dios tsíkjanoya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjejá Dios tójkotsé sín ntiha, la mé chaxín tjuahá sín: a ntá jehya janhván, la kjaxin kaín tí sín chóxin tí tan chaxín. ² Tjuahará tí jahará kixin tí tan chaxín ó chóna asénni, tíha mé ts'ejókoni jnkochrín. ³ It'éni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókujikonóahará ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chàna k'uíquàn kixin isorá tjejorá títekáonrá tí nkehe chaxín, éxí tsík'etóan It'éni Dios. ⁵ A ntá jie jahará kichó ni, xrjanóahará kixin chrótjuèhéra kichuára. Méxra xikaha tjékjian tí xroon i, la jehya ijnko nkehe nixin tsík'etóan Dios. Náhí. Tíha la mé tí nkehe tsík'áyéheni tí kjuák'e Ìnchéni Jesucristo. ⁶ A ntá tí tjuèheni kichó ni la mé tíhi kixin chrók'uejóni éxí tsík'etóan Dios; a ntá tí nkehe tsík'etóan Dios la mé ó tsíkinhínrá jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xikaha mé ixri xrich'ia la ko nínkakonhen Cristo. ⁸ Chrókóxakonhanrá kixin chrók'uitjányanhya tí xra kjuich'erá kixin naxa chrók'uayéhéra tí nkehe tsjintaxín ts'ayéhéra.

⁹ A ntá tí síin ijnko nkexro kuítóhe tí nkehe kjuako Cristo ntá kjuichroe la mé chónahya sín Dios; a ntá tí nkexro títoehya tí nkehe kjuako Cristo mé chóna sín It'éni Dios la ko tí Xjeen ch'án. ¹⁰ A ntá jnkójín sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuitóhe tí sín a ntoará la ko ni chrónixjeéhyará sín jnkójína. ¹¹ A ntá tí nkexro tsonixjehe tsontáchro kixin: “¿Á jína k'uinka?” na mé éxí tóxrjínhin sín tí nkehe jínahya ich'e tí sín a.

Tí tan tsjixixín

¹² Chonta nchónhya nkehe chrókuinhínrá jahará, kjánchó tjínkakonhya chrókjian xroon ó. Náhí. Tjínkavan kixin tjoka chrókjuasántsajahará tí jahará tsonixjahará kixin chrókjuintaxín chrókóchéheni.

¹³ Tí sín kichuára tójkotsé kuénte nínko ntihi, mé tí sin kjaxin tsíkjejá Dios, mé nixjahará sín. Amén. Ó tjen.

Tí níxin xroon tsíkjin ch'ín Juan

¹ Janhan mé tí nkexro t'ayakonhen nínko mé tjékjan tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuaha.

² Kíchóni, tjáncháha Dios kixin éxí jaha jína tjen tinkachónkia Ìnchéni la jína chrók'uaxrje kaín xra ch'e la ko jína chrókjuak'e jaha. ³ Imá kóchàna tió kui iso tí sín kíchó ni chrónka sín kixin jína tjákoxian tí tan chaxín. ⁴ Kohya ijnko nkehe antsí má nchechàna éxí tió kuinhan kixin tí sín t'íkuan éxí xjanna tjejótitekaon sín tí tan chaxín

⁵ Kíchóni, chaxín jína tjech'e xra tjínkítsa tí sín kíchó ni la ko antsí tjínkítsa tí sín tsíkjin ókjé chjasin. ⁶ A ntá tí tsíkójkotsé tí sín kíchó ni la tsíchrónka sín kixin nkexrí tjuéhé tí jehe sín. Jaha chrókjuínkítsa tí nkehe t'ichjánxinhin sín tí sátsji sín. Xíkaha mé tóxrjinhin Dios. ⁷ Tió sákjuí sín kjuankixin sín chrónka sín itén Ìnchéni la chrohya sín chrók'uáyéhe sín ninkehó nkehe kuènte tí sín chónhya Dios. ⁸ Méxra tí jeheni t'ichjánxin chrókjuinkítsani tí jehe sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótrefes

⁹ Janhan ikjian ijnko xroon k'uáyéhe tí sín tójkotsé ntiha. Kjánchó ch'ín Diótrefes kuítekakonhya ch'án tí nkehe k'uətuənhenni ch'án kixin tjinkaon ch'án chrók'uətoan ch'án jehó ch'án. ¹⁰ Méxra xíkaha tí sátsjia ntiha tsonixjaha ch'án kixin tí kjuach'ia ntáchro ch'án t'ántaxinhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjon kjuachaxin la t'ətoan ch'án kixin tsjanjonhya sín kjuachaxin la ko t'ətoan ch'án kixin tsochjinahya sín tí tójkotsé tí chojni.

¹¹ Kíchóni chrókjuákoxinhya tí nkehe jínahya. Íchá jína chrókjuákoxian tí nkehe jína. Tí nkexro ich'e nkehe jína na mé kuènte Dios. A ntá tí nkexro ich'e nkehe jínahya la mé tsík'ikonhya sín Dios.

Jína tjákoxin tí ch'ín Demetrio

¹² Kaín sín ntáchro sín kixin jína tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixin nixja ch'án

¹³ Janhan chonta nchónhya nkehe tsontáxrjan, kjánchó tjínkəkonhya tsokjian ó ¹⁴ kixin tjínkəvan tjoka ts'íkuan tí jaha, a ntá tsjoni.

¹⁵ Kjuaxróxin chrókjuak'e jaha. Kaín nkexro choxian ntihi nixjaha sín. Tétuanhan nixjéhé jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'ahā xrā Jesucristo, la sana mé Jacobo la mé ikjian tí xroon í ts'áyéhe tí sín tsíkjeyá It'éni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín. ² Imá kuikonóahará ch'án ntá ts'ayéhérá kjuaxróxin kixin tjuahará ch'án.

*Tí sín ntoáhya tjako
(2 Pedro 2.1-17)*

³ Kíchóni, imá tjínkavan tsokjian tí xroon ts'ayéhérá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayéhérá tsoxrjanóaxínrá kixin jína chrókiénxinrá nkehe chrókjuáteherá kixin nkexrí tinkachónkirá Ìnchéni kixin tí fe la mé ónaá tsík'áyéhé tí sín tsíkjinchetjóá Dios. ⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuènte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etōan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sintaxráxinkáonrá inaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjāyan ch'án tí sín kuítekakonhya sín tí jehe ch'án.* ⁶ Kjaxin tí sín ángel kuítekakonhya sín tí k'uetōan Dios ntá kuítóhe sín tí kjuachaxin tsíkjanjon Dios tsík'áyéhe sín la ko kuítóhe sín tí k'uék'ejó sín jína, a ntá jie Dios k'uetōan ch'án kixin ts'ejóchjina sín tí sítié la ts'ejóchónhen sín tsijia tí yaon tsitōexín ijíé sín. ⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoa sín. Tíha mé chrórxaxinkakonxín kaín chojni kixin nkexrí tsonhen tí sín titekakonhya tsjasótexín sín tí xrohi jnkochrín sín ts'ankahya.

⁸ Méxra kjaxin tí chojni a kotáchrién sín tsík'ikonxín kixin ó nchōxon chrókjuasinko sín jie chojni chjin ókjé la ko chrókuitekakonhya sín tí kjuachaxién Ìnchéni la ko chrók'uántaxínhin sín tí sín ángel chóna kjuachaxin t'etōan. ⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuènte ch'ín Moisés.† A ntá jehe ch'án kjónté xikaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.” ¹⁰ A ntá tí chojni i t'ántaxínhin sín tí nkehe tienxínhya sín la tjenkayáxin sín éxi ko tienxínhya nchexiteyéhe tí nkehe ntáchro asén, mé xikaha tí nkehe jínahya kjuích'e sín ts'itjāyanxín.

¹¹ ¡Nòá tí jehe sín! Chréhe sín éxi kjuích'e ch'ín Caín.‡ Tjinkaon sín chrókjuacha sín chichaon ntá ntoáhya kjuích'e sín éxi kjuích'e Balaam, la ko its'en sín éxi ik'uén ch'ín Coré kixin kuítekakonhya sín.§* ¹² Ijnko kjuatósuèhe kixin tjejóyáxanxín sín tí síin kia náxrjón chontará, kixin tjejóne sín la ko tjejót'i sín chéhe sín la kjónté xikaha la ninkehó kjuasáya chóntahya sín. Tjejó sín éxi tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxi tjuí chóntahya ntá tjakáko xrinto; la ko éxi ijnko nta t'ónahya to tí nitjó chrók'óna to, éxi yáya tsík'en tsík'axrjenkixin nuèé. ¹³ Jehe sín na mé éxi ntayaon jiehe síxróji lóxrjo ó chóntahya ntá jína mé xikaha chónkó tí nkehe ch'e sín mé ijnko kjuatósuèhe tíha; la ko éxi konotsé kjuíchroé sákjuí ókjé; a ntá tjechónhen sátsji sín tsjasóte sín sítié jnkochrín.

¹⁴ A ntá kjuák'e ch'ín Adán, a ntá yatōxin chr'éxin kui ch'ín Enoc nixjāxin kjuachaxién Dios ntáchro ch'án kixin k'uíkon ch'án itjen Ìnchéni kuikao nchónhya mil tí sín ángel kuènte

* **1:5** Éxodo 12.51 Números 14.29-30 † **1:9** Deuteronomio 34.6 ‡ **1:11** Génesis 4.3-8 § **1:11** Números 31.16

* **1:11** Números 16.1-3

ch'án, ¹⁵ kixin sinchekitoexín ch'án ijié kaín tí sín jínahya kixin kaín tí jínahya kjuích'e sín la ko kaín nkehe k'uénixja tí sín jínahya k'uántaxínhín sín tí jehe ch'án. ¹⁶ Xrácín tóxrjínhya sín nkehe sítónhen la ko ixri sín tjonta kíchó sín. Jehó xritjeyá sín tí nkehe tóxrjínhín sín tjenkayáxin sín. Ihnke sín nixja sín la ko itjo sín jína chojni kixin ntá tí sín a chrókjuinkitsa jehe sín.

Nhexraxinkaon ch'án tí sín tinkáchónki Cristo

¹⁷ A ntá jahará kíchó ni, xráxinkáonrá kixin tí sín tsíkjeyá Ìnchéni Jesucristo ¹⁸ ntáchro sín kixin tí yaon tsjixixín tsjejexin chjasintajni ts'ixin chojni tsitekakonhya sín ts'ántaxínhín sín tí nkehe tjinkaon Dios la ko tsotjinkaon sín sinchexiteyéhé sín tí nkehe jínahya ntáchro asén sín ó. ¹⁹ Tí sín a mé tjinkaon ts'óxika tí sín jnkokoá tjejótojnkotsé kixin naxá tóxrjínhín sín sich'e sín nkehe siín chjasintajni kixin chóntahya sín Nchakuen Dios.

²⁰ A ntá jahará kíchó ni tjuahará, antsí jína chrók'uejorá tinkachónkirá Ìnchéni. Chrónixjexínrá Dios tí kjuachaxin kuènte Nchakuen ch'án. ²¹ Jína chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsotjáhará ch'án kjuachón jnkochrín.

²² Chrókuiikonóhérá tí sín naxá tienxínhya. ²³ Jnkojín sín chrókjuínchekaára chrókuakitsjekjanxínrá sín chríkjan xrohi, la ko chrókuiikonóhérá í so sín kjánchó chróchontará cuidado tí jehe sín kixin kjónté ti iké sín kjaxin chóna jie.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jie la ko tió tsjijini tí tjen ch'án la ninkehó jie chróchóntahyani, imá tsochéheni tí tjen ch'án ntiha. Kjuasáyé Dios imá chóna ch'án kjuachaxin t'etoan ch'án la ko kjuínchekaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

¹ 18

Kaín tí nkehe i mé chénka Dios Jesucristo kixin jehe ch'án tsochénta tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuènte ch'án kixin nkexrí chrókonohe tí ch'ín Juan ch'ehe ch'án xra. ² A ntá jehe ch'án mé k'uítuenhen ch'án ntá chrónkaxín tí nkehe chaxín tsintáchro Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxin Dios.

³ Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsonhen la ko tóxrjinhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato ninko

⁴ Janhan Juan ikjian tí xroon tsochr'anhan tí yato ninko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá la ko kjaxin tí yato Nchakuen ch'án tjejó tí trono t'etoxán ch'án mé tjanjon kjuaxróxin. ⁵ La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankixín xechón kjónté tsík'en kixin tjetoan ch'án kixin t'etuènen ch'án kjónté kaín tí sín rey la ko tí sín t'etoxan siín chjasintajni. Jehe ch'án mé tjuèheni ch'án la ko tí ijnié ch'án mé k'uíjmáxinni kaín tí jie chóntani. ⁶ Jehe ch'án mé tsíkjanjon kjuachaxin tsík'ónani nchat'á kixin sich'ehe ni xra It'eni Dios. Tí kjuachaxin kuènte ch'án me ts'etoxan jnkochr'ixín. Mé xikaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuj. Kaín chojni ts'ikon ch'án la ko kjaxin tí sín k'uékóninkakonhen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin siín chjasintajni tsotsjánka sín tió ts'ikon sín tí jehe ch'án. Mé xikaha tsonhen. Amén.

⁸ Janhan mé tí xrankixín la ko tí tsjixixín éxi tí letra xrankixín A la tsjixixín Zeta. Mé xikaha ichro Ìnchéni Dios, tí nkexro imá t'etoxan. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá.

Ch'ín Juan tsík'ikon ch'án kixin Cristo chóna kjuachaxin

⁹ Janhan Juan mé ijnko kichó tí jahará mé tjékian Jesús la ko tí kjuachaxin kuènte Dios chonta la mé jahará la ko jeheni jnkokón tjejótasóteni la jehe ch'án tjinkitsani kixin tsjachani. Kjuakua itén Dios éxi chrónka Jesucristo la mé tíha kjuak'échjinaxián tí isla it'in Patmos. ¹⁰ A ntá ijnko yaon xraxinkakonxinni Ìnchéni la ikui kjuachaxin Nchakuen Dios tí tjén tí janhan la kuinhan kixin nóton tí janhan ijnko nkexro nixja imá itsen éxi itén ijnko trompeta. ¹¹ Mé ntáchro ch'án kixin:

—Janhan mé tí xrankixín la ko tí tsjixixín éxi tí letra xrankixín A la tsjixixín Zeta. Mé tsokjian jaha ijnko xroon kaín tí nkehe k'uíkuān kixin tsochr'enhén tí yato ninko tjejó tí estado Asia na mé tí ninko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjía tsjahā kixin nkexro itén tí tjenixjana ntá xrínahya k'uíkuān yato candelero tsík'óna chica oro. ¹³ A ntá chríkjan tí yato candelero k'uíkuān ijnko nkexro éxi yóhe Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsíkóyóhe toté ch'án la ko mé chóna ijnko cinta jehó oro tjenkáni ntakuin ch'án. ¹⁴ Tí kaxihí ch'án la tjóá éxi kaxree kolélo tjóá o éxi chrinta tsjehe la ko tí ikon ch'án la éxi xrohi nene tsjehe. ¹⁵ Ntá tí toté ch'án la éxi chica sine tjákini na ntá tsík'axrjexín tja. A ntá tí itén ch'án la itsen éxi tóvéntó nchónhya ntarío. ¹⁶ A ntá tí tja ch'án chjina mé chóna yato konotsé. A ntá tí ir'va

ch'án k'uaxrjexín chica espada iyo, yánjín taté. A ntá imá tjákini tsjehe ikon ch'án la éxí yaon t'inkaséyanxín imá.

¹⁷ A ntá tí k'uíkuan xíkaha la kjuáchr'ítsinka toté ch'án éxí tsík'énna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kixin:

—Chrakonhya jaha. Janhan mé tí xrankíxixín la ko tí tsjixixín. ¹⁸ Janhan tí nkexro tjechón. Ik'uén, a ntá ijie la tjéchuān inaá la itjén jnkochr'ixín. Amén. Janhan chonta llave kuènte chojni its'en la ko kuènte tí síin tí sín tsík'en. ¹⁹ Méxra ikjian jaha tí nkehe k'uíkuan mé tí nkehe síin ijie la ko tí nkehe tsonhen chr'éxin. ²⁰ Ninkexró k'uékienxínhya nkexrí t'axrjexín tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kixin tí yato ángel t'ayakonhen tí yato nínko la ko tí yato candelero k'uíkuan me kjaxín t'axrjexín tí yato nínko.

2

Tí tan k'uáyéhe tí yato nínko: Tí tan k'uáyéhe tí sín chjasin Éfeso

¹ Tsokjian tí nkehe ts'áyéhe tí ángel t'ayakonhen tí nínko Éfeso: “Xíkaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xíkahi: ² Janhan nòna kaín tí xra ch'erá la ko nòna kixin tóxrjíanhyará tí sín jínahya. Janhan la ó nòna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín. ³ Nchónhya kjuasótiará la kjónté chonhénra kóninkákonhyará la imá kjuich'erá xra kixin tinkachónkirá nina la ko nunca kóxrjéhyará. ⁴ Kjánchó tjánchía ijnko jie tí jahará kixin tinkachónkihyará éxí kjuankíxixínra k'uétjuānará. ⁵ Méxra chróxráinkáonra kixin ó kuitohérá tí k'uétjuānará la ntá chrókujínkirá tí nkehe tjenkayáxinra la ko chrókujich'erá xra éxí tí kjuankíxixínra. A ntá tí náhi, la tjoka tsjasán la tsjakíyan tí candelero tí tjejorá tí nunca tsjínkihyará tí nkehe jínahya tjenkayáxinra la tí tsokjanhyará tsoxráinkáonra Dios. ⁶ Kjánchó chrókónohará kixin tóxrjina tí nkehe tjejoch'erá kixin tóxrjíanhyará tí xra ch'e tí sín nicolaítas kixin kjaxín janhan nínkakonhan tí nkehe ch'e sín. ⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntáchro kixin: Tí sín tsjacha sinchexiteyana sín la tsotjahá sín kjuachaxin sine sín tí to t'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasin Esmirna

⁸ Ikjian tí nkehe ts'áyéhe tí ángel t'ayakonhen tí nínko Esmirna: “Xíkaha ichro tí nkexro xrankíxixín la tsjixixín, mé tí nkexro ik'uén la ntá jie tjechón: ⁹ Janhan la ó nòna kaín nkehe tjejoch'erá. Ó nòna kixin nkexrí tjejótjasótiará la ko ó nòna kixin nòna kjánchó jehya. Náhi. Jehe sín mé tójnksé sín tí nínkoé tí Jínahya. ¹⁰ Kjánchó chrakonhyará kjónté tsjasótiará. Tí ch'ín Tsochren tsochr'ánxanhanra ntóechiso jnkojín tí jahará kixin tsotsjexín nkexrí tí jahará ntá t'ichjánxin tsjasótiará iso yaon. Kjánchó chrókuitoéhyará Dios kjónté chrók'uenra ntá janhan tsotjáhará tí kjuachón chr'éxin. ¹¹ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko: Tí nkexro tsjacha sinchexiteyana sín la í tsjasótehya, la tí yóxin its'en chojni la í ts'enhya tí jehe sín.”

Tí tan k'uáyéhe tí sín chjasin Pérgamo

¹² Tsokjian tí nkehe ts'áyéhe tí ángel t'ayakonhen tí nínko Pérgamo: “Mé xíkaha ichro tí nkexro chóna chica espada yánjín taté: ¹³ Janhan ó nòna kaín nkehe tjejoch'erá la ko ó nòna nketí tjejorá kixin tí tjejorá la t'etoan ch'ín Satanás la kjónté la jina kuinkachónkirá tí janhan. Jahará kuitoéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyana jina. Jehe sín tsík'óyáxin sín ch'án tí tjejorá ntiha kixin ntaha t'etoan ch'ín Satanás. ¹⁴ Kjánchó janhan tjánchía ijnko jie tí jahará kixin iso nkehe ntoáhya ch'erá. Síin ntiha chjasin Pérgamo tí tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuēnhen ch'án tí ch'ín Balac kixin tí sín

israelita chrókjuasin sín jie chrókjóne sín tí nkehe tsíkjokehe sín tí nkehe tsíkjanoya la ko chróchónta sín chojni chjin ókjé chrókjuasinko sín jie. ¹⁵ Kjaxin xikaha tí tjejorá la síin iso sín tjinkakonhya sín tsítóhe sín tí nkehe tjako tí sín nicolaítas. Janhan mé tjínkakonhya tí sín a. ¹⁶ Méxra chrókjanrá chrókuinkachónkirá Dios. A ntá tí náhí, la tjoka tsjasán tí tjejorá la tsjánjonkianxian sín tí espada t'axrjexín ir'va. ¹⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntáchro kixin: Tí nkexro tsjacha sinchexiteyàna sín la tsotjahá sín kjuachaxin chrókjóne sín maná tjechónhen la ko tsotjahá sín ijnko xro tjóá la tí xro la ts'ínixín ihnié sín nixin chónhya ninkexró. Jehó tí nkexro ts'áyéhe mé tsonohe.”

Tí tan k'uáyéhe tí sín chjasin Tiatira

¹⁸ 'Tsokjian tí nkehe ts'áyéhe tí ángel t'ayakonhen tí nínko chjasin Tiatira: “Mé xikaha chro tí Xjeen Dios, tí nkexro ikon éxí yóhe xrohi nene sít'axrjexín la ko toté éxí chica sine tjákini tsjehe. ¹⁹ Janhan ó nòna kaín tí nkehe tjejoch'erá la ko ó nòna kixin tjuanará la ko tinkachónkirá tí janhan la ko ó nòna tí xra tjejoch'erá la ko ó nòna kixin tjejochonhénrá tóninkákonhyará. La ko ó nòna kixin antsí tjejoch'erá xra ijie ntá tí kjuankíxixínrá la kénhyó. ²⁰ Kjánchó tjánchía ijnko jie tí jahará kixin tjánjonrá kjuachaxin tjako tí tjan Jezabel. Kjaxin ntáchro tjan kixin nixja tjan itén Dios kjánchó ch'iyehe tjan tí sín ch'ena xra kixin kjaxin sín chrókjuasinko sín jie chojni chjin ókjé la ko chrókjóne sín tí nkehe tsík'óyán sín tsíkjokehe sín tí nkehe tsíkjanoya. ²¹ A ntá janhan ó kuitohá tjan intsí kixin chrókjuinkí tjan tí tjenkayáxin tjan kjánchó tjinkakonhya tjan sich'e tjan xikaha la tjinkakonhya tjan chrókuítóhe tjan tí jie tjasinko tjan chojni ntoa. ²² A ntá jie tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítóehya sín tí nkehe tjinkaon tjan sich'e tjan. ²³ A ntá janhan ts'oyán tí xjeen tí jehe tjan. Ntá kaín tí nínko tsonoexín sín kixin janhan choxian nkehe tónhen asén kaín chojni. A ntá jnkojnko tí jahará la tsjénkahará nkexrí tí xra kjuich'erá. ²⁴ A ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjínkákonhyará chrókónohará tí nkehe jínahya kuènte ch'ín Tsochren la xikahó la í tsétuanhyará í jnko xra. ²⁵ A ntá jahará la tí nkehe ó chontará la t'ayakonhénrá hasta tsokjan janhan. ²⁶ A ntá tí sín tsjacha sinchexiteyàna sín la ko xikaha sich'e sín hasta tsjixixín kixin janhan tjínkavan xikaha chrókjuich'e sín na mé janhan tsjánjuan kjuachaxin ts'etuènenhén sín kaín naciòn. ²⁷ Na mé xikaha T'aná mé chjina kjuachaxin tsétoan la kjaxin xikaha jehe sín mé ts'etuènenhén sín tí naciòn yóhe chróchónta sín ijnko chica vara kixin chróchjéhe sín tí chj chrók'ókuen tí chj tsík'óna nchetje. ²⁸ Me kjaxin tsotjahá sín tí konotsé tí tji nchítjen. ²⁹ A ntá tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

3

Tí tan k'uáyéhe tí sín chjasin Sardis

¹ 'Tsokjian tí nkehe ts'áyéhe tí ángel t'ayakonhen tí nínko chjasin Sardis: “Xikaha ichro tí nkexro chóna yato Nchakuen kuènte Dios la ko chóna tí yato konotsé: Janhan nòna kaín nkehe ch'erá, ó nòna kixin éxí tsík'en tí xra ch'erá kjónté nchehnerá kixin tjejochónrá. ² T'ayará. Naxa t'ayakonhénrá kjónté í tsjéhya tí nkehe kuitóhe kixin kjaxin tíha mero its'en. Ó k'uíkuan kixin tí xra ch'erá la t'ikon tí Dios kuèntana kixin ntoáhya. ³ Chróxráxinkáonrá tí nkehe tsíxrakohará la ko tíha chrókjuich'erá la chrókjanrá chróxráxinkáonrá Dios. A ntá tí naxa tjejochrinrá la titàya tsjasán éxí ijnko síchee la tsonoahyará nkesá tíha. ⁴ Kjánchó naxa síin iso chojni ntaha chjasin Sardis naxa kjuínchekjítahya sín iké sín la jehe sín la ts'ájikian sín kixin chóna sín ka tjóá kixin jehe sín la jina sín. ⁵ Tí sín tsjacha sinchexiteyàna sín la ts'áyéhe sín ka tjóá ts'inkáya sín la ko tsoxíkahya ihnié sín chóna tí libro ts'ínixín ihnié tí sín tsaá la ko tsochoxian sín

nkayakon T'aná la ko nkayakon tí sín ángel kuènte ch'án. ⁶Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

Tí tan k'uáyéhe tí sín chjasin Filadelfia

⁷'Tsokjian tí nkehe ts'áyéhe tí ángel t'ayakonhen tí nínko chjasin Filadelfia: “Xíkaha ichro tí nkexro tjóá la ko chaxín mé tí nkexro chóna llave kuènte ch'ín rey David. A ntá tí tsakitjehe ch'án puerta la ninkexró tsjachahya ts'ikjéhe, a ntá tí ts'ikjéhe ch'án puerta la ninkexró tsjachahya tsakitjehe. ⁸Janhan ó nòna kaín nkehe tjejoch'erá. Kjuaké tí tjejorá ijnko puerta xitjehe la ninkexró xitjahya ts'ikjéhe. Kjónté intsíkoá kjuachaxin chontará la jahará kjuinchesteyará tí nkehe kjuakua la ko kjuinchemáhyará tí janhan. ⁹Tí sín tsíkitekaon Satanás la ntáchro sín kixin judío sín kjánchó jehya sín, xrich'ia sín la chr'éxin tsétuñhan sín ts'ejóxin toch'in sín chrínkí totará la ntá tsonohe sín kixin chaxín janhan tjuahará. ¹⁰Ó kuítekáonrá tí nkehe kuétuñhanrá la jína tjejorá la mé xíkaha janhan ts'ayakonhanrá tí ichrén nkehe tsonhanrá tió tsi tí nkehe tsonhen kuenté chjasintajni kixin ó jehí xíkaha tsonhen kaín chojni tjejó chjasintajni. ¹¹Janhan mé tjoka ts'inka. Méxra t'ayakonhénrá tí nkehe chontará kixin ninkexró chrókuakitsjehará tí nkehe ó kjuachará. ¹²Tí nkexro tsjacha sinchesteyána la ts'óna sín columna kuènte nínko kuènte Dios kuéntana la nunca xitjahya sátsjixin sín ntiha. La janhan tsokjian ihnié tí Dios kuéntana tsjiko sín la ko tsokjian ihnié chjasén Dios kuéntana mé tí Jerusalén nixin tsixin nkajní tí tjen Dios kuéntana. Kjaxin tsokjian nina nixin tsochóna sín. ¹³Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

Tí tan k'uáyéhe tí sín chjasin Laodicea

¹⁴'Tsokjian tí nkehe ts'áyéhe tí ángel t'ayakonhen tí nínko chjasin Laodicea: “Xíkaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxièn ch'án kjuich'éxaxín Dios kaín nkehe. ¹⁵Ó nòna kaín nkehe tjejoch'erá. Ó nòna kixin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará. ¹⁶A ntá jahará la yásorá la jehya ikinrá la jehya sóará. A ntá ijie ir'va ó tsíkia tí jahará la ts'itjia. ¹⁷Ntáchrorá kixin jahará rícorá la imá jína tjejorá la ko ninkehó t'itjanyhya tí tjejorá, ichrorá. Kjánchó chontahyará kjuachéhe la ko jehya jína tjejorá la ko nòará la ko ntakótánrá la ko tjóchinrá. ¹⁸Méxra ijie ntaxraxinkáonrá janhan sintakjihará tí nkehe oro náxrjón ts'ik'axrjexín tja kixin ntá chaxín ts'ónará rico. La ko janhan sintakjihará ika tjóá kixin ts'ínkayará ntá tsjinhanrá kjuatósuèhe kixin í tjóchinhyará. La ko janhan tsjánjuan xroan kolirio tsjiankí ikonrá kixin ts'ikonrá. ¹⁹Janhan mé tsjéntuáha kaín tí sín tjuaha. Méxra íchá jína chrókjan sín chrókuinkáchónki sín Dios. ²⁰Tsjehérá janhan itjén ntója puerta, jtét'eya. A ntá jnkojín nkexro chrókuinhin tí tanná ntá chrókuakitjehe tí puerta ntá chrók'uixanhan ntøe sín la chrókjónekian sín la ko jehe sín la ko janhan. ²¹A ntá tí sín chrókjuacha chrókjuinchesteyána la tsjánjuan kjuachaxin ts'ejókian sín tí tétøanxian ntiha la éxí xíkaha janhan kjuacha ntá T'aná kjuanjon kjuachaxin tjékian ch'án tí tjen ch'án t'etøan ch'án ntiha. ²²Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

4

Tí sín tjikosáyehe Dios nkaya nkajní

¹Ntá chr'éxin janhan k'uíkuan ijnko puerta tjejoch'ehé nkaya nkajní. Ntá kuñhan ijnko itén nkexro éxí trompeta mé tí nkexro nixjana tí xrankixín, ntá jehe ch'án nixjana ch'án, ntáchro ch'án kixin:

—T'it'ótjen ntihi ntá tsjákoaha kaín nkehe tsonhen chr'éxin.

²Ntá tuénxín ikui tí kjuachaxin kuènte Nchakuen Dios k'uayáha ntá k'uíkuan tí trono itjen nkaya nkajní ntá ntiha tjetjaxin ijnko nkexro. ³A ntá tí ch'ín tjetjaxin tí trono mé tjákini tsjehe éxí ixro jaspe o ixro cornalina. A ntá jnkotatjen tí trono itjen ijnko

konchecha tjákiní tsjehe éxí ijnko xro esmeralda. ⁴ A ntá kjaxin jnkontatjen tí trono k'uíkuan í so veinticuatro trono kjaxin tjejtjaxin veinticuatro sín táda, iké sín la tjóá la ko tjejóya kja sín corona tsík'óna chica oro. ⁵ A ntá tí trono kuènte Dios la ntiha sít'axrjexín tí sítjónkíxín la ko sítjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios. ⁶ A ntá nkayakon tí trono la kjaxin itjen ijnko ntayaon éxí xroxrjo tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton. ⁷ A ntá tí nkexro tjechón k'uíkuan saoxín mé éxí koxra tsjehe. A ntá tí nkexro yóxin tóyóhe éxí koxinta, a ntá tí nkexro níxin tsjehe éxí chojni. A ntá tí noóxin la éxí kotjuanhnko xritjaká tsjehe. ⁸ A ntá jnkoinko tí noó nkexro tjejóchón chóna injon kanenee sín la chóna nchónhya ikon nóton la ko nkaxenhen, la nchakotjin la ko tie títoehya sín ntáchro sín kíxin:

Santo, santo, santo,

Ìnchéni Dios, jaha chonta kaín kjuachaxin,
jaha xráxín tjen la ko itjen ijie la ko jaha ts'inka ínaá.

⁹ A ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehe sín ch'án chjéhe sín kjuasáyé tí nkexro tjetjaxin tí trono mé tí nkexro tjechón jnkochríxín. ¹⁰ La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehe sín tí jehe ch'án kíxin jehe ch'án tjechón jnkochríxín la ko tjakjinjin sín corona tjoka sín tí tjen tí trono la ntáchro sín kíxin:

¹¹ Ìnchéni Dios kuènteni, jaha la imá jína la t'ayéhe kjuasáya kíxin tjikosáyahani tí jaha kíxin tí kjuachaxin chonta;

kíxin jaha kjuich'éna kaín nkehe siín kíxin jaha kóxrjínhan xíkaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uíkuan ijnko libro mé tsíkjin sín nkaxenhen la ko nóton la ko mé tsíkjèxin yato sello. ² La k'uíkuan ijnko ángel chóna kjuachaxin ntá kjuanchankí ch'án itsen ntáchro ch'án kíxin:

—¿Nkexro tí jína chrókjuacha chrókuakitjehe tí libro la ko chróchrítón tí sello chóna?

³ La ninkexró ní nkajní o ní chjasintajni o ní chrínkí nonte tsjachahya tsakitjehe tí libro la ní komáhya sín. ⁴ A ntá janhan la imá tsjanka kíxin naxa tónoxínhya ninkexró chrókjuacha chrókuakitjehe tí libro o chrókjuinchekuáxin tí libro o chrókomá nkehe tí ntáchro tí libro. ⁵ Ntá ijnko tí sín táda ntá nixjana ntáchro kíxin:

—Tsjankehya, tsjehé ntihi tí Koxra k'uaxrjeníxin Judá la ko tsík'axrjeníxin rey David. Mé kjuacha la ó tsjacha tsakitjehe tí libro la ko tsóchrítón tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uíkuan tjexín toté ijnko Kolélo tsjehe éxí tsík'óyán sín mé chóna yato ntèe la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni. ⁷ A ntá tí Kolélo a kuákja tí libro itjen tja chjina tí nkexro tjetjaxin tí trono. ⁸ A ntá tió k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uéjoxin toch'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihnti tsík'óna chica oro tsíkaón chjincó. Tíha mé oración nixjehe Dios kaín tí sín tsíkjinchetjóá ch'án. ⁹ Itsje sín nkehe níxin ntáchro kíxin:

Jaha mé ijnko nkexro jína kjuacha kuákja tí libro la ko kóchrítuan tí sello;

kíxin tsík'óyán sín tí jaha la ko tí ijniá k'uëñaxian tí jeheni ts'áyéhe Dios,

mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsíkjich'éñani reyes la ko nchat'á sich'eñeni xra Dios kuènteni, la ko jaha tsíkjánjuan kjuachaxin ts'etoanni chjasintajni.

Mé xikaha ichro sín.

¹¹ Ntá tuénxín k'uikuān la ko kuinhan itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín. ¹² Itsen nixja sín ntáchro sín kixin:

Tí Kolélo tsík'óyán sín,

tíha mé kjuacha k'uáyéhe kjuachaxin ts'etōan la ko k'uáyéhe tí nkehe tjeje kuènte Dios, la ko tí kjuaxrexinkaon jína la ko kjuachaxin sich'e xra la ko mé xikaha tjikosáyeheni ch'án.

¹³ Kjaxin kuinhan kixin kaín nkehe kjuích'éna Dios siín nkajní la ko chjasintajni la ko tí nkehe siín chrínkí nonte la ko kaín nkehe siín ntayaon la kaín tíha mé ntáchro kixin:

Chjéheni kjuasáya tí nkexro tjetjāxin tí trono la ko tí Kolélo kixin chóna kjuachaxin jnkochrín.

¹⁴ A ntá tí noó sín tjejóchón ntáchro sín kixin:

—Xikaha tsonhen. Amén.

La ko tí veinticuatro tí sín táda k'uejóxin toch'in sín la chjéhe sín kjuasáyé tí nkexro tjechón jnkochrín.

6

Tíyato sello

¹ A ntá k'uikuān kixin tí Kolélo kóchrítōn tí xránkixixín tí yato sello ntá kuinhan ijnko tí noó tí noó tí sín tjejóchón nixja ch'án éxí kjóna, la ntáchro ch'án kixin:

—Xrákiá tsjehé.

² Ntá k'uikuān ijnko kokate tjóá. A ntá tí nkexro tjejen tí kokate chóna ch'án ijnko arco tí tja ch'án la tsík'áyéhe ch'án ijnko corona. Jehe ch'án mé kjuacha ch'án la naxa xikjacha ch'án inaá.

³ A ntá tí Kolélo kóchrítōn tí yóxin sello ntá kuinhan tí nkexro yóxin tjechón ntáchro kixin: —Xrákiá tsjehé.

⁴ Ntá sákjuí í jnko kokate kjátse. A ntá tí ch'in tjejen k'uáyéhe ch'án kjuachaxin tsjakjìn tí kjuaxróxin siín chjasintajni kixin ntá chojni mé ts'óyán kichó sín kixin jehe ch'án mé tsík'áyéhe ch'án ijnko espada ijié.

⁵ A ntá tí Kolélo kóchrítōn tí nixin sello la ntá kuinhan nixja tí nixin nkexro tjechón ntáchro kixin:

—Xrákiá tsjehé.

Ntá k'uikuān ijnko kokate tié. A ntá tí nkexro tjejen tí kokate chóna itja ch'án ijnko báscula. ⁶ La ntá kuinhan itén ijnko nkexro jnkōsiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókuinche k'itjáyanhya tí aceite la ko tí vino. (Tíha mé t'axrjexín tsokjinta.)

⁷ A ntá tí Kolélo kóchrítōn tí noóxin sello ntá kuinhan tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uikuān ijnko kokate sine. A ntá tí ch'in tjejen va a mé it'in ch'án Muerte. A ntá nóton tí jehe ch'án la ikui nkehe tóyóhe tí tjejó tí sín tsík'en. Jehe ch'án k'uáyéhe kjuachaxin ts'etōan ch'án noóxin parte chjasintajni kixin ntá ts'óyán kichó sín la tsokjinta la ko ts'enxín sín ichin la ko kaín ko jiehe siín chjasintajni mé tsjāya va.

⁹ A ntá tí Kolélo kóchrítōn tí n'óxin sello ntá k'uikuān chrínkí tí altar tí asén tí sín tsík'enxín tí tan kuènte Dios tsíchrónka sín. ¹⁰ Ntáchro sín itsen kixin:

—Jaha mé Ìnchéni tjóá jína la jaha mé sinchexiteyá tí nkehe tsíntáchrúa, ¿la nkesá sinchekitoexián ijié tí sín siín chjasintajni tsík'óyán tí jeheni? —ichro sín.

¹¹ **A** ntá tí sín a mé k'uáyéhe sín iké sín tjóá ntá k'uituenhen sín naxa ts'ok'éhe sín í so yaon tsoxetajia tí número tí kichó sín ch'ehe xra Cristo naxa ts'enxín sín éxí k'uén tí jehe sín.

¹² **A** ntá tí Kolélo kóchríton tí injonxin sello ntá xríñahya imá kuínkí nonte. **A** ntá tí yaon la kótié éxí ika tjiko chojni tsík'en. **A** ntá nitjó k'óna kjátse éxí jñi. ¹³ **A** ntá konotsé sít'ánótjenxin nkajni sítjitsínka nonte éxí yóhe tí inta t'óna to higo la síxènjín tí to yoa tió tsjixraya tí nta kixin tí imá fuerte chjéhe xrinto. ¹⁴ **A** ntá nkajni k'uitjáyan éxí ijnko xroon tsíxrèya. Ntá kaín jñá la ko tí nonte ntsíntsí siín jnkosiné ntayaon sákjuí ókjé. ¹⁵ **A** ntá kaín tí sín reyes siín chjasintajni la kjaxin tí sín t'etóan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uixenhen sín tjo siín nteje ts'ejómáxin sín. ¹⁶ Ntáche sín tí jñá la ko tí tjo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etóan tjetjaxin trono la ko chrókjuasótehyani tí kjuachrakon jié tsjanjon tí Kolélo.

¹⁷ Kixin ó kui tí yaon imá jié kuènte kjuachrakon la, ¿xá nkexro chrókjuacha chrók'uejó ntiha?

7

Tí sín israelita chóna sello

¹ **A** ntá chr'éxin k'uikuán noó sín ángel tjejóxin toté sín la jnkojnko sín tjejó sín tí chrínta chjasintajni chónthehe sín tí noó xrinto kixin tsochjéhya xrinto chjini chrítaón chjasintajni la ko ní chrítaón ntayaon la ko nijnko tí nta yoa. ² Kjaxin k'uikuán í jnko ángel kjuixín nó tjitoxin yaon la chóna sello kuènte Dios tjechón. Ntá tí ángel mé k'uiyéhe ch'án itsen tí noó ángel tsík'áyéhe kjuachaxin sincheníhi nonte la ko ntayaon. ³ Ntáchro ch'án kixin:

—Náhi, sincheníehya nonte la ko ntayaon la ko kjaxin tí nta la náhi tí naxa tsíkahya sello totjen tí sín ch'ehe xra Dios kuènteni.

⁴ Kuññan tí número tí sín tsíka sello la me ciento cuarenta y cuatro mil kain tí sín tsík'axrjeníxin tí sín israelita. ⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad ⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés ⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Leví la ko teyó mil tí sín tsíka sello tsík'axrjeníxin Isacar ⁸ la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrjeníxin José la ko teyó mil tí sín tsíka sello tsík'axrjeníxin sín Benjamín.

Siín nchónhya chojni chóna ka tjóá

⁹ Ntá kjuixín tíha ntá k'uikuán nchónhya chojni kaín xín nación la ko kaín xín nkexrí tsjehe sín la ko kaín xín nkíva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín. ¹⁰ Kaín sín itsen nixja sín ntáchro sín kixin: Dios kuènteni mé kjuínchekaáni.

Jehe ch'án mé tjetjaxin tí trono tí tjen tí Kolélo kjuínchekaáni.

¹¹ Kaín tí sín ángel tjejóxin toté sín jnkontatjen tí trono la ko jnkontatjen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios. ¹² Ntáchro sín kixin:

Amén. Kjuíncheyaonni Dios la tsochjéheni Dios kjuasáya kixin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kixin tjinkítsani ch'án jnkochrín. Amén.

¹³ **A** ntá ijnko tí sín táda kjuanchankína, ntáchro kixin:

—**A** ntá tí sín tjejóya ika tjóá la, ¿xá nkexro tíha? la ko ¿xá nketí tsíkjixín sín?

¹⁴ Ntá janhan ntáxrjan kixin:

—Inchéni, jaha ó noha. Ntá jehe ch'án ntáchro ch'án kixin:

—Tí sín i tsíkjin sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótjuáxin ijníé tí Kolélo. ¹⁵ Méxra xikaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen ninko kuènte ch'án. ¹⁶ A ntá tí nkexro tjetjaxin chrítaón tí trono mé t'ayakonhen ch'án sín. ¹⁶ A ntá tí sín a mé ts'enixinhya sín kjinta la ko ts'enixinhya sín ìnta la ko tsochjánxinhya sín yaon la ko ni sóa kohya nkehe sich'ehe sín. ¹⁷ Kixin tí Kolélo tjen jnkosiné tí trono mé t'ayakonhen ch'án tí jehe sín éxí iko kuènte ch'án la ko sátjiko ch'án tí tjiá nta tjanjon kjuachón la Dios mé sinchexámá kaín tí ntañon tí jehe sín.

8

Tí yatoxin sello la ko tí ihnti oro

¹ A ntá tí Kolélo kóchrítón tí yatoxin sello kuènte tí libro la ntá kohya ninkehó ruido nkajní chjina it'o hora. ² Ntá tuénxín k'uíkuan yato ángel tjejóxin toté nkayakon Dios la jnkoinko sín k'uáyéhe sín jnkoinko trompeta. ³ Ntá chr'éxin ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjincō tsjak'e ch'án kixin sátsjiko tí oración kuènte kaín tí sín tsíkjinchetjóá Dios kixin tsjak'e chrítaón tí altar oro nkayakon tí trono. ⁴ A ntá tí ihnti kuènte chjincō chríinxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios. ⁵ A ntá tí ch'ín ángel kuákja ch'án tí ihnti kjuínchekaón ch'án xrinta kuènte xrohi kuènte tí altar la ik'ue ch'án chjasintajni. La ntá kjóna la ko nchónhya ruido la ko sítjónkixin la ko kuínki nonte.

Tí trompeta

⁶ A ntá tí yato ángel mé chóna sín jnkoinko trompeta ó yaxínhin sín kixin ts'ánoa sín.

⁷ A ntá tí ángel saxín k'uánoa trompeta ntá k'uániá toni la ko xrohi tsínkíkjan jni mé xikaha ikui chrítaón chjasintajni. A ntá iche nixin parte nonte la ko nixin parte tí nta la ko kaín tí kayoa siín.

⁸ A ntá tí yóxin ángel k'uánoa trompeta la ijnko nkehe yóhe tsjehe éxí ijnko jna jié tjeche la sákjuí kjuíankí ntayaon la ntá nixin parte tí ntayaon la k'óna jni. ⁹ A ntá tí nixin parte kaín tí nkehe siín tí ntayaon la ik'uén la ko nixin parte kaín tí ntabárcō la xíka.

¹⁰ A ntá tí nixin ángel k'uánoa trompeta la ntá xrínahya k'uánótjen ijnko konotsé jié k'uánótjenxin nkajní mé tjeche éxí ijnko xrohi jié. K'uánótjen chrítaón nixin parte ntarío la ko tí sít'axrje nta. ¹¹ Tí konotsé mé it'in Itsjá la tsíkjiankí nixin parte tí nta ntá kótsjá tí nta la nchónhya chojni ik'uén kixin tí nta xikaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko nixin parte tí yaon la ko nixin parte tí nitjó la ko nixin parte tí konotsé. Méxra tí nixin parte kuítóhe sítié la í kohya t'inkaséyan tí nixin parte tí nchakotjin la ko tí tie.

¹³ Ntá tuénxín k'uíkuan la ko kuínhan ijnko ángel tjetjaká jnkosiné nkajní t'èya ch'án itsen, ntáchro ch'án kixin:

—Nõa tí sín tjejó chjasintajni tió tsontáchro tí trompeta ts'ánoa tí iní ángel inaá.

9

¹ A ntá tí n'óxin ángel k'uánoa trompeta la k'uíkuan ijnko konotsé tsík'ánótjenxin nkajní chrítaón chjasintajni ntá k'uáyéhe tí llave kuènte tí tòye ninka. ² A ntá tuénxín xitjehe tí tòye ninka ntá ntiha chríinxín nchónhya ihnti kuènte tja ntá tí t'inkaséyanxín yaon la ko tí xrintō k'uixin tié kixin tí ihnti kuènte tí tòye. ³ A ntá tí ihnti mé k'uaxrjexín kochjōa xritjaká chrítaón chjasintajni. A ntá tí kochjōa k'uáyéhe kjuachaxin éxí tí chóna konchija siín chjasintajni. ⁴ K'uítuenhen va kixin sincheníehya va tí kayoa siín chjasintajni la ko ninkehó nkehe yoa la ko ninkehó ntayoa. Jehó chojni chónahya sello kuènte Dios tí totjen mé sincheníhi va. ⁵ Kjánchó k'uáyèhya va kjuachaxin ts'óyan chojni. Jehó sinchekjoté va

chojni hasta in'ó nitjó la tí kjuatjoté mé yóhe kjuatjoté éxí chojni tsíkjinehe konchía. ⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjónté tjinkaon sín chrók'uen sín la tí muerte sátsíkji ókjé.

⁷ A ntá tí kochjoá éxí kokate tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsík'óna oro la ko tí kàré la tóyóhe éxí kàré chojni. ⁸ A ntá tí kaxree va tsjehe tóyóhe éxí kaxihi chojni chjin, a ntá tí neno va la tóyóhe neno koxra. ⁹ A ntá tí cuérpoé la tjejianjin nkehe tsík'óna chica kíxin kohya nkehe tsonhen va. A ntá ruido kuènte kanenee la éxí nchónhya carro tinkánkákjen kokate tió xritinká tí síin kjuanínkaon. ¹⁰ A ntá tí ntané va mé tsjiate chojni la éxí ntané konchía, la tíha mé tsochónta kjuachaxin sincheníhi chojni hasta in'ó nitjó. ¹¹ A ntá tí kochjoá mé chónta ijnko nkexro t'etoan mé ijnko ángel kuènte tí tòye njnka. Tí ángel mé nkiva hebreo mé it'in Abadón la nkiva griego la mé Apolión mé t'axrjexín kíxin táha mé sinchek'itjáyan nkehe.

¹² Mé xikaha kónhen tí kjuachrakon xrankíxixín. A ntá naxa t'itjáyan yaá ínaá.

¹³ A ntá tí injonxin ángel k'uánoa trompeta la kuinhan ijnko itén nkexro k'uaxrjexín tí tjejó tí noó ntée kuènte tí altar oro tí tjen Dios. ¹⁴ A ntá tí itén tí nkexro ntáche tí injonxin ángel chónta trompeta kíxin:

—Tjasintankehé tí noó ángel kuènte tí jínahya tjejóchroé chjinaxón tí ntario jíe it'in Eufrates.

¹⁵ Ntá xikaha xintankehe tí noó sín ángel kíxin ts'óyán sín tí níxin parte chojni. Mé xikaha yaxínhin sín sátsji sín tí hora la tí yaon la tí nitjó la tí nánó. ¹⁶ Ntá kuinhan tí número tí soldado la ko tí kokate la doscientos millones.

¹⁷ Mé xikaha xrínahya k'uíkuan tí kokate. A ntá tí sín tjejókjen kokate la tí ntakuin sín chónta nkehe tsík'óna chica kjátse la azul la sine. A ntá tí kokate la ikja la éxí kja koxra la tí ir'va la k'uaxrjexín xrohi la ko ihnchi la ko azufre. ¹⁸ A ntá níxin parte chojni tsík'enxín tí iní clase tí chin tsík'axrjexín ir'va kokate mé xrohi la ihnchi la azufre. ¹⁹ Tí kjuachaxin chónta tí kokate la k'uaxrjexín ir'va va la ko tí ntané va. A ntá ntané la éxí konche tsjehe la tí kja va mé sincheníhi chojni.

²⁰ A ntá tí í so chojni kuítóhe k'uénxinhya tí chin a la kjónté kjuinkíhya sín tí nkehe tjenkayáxin sín la kuitoehya sín tinkáchónki sín nchakuen jínahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya. ²¹ La kjónté xikaha la kuítóehya sín tí nkehe jínahya ch'e la ko tí chrók'óyán kíchó la ko tí nchekjiko kíchó la ko tí chónta sín chojni chjin ókjé la ko tí tjinkaon sín chrókueé.

10

Ijnko ángel la ko tí librito ntsí

¹ Ntá k'uíkuan íjnko ángel imá chonta kjuachaxin k'uínkajinxin nkajní tjenkakjan ch'án tjuí la ko ijnko konchecha chrítaón tí ikja ch'án. A ntá tí kàré ch'án imá tjákini tsjehe éxí yaon, a ntá tí toté la éxí xrohi síchr'ákjen. ² Tjexraá ch'án ijnko libro ntsí tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche. ³ Ntá xrínahya k'uèya ch'án itsen éxí ijnko koxra tsjánka va tí tónínkaon va mé xikaha k'uèya la yato kjónta kjuáteyá tí itén ch'án. ⁴ Ntá kjuixin ntáchro tí yato kjónta la chrókjian ntá kuinhan ijnko itén nkexro nkaya nkajní ntáchro kíxin:

—Chróchronkahya tí nkehe ntáchro tí yato kjónta la ko ni chrókjinhya tíha.

⁵ Ntá tuénxín tí ángel k'uíkuan ijnko toté tjejen ntayaon la ijnko toté tjejen nche ntá kjuaya tja chjina nó nkajní. ⁶ Ntá kjuasin ch'án testigo tí nkexro tjen jnkochrín mé tí nkexro a mé kjuích'éna nkajní la ko chjasintajni la ko ntayaon la ko kaín xín nkehe síin la ntáchro ch'án kíxin:

—Í séhya má naxa tsoxrjen ⁷ ntá tsjixraká tí yaon tí yatoxin ángel ts'ánoa trompeta ntá tsoxiteyá tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchrónka sín itén ch'án.

⁸ A ntá tí itén nkexro kujnhan k'uaxrjexín nkaya nkajní ntá xínixjana inaá ntáchro kixin:
—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuia kjuáncháha tí ángel tí libro ntsí ntá jehe ch'án ntáchro ch'án kixin:

—Tákjá la inte. A ntá tí ir'va la tsoxé éxi tsjen kjánchó tí tsa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxi tsjen ntá chr'éxin la kótsjá nkaya tseña. ¹¹ Ntá tuénxín k'uetuanna ch'án kixin:

—Inaá tsochrónkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijnko ntavara éxi tji tsjehe tsjáchroaxián ntá ntáchro ch'án kixin:

—T'àyá tjáχροa nkaxenhen njnko kuènte Dios la ko tí altar la tékia nkekjaín nkexro tjejó ntiha tinkáchónki Dios. ² Kjánchó tí ntasin itjen ntója njnko la tjáχροahya kixin táha ó tsík'áyéhe tí sín tsíkjixin kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó. ³ A ntá mé janhan tsochr'an iyó testigo kuéntana tsonixjaxinna mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuènte chjasintajni. ⁵ A ntá tí jnkojín sín tjinkaon sich'ehe sín daño la jehe sín la xrohi ts'axrjexín ir'va sín la tsoche kaín tí sín nínkakonhen sín la mé xikaha its'en kaín tí sín tjinkaon sich'ehe sín daño tí jehe sín. ⁶ A ntá tí testigo i chóna kjuachaxin ts'ikjehe nkaya nkajní kixin í ts'aniáhya chrin tí tsonixja sín kuènte Dios la ko kjaxin chóna sín kjuachaxin tsontáche sín tí ntá kixin ts'óna jni la ko sinchekjasótexín sín chojni chjasintajni nchónhya clase chin nchónhya veces éxi tí tjinkaon sín. ⁷ A ntá tí kjuixinhin sín tí xra ntá tí ko jiehe ts'axrjexín tí tòye njnka mé tsjankixin tsjanjonko tí jehe sín ntá tsjacha va ts'óyán va tí jehe sín. ⁸ A ntá tí cuérpóé sín tsitöhe sítsínka tí calle kuènte chjasin jie tí tsíkjak'enkani sín Ìnchéni ntacruz mé tí chjasin mé kjaxin nchek'in sín Sodoma la ko Egipto. ⁹ A ntá iní yaon ko t'ó la kaín chojni itsjé chjasin la ko kaín nkexrí tsjehe sín la ko nchónhya nkiva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a. ¹⁰ A ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uéchrónka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a. ¹¹ A ntá chr'éxin ó k'uátsínka iní yaon ko t'ó la ntá Dios kjuínchexechón tí iyó tí sín a inaá la k'uàya sín inaá la ntá kaín chojni k'uíkon la imá chrakon sín. ¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chrìyan xrákiá antsí ntihi.

Ntá chrìnxín sín nkajní ijnko tjuj. A ntá kaín tí sín nínkakonhen sín la k'uíkon sín kixin xikaha kónhen sákjuj tí iyó sín a. ¹³ Ntá tuénxín imá kuínkí nonte la ntá ijnko ite parte chjasin ntiha la k'uítjayan la yato mil chojni tsík'en kixin tí kuínkí nonte. A ntá kaín tí sín xéhe imá chrakon sín la kjuankixin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí níxin kjuachrakon inaá.

Tí yatoxin trompeta

¹⁵ A ntá tí yatoxin ángel k'uánoa trompeta ntá kuínhin sín ijnko tan nkajní itsen ntáchro kixin:

Ḃ ntá tí sín k'uáyéhe kjuachaxin kuènte chjasintajni la ó kjaxin nchexiteyéhe sín Ìnchéni Jesucristo

kíxin jehe Jesucristo mé ts'etōan ch'án jnkochrírín.

¹⁶ Ḃ ntá tí veinticuatro tí sín táda tjejótxaxin sín trono nkayakon Dios la mé k'uísén sín hasta káxín ikja sín nonte la tjanchehe sín kjuasáya Dios. ¹⁷ Ntáchro sín kíxin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxín tjen la ko jaha ts'inka ínaá.

Kíxin jaha k'uayéhé kjuachaxin jié kíxin xráxín tétōan.

¹⁸ Ḃ ntá kaín tí nación kónínkaon,

Ḃ ntá ó kui tí yaon jaha sinchekjasóte sín

la ko kjaxin jaha sinchekitoexián ijié tí sín tsík'en

la ko tsjénkehé tí sín kjuít'aha xrá chrónkaxín itán

la ko tí sín ó kjuínchetjóá la ko tí sín kjuikosáyehe tí ihniá,

mé tí chojni nteto la ko tí sín chánjan ntsíntsí.

Jaha tjoka sinchek'itjáyan tí sín chrókjuinчек'itjáyan chjasintajni.

¹⁹ Ḃ ntá xitjehe tí nínkōe Dios tjen nkaya nkajní, Ḃ ntá nkaxenhen kónoxín tí caja tjinká tí nkehe tsík'etōan Dios. Ḃ ntá sítjónkíxín la ko nchónhya ruido sítjonta la ko kuínkí nonte la ko imá tsanká k'uániá toni.

12

Tí chojni chjin la ko tí dragón

¹ Ḃ ntá kónoxín nkajní ijnko kjuaxroan jié mé ijnko chojni chjin iké tjákini éxí yaon tsjehe la chrínkí toté tjan itjen nitjó. Ḃ ntá tí kja tjan tjenkáya ijnko corona chóna teyó konotsé. ² Ḃ ntá tí chojni chjin a mé tjejá tjan la t'èya tjan kíxin tjeté tjan kíxin sinchekokjíhi tjan xjeen tjan. ³ Kjaxin kónoxín í jnko kjuaxroan nkajní mé ijnko dragón kjátse chóna yato kja la ite ntéé la jnkojnko corona jnkojnko kja. [Tí dragón mé ijnko kots'aja jié.] ⁴ Tí ntané mé nkánkákjen níxin parte konotsé kuènte nkajní la ik'ue chrítaón chjasintajni. Ḃ ntá tí dragón kjuák'e chók'èxin tí tjen tí chojni chjin mero tsokjíhi xjeen kíxin tjinkaon tjoka chrókjōne tí xjan tsokjíhi. ⁵ Ḃ ntá tí xjan kjuínchekokjíhi tjan mé xjan ntoa kíxin jehe ch'án mé ts'etuenhen ch'án kaín nación la tsochóna ch'án ijnko vara chica ts'etōanxín ch'án. Ntá tí xjeen tjan la mé Dios sákjuiko tí tjen ch'án t'etōan ch'án. ⁶ Ḃ ntá tí chojni chjin la kuinká tjan sákjuí tjan nteje kíxin tsíkjincheyóxin Dios nketí sátsji tjan kíxin ntaha tsoxranjon nkehe sine tjan mil dos cientos sesenta yaon.

⁷ Ntá chr'éxin xrínahya k'uúxin kjuánínkaon jié nkajní la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín. ⁸ Kjánchó kjuachahya tí dragón la kohya lugar kuènte nkaya nkajní. ⁹ Mé xíkaha kuakitsjexín sín tí dragón nkajní. Jehe mé tí konche ósé ikjí mé nchek'in sín diablo la ko Satanás. Jehe mé k'uékjich'iyehé tí chojni kuenté chjasintajni. Jehe la ko tí sín ángel kuènte k'uaxrjexín ntiha la kjuítsínka chjasintajni.

¹⁰ Ntá kuínhan itén ijnko nkexro nkaya nkajní itsen nixja ntáchro kíxin:

—Ó kui tí tsaáxinni tí kjuachaxién tí Dios kuènténi la ko tí kjuachaxin t'etōan Cristo kíxin ó k'uaxrjexín nkajní tí nkexro t'eka jie tí kíchó ni mé kjuanchia jie nchakotjin la ko tie nkayakon Dios kuènténi. ¹¹ Tí sín kíchó ni la kjuacha sín kuaáxin sín kíxin tí ijnié tí Kolélo k'úitji la ko kíxin jehe sín chrónkaxín sín tí tan tsík'áyéhe sín la chrakonhya sín kjónté chrók'uenxín sín. ¹² Ḃ ntá jie la tócháhará kaín rá tjejorá nkajní. Ntá nòa tí sín tjejó chjasintajni la ko ntayaon kíxin k'uúnkajin tí ch'ín diablo la imá nínkaon ch'án kíxin ó nohe ch'án kíxin í kánhyó sé tsjak'e ch'án.

¹³ Ntá tí ch'ín dragón ó nohe kíxin k'uánótjenxin nkajní ikui chjasintajni ntá sákjuíchréhe tí chojni chjin chóna tí xjan ntoa kíxin chrókjuinчек'itjáyan tjan. ¹⁴ Kjánchó

tí chojni chjin k'uáyéhe yaá kanenee kuènte kotjuanhnko ijié kixin jina tsjaká tjan sátsji nteje kixin ntá ikjín tsitohe tí konche. Sátsji tjan kixin ntiha tsoxranjon nkehe sine tjan iní nánó ko t'ó. ¹⁵ A ntá tí konche mé k'uaxrjexín ntá ir'va kixin ts'óna ijnko ntarío kixin tjinkaon va chrók'uátjoáko tí tjan a tí ntá a. ¹⁶ A ntá tí nonte kjuínkítsa tí tjan a kixin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uíxenhén. ¹⁷ A ntá tí dragón la imá kónínkakohen tí tjan a ná imá kónínkaon kjuánjonko tí í so sín naxa kjéhya tí tjan a kixin naxa titekaon sín tí nkehe tsík'etoan Dios la naxa tinkáchónki sín tí nkehe tsíchrónka Jesucristo.

13

Tí yaá bestia

¹ Tí kjuak'é chrínta ntayaon ntá ntaha k'uíkuan chrínxín ijnko bestia chóna yato kja la ko ite ntée chojni t'ántaxínhin Dios. ² Tí bestia k'uíkuan mé tóyóhe kotigre la chóna toté éxí toté ko oso la ko tí ir'va la éxí ir'va koxra. Tí dragón kjuanjon kjuachaxin imá ts'etoan tí bestia a. ³ A ntá ijnko kja tí bestia chóna ijnko tsíchrít'ó jié chóna chrók'uenxín ntá tsíkitohe jina ntá kuenté chjasintajni la chrakon chojni ntá chréhe sín tí bestia. ⁴ Kjuikosáyehe sín tí dragón kixin jehe kjuanjon tí kjuachaxin k'uáyéhe tí bestia ntá kjaxin kjuikosáyehe sín tí bestia la ntá chro sín kixin:

—¿Xá nkexro chrókóyóhe tí bestia la xá nkexro chrókjuacha chrókjuanjonko tí jehe?

⁵ Kjaxin tí bestia k'uáyéhe kjuachaxin tsontá chro kixin chóna kjuachaxin má la ts'ántaxínhin Dios la tsochóna kjuachaxin cuarenta y dos nitjó. ⁶ Ntá mé xikaha kjuích'e k'uántaxínhin Dios la ko k'uántaxínhin ihnié Dios la ko k'uántaxínhin tí nínko tjen nkaya nkajní la ko kaín tí sín tjejó ntiha. ⁷ Kjaxin tsík'áyéhe kjuachaxin tsjanjonko tí sín tinkáchonki Dios hasta tsjacha ts'etuénhen tí sín ntá k'uáyéhe kjuachaxin ts'etuénhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación. ⁸ A ntá tí bestia mé kaín xín chojni siín chjasintajni mé tsjikosáyehe sín tí bestia. Tí chojni a mé ts'ínixínhya ihnié tió k'óna chjasintajni, mé ts'ínixínhya ihnié sín tí libro ts'ínixín ihnié tí sín tsaá. Tí xroon a mé chóna tí Kolélo tsík'óyán sín.

⁹ La jnkojín nkexro tjinkaon chrókuinhin la chrókuinhin tíhi. ¹⁰ Tí nkexro sátsjiko tsjik'ikjehe í so chojni la kjaxin ch'án ts'ikjehe ch'án la tí nkexro tsjayaxin espada la kjaxin espada ts'enxín. A ntá tí nkexro tinkáchónki Dios la t'ichjánxin tsonínkakohenya la ko tsochóna fe.

¹¹ A ntá chr'éxin k'uíkuan í jnko bestia k'uaxrjexín nonte, chóna yaá ntée éxí tsjehe ntée coronta la mé nixja éxí nixja tí dragón. ¹² Tí bestia la chóna kaín xín kjuachaxin éxí k'uéchóna tí bestia saoxín tí k'ué la t'etuénhen tí sín siín chjasintajni kixin tinkáchónki sín tí bestia saoxín mé tí bestia tsíchrít'ó kja ntá tsíkitohe jina. ¹³ Kjaxin kjuasin kjuaxroan jié hasta xrohi k'uánótjenxin nkajní ikui nonte ntá nchónhya chojni k'uíkonxín kon sín kixin xikaha kónhen. ¹⁴ Mé xikaha tí bestia tsík'áyéhe kjuachaxin kjuasin kjuaxroan tí tjen tí bestia saoxín la kjuích'iyehé nchónhya chojni siín chjasintajni. La ntá k'uetuénhen tí sín siín chjasintajni sich'éna sín ijnko nkehe tsíkjanoya éxí yóhe tsjehe tí bestia tsíchrít'oxin espada la kjónté xikaha naxa kjuák'echón. ¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsíkjanoya tóyóhe tí bestia saoxín kixin ntá tí nkehe tsíkjanoya la jina tsonixja la ko jina ts'etoan its'en kaín nkexro tinkáchónkihya tí jehe. ¹⁶ Kjaxin ts'etoan kixin kaín chojni tsochóna marca, á chojni hyé o chojni ntsíntsí, la á chojni rico, la á chojni nòa la á chojni ch'exón xra la ko chojni náhi, mé kaín sín tsochóna sín marca, á tja sín chjina o totjen sín. ¹⁷ Ntá ninkexró xitjahya ts'ena la ko ninkexró xitjahya sinchekji tí chóntahya sín marca o ihnié tí bestia o chóntahya sín número kuènte ihnié tí bestia. ¹⁸ T'ichjánxin chrókienxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uíkuan tí Kolélo tјexín toté chrítaón tí jna Jerusalén. Jehe ch'án tјeko ch'án ciento cuarenta y cuatro mil chojni ts'ínixín totjen sín ihnié tí Kolélo la ko ihnié It'é ch'án. ² Ntá tuénxín kuinhan ijnko itén nkexro kuixín nkaya nkajní mé ijnko ruido éxí nchónhya ntarío la ruido éxí sítjonta itsen la éxí ijnko ruido nchónhya chojni it'in sín isón arpa. ³ Itsje sín nkehe nixin nkayakon tí trono la ko nkayakon tí noó nkexro tјejóchón la ko tí sín táda. Nijnko nkexro chrók'uitjahya tí nkehe tјejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni. ⁴ Tí sín a mé k'uéchóntahya sín itsjé chojni chjin la tјóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixin chojni k'uékjasin jie la ko tí sín a mé éxí ijnko ofrenda xrankíxixín k'uáyéhe Dios la ko tí Kolélo kјaxin. ⁵ Kónoxínhya ninkehó kjuach'ia k'uaxrјexínhya ir'va sín. La tí sín la ninkehó jie chóntahya sín tí tјejó sín nkayakon tí trono kuènte Dios.

Tí nkehe chrónka tí iní ángel

⁶ A ntá k'uíkuan íjnko ángel tјetјaká jnkosiné nkajní chrónka tí tan tsaáxinni jnkochrín tsinhin tí sín siín chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin. ⁷ Ntá t'èya itsen ntáchro kixin:

—Chróchrakonrá la chróxráxinkáonrá Dios la chróchјeherá ch'án kjuasáya kixin ó kjuixraká tí yaon sinchekitoéxín ch'án ijje chojni. Tјikosáyeherá ch'án kixin jehe ch'án kjuích'éna ch'án nkajní la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixin kjuítsínka, ó kjuixin kjuítsínka tí chjasin jie Babilonia. Mé ntiha kuixín tí vino kókuaxín sín kaín nación ntá kjuasin sín jie chóna sín chojni chjin ókjé.

⁹ Ntá xíki tí nixin ángel nixja itsen, ntáchro kixin:

—Jnkójín sín tsјikosáyehe sín tí bestia la ko tí nkehe tsíkjanoya kuènte o tsítóhe sín tsochóna tí marca tí totjen sín o tí tja sín, ¹⁰ mé t'ichjánxin its'i sín tí vino tsјasótéxín sín kuixín tí tјen Dios kixin xíkaha tјechónhen tí kjuanínkaon kuènte Dios ntá ntiha tsјasótéxín sín tí xrohi la ko azufre mé xíkaha tsonhen tí sín a ts'ikon tí sín ángel kuènte Dios la ko tí Kolélo. ¹¹ Tí ihnchi kuènte xrohi sítјasótéxín sín síchriin jnkochrín la tí sín a kuinkáchónki tí bestia la ko tí nkehe tsíkjanoya kuènte o chóna sín ihnié kuènte. ¹² A ntá tí sín tinkáchónki Dios la kuítekaon sín tí nkehe k'uetóan ch'án la ko naxa jína tinkáchónki sín Jesús mé t'ichjánxin chrókuítóehya sín titekaon sín ch'án.

¹³ Ntá kuinhan itén ijnko nkexro kuixín nkajní ntáchro kixin:

—Ikjian tíhi: “Náxrjón tјejó tí nkexro kjónté its'en sín ijje o chr'éxin kixin tinkáchónki sín Inchéni.” Kјá jína, ichro Nchakuen Dios, kixin tí jehe sín ts'ok'éhe sín kixin ó kjuích'e sín xra la tí xra kjuích'e sín mé kjuacha sín.

Tí nkehe tsík'óna chjasintajni

¹⁴ Ntá xrínahya k'uíkuan ijnko tјui tјóá la chrítaón tí tјui tјetјaxín ijnko nkexro éxí yóhe tsjehe tí Xjeen Dios Tsík'óna Chojni tјenkáya ijnko corona tsík'óna chica oro tí kja ch'án la ko ijnko chica hoz imá taté tјexraá ch'án. ¹⁵ A ntá nkaxenhen nínko mé k'uaxrјexín íjnko ángel itsen nixja ch'án nixjehe ch'án tí nkexro tјetјaxín chrítaón tјui ntáchro ch'án kixin:

—Tјankíxian tatéxian chica hoz kixin ó kjuixraká tí yaon tsotjá tí nkehe siín chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxín tí nkexro tјetјaxín chrítaón tјui ntá kjuínchek'átsínka ch'án chica hoz kuénté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrјexín íjnko ángel tí nínko tјen nkaya nkajní la kјaxin sákjuíko ch'án ijnko chica hoz imá taté. ¹⁸ Ntá sákjuíxin íjnko ángel tí tјen altar la chóna ch'án kjuachaxin

kuènte xrohi la itsen k'uíyehē ch'án tí nkexro chóna tí chica hoz imá taté la ntáchro ch'án kixin:

—Tjankixian t̄atexian tí chica hoz taté la tjankixian it̄ja tí racimos to uva tsík'óna chjasintajni kixin ó tsíchjé to —ichro ch'án.

¹⁹ A ntá tí ángel kjuínchek'atsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí t̄jat'o ts'ényaxín sín to. Tíha mé t'axrjexín kixin xikaha Dios sinchekjasóte chojni. ²⁰ A ntá tí to uva tsík'ényaxín sín t̄jat'o tí ikon chjasin a ntá tí t̄jat'o a mé k'uaxrjexín nchónhya j̄ni noixín éxí tí freno tjinká ir'va kokaṭe la trescientos kilómetro kjínxin sátsíkji tí j̄ni a.

15

Tí yato tí ángel la ko tí chin tsjixixín

¹ Ntá k'uíkuan tí nkajní í jnko kjuaxroan jié mé ijnko kjuachrakon: mé tí yato sín ángel kuikao tí yato chin tsjixixín tsoníexín chojni. Tíha mé tí kjuanínkaon kuènte Dios tsjixixín.

² Kjaxin k'uíkuan ijnko nkehe tóyóhē ijnko ntayaon tsík'óna éxí xrosent̄a tsínkíjan xrohi. La tí sín tsíkjacha kixin kuinkáchónkihya sín tí bestia la ko tí nkehe tsíkjanoya kuènte la ko kuáhya sín tí número kuènte ihnié tí bestia mé tjejóxin toté sín chjinaxón ntayaon tsík'óna éxí xrosent̄a la ko chóna sín isón arpa tsíkjanjon Dios tsík'áyéhe sín. ³ Itsje sín isón k'uétsje ch'ín Moisés, tí nkexro kjuích'ehe x̄ra Dios la ko isón kuènte tí Kolélo la mé ntáchro kixin:

Imá ijíé tí kjuaxroan kuéntá kixin kaín nkehe tsíkjich'éna.

Jaha Ìnchéni Dios kaín kjuachaxin chonta.

Ntoá la ko chaxín tí nt̄ia kuéntá.

Jaha mé ijnko Rey t'et̄oan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kixin jaha mé ijnko nkexro jína tjóá?

Kuenté chjasintajni tsjikosáyehe sín tí jaha

kixin k'uíkon sín tí x̄ra tsíkjich'e la jína tíha.

⁵ Kjuixin tíha la k'uíkuan nkajní tjexrankehē tí n̄nko la ko tí cuarto tjóá t'inkachjina tí nkehe tsík'et̄oan Dios. ⁶ A ntá tí n̄nko a k'uaxrjexín yato ángel kuikao yato chin. Tí iké sín la ika tjeté tjóá tjákini. A ntá tí cinta chóna ntakuin sín mé jehó oro. ⁷ A ntá ijnko tí noó tí nkexro tjejóchón mé kjuanjon ijnko copa k'uáyéhe jnkojnko ti yato ángel mé copa tsík'óna chica oro tsíkaón tí nkehe tsjasótexín chojni kuixín tí t̄jen Dios tí nkexro tjechón jnkochrín. ⁸ A ntá tí nkaxenhen n̄nko la tsíkaón ihnchi kuixín tí kjuachaxin jié kuènte Dios la nijnko nkexro xitjahya ts'ixenhen ntiha tsjixinjian ts'átsínka tí yato tí chin kuikao tí yato ángel.

16

Tí copa tjinká nkehe tsjasótexín chojni

¹ Ntá kuinhan ijnko itén ijnko nkexro imá itsen k'uaxrjexín nkaxenhen n̄nko, ntáche tí yato sín ángel kixin:

—Sátjia tikíkanjian chrítaón chjasintajni tí nkehe tjíá tí yato copa la táha mé tsjasótexín chojni kuixín tí t̄jen Dios —ichro ch'án.

² A ntá tí ángel saoxín sákjuík'it̄ji tí nkehe tjíá tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanoya kuènte tí bestia mé tsík'ayan sín tosóa, imá tjetéhe sín.

³ A ntá tí yóxin ángel sákjuík'it̄ji tí nkehe tjíá copa chrítaón ntayaon. A ntá tí ntayaon la k'óna j̄ni éxí ijnié ijnko chojni tsík'óyán kichó la kaín ko sínkánkí ntayaon ik'uén.

⁴ **A** ntá tí níxin ángel sákjuík'itji tí nkehe tjiá copa chrítaón ntarío la ko chrítaón tí nta sít'axrje tòye, la ntá tí nta k'óna jni. ⁵ Ntá tuénxín kuñhan nixja tí ángel kuènte nta ntáchro kixin:

—Jaha mé ijnko nkexro jína kixin kjuinchekitoexián ijie chojni. Ichéni jaha ijnko Dios jína, óse tjen la ko naxa tjen ijie ⁶ kixin jehe sín k'óyán tí sín tinkáchónki tí jaha la ko tí sín tsíchrónka itan la ntá jaha Inchéni chjehé sín ijni its'i sín kixin mé xikaha sítjasóte tí jehe sín.

⁷ Kjaxin kuñhan nó altar ijnko nkexro ntáchro kixin:

—Chaxín Inchéni Dios, jaha mé chonta kaín kjuachaxin la ntoá jína kjuinchekitoexián tí ijie a.

⁸ **A** ntá tí noóxin ángel sákjuík'itji tí nkehe tjiá copa chrítaón yaon, a ntá tí yaon antsí k'uáyéhe kjuachaxin tsosóa kixin tsochjánxin chojni tí sóa kuènte. ⁹ **A** ntá kaín chojni chjánxin tí imá sóa kuènte yaon la k'uántaxínhin sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ **A** ntá tí in'óxin ángel sákjuík'itji tí nkehe tjiá copa chrítaón tí trono t'etoanxín tí bestia. **A** ntá kaín tí k'uéchóna kjuachaxin k'uék'etoan tí bestia la k'uixin tié. **A** ntá tí chojni a la netja nejen sín kixin tjotéhe sín. ¹¹ La kjónté xikaha la kjuinkíhya sín tí nkehe jínahya ch'e sín. Náhí. Íchá má k'uántaxínhin sín Dios tjen nkaya nkajni kixin tjotéhe sín kixin xikaha kónhen sín.

¹² **A** ntá tí injonxin ángel sákjuík'itji tí nkehe tjiá copa chrítaón ijnko ntarío jie it'in Eufrates. **A** ntá tí ntarío la kjuixié kixin jína tsakitjehé sín ijnko nta tsjixin tí sín rey tsjixin nó tjitoxin yaon.

¹³ **A** ntá k'uíquán kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxi korána tsjehe. ¹⁴ Tíha mé nchakuen tí jínahya kjuasixín sín kjuaxroan. **A** ntá sákjuikjinchekójnkotsé kaín rey siín chjasintajni kixin tsjanjon sín ijnko yaon jie kuènte Dios chóna kaín kjuachaxin. ¹⁵ “Tsjehe, janhan titàya ts'inké éxi ijnko xichee. Chéhe tí nkexro tjejótsehe la t'ayakonhen tí iké kixin ts'itjáyannya kixin chrók'uajihya sín tjóchin sín la chrókósuèhya sín kixin chrókónoxín kixin tjóchin sín.”

¹⁶ **A** ntá tsojnkotsé tí sín rey tí nonte it'in Armagedón nkiva Hebreo.

¹⁷ **A** ntá tí ángel yatoxin sákjuík'itji nkehe tjiá copa chrítaón tí xrinto ntá nkaxenhen ninko nkaya nkajni k'uaxrjexín ijnko itén chojni itsen nixja mé kuixin tí tjen tí trono la ntáchro kixin:

—Ó kjuixin kónhen tíha.

¹⁸ **A** ntá sítjónkixín la ko ruido sítjonta la ntá imá kuínki nonte fuerte. La desde tí kjuankixin k'uixin chojni chjasintajni la xikahya kónhen kuínki nonte a ntá jie antsí fuerte kuínki nonte. ¹⁹ **A** ntá tí chjasin jie xitjehé nonte la iní k'óna, chjenca. La koí kaín chjasin siín chjasintajni tsík'oya. **A** ntá Dios xraxinkaon kixin chrókjuínchekjasóte tí sín siín tí chjasin jie Babilonia la k'uetōan ch'án its'i sín tí vino tsjasótexín sín kixin mé xikaha kóninkaon ch'án. ²⁰ **A** ntá kaín tí nonte sínkátaón ntayaon k'uánianki nta la ko tí jna k'uitjayan. ²¹ **A** nta nkajni k'uánótjexin toni ijie xratja chojni mé cuarenta kilo yexín jnkojnko toni. **A** ntá chojni na antsí má k'uántaxínhin sín Dios kixin tí xikaha kónhen sín xratja sín toni la imá kjoté sín.

17

Tsjasóte tí tjan jínahya

¹ **A** ntá ikui ijnko tí yatoxin ángel chóna tí yato copa la ntáchro ch'án kixin:

—Xrákiá tsjákoaha nkexrí tsjasóte tí chojni chjin tjasin jie tjetjaxin tjan chrítaón tí nchónhya nta. ² Tí sín rey t'etoan chjasintajni kjuasinko tjan jie la ko tí chojni siín chjasintajni kókuaxxin sín tí vino a mé kjaxin kjuasixín sín jie.

³ A ntá tuénxín Nchakuen Dios sákjuikian nteje ntá k'uíkuan ijnko chojni chjin tjetjaxin chrítaón ijnko bestia kjátse la kuenté tí ko a la símá ihnié náxrxónhya tsík'ántaxíenxín sín Dios la chóna yato kja la ko ite ntée. ⁴ A ntá jehe tjan chóna tjan iké tjan morado la ko kjátse la teyá tjan chica oro la ko xro náxrxón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie. ⁵ Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jie Babilonia, mé ìné tí chojni chjin tjasin jie la ko kain chojni jínahya ch'e siín chjasintajni.” ⁶ Ntá kónòna kixin tí tjan a la tsékanxin tí ijnié tí sín tinkáchónki Dios la ko tí ijnié tí sín tsík'enxín tí chrónka sín kixin tinkáchónki sín Jesús. Ntá k'uíkuan xíkaha imá chrakonna. ⁷ A ntá ijnko ángel ntáchro ch'án kixin:

—¿Nkekuénté chrakuan? Ntá ijie sjintanoha tí nkehe tienxínhya chojni kuènte tí tjan a la ko kuènte tí bestia tjekjen tjan chóna yato kja la ko ite ntée. ⁸ Tí bestia k'uíkuan jaha kjuák'e ósé la ijie tjechónhya kjánchó senó tsochrìinxín tí tòye ninka ntá chr'éxin ts'itjayan. A ntá tí sín siín chjasintajni ts'ínixínhya ihnié sín tí libro ts'ínixín ihnié chojni tsaá desde k'óna chjasintajni, la mé jehe sín tsochrakon sín tió ts'ikon sín tí bestia kjuák'e ósé la tsík'en la ntá ijie xikjan ínaá.

⁹ Tí jnkójn nkexro chrókienxín la mé tí yato kja la t'axrxéxin yato jna tjekjen tí chojni a. ¹⁰ A ntá tí kja kjaxin t'axrxéxin yato rey la ntá in'ó tí sín rey la í t'etuanyha sín ijie la ijnko tí jehe sín t'etoan ijie la í jnko naxa tjihya. A ntá tió tsji tí yatoxin la í kánhyó sé ts'etoan. ¹¹ A ntá tí bestia kjuák'e senó la ijie tjechónhya mé tí jnixin rey la jehe ch'án kuènte tí yato rey la chr'éxin la ts'itjayan.

¹² A ntá tí ite ntée tsík'ikuan mé ite rey naxa t'etuanyha. A ntá ijie la ts'áyéhe sín kjuachaxin ts'etoanko tí bestia kjánchó kánhyó sé. ¹³ Tí ite tí rey la jnkokoá tsjenkayáxin sín la tsjanjon sín kjuachaxin kuènte sín kixin ts'etoan tí bestia. ¹⁴ Tsjanjonko sín tí Kolélo a ntá tí Kolélo la tsjacha ts'etoan kixin jehe ch'án mé Ìnché kaín chojni la ko jehe ch'án mé tí Rey ts'etuénhen kaín rey la ko tí sín tjejóko ch'án mé tsík'íyehé Dios la tsík'jeyá ch'án sín la jína nchexiteyá sín.

¹⁵ Kjaxin ntáchro tí ch'ín ángel kixin:

—Tí nta k'uíkuan la chrítaón tjetjaxin tí chojni chjin tjasin jie la mé t'axrxéxin kixin nchónhya chjasin la ko nchónhya chojni la ko nchónhya nación la ko nchónhya nkiva. ¹⁶ A ntá tí bestia k'uíkuan la ko tí ite ntée la tíha mé tsonínkakonhen tí tjan tjasin jie la tsitqhe tjan tjóchín tjan la sine tí bestia tí nto chóna cuérpoé tjan la ko tsoche tí huésóé tjan. ¹⁷ Dios tsík'etuénhen asén sín kixin xíkaha sich'e sín éxí tjinkaon ch'án kixin jnkokoá tsjenkayáxin sín la ko tsjanjon sín kjuachaxin kuènte tí sín rey kixin ts'etoan tí bestia tsoxiteyájia tí nkehe tsintáchro Dios. ¹⁸ A ntá tí chojni chjin k'uíkuan la táha mé tí chjasin jie t'etoan tí sín rey t'etoan chjasintajni.

18

Kjuítsínka chjasin Babilonia

¹ Ntá chr'éxin k'uíkuan í jnko ángel k'uínkajinxin nkajní chóna nchónhya kjuachaxin ntá chjasintajni antsí k'uínkaséyanni tí tjákiní tsjehe ch'án. ² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jie Babilonia. Ntá tí jínahya ó kjuacha k'uíxénhen t'etoan ntiha la ntiha siín kaín xín clase nchakuen jínahya la ko siín kaké ko xritjaká tjuáhya la ko jínahya. ³ A ntá kaín xín nación kókuaxin tí vino kjuínchekji tjan ntá kjuasinko tjan sín jie la ko tí sín rey t'etoan chjasintajni kjaxin kjuasinko tjan jie. La tí sín nchekji nkehe chjasintajni kórícoxín sín kixin k'uena tjan nchónhya nkehe.

⁴ Ntá kuínhan í jnko itén nkexro kuixin nkaya nkajní ntáchro kixin:

—T'axrxéxinrá tí chjasin ntiha kixin tí jahará tinkachónkirá tí janhan kixin chrók'uícayará tí ijie sín la ko chrókjuasótexínhyará tí nkehe tsonhen sín. ⁵ Kixin

tí nchónhya jie tinkák'ánkí hasta kjuixraká nkajní la Dios ó nohe tí jie chóna sín. ⁶ Ch'eherá tjan éxí tí jehe tjan kjuích'ehe tjan í so chojni kixin xikaha tsjasótexín tjan. Chrókjuenkehérá tjan iyó veces éxí tí tsíkjich'éna tjan ik'ui í so chojni. ⁷ Antsí chrókjuasóte tjan tóyóhe tí nkehe kjuích'e tjan kixin kjuínchehnke tjan la ko k'uéchóna tjan kaín nkehe tóxrjínhin tjan. Jehe tjan ntáche asén tjan kixin: “Ntihi tjetjaxian éxí ijnko reina. Jehya ik'ána kixin chrókjuasótena.” ⁸ Mé xikaha kjaxin jnkokoá yaon itsi tí kjuaxikaon tsonhen tjan mé its'en tjan la ko tsjasótexín tjan kjinta la tsoche tjan kixin Inchéni imá chóna tjan la jehe ch'án sinchekjasóte ch'án tjan.

⁹ A ntá tí sín rey siín chjasintajni tsíkjasinko sín tjan jie la ko nchónhya nkehe kjuínchexenko sín tjan la mé tsotsjánka sín la ts'èya sín tió ts'ikon sín ts'aya ihnchi tió tsoche tjan. ¹⁰ Ntá jehe sín tsitohe sín ikjín kixin chrakon sín kixin xikaha tsjasóte tjan la tsontáchro sín kixin:

—Nòa tí jaha chjasin jie Babilonia, chjasin imá t'etoan kixin titàya kjuasótia.

¹¹ Tí sín xrinchekji nkehe la kjaxin tsjánka sín, t'èya sín kixin xikaha kónhen tí chjasin ntiha kixin kohya nkexro ts'enehe sín tí nkehe sinchekji sín. ¹² Kjuínchekji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjátse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixro chica la ko ixro mármol. ¹³ Kjaxin xrinchekji sín canela la ko xroan xraxé náxrjón la ko chjincjo la ko xroan mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokate la ko carreta la ko chojni ch'exón xra kjaxin kjuínchekji sín. ¹⁴ Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'uitjayan kaín nkehe náxrjón tjete k'uéchonta.

¹⁵ Tí sín k'uékjinchekji tí nkehe la kóríco sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'èya sín ¹⁶ la tsontáchro sín kixin:

—Nòa tí chjasin jie. Éxí ijnko chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla. ¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etoan tí ntabárcjo la ko tí sín tsík'ixenhen tí ntabárcjo la ko tí sín ch'e xra chrítaón ntayaon kuítóhe sín ikjín ¹⁸ la tió k'uikon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jie í?

¹⁹ La tjíkjanjin kja sín nche la tsjánka sín t'èya sín kixin:

—Nòa tí chjasin jie. Kóríco tí sín k'uéchóna ntabárcjo chrítaón ntayaon kixin tí chjasin í la ntá jnkorató koá kjuixin k'uitjayan tí nkehe chóna sín.

²⁰ A ntá jahará tjejorá nkajní tócháhará kixin xikaha kónhen tí chjasin a. Tócháhará jahará k'uájikoarà Inchéni la ko jahará k'uéchronkará itén Dios la ko kaín rá kuinkachónkirá tí jehe ch'án kixin Dios kjuínchekjasóte tí chjasin a kixin tí jie kjuasin sín kjuínchekjasótiará sín tí jahará.

²¹ A ntá ijnko ch'ín ángel chóna kjuachaxin kjuatsen ijnko xro éxí ijnko xro jie kuènte molino la k'uenkí ch'án ntayaon la ntá ntáchro ch'án kixin:

—Mé xikaha tsonhen tí chjasin Babilonia, tí chjasin jie la nunca ts'ikonhya chojni chr'éxin. ²² Nunca tsienhya sín música kuènte isón arpa la ko flauta la ko trompeta tí ntja la ko ninkexró xitjahya sich'e ninkehó xra ntiha la ko kjaxin tsienhya sín ninkehó tóvéntó xro molino. ²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsotehe chojni ntiha. Tí sín k'uékjinchekji nkehe ntiha la imá

k'uék'etoan kuènte chjasintajni la tí sín k'uékjich'iyehé tí sín siín chjasintajni la k'uékjich'e sín jínahya, k'uédkjinchexroan sín.

²⁴ A ntá tí chjasin jié ntiha tsíkónoxín ijnié tí sín tsík'en k'uéchrónka itén Dios la ko tí sín tinkáchónki tí jehe ch'án la ko kain tí sín tsík'énxín chjasintajni.

19

¹ Ntá chr'éxin ntá kuínhan itén nchónhya nkexro tjejó nkaya nkajni itsen nixja, ntáchro sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án ti jeheni la imá chóna kjuachaxin Dios kuènteni.

² Kixin jehe ch'án ntoá kjuínchekjasóte ch'án tí tjan kjuasin nchónhya jié kixin jehe tjan kjuachroe tjan chojni siín chjasintajni kixin tí nkehe jínahya k'uékjich'e tjan.

Dios kjuínchekjasóte tjan kixin k'óyan tjan tí sín k'uékjich'ehe ch'án xra.

³ La ntá kjaxin inaá xintáchro kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítøehya chrìn hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja sín nonte kjuikosáyéhe sín Dios tí nkexro tjetjaxin tí trono la ntáchro sín kixin:

—¡Amén! ¡Aleluya! ¡Kjuasáyé Dios!

⁵ Ntá xrínahya kuínhin sín itén ijnko nkexro tjen nó trono ntáchro kixin:

Chjehérá kjuasáya tí Dios kuènteni kaín rá ch'ehérá ch'án xra la kuítekákonhénra ch'án, mé kaín tí jahará kjónte chánjan ntsíntsi o chojni nteto.

Tí kia tsøtehe tí Kolélo

⁶ Kjaxin kuínhan nkehe éxi itén nchónhya chojni éxi nchónhya ntarío sítóvéntó la ko imá itsen sítjonta la ntáchro kixin:

¡Aleluya! Kjuasáyé Ìnchéni ó kjuankixin t'etoan Ìnchéni Dios kuènteni chóna kaín kjuachaxin.

⁷ Chrókóchéheni la chrókjuikosáyeheni Dios kixin ó kjuixraká tí yaon ts'ixín kia kuènte Kolélo.

La tí tjan tsøtehe la tsíkóyaxínhin tjechónhen,

⁸ mé tsík'áyéhe kjuachaxin tsík'itsa ka lino náxrjón tjóá tjákini.

A ntá tí ka lino náxrjón a mé t'axrjexín kixin tí jína k'uéjó tí sín tinkáchónki Dios.

⁹ Ntá tí ch'ín ángel k'uøtoan ch'án kixin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsøtehe tí Kolélo.”

A ntá ntáchro ch'án inaá kixin:

—Tí palabra a mé chaxín ntoá nixja Dios.

¹⁰ Ntá kjuak'éxian tøch'ian tøté tí ángel kixin chrókjuikosáyaha ch'án, kjánchó jehe ch'án ntáchro ch'án kixin:

—Xikahya chrokjuich'e kixin janhan kjaxian t'aha xra Dios éxi tí jaha la ko éxi tí sín kichuá kuitøehya kuítekaon tí tan jína chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uíkuan kixin nkajni tjexrankehe la ntaha kónoxín ijnko kokate tjóá la ko tí nkexro tjejen va mé it'in Jína la ko Chaxín kixin ntoá kjuínchekitøexín ch'án ijje chojni la ko ntoá kjuánjonko ch'án chojni. ¹² A ntá tí ikon ch'án mé tjákini éxi xrohi nene xikaha tsjehe. A ntá tí kja ch'án la chóna nchónhya corona la ko ts'ínixín ijnko ihnié ijnko nkexro la jehó ch'án mé nohe ch'án tíha. ¹³ Tjenkáya ch'án ijnko ka tsík'ixikjanjin jni ntá ihnié ch'án mé Itan Kuènte Dios. ¹⁴ Chréhe tí sín soldado kuènte nkajni. Iké sín mé ka lino

náxrjón tjóá la tjejókjen sín kokate tjóá. ¹⁵ Ir'va tí jehe ch'án k'uaxrjexín espada imá taté kixin táha mé tsjik'óyánxin ch'án tí sín siín kaín nación la ko ts'etōanxín ch'án ijnko chica vara. Jehe ch'án mé sinchekitoexín ch'án ijie sín éxí t'énxin sín to uva toté sín mé xikaha ts'etūenhen ch'án kixin its'i sín vino tsjasótexín sín kixin mé xikaha tsixin tí kjuanínkaon kuènte Dios chóna kaín kjuachaxin. ¹⁶ Iké ch'án mé ts'ínixín kixin jehe ch'án me Rey t'etūenhen kaín rey la ko jehe ch'án mé Ìnché kain chojni.

¹⁷ Ntá tuénxín k'uíquān ijnko ángel tjejin toté tí tjen yaon la k'uéyato ch'án itsen k'uéyatohe ch'án tí ko xritjaká, ntáchro ch'án kixin:

—Xrákirá tójnkotsérá ntihi kixin Dios tsjanjon nkehe sinterá ijie. ¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jjehe la ko ntoe kokate la ko cuerpo kuènte tí sín tsíkjiták'á va la ko cuerpo kuènte kaín chojni libre o chojni ch'exón xra la chojni hyé o chojni ntsínsí.

¹⁹ K'uíquān tí bestia la ko tí sín reyes t'etōan chjasintajni la ko tí soldado kuènte sín, tsíkójnkotsé sín tsjanjonko sín tí nkexro tjejen kokate la ko koí tí sín soldado kuènte ch'án. ²⁰ A ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xikaha kjuich'e tí nkexro ntoáhya kjuako, kjuich'iyehé ch'án tí sín tsíkítóhe tsíka marca kuènte tí bestia la ko kjuikosáyehe sín tí nkehe tsíkjanoya kuènte tí bestia. Ntá tí bestia la ko tí nkexro ntoáhya kjuako itén Dios mé k'uituenhen sín sátsji tí siín xrohi tsoche tjejóchónxinhín sín tsochéxin azufre. ²¹ A ntá tí í so sín la ts'enxín tí espada k'uaxrjexín tí ir'va tí nkexro tjejen tí kokate tjóá la kaín ko xritjaká ts'ixín tí siín tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrínahya k'uíquān ijnko ángel k'uínkajinxín nkajní tjejraá llave kuènte tí tòye ninka la ko ijnko cadena jié tjejraá ch'án. ² A ntá tí ángel a itsé tí dragón mé tí konche óse kjí mé tíha tí ch'ín diablo la ko Satanás la kjuak'echroé ch'án ijnko mil nánó. ³ Ich'án ch'án sákjuí tòye ninka ntá k'uikjehe ch'án la ko kjuak'e ch'án ijnko sello chrítaón puerta kixin ntá tí dragón chrókjuich'iyehya tí chojni siín kaín nación hasta chrók'uatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uíquān tí trono la ko tí sín tjejótjaxín tsík'áyéhe sín kjuachaxin sinchekitoexín ijie chojni. Kjaxin k'uíquān asén chojni tsíchínjin kja kixin kuítekaon sín Jesús la ko tsíchónkaxín sín itén Dios. Jehe sín la kuinkáchónkihya sín tí bestia la ko tí nkehe tsíkjanoya kuènte la ko kuítóehya sín ikuá sín marca tí totjen sín o tí itja sín. Mé k'uíquān kixin tsíxechón sín la ko ts'etōanko sín Cristo ijnko mil nánó. ⁵ Ntá í so chojni tsík'en la naxa xechónhya hasta ts'atsínkajia tí mil nánó. Tíha mé xrankixín tsoxechón chojni. ⁶ Náxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chónahya ninkehó kjuachaxin naxa xikaha chrókónhen sín. Jehe sín mé nchat'á kuènte Dios la ko kuènte Cristo la ts'etōanko sín ch'án tí mil nánó.

⁷ A ntá ts'atsínka tí mil nánó ntá ch'ín Satanás tsoxintankehe tí kjíchroé. ⁸ La sátsjikjich'iyehé tí chojni siín kuenté chjasintajni la ko sátsjikjich'iyehé tí chjasin Gog la ko Magog. La tsojnkotsé sín kixin tsjanjon sín la ko tí soldado kuènte tí jehe sín. Nchónhya sín tsojnkotsé ntiha éxí tí nchesen siín ntayaon. ⁹ Mé xikaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasin jié tjehe ch'án. A ntá xrohi tsixin nkajní kixin tsochexín tí sín jínahya ts'itjáyanxín sín. ¹⁰ A ntá tí diablo tsíkjich'iyehé tí jehe sín kjaxin sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochrín.

Tsitōexín ijíe chojni tí tjen tí trono jíe tjóá

¹¹ Ntá k'uíkuan ijnko trono jíe tjóá la ko tí nkexro tjetjāxín nó ntiha. A ntá tí tjen ch'án ntiha la ó k'uitjáyankoá nonte la ko nkajní la í kónoxínhya ínaá tí nonte. ¹² Ntá k'uíkuan tí sín tsík'en; chojni hyé la ko chojni ntsínsí tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihníe tí sín tsaá. Ntiha tsitōexín ijíe chojni tsík'en éxí nixja tí í so libro nkehe tí xra kjuích'e sín ts'ínixín ntiha. ¹³ Tí sín tsík'enxín ntayaon la ntiha xrakuaxín sín la tí sín sátsíkji tí síin chojni tsík'en la ntiha xrakuaxín sín kaín sín tsochjina sín tsitōexín ijíe jnkojnko sín kixin nkexrí tí xra kjuích'e sín. ¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha. ¹⁵ La ko ntaha sátsji tí chojni ts'ínixínhya ihníe sín tí libro ts'ínixín ihníe chojni tsaá.

21

Nkajní nixin la ko nonte nixin

¹ Ntá k'uíkuan ijnko nkajní nixin la ko ijnko nonte nixin kixin tí nkajní saoxín la ko tí nonte saoxin tsík'itjāyan la ko kjaxin kohya ntayaon. ² Janhan Juan k'uíkuan tí chjasin jíe tjóá. Táha mé tí Jerusalén nixin k'uínkajinxín nkajní kuixín tí tjen Dios la kuenté tsíkóyóxin éxí ijnko chojni chjin tsoṭehe tsík'itsa kixin tsákja tí xí. ³ Ntá kuñhan ijnko itén ijnko nkexro itsen kuixín nkajní ntáchro kixin:

—Dios itjen tí síin chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín. ⁴ Jehe ch'án mé sinchexámá kaín ntakon sín la í tsokohya nkexro its'en la tsokohya nkexro tsotsjánka la ko ts'áváhya sín la ko tsokohya kjuatjoté kixin kaín tí nkehe k'uékónhen ósé la ó kjuixin k'uátsínka.

⁵ A ntá tí nkexro tjetjāxín tí trono ntáchro ch'án kixin:

—Janhan mé t'ána kaín nkehe nixin.

Kjaxin ntáchro ch'án kixin:

—Ikjian tíha kixin tíha mé palabra chaxín la chrókuítekáván kaín tíha.

⁶ Ntá chr'éxin chrónka ch'án kixin:

—Kaín nkehe la ó kjuixin tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkexro t'enxín ntá la janhan tsotjahá sín tí ntá its'i sín mé tí ntá tjanjon kjuachón la ninkehó ts'ixinkíéhya sín tíha. ⁷ Tí nkexro tsjacha tsítōehya tí janhan la ts'áyéhe sín kaín tí nkehe tsotjahá sín. La janhan mé ts'óna Dios kuènte sín, a ntá jehe sín mé xjanna ts'íkaan tí jehe sín. ⁸ A ntá tí chojni chrakon la chojni titekakonhya la tí sín chjinoxínhin la ko tí chojni ts'óyán kichó la ko tí chojni tsakja chojni chjin ókjé la ko tí chojni xrinchexroan la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí síin xrohi tsochexín sín azufre tió itsi tí yóxin muerte.

Tí Jerusalén nixin

⁹ Ntá ikui ijnko tí yatoxin ángel chóna tí yatoxin copa tsíkaón tí yatoxin chin tsjixixín tsjasótexín chojni. Ntá ntáchro ch'án kixin:

—Xrákia tsjákoha tí tjan tsoṭehe tí Kolélo.

¹⁰ Ntá k'uíkuan ijnko nkehe kjuakoxín Nchakuen Dios la ntá tí ángel sákjuíkian ijnko jna jíe la ko noi la kjuakona ch'án tí chjasin jíe tjóá mé tí Jerusalén ts'inkajinxín nkajní tsíkixín tí tjen Dios. ¹¹ A ntá tí chjasin a mé tjákiníxin kjuachaxin kuènte Dios. A ntá tjákiní éxí ijnko xro imá náxrjón tjeṭe éxí xro jaspe éxí xrosenta tsjehe. ¹² A ntá jnkontatjen tí chjasin chóna tjat'o noi la chóna teyó puerta la jnkojnko ángel jnkojnko puerta tjejónta la ihníe tí teyó tí sín tsík'axrjeníxin sín Israel ts'ínixín jnkojnko puerta. ¹³ La iní puerta la nó tjitōxin yaon la iní puerta la nó norte la iní puerta la nó tjiatóxin yaon la iní puerta la nó sur. ¹⁴ Tí tjat'o tsík'antatjen tí chjasin chóna teyó xro chónaxín fuerza tí tjat'o la jnkojnko ihníe tí teyó tí sín k'uájiko tí Kolélo a mé ts'ínixín jnkojnko tí xro a.

¹⁵ A ntá tí ángel tjenixjana chóna ijnko nta vara oro, éxi tji tsjehe, tsjachoxín tí chjasin la tí puerta kuènte chjasin la ko tí tjat'o t'inkákuènxin. ¹⁶ Tí chjasin la cuadrada la tí kjinjinxin jnkokón la ko tonxín la jnkokón. A ntá tí ángel kjuachoxín tí chjasin tí nta vara éxi tji tsjehe tsíkjachoa ch'án tí chjasin mé chóna dos mil dos cientos kilómetro tí kjinjinxin la ko tí ntetoxín la ko tí tonxín la jnkokón. ¹⁷ Ntá tsíkjachoa ch'án tí tjat'o tsíkjintajin tí chjasin a la chóna sesenta y cuarto metro kixin éxi tjachroa chojni chjasintajni mé xikaha kjuachoa tí ángel.

¹⁸ Tí tjat'o tsík'ántatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosenta tjoá. ¹⁹ Tí xro tsík'óna xrankixín tsík'ántatjen tí tjat'o la nchónhya xro chjiní náxrjón tsínkíjjan. A ntá tí xro xrankixín la jaspe, a ntá tí xro yóxin la zafiro, la tí xro níxin la ágata, a ntá tí noóxin la esmeralda. ²⁰ A ntá tí n'óxin xro la xro mármol la tí injonxin la cornalina, la tí yatoxin la crisólito, a ntá tí jnixin la berilo, la tí xro naxin la topacio, la tí texin la crisoprasa. A ntá tí tejnkoxin la jacinto, a ntá tí teyóxin la amatista. ²¹ A ntá tí teyó puerta mé tjejó perla la jnkojnko puerta tsík'óna jnkokoá perla. A ntá tí ntja jíe kuènte chjasin la tsík'óna jehó chica oro éxi xrosenta tsjehe.

²² Ntaha la k'uíkónhya ninkehó nínko tí chjasin a, kixin Inchéni Dios chóna kaín xín kjuachaxin la jehe ch'án la ko tí Kolélo mé tí nínko ntiha. ²³ Tí chjasin a mé t'ichjánxinhya yaon la ko ni nitjó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuènte. ²⁴ A ntá tí chojni kuènte kaín nación tsíkaá la ts'ikonxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín. ²⁵ A ntá tí puerta kuènte chjasin la tsík'jehya tí nchakotjin la ntaha la tsokohya ts'ixin tie. ²⁶ Ntaha sátsjiko kaín xín nación tí nkehe náxrjón k'uéchóna sín chjasintajni. ²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chjinnoxínhin o chojni ch'ia. Jehó ts'ixenhen tí sín ts'ínixín ihnié tí libro ts'ínixín ihnié tí sín tsaá, mé tí libro chóna tí Kolélo.

22

¹ A ntá tí ángel kjuákona ijnko ntarío tjoá, a ntá tí nta a mé tjanjon kjuachón. Táha mé t'ikonxíni éxi xrosenta la mé k'uaxrjexín tí trono kuènte Dios la ko tí Kolélo. ² A ntá jnkosiné tí calle tjetotan kuènte tí chjasin a la ko nanánko tí ntarío ntiha itjen tí inta tjanjon kjuachón mé t'óna to teyó veces jnkojnko nánó kixin t'óna to jnkojnko nitjó. Tí ka kuènte tí nta la xroan tsitoxín jina tí nación siín ntiha. ³ La mé ntiha tsokohya ninkehó kjuachjinnoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án. ⁴ Ts'ikon sín tí kàré Dios la ko tsochóna sín ihnié ch'án tí totjen sín. ⁵ Ntiha la tsokohya ts'ixin tie la tí sín siín ntiha la t'ichjánxienhya sín xrohi kuènte lámpara la ko ni xrohi kuènte yaon kixin Inchéni Dios mé ts'inkaséyanxín sín ntiha la ko tsochóna sín kjuachaxin kuènte Dios jnkochrín.

Tí itsi Inchéni la kánhyó sé

⁶ A ntá tí ángel mé nixjana ch'án ntáchro kixin:

—Tí itan a mé chaxín la chrókuitekákonhén tí tan a. La ko Inchéni mé tí Dios nchexraxinkaon tí sín nixja kjuachaxin ihnié ch'án mé ichr'án ch'án tí ángel kuènte ch'án kixin tsjakuexin ch'án tí sín ch'ehe ch'án xra, tí nkehe tjoka tsonhen.

⁷ —¡Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuinhan la ko k'uíkuan tíha. A ntá chr'éxin kjuixin kuinhan la ko k'uíkuan tíha ntá kjuak'éxian toch'ian chrínkí toté tí ángel kixin xikaha kjuákona la ntá chrókuíkosáyaha ch'án. ⁹ A ntá jehe ch'án ntáchro ch'án kixin:

—Xikahya sich'e kixin janhan kjaxin t'aha xra Dios éxi tí jaha xikaha la ko éxi tí sín kichuá mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókuíkosáyehé.

¹⁰ Kjaxin k'uetuanna ch'án kixin:

—Chrókjuak'echjinahya tí nkehe jahvá kuinhín kuènte Dios éxí nixja tí libro i kixin ó kuichjina tí yaon tsoxiteyá. ¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjínhin Dios la naxa chrókjuich'e xikaha la ko tí nkexro tsíkjinchetjóá Dios la naxa jína chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjahará jnkojnkorá kixin nkexrí tí xra chuich'erá. ¹³ Janhan mé tí xrankíxixín la ko tí tsjixixín la janhan mé tí saoxín la ko tí tsjixixín éxí tí letra xrankíxixín A la tsjixixín Zeta.

¹⁴ Náxrjón ts'ejó tí nkexro tsíkjen iké kixin tsochóna sín kjuachaxin tsochjinehe sín tí nta tjanjon kjuachón kixin jína ts'ixenxín sín tí puerta kuènte chjasin. ¹⁵ A ntá ntója tsitöhe tí chojni jínahya kuitekakonhya la ko tí chojni nchexroan la ko tí sín chóna nchónhya chojni chjin la ko tí chojni tjàya la ko tí chojni tinkáchónki tí nkehe tsíkjanoya la ko tí chojni tóxrjínhin xrich'ia.

¹⁶ —Janhan Jesús mé ichr'an tí ángel kuèntana kixin tsochénka kaín ninko kaín tíha. Janhan mé k'uaxrjeníxian tí rey David la ko janhan tí konotsé itji tí chjina t'inkáséyan.

¹⁷ Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enxín nta tjinkaon nta la chrók'ui tí nta tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé antsí sinchekjasóte tí jehe sín tsoníhi sín éxí nixja tí libro i. ¹⁹ A ntá jnkojìn nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro ts'ínixín ihnié tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

²⁰ A ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Inchéni Jesús!

²¹ Inchéni Jesucristo mé sincheyaonrá kaín rá. Amén.